


Mbia Cheẽ



New Testament in Sirionó (BL:srq:Sirionó)

Mbia Cheẽ
New Testament in Sirionó (BL:srq:Sirionó)

copyright © 1977 Wycliffe Bible Translators, Inc.

Language: Sirionó

Translation by: Wycliffe Bible Translators, Inc.

Sirionó [srq], Bolivia

Copyright Information

© 1977, Liga Bíblica Mundial del Hogar. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Sirionó

© 1977, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 4 Mar 2019 from source files dated 20 Jul 2017
eb2687f2-4654-5d43-8ec2-3ee35e8a435e

Contents

SAN MATEO	1
SAN MARCOS	45
SAN LUCAS	71
SAN JUAN	117
HECHOS	150
ROMANOS	195
1 CORINTIOS	216
2 CORINTIOS	235
GÁLATAS	247
EFESIOS	254
FILIPENSES	261
COLOSENSES	266
1 TESALONICENSES	271
1 TESALONICENSES	275
1 TIMOTEO	278
2 TIMOTEO	284
TITO	288
FILEMÓN	291
HEBREOS	292
SANTIAGO	307
1 PEDRO	312
2 PEDRO	318
1 JUAN	321
2 JUAN	326
3 JUAN	327
JUDAS	328
APOCALIPSIS	330

EL SANTO EVANGELIO SEGÚN SAN MATEO

Jesucristo i ñiinda ameí

¹ Ñ dei Jesucristo i ñiinda ã. David rei ei tuchi. Abraham abe no.

² Abraham ndei Isaac ndu. Isaac ndei Jacob ndu no. Jacob ndei Judá ru no. Judá nongue abe ru. ³ Judá rei Fares ndu. Zara ru abe no. (Tamar rei ũquĩsi.) Fares ndei Esrom ndu. Esrom ndei Aram ndu. ⁴ Aram ndei Aminadab ndu. Aminadab ndei Naasón ndu. Naasón ndei Salmón ndu. ⁵ Salmón ndei Booz ndu. (Rahab ndei esi.) Booz ndei Obed ndu. (Rut rei esi.) Obed ndei Isaí ru. ⁶ Isaí rei David ndu. David ndei ererecua. David ndei Salomón ndu. (Urías ninisi rei esi.) ⁷ Salomón ndei Roboam ndu. Roboam ndei Abías ru. Abías rei Asa ru. ⁸ Asa rei Josafat ndu. Josafat ndei Joram ndu. Joram ndei Uzías ru. ⁹ Uzías rei Jotam ndu. Jotam ndei Acáz ru. Acáz rei Ezequías ru. ¹⁰ Ezequías rei Manasés ru. Manasés rei Amón ndu. Amón ndei Josías ru. ¹¹ Josías rei Jeconías ru. Jeconías nongue abe ru. ũquĩ ngue siqui abae judíos rerao mose Babilóniaa nda.

¹² Jeconías rei Salatiel ndu no. Salatiel ndei Zorobabel ndu. ¹³ Zorobabel ndei Abiud ndu. Abiud ndei Eliaquim ndu. Eliaquim ndei Azor ndu. ¹⁴ Azor ndei Sadoc ndu. Sadoc ndei Aquim ndu. Aquim ndei Eliud ndu. ¹⁵ Eliud ndei Eleazar ndu. Eleazar ndei Matán ndu. Matán ndei Jacob ndu. ¹⁶ Jacob ndei José ru. José quia María quereco nguiã. María rei Jesús si. Cristo, i equia ee.

¹⁷ Nyebe cator ce generaciones jaaja. Sã Abraham nane siqui no. David siqui mose, catorce generaciones cote. Abae judíos rerao mose Babilóniaa, catorce que aque abe mose cote ra. Cristo nyaacuquia mose que catorce aque mose cot e no nda.

Jesucristo nyaacuquia mose

¹⁸ Jesucristo chaacuquia tasenei na jêje. María rei esi. María que siquichõ ndei quia José ninisirã nda. Nyucuaaque ru eã ngue siqui rei ra. Nguirĩ ngue eteachõ nguẽ ye ra. Siquiã ndaque José rese. Espíritu Turã ae que eririĩ mondo erie ye ra. ¹⁹ José turãte que eriqui rei ra. Eireĩte que eriqui mae María rio rese ra. —Seninisirã eã nda cote reae. Ahui rei ra esi mbia mbiiranua ndeae, i rei que ndua ndua uchi angui re ra. María siqui reĩ nguia emo ndese ee reaẽ. ²⁰ José que ndua ndua quia erese ra. Ndua ndua mose que ángel mo ndu eque re cuu ra. Angel que ñee ee ra. —David ririĩ ño nde re. María eisi turã ño neninisirã. ¡Ndeireĩ nguíã ño jê! Emo ngue siqui ãte quia erese ra. Espíritu Turã ae que eririĩ mondo erie ye ra. ²¹ Nguirĩ nda etea. “Jesús” ere chõ eririĩ je. Ae quia ra mbia sirõ tuchi eicuã si, i que ángel ñee José je cuu ra. ²² Eĩ nda Dios cheẽ io cote. Ae Dios cheẽ mbuchecuaa mbesa cose nae, ũquĩ nda io cote. Ñ dei embesa ji ã:

²³ ¡Sã jê! Nyucuaaque ruã nda nguiriĩ tea.

Emanuel, i ra eririĩ je.

Dios riqui nanderese co, i ñi Emanuel nde, i que embesa ji cose ra.

²⁴ José que ñnumba cote ra. Angel cheẽ ndui si que María rerequia turã cote ra.

²⁵ José que siqui eã mbei erese ra. Nguirĩ ndea chee. Jesús i que José eririĩ je ra.

2

Mbia aquiatu nyoí Jesús itãquieĩ ndea

¹ Jesús que nyaacuquia Belén nda. Judea, i que hue ibi je ra. Herodes rei hue jenda mbia rerecua Jesús nyaacuquia mose. Mbia aquiatu mo ngue ngaẽ huee ra. Tenda semba si que ecuaẽ Jerusalén nda. ² ũquĩ ngue ñee ngaẽ judíos je ra. —¿Mangue judíos rerecua mangue re? Ae nyaacuquia ramo nae ¿mangue mangue re? Uremae ngue nyasitata embae rese ra. Ureico mose ure récuaa. Nyebe urechu nguiã erea co. Urecoi rã urenia ndese ñee ee. ¿Ma eriqui ma nde? i que mbia aquiatu ñee judíos je ra. ³ Herodes que

jirandu erese ra. “Judíos rerecua nyaacuquia” i mose, Herodes que pare pare i tuchi quia ra. Siqui turã eã cote. Jerusalén jenda abe que ndua ndua jate quia erese ra. ⁴ Herodes que “jenyu” i sacerdote rerecua ja je ra. Embesasa ja je abe que “jenyu” i ra. —¿Mangue ra Cristo nyaacuquia mangue re? “Hue ra nyaacuquia” ¿i embesa ji re? i que Herodes ñee ee ra. ⁵ Ûquĩ ngue ñee Herodes je ra. —Nyaacuquia ra Belén de Judea. I que embesa ji ra:

⁶ Sucha ñetẽ tuchi rei Belén.

Belén de Judea.

Mbia chiicua tuchi ra Belén cote.

Hue jenda mo nda mbia rerecuarã tuchi cote.

Ae ra serimba Israel jenda teaquiato tuchi quia cote,

i que Dios cheẽ embesa ji ra, i que sacerdotes ñee Herodes je ra.

⁷ Nyebe Herodes “jenyu” i nguiã ùquĩ mbia aquiato je. Ñee ngue ùquĩ ísaa ra. —¿Manosete nyasitata embae rese jemae nde? i que ñee ee ra. ⁸ Herodes que ùquĩ mbia aquiato mondochoi Belén cote ra. —Jẽso Belén. Nyaacuquia ramo je rese jẽirandu tuchi. Jẽ erea mose, sembiirandu se. Ñ nda se abe aso mae erese. Ñ nda acoi senia ndese se abe ñee ee, i rei que Herodes ñee ee ra. ⁹ Mbia aquiato que nyoĩ cote ra. Ae nyasitata rese eriqui mae nyii nae, aque nyasitata que oso bei quia mbia rẽta ra. Tiba que ee Belén arõ cote ra. ¹⁰ Nyebe mbia aquiato ia tuchi nguiã mae mose nyasitata tiba rese cote. ¹¹ Mbia aquiato que ique tuchúaa cote ra. Huee que ãquẽ itãquieĩ ndiqui ee cote ra. Usi rese. María, i equia ee. Ngoi que ngũiã ndese eitãquieĩ je cote ra. Ñee turã ngue ee ra. Mbae que esirõ mondo Jesús je cote ra. Oro. Mbae mbushimbusa abe no. Mirra abe no. ¹² Dios que ñee mbia aquiato je cote ra. —Jẽsochĩ nda ñee Herodes mbiirandu jẽ, i que Dios ñee ee cuu ra. Nyebe echoi nguiã Herodes abi nguécuaa.

José nyoĩ uchã Egíptoo

¹³ Aquere que Dio s ángel mo mondo ñee José je ra. Ñee ngue ee cuu ra. —Herodes ra eitãquieĩ sequia sequia. Iquia serĩte equia co. Jẽso uchã. ãquẽ jendao sunuña Egíptoo. Esi rese. Huee jẽingochõ. Acheẽ jee ra ndeje huee, i que Dios ñee José je ra. ¹⁴ José que ñumumba juã cote ra. ãquẽ ngue ecuruchoi isa usi rese ra. Nyoĩ que Egípto quti ra. ¹⁵ Chi arete que Egíptoo ra. Ererecua Herodes que mano cote ra. Dios cheẽ ngue ique cote ra. Eĩ ngue Dios cheẽ embesa ji ra:

Seriirĩ ngue aru Egípto si ra,

i que embesa ji ra.

Herodes ãquẽ itãquieĩ iquia ja

¹⁶ Herodes que paama i tuchi cote ra. —Mbia aquiato sembiirĩ irĩ ñochĩ. Nyebiã ñochĩ ecuaẽ ñee seje, i que ra. Nyebe que soldados mondo mbia riirĩ nacue iquia ja cote ra. ãquẽ itãquieĩ ngu e eiquia iquia ja quia Belén jenda ra. Hue rurubinda ja abe no. Ngata ramo je abe iquia ja. Nyasitata nyecua quia mbia je nae, aque mosenda ãquẽ itãquieĩ iquia ja. ¹⁷ Herodes ùquĩ iquia mose que Dios cheẽ ique cote ra. Ae Jeremías mbesa quia: ¹⁸ Mbia Ramá jenda nyeseo tuchi.

Eya eã tuchi nguiirĩ ndese.

Emo embia aroneãte.

Eriirĩ nguia mano jate nguiã ee, i que embesa ji ra.

¹⁹ José chi mose Egípto que Herodes mano nyee ra. Nyebe Dios ángel mo mondo nguiã ñe e José je. ²⁰ —José, echumumba rã. Jẽso Israel cote. ãquẽ abe erao. Esi rese. Ae ãquẽ iquia serĩte quia nae, ùquĩ ngue mano cote ra, i que ángel ñee José je cuu ra. ²¹ José que ñumumba cote ra. Nyoĩ que nyebi Israel quti cote ra. ãquẽ ngue equerao esi rese ra. ²² Herodes riirĩ ngue siqui Judea jenda rerecuarã cote ra. Arquelao, i que ee ra. José jirandu mose erese que esiquiche cote ra. Oso sereãte que huee cote ra. Dios que ñee ee cuu ra. Nyebe esi nguiã Galilea cote. ²³ Sucha tubiriã mo ngue chi Galiléaa ra. Nazaret, i

que hue je ra. José que nyoï bei hue, hue jendarã cote ra. Nyebe Dios cheẽ mbesa ji ique nguiã cote. Ì ngue Dios cheẽ nda: Nazaret jenda ra Jesús, i que Dios cheẽ nda.

3

Juan el Bautista Dios chẽ senei senei

¹ Emo mose que Juan el Bautista Dios cheẽ nenei nenei mbia je cote ra. Dios cheẽ ngue esenei senei nguia mbia je turúquiaa ra. ²—Jendua si jẽicuã ndese. Jendua si Dios rese. Dios ra tu mbia rerecuarã tuchi cote, i beite que Juan nguia ñee nda. ³ Sã Isaías embesa nyii no:

Emo ndiqui ñeemombo mombo turúquiaa huee.

“Sã emo ndiqui ñeenda mbuquiche no, eĩ jenyẽ si chõ nguia jẽ abe icoquiato nanderere-cua je”, i equia turúquiaa hue,

i que Isaías embesa ra. Juan ñii si que embesa ra. ⁴ Quiicuã mbuaera chõ ngue Juan irao ra. Mbae ire chõ ngue enumbicuasa no nda. Tucu mbuae chõ ngue eu quia no nda. Irao quiaa riinda abe. ⁵ Jerusalén jenda que ngaẽ ngaẽ tuchi quia echeẽ andu ra. Judea jenda abe no. Ama Jordán nimia nduinda abe no. ⁶ Mbia huiicuã nenei nenei mose Dios je, ùquĩ mose que Juan ndiqui bautizar i ee ra. Ama Jordán ye.

⁷ Fariseos tubiriã abe que ngaẽ ngaẽ tuchi quia Juan ndea ra. Saduceos tubiriã abe no. Juan ngue ñee asite ùquĩ je ra. —Mbei rã ño jẽingo nguiã ã. Mbae icuã nda tu mbia je nae, ¿ùquĩ ñii ño jenyu quia uchã serea co re? ⁸ Jẽ mbae icuã ndecha mose Dios je, mbae turã jẽsaã saã mbei quiatu quia ee cote. ⁹ “Abraham ndiirĩ nducucha chõ nande re. Nyebe ra Dios nandemingo bei” jjenyechĩ nda jẽ! Dios Abraham ndiirĩ nducucha chao arõte raque sita je. ¹⁰ Ira rã si chõ mbia riqui nguiã ã. Sã ira mo ndiqui ia turã no. Sã emo ndiqui ia eã no. Aque quia ra mbia maña cote. Erei sacuã. Eĩ serĩ serĩ ño Dios nguiã mbia je co, mbia mbae turã naa eã mose.

¹¹ I je chõ aico nguiã bautizar i mbia je co. Jẽ ndua ndua si mose Dios rese. Co chi emo ndu quia serui co. Ae quia equirãcuã tuchi sesi re. Ae quia eturã tuchi sesi re. Ae quia ra bautizar i mbia je Espíritu Turã je. Mbia chiã mbitirõ sacuã. Sã tata riqui mbae mbitirõ no. ¹² Ae ra mbia umbae miĩ icúe. Eturã achõ ño embae re. Ae embae eã nae, ùquĩ nda eséi cote. Ùquĩ ndeisa ra ua eã mbei tata. Sã mbia quiata a chiqui chiqui no. Sã ea miĩ icúe no. Sã echuruique mombo tátaa no, i que Juan ñee mbia je ra.

Juan bautizar i Jesús je

¹³ Jesús que tu Galilea si cote ra. Tu que Juan ndea Ama Jordán nda. Juan bautizar i sacuã ee. ¹⁴ Juan ngue teã teã ndei ee ra. —¿Mañi ae ra bautizar i ndeje re? Nde chõ bautizar ere seje ae, i rei que Juan ñee Jesús je ra. ¹⁵ Jesús que ñee ee ra. —Bautizar ere rei seje. Dios cheẽ ndui si mbae nandesaã turã ja quia, i que Jesús ee ra. Juan ngue eno i chee ee ra. ¹⁶ Juan ngue bautizar i ee ra. Jesús que usẽ oso ama si cote ra. Ibei que nyiequia ee cote ra. Espíritu Turã ngue nguichi nyurushi rã nda. Nguichi que eu Jesús rese ra. ¹⁷ Ibei jenda que ñee nda. —Seriirĩ ño co re. Sechesequa chõ co re. Seyate erese, i que Dios ñee Jesús je ra.

4

Jesús tambũicuã, i raque Satanás

¹ Turúquiaa que Espíritu Turã Jesús rerao ra. “Tã tae Jesús je”, i sacuã diablo Jesús je. ² Huee que Jesús riqui arete ra. Cuarenta días. Mbae mo ngue eu eã mbei aque mose ra. Eriãcuãte que cote ra. ³ Aque mose tuchi que diablo si ee ra. Embũicuã sacuã. —Nde Dios riirĩ mose, mbichae esaã ã sita je. Ì nda ereu, i rei que diablo ñee ee ra. ⁴ Jesús que ñee ee ra. —Tei. Sã embesa ji ñee no: “Mbia chiũ achõ nda mbia mingo eã. Dios cheẽ nguia ra mbia mingo nguiã”, i que embesa ji ra, i que Jesús ee ra. ⁵ Aquere que diablo ererao Jerusalén nda. Querao que suruchui ibate Dios chuchua arõ nda. ⁶ Ñee ngue Jesús je ibate

ereco mose ra. —Nde Dios riirĩ mose, eo oso íbii no. Dios ra ndereaquiatu. Sã embesa ji riqu i ñee no:

Dios ra ángeles mondo ndereaquiatu sacuã.

Oje ra ndeisi. Nembuquichi mingue rae.

Sita ra cua iã ndei je,

i que embesa ji ra, i rei que diablo ñee Jesús je ra. ⁷ Jesús que ñee diablo je ra. —Sã embesa ji ñee no: “Ma Dios sereaquiatu. Tã tae ee no’, jenyechĩ nda Dios je”, i ñi Dios cheẽ nde, i que Jesús ñee diablo je ra. ⁸ Aquere que diablo ererao ibi ibate mo nda. Ibate tuchi ererao cote. Diablo que ibi teacuquia ja ee ra. Ishonda abe reacuquia ja ee. ⁹ Diablo que ñee ee ra. —Sembae ja chõ ibi re. Ibi turã ja. Ndeico mose serese, tamondo ja ndeje. Serimbarã mose nde, tamondo ja ndeje, i rei que diablo ñee Jesús je ra. ¹⁰ Jesús que ñee ee ra. —Quiatúae sesi ae, Satanás. ¿Mañi nda se nderimbarã nde? “Dios ae rese chõ jeingo”, i que embesa ji ñee ndesẽ, i que Jesús ee ra. ¹¹ Diablo que oso erecha cote ra. Angeles que ngaẽ Jesús reaquiato cote ra.

Jesús mbia mbaaquiatu quiatu ramo

¹²⁻¹³ Aque mose que mbia rerecua Juan tarõ cárcel nda. Jesús jirandu mose etarõ ndese que esi Galilea cote ra. Nazaret, i que sucha tubiriã je ra. Aquere que esi siri Capernaum cote ra. Ama ndisha ji. Zabolón abe ji. Neftalí abe ji. Huee que Jesús si siri ra. ¹⁴ Isaías chimbesa Dios cheẽ ngue ique cote ra. Jesús siqui mose huee. Eĩ ngue Isaías embesa cose ra:

¹⁵⁻¹⁶ Mbia hue jenda ja que siqui itondáruu nyii ra.

Zabolón jenda. Neftalí jenda.

Ama ndisha ji jenda.

Ama Jordán ndobeinda.

Ae judíos eã Galilea jenda nae, ñquĩ abe no.

Ñquĩ mbia que siqui ja rei itondáruu nyii ra.

Nyaashĩ ngue tu ee cote ra,

i que Isaías embesa ra. ¹⁷ Aque mose bei chõ ngue Jesús riqui ñee mbia je cote ra. —Jendua si Dios rese. Mbia rerecuarã tuchi ra Dios namo jiri, i que Jesús quia ñee mbei mbia je cote ra.

Jẽingo serui, i Jesús uchimbbaaquiatuã je

¹⁸ Emo mose que Jesús si quia ama nimia ndui ra. Ama Ndisha Galilea. Huee que mae Simón Pedro rese ra. Enongue rese abe que mae nda. Andrés, i equia ee. I que eu sira mbuasa mondo mundo ii ra. Sira resenda bei rei ñquĩ. ¹⁹ Jesús que ñee ee ra. —¡Serui bei chõ jẽingo jẽ! Taembbaaquiatu quiatu. Mbia teendu endu bei quia seje cote, i que Jesús ee ra. ²⁰ Nyoĩ ja que erui ra. Sira mbuasa si que echoi hui ra. ²¹ Pe jiri que mae Jacobo rese ra. Enongue rese abe. Juan, i equia ee. Eru abe que siqui erese ra. Zebedeo, i equia ee. Huee que echi ja canoa ye sira mbuasa mbitirõ tirõ nda. —Jẽingo serui, i que Jesús Jacobo je ra. Juan je abe. ²² Jesús cheẽ nduibe tuchi que echoi erui ra. Canoa ndecha. Ngu abe recha.

Jesús mbia tubiriã mbaaquiatu

²³ Jesús que ngata tuchi quia Galilea rĩ nda. Mbia que embbaaquiatu quiatu quia mbia chumunua nuásaa ra. Dios cheẽ turã ngue esenei senei nguia ee ra. Mbia rasi chumumbara que embucherõ cherõ nguia ra. ²⁴ Mbia Siri a jenda que jirandu tuchite chee erese ra. Nyebe eriqui nguia erasi rurucuaẽ cuaẽ jate ee. Erasi chumumbara. Mbia aba checuayã nyireco abe no. Mbia quiachã quiachã je abe no. Mbia umi sayã je abe no. Jesús que embucherõ cherõ ja quia ra. ²⁵ Mbia tubiriã tuchi que siqui Jesús rui cote ra. Galilea jenda. Decápolis jenda abe no. Jerusalén jenda abe no. Judea jenda abe no. Ama Jordán ndobeinda abe no. Uquĩ jenda siqui ja Jesús rui.

5

Jesús mbia mbaaquiату quiatu ibi ibate

¹ Mbia tubiriã ngu e chi Jesús rese ra. Nyebe Jesús nyui nguiã ibi ibate mo ndese ra. Ngoi que huee ra. Echimbaaquiату que esiichã ngaẽ nda. ² Jesús que embaaquiату quiatu ra.

Ae eyate riqui

³ Eĩ ngue ñee ee ra:

—Ae siqui mingue quia nae, eya chõ ùquĩ nde. Ûquĩ nda siqui Dios rese.

⁴ Ae nyeseo quia nae, eya chõ ùquĩ nde. Dios ra embia tuchi.

⁵ Ae eseteãte riqui nae, eya chõ ùquĩ nde. Ibi ja ra embae cote.

⁶ Ae siqui turã sete quia nae, eya chõ ùquĩ nde. Dios ra embucuata turã nguia.

⁷ Ae eya eãte riqui mbia rese nae, eya chõ ùquĩ nde. Dios ia eãte ra ùquĩ ndese.

⁸ Ae echiã turãte riqui nae, eya chõ ùquĩ nde. Ûquĩ nda mae Dios rese.

⁹ Ae mbia mingo turã nguia nyiese nae, eya chõ ùquĩ nde. “Seriiri” i ra Dios ùquĩ je.

¹⁰ Mbia icuã icuã mose jëturã je, jëya tuchi rae. Jenderecua tuchi chõ Dios riqui nguiã co.

¹¹ Mbia ñee icuã mose jëje seriĩ, jëya tuchi rae. Mbia icuã icuã mose jëje seriĩ. Mbia ñee ñooño mose jeniĩ, jëya tuchi rae. ¹² Jeñimbia chõ nguia ùquĩ mose. Dios quia ra mbae turã tuchi mondo jëje ibate. Mbia icuã icuande jëje nyii. Eĩ ngue mbia icuã icuã nguia Dios rimba je nyii no nda.

Tata rendi rã ndei Dios quiato

¹³ Embiquesa rã ño jëingo nguiã mbia je ã. Sã embiquesa turãte no. Eise quiachamba mose, eicuã tuchi ra cote. Mbia ra emombo chõ cote. Mbia ra irõ ño erese. ¹⁴ Tata rã ño jëingo nguiã mbia Dios quiatoã je ã. Mbia sucha cuasu raã mose ibi ibátee, mbia ra mae ja erese. ¹⁵ Sã nandeico lámpara mendi no. Sã nandeico eati eã no. Sã nandeico emii eã mbaequi re no. Erendi checua chõ nda nandemii nguiã. Mbia resae ja sacuã. ¹⁶ Eĩ jenyee si chõ nguia tata turã na. Mbae resae turã mbia je. Eĩ jenyee mose ra mbia mae jëturã ndese. Ñee turã nda jendu ibatenda je cote.

Jesús mbia mbaaquiату quiatu Moisés chimbesa rii

¹⁷ Dios cheẽ ique ja sacuã ño achu nguiã co. Moisés cheẽ mbutiã sacuã eã ño ngue achu nguiã. Dios cheẽ mbuchecuasa cheẽ mbutiã sacuã eã ño ngue achu nguiã. ¹⁸ Tacheẽ nyecua jëje. Moisés cheẽ nda ique ja. Ibei ra ua. Ibi abe ra ua no. Moisés cheẽ nguia ra ua eã mbei. Ique ja chee rae. ¹⁹ Dios cheẽ tubiriãte raque mbia je, mbia echeẽ mumbayã sacuã. Emo echeẽ mii mumba mose, Dios biãte ra ùquĩ, Dios siqui mose ererecuarã tuchi cote. “Dios cheẽ mii emumba”, i mose emo, Dios biãte ùquĩ. Ae echeẽ mumbayãte quia nae, Diosbi tuchi chõ ùquĩ nde. Ae ñee nguia mbia je nae, “Dios cheẽ jemumbayã ja” i quia mbia je nae, Diosbi tuchi chõ ùquĩ nde. ²⁰ Tacheẽ nyecua jëje. Fariseos uturã saã saã tuchi raque. Embesasa abe uturã saã saã tuchi raque. ¡Jë nguia jëingo turã tuchi ùquĩ si jë! Jë jëingo turã eã mose ùquĩ si, jëingo eã nda Dios rese, Dios siqui mose mbia rerecuarã.

Paama jenyechi nda emo je, i Jesús

²¹ Amei ñee ngue jeñandu rei ra. “Mbia mo nda ereiquiachĩ. Nde mbia mo iquia mose, nde abe ra mbia ndeiquia arõte”, i rei que amei nda. ²² Se quia tacheẽ nyecua jëje. Jë paama i chooño mose jenongue je, mbia ra jeiquia arõte. “Ndeaquiatuã nde” jenyee mose jenongue je, mbia ra jëiquia arõte. “Ndearacuayã nde” jenyee mose jenongue je, jëso arõte ra tata cuasu. ²³⁻²⁴ Nembae ofrenda rerao mose Dios je, endua rã nyii, emondo nonde ee. Ndenongue mo paama i mose ndeje, ofrenda esecha rã oso ñee ndenongue je. Jeñimbuturã na nguia nyii. Aquere quiatu eso nyebi ofrenda mee Dios je cote. ²⁵ Emo mbia rerecua mbuqueta queta mose nderiĩ, ndeturã ño ee. Echeẽ turã ño ee. Jë ae chõ

jeñimbuturã jenyue. Ì nda ndererao icuã eã. Ndererao mose ra ndetarõ mbei cárcel.
²⁶ Huee ra ereico bei. Nembae mondo ja tuchi chee ee.

Emo mae mose cuña mo ose ose, adulterio i ùquĩ je

²⁷ Amei ñee ngue jeñandu rei ra. “Emo ninisi rese ra jëingochĩ”, i rei que ra. ²⁸ Se quia tacheẽ nyecua jêje. Emo mae icuã mose cuña mo ndese, “aque rese nda aico raã ña” i mose, ùquĩ abe eicuãte. Siqui raanguia erese chõ ùquĩ nde. ²⁹ Nderesa mae mose mbae icuã ndese, echoo mombo. Nderesa nemingo serĩ mose mbae icuã nde se, echoo mombo. Coche nderesa miĩ eremombo nguiã. Ì nda nderete osoã tata cuásuu. ³⁰ Ndeo nemingo mose mbae icuã ndese, echisia mombo. Coche ndeo mombo nguiã. Ndequiato cutinda raque. Ì nda nderete osoã tata cuásuu.

Jeninisi ra jemombochĩ jê, i Jesús

³¹ Amei ñee ngue jeñandu rei ra. “Emo ngüinisi mombose mose, sã emombo chõ. Papel mbesa ji emondo ee”, i rei que amei nda. ³² Se quia tacheẽ nyecua jêje. ¡Jeninisi ra jemombochĩ jê! Jeninisi siqui mose emo ndese, ùquĩ mose miĩ ño jeninisi jemombo arõte raque. Jê emombo chooño mose, jëingo jeninisi mingo adulterio rese ùquĩ. Ae emombo ji quereco cote nae, ùquĩ abe eicuãte no. Adulterio, i chõ ùquĩ je re.

Jurar jenyê jirichĩ nda jê

³³ Amei ñee ngue jeñandu rei ra. “Jurar jenyê mose Dios je, jeñee nda jembuchebichĩ ee”, i rei que amei nda. ³⁴ Se quia tacheẽ nyecua jêje. ¡Jurar jenyê eã mbei tuchi jê! Ibei riĩ abe jurar jenyê eã jê. Dios recua chõ ibei re. ³⁵ Ibi riĩ abe jurar jenyê eã jê. Dios ironguia chõ ibi re. Jerusalén niĩ abe jurar jenyê eã jê. Dios mbae tuchi chõ Jerusalén nde. ³⁶ Jeãquĩ niĩ abe jurar jenyê eã jê. Jêa miĩ mo jembushĩ aroneate. Co miĩ jemondei aroneate no. ³⁷ ¡Jurar jenyê eã jê! “Ae” jenyê chõ. “Tei” jenyê chõ. Ùquĩ miĩ ño jeñee. Jurar jenyê mose, eicuãte ùquĩ.

Emo icuã mose jêje, jêturã ño ee

³⁸ Amei ñee ngue jeñandu rei ra. “Emo nderesa mungue mose, nde abe aque resa emungue. Emo ndererĩ siquio mose, nde abe ereĩ esiquio”, i rei que amei nda. ³⁹ Se quia tacheẽ nyecua jêje. Mbae icuã nda jësaãchĩ mbia icuã je. Emo ucua mose nderitii rese, nderitii ribisho abe eteacuquia ee. ⁴⁰ Emo demandar i mose ndeje, “nembae camisa emondo seje” i mose, emondo chõ ee. Ndeirao nongue abe emondo ee. ⁴¹ “Sembae mbae usi erao jiri seje”, i mose emo ndeje, peebe jiri erao ee. ⁴² Emo ache ache i mose ndeje, emondo ee. “Mbae mo prestar ere seje” i mose emo, emondo ee.

⁴³ Amei ñee ngue jeñandu rei ra. “Ae eturãte riqui ndeje nae, echesequa erese. Ae ndeucuãyã nguia nae, nde abe eucuãyã” i rei que amei nda. ⁴⁴ Se quia tacheẽ nyecua jêje. Echesequa chõ ndeucuãyãsa rese. Mbae turã esaã ño nguia ee. Ae ñee icuã nguia nderiĩ nae, echeẽ turã ño nguia nde ee. Ae eicuãte riqui ndeje nae, ùquĩ niĩ eico ñee turã Dios je. ⁴⁵ Eĩ jenyê mose ra Ibatenda riirĩ turã tuchi jê. Dios quiarei eturã mbia ja je. Mbia turã je. Mbia icuã je abe no. Dios quiarei tenda mbusẽ turã mbei mbia turã je. Eicuã je abe no. Dios quiarei ama mbuchaaqui turã mbei mbia turã je. Eicuã je abe. ⁴⁶ Ae eturãte riqui mbia jêje nae, ùquĩ achõ je jêturã mose, eicuãte ùquĩ. Mbia icuã abe mbae turã saãte uquiato achõ je. Eĩ jenyechĩ nda jê. ⁴⁷ Jêquiato achõ je jeñee turã mose, aba biãte ùquĩ. Eĩ ño Dios quiatoã abe nguiã ñee turã uquiato je. ⁴⁸ Jê nguia jëingo turã mbei mbia ja je. Sã jendu Ibatenda turã mbei riqui no.

6

Mbae turã jësaã nyecuayã ño nguia

¹ “Sã mbia mae ja sechiao turã ndese”, jenyechĩ nda mbae turã naa mose. Mbia rësaa achõ nda mbae turã jësaã saãchĩ jê. Ùquĩ jësaã saã mose ra jendu Ibatenda mbae turã

mee eã jêje. ² Jêingo mose mbae mee mee mbaecha reã je, jemondo checuayã ño nguia ee. Mbia mbiirandu randu eã. Ae uturã saã saã nguia nae, ùquĩ na nda jêingochĩ. Dios ra mbae turã mee eã ùquĩ je. “Sã mbia mae ja sechiao turã ndese”, jenyechĩ nda jê. ³ Mbae turã jêsaã mose, jêsaã mingue chõ. ⁴ Mbae turã jêsaã nyecuayã ño. Jêingo mose mbae turã naa naa nyecuayã, Dios ae ra mae jêturã ndese. Ae quia ra mbae turã mee nyecua jêje cote.

Eĩ jenyechõ ñee Dios je, i Jesús

⁵ Jeñee mose Dios je, jeñee mingue chõ nguia ee. Uturã naa naasa rã nda jêingochĩ. Ùquĩ ndiqui nyo choi mbiásaa ñee sacua Dios je ùquĩ. “Sã mbia mae ja serese secheẽ mose Dios je”, i equia ùquĩ. Mbia riqui mae jate raque erese. Dios quia ra mbae turã mee eã ee. ⁶ Nde ñeese mose Dios je, nde ae chõ echeẽ nguia ee ndechuchúaa. “Sa mbia mae ja serese”, erechĩ nda jê. Nde a e chõ echeẽ nguia ee. Dios ae ra siqui nderese. Dios ae mbae icua ja nguiã. Ae quia ra mbae turã mee ndeje cote.

⁷ Nde ñee mose Dios je, hue rĩ beite ra ereicochĩ ñee ee. Eĩ ño Dios icuasa reã nguiã ñee ndaque Dios je. “Hue rĩ urecheẽ mbei mose ra Dios ureandu”, i rei nguiã. ⁸ Ùquĩ na nda jêingochĩ. Ae mbae ãte riqui jêje nae, ùquĩ Dios icuate quia co. Jeñee nonde ee. “Mbae embu ure je”, jê i nonde ee. ⁹ Eĩ jenyechõ nguia ñee Dios je:

Paba Ibatenda, sã mbia ñee turã mbei quia nderĩĩ.

¹⁰ Mbia rere cuarã ja sacua echu jei íbii.

Sã mbia ibatenda riqui siqui beite ndebi rese no.

Sã mbia ibi jenda abe riqui ndebi rese.

¹¹ Ae ra ureu namo, ùquĩ embu rã urechiurã.

¹² Ae uresaã icua icua ndeje nae, ùquĩ embutiã ná uresi. Sã ureico tesarei mbia icua icua mose ure je no.

¹³ “Mbae icua jêsaã” jichĩ nda emo ure je jê!

Urereaquiato bei quia mbae icua si.

Nde miĩ ño mbia rerecuarã nde.

Nde miĩ ño ndequirãcuã nde.

Nde miĩ je mbia ñee turã sacua mbei. Amén.

Eĩ jenyechõ ñee Dios je. ¹⁴ Mbia icua icua mose jêje, jêtesarei chõ esi. Eĩ jenyechõ mose ra Dios Ibatenda abe jeicuã mbutiã jêsi. ¹⁵ Jêtesarei eã mose mbia icua si, Dios abe ra jêicuã mbutiã eã jêsi.

“Sã mbia mae ja serese” jenyechĩ nda hui mose jenyiu si

¹⁶ Jenyiu si jêhui mose Dios je, “sã mbia mae jate seyayã ndese”, jenyechĩ nda ñee. Jendesa ia eã techĩ nda aque mose jê. Eĩ ño uturã naa naasa nguiã. Mbia nda mae ja rei nguiã erese. Dios quia ra mbae turã mee eã ee. ¹⁷ Ndehui mose ndechiu si Dios je, ndeya chõ eico. ¹⁸ Sã mbia jiranuã nderiãcuã ndese. Sã Dios ae jirandu nderiãcuã ndese. Dios quia mbae icua jate nguiã. Ae quia ra mbae mee ndeje cote.

Jembaerã ibatenda rese quia jêingo ndua ndua

¹⁹ “Mbae turã tamunua nu a sembaerã aa íbii”, jenyechĩ nda jê. Chicuaquiareĩ nda eu arõte. Emo embuquiachã arõte jêsi. Eichoi arõ ndete no. ²⁰ Ibate quia mbae jemunua nua jembaerã. Ibate quia ra chicuaquiareĩ eu eã. Ibate quia ra jembaerã ichoi eã mbei. Ibate quia ra emo embuquiachã eã jêsi. ²¹ Jembaerã chi mose ibate, Dios rese ra jêingo ndua turã. Jembaerã chi mose íbii, ibi jenda miĩ ndese ra jêingo ndua.

Nanderesa mbae resae nanderete je

²² Nanderesa quiarei mbae resae nanderete je. Nanderesa turã mose, nanderete abe ra oso turã. ²³ Nanderesa icua mose, nanderete abe ra oso icua icua no. Tat a rendi rã jêingo bei. Ùquĩ mose ra jêingo jiri jiriã itondáruu.

Mbae isiquia Dios quiato eã

²⁴ Erimba mii mo siqui aronea ererecua nyeremo ndese. Ererecua nyeremo mose, huee ra erimba ererecua nongue ucuayã. Ererecua nongue ra ebite. Eĩ si chõ mbia re. Ae ndua beite quia mbae isiquia rese nae, ùquĩ siqui aroneate Dios rui. Ae siqui beite quia Dios rese nae, ùquĩ nguiarei ndua eã jiri mbae isiquia rese.

Dios uquiato teaquiato bei

²⁵ “¿Mbae ra nandeu re?” jenyechĩ nda quicoi coi jẽ. “¿Ma tiru ra nandemingue re?” jenyechĩ nda quicoi coi no jẽ. Mbia chiũ ae ra mbia mingo eã. Mbia irao abe ra mbia mingo eã no. ²⁶ Sã nguireĩ no. Mbae tiquiyã ndaque. Mbae ishao eã ndaque no. Mbae ruacuã eãte raque embae no. Dios ae quiarei embuquiaru quiaru bei. Jẽ nguiarei Dios queteamba tuchi nguireĩ si. Dios ae jembuquiaru nguiã jẽ no. ²⁷ Mbi a ae ra tiarõ eã. “Se ra atiarombe”, i raque ndua ndua uchiangui re. Dios ae mbia mbutiarõ nguiã. ²⁸ “¿Ma tiru ra nandemingue re?” jenyechĩ nda pare pare i jẽ. Sã mbae uti no. Sã mbae uti turãte riqui no. Mbae ao ao eã ndaque. Ninyu mburã ndirã eã ndaque. ²⁹ Dios ae chõ mbae uti mbuturã nguiã. Mbae uti quiarei eturã jiri Salomón si. Salomón turãte raque. ³⁰ Sã Dios quiata mbuturã no. Quiata mano jeite raque. ¿Mañi nda Dios jembuquiaru eã jẽ nde no? ¿Mbaerã jẽingo Dios icuayãte re? ³¹ “¿Mbae ra nandeu re?” jenyechĩ nda pare pare i jẽ. “¿Mbae ra nandembei re?” jenyechĩ nda pare pare i jẽ. “¿Ma tiru ra nandemingue re?” jenyechĩ nda eno jẽ. ³² Eĩ ño Dios quiatoã nguiã. Jẽ nguia jendu Ibatenda tesareia mbeite nguiã jẽsi. ³³ Jẽ nguia jẽingo tuchi Dios rese jendecuarã. Sã Dios turãte no. Ùquĩ na ño jẽingo. Ùquĩ mose ra Dios mbae mee mee mbei jẽje. Jeniurã. Jeñimbeirã abe no. Jẽiraorã abe no. ³⁴ “Mbae tiã ñochĩ nda seje isamami nde”, jenyechĩ nda pare pare i jẽ. Isamaminda rese ra jendua nduachĩ namo jẽ. Namonda mii ndese jendua namo no. Isamami nguiatu jendua isamaminda rese.

7

“Eicuãte que co ra”, jenyechĩ nda emo nii

¹ “Co que eicuãte ra”, jenyechĩ nda emo nii. “Jẽicuãte” iã nda Dios jẽje chã. ² Mbia icuã mose, jeñeechĩ nda ee. Jẽturã mose ee, Dios abe ra eturã jẽje. Mbae jemee mee turã mbia je. Dios abe quia ra mbae mee tuchi jẽje cote. Jẽ embisẽ mee mose emo je, Dios abe ra embisẽ mee jẽje no. ³ ¿Mbaerã jẽingo “eicuã” i emo je re? Jẽ jẽicuã tuchi mose esi. “Mbae ñetẽ ndiqui nderesaa aque”, jenyechĩ nda emo je, jẽ mbae cuasu rerequia mose jendésaa jẽ nguiatu. ⁴⁻⁵ “Mbae turã ndese chõ jẽingo”, jenyechĩ nda jẽ jẽicuã mose jẽ. “Mbae ñetẽ tasirõ nderesa si”, jenyechĩ nda mbae cuasu siqui mose jendésaa jẽ. Jẽ nguia jẽturã jẽsaã saã ñote nguiã aque. Jẽ nane nguia jẽturã ndiqui. Aquere quia jeñee emo mingo turã cote. ⁶ Sã mbia mo ndiqui perro rã si no. Teasu socoi quia rã abe no. Ùquĩ nguiarei mbia icuã mbei Dios cheẽ andure. Dios cheẽ isi teã teã. Dios cheẽ jẽsenei eã ùquĩ je cote. Emo je quia jẽsenei cote.

Jeñee mose Dios je, mbae ra emondo jẽje

⁷ Jeñee mbei mose Dios je, mbae ra emondo jẽje. Jẽ mbae mo ndequia mose, jẽtea rae. Jẽ eiquesa mbuu mbuu mose, ùquĩ mose ra embuquiata jẽje no. ⁸ Ae ñee mbeite quia Dios je nae, mbae ra Dios mondo ee. Ae mbae mo sequia beite quia nae, tea rae. Ae eiquesa mbuu mbuu quia no nae, equia ra ee no. ⁹ Jendiirĩ “mbichae embu seje” i mose, ¿sita ra eru mee ee re? ¹⁰ Jendiirĩ “sira embu seje” i mose, ¿mbei ra eru mondo ee re? ¹¹ Mbia icuã nyee mbae turã mondo mondo quia nguiirĩ je ã. Jendu Ibatenda quia ra mbae turã tuchi mee jẽje, jeñee mose ee. ¹² Sã jẽyate riqui mbia siqui turã mose jẽje no. Eĩ jenye si chõ nguia siqui turã mbia je no. Moisés chimbesa tuchi chõ ùquĩ nde. Dios quiato cose ndare chimbesa ja chõ ùquĩ nde.

Eiquesa chumumbi

¹³ Eiquesa chumumbi rĩ ño jěso ique jě. Aque ñeenda oso quia tata cuasu nae, eicoi chō aque re. Ae eiquesa ngasē nguia tat a cuasu nae, eicoi chō aque no nde. Hue rĩ mbia tubiriã ndiqui nguia ùquĩ. ¹⁴ Ñeenda nongue rui quiatu ngasē nguia Dios je. Aque ñeenda quiarei echumumbi. Echumumbi chō aque ñeenda iquesa re. Mbia mii mii ño siqui nguia aque ñeenda rui. Ûquĩ nguia ra Dios mingo bei.

Sã ira ae ia ae ae no

¹⁵ Ae Dios cheē senei ñooño nguia nae, aba mbiĩrĩ irĩsa chō ùquĩ nde. Ûquĩ ndei Dios quiato raã ñooño. Mbia mbiĩrĩ irĩsa Dios rĩ. ¹⁶ Sã ira ae e a ae ae no. Uva a rã eã nda nyu a ia no. Ea ae eno nde. Higo a rã eã nda isio rashĩ a no. Ea ae eno nde. ¹⁷ Eĩ si chō mbia no nde. Mbia turã nda siqui mbae turã ndese. Mbia icuã nda siqui mbae icuã ndese no. ¹⁸ Ira turã mose, ea abe ra eturã. Nyiabi aronea. Ira icuã mose, ea abe r a eicuã no. Ei rã si ra ea. ¹⁹ Ira mo ia turã eã mose, nyisia rae. Mendi rae. ²⁰ Dios cheē nenei neneisa chō jěicua rã. Dios cheē ndui si eriqui turã mose, Dios quiato chō ùquĩ nde. Dios cheē ndui eã mose, Dios quiato eã ño ùquĩ no nde.

Mbia ra ique ja eã

²¹ “Sererecua” i rei mbia tubiriã nguia seje ã. Ûquĩ nguia nda ique ja eã nguia serécuaa. Ae siqui Seru Ibatenda cheē ndui nae, ùquĩ mii ño nda ique serécuaa. ²² Aque mose ra mbia ñee tuchi seje. “Jesús, ndecheē ngue urembuchecua checua tuchi quia mbia je resē. Aba checuayã ngue urejea jea tuchi quia mbia si nderĩ ndesē. Mbia mae sayã ngue uresaã saã tuchi quia nderĩ ndesē”, i tuch i rei ra mbia seje. ²³ Ûquĩ je ra acheē. “Co aico jěicuayã mbeite co resē. Jěso serecha. Mbae icuã aosa chō jě nde”, ae ra ee.

Tuchua nyeremo

²⁴ Ae siqui serese, ae secheē mumbayã nguia nae, ùquĩ quiarei eturã tuchi. Tuchua ãtã aosa rã ño ùquĩ nde. Sã eaquiato mo tuchua ao sita turã arō no. ²⁵ Ama nyaaqui mose, amandi cuasu raque. Quiririã abe ichu ichu raque tuchu a je. Tuchua mbuquiata aroneate. Sita turã arō nguia ngue uchuchu a ao nguia. Eĩ si chō secheē mumbasa rē a nde. Tuchu a ãtã aosa rã si. ²⁶ Ae secheē mumba quia eandu mose nae, eaquiata na ño ùquĩ nde. Sã eaquiata mo uchucharã ao no. Aque quiarei ibi ribicoi tuchiã. Sita quiishĩ arōchi chō uchuchua ao nguia. ²⁷ Ama nyaaqui mose, amandi cuasu ee cote. Quiririã abe ichu ichu tuchua je. Aque quiarei iãcuã mbucoi asi mondo. Eĩ si chō secheē mumbasa re, i que Jesús ra.

²⁸ Jesús que hui ucheē si cote ra. Mbia que nyuruira tuchi echeē andu ra. ²⁹ Ererecua rã ño ngue eriqui nguia mbia mbaaquiato quiatu.

8

Jesús mbia leproso mbucherō

¹ Jesús que nguichi ibi ibate si cote ra. Mbia cuabēte que siqui erui ra. ² Emo ndasi que tu ee ra. Leproso, i que aque erasi je ra. Tu que ngoi ngũĩã ndese ñee Jesús je ra. —Sererecua, nde sembucherōse mose, sembucherō se, i que ñee Jesús je ra. ³ Jesús que oco erese cote ra. —Echerō cote, i que ee ra. Echeē mosebe que nyerō nda. ⁴ Jesús que ñee ee ra. —jErecheēchĩ nda mbia mo je jě! Eso nderasiã ndeacuquia sacerdote je cote. Moisés cheē ndui si chō mbae mo emondo Dios je. Eĩ nda mbi a jirandu nderasiã ndese cote, i que Jesús ñee ee ra.

Jesús soldado rerecua rimba mbucherō

⁵ Jesús que oso sucha tubiriã Capernaum cote ra. Soldado rerecua a mo ngue tu ñee ee ra. Capitán ngue ae ra. ⁶ —Sererecua, serimba rasite riqui sechuchua huee. Erasi tuchi. Umi umi sayã tuchi, i que capitán ñee Jesús je ra. ⁷ —Taso embucherō, i que Jesús echeē mose ra. ⁸ Capitán ngue ñee Jesús je ra. —Seicuãte aico co, Jesús. Sechuchua

ra ereiquechĩ. Echeeño. Ndecheẽ achõ ño emondo serimba mbucherõ sacua. ⁹ Se abe sererecua riqui co. Echeẽ amumba aroneate quia co. Se abe soldados rerecua aico nguiã co no. Secheẽ abe emumbayãte quia co no. Eso, i mose, secheẽ mumbayãte no. Echu, i mose, secheẽ mumbayãte no. Se neẽ mose serimba je, secheẽ mumbayãte no. Ndequirãcuã na eãte raque se, i que capitán ñee Jesús je ra. ¹⁰ Echeẽ andu mose que Jesús nyuruirate ra. Ñee ngue nguesenda je ra. —Tacheẽ nyecua jẽje. Capitán ndiqui seicua tuchite co. Seicua tuchite equia judíos mo si co. ¹¹ Tacheẽ nyecua jẽje. Ae judíos eã emo jenda ja nae, ũquĩ tubiriã nda siqui Dios rese. Dios siqui mose mbi a rerecuarã. Ũquĩ tubiriãte ra quiaru turã Abraham ndese. Isaac rese. Jacob rese no. Judíos eã ndaque ũquĩ. ¹² Dios quia ra judíos mombo itaicuee. Itondáruu. Huee ra nyeseo tuchi cote. Erasite ra huee cote, i que Jesús ñee judíos rĩ nda. ¹³ Jesús que ñee capitán je cote ra. —Eso chõ ndechuchúaa cote. Ereico seicuate co. Nyebe ndecheẽ amumba eã nguiã nderimba mbucherõ, i que Jesús ee ra. Jesús cheẽ mosebe que erimba nyerõ nda.

Jesús Pedro ninisi si mbucherõ

¹⁴ Jesús que oso Pedro chuchua cote ra. † que Pedro chari rasi u nyaara ee ra. Eracu tuchi que ra. ¹⁵ Jesús que oco ari o rese ra. Eracu que ti i cote ra. Ari que juã cote ra. Mbae que echao chao quia mbia chiurã cote ra.

Jesús mbia rasi chumumbara mbucherõ

¹⁶ Itondaru ramo mose que mbia erasi rurucuaẽ cuaẽ tuchi Jesús je ra. Ae aba checuayã quereco qui a nae, ũquĩ ndurucuaẽ tuchi Jesús je. Aba checuayã ngue usẽ usẽ nguia mbia si Jesús cheẽ mose ra. Erasi chumumbara que embucherõ cherõ tuchi quia ra. ¹⁷ Ũquĩ mose que Isaías cheẽ io cote ra. Eĩ ño ngue Isaías embesa cose ra: “Dios rucucha que nandeicuã sirõ nandesi ra. Dios rucucha que nanderasi sirõ nandesi no nda”, i que Isaías embesa ra. Ũquĩ ngue io cote ra.

Jesús rui taico, i raque emo

¹⁸ Mbia cuabête que Jesús mamate ra. Nyebe Jesús ñee nguiã uchimbaaquiatu je. — Nyao rã sobei, i rei que ee ra. ¹⁹ Aque mosete que embesasa mo ñee ee ra. —Taico bei nderese. Ndeso mose manguiti, se abe ra aso bei quia nderese, i rei que ñee Jesús je ra. ²⁰ Jesús que ñee ee ra. —¿Mbae rasi ra eresaã saã serese re? Eoita quia ecua jiri re. Nguireĩ nguia equisa jiri no nde. Se quia sequisayã mbei re, i que Jesús ee ra. ²¹ Echimbaaquiatu mo ngue ñee ee ra. —Sererecua, sã paba mano na. Aquere quia ra aico bei nderui cote, i rei que Jesús je ra. ²² Jesús que ñee ee ra. —Sã mbia ataque chõ nderu chati. Eico chõ serui nde, i que Jesús ñee ee ra.

Jesús quiririã icuã icuã mbutiba; ama ndebera abe

²³ Jesús que ua canoa ye cote ra. Uchimbaaquiatu rese. ²⁴ Ama ndiit e re mose que quiririã icuã icuã ndu ee ra. I rebera que ique ique tuchi quia canoa ye ra. Jesús que uque oso quia canoa ye ra. ²⁵ Nyebe echimbaaquiatu Jesús mumba nguiã. —Urembaaquiatusa, echumumba. Ureraaro nã. Nandemanochĩ nda re, i que ñee Jesús je ra. ²⁶ Jesús que ñee uchimbaaquiatu u je ra. —¿Mbaerã jẽsiquichete riqui re? ¿Seicuayãte equia ã nde? i que Jesús ñee ee ra. Nyuruã ngue ñee asite quiririã je cote ra. Ama je abe no. Quiririã ngue ti i echeẽ mose cote ra. Ama abe. ²⁷ Echimbaaquiatu que nyuruira tuchi mae Jesús quirãcuã ndese ra. —Quiririã echeẽ mumbayã ñochĩ. Ama abe echeẽ mumbayã ñochĩ, i que ñee nyue cote ra.

Jesús aba checuayã icuã jea

²⁸ Jesús que ngasẽ ama ndobei cote ra. Gadara, i que hue ibi je ra. Amei mo nyeremo ngue ngaẽ ngasẽ Jesús je ra. Mbia raaque tãsa si chõ ngue ecuaẽ ngasẽ Jesús je ra. Aba checuayã icuã ño ngue siqui tuchi nguiã ũquĩ ñiangui re ra. Aba checuayã ño ũquĩ mbiicuã tuchi nguiã. Nyebe mbia mo hue rurubiã mbei nguiã. ²⁹ Ũquĩ ngue ñee asite cuaẽ Jesús je ra. —¿Mañi ere ra equia ure je re, Jesús? Dios rucucha chõ nde re. ¿Urembasi

jei sacua ño erechu aa re? i que ñee tuchi Jesús je ra. ³⁰ Chiasu socoi tubiriã ngue chi quiaru huee rurubi ra. ³¹ Nyebe aba checuayã icuã ñee jate nguiã Jesús je. —Nde urejea mose mbia si, chiasu chiangui re ureso rã, i que aba checuayã ñee Jesús je ra. ³² —Eno, i que Jesús ee ra. Nyebe aba checuayã usê ja nguiã amei ñia si cote. Chiasu chiangui re que echoi ja ra. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda. ³³ Chiasu raarõsa mundite que ra. Mae mose erese. Nyoï que mbia mbiirandu jate chiasu rese ra. —Jesús que amei mbucherõ nda. Aba checuayã ngue ejea esi ra, i que maesa erese ñee mbia ataque je ra. ³⁴ Nyebe hue jenda nyoï ja nguiã ñee Jesús je. —Eso rã urerecha urerecua si, i jate que hue such a jenda ñee Jesús je ra.

9

Jesús emi sayã mo mbucherõ

¹ Jesús que ua canoa ye cote ra. Nyoï que sobei ra. Ngasê ngue uchuchúaa cote ra. ² Mbia que erasi mo curucuaẽ quisa ye ee ra. Emi sayãte que ae ra. —Erurucuaẽsa riqui seicua ùquĩ, i que Jesús ñee uchiangui re ra. Nyebe ñee nguiã emi sayã je. —Echimbia chõ, Echo. Ndechisaã mbae icuã ambutiã nguia ndesi a, i que Jesús ñee umi sayã je ra. ³ Embesasa que ñee nyue ra. —Jesús riqui Dios ibatenda raã naa ñochĩ co, i que ñee nyue ra. ⁴ Jesús que ùquĩ ndua ndua icuate quia ra. Nyebe ñee nguiã ee cote. —¿Mbaerã jẽingo ndua ndua icuã nde? ⁵ ¿Ma mbaranguiatuã eã jiri jẽje re? ¿Mbia icuã mbutiã esi ere? ¿Mbia rasi mbucherõ ere no? ¿Ma mbaranguiatuã eã jiri jẽje re? ⁶ Dios rucucha rei se. Mbia chiao icuã mbutiã aquiatu chõ se re. Sequirãcuã tateacuquia jẽje, i que Jesús ñee ee ra. Ñee ngue erasi je cote ra. —Ehuã na. Ndechuchua eso cote. Ndequisa abe erao, i que Jesús emi sayã je ra. ⁷ Emi sayã ngue juã asi oso ra. ⁸ Mbia que nyuruira ja u mae emi sayã ngata rese ra. Mbia que ñee turã ja Dios quirãcuã ñii cot e ra.

—Serui bei eico, i Jesús Mateo je

⁹ Mateo, i que emo je ra. Ae que impuestos isi isi bei quia mbia rerecua mbaerã nda. Jesús que ngasê ee cote ra. Ngoï que huĩ plata isi isi impuestorã nda. —Serui bei eico, i que Jesús ñee ee ra. Ae Mateo juã oso nguiã erui. ¹⁰ Emo mose que Jesús nyoï quiaru erese ra. Impuestos isi isiquia ata que chi quiaru erese huee ra. Echimbaaquiato abe rese. Mbia icuã mo abe que chi quiaru erese no nda. ¹¹ Fariseos que ñee icuãte Jesús chimbaaquiato je ra. —¿Mbaerã Jesús riqui quiaru mbia icuãte rese re? i que ñee nda. ¹² Nyebe Jesús ñee nguiã ee. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. ¹³ ¿Ã embesa ji jẽicuayãte re? “Mbae mo jemee seje”, ae eã nguiã jẽje co. “Jẽya eã ño mbia rese”, ae chõ nguiã jẽje co, i que embesa ji ra. Ùquĩ embesa ji jẽicua jiri ae. “Jenyu seje”, aeã ngue u nguiã mbia turã je. Mbia icuã je chõ ngue achu nguiã “jenyu seje” i, i que Jesús ñee ee ra.

Jesús chimbaaquiato hui ãte uchiu si

¹⁴ Juan ñimbbaaquiato que ngasê ñee Jesús je ra. —Ure quia ureico nguiã hui hui urechiu si ã. Fariseos chimbaaquiato abe hui hui quia uchiu si no. ¿Mbaerã ndechimbbaaquiato riqui hui ãte uchiu si ã nde? i que ñee Jesús je ra. ¹⁵ Jesús que ñee ee ra. —Sã emo ndiqui ngũinisirã isi ramo no. Sã eresenda iate riqui quiaru erese no. Sã eriqui hui aroneate uchiu si aque mose no. Sã eru riqui mano emo mose no. Aque mose quiatu ra equiato hui uchiu si cote. ¹⁶ Sã emo ndiqui tiru yasu mii aroneate tiru ima sorei rese no. Eyasu ra nyaacua quiata eima si. Soro icoi tuchi ra cote. ¹⁷ Sã emo mbaeri rasi ramo nderecoquiato eã eriru ima ye no. Mbae ire ima ye ererecoquiato aronea ño ñene. Eri rasi ra ñimatã ño mbae ire ndoro. Eri ra uchẽ ja. Mbae ire abe mbiicuãte ra cote. Mbaeri yasu quia nda equerecoquiato nguiã mbae ire yasu ye. Soroã sacua, i que Jesús ñee ee ra.

Jesús Jairo riirĩ mbucherõ; ari mo abe mbucherõ

¹⁸ Jesús cheẽ mose que judío rerecua mo ngasẽ ee ra. Jesús jii que ngoi ñee ee ra. — Qui seriirĩ si mano namote qui. Nyao rã erea. Ndeoco mose erese, quera si rae, i que ñee Jesús je ra. ¹⁹ Jesús que juã oso erese ra. Echimbbaquiuiatu abe nyoĩ erese. ²⁰ Ari rasi mo abe que oso quia mbia ite rĩ nda. Eruqui nda uchẽ mbei quia ee ra. Doce años nyee. Eruqui nda tibayã mbei ee ra. Ari que tu Jesús quite quiti eriichã nda. Jesús irao ai rese que oco cote ra. ²¹ —Seoco mose Jesús irao rese ra acherõ, i nda ra. ²² Jesús que uba ñee ari je ra. —Coche ñene, Echo. Seicuate que se ra. Nyebe arembucherõ nguiã, i que Jesús ñee ari je ra. Aque mose tuchi que eruqui tiba ee cote ra. ²³ Jesús que ngasẽ nyee judío rerecua chuchua ra. Mbia que nyeseo seo quia ãquẽ ndaaque rese ra. Mbia que irasei rasei eraaque tiquia nonde ra. ²⁴ Jesús que ñee ee ra. —¡Qui jẽ! Jẽso ja itaicuee. Eriirĩ mano eã ño nguiã. Uque chõ ñene, i que ñee mbia je ra. Mbia que iquia iquia echeẽ mose ra. ²⁵ Jesús que mbia mondo ja chee itaicuee ra. Oso que i que eraaque rea cote ra. Eraaque o que eisi ra. Quera si que cote ra. Nyuruã ngue cote ra. ²⁶ Mbia hue jenda que jirandu jate erese ra. Jesús eraaque mbuquera rese.

Jesús eresayã nyeremo mbucherõ

²⁷ Jesús que oso hue si cote ra. Mbia resayã nyeremo ngue nyoĩ erui ra. Ñee mombo mombo que Jesús je ra. —¡Jesús! ¡David rucucha! ¡Ndeyayã ño urerese jẽ! i que ñee Jesús je ra. ²⁸ Jesús que oso ique tuchúaa cote ra. Ae eresayã nyoĩ nguiã erurubi. Jesús que ñee ee ra. —¿Sequirãcuã jembucherõ arõte reĩ nguiã jẽje re? i que Jesús ñee ee ra. —Ae, i que eresayã ñee ja ee ra. ²⁹ Ae Jesús oco nguiã eresa rese cote. —Seicua mose ra jaembucherõ, i que ra. ³⁰ Eresa que nyerõ ja ee cote ra. —Sã mbia jiranua serese, i tuchi rei que Jesús ñee ee ra. ³¹ Eresayã ngue Jesús cheẽ mumba tuchi ra. Nyoĩ que mbia mbiirandu tuchi Jesús rese hue rĩ ja ra.

Jesús echeẽ nguiã mbucherõ

³² Jesús so mose que mbia echeẽ ngũã mo curucuaẽ ee ra. Aba checuayã icuã ngue siqui aque chiangui re ra. ³³ Jesús que aba checuayã icuã jea esi ra. Echeẽ ngũã ngue ñee turã cote ra. Nyebe mbia tubiriãte chi nguiã nyuruira mae erese. —Emo ngue ũquĩ saã eã mbeite quia aa Israel ra, i que nyuruira jate ra. ³⁴ Fariseos quiatu que ñee icuãte Jesús rĩ nda. —Satanás quirãcuã je chõ Jesús riqui nguiã aba checuayã jea jea mbia si co, i rei que fariseos ñee nda.

Jesús ia eã tuchi mbia tubiriã ndese

³⁵ Jesús que nyoĩ sucha mbuchesea sea ja ra. Mbia mbaaquiatu quiatu ja ra. Mbia chumunua nuásaa jate. Dios cheẽ ngue esenei senei tuchi quia ee ra. Mbia rasi chumumbara que embucherõ cherõ nguiã ra. ³⁶ Mbia rasi rasi tuchi que ee ra. Mbia ia eã tuchi que ee ra. Mbia quiachã je rã ngue ee ra. Sã oveja riqui quiachã jate eraarõ iriã no. Eĩ si chõ mbia nguiã Jesús je. Nyebe Jesús ia eã tuchi riqui nguiã erese. ³⁷ Jesús que ñee uchimbbaquiatu je ra. —Secheẽ andusa reã ndei etubiriã jiri. Secheẽ nenei neneisa quia rei co mii jiri. ³⁸ Jeñee nguiã Dios je. “Dios, ndecheẽ nenei neneisa mo emondo tuchi. Mbia mbiirandu randu sacua”, jenyẽ chõ nguiã Dios je. Sã mbaecha mbia mo mondo mbae a ireĩ ishao shao equiche mose no, i que Jesús ñee ee ra.

10

Jesús mbia doce irabo uchimbbaquiaturã

¹ Jesús que “jenyu” i uchimbbaquiatu doce je ra. Uquirãcuã ngue emee uchimbbaquiatu je cote ra. Aba checuayã icuã jea jea sacua mbia si. Mbia rasi chumumbara mbucherõ cherõ sacua abe no. ² ã ño echimbbaquiatu ã nde:

Simón (Pedro, i abe que mbia quia ee ra.)

Andrés (Simón nongue rei Andrés.)

Jacobo (Zebedeo riirĩ ndei Jacobo.)

Juan (Jacobo nongue rei Juan.)

³ Felipe

Bartolomé

Tomás

Mateo (Impuestos isi isiquia rei Mateo.)

Jacobo (Alfeo riirí ndei Jacobo.)

Lebeo (Tadeo, i abe que ee ra.)

⁴ Simón el Cananista

Judas Iscariote (Aque que Jesús mondo mbia icuã je ra.)

Ūquĩ ja que Jesús irabo ra.

Jesús uchimbaaquiatu doce mondo ucheẽ nenei nenei sacuã

⁵ Jesús que ũquĩ mondo ja ucheẽ nenei nenei sacuã nda. Emondo nonde que ñee ee ra. —Judíos achõ jembaaquiatu quiatu quia. Jẽsochĩ nda judíos eã je. Samaria jenda chuchua abe ra jẽsochĩ. ⁶ Israel jenda chõ jembuchesea sea oso. Ovejas quiachã je rã ño Israel jenda re. ⁷ Jẽso mose, secheẽ jẽsenei senei mbei quia ee. “Mbia rerecuarã tuchi ra Dios cote”, jenyee oso secheẽ nenei nenei judíos je. ⁸ Mbia ire rasi jembucherõ cherõ nguia. Mbia rasi chumumbara jembucherõ cherõ nguia. Mbia raaque abe jembuquera quera quia. Aba checuayã icuã abe jẽjea jea quia mbia si. Sequirãcuã ngue amee ñooño jẽje. “Mbae mo jemee na seje eribishorõ”, ae eã tuchi se quia jẽje co. Nyebe jẽ abe mbae turã jẽsaã ñooño mbia je. “Mbae embu se”, iã mbia je. ⁹ Mbae mo nda jendaochĩ icua jẽso mose. Mbae isiquia mo nda jendaochĩ icua. Mbae isiquia ñete mo nda jendaochĩ icua. ¹⁰ Mbae riru mo abe ra jendaochĩ no. Jẽirao nongue abe ra jendaochĩ no. Jẽiyao nongue abe ra jendaochĩ no. Jenyitochoquia abe ra jendaochĩ. Ae je ra mbae turã jẽsaã saã nae, sã ũquĩ ae riqui jembuquiaru quiaru turã mingo. ¹¹ Jengasẽ mose sucha tubiriã mo, mbia turã mo jẽtea huee. Aque chuchua mi ño jẽingo uque. Tuchua ra jembuchesea seate chĩ jẽingo mose huee. Ae ra jengue nyii nae, hue tuchia bei chõ jẽingo uque. ¹² Jẽique mose emo nyuchúaa, hue jenda je jeñee turã no. Saludar jenyee turã ee no. ¹³ Hue jenda siqui turã mose, Dios quirãcuã jemee ee. Siqui turã eã mose, Dios quirãcuã jẽisibe esi. ¹⁴ Hue jenda jẽisi sereã nea mose, jẽhui chõ esi. Hue jenda jeñee andu sereã mose, jẽso chõ hue si. Jẽi tubi jembutomo tomo ee. ¹⁵ Tacheẽ nyecua jẽje. Ae ra jeñee isi sereã nae, ũquĩ nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae, ũquĩ nguia ra embasi tuchi Sodoma jenda si. Gomorra jenda abe si.

Mbia icuã icuã tuchi ra jẽje, i Jesús

¹⁶ A aico jemondo secheẽ nenei nenei sacuã mbia je a. Sã nyacua icuãte riqui oveja je no. Eĩ si ra mbia icuã icuãte jẽje. Oveja seteã na ño jẽingo. ¡Jẽaracua chõ nguia jẽ! Sã mbei aracuate riqui no. Mbae icuã mo nda jẽsaãchĩ jẽ. Sã nyurushi riqui mbae icuã naa eã mbeite no. ¹⁷ ¡Sã jẽ! Mbia icuã icuãte ra jẽje. Jembĩrĩ irĩ ndae. Jemee mee icuã nda mbia rerecua je. Jẽiruã nua nda mbia chumunuásaa. ¹⁸ Mbia icuã icuãte ra jẽje seriĩ. Mbia rerecua je ra jenderao icuã. Eĩ jenyee mbia rerecua mbiirandu randu seriĩ. Judíos eã abe mbiirandu randu seriĩ. ¹⁹ Jemee mose mbia rerecua je, pare pare jenyechĩ nda jẽ. “¿Manyae ra ũquĩ ñee ndibishorõ nde?” jenyechĩ nda pare pare i jẽ. Dios ae chõ nda jembucheẽ turã nuiã nguia mbia je aque mose. ²⁰ Jẽ ae ra jeñee eã. Espiritu Turã ae nda jembucheẽ nguia mbia je. ²¹ Jenongue ra jemondo chee mbia icuã je. Jẽiquia sacuã. Jendu abe ra jemondo chee mbia icuã je. Jendiirĩ abe ra jemondo chee mbia icuã je. Mbia icuã nda jemo iquia iquia chee. ²² Mbia ra jẽucuayã jate seriĩ. Ae ra siqui bei serese, ũquĩ nda Dios mingo bei. ²³ Mbia icuã icuã mose jẽje sucha moo, jẽso chõ sucha tubiriã nonguee. Tacheẽ nyecua jẽje. Achu jeibe ra se. Sucha Israel jenda jembuchesea sea ja eã mose chõ nda achu jei.

²⁴ Jengasu ra jẽsaã saãchĩ sesi jẽ. Se chõ jembaaquiatusa re. Embaaquiatusa quia ecuasu jiri echimbaaquiatu si re. Ererecua quia ecuasu jiri erimba si re. ²⁵ Coche jẽingo

nguiã se rã si. Sã mbia icuã icuãte riqui seje no. Eĩ si ra eicuã icuã jêje no. Sã mbia “Satanás” i ñee icuã seje no. Eĩ si ra ñee icuã icuã jêje no. Serimba je no.

Dios riqui jendeaquiato bei co

²⁶ Jêsiquiche quichechĩ nda ñee icuã icuã je si jê. Ae mbia saã nyecuayã cuayã nguia nae, ũquĩ nda nyecua ja cote. Ũquĩ nda mbia icua ja cote. ²⁷ Ae rĩĩ aico ñee nyecuayã cuayã jêje nae, ũquĩ jêseni senei turã mbuchecua mbia je cote. Ae asenei senei nguia jêisaa nae, ũquĩ jêseni senei turã mbuchecua mbia je cote. ²⁸ Ae “taiquia” i quia jeni nae, jũquĩ si ra jêsiquichechĩ jê! Ae aba mombo serĩte quia tata cuasu nae, aque si quiatu jêsiquiche. Aque si quiatu jêsiquiche tuchi jê. ²⁹ Aba queteamba eã jiri raque nguireĩ. Mbae isiquia mumba eãte raque nguireĩ. Dios quia ra tesareia nguireĩ mo si. Nguireĩ mo ngoi mose íbii, Dios riqui eicua jate ã. ³⁰ Dios riqui jê miĩ miĩ icua jate co. Jêa miĩ miĩ abe eicua jate quia co. ³¹ Jêsiquichechĩ nda jê. Dios quiatu queteã tuchi nguia jendese nguireĩ mo si.

Jesús quiato chõ se re, jenyê checua chõ nguia mbia je

³² “Jesucristo quiato chõ se re”, ae i quia mbia je nae, ũquĩ niĩ nda acheẽ turã se abe. “Sequiato chõ ã nde”, ae ra Paba Ibatenda je. ³³ “Jesucristo quiato chõ se re”, ae i ãte quia mbia je nae, ũquĩ niĩ nda acheẽ turã eã se abe. “Sequiato eã ño ũquĩ nde”, ae ra Paba Ibatenda je.

Achu chõ ngue mbia mbuchao chao nyesi resẽ, i Jesús

³⁴ ¿Achu reĩ mbia mbuturã turã sacua serimba je jêje re? Tei. Achu chõ ngue mbia mbuchao chao nyesi resẽ. Mbia icuã icuã nda uchue serĩĩ. Emo emo nda siqui serui. Emo emo nda siqui icuã icuãte ee. ³⁵ Emo nda eicuãte ngu je serĩĩ. Cuña mo nda eicuãte usi je no. Acuanĩ mo nda eicuãte uchari je serĩĩ no. ³⁶ Tuchua jenda ra nyao nyao nyesi. Emo nda siqui serese serimbarã. Eataque ra nyao nyao esi. ³⁷ Ae nyesequa tuchi quia ngu rese sesi nae, ũquĩ nda serimbarã eã. Ae nyesequa tuchi quia usi rese sesi nae, ũquĩ nda serimbarã eã no. Ae nyesequa tuchi quia nguĩrĩ ndese sesi nae, ũquĩ abe ra serimbarã eã no. ³⁸ Ae ra siquĩã serui, ũquĩ nda serimbarã eã. ãe mano sereãte serĩĩ, ũquĩ nda serimbarã eã. ³⁹ Sã mbia nduate quia serese. Ae nduate quia nyiese nae, ũquĩ nda nyoĩ eãte ibate. Ae ndua eãte quia nyiese nae, ũquĩ nguia ra nyoĩ ibate.

Dios ra mbae turã mondo mbia turã je

⁴⁰ Ae ra eturã ndiqui jêje nae, seje abe chõ nda eturã ndiqui. Ae eturã ndiqui seje nae, semondosa je abe chõ eturã ndiqui nguia. ⁴¹ Ae eturã ndiqui Dios cheẽ mbuchecua nae, Dios ra mbae turã mondo ee. Sã mbae turã mee ucheẽ mbuchecua je no. Ae eturã ndiqui echiã mbuquishĩ ji je nae, ũquĩ je abe ra Dios mbae turã mondo no. ⁴² Tacheẽ nyecua jêje. Emo sechimbaaquiato isei mbiu turã mose serĩĩ, mbae turã abe ra Dios mondo aque je no, i que Jesús ñee uchimbbaaquiato je ra.

11

Juan el Bautista mbia mondo ñee Jesús je

¹ Jesús que hui ñee uchimbbaaquiato doce je cote ra. Aquere que esi Dios cheẽ nenei nenei hue rurubinda je cote ra.

² Juan ngue chĩ cárcel nda. Hue eñi mose que jirandu Cristo chisaã ndese ra. Uchimbbaaquiato nyeremo ngue emondo Jesús rea ra. Ñee sacua ee. ³ —Jêso ñee Jesús je. “‘Cristo ra tu’, i beite equia ã nae, ¿ae nde re? ¿Cristo ra uresaarõ arõ mbei quia re?” jenyê oso Jesús je, i que Juan uchimbbaaquiato mondo erea ra. ⁴ Jesús que ñee Juan nimba je ra. —Ae rese jemae nae, ũquĩ jêseni oso Juan je. Ae jeñandu nae, ũquĩ abe no. ⁵ Eĩ jenyê chõ ñee Juan je: “Jesús que eresayã mbucherõ nyerõ nguia ra. Ecuatayã abe mbucuat a cuata. Eire rasi abe mbucherõ nyerõ. Eraaque abe mbuquera quera. Ucheẽ

turã ngue esenei senei tuchi quia mbaecha reã je ra”, jenyé oso Juan mbiirandu. ⁶ Emo hui eã mbei mose sesi, aque ia tuchi ra siqui cote, i que Jesús ucheẽ mondo Juan je ra.

⁷ Juan ñimondo que nyebi nyoi Juan ndea cote ra. Jesús que ñee mbia ja je Juan ñii cote ra. —¿Mbae rese mae jẽso turúquiaa re? ¿Quiririã idioi ichu ichu rese chõ jẽso mae nde? Quiririã ndese mae eã ngue jẽso resẽ. ⁸ ¿Emo irao turã ndese jẽso mae nde? Ûquĩ ndese eã ngue jẽso mae ndesẽ. Eirao turã siquiã nguiã turuquia ñi. Ae siqui quia mbia rerecua chuchua nae, ùquĩ nguia eirao turã ndiqui nguiã. ⁹ Juan ndese mae ño ngue jẽso turúquiaa resẽ. Dios cheẽ nenei neneisa tuchi chõ ae mbia mo si re. Ae chõ mbia mingoquiato quiato nguiã se ñee sacua mbia je. ¹⁰ Sã embesa ji riqui ñee no:

Secheẽ nderaosa tamondo ndenonde.

Ae ra mbia mingoquiato ndeje, nde ñee sacua ee,

i que embesa ji ñee nda. Juan ñii ño embesa ji riqui nguiã ñee. Nyebe Juan ndu nguiã senonde. ¹¹ Tacheẽ nyecua jẽje. Juan el Bautista quiarei i tuchi raque mbia ñiinda ja si. Ae ra siqui tuchi Dios rese erimbarã cote nae, ùquĩ nguia ra i tuchi Juan si cote. ¹² Juan Dios cheẽ nenei nenei namo mosenda bei chõ mbia riqui nguiã ngaẽ ngaẽ Dios cheẽ andu ã. Mbua bite Dios siqui mose mbia rerecuarã. ¹³ Juan tu nonde chõ embesa ji riqui nguiã ñee j a serĩ. “Dios rucucha ra tu emo mose”, i serĩ. Sechu eã mose. Juan nane ngue “co eru quia co” i ñee nda. ¹⁴ Sã embesa ji riqui ñee nyii no. “Elías raanguia ra tu mbae mbuquiche ja Cristo tu nonde”, sã i embesa ji no. Juan ñii ño eriqui nguiã ñee. ¹⁵ Jẽisa mose, jsecheẽ jeñandu turã na!

¹⁶ Mbua namonda siqui turã eãte quia aba cheẽ ndui ã. Mbua ririĩ na ño eriqui nguiã ã. Sã mbua ririĩ ndiqui ñibusarei sarei no. ¹⁷ Sã eriqui ñee ñee nyue no. “Flauta que ambucheẽ ñee ndei jẽje ra. ¿Mbaerã jenyuruqui sereã nea nde?” sã i chõ nyue no. “Mbae aba mbua eã ngue ambucheẽ ñee ndei jẽje resẽ. ¿Mbaerã jẽyate erese re?” sã i chõ mbua ririĩ nyue no. Ûquĩ na si chõ mbua riqui nguiã aba cheẽ mumba ã. ¹⁸ Juan el Bautista que tu rei mbua je ra. Mbua que eisi turã ã a nda. “Co eriqui quiaru sereãte nanderese co. Co eriqui mbae mbei sereãte nanderese co”, i chõ mbua quia ee ã. “Aba checuayã ndesenda”, i chõchĩ equia ee ã. ¹⁹ Aquere que achu se abe ra. Aquiaru rei nguiã jendese co. Mbae abe ambei rei nguiã jendese co. Se abe que seisi turãya nda. “Quiaru tuchi je”, i chõchĩ seje. “Mbae mbeisa”, i abe que seje no nda. “Mbua icua quiato chõ ñene”, i chõ ngue seje no nda. Ae earacuate nae, Dios aracua abe ra eicua.

Jesús ia eã mbua sucha tubiriã jenda rese

²⁰ Ae mbua je Jesús uquirãcuã ndeacuquia cuquia tuchi nae, ùquĩ ngue Jesús isi eã mbei ra. Nyebe Jesús riqui nguiã ñee asi asi mbua hue jenda je. ²¹ —Seya eãte jendese, Corazín jenda. Seya eãte jendese, Betsaida jenda. Jendasi tuchi rae. Mbua mae sayã ngue asaã saã jẽje nae, ùquĩ naa mose Sidón jenda je, eĩ nda Sidón jenda huiicua secha rei. Eĩ nda Tiro jenda abe huiicua secha rei. Eĩ nda eya eãte rei huiicua ndese. ²² Jẽ nguia jẽicua jẽsecha sereãte rei. Nyebe ra Dios jembasi mbasi tuchi ùquĩ si quiato. Dios mbua icua mbasi mbasi mose. ²³ Jẽcuasu jẽsaã saã tuchi techĩ nguia re, Capernaum jenda. Nyebe ra Dios jemondo tuchi tata cuasu. Mbua mae sayã ngue asaã saã jẽje nae, ùquĩ naa mose Sodoma jenda je, eĩ nda Sodoma jenda huiicua secha rei. Eĩ nda Dios hue sucha cuasu mbutiã eã ndei. ²⁴ Jẽ nguia jẽicua jẽsecha sereãte rei. Nyebe ra Dios jembasi mbasi tuchi Sodoma jenda si. Dios mbua icua mbasi mbasi mose, i que Jesús ñee nda.

Jesús aba quenea mboseĩ

²⁵ Jesús que ñee Dios je cote ra. —Seyate aico nderese co, Paba. Ibi jenda rerecua ja chõ nde re. Ibei jenda abe rerecua ja chõ nde no nde. Ndecheẽ ngue erembuchecu a eã mbua aquiato je ra. Mbua ririĩ naanguia je chõ ngue ndecheẽ erembuchecu nguiã. ²⁶ Ûquĩ ño ngue eturã ndeje ra, Paba, i que Jesús ra. ²⁷ —Seru que mbae mondo ja seje ra. Paba miĩ ño seicua tuchi nguiã. Paba ririĩ miĩ tuchi chõ se re. Se miĩ ño Paba aicua tuchi nguiã no. Ae je ra Paba ateacuquia nae, ùquĩ miĩ ño nda Paba icua tuchi nguiã serese. ²⁸ Jenguenea

mose, jenyu chõ seje. Jenguenea tamboseĩ na jësi. Taambia mingo. ²⁹ Seseteã ño aico nguiã se. Aico mingue chõ nguiã se co. Jeñimbaaquiato jiri seriĩ. Jeñimbucha chõ serese. Eĩ jenyu mose ra jeñia pare pare i eã cote. Jëya bei ra jëingo cote. ³⁰ Ae siqui serimbarã nae, ũquĩ iate riqui ã. Secheẽ mbarangiatuã eãte aba je, i que Jesús ñee nda.

12

Jesús chimbaaquiato mbae a ishao shao sábadu mose

¹ Sábadu mose que Jesús si quia mbiaco ite ite rĩ emo mose ra. Echimbaaquiato riãcuãte que eriqui ra. Nyebe que quiata a ucua miĩ miĩ nyoĩ quia ecuã mose ra. Equiti quitire oo je que echoĩ quia eachãaña cote ra. ² Fariseos mo ngue ñee ee ra. —¿Mbaerã ndechimbaaquiato riqui mbae ishao shao sábadu mose re? Co mose chõ mbia riqui uquenea ucua resẽ, i que fariseos ñee Jesús je ra. ³ Jesús que ñee ee ra. —¿Embesa ji rese jemaẽ eã David rĩ nyii re? David riãcuãte que aque mose ra. Eresenda abe riãcuãte que eriqui aque mose no nda. ⁴ David que ique Dios chuchúaa aque mose ra. Mbichae Dios chuchua jenda que eu ra. Mee mee ngue nguesenda abe je ra. Eriãcuãte quiato ngue re. Sacerdote achõ mbaerã ndaque mbichae. ⁵ ¿Moisés chimbese rese jemaẽ ate sacerdote rĩ nde? Sábadu mose que quieĩ quieĩ rei Dios chuchua ra. “Dios cheẽ mumbasa”, i ate quia mbia nguiã ñee ee. ⁶ Tacheẽ nyecua jëje. Secheẽ nguia i tuchi jiri nguiã Dios chuchua si co. ⁷ Co embesa ji jëicuayãte quia ã. “Sebite jëya eã jëingo mose mbia rese. Sebiãte ofrenda jemee ñooño mose”, i Dios quia co. Jëingo ũquĩ icuayãte ã. Eĩ nda jeñee icuã eãte rei mbia turã je. ⁸ Sábadu rerecua bei chõ se re, i que Jesús ñee fariseos je ra.

Jesús emo o tomei mbucherõ

⁹ Jesús que oso mbia chumunuásaa cote ra. ¹⁰ Huee que eo tomei mo ndiqui ee ra. Mbia que Jesús mbucheẽ icuã sete ra. Nyebe ñee nguiã ee. —¿Eicuãte erasi mbucherõ sábadu mose re? ¿I ere? Echeẽ ure je jë, i que mbia ñee Jesús je ra. ¹¹ Jesús que ñee ee ra. —Sã jenimba oveja mo ndiqui jaã no. Ngoĩ oso ibicua mo ye no. ¿Sábadu mose ra jenosẽ ibicua si re? Ae. Jenosẽ jei rae. Sábadu mose raque. ¹² Dios queteamba tuchi chõ mbia riqui nguiã oveja si ã. Coche nandeico nguiã mbae turã naa naa sábadu mose, i que Jesús ñee mbia je ra. ¹³ Ñee ngue eo tomei je cote ra. —Ndeo emee secuti, i que ee ra. O que emee Jesús cheẽ mose ra. Aque mosechi que eo nyerõ cote ra. ¹⁴ Nyebe fariseos paama i nguiã Jesús je. Mbia mbucherõ mose sábadu mose. —¿Mañi nande ra Jesús je re? Nandeiquia rei ra reae, i tuchi que eu ñee nyue ra.

Isaiás chimbese ique Jesús rĩ

¹⁵ Jesús que jirandu ũquĩ ñee ndese ra. Nyebe esi nguiã hue si. Mbia tubiriã ngue nyoĩ erui ra. Jesús que mbia rasi mbucherõ cherõ ja quia ra. ¹⁶ —¿Mbia ra jemiiranduchi serese jë! i que Jesús ñee ee ra. ¹⁷ Aque mose que Isaiás chimbese ique cote ra. Eĩ ngue Isaias embesa miĩ Jesús rĩ nda:

¹⁸ Serimba chõ co re. Co que airabo ra.

Sechesequa chõ ae re. Seyate aico erese co.

Espíritu Turã tamondo tuchi ee.

Ae ra secheẽ turã senei senei ja mbia je.

¹⁹ Eicuã icuã eã nda emo je. Ñee icuã eã ndae. Ucuasu ra esaã saã eã mbia je.

²⁰ Siqui turãte ra equia equirãcuã nea je.

Siqui turãte ra equia eaquiato je no.

Mbia ra siqui turã nyee erui ererecuarã.

²¹ Mbia ja ra ndua turã mbei erese cote, i que Isaiás embesa cose ra. ũquĩ ngue ique cote ra.

Aba checuayã quirãcuã Jesús quereco co, i raque mbia

²² Mbia que eresayã mo curucuaẽ Jesús je ra. Echeẽ aquiatoate abe que ra. Aba checuayã icuã nguiato ngue siqui nguiã echiangui re. Jesús que embucherõ nda. Nyebe

mae turã nguiã cote. Ñee turã abe cote no. ²³ Mbia que nyuruira ja mae erese ra. —David rucucha chõ Jesús riqui re, i chõ ngue mbia quia ndua ndua ra. ²⁴ Fariseos que echandu ja ra. Nyebe ñee icuã icuã nguiã Jesús je. —Ab a checuayã icuã nderecua tuchi chõ Satanás nde. Satanás quirãcuã je chõ Jesús riqui nguiã aba checuayã icuã jea jea mbia si co, i rei que fariseos ñee icuã Jesús je ra. ²⁵ Jesús que ñquĩ ndua ndua icuate ra. Nyebe ñee nguiã ee. —Gobierno icuã icuã mose nyue, ua rae. Tuchuamo jenda icuã icuã mose nyue, ua ra eno. ²⁶ ¿Mañi nda Satanás aba checuayã jea mbia si re? Erimba chõ nyeresẽ. Satanás icuã icuã mose nyue, equirãcuã nda ua no. ²⁷ “Satanás quirãcuã je chõ Jesús riqui nguiã aba checuayã jea jea mbia si”, jenyẽ chõchĩ nguia seje ã. ¿Aba uquirãcuã mee jenimba je jẽ nde? Aba checuayã icuã jea nonde re. ¿Satanás uquirãcuã mee jenimba je serese re? ²⁸ Dios quirãcuã je quiatu aico nguiã aba checuayã jea jea mbia si co. “Dios quirãcuã ndese chõ ureico nguiã mae”, jenyẽ eã ñochĩ equia ã. ²⁹ Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõte quia esi co. Dios Satanás mbae mbutiã ja arõte quia co. ³⁰ Ae siqui ãte quia serese nae, eicuã ño ñquĩ ndiqui nguiã seje. Ae secheẽ senei senei eãte quia mbia je nae, ñquĩ icuã ño eriqui nguiã seje. ³¹ Tacheẽ nyecua jẽje. Emo siqui icuã mose, Dios eicuã mbutiã arõte esi. Emo ñee icuã mose, Dios echeẽ icuã mbutiã arõte no. Emo ñee icuã mose Espiritu Turã ñii, ñquĩ icuã nguiatu ra Dios mbutiã eã mbei esi. ³² Emo ñee icuã mose serĩ, Dios echeẽ icuã mbutiã arõte. Emo ñee icuã mose Espiritu Turã ñii, ñquĩ icuã nguia ra Dios mbutiã eã mbei. Mbae ua ja mose chee ra Dios ñquĩ ñee icuã mbutiã eã mbei.

Sã ira ae ea ae ae no

³³ Ira turã mose, ea abe ra eturã no. Ira icuã mose, ea abe ra eicuã no. Mbia ira icua mose, ea abe ra eicua. Nyiabiã ndae. Sã ira ae ea ae ae no. ³⁴ Mbei rã ño jẽingo nguiã. Jẽicuã ño jẽingo nguiã. Nyebe jeñee turã aquiatu ãte riqui ã. Ae rese mbia riqui ndua ndua uchiangui re nae, ñquĩ ñii sí ra ñee. ³⁵ Mbia turã nda ñee turã. Echiangui renda quia eturãte re. Nyebe eriqui nguiã ñee turã. Mbia icuã nguia ñee icuã nguiã. Echiangui renda quia eicuãte riqui nguiã. Nyebe eriqui nguiã ñee icuã. ³⁶ Tacheẽ nyecua jẽje. Emo ñee ñooño mose, Dios ra ñee asite aque je. Dios mbia icuã ndea rea mose. ³⁷ Emo ñee turã mose, echiangui renda turã ño ñene. Nyebe ra Dios ñee asiã ee. Emo ñee ñooño mose, echiangui renda icuã ño ñene. Nyebe ra Dios ñee asi ñquĩ je, i que Jesús ñee nda.

Mbia mae sayã esaã ure je, i bei mbia Jesús je

³⁸ Fariseos mo ngue ngaẽ Jesús rea ra. Embesasa abe que ngaẽ erea ra. Ñee ngue ee ra. —Mbia mae sayã esaã na ure je, i rei que ñee Jesús je ra. ³⁹ Jesús que ñee ee ra. —Jẽicuãte riqui co mosenda jẽ ja ã. “Mbia mae sayã esaã ure je”, jenyẽ beite equia ã. Mbia mae sayã mii ño nda asaã jẽje. Jonás na si. ⁴⁰ Sã Jonás ndiqui raque tres días sira rie ye no nae. Jonás na sí ra asaã mbia je. Tres días ra aico ibicua rie. ⁴¹ Nínive jenda quia eturã jiri co mosenda si re. Dios ra co mosenda mbasi tuchi Nínive jenda si. Sã Nínive jenda huiãcuã ndecha Jonás ñee mose ee no. Aico raque ñee jẽje co mosenda je co. Jẽ secheẽ jemumbate chõ chĩ nguia ã. Se quia raque ererecua tuchi Jonás si. Nyebe ra Dios jembasi tuchi mbia icuã ndea rea mose. ⁴² La reina de Seba quia eturã jiri mbia co mosenda si re. Dios ra co mosenda mbasi tuchi la reina de Seba si. Sã la reina de Seba tu isho si tuchi Salomón ñee andu no. Se quia acheẽ ndaque quia jẽje. Searacua tuchi raque se quiatu Salomón si. Secheẽ jemumbate chõchĩ nguia ã. Nyebe ra Dios jembasi tuchi mbia icuã ndea rea mose.

Aba checuayã icuã nyebi u mbia chiangui re

⁴³ Aba checuayã icuã usẽ mose emo ñia si, ngata bei chõ nguiã. “¿Mangue ra sequenea aucua que re?” i chõ nguiã. Uquenea ucua sacua mo etea eãte. ⁴⁴ “Tasobe rei nyebi. Ae si achu usẽ, aque chiã ye sí taso”, i que aba checuayã nda. Nyebi si mose u, mbia chiã oreãte que ee ra. Echiã ndecoteã eãte que ee ra. Tuchua tii ji raãte que ee ra. ⁴⁵ Aba checuayã

icuã ngue nguesenda siete queru cote ra. Ique ja que echoi aque chiangui re cote ra. Ae chiangui re aba checuayã icuã siete riqui nae, aque icuã i i tuchi que eriqui cote ra. Aba checuayã mii ngue siqui eye nyii ra. Etubiriâte cote. Aque icuã tuchi cote nyii si, i que Jesús mbia je ra.

Jesús nongue ngae erea usi resē

⁴⁶ Jesús ñee mbei mose que esi ngaē ndei ee huee ra. Jesús nongue ja rese. Chichō ja chō ngue taicuee ra. Ñee serete que ee ra. ⁴⁷ —Hue ndesi riqui nderequia taicuee huee. Ndenongue rese, i que emo Jesús mbiirandu ra. ⁴⁸ Jesús que ñee umbiirandusa je ra. —¿Aba je chō aico “taĩ” i chã? ¿Aba je chō aico “senongue” i no ña? i que Jesús ñee nda. ⁴⁹ Jesús que o mee uchimbbaaquiato cuti ra. —Ñ je chō aico nguiã “taĩ” i. Ñ je chō aico nguiã “senongue” i no. ⁵⁰ Ae Paba Ibatenda cheē mumbayã nguia nae, ũquĩ je chō aico nguiã “senongue” i. Ũquĩ je chō aico nguiã “taĩ” i no, i que Jesús ñee ee ra.

13

Emo mbae eĩ mombiquia mbiquia

¹ Aque mose sí que Jesús si usē tuchia si ra. Tuchia si que esi ngoi ama ndish a nimíaa nda. ² Mbia que ngaē ngaē ja quia Jesús rea ra. Nyebe Jesús ua oso nguiã ngoi canoa ye. Mbia quiatu que chichō ama nimíaa ndese ra. ³ Jesús que embbaaquiato quiatu tuchi quia ra. Ejemplos que esaã saã tuchi ee ra. —Sã emo si rei mbae eĩ mombiquia mbiquia no. ⁴ Sã emo ndiqui uqui uqui ñeenda rui no. Sã nguireĩ ndiqui ngaē eu no. ⁵ Sã emo emo ndiqui uqui sita arō no. Sita aronda suri jei raque. Ibi ererate quia ñene. ⁶ Tenda ibate mose que eriqui ñimama mano nda. Erao eâte quia ñene. Nyebe mano jei nguiã. ⁷ Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que echati asi u eriquisã nda. ⁸ Sã emo ndiqui uqui uqui ibi túraã no. Ũquĩ nguiatu que ia turã nda. Sã emo ia cien no. Sã emo ia sesenta no. Sã emo ia treinta no. ⁹ Jëisa mose, jsecheē jeñandu turã na!

Dios riqui ucheē mbiasa jaaja jêje co, i uchimbbaaquiato je

¹⁰ Jesús chimbaaquiato que ñee nyecuayã Jesús ísaa ra. —¿Mbaerã ejemplos achō eresenei senei mbia je re? i que echimbbaaquiato ñee ee ra. ¹¹ Jesús que ñee ee ra. —Mbia rerecua tuchi quiarei Ibatenda. Ae riqui nguiã ucheē mbiasa asa ja jêje co. Mbia ataque quia siqui sereã erese co. Mbia ataque je quia eriqui nguiã ucheē mbiasa eã jiri. ¹² Emo umbae rerequia mose, Dios ra emo mondobe ee. Emo embae eã mose, Dios ra embae sirō ja esi. ¹³ Nyebe aico nguiã ejemplos achō nenei nenei mbia je co. Eanduchō sacua. Eicua turã ndocoĩ. ¹⁴ Mbia eanduchō mose que Isaías chimbesa ique cote ra: Mbia ra secheē ñandu raque. Icuayã nguiatu rae.

¹⁵ Eãquĩ átate riqui ã.
Secheē andu sereâte equia ã.

Mae sereâte equia sechiao rese ã.
Ndua eã mbei equia serese ã.

Nyebe ra ambitirō eã mbei,
i que Dios cheē Isaías chimbesa rese ra. ¹⁶ Jê nguiatu Dios cheē jeñandu turâte nguiã ã.

Jê nguiatu jemaerete serete nguiã Dios chiao rese ã. Nyebe jêyate jêingo nguiã ã. ¹⁷ Tacheē nyecua jêje. Ae jeñandu quia secheē ã nae, Dios cheē mbuchecuasa ñiinda ã ñandu serete raque. Mbia turã ñiinda abe ã andu serete raque. Ñandu eã mbeite equia ã. Jê ae chō jêingo nguiã eandu ã cote. Jê ae je chō echecua riqui nguiã.

Jesús ucheē mbiasa uchimbbaaquiato je mbae eĩ nii

¹⁸ Secheē tambiasa jêje cote. Mbae eĩ mombiquia mbiquia ji ríĩ. ¹⁹ Ae uqui uqui ñeenda rui nae, Dios cheē andu chooñosa rã ño ũquĩ nde. Icuã eâte quia ñene. Nyebe diablo ru nguiã Dios cheē ndirō echiangui si. ²⁰ Ae uqui uqui sita arō nae, mbia mo na ño ũquĩ no

nde. Dios cheẽ andu mose, isi turã ndaque. Eyate raque erese. ²¹ Mbia icuã icuã mose ee Dios cheẽ nii, hui jei chõ nguiã esi. Mbae rao eã naanguia chõ ùquĩ nde. ²² Ae uqui uqui nyu réndaa nae, mbia mo na ño ùquĩ no nde. Dios cheẽ andu turã ndaque. Siqui bei eã ño nguiã erui. Umbaerã achõ ndese chõ eriquichĩ nguiã ndua. “Mbaecha tuchite ra se”, i bei chõ nguiã ndua ndua. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbeite ee. ²³ Ae uqui uqui ibi túraã nae, mbia mo na ño ùquĩ no nde. Ùquĩ nguiatu Dios cheẽ ñandu turã nguiã. Icuã icuã turã ño nguiã. Nyebe eriqui bei nguiã erese. Ia ia bei raanguia cote. Emo emo ia cien. Emo ia sesenta no. Emo ia treinta no, i que Jesús ucheẽ mbiasa ñee nda.

Mbae icuã suri trigo turã ndese

²⁴ Jesús que ejemplo nongue senei ee ra. —Sã emo trigo eĩ mombiquia mbiquia úcoo no. Ùquĩ na ño Dios rimba riqui nguiã ã. ²⁵ Sã trigo eĩ mombiquiasa uque cote no. Sã emo tu nyu eĩ mombiquia mbiquia trigo eĩ mumbara mbara no. ²⁶ Trigo eĩ ngue obo cote ra. Nyu abe que suri erese ra. ²⁷ Nyebe erimba ñee nguiã echa je. “Trigo eĩ achõ eremombiquia mbiquia reĩ nguiã seje. ¿Mbaerã nyu abe riqui suri suri erese re?” i que ererecua je ra. ²⁸ Ererecua que ñee ee ra. “Seucuãyãsa chõ ùquĩ nde. Nyu eĩ mombiquia mbiquia chõchĩ trigo eĩ mumbara mbara”, i que ererecua ñee nda. —¿Ureso ra eriqui riqui re? i rei que erimba ñee nguerecua je ra. ²⁹ Ererecua que ñee nda. “Tei. Nyu riqui riqui mose ra trigo abe riqui riquichĩ nde. ³⁰ Sã echichõ ja. Eucua mose ja chee. Ea ireĩ mose quiatu ra acheẽ serimba je cote. Serimba ra nyu rane siqui siqui aque mose cote. Nyu ra esei cote. Aquere quia ra trigo a ishao shao erereco quiatu sacua sechuchua cote”, i que echa ñee nda, i que Jesús ñee nda.

Mbae eĩ na ño Dios rimba re

³¹ Jesús que ejemplo mo senei mbia je ra. —Mbae eĩ na ño Dios rimba re. Sã mbia mostaza eĩ tiquia no. ³² Eñetẽ tuchite raque mbae eĩ mo si. Suri oso quia cote. Ecuas tuchite chee cote. Ira rã ño cote re. Nguireĩ nguichi quichi chee erãquiã ndese. Eĩ si chõ Dios rimba re. Ùquĩ mii ndaque nyii. Ñimbeta tuchi cote. Mbae eĩ na, i que Jesús ñee nda.

Levadura rã ño Dios rimba re

³³ Jesús que ejemplo mo senei mbia je ra. —Levadura rã ño Dios rimba re. Sã mbia levadura ñetẽ mondo mbichae ao ramo mose no. Sã levadura riqui oso mbichae mbuchimatã ja no. Eĩ si chõ Dios rimba re, i que Jesús ñee nda.

Jesús ejemplos senei tuchi mbia je

³⁴ Eĩ ño ngue Jesús quia mbia tubiriã mbaaquiato quiato ejemplos je ra. Ejemplos achõ ngue esenei senei mbia mbaaquiato sacua nda. ³⁵ Nyebe Dios cheẽ mbuchecua chimbesa ique cote. Eĩ ño echimbese re: Ejemplos je mbia tambaaquiato quiatu. Ae mbia icuayã mbeite quia nae, ùquĩ tambuchecua mbia je, i que embesa ji ra, i que Jesús ñee nda.

Jesús ejemplo mbuchecua nyu eĩ nii

³⁶ Jesús que mbia mondo ja cote ra. Aquere que esi ique tuchu a mo nda. Echimbaaquiato que ecurubite ñee ee ra. —Ae ejemplo eresenei mbia je nyu eĩ nii nae, ùquĩ embiasa jiri ure je, i que ñee ee ra. ³⁷ Jesús que ñee ee ra. —Ae trigo eĩ mombiquia mbiquia nae, se rã ño ae re. ³⁸ Ae ibii emombiquia mbiquia nae, mbia ja rã ño ùquĩ ibi re. Trigo eĩ turã na ño Dios quiato re. Nyu eĩ icuã na ño diablo quiato no nde. ³⁹ Ae mbae eĩ icuã mombiquia mbiquia nae, aba checuayã nderecua rã ño ùquĩ nde. Mbae a ishao shao raanguia ra ibi ua mose cote. Mbae a ishao shaosa rã ño angeles re. ⁴⁰ Sã mbia riqui nyu mombo mombo tátaa nae, eĩ si ra Dios uquiatoã mombo tátaa ibi ua ja mose

no. ⁴¹ Serimba ángeles ra amondo mbi a rea rea ja. Ae mbae icuã saã uquia quia mbia je nae, serimba ra ũquĩ sirõ ja. ⁴² Serimba ra ũquĩ mombo mondo tata cuásuu. Nyeseo seo tuchi ra tátaa. Huee ra ureĩ quiti quiti tuchi. ⁴³ Ae Dios mbuturã nae, ũquĩ nininya tuchi ra tenda rã si cote. Eru ibatenda siqui mose mbia rerecuarã tuchi.

Tesoro rã ndei Dios cheẽ

⁴⁴ Dios cheẽ nguiĩrĩ nii ndei eturã tuchi mbae ja si. Eturã tuchi tesoro si no. Sã amei mo tesoro ati ji rea íbii no. Tesoro turã tuchi que ee ra. Amei ia tuchi que erea mose ra. Sã amei vender i ja umbae je no. Aque ibi isi sacuã. Tesoro mii ndese ndua.

Dios cheẽ ndei perla turã na

⁴⁵ Dios cheẽ nguiĩrĩ nii ndei eturã tuchi mbae ja si. Sã comerciante mo perlas turã ndequia requia no. ⁴⁶ Perla turã tuchite mo ndea mose, aque mii ndese chõ eriqui nguiã ndua ndua cote. Sã vender i ja umbae je aque perla ribishorõ no.

Dios ra mbia icuã quirirõ

⁴⁷ Sira mbua mbua ji rã ño Dios rimba re. Sã emo tarafa mondo ii no. Sira chumumbarate que embua ra. ⁴⁸ Sã sira mbuasa mbisẽ tuchi riqui no. Sã echa econosẽ serao usẽ cote no. Echa que ngoi sira turã irabo rabo cote ra. Sira icuã ndirirõ ndirõ emombo sacuã. ⁴⁹ Eĩ si ra Dios mbae ua ja mose. Dios ra ángeles mbu mbia icuã mombo sacuã mbia turã si. ⁵⁰ Eicuã nda emombo tata cuásuu. Nyeseo seo tuchi ra tátaa. Huee ra ureĩ quiti quiti tuchi. ⁵¹ ¿Secheẽ jẽicuate rei quia ã nde? i que Jesús ñee mbia je ra. —Ae, i que ñee Jesús je ra. ⁵² Jesús que ñee ee ra. —Embesasa mo siqui mose serese, mbaecha rã ño aque re. Sã mbaecha riqui umbae ima ndirõ mbia je emo mose no. Umbae yasu abe rirõ emo mose no, i que Jesús ñee mbia je ra.

Mbia Nazaret jenda Jesús isiteã

⁵³ Jesús que ũquĩ ejemplos senei ja mbia je ra. Hue si que esi cote ra. ⁵⁴ Oso que ngasẽ nguecua Nazaret cote ra. Oso que mbia mbaaquiato judíos chumunuásaa ra. Nyebe mbia nyuruira tuchi nguiã ñee nyue. —¿Mangue eriqui ñimbaaquiato tuchite re? Nandemae sayã esaã saã tuchichĩ nguia re. ⁵⁵ Ira mbitirõ tirõsa ririĩ ño ndaque. María abe ririĩ ño ndaque no. Jacobo nongue chõ ndaque. José abe no. Simón abe no. Judas abe no. ⁵⁶ Æ echari abe riqui ja raque nanderese ã. ¿Mañi equia mbae i cua ja tuchite re? i que mbia Jesús recu a jenda ñee nyue ra. ⁵⁷ Nyebe mbia hue jenda riqui Jesús isiteã nde. Jesús que ñee ee ra. —Dios cheẽ mbuchecuasa ishonda cheẽ nguia ra mbia isi turã mbei. Nguecua jenda cheẽ achõ nguia ra eisi turã eã. Ngõngue cheẽ achõ nguia ra eisi turã eã no, i que Jesús ñee nguecua jenda je ra. ⁵⁸ Hue jenda mbia que Jesús icua eãte ra. Isiteã ño ngue ra. Nyebe Jesús mbia mae sayã naa eã jiri nguiã ee huee.

14

Mbia Juan el Bautista iquia

¹ Mbia que jirandu ja Jesús rese cote ra. Herodes abe que jirandu erese ra. Ererecua que ae ra. ² Juan el Bautista Jesús riqui reĩ ee reaẽ. Ae que ñee ngũimba je Jesús riĩ nda. —Sechiiquia quera si chõchĩ. Juan el Bautista quera si chõchĩ. Nyebe eriqui nguiã mbia mae sayã naa naa co, i que Herodes ñee Jesús riĩ nda. ³⁻⁴ Herodes que Juan isi icuã nyii ra. Nyucua que mondo tarõ nda. Paama i nda Juan je ra. —¿Nde ndenongue ninisi erereco aroneate jẽ! i quiato que Juan ñee ee nyii ra. Herodes siqui mose nõngue ninisi rese. Herodías, i que enongue ninisi je ra. Felipe, i que enongue je ra. ⁵ —Juan taiquia, i rei que Herodes ñee nda. Mbia ataque quiarei siqui tuchi Juan ndese. Dios cheẽ mbuchecuasa, i chõ mbia nguiã Juan je. Nyebe Herodes siquiche jiri nguiã Juan iquiayã aque mose. ⁶ Herodes mbae cumpleaños mose, Herodías ririĩ ngue nyuruqui ruqui mbia ja je aque mose ra. Nyucuaaque que ae ra. Herodes ia tuchi que mae nyucuaaque nyuruqui rese ra. ⁷ —¿Mbae ra amee ndeje re? Echeẽ ño seje. “Sebite co” nde i mose, aque tamondo

ndeje. Acheẽ ñooño eã ño nguiã ndeje a, i que Herodes ñee nyucuaaque je ra. ⁸ Esi quia ñee ñee nguia nyucuaaque je nyii reaẽ. Nyebe nyucuaaque ñee nguiã Herodes je. —Juan el Bautista ãquĩ emee na seje mbia chiu riru ye, i que nyucuaaque ñee ererecua Herodes je ra. ⁹ Ererecua chosoi que oso serĩ tuchi echeẽ andu mose ra. —Acheẽchĩ se quia ee. A seresenda chi ja quiaru serese a resẽ. ã seandu ja chõchĩ. Nyebe ra secheẽ ambuchebi eã ee, i que ererecua uchiangui re ra. —Juan ãquĩ emee ee, i que ngũimba je cote ra. ¹⁰ —Juan ãquĩ jendoso oso cárcel. Jemondo nyucuaaque je, i que ra. ¹¹ —Juan ãquĩ ngue ecurucuaẽ mbia chiu riru ye cote ra. Mee ngue nyucuaaque je cote ra. Nyucuaaque que emee usi je cote ra. ¹² Juan ñimbaaquiatu que ngaẽ Juan ndaaque rea ra. Nyati que suruchoi ra. Nyoĩ que Jesús mbiirandu erese cote ra.

Jesús mbichae tubiriã saã mbichae miije

¹³ Jesús jirandu mose Juan ndese que esi turúquiaa ra. Ama ndui que esi canoa ye ra. Mbua que jirandu randu erese ra. Nyebe nyoĩ ja nguiã erui ibi rĩ. Sucha ja ja jenda. ¹⁴ Jesús que usẽ canoa si cote ra. Mbua tubiriã ndese que mae nda. Eya eã tuchite que erese ra. Erasi que embucherõ cherõ nda. ¹⁵ Tenda nyeseco mose que echimbaaquiatu ñee ndei ee ra. —Mbae ãte a turúquiaa. Tenda abe nyesecote. Mbua emondo rã sucha tubiriã nia. Sã echoi bei uchiurã isi, i rei que echimbaaquiatu ñee Jesús je ra. ¹⁶ —Sã echoi eã. Jeño mbae jemondo ee echiurã, i que Jesús ñee ee ra. ¹⁷ —Tei. Mbae quia ra aba mondo ee. Cinco chõ ngue mbichae ra. Sira abe nyeremoñote nyeresẽ, i que echimbaaquiatu ñee Jesús je ra. ¹⁸ —Jembu rã seje, i que Jesús ra. ¹⁹ Ñee ngue mbua tubiriã je cote ra. —Jengoi ja quiata tose, i que ra. Jesús que mbichae cinco sirõ cote ra. Sira nyeremo abe no. Mae ngue ibate ra. Gracias, i que ñee Dios je ra. Mbichae que esiquio quio cote ra. Mee ngue uchimbaaquiatu je ra. Echimbaaquiatu que emee mee mbua ja je cote ra. ²⁰ Mbua que embuquiaru ja tuchi cote ra. Miãtã tuchi que ra. Mbua huisa tubiriã ngue cote ra. Sira rire. Mbichae rire abe no. Doce iru que mbua mombisẽ esique sique je ra. ²¹ Ae mbichae u sira rese nae, etubiriã tuchite que ra. Cinco mil ndobei. Cuña abe etubiriã. Mbua riirĩ abe etubiriã no.

Jesús ngata i arõ

²² Aquere que Jesús uchimbaaquiatu mondo ja canoa ye ra. —Jẽ nane jẽso sobei. Mbua tambui turã na mondo uchuchúaa se nyii, i que ra. ²³ Jesús que mbua tubiriã mbui turã mondo uchuchúaa cote ra. Ae ae que oso sita ibate rĩ cote ra. Ñee sacua Dios je. Hue que ae ae riqui itondaru chee ra. ²⁴ Canoa yenda que chi bei quia ama ite rĩ nda. Quiririã ngue tu icua icua ee ra. I rebera que tu asi asi tuchi ee ra. ²⁵ Nguira cheẽ mose que Jesús ngasẽ ee ra. I arõ ngue esi quia ngata ra. ²⁶ Echimbaaquiatu que mae erese ra. Echiã ngue cuaãcua i tuchi ra. Ngata mose i arõ. —Aba checuayã ño tu nguiã aque, i rei que tasẽ tasẽ nda. Siquiche tuchi que ra. ²⁷ —Jẽsiquichechĩ nguiã. Se chõ nyeresẽ, i jeite que Jesús ñee ee ra.

²⁸ Pedro que ñee ee ra. —Nde mose, echeẽ seje. “Echu ngata i arõ”, ere seje, i que Pedro ñee Jesús je ra. ²⁹ —Quiatuchu, i que Jesús ñee ee ra. Ae Pedro nguichi nguiã canoa si i rese irõ. Oso nda ngata i arõ Jesús rea chã nde. ³⁰ Pedro mae mose quiririã icua ndese que esiquichete ra. I que oso quia ñiimi nda. —¡Sererecua! ¡Senonosẽ na se! i que ñee Jesús je ra. ³¹ Ae Jesús o mondo nguiã eo isi. —Seicuayã ñochĩ. ¡Mbaerã ereico seicuayãte re? i que Jesús ñee ee ra. ³² Ua mose canoa ye que quiririã tiba cote ra. ³³ Canoa yenda que ñee turãte Jesús je cote ra. —Dios rucucha tuchi chõ nde riqui re. ¡Ae bei jẽ! i que ee ra.

Jesús mbua Genesaret jenda mbucherõ cherõ

³⁴ Ngasẽ nyee que sobei cote ra. Genesaret, i que hue ibi je ra. ³⁵ Hue jenda que jirandu ja erese ra. Hue rurubinda abe que mbua mbiirandu erese ra. Mbua que er asi curucuaẽ cuaẽ ja Jesús je cote ra. ³⁶ —Sã mbua rasi oco oco rã ndeirao ai rese, i tuchi que mbua Jesús je ra. Ae oco erese nae, ũquĩ ngue nyerõ nyerõ ja ra.

15

Mbia chiangui renda ae chõ embiicuañguiã

¹ Aquere que fariseos mo ngaẽ ñee Jesús je ra. Embesasa mo abe que ra. Jerusalén jenda chõ ùquĩ ja re. ² Ûquĩ ngue ñee Jesús je ra. —¿Mbaerã ndechimbaaquiatu riqui nanderamei ñee mumba mumba beite re? Echoi quiiriã mbei chõ quiaru nguiã, i que ñee asite Jesús je ra. ³ Jesús que ñee ee ra. —¿Mbaerã jẽingo Dios cheẽ mumba mumba jẽ nde? Jenamei ñee ndese chõte jẽingochĩ nguiã ã. Siqui rocoĩ Dios cheẽ ndese. ⁴ Dios que ñee mbia je cose ra. “Jẽturã ño jẽingo jendu je. Jẽsi je abe no. Emo ñee icua mose ngu rĩ, ùquĩ jẽiquia. Emo ñee icua mose usi abe rĩ no, ùquĩ abe jẽiquia no”, i quia que Dios ñee mbia mbaaquiatu cose ra. ⁵⁻⁶ Dios cheẽ jenyabi tuchi chõchĩ nguia mbia mbaaquiatu quiatu ã. “Ae nda amee neĩ jẽje, ùquĩ ngue amee ja Dios je ra”, i mose emo ñee ngu je, “coche ñene” jenyẽ chõchĩ nguiã ee. Mbae mee eã mose ngu je. Usi abe je. Nyebe jẽingo nguiã mbia mbaaquiatu icua icua ùquĩ. Jenamei ñee achõ ño jẽsenei senei nguiã mbia je ùquĩ. Dios cheẽ nenei nenei ndocoĩ ee. ⁷ Jẽturã jẽsaã ñooño ño nguiã ùquĩ. Jeni tuchi chõ ngue Isaías embesa nguiã cose. Eĩ ngue Isaías embesa cose ra:

⁸ ã mbia ñee turã ndaque quia seje ã.

Uchiangui re quia eriquiãte nguiã serese ã.

⁹ Ñee turãte raque equia seje ã.

Amei ñee achõ ño esenei seneichĩ nguiã mbia je.

Dios cheẽ miñ nenei nenei ndocoĩ ee,

i que Isaías embesa jeniñ nda, i que Jesús ñee ucuasu raã naasa je ra.

¹⁰ —Jenyu rã secheẽ andu, i que Jesús ñee mbia tubiriã je ra. —Secheẽ jẽicua rã jẽñiangui re. ¹¹ Mbia chiu embiicuañ eã nguiã. Echiangui renda chõ embiicuañ nguiã. Echiangui renda chõ usẽ nguiã echuru rĩ echeẽ mose. Ûquĩ ño embiicuañ nguiã, i que Jesús mbia mbaaquiatu ra. ¹² Echimbaaquiatu que ngaẽ ñee Jesús ísaa cote ra. —¿Ereicuayãte ere? Ndecheẽ ngue fariseos mbupaama ite ra, i que echimbaaquiatu ñee nyecuayã ee ra. ¹³ Jesús que ñee ee ra. —Ae ira Paba Ibatenda chutã eã nae, ùquĩ nda esiqui ja erao resebe. Ûquĩ ira rã ño fariseos riqui nguiã ã. ¹⁴ Eresayã na ño fariseos riqui nguiã. Sã eresayã mo “ñeenda tateacuquia jẽje” i raque emo je no. Quiachã ja chõ ndae, i que Jesús ñee ee ra. ¹⁵ Pedro que ñee ee cote ra. —Erecheẽ ngue namo, “ùquĩ nda mbia mbicuañ” ere que, ùquĩ embuchecua rã ndecheẽ ure je, i que Pedro ee ra. ¹⁶ Jesús que ñee ee ra. —¿Jẽ abe jẽicuayãte quia re? ¹⁷ Ae mbia u quia nae, oso chõ nguiã erie ye. Echiique rui chõ eriqui nguiã oso oso. Usẽ nyee. ¹⁸ Mbia chiangui renda chõ embiicuañ nguiã usẽ mose echuru rĩ. ¹⁹ Aba chiangui renda quia aba mundua icua icuañte nguiã. Nyebe mbia riqui nguiã emo iquia. Siqui siqui emo ninisi rese. Emo ndu rese abe no. Siqui siqui eruã ndese no. Mbae mbuquiachã quiachã no. Ñee ñooño abe no. Ñee icua icua no. ²⁰ Mbia chiangui renda ja chõ ùquĩ nde. Ûquĩ ño mbia mbicuañ icuañ nguiã ùquĩ ao ao mose. Uchoi quiiriã mose quiaru, ùquĩ nguia ra mbia mbicuañ eã, i que Jesús ñee nda.

Ari mo Jesús icua

²¹ Jesús que nyoĩ hue recha cote ra. Ngasẽ ngue Tiro jii cote ra. Sidón jii abe no. ²² Ari mo Canaán jenda que siqui huee ra. Ae que tu ñee Jesús je ra. —David nducucha chõ nde re, Jesús. ¿Ndeyayã ño serese jẽ! Aba checuayã icuañ ndiqui seriirĩ mbasi mbasi co, i tuchi que ari ñee Jesús je ra. ²³ Jesús que ñee ãte ee ra. Echimbaaquiatu que ngaẽ ñee Jesús je ra. —Ari emondo chõ uchuchúaa. Eñi mbeichĩ ñee nande je a, i que echimbaaquiatu ñee Jesús je ra. ²⁴ Jesús que ñee ee ra. —Sã ovejas mo quiachã no. Ûquĩ na ño judíos riqui nguiã ã. Judíos achõ je chõ ngue Dios sembu nguiã, i que Jesús ee ra. ²⁵ Ari que tu ngoi ngũíã ndese ñee Jesús je ra. —Sererecua, seriirĩ embucherõ na seje, i que ari ñee Jesús je ra. ²⁶ Jesús que ñee ee ra. —Judíos rese rane taico mbae raã naa. Ahui aronea judíos si, mbae raã naa mbiamo je, i que Jesús ee ra. ²⁷ Ari que ñee ee ra. —Aicuate raque

se, Sererecua. Mbiamo ndaque ure. Judíos eã ndaque ure. Ure abe je chõ mbae esaã ae. Seririĩ embucherõ seje ae, i que ari ñee ee ra. ²⁸—Seicuate equia co, Ari. Nderiiriĩ tambucherõ ndeje, i que Jesús ñee ari je ra. Aque mosechi tuchi que eriiriĩ nyerõ nda.

Jesús mbia rasi chumumbara mbucherõ

²⁹ Jesús que oso hue recha cote ra. Oso que equia ama nimia ndui ra. Ama Ndisha Galilea nimia ndui. Hue si que esi sita ibate cote ra. Huee que ngoi huee ra. ³⁰ Mbia que ngaẽ ngaẽ tuchi quia ee huee ra. Erasi chumumbara rurucuaẽ cuaẽ tuchi ee. Ecuatayã. Eresayã. Echeẽ ngũĩã. Eo icuã. Mbia que ùquĩ ndasi chono ja Jesús i jii ra. Jesús que ùquĩ mbucherõ ja ra. ³¹ Nyebe mbia riqui nguiã nyuruirã tuchi mae erese. Echeẽ ngũĩã ñee turã mose. Eo icuã mbuturã mose. Ecuatayã ngata turã mose. Eresayã mae turã mose. Nyebe mbia ñee turã ja nguiã Dios riĩ.

Jesús mbichae tubiriã saã mbichae mii je

³² Jesús que ñee uchimbaaquiato ísaã cote ra. —Seyayãte aico ã mbia tubiriã ndese co. A echi arete serese tres días a. Embae mo eãte echiurã aa. Eriãcuã amondo sereãte echuchúaa. Eriãcuã nda eiquia ñeenda cúa, i que Jesús ra. ³³ Echimbaaquiato que ñee ee ra. —Turúquiaa chõ nandeico a resẽ. ¿Mañi nda aba ã mbuquiaru ja re? Mbae eã tuchite a resẽ, i que echimbaaquiato ñee Jesús je ra. ³⁴—¿Manya mbichae jembae re? i que Jesús ee ra. —Siete mbichae. Sira ñetẽ mo ndese, i que ee ra. ³⁵ Jesús que mbia mbucoi ja íbii ra. ³⁶ Mbichae que eisi ja o je ra. Sira ñetẽ abe no. Gracias, i que Dios je ra. Mbichae que esiquio quio mbia je cote ra. Sir a rese. Mee ja que uchimbaaquiato je cote ra. Ùquĩ ngue emee mee mbia ja je cote ra. ³⁷ Mbia que eu ja ñimbio chee ra. Mbichae sique sique que emunua nua ja ra. Sira sique rese. Siete iru que emombisẽ nyee ra. ³⁸ Mbichaecua rei mbia cuatro mil. Cuña abe abe. Mbia riiriĩ abe abe no. ³⁹ Jesús que mbia mondochoi ja cote ra. Jesús que ua canoa ye cote ra. Oso que Magdala quiti cote ra.

16

Mbia mae sayã eteacuquia ure je, i fariseos

¹—Tã nande rã Jesús je, i que fariseos ñee nyue ra. Saduceos rese. Nyebe ùquĩ ngaẽ nguiã ñee Jesús je. —Mbia mae sayã esaã na ure je. Í nda “Dios chĩmbu” ure tuchi ndeje, i rei que ñee Jesús je ra. ² Jesús que ñee ee ra. —Ibei jëicuate raque ùquĩ. Ibei ireĩ ndese jemae mose eresaitõ, “ama nda nyaaquíã” jenyẽ chõ nguiã eicua. ³ Ibei ireĩ ndese jemae mose eresaitõ ndabe, “nyaaqui rae”, jenyẽ chõ nguiã eicua ùquĩ no. Ibei jëicuate raque quia ã. Ae Dios teacuquia jëje nae, ùquĩ jëicuayã mbei chõchĩ nguiã ã. Ae ra tu icuãte mbia je nae, ¿mbaerã jëingo ùquĩ nguiatu icuayãte re? ¿Mbaerã jëingo jëaracua raã naa nde? ⁴ Mbia icuã ja chõ ã nde. Ae siqui ibi riĩ namo nae. Hui jate equia Dios si ã. “Mbia mae sayã esaã ure je”, i chõchĩ equia seje ã. Aque mii nda asaã jëje. Jonás na si ra asaã jëje, i que Jesús ñee nda. Oso que erecha cote ra.

Fariseos mbia mbaaquiato icuã, i Jesús

⁵ Jesús chimbaaquiato que uchiurã curuchoi eã nda. Tesarei que esi nyoĩ mose sobei ra. ⁶ Jesús que ñee ee ra. —Mbichae mbuchimatãsa rã ndei fariseos cheẽ. Saduceos cheẽ abe no. Ùquĩ ñee ndese ra jëingochĩ jë, i que Jesús ee ra. ⁷ —Mbichae quiato ngue nanderuã nguiã. Nyebe eriqui nguiã ñee nande je ùquĩ, i rei que echimbaaquiato ñee nyue ra. ⁸ Jesús que echeẽ ñee icuate ra. Nyebe ñee nguiã ee. —¿Mbaerã jëingo “mbichae nanderuãchĩ” i re? ¿Mbaerã jëingo seicuayãte re? ⁹ Ae riĩ aico ñee jëje nae, ¿ùquĩ jëicuayã mbeite quia re? Se mbichae mbeta mose ¿ùquĩ si jëtesarei chõ nde? Cinco mbichae mbeta mose mbia cinco mil je, ¿manya iru jemombisẽ mbichae sique sique je re? ¹⁰ Siete mbichae mbeta mose mbia cuatro mil je ¿manya iru jemombisẽ mbichae sique sique je no? ¹¹ Secheẽ mose jëje nyii, “mbichae mbuchimatãsa rã ndei fariseos cheẽ”, i mose jëje, secheẽ jëicua rã. Mbichae riĩ aico ñee ãte jëje co. Fariseos cheẽ ndese jëingo

eã sacua ño aico nguiã ñee jêje. Saduceos cheẽ ndese abe jêingo eã sacua, i que Jesús ra. ¹² Echimbaaquiato que eicua chee ra. —Mbi chae mbuchimatãsa rĩ eã ño eriqui ñee nande je re. Ae fariseos senei senei icua nguia mbia mbaaquiato nae, ũquí ñi ño eriqui ñee nde. Saduceo ñee ñi abe no, i que echimbaaquiato eicua ramo cote ra.

Cristo chõ nde resẽ, i Pedro Jesús je

¹³ Jesús que nyoĩ Cesarea de Filípoo cote ra. Huee que ñee uchimbaaquiato je cote ra. —Mbiarã ngue achu íbii ra. ¿Aba aico reĩ se mbia je re? i que Jesús ñee ee ra. ¹⁴ Echimbaaquiato que ñee ee ra. —Juan el Bautista ereico reĩ nguiã mbia je co. Elías ereico reĩ nguiã emo je no. Jeremías ereico reĩ nguiã emo je no. Dios cheẽ nenei neneisa mo ereico reĩ nguiã emo je no, i que echimbaaquiato ñee Jesús je ra. ¹⁵ —¿Aba aico reĩ jêje co re? i que Jesús ee ra. ¹⁶ —Cristo chõ nde resẽ. Dios ririĩ ño nde resẽ, i que Pedro ee ra. ¹⁷⁻¹⁸ Jesús que ñee Pedro je cote ra. —Ndeyate ereico co, Simón. Mbia mo nemiirandu eãte quia serese co. Paba Ibatenda mii ño nemiirandu nguiã serese. Jonás ndiirĩ ndei nde. Tacheẽ tuchi ndeje. “Pedro” i chõ equia ndeje co. “Sita” i ñi Pedro je re. Aque sita arõ ño nda sembae iglesia achao. Satanás nda esiquisã eãte. Satanás quirãcuãte raque. Mbia iquiasa raque ae no. Ae ra sembae iglesia siquisã eã mbei. ¹⁹ Mbae tamee ndeje. Llave tamee ndeje. Aque je ra Dios recua iquesa erembuquiata quiata mbia je. Mbia ique sacua. Ae je ra erembuqui ata, ũquí nda ique. Ae je ra erembuquiata eã, ũquí nda ique eã, i que Jesús ra. ²⁰ Jesús que ñee uchimbaaquiato ja je cote ra. —“Jesús rei Dios chimondo” jenyechĩ nda emo mbiirandu jẽ, i que ee ra.

Mbia ra seiquia, i Jesús

²¹ Aque mose bei que Jesús umano nonde senei senei uchimbaaquiato je ra. —Paba ra sererao Jerusalén. Huee ra amei seiruã nu a tuchi. Sacerdotes rerecua abe ra sembasi mbasi tuchi no. Embesasa abe no. Seiquia rae. Tres días mose ra aquera si, i que Jesús ñee ee ra. ²² Pedro que Jesús querao pe jiri ñee sacua ee ra. —Mbia ra jeĩ jeĩchĩ ndeje jẽ. Mbia ra ndeiquiachĩ jẽ, i rei que Pedro ñee asi ee ra. ²³ Jesús que uba ñee Pedro je ra. —Ehui chõ sesi, Satanás. ¿Mbaerã ereico seriquisã quisã nde? Mbia ndua rã ño ereico nguiã ndua. Dios ndua rã eã, i que ñee Pedro je ra.

²⁴ Jesús que ñee uchimbaaquiato je cote ra. —Emo siquise mose serui, sã hui ja mbae ubi si. Sã cruz umbaerã ndui se rã si. Sã eriqui serui bei cote. ²⁵ Emo ndua bei mose ngueco rese, ereco ra ua esi. Emo hui mose ngueco si seje, ũquí nda siqui bei. ²⁶ Emo ngueco mumba chooño mose, eya eã mbei rae. Mbaecha rete raque. Emo ngueco mumba chooño mose, mbae mo eãte ereco ribishorõ sacua. ²⁷ Dios ra sembu si íbii uquirãcuã je. Ibatenda rese ra achu ángeles. Ae mbae turã saã saã nguia nae, ũquí je ra mbae turã amondo se tu mose. Ae mbae icua saã saã nguia nae, ũquí je ra mbae icua amondo no. ²⁸ Tacheẽ nyecua jêje. A jengu a nae, jemo nda jemaesechu rese. Achu ra mbia rerecuarã tuchi cote. Jemo jemano eã mose r a achu mbia rerecuarã tuchi cote, i que Jesús ra.

17

Jesús nyicuabo uchimbaaquiato resaa

¹ Tenda seis uare que Jesús uchimbaaquiato mo nderao sita ibátee ra. Pedro. Jacobo. Juan abe no. Jacobo nongue rei Juan. ũquí ngue equerao ja mbia tiãsa ra. ² Jesús que nyicuabo erésaa ra. Eruba que ñimbiasu ra. Tenda nininya rã tuchi que eruba ra. Eirao abe nininya tuchi que ra. Eiraoshĩ nininya tuchi que ee ra. ³ Mbia nyeremo ngue nyecua u ibate si ra. Jesús nininya mose que echi ñee ñee erese ra. Moisés que enongue ra. Elías que enongue ra. ⁴ Pedro que ñee Jesús je ra. —Sembaaquiatusa, nandecu turãte a. Sucha ñetẽ uresaã saã na, ndebi mose. Enongue nmbaerã. Enongue Moisés mbaerã no. Enongue Elías mbaerã no, i rei que Pedro ñee Jesús je ra. ⁵ Pedro cheẽ mosete que ibeishĩ ndu eite ñi nda. Abamo ñee mo ngue echandu ibeishĩ qui re ra. —Co rei sebi tuchi seriirĩ co. Seya tuchite aico erese co. Echeẽ jeñandu bei quia, i que Dios ñee ee ibeishĩ qui re

ra. ⁶ Echimbaaquiato que siquichete eandu mose ra. Echeẽ mose que echoi nyaara nguie quiti ra. ⁷ Jesús que esichã oco oco erese ra. —Jẽhuã na. Jẽsiquichechĩ nda jẽ, i que ñee ee ra. ⁸ Echimbaaquiato soboiba mose que mae Jesús miĩ ndese cote ra.

⁹ I ecuaẽ nguia nguichi mose sita ibate si que Jesús ñee ee ra. —Ae rese jemaie namo nae, ùquĩ nda jẽsenei seneichĩ emo je jẽ. Seraaque quera si mose, aque mose ramo ño jẽsenei senei mbia je cote, i que Jesús ñee ee ra. ¹⁰ Echimbaaquiato que ñee ee cote ra. —¿Mbaerã “Elías rane nda tu Cristo si” i embesasa re? i que ñee Jesús je ra. ¹¹ Jesús que ñee ee ra. —Ae bei. Coche Elías rane tu nguia mbae mbitirõ ja. ¹² Elías que tu ra. Mbiam que eicuayãte ra. Mbiam icuã icuã jate que eriqui ee ra. Eĩ si ra mbiam icuã icuã seje no, i que Jesús ee ra. ¹³ Echimbaaquiato que Jesús cheẽ icua ramo cote ra. —Juan el Bautista rĩ ño eriqui ñee nde, i que Jesús cheẽ icua ramo cote ra.

Jesús aba checuayã jea mbiam riirĩ mo si

¹⁴ Ngasẽ ngue mbiam ja je cote ra. Emo ngue ngoi ngũĩã ndese ñee Jesús je ra. ¹⁵ —Serriirĩ embucherõ na, Sererecua. Tẽ i beite que equia ra. Titi titi i beite que equia no nda. Erasi tuchite. Ngoi coi beite tátaa. Ama ye abe ngoi coi beite. ¹⁶ “Serriirĩ embucherõ na”, ae rei ngue nguia ndechimbaaquiato je. Mbiam mbucherõ aquiata ño eriqui re, i que eru ñee Jesús je ra. ¹⁷ Jesús que ñee cote ra. —¿Mañi jenyie quia seicuayãte re? ¿Secheẽ jemumba tuchi chõ nguia re? ¿Ñimbirãcuã mbeite ra aba quia jẽje re? i que Jesús ra. —Eriirĩ jendu rã seje, i que cote ra. ¹⁸ Jesús que ñee asite aba checuayã je cote ra. Aba checuayã ngue usẽ eriirĩ si cote ra. Aque mose tuchi que eriirĩ nyerõ cote ra. ¹⁹ Aquere que echimbaaquiato ñee Jesús ísaa ra. —¿Mbaerã ureico aba checuayã jea aroneate mbiam si re? i que ñee Jesús je ra. ²⁰ Jesús que ñee ee ra. —Seicuayãte jiri quiato nguia ã. Tacheẽ nyecua jẽje. Sã mostaza eĩ ñetẽte riqui raque no. Jẽ seicua ñetẽ mose, mbae ra asaã ja jẽje. “Eso pe jiri”, jenyie mose co sita ibate je, siri ra oso pe jiri jeñee nguire. Jẽ seicua mose, mbae jẽ saã ja arondete. ²¹ Aba checuayã ngue ajea namo, ùquĩ nda jẽjea eã jeñee eã mose Dios je. Ûquĩ nda jẽjea eã, jẽhui eã mose jenyiu si, i que Jesús ñee ee ra.

Mbiam ra seiquia, i si Jesús

²² Galilea rĩ ngue Jesús riqui ngata uchimbaaquiato rese ra. Jesús que embaaquiato quiato quia ra. —Mbiarã ngue achu ra. Mbiam ra semee mbiam icuã je. ²³ Mbiam icuã nda seiquia. Tres nyaashĩ mose r a aquera si, i que Jesús ra. Echimbaaquiato ia eã tuchi que echeẽ mose ra.

Jesús mbae isiquia mondo impuestos pagar i sacua

²⁴ Ngasẽ ja que Capernaum cote ra. Ae impuestos isi isi quia Dios chuchua jenda nae, ùquĩ ngue nyoĩ ñee Pedro je ra. —¿Jenderecua impuestos mee eã nguia Dios chuchua jenda je re? i que ñee Pedro je ra. ²⁵ —Impuestos emee mee mbeite quia co, i que Pedro ee ra. Pedro que oso ique tuchúaa cote ra. Jesús rane ngue ñee ee ra. —I ere, Pedro. ¿Aba je mbiam rerecua riqui “impuestos jemee na seje” i re? I eã nda nguiri je. Mbiam je chõ nda ñee nguia, i que Jesús ee ra. ²⁶ —Ae. Mbiam si ra eisi, i que Pedro ñee ee ra. Jesús que ñee ee cote ra. —Eriirĩ nda impuestos mee eã ee resẽ. ²⁷ Dios riirĩ ndaque se. Impuestos nandemee ndei Dios chuchua jenda je. Sã mbiam ndua icuã eã nande rese. Quiato ama ndíshaa. Sira mbabasa emondo ii. Ae rane nda sira erembua nae, aque churu ye ra mbae isiquia mo eretea. Aque emee serao impuestos isi isiquia je. Sembae impuestos sacua. Nembae sacua abe no, i que Jesús ñee Pedro je ra.

18

Ererecua tuchi ra se, i jaaja Jesús chimbaaquiato nyue

¹ Aque mose que echimbaaquiato ñee jate Jesús je ra. —¿Aba ra ererecua tuchi urenderese re? i que ñee Jesús je ra. ² Jesús que ãquẽ mo mbucoi miĩ eite re ra. ³ Ñee ngue mbiam je cote ra. —Tacheẽ nyecua jẽje. Dios quiti jemba eã mose ra jenderecua eã mbei Dios. Mbiam riirĩ na jẽingoã mose ra jenderecua eã mbei Dios no. ⁴ Ae siqui quia cocheete

nae, ũquĩ nda mbia rerecuarã nyee Dios rese. Ae siqui quia mbia riirĩ n a nae, ũquĩ nda mbia rerecuarã nyee Dios rese. ⁵ Ae eturã ndiqui mbia riirĩ je serĩ nae, seje abe chõ eturã ndiqui nguiã.

Mbae icuã nda nandesã uquiachĩ emo je

⁶ Ae ra mbae icuã saã uquia seicuada mo je nae, ũquĩ nda mbae rasi saã tuchi cote. Ũquĩ nda aba mombo chõ ama ndisha ye nyii re chã. Sita resebe ecua ji mondo. ĩ nda mbae icuã naa uquia eãte rei seicuada je. ⁷ Mbae icuã nguiarei siqui bei tuchi mbia mbiã nonde. Ae ñee nguia mbia je nae, “mbae icuã esaã” i nae, eicuã tuchi chõ ũquĩ nde. Ae “mbae icuã esaã” i nae, ũquĩ nda mbae rasi saã tuchi cote. ⁸ Ndeo nemingo mose mbae icuã ndese, ndeo echisia mombo. Coche rei ra ereso ibate ndeo miĩ nderequia, siqui bei sacua huee. Ndei nemingo mose mbae i cuã ndese, ndei echisia mombo no. Coche rei ra ereso ibate ndei miĩ nderequia, siqui bei sacua huee. Oso rocoĩ tata cuásuu, ndeo nyeremo nderao. Ndei nyeremo nderao. Tata ra uqueã mbei huee no. ⁹ Nderesa nemingo mose mbae icuã ndese, nderesa echoo. Coche rei ra ereso ibate nderesa miĩ nderequia. Nemombo rocoĩ tata cuásuu, nderesa nyeremo nderao.

Oveja quiachã je

¹⁰ Seririĩ ñetẽ mo nda jẽucuãyãchĩ jẽ. Angeles riqui eraarõte ã. Angeles riqui Paba rese ibate pe. ¹¹ Se que achu quiachã je rea ra. ¹² Sã emo nimba quiachã oveja no. Cien ndei ngue erimba re. Co miĩ ngue quiachã ee ra. Aque esi quia quiachã je requia aque. Eataque recha. Noventa y nueve recha. ¹³ Tacheẽ nyecua jẽje. Echa quiachã je rea mose, eyate que erese ra. Eya tuchi que erese ovejas ataque si ra. Quiachã eã je si. ¹⁴ Sã jendu ibatenda abe no. —Sã aque miĩ quiachã eã seriirĩ ñetẽ mo, i chõ Dios nguiã co.

Emo mbae icuã naa mbei mose ndeje, etesarei sarei bei chõ

¹⁵ Nderesenda icuã mose ndeje, eso ñee ee. “Ã ngue eresaã mbae icuã nda”, ere chõ ñee eĩsaa. Ndecheẽ andu turã mose, nderesenda que eremitirõ turã nda. ¹⁶ Ndecheẽ andu sereã mose, emo abe erao ñee sacua ee. Aque miĩ nda reae. Nyeremo nda re no ae. Ũquĩ abe ñee sacua ee. Jeñee ja mose ee hue rĩ ja, jẽandu turã arõte. ¹⁷ Ũquĩ andu sereã mose, jeñee mbia chumunuásaa cote. Sã mbia ñumunua je ñee ja ee. Ũquĩ ñee andu sereã mose, jemombo chõ cote. Dios quiatoã naanguia jẽsaã ño ee cote. Mbia icuã naanguia jẽsaã ño nguia ee cote. ¹⁸ Tacheẽ nyecua jẽje. Jẽ mbae mo ndiquisã mose, Dios abe ra esiquisã. Jẽ mbae mo ndiquisã eã mose, Dios abe ra esiquisã eã no. ¹⁹ Tacheẽ nyecua jẽje. Jẽ nyeremo ndua turã mose hue rĩ sí, “co embu ure je” jenyẽ turã ja mose Dios je, Paba Ibatenda ra emondo jẽje. ²⁰ Jẽ nyeremo ñumunua mose seriĩ, aico chee nguiã jendese jẽite re huee, i que Jesús uchimbãaquiatu je ra.

²¹ Pedro que ñee Jesús je ra. —Seresenda icuã mbei mose seje ¿manya veces ra atesarei eicuã si re? ¿Siete veces ra re? i que Pedro ra. ²² Jesús que ñee ee ra. —Tei. Siete veces eã. Eata tuchi quia ñene. Setenta veces siete quia ñene, i que Jesús ee ra.

Jendesenda icuã si chõ jẽtesarei

²³ Sã ererecua mo ndiqui no. Dios rã si chõ ererecua re. Sã ererecua a cuenta raã naa ja ngũimba je no. ²⁴ Cuenta raã naa mose que erimba mo ndurucuaẽ ee ra. Aque que deber i tuchi quia ee ra. ²⁵ Mbae ãte que erimba mbae pagar i sacua nda. Nyebe ererecua ñee nguiã. “Embae je vender nande ja rã. Eriirĩ abe je vender nande. Eninisi abe no. Ae abe je vender nande. ĩ nda cuenta ua jiri”, i rei que ererecua ñee nda. ²⁶ Erimba ia eã tuchi que echeẽ andu ra. Ngoi que ngũĩã ndese ñee nguerecua je ra. “Sererecua, eico tochi chõ seje ae. Mbae tamondo ja chee ndeje”, i que erimba ra. ²⁷ Ererecua ia eã tuchi que erese ra. “Mbae emondo eã ndei seje pagar i sacua”, i chõ nyee que ee ra. Hui chõ nyee que esi ra. ²⁸ Erimba que usẽ ndei oso quia ra. Aque mosechi que ngasẽ nguesenda mo je ra. Deber i miĩte rei ee reaẽ. “Pagar ere rã seje”, i que echosoĩ isi ra. ²⁹ Eresenda que ngoi ngũĩã ndese ñee ee ra. “Eico tochi chõ seje ae. Mbae tamondo ja chee ndeje”,

i que eresenda ñee ee ra. ³⁰ “Nya” i chõ ngue enongue echeẽ mose ra. Cárcel chõ ngue ererao chee matã nda. Mbae mondo ja chee sacuaã ee. ³¹ Eresenda ataque ia eã tuchi que mae erese ra. Nyebe echoi nguiã ñee ererecua je. ³² Nyebe ererecua “echu” i nguiã ee. “Serimba icuãte chõ ereicochĩ nde re. Ae deber ere seje, ùquĩ ñii ngue acheẽ eãte ndeje. Seya eãte que nderese nde ñee mose seje nyii. ³³ ¿Mbaerã ndeya eã eã ño ndenongue rese nde re? Sã ñi seya eãte nderese nyii no”, i que ererecua ñee ee ra. ³⁴ Ererecua que paama i tuchi ee ra. “Jẽiruã nua tuchi, pagar i ja chee”, i que ererecua ñee mbia je ra, i que Jesús mbia mbaaquiato quiatu ra. ³⁵ —Eĩ sí ra Paba Ibatenda paama i jẽje, jẽtesareĩã mose jendesenda icuã si, i que Jesús mbi a je ra.

19

Jesús ñee mbia ngüinisi mombo je ri

¹ Jesús cheẽ uare que esi Galilea si cote ra. Ama Jordán ndobei que esi sobei cote ra. Judea bei chõ hue ja ibi re. ² Mbia que nyoi ja tuchi quia erui ra. Huee que mbia rasi mbucherõ cherõ tuchi ra. ³ Fariseos mo ngue nyoi Jesús riichã nda. —Tã nande Jesús je no. Ma ñee Dios cheẽ abi, i que ñee nyue ra. —¿Coche mbia ngüinisi jea ubiã mose re? i que ñee Jesús je cote ra. ⁴ Jesús que ñee ee ra. —¿Embesa ji rese jẽingo mae ate re? “Dios mbia ao mose, nyeremo ngue echao ra. Erãcuẽ ngue echao ra. Eninisirã abe que echao no nda. ⁵ Nyebe ra emo ndiqui ngüinisi rese bei. Ngu si isho. Usi si abe no. Ngüinisi rese siqui bei sacuaã. Co miã na siqui sacuaã nyiese”, i ñi embesa ji re. ⁶ Nyeremo siqui rã eã ño cote re. Co miã siqui rã ño ùquĩ cote re. Ae Dios mbucha nyiese nae, sã ùquĩ huĩ eã mbei nyesi, i que Jesús ñee ee ra ⁷ Fariseos que ñee ee cote ra. —¿Mbaerã Moisés ñee ùquĩ nde? “Jeninisi jea nonde, papel mbesa je jemondo ee”, i ee re, i que ra. ⁸ Jesús que ñee ee ra. —Jẽaquẽ átãte quiatu ngue re. Nyebe Moisés embesa nguiã jẽje ùquĩ. Ùquĩ i ate que Dios mbia ao ramo mose nyii ra. ⁹ Ae ngüinisi jea nae, eninisi siquiã ndaque emo ndese, eicuã tuchi chõ ùquĩ nde. Ae ngüinisirã mo ndeabe mose, adulterio i que ùquĩ je ra, i que Jesús ñee ee ra.

¹⁰ Echĩmbaaquiato que ñee ee ra. —Mbaeiaie mose ngüinisi jea mose ¿mbaerã nguiatu ra ngüinisirã ndea re? i rei que echĩmbaaquiato ñee nda. ¹¹ Jesús que ñee ee ra. —Mbia ja riqui ùquĩ icua eãte ã. Ae Dios mbaaquiato quiatu nae, ùquĩ miã ño siqui nguiã eicua ã. ¹² Ae eninisi sereã mbeite nae, ùquĩ nda siqui turã, eninisiã ndaque rae. Emo nyia o ji mose, ùquĩ abe ra siqui turã, eninisiã ndaque rae. Emo ngüinisirã nderequia eã mose Dios riĩ, ùquĩ abe ra siqui turã, eninisiã ndaque ra eno. Ae ra “coche seninisiã aico nguiã co” i mose, sã eriqui bei eninisiã, i que Jesús ñee ee ra.

Jesús mbia riirĩ isi turã turã

¹³ Mbia que nguiirĩ ngurucuaẽ cuaẽ nguia Jesús je ra. Jesús o noono sacuaã eãquĩ arõ. Jesús ñee sacuaã Dios je eriĩ. —¿Mbaerã jendiirĩ jendu quia co re? i rei que Jesús chĩmbaaquiato ñee mbia je ra. ¹⁴ Jesús que ñee nda. —Tei. Jẽhui chõ esi. Sã nguiirĩ ndurucuaẽ cuaẽ seje. Eĩ ño Dios rimba nguiã. Ucuasu raã naa eã. Mbia riirĩ na, i que Jesús ñee ee ra. ¹⁵ Jesús que o chono ñono mbia riirĩ arõ nda. Aquere que esi ngata cote ra.

Acuanĩndu mbaecha mo ñee Jesús je

¹⁶ Acuanĩndu mo ngue tu ñee Jesús je ra. —Mbia mbaaquiatusa turãte nde. ¿Mbae turã mo nda asaã Dios je semingo bei sacuaã nde? i que ñee Jesús je ra. ¹⁷ Jesús que ñee ee ra. —¿Mbaerã ereico eturã i seje re? Dios miã ño eturã ndesẽ. Nde ndeico beise mose, Dios cheẽ emumbayã ja, i que Jesús ñee e e ra. ¹⁸ —¿Mbae ra amumbayã Dios cheẽ nde? i que acuanĩndu ee ra. Jesús que ñee ee ra. —“Mbia mo nda ereiquiachĩ. Emo ninisi rese ra ereicochĩ. Mbae mo nda erembuquiachãchĩ. Erecheẽ ñooñochoĩ nda emo ñii. ¹⁹ Ndeturã ño nderu je. Ndeturã ño ndesi abe je. Sã erchesequa ndechiese no nae, eĩ ere si chõ nyesequa nde ji jenda rese”. Dios cheẽ ja chõ ùquĩ nde. Mbia echeẽ mumbayã sacuaã, i

que Jesús ñee acuanindu je ra. ²⁰ Acuanindu que ñee ndei ee ra. —Ūquĩ ngue amumbayã ja bei quia ra. Señetẽ mosenda bei. ¿Mbae mo abe ra asaã nde? i que acuanindu ñee Jesús je ra. ²¹ Jesús que ñee ee ra. —“Taico turã tuchi”, nde i mose, ã abe esaã. Nembae emondo mondo ja mbia mbaecha reã je. Nde ūquĩ naa mose, mbae tubiriã nda nembae, ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²² Acuanindu Jesús cheẽ andu mose que echosoi oso serĩte cote ra. Eyayãte que oso ra. Mbaecha tuchite quiatu ngue ae re.

²³ Jesús que ñee uchimbaaquiatu je cote ra. —Tacheẽ nyecua jẽje. Mbaranguiatu ãte mbaecha je ngasẽ sacua ibate siqui bei sacua huee. ²⁴ Sã ticuasú mo ndiqui oso aroneate ique aguja sorei rĩ no nae. Eĩ si chõ mbaecha no nde. Oso aronea ibate Dios rese, i que Jesús ra. ²⁵ Echimbaaquiatu que nyuruira tuchi echeẽ andu ra. —¿Aba quia ra oso Dios rea ibate re no? i que echimbaaquiatu Jesús je cote ra. ²⁶ Jesús que mae erese ñee ee ra. —Ae mbia saã aroneate quia nae, Dios miĩ ño nda esaã, i que Jesús ee ra. ²⁷ Pedro que ñee Jesús je ra. —Ure que urembae uresech a ja ra. Siqui sacua nderui. ¿Mbae ra ereme ure je re? i que Pedro ñee nda. ²⁸ Jesús que ñee ee ra. —Tacheẽ nyecua jẽje. Dios mbae mbiasu ja mose ra ererecua tuchi rei se cote. Mbia ra mae ja serese aque mose. Aque mose ra jẽ abe ererecua. Jẽ doce. Trono jaaja ra jembraerã cote. Judíos rerecua ja ra jẽ. ²⁹ Emo umbae secha ja mose siqui sacua serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi secha. Ae ngüinisi secha. Ae nguiirĩ secha. Ae umbae ibi secha no. Ūquĩ mbae ja ra asibishorõ tuchi cien veces. Aquere ra siqui bei tuchi Dios rese ibate cote. ³⁰ Ae rane eriqui nyii nae, ūquĩ nda siqui mbia rui tuchi cote. Ae siqui quia mbia rui tuchi nyii nae, ūquĩ nane nda cote, i que Jesús ra.

20

Ae rane eriqui nyii nae, ūquĩ nda siqui mbia rui tuchi cote

¹ Jesús que mbia mbaaquiatu quiatube no nda. —Dios rei mbia rerecua tuchi. Sã mbaecha mo ndiqui no. Sã mbaecha uva tubiriãte riqui embae no. Sã mbaecha mbia mo ndea rea umbae ishao shao sacua no. Nyaashĩ namo mose. ² “Denario miĩ tamondo mondo ja jẽje. Sembae ishao shao sacua tenda mondo chee”, i que emondochoi úcoo cote ra. ³ Tenda chui mose que mae emo ndecoteã eã ndese ra. ⁴ —Jẽ abe jẽso sembae ishao shao. Mbae mo tamee jẽje, i que ee ra. Nyoĩ que echeẽ mose ra. ⁵ Tenda nandeite re mose que echa emo mondo choi cote ra. Umbae ishao shao sacua. Eĩ si que echa tenda chaara ramo mose no nda. ⁶ Tenda ireĩ mose abe que mae emo ndecoteã eã ndese no nda. “¿Mbaerã jẽingo tenda mondochooño siqui rocoĩ mbae mo ndese a re?” i que echa ñee ee ra. ⁷ “Emo ngue ‘mbae mo esaã seje’ i ãte ure je ra”, i que ee ra. “Jẽso jẽ abe sembae ishao shao. Mbae mo tamee jẽje”, i que echa ee ra. ⁸ Itondaru ramo mose que echa ñee mbia reaquiatusa je ra. “‘Jenyu’ ere sembae ishao shaosa je. Pagar ere rã ūquĩ ja je. Ae ique ramo eresaitõ nae, ūquĩ nane je pagar ere. Ae rane ique nyii nae, ūquĩ je pagar ere hui bei cote”, i que echa ñee nda. ⁹ Ae ique eresaitõ nae, ūquĩ nane je que denario miĩ mee mee nda. ¹⁰ Ae rane ique nyii nae, ūquĩ ngue ñee ñee u nyue ra. “Eata jiri ra emee nande je reae. Nande rane ngue uva a nandeishao shao”, i rei que eu ñee ñee nyue ra. Ūquĩ je abe que denario miĩ mee mee nda. ¹¹ Pagar i mose ee que ñee asi asi echa je ra. ¹² “Ae ique ramo eresaitõ nae, ūquĩ ngue mbae ishao shao eã jiri resẽ. Eresaitõte que ique. Ure quiatu que tenda uremumba rei uva a ishao shao ndeje. ¿Mbaerã mbae isiquia ereme ee ure rã si chõ nde?” i que ñee echa je ra. ¹³ Echa que ñee ūquĩ mo je ra. “Mbae icua mo asaã eãte ndeje resẽ. ‘Denario miĩ’, nande que ñee nyii resẽ. ¹⁴ Quiatu nembae denario rerao cote. Ae ique ramo nae, ūquĩ je abe denario tamee mee nde rã si. ¹⁵ Sembae ae rese aico nguiã. Sembae amondose mose emo je, ¿amondo aroneate se re? Se sembae mee mose emo je, ¿ndebiãte ūquĩ nde?” i que echa ñee ee ra. ¹⁶ Ae rane eriqui nyii nae, ūquĩ

nda siqui mbia rui tuchi cote. Ae siqui quia mbia rui tuchi nyii nae, ũquĩ nane nda cote. “Jenyu serui” i tuchi Dios quia mbia ja je co. Mbia mii mii ño eisirõ sirõ nguiã co, i que Jesús ñee nda.

Mbia ra seiquia, i si Jesús

¹⁷ Jesús que ngata oso quia Jerusalén quti ra. Uchimbaaquiato que equerao mbia tiãsa ñee sacua ee ra. ¹⁸ —Co nyao quia Jeursalén co. Huee ra mbia semee sacerdotes rerecua je. Embesasa abe je. “Jesús jëiquia”, i ra serii. ¹⁹ Semee nda judíos eã je cote. Seiquia sacua. Mbia ra secheẽ saã saã. Seiruã nua abe ra eno. Sembucha chee ra iquia ira rese. Tres nyaashĩ mose ra aquera si, i que Jesús ñee ee ra.

Ererecuarã ure, i raque Jacobo, Juan ndese

²⁰ Ari mo ngue oso Jesús riichã nda. Jacobo si. Juan si. Zebedeo riiri ngue ũquĩ nda. Ari que oso Jesús riichã nguiiri ndese ra. Ngoi que nguiã ndese ñee Jesús je ra. —Mbae mo esaã na seje, i que ee ra. ²¹ —¿Mbae ra aba saã ndeje re? i que Jesús ñee ari je ra. Ari que ñee ee ra. —Ndeico mose ererecua tuchi, sã seriiri abe riqui ererecuarã nderese. Sã seriiri ngoi ja u ndejii. Enongue chĩ ngoi ndequito cuti. Enongue ndequiato cutiã no, i rei que ari ñee Jesús je ra. ²² Jesús que ñee ee ra. —Ae riĩ jëingo ñee seje nae, jëirandu turã eãte ũquĩ ndese. Ae rasi ra asaã tuchi nae, ¿ũquĩ ndasi ra jësaã jë abe re? i que Jesús ee ra. “Ae”, i que ari riiri ñee ee ra. ²³ Jesús que ñee ee ra. —Ae bei. Ae rasi ra asaã tuchi nae, ũquĩ ndasi ra jësaã tuchi raque jë abe. “Ererecuarã ure”, jenyje que seje, ũquĩ asaã aroneate se jëje. Paba ae quiato ra ũquĩ saã. Ae ebite, ũquĩ nda emii ererecuarã, i que Jesús ra. ²⁴ Echimbaaquiato ataque que jirandu erese ra. Echimbaaquiato diez. Paama i que Juan je ra. Jacobo je abe. ²⁵ Jesús que “jenyu” i ñee uchimbaaquiato ja je cote ra. —Mbia ataque rerecua riqui ucuasu raã naa tuchi ngũimba je ũquĩ. ²⁶ ũquĩ nda jësaãchĩ jë. “Ererecua ra se”, i mose jemo, sã aque riquichõ uataque rimbarã. ²⁷ Jemo “se rane jë” i mose, sã ũquĩ ndiqui bei mbae turã naa naa uataque je. ²⁸ “Sã mbia mbae turã naa naa seje”, ae eã ngue u ra. “Se quiato mbae turã tasaã saã mbia je”, ae u nguiã. Co achu quia mano mbia tubiriã ndiquicharõ sacua co, i que Jesús ñee nda.

Jesús mbia nyeremo ndesayã mbucherõ

²⁹ Jesús que ngata oso quia Jericó si ra. Uchimbaaquiato rese. Mbia tubiriã ngue nyoĩ quia erui ra. ³⁰ Eresayã nyeremo ngue chi ñeenda jie ee ra. Eresayã ngue jirandu Jesús ucuã rese ra. Ñeemombo mombo que Jesús je ra. —¿Sererecua! ¿David rucucha! ¿Ndeya eã ño urerese jë! i que eresayã ñee Jesús je ra. ³¹ —¿Jëquiriri chõ jë! i tuchi rei que mbia ñee ee ra. —¿Sererecua! ¿David rucucha! ¿Ndeya eã ño urerese jë! ibe que eresayã ñee Jesús je ra. ³² Jesús que tiba ñee ee cote ra. —Jenyu rã. ¿Mañi ae ra jëje re? i que Jesús ñee eresayã je ra. ³³ —Ureresa embuturã na, Urererecua, i que eresayã ñee ee ra. ³⁴ Jesús ia eã tuchi que erese ra. Oco ja que eresa rese ra. Aque mose tuchi que eresayã ndesa turã ja cote ra. Mae turã ngue cote ra. Jesús rui que echoi quia cote ra.

21

Jesús ngasẽ Jerusalén

¹ Jesús que Jerusalén curubite nyoĩ quia ra. Betfagé, i que hue sucha je ra. Ibi ibate mo abe que chĩ huee ra. Monte de los Olivos, i que hue je ra. Hue si que Jesús uchimbaaquiato nyeremo mondo ra. ² Ñee ngue ee ra. —Achi súchaa chõ jëso rã. Burro cuasa ra chĩ nguiiri ndese jëje huee. ũquĩ jenyura seru seje. ³ Emo ñee mose jëje, “¿mbaerã nda jenyura re?” i mose jëje, jeñee ee. “Nandererecua que ‘jendu’ i ra. Mondo jeibe ra jëje”, jenyje ee, i que Jesús ñee ũquĩ nyeremo mondo ra. ⁴ Embesa ji cheẽ io sacua ño ngue ũquĩ nda. I embesa ji huĩ a:

⁵ Jeñee Jerusalén jenda je.

“¿Sã jë! Jendererecua ru quia jëje burro ato co.

Ucuasu esaã saã eãte u quia co.

Burro ririĩ átoo eru quia co”, jenyee ee,

i que embesa ji huĩ nyii ra. ⁶ Ũquĩ nyeremo ngue Jesús mondo cote ra. Ae riĩ Jesús ñee ee nae, ũquĩ ngue nyecua ja ee cote ra. ⁷ Burro que ecuruchoi Jesús je ra. Huiĩrao que echono ñono burro quite arõ nda. Burro ririĩ quite arõ abe. Jesús que nyui eato cote ra. ⁸ Jesús que ngata rei oso quia burro átoo ra. Mbia tubiriã ngue huiĩrao mbiitee tee nyoĩ quia ibi riĩ enonde ra. Emo emo ngue sindo mbiitee tee ee no nda. Jesús oso sacuaã hue riĩ. ⁹ Mbia ia tuchi que tasẽ tasẽ nda. —Co nandererecua ru quia ngasẽte co. Co Dios chimbu ru quia ngasẽte nande je co. David rucucha ru quia co. Dios turã tuchi riqui nande je co, i tuchi que mbia quia ñee nda. Ae nyoĩ quia Jesús nonde nae, ũquĩ. Ae nyoĩ quia erui nae, ũquĩ abe no. ¹⁰ Jesús que ngasẽ Jerusalén cote ra. Mbia hue jenda ia tuchi que o o ja erese ra. —¿Aba co re? i tuchi que equia Jesús riĩ nda. ¹¹ Mbia ataque que echeẽ sibishorõ nda. —Dios chimondo chõ co re. Jesús i equia ee. Nazaret de Galilea jenda chõ ae re, i que ñee nda.

Jesús mbia mbusẽ Dios chuchua si

¹² Jesús que oso Dios chuchúaa ra. Huee que mbia riqui mbae isi isi bei ra. Mbae mondo mondo abe mbae isiquia ribishorõ. Ũquĩ ja que Jesús mombo hue si ra. Ae mbae isiquia sibishorõ shorõ nguia, ũquĩ mbae abe que embuchiichere chere ja mesa ra. Mesa aronda resebe. Ae nyurushi cuasu mondo mondo mbia je mbae ribishorõ nae, ũquĩ nenda abe que embuchiichere chere ra. ¹³ Jesús que ñee ũquĩ ja je ra. —“ Mbia cheẽsa Dios je”, i ra mbia Dios chuchua je”, i rei que embesa ji huĩ nda. Jẽ nguia jẽicuã tuchite Dios chuchu a je re. Mbae mbuquiachãsa chuchua jẽsaãte chi nguia ee, i que Jesús ñee asite ũquĩ je ra.

¹⁴ Jesús siqui mose Dios chuchúaa, mbia resayã ngue nyoĩ nyoĩ erea huee ra. Mbia cuatayã abe no. Jesús que ũquĩ mbucherõ ja ra. ¹⁵ Ererecua cuabẽte que chi mae icuã icuã erese ra. Sacerdote rerecua abe no. Embesasa abe no. Jesús chisaã turã ndese mae mose que paama ite ee no ra. —David rucucha turãte riqui co, i mose mbia ririĩ Jesús riĩ, ũquĩ mose que ererecua paama i ja Jesús je ra. ¹⁶ —¿Mbia ririĩ ñee erechandu quia re? i que ũquĩ ñee Jesús je ra. Jesús que ñee ee cote ra. —Ae. ¿Embesa ji rese jemae eãte re? “Dios ra mbia ririĩ mbucheẽ turã uturã niĩ”, i que embesa ji ra, i que Jesús ñee ererecua je ra. ¹⁷ Jesús que oso mbia rerecua recha ja cote ra. Sucha tubiriã abe recha. Oso que Betániaa nda. Huee que itõ nda.

Jesús ñee icuã higo i je

¹⁸ Isamamimbe que Jesús choi sí quia sucha tubiriã nda. Eriãcuãte abe que nyoĩ quia ra. ¹⁹ Higo i mo ndese que mae ñeenda jie ra. Siichã ndei que oso ra. Ea eãte que ee ra. Ero achõte chõ ngue ee ra. Nyebe Jesús ñee nguia higo i je. —Ndea eã mbei r a cote, i que Jesús ñee ee ra. Aque mosebe tuchi que esi quia ñimama mano nda. ²⁰ Echimbaaquiato que nyuruiira tuchi mae erese ra. —¿Mañi higo i quia ñimama asite mano nde? i que ñee Jesús je ra. ²¹ Jesús que ñee ee ra. —Tacheẽ nyecua jẽje. Ae asaã higo i je nae, jẽ abe ra ũquĩ jẽsaã serã sí, jẽ Dios jẽicua tuchi mose. Jeñee nyee ra sita ibate mo je. “Esiri rã oso am a ndisha ye”, jenyee chee ra sita ibate mo je. Sita ibate ra jeñee mumbayã jẽ Dios jẽicua tuchi mose. ²² “Ã emondo seje”, jenyee mose Dios je, mondo r a jẽje. “Dios ra emondo seje”, jenyee mose jeñiangui re, Dios ra emondo jẽje, i que Jesús ra.

¿Aba nembu re? i mbia ñee Jesús je

²³ Jesús que oso Dios chuchúaa ra. Huee que eriqui mbia mbaaquiato quiato ra. Sacerdote rerecua que nyoĩ ñee ee amei ndese ra. —¿Mbaerã ereico mbia mbaaquiato quiato Dios chuchúaa re? ¿Aba “ũquĩ esaã saã” i ndeje re? i que ererecua ñee ja Jesús je ra. ²⁴ Jesús que ñee ee ra. —Se rane tacheẽ jẽje. Se rane preguntar tae jẽje. Secheẽ jẽsibishorõ turã mose, ũquĩ mose quiato ra jeñee asibishorõ turã se abe. ²⁵ ¿Aba ñee Juan je re? “Eso bautizar i mbia je” i ee re. ¿Dios eã ño ere? Jeñee seje, i que Jesús ee ra.

Ererecua que ndua ndua ja u cote ra. Ñee ñee ngue u nyue ra. —¿Mañi nande ra echeẽ ndobeishĩ nde? “Dios que Juan mbu ra”, nande aroneate ñee ee. Nyebe ra ñee nande je. “¿Mbaerã jẽingo eãte erui re no?” i quiarei ra nande je. ²⁶ “Dios eã ngue embu ra”, nande aroneate ñee ee no. Mbia ataque ra paama i tuchi nande je. Juan quiato tuchi quiarei mbia, i que ererecua u ñee ñee nyue ra. ²⁷ Ererecua que ñee nyee Jesús je cote ra. —Ureicuayãte. Aba chõ Juan mbu bautizar i sacua mbia je, i que ererecua ñee ja Jesús je ra. Jesús abe que ñee ee cote ra. —Se abe tacheẽ eã ndei jẽje no. Ae “ã esaã” i seje nae, aque riĩ nda acheẽ eã jẽje no, i que Jesús ererecua je ra.

*Acuan*ĩndu ndua ndua si

²⁸ Jesús que ñeembe ee ra. —I ra ã jẽje reae. Sã amei mo ndiirĩ nyeremo no. “Quiatu rã uvas ishao shao seje”, i que amei nguiirĩ ndiqui je ra. ²⁹ “Nya” i rei que eriirĩ ndiqui ñee ngu je ra. Aquere que ndua si chõ oso uvas ishao shao ra. ³⁰ “Quiatu rã uvas ishao shao seje”, i rei que amei ñee nguiirĩ nduĩnda je cote ra. “Se quiatu taso, Paba”, i rei que ee ra. Osoã ño ngue ra. ³¹ ¿Ma ngu cheẽ mumbayã ũquĩ mo nde? i que Jesús ñee judíos rerecua je ra. —Eriqui chõ ngue ngu cheẽ mumbayã ndesẽ, i que ñee ee ra. Jesús que ñee ee ra. —Tacheẽ nyecua jẽje. Cuñandu ata ata riqui Dios cheẽ andu turã jẽsi ã. Impuestos isi isiquia abe riqui Dios cheẽ andu turã jẽsi ã. Ũquĩ nda siqui tuchi Dios rese jẽsi. ³² “Eĩ jenyẽ chõ siqui turã Dios je”, i rei que Juan el Bautista jembaaquiato quiatu ra. Jẽ nguiatu que echeẽ jemumbate ra. Cuñandu ata ata quiatu que echeẽ isi turã nda. Impuestos isi isiqui a rese. Ũquĩ ndese mae mose abe que jẽya eã eã jẽicuã ndese no nda. Jẽ echeẽ isi turã sacua.

Uva raarõsa icuã icuã nguerecua je

³³ ã abe jeñandu. Sã mbia ibicha mo ndiqui no. Sã eriqui uva i tiquia tiquia no. Sã etarõ no. Uva rique rirurã abe que echao ra. Sucha ibate mo abe que echao ra. Uco raarõ turã ja sacua. “Sembae uvas jẽsaarõ”, i que emo je cote ra. Ae que oso isho itõte cote ra. ³⁴ Uva quiche mose que ngũimba mo mondo rei umbaerã ndea ra. ³⁵ Uva raarõsa que erimba mbucuasẽ icuã ño nda. Iruã nua ño ngue ra. Echa que ngũimba nongue mo abe mondo rei erea ra. Eraarõsa que aque iquia ra. Enongue que echei chei tuchi mbuqui sita je ra. ³⁶ Eĩ eĩ mbei que eraarõsa quia echa rimba ja je ra. ³⁷ Aquere que echa nguiirĩ mondo erea cote ra. “Ireĩ ireĩ jiri ra seriirĩ si”, i rei que ra. ³⁸ Uva raarõsa mae mose erese que ñee nyue ra. “¿Co eriirĩ ndu quia co cote jẽ! ¿Nandeiquia rei jẽ! Ñ nda uvas nandembaerã ae tuchi cote”, i que ñee nyue ra. ³⁹ Eraarõsa que eriirĩ isi icuã cote ra. Curuchoi que pe jiri iquia ra. Mano ngue cote ra. ⁴⁰ ¿Mañi nda echa quia eraarõsa je cote re? i que Jesús ñee mbia je ra. ⁴¹ Mbia que ñee ee ra. —Echa ra eraarõsa icuã iquia ja cote. Uva i ra emondo emo je eraarõ sacua cote. Ũquĩ nguia ra embaerã mee turã turã ee equiche mose, i que mbia ñee Jesús je ra.

⁴² Jesús que ñee mbia je ra. —¿Ã embesa ji rese jemae ãte re?

Sã emo ndiqui tuchia ao sita je no.

Sita mo ngue equirirõ mombo ra.

Eicuãte eriqui reĩ nguĩ ee.

Aquere Dios emundua si erese. “Earonda sacua turambi chõ eriqui re”, i ndua si uchimombo rese.

Uchimombo que esirõ si cote ra.

Dios chiao chõ ũquĩ nde.

Dios chiao turã tuchi riqui nande je ã,

i ñi embesa ji re. ⁴³ Tacheẽ nyecua jẽje. Jenderecua eã nyee ra Dios cote. Ae mbiamo nda Dios icua nae, ũquĩ nderecua quia ra Dios cote. ⁴⁴ Ae ra ngoi aque sita arõ nae, ũquĩ nda huẽ. Aque sita ngoi mose emo arõ, ũquĩ nda mano no, i que Jesús ra. —Aque sita rã ndei se, i chõ ngue re.

⁴⁵ Sacerdote rerecua que Jesús cheẽ ñandu ja ejemplos ra. Fariseos abe echandu ja. —Urerĩ ño eriqui nguiã ñee co, i que ndua ndua ra. ⁴⁶ Paama i tuchi que Jesús je ra. Jesús nda eisi icuã nguiã ña. Siquiche quiatu que mbia si ra. —Dios cheẽ na si tuchi chõ Jesús riqui nguiã ñee co, i jate quiatu que mbia ataque quia ra.

22

Jenyu quiaru serese, i raque emo uquiato je

¹ Jesús que ejemplo mo senei mbia je ra. ² —“Jenyu serea”, i raque Dios quia emo emo je co. Sã ererecua mo ndiqui ñee mbia je no. “Jenyu quiaru serese”, i rei que uquiato je ra. Eriirĩ ngüinisi rea ramo mose. ³ Mbae quiche ja mose que ngüimba mo mondo rei mbia mbiirandu ra. Mbua que ngaẽ sereã nea ja chõ erea ra. ⁴ Ngüimba mo ngue emondobe rei erea ra. “Mbae quiche jate que ra. Ticuasú quira tuchi que equishĩ nda. Eriirĩ ngüinisirã isi ramo ndese jẽso mae. Jẽso quiaru erese”, i rei que erimba mbia je ra. ⁵ Ae je “jenyu” i nae, ùquĩ ngue echeẽ mumba ja chõ nda. “Co aso quia seco co”, i que emo nda. “Co aso quia mbae mo naa naa se co no”, i que emo no nda. ⁶ Mbua que teã teã ja ra. Ererecua rimba iruã nua ño ngue ra. Eiquia chee. ⁷ Ùquĩ mose que ererecua paama i tuchi ra. Soldados que emondo ngüimba iquiasa iquiasa iquiasa ra. Echuchua abe rei rei. ⁸ Ererecua que ñee ngüimba je cote ra. “Mbae quiche chi ja raque a. Ae je ‘jenyu’ ae rei nyii nae, sã ùquĩ ngaẽ eã. Eicuãte quia ñene. ⁹ Jẽso ñee mbia ja je. Ishonda ja je. ‘Jenyu ja ererecua ririĩ ngüinisi rerequia ramo ndese mae’, jenyu oso quia mbia mbuchesea sea”, i que ererecua ñee nda. ¹⁰ Erimba que nyoĩ mbia mbiirandu randu ja ra. Mbua turã mbiirandu. Mbua icuã abe mbiirandu randu no. Mbua que ngaẽ tuchi cote ra. Tuchua itãyã nyee que ra.

¹¹ Ererecua que ique mbia tubiriã ndese mae cote ra. Emo irao icuãte que chĩ ee huee ra. Tiru ererecua chimondo emingue eã ñochĩ nguia reaẽ. ¹² Ererecua que ñee ee ra. “Seriirĩ ndiqui ngüinisirã isi a resẽ. ¿Mbaerã ndeirao turã eremingue eã nde?” i que ererecua ñee ee ra. Ñee eãte que ererecua cheẽ mose ra. ¹³ Ererecua que ñee ngüimba je cote ra. “Co jẽisi jẽ. Eo jenyucua. Ei abe jenyucua. Jenosẽ serao mombo itaicuee itondaruqui re. Huee ra nyeseo tuchi. Huee ra ureĩ quiti quiti tuchi”, i que ererecua ñee nda. ¹⁴ “Jenyu serui” i tuchi Dios quia mbia ja je co. Mbua mii mii ño eisirõ sirõ nguiã co, i que Jesús ñee nda.

¿Impuestos ra uremee ererecua je re? i mbia ñee Jesús je

¹⁵ —Jesús nandembucheẽ icuã na. Ñ nda mbia paama i ee, i que fariseos ñee ñee nyue ra. ¹⁶ Nyebe fariseos uchimbacuaquiato mo mondochoi nguiã Jesús rea. Herodes chimbacuaquiato rese. Jesús mbucheẽ icuã sacua ño ùquĩ nde. Uturã ngue esaã ñooño Jesús je ra. —Jesús, co ereico mbia mbacuaquiato quiatu turãte co. Ndeturãte ereico mbia ja je co. Co ereico turãt e mbia mbuchiabiã co. Mbua erembacuaquiato quiatu turãte quia Dios icha riĩ co. ¹⁷ Nyebe urechu nguiã ñee ndeje a. ¿Coche mbia mbae isiqui a mee mee Romano nderecua je re? ¿Uremee nda ee re? ¿Uremee eã nda ee re no? i que ñee Jesús je ra. ¹⁸ Jesús que ùquĩ icuã icuate ra. Nyebe ñee nguiã ee. —¿Mbaerã jẽingo “Ñ nda Jesús ucheẽ nyabi”, i seriĩ nde? ¹⁹ Mbae isiquia mo jẽteacuquia imbu seje, i que ee ra. Mbua que eteacuquia ee ra. ²⁰ —¿Aba mbae nombre ñi mbae isiqui a rese a re? ¿Aba aiqui aingue abe ñi a re? i que Jesús ee ra. ²¹ —Romano nderecua, i que ñee Jesús je ra. Jesús que ñee ee cote ra. —Romano nderecua mbaerã jemee ño ee. Dios mbaerã jemee ño ee no, i que Jesús ee ra. ²² Mbua que nyuruirã jate u Jesús cheẽ andu ra. Nyoĩ ja que erecha cote ra.

Mbia raaque ra quera si, i Jesús

²³ —Mbua raaque ra quera eã mbei, i que mbiamo nguia ñee nda. Saduceos i que ùquĩ je ra. Ùquĩ mo ngue nyoĩ ñee Jesús je ra. ²⁴ —Sererecua, ã ngue Moisés mbesa nande je ra: “Emo mano mose eriiriã, sã enongue mano je ninisi rerequia erendaque re. Sã tiiriĩ ngõngue raaque riĩ”, i que Moisés embesa nande je ra. ²⁵ Eriqui mo ngue siqui urerese ra.

Seis que eribi ra. Eriqui que ngūinisirã quereco rei ra. Mano ño ngue tiirĩ ndocoĩ ngūinisi recha ra. Enongue que nguiqui checha quereco rei cote ra. ²⁶ Ae abe que mano ño tiirĩ ndocoĩ no nda. Ũquĩ seis que ngōngue cheecha quereco ja rei ra. Mano ja chō ngue tiirĩ ndocoĩ no nda. ²⁷ Eninisi eru cheecha que mano nyee chō cote no nda. ²⁸ Siete rei que eru nyii ra. Mbia raaque quera si ja mose, ¿abate ra equereco cote re? i que saduceos ñee Jesús je ra. —Ma Jesús ñee icuã, i chō ngue re. ²⁹ Jesús que ñee ee ra. —¿Mbaerã jëingo Dios cheẽ icua eãte ã nde? Jëingo Dios cheẽ abi tuchi ã. Jëingo Dios quirãcuã icua eãte ã. ³⁰ Ae raaque ra Dios mbuquera si nae, ũquĩ nda ngūinisi quereco eã mbei huee cote. Ũquĩ nda ngu quereco eã mbei huee cote no. Angeles rã mbei ra mbia riqui huee ibate cote. ³¹ Mbia raaque quera si rĩ ño ngue Dios jembiirandu rei ra. ¿Embesa ji rese jemae ãte re? ³² ã ño Dios cheẽ embesa ji re:

Abraham nderecua chō aico nguiã se co.

Isaac nderecua abe.

Jacob rerecua abe no,

i que embesa ji ra. ã ngue mano ndei nyii ra. Eresco siqui bei chō nguiã namo ã. Mbia raaque rerecua eã ño Dios re. Mbia reco rerecua chō ae re, i que Jesús ñee mbia je ra.

³³ Mbia tubiriã ngue chi nyuruira tuchi eandu ra. Jesús mbae icua ja mose.

Echesequa tuchi quia Dios rese

³⁴ Jesús cheẽ aquiatu tuchi que ra. Nyebe saduceos cheẽ mbutiba nguiã. Fariseos jirandu mose erese que ñumunua ñee nyue ra. ³⁵ —Se chō tacheẽ Jesús je. Ma Jesús ñee icuã, i rei que fariseo mo nda. Embesasa que ae ra. ³⁶ —Jesús, Dios cheẽ tubiriãte riqui ã ndesẽ. Mbia echeẽ mumbayã sacua. ¿Ma Dios cheẽ ndiita tuchi ma nde? i que fariseo ñee Jesús je ra. ³⁷ Jesús que ñee ee ra. —ã ño Dios cheẽ ndiita ã nde: “Echesequa tuchi quia Dios rese. Ndechiã je. Neaĩ je abe. Nendua ndua je abe”. ³⁸ Ũquĩ ño Dios cheẽ ndiita ũquĩ nde. Ũquĩ ño Dios cheẽ ñiinda ũquĩ nde. ³⁹ ã abe rei ũquĩ nduinda ã no: “Sã ereico nyesequa ndechiese no. Eĩ ere si chō nyesequa mbia rese”. ⁴⁰ Moisés chimbesa tuchi chō ũquĩ nde. Dios quiato cose ndare chimbesa ja chō ũquĩ nde, i que Jesús ra.

¿Aba rucucha Cristo re?

⁴¹ Fariseos chichō mose ñumunua ngue Jesús ñee ee ra. ⁴² —¿Aba rucucha Cristo re? ¿Aba jenye equia ee re? i que Jesús ñee ee ra. —David nducucha chō ñene, i que fariseos ñee nda. ⁴³ Jesús que ñee ee cote ra. —¿Mbaerã David “sererecua” i ee re no? Espíritu turã embucheẽ mose. ⁴⁴ ã ngue David ñee nda:

Dios que ñee Cristo sererecua je ra:

“Ecoi seji. Nde abe ra ererecua serese.

Ae ndeucuayãte quia nae, ũquĩ je ra ndequirãcuã ateacuquia tuchi.

Ndequirãcuã tuchi chee ra ũquĩ si”, i que Dios ñee sererecua je ra,

i que David ra. ⁴⁵ David sí chō “sererecua” i nguiã Cristo je. Cristo David rucucha mose, ¿mbaerã David “sererecua” i ee re? i que Jesús fariseos je ra. ⁴⁶ Ũquĩ ngue ñee aquiatuãte Jesús cheẽ ndibishorõ nda. Aque mose bei que mbia preguntar i eã mbei Jesús je cote ra.

23

Jesús ñee asi fariseos je

¹ Jesús que ñee uchimbaaquiato je ra. Mbia tubiriã je abe no. ² —Fariseos rã nda jëingochĩ jẽ. Embesasa rã abe ra jëingochĩ jẽ. “Ure quia Moisés chimbesa ureicuate nguiã ure ã”, i chō nguiã. ³ Coche jëingo nguiã echeẽ mumbayã ndaque. Erã sí quia nda jëingoã nguiã. Echeẽ turã turãte raque. Siqui turã eãte quiato nguiã. ⁴ Dios cheẽ embeta mbeta tuchichĩ nguia mbia je ã. Mbia echeẽ mumbayã aroneate chee quia ã. Eya eã eãte eriqui mbia rese ã. ⁵ Mbae turã naa mose, mbia mae sacua erese chō ũquĩ nde. Tiru huiirao ibi quitinda ai mbiicoi tuchi equia ã. Dios cheẽ mbesa ji echucua bei

quia uchiba cúa rese ã. Mbia mae sacua erese chõ eriqui nguiã ùqui naa naa ã. ⁶ Aba mbia eã tuchi fariseos. “Serendarã turã nguiatu se jẽ”, i tuchi equia mbia chumunua nua mose ã. ⁷ “Sã mbia ererecua i nande je”, i beite equia ã. Ebi tuchi “mbia mbaaquiatusa” i mose ee. ⁸ “Mbia mbaaquiatusa rei se”, jenyechĩ nda jẽ. Se mii ño jembaaquiatusa re. Nyiesenda chõ jẽ nde. ⁹ “Paba” jenyechĩ nda mbia mo je jẽ. Jendu mii ño siqui nguiã ibate pe. ¹⁰ “Ererecuarã se”, jenyechĩ nda eno. Se mii ño jenderecua re. ¹¹ Jemo siqui mingue mose, mbae raã naa mose uataque je, aque quia ra ererecuarã. ¹² Ae ucuasu raã naa nguiã nae, mbia ñetẽ nda Dios saã ño ùqui je. Ae siqui mingue quia nae, mbia rerecuarã ño nda Dios saã ùqui je.

¹³ Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jẽcuasu jẽsaã saãte quia ã. Jẽingo sereãte quia Dios rese ã. Mbia siquise mose Dios rese, jẽingo emingo eãte erese ã no. ¹⁴ Aba mbia eã tuchite jẽ. Eru cheecha mbae jembutiã tiã ñochĩ nguiã ã. Ñquinde jẽingo chõchĩ ñee oco oco Dios je ã no. “Í nda mbia mae nanderese” jenyechĩ equia ã. Nyebe ra Dios jembasi tuchi cote. ¹⁵ Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jẽcuasu jẽsaã saãte quia ã. “Jẽingo ure rui” jenyechĩ be chõchĩ equia mbia je ã. Ñqui mo siqui mose jendui, eicuã tuchi chõ ùqui abe cote re.

¹⁶ Aba mbia eã tuchite jẽ. Sã eresayã mo ndiqui emo ndesayã mbuti echiba rese no. Ñqui na ño jẽ nde. Jẽaquiata ño mbia mbaaquiata quiatuchĩ nguiã. “Jurar jenyechĩ mose Dios chuchua rĩ, coche jeñee jembuchebi nguiã”, jenyechĩ nguiã mbia je ã. “Jurar jenyechĩ mose oro Dios chuchua jenda rĩ, ùqui mose quiatu jeñee jembuchebi aroneate nguiã”, jenyechĩ nguiã mbia je ã. ¹⁷ ¿Oro quiatu i tuchi jiri Dios chuchua si re? ¿Mbaerã jẽaquiata riqui re? ¹⁸ “Jurar jenyechĩ mose altar rĩ, coche jeñee jembuchebi nguiã”, jenyechĩ nguiã mbia je ã. “Jurar jenyechĩ mose ofrenda altar jenda rĩ, ùqui mose quiatu jeñee jembuchebi aroneate nguiã”, jenyechĩ nguiã mbia je ã. ¹⁹ Eresayã na tuchi chõ jẽingochĩ nguiã. ¿Mbaerã jẽaquiata riqui re? ¿Ofrenda quiatu i tuchi jiri altar si re? ²⁰ Jurar jenyechĩ mose altar rĩ, earonda abe rĩ ño jẽingo nguiã jurar i ofrenda. ²¹ Jurar jenyechĩ mose Dios chuchua rĩ, Dios abe rĩ ño jẽingo nguiã jurar i. Dios abe quia siqui nguiã uchuchua huee. ²² Jurar jenyechĩ mose ibei rĩ, Dios renda abe rĩ ño jẽingo nguiã jurar i. Dios sí rĩ abe no.

²³ Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jẽcuasu jẽsaã saãte quia ã. Décimo jemee mee ndaque quia Dios je mbae ñetẽ ñi. Comino. Menta. Anís. Dios cheẽ ndiita quiatu jemumba mumbate nguiã. Dios jẽicua rã nyii. Jẽingo turã na nyii. Jẽya eã na mbia rese nyii. Aquere quiatu mbae ñetẽ jẽsaã cote. ²⁴ Sã eresayã mo ndiqui emo ndesayã mbuti echiba rese no. Ñqui na ño jẽ nde. Mbae ñetẽ jẽsaã turã turãte raque quia ã. Dios cheẽ ndiita quiatu jemumba mumbate nguiã. ²⁵ Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jẽcuasu jẽsaã saãte quia ã. Sã emo ndiqui i riru irei irei earonda no. Eimi nguiatu eirei quiiriãte re. Eĩ ño jẽ no nde. Jẽturã abe rã ño jẽaronda no nde. Jeñiangui renda quiatu eicuã icuãte re. Mbae quia jembuquiachã quiachãte nguiã. Mbae abe quia jenyosei icuã icuãte nguiã. ²⁶ Eresayã na tuchi chõ jẽingochĩ jẽ nde, Fariseos. Jeñiangui renda rane nguiatu jẽirei. Jẽaronda abe ra equishĩ cote.

²⁷ Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jẽcuasu jẽsaã saãte quia ã. Mbia raaque tãsa rã ño jẽingo nguiã. Eati ji turãte raque. Eimi ye quiatu mbia raaque quianguie chi nguiã hue. Eroo cuí abe no. ²⁸ Eĩ si chõ jẽ nde. Jẽaronda turãte abe rã ndiqui raque mbia je. Jeñiangui rend a quiatu eicuãte re.

²⁹ Aba mbia eã tuchite jẽ, Embesasa. Aba mbia eã tuchite jẽ abe no, Fariseos. Jẽcuasu jẽsaã saãte quia ã. Ae mbia turã mano cose nae, ùqui tãsa jembutiã turã mbeite raque quia ã. Dios cheẽ mbuchecua tãsa abe no. ³⁰ “Cose ureico mose, ñ nda ureicuã eãte rei

Dios quiato je. Ureramei na eã”, jenyete raque equia ã. ³¹ “Mbia iquia iquiasa riirĩ ño ure re”, jenyete equia ũquí. Jendu rã si tuchi jẽ. Mbia i quiasa. ³² Jenamei icuã na si chõ jẽingo no. ³³ Mbei tásie rã tuchi chõ jẽ nde. Eĩ jenyete bei oso quia aque ngasẽ nyee tata cuasu. ³⁴ Nyebe ra Dios cheẽ mbuchecuasa amondo mondo quia jẽje. Mbia mbaaquiatusa ra amondo jẽje. Mbia aracua abe no. Jẽ nda sechimondo emo emo jẽiquia. Emo emo nda jẽiruã nua mbia chumunuásaa no. Jẽico ico ra equia erese eiquia chee. ³⁵ Ae Dios quiato iquia iquia quia cose nae, ũquí ñi nda Dios jembasi cote. Sã mbia Abel iquia cose no. Sã mbia Zacarías abe iquia Dios chuchua jii no. Berequíás riirĩ ndei aque. Sã mbia Dios quiato iquia iquia bei cose no. ³⁶ ũquí ja riĩ nda Dios jembasi cote. Acheẽ nyecua quia jẽje a.

Jesús ia eã tuchi Jerusalén jenda rese

³⁷ Tacheẽ na jẽje, Jerusalén jenda. Seya eãte aicochĩ jendese co. Hue jẽingo mbia iquia iquia beite hue. Dios cheẽ mbuchecuasa iquia iquia. Dios chimondo abe iquia iquia no. Sã nguira riqui nguiire reaquiato mundo ujeoqui re no. “Eĩ tae jendeaquiato”, ae beite rei nguiã jẽje co. Secheẽ jẽisi sereã mbei chõchĩ nguia ã. ³⁸ ¡Aico jendecha a cote jẽ! ³⁹ Jemae mae eã nda serese cote. Sechube mose ibate si, aque ramo mose ra jemae serese cote. “¡Co chi Dios rucucha ru quia co cote jẽ!” i ra mbia seisi turã aque mose cote, i que Jesús ñee nda.

24

Mbia ra Dios chuchua mbucoi ja, i Jesús

¹ Jesús que oso usẽ Dios chuchua si cote ra. Ecuata mose que echimbaaquiato ñee ee ra. —Sã Dios chuchua turã tuchite jẽ, i que ñee ee ra. ² Jesús que ñee ee ra. —Tacheẽ nyecua rã jẽje. Ae rese jẽingo mae ã nae, ũquí nda mbia mbucoi ja cote. Sita mo nda chi eã nyichuarõ Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chõ ã nde

³ Jesús que chĩ ngoi huee ibi ibátee mo nda. Monte de los Olivos i que hue je ra. Echimbaaquiato que ngasẽ ñee eísaa ra. —¿Manosete ra ũquí nde? ¿Mbae ra urembiirandu nderese ndechu serĩ mose re? ¿Mbae ra urembiirandu mbae ua ja serĩ mose re no? i que echimbaaquiato ñee Jesús je ra. ⁴ Jesús que ñee ee ra. —Jẽtesa jiri quia jẽ. Mbia mo nda jembĩrĩ irĩchĩ ñee jẽje jẽ. ⁵ “Cristo chõ se re”, i ra mbia ñee ata atate jẽje. ũquí ñee nda jeñanduchĩ jẽ. ũquí nda mbia mbĩrĩ irĩ jate. Ñee ñooño je chõ ũquí nde. ⁶ Mbia ra guerras saã saã tuchi. Mbia ra ñee ñee tuchi quia nyĩquia iquia je riĩ. ũquí mose ra jẽsiquichechĩ jẽ. ũquí ja rane nda nyecua raque. Aque mose ra mbae ja ua eã ná. ⁷ Mbia ra guerras saã tuchi chee. Nyĩquia iquia tuchi rae. Mbia riãcuã tuchi ra aque mose no. Emo ñooñoa tuchi ra mbia rasi. Mangue chooñoa tuchi ra ibi nyere nyere. ⁸ Jembasi ramo mose chõ nda ũquí nde. Aquere ra jembasi tuchi cote.

⁹ Mbia icuã icuã tuchi r a jẽje serĩ. Nguerecua je ra mbia jenderao rao tuchi. Jẽiquia chee rae. Mbia mangue chooñoa jenda ra jẽucuyã tuchi serĩ. ¹⁰ Ae siqui quia serui nae, ũquí tubiriã nda hui sesi ũquí mose cote. ũquí nda nyiucuyã. ũquí nda nguerecua mbuqueta queta tuchi ngõngue riĩ. ¹¹ “Dios cheẽ mbuchecuasa chõ se re”, i ra mbia ñee ata atate jẽje. ũquí nda mbia mbĩrĩ irĩ tuchi. ¹² Mbia icuã icuã tuchi ra cote. Aba cheẽ mumba mumba beite ra cote. Mbia ra nyesequa eã tuchi nyiese cote. ¹³ Ae ra siqui bei serese, ũquí nda Dios mingo bei. ¹⁴ Sequiato r a Dios cheẽ turã senei senei ná mbia ja je nyii. Mangue chooñoã jenda ja je. Aquere ra mbae ua ja cote.

¹⁵ Dios cheẽ mbuchecuasa rei Daniel. Ae que embesa Mbae Mbutiãsa Icuã ñi nda. “Dios rendaque re taico se quiato”, i ra equia huee. (Ae ra mae nguia sechimbesa rese nae, sã ũquí eicua.) ¹⁶ Jemae mose Mbae Mbutiãsa Icuã ndese, jeña esi. Ae siqui quia

Judéaa, sã ùquĩ uchã jei choi ibi ibátee mo. ¹⁷ Ae ra siqui tuchia quite rese, sã ùquĩ iqueã nyoĩ uchuchua uquichi mose. Sã echoi chõ uchã hue si bei, umbae rirõ ndocoĩ. ¹⁸ Ae ra siqui úcoo, sã ùquĩ nyebiã ngaẽ huiirao rea. Sã hue si bei chõ echoi uchã. ¹⁹ Aba mbia eã tuchi ra emo ãquẽ ndiru rerequia mose aque mose. Nguirĩ mbuquiambu je abe no. ²⁰ “Nyiiseĩ mose eã urechã” jenyẽ Dios je. “Sábado mose eã abe urechã”, jenyẽ abe Dios je no. ²¹ Mbia ra mbae rasi saã tuchi aque mose. Mbae rasi que mbia saã eã jiri nyii ra. Aque ramo mose ra mbae rasi raã tuchi cote. Mbae ua bei sacua ño ùquĩ nde. ²² Ae rasi ra mbia saã tuchi nae, ùquĩ nda Dios mbujua jiri uquiato riĩ. Ì nda emo ñimbirãcuã eã tuchi rei ùquĩ ndasi je. ²³ “A Cristo riqui a jẽ” i mose emo jẽje, “nyia” jenyechĩ nda ùquĩ ñee mose jẽ. “Hue Cristo riqui hue jẽ” i mose emo jẽje, “nyia” jenyechĩ nda eno jẽ. ²⁴ “Cristo chõ se re”, ichõĩño nda mbia ñee ata atate jẽje. “Dios cheẽ mbuchecua chõ se re”, ichõĩño nda mbia ñee ata atate jẽje no. Mbia mae sayã nda esaã saã tuchi mbia mbiĩrĩ irĩ sacua. Ùquĩ Dios quiato abe chee mbiĩrĩ irĩ arõte. ²⁵ Ùquĩ nonde chõ aico nguiã jembirandu randu co. ²⁶ “Hue Cristo riqui turuquia hue”, ichõĩño nda mbia jẽje serĩ. “A Cristo riqui tuchia a”, ichõĩño nda emo jẽje serĩ no. Ùquĩ mose ra “nyia” jenyechĩ jẽ. ²⁷ Sã ama ndiqui pirirã i ibei resae ja no, eĩ nda sechu mose. Mbia ra mae ja serese. ²⁸ Sã urubu riqui mae ja mbae raaque rese no. Eĩ si ra seicua mae ja sechu rese no.

Dios riirĩ nda tube ibate sã

²⁹ Mbia ùquĩ ndasi raã ja mose r a tenda checuayã mbei cote. Nyasi abe no. Nyasitata ra ngoĩ ngoĩ. Ibei jenda abe ra quiata quiata chee cote no. ³⁰ Aque mose ra achu ibei rese. Senininya tuchi ra sechu mose. Sequirãcuã tuchi ra sechu mose no. Mbia ra mae ja tuchi sechu rese mangue chooñoa jenda ja. Mbia ia eã tuchi ra nyeseo mae mose serese. ³¹ Angeles serimba ra amondo corneta mbucheẽ sacua. Ùquĩ nda mbia sechiisirõ munua nua ja seje cote. Ishonda ja. Mangue chooñoa jenda ja.

³² Sã higuera riqui no. Sã ira mo ndiqui no. Ero quira usẽ j a mose, “iraro itõ ndacu ra cote”, i chõ mbia nguiã aque mose. ³³ Eĩ sí ra mbae ua ja nonde. Ae riĩ aico ñee jẽje nae, ùquĩ ndese jemaẽ mose, “mbae ra ua ja cote” jenyẽ ra cote. ³⁴ Tacheẽ nyecua jẽje. ã mbia riqui ngata ibi ã nae, ùquĩ emo emo nda manoã mbae ua ja nonde. ³⁵ Ibei ra ua. Ibi abe ra ua no. Secheẽ nguiã ra ua eã mbei.

³⁶ Manosete chõ nda mbae ua ja. Aico eicuayãte co. Mbia mo abe eicuayãte quia ã no. Angeles abe eicuayãte quia ã no. Paba miĩ ño eicua nguiã co. ³⁷ Sã Noé mosenda mbia siqui sereãte Dios rese cose no. Eĩ si ra mbia siqui sereã Dios rese sechu nonde no. ³⁸ Sã Noé mosenda mbia quiaru chooño no. Ndua rocoĩ Dios rese. Ngüinisirã ngue equereco chooño ndua rocoĩ Dios rese no nda. Noé que ique chee arca ye ra. Amandi cuasu nonde. ³⁹ Ama ngue uchi u quia mbia iquia ja nonde cote ra. Mbia mbua tuchi que ra. Eĩ ae ra u mbia mbua tuchi sechu mose. ⁴⁰ Sechu mose ra mbia nyeremo siqui úcoo. Co miĩ nda arao. Enongue ra siquichõ. ⁴¹ Cuña nyeremo nd a chi raque mbua tocho no. Co miĩ nda arao. Enongue ra siquichõ. ⁴² Jẽtesa bei quiatu quia serese. Ae mose ra achu, aque tenda rese jẽiranuate riqui ã. ⁴³ Mbaecha mo jirandu mose mbae mbuquiachãsa rese, “co isa ra eru” i mose, ùquĩ mose nda uqueã nde chaẽ. Ì nda mbae mbuquiachãsa mbae sirõ eã ndei. ⁴⁴ Jẽingoquiato bei quiatu quia seraarõ arõ. Jendua eã mose serese ra achu jembuate.

Erimba echeẽ mumbayã mose, eya tuchi rae

⁴⁵ Dios rimba aba cheẽ mumbayã je aico ñee a. Dios rimba aquiato je aico ñee a. Sã ererecua mo ñee ngüimba turã je no. “Sembae esaarõ turã ja quia secutiã. Serimba ataque embuquiaru quiaru turã secutiã”, i que ererecua ee ra. ⁴⁶ Erimba echeẽ mumbayã mose, ererecua ia tuchi ra eru mose. Erimba abe ra eya tuchi no. ⁴⁷ Ererecua ra ngüimba miĩ umbae raarõ mbei sacua cote. ⁴⁸ Sã erimba ndua ndua uchiangui re no. “Sererecua ra tu jei ãte” i ndua ndua. ⁴⁹ Hue ñee icuã icuã uataque je hue cote. Iruã nua cote. Quiaru chooño cote. Mbae mbei chooño abe cote. Quiacua quiacua mbia icuã ndese cote. ⁵⁰ Sã

ererecua ruchiŋŋuia ngũimba mbuate aque mose cote jẽ. ⁵¹ Ererecua ra eiruã nua tuchi. Mombo rae. Mbae rasi ra esaã tuchi. Ae ucuasu saã saã nguia nae, ũquĩ ndese ra mbae rasi raã tuchi cote. Nyeseo seo tuchi ra equia. Ureĩ nda equiti quitu tuchi.

25

Nyucuaaque icoquiato je

¹ Nyucuaaque icoquiato je rã si rei Dios rimba. Sã nyucuaaque diez nyoĩ quia emo ngũinisi nderequia ramo ndese maenno. Lamparina nendi que ecuruchoĩ ja quia ra. ² Cinco que icoquiato je ra. Cinco que icoquiatoũ je no nda. ³ Ae icoquiatoũ nae, ũquĩ ngue mbae quira curuchoĩ eã umbae lamparina mombisẽ sacuaã nda. ⁴ Ae icoquiato nae, ũquĩ ngue mbae quira curuchoĩ botella ye ra. Lamparina ye abe. ⁵ Ae ra ngũinisi isi reĩ nguia ee, aque que itõte ee ra. Nyucuaaque reesi esi chee que ra. Uque uque ja chee que ra. ⁶ Itondiite mose que to i andu cote ra. “Co erurã ndu quia co cote jẽ. Jẽso mae erese cote”, i que mbia tasẽ tasẽ ee ra. ⁷ Nyucuaaque que nyuruã ja cote ra. “Nandembae lamparina nandemombisẽ mbisẽ ja”, i rei que ra. ⁸ Ae icoquiatoũ nae, ũquĩ ngue ñee ndei icoquiato je ra. “Urembae uque uquete. Mbae quira ñetẽ jemee mee na ure je”, i rei que uataque je ra. ⁹ “Ateẽ. Nande ja chayãte ra resẽ. Emo jẽisi chõ oso icua”, i que icoquiato je ñee ee ra. ¹⁰ Nyoĩ rei que equia eisi cote ra. Ecutiã ngue erurã ndu cote ra. Nyucuaaque icoquiato je que nyoĩ ique erese ra. Ngũinisirã isi ramo ndese mae. Quiaru abe que ehoĩ erese ra. Eiquesa que ematã cote ra. ¹¹ Icoquiatoũ je abe que ngaẽ nyee ra. I que eiquesa matã ji mi ee ra. “Embuquiata rã ure je”, i rei que ñee eru je ra. ¹² Eru que ñee ee ra. “Tei. Jaẽicuayã tuchite se”, i que eru ñee ee ra, i que Jesús ñee mbia je ra. ¹³ —Jẽingoquiato bei quia jẽ. Ae mose ra achu, ũquĩ jẽicuayãte quia ã.

Ererecu a mbae isiquia mbuchao chao ngũimba je

¹⁴ Sã ererecua mo mbae isiquia mee mee ngũimba je no. Eĩ si chõ Dios nguia mbae mee mee ngũimba je. Ererecua oso serĩ mose que umbae mbae isiquia mee mee ngũimba je ra. Embaata ata sacuaã ño ngue emee nguia ee. ¹⁵ Cinco mil que emee emo je ra. Dos mil enongue je no. Un mil que enongue je no nda. “Jenyu chõ tamee mee jẽje jẽ”, i que ñee ee ra. Secha que oso isho cote ra. ¹⁶ Ae je ererecua cinco mil mondo nae, aque que negocio saã saã mbae isiquia je ra. Mbae isiquia que embaata tuchi ra. ¹⁷ Ae je ererecua dos mil mondo nae, aque abe que negocio saã saã mbae isiquia je ra. Mbae isiquia que embaata tuchi no nda. ¹⁸ Ae je ererecua un mil mondo nae, aque que ibi sibicoĩ mbae isiquia rerecoquiato sacuaã nda. ¹⁹ Emo mose tuchi que ererecua ru cote ra. Ñee ngue ngũimba je cote ra. “Jenyu sembiirandu sembae mbae isiquia rese cote”, i que ñee ee ra. ²⁰ Ae je cinco mil mondo nae, aque rane ngue tu ñee nguerecua je ra. “Cinco mil que ereme ndei seje nae, ũquĩ ngue ambaata ra. Cinco mil que aisibe ra”, i que emee ja nguerecua je ra. ²¹ Ererecua que ñee ee ra. “Coche ñene. Nde quiarei serimba turã tuchi. Mbae ñetẽ ngue eresaã turãte nde ra. Nyebe ra mbae tubiriã ereteaquiato seje cote. Ndeya bei tuchi ra ereico serese cote”, i que ererecua ñee ee ra. ²² Ae je ererecua dos mil mondo nae, aque que tu ñee nguerecua je cote ra. “Dos mil que ereme ndei seje nae, ũquĩ ngue ambaata ra. Dos mil que aisibe ra”, i que emee ja nguerecua je ra. ²³ Ererecua que ñee ee ra. “Coche ñene. Nde quiarei serimba turã tuchi. Mbae ñetẽ ngue eresaã turãte nde ra. Nyebe ra mbae tubiriã ereteaquiato seje cote. Ndeya bei tuchi ra ereico serese cote”, i que ererecua ñee ee ra. ²⁴ Ae je ererecua un mil mondo nae, aque que tu rei ñee nguerecua je cote ra. “Nde que ere queteãte quiato nguia mbae rese. Ndechitiquia eã abe ereishao shaote quia co. ²⁵ Nyebe asiquiche tuchi nguia mbae isiquia mee mose seje. Nyebe achati nguia ibi je. Co é co resẽ”, i que ñee nguerecua je ra. ²⁶ Ererecua que ñee ee ra. “Aba rimba biã tuchi quiarei nde. Ndetomei tuchi chõ eriqui re. Sequeteã mose mbae rese ndeje, ¿mbaerã secheẽ eremumba re? ²⁷ Sembae mbae isiquia eremonaõ ñochĩ banco. I nda eata jiri sechu mose cote re chã”, i que ererecua ñee asite ee ra. ²⁸ Ererecua

que ñee mbi a hue jenda je cote ra. “Mbae isiquia jēsirō na esi un mil. Ae diez mil quereco nae, aque je jemondo. ²⁹ Ae embae tubiriâte nae, aque je mbae tamondobe. Ae embae âte nae, embae ñetē tasirō ja esi. ³⁰ Co que serimba icuã tuchi ra. Jemombo itondaruqui re. Mbae rasi ra esaã tuchi huee. Huee ra nyeseo tuchi. Ureĩ nda equiti quiti tuchi”, i que ererecua ñee nda.

Jesús ra mbia emo emo mingó icúe umbaerã

³¹ Sechu mose íbii mbia rerecuarã, ángeles sembae ra semama tuchi aque mose. Serenda nininya tuchi ra aque mose. ³² Mbia mangué chooñoa jenda ja ra chí ñumunua huee aque mose. Mbia emo emo nda achono icúe sembaerã aque mose. Sã oveja raarōsa riqui ovejas no icúe chivos si no. ³³ Uquiato cuti ra ovejas no. Uquiato cutiã nda chivos no no. ³⁴ Eĩ ae ra se mbia rerecua tuchi mose. Acheẽ nda mbia sequiatio cutinda je. “Jenyu serese. Jenderecua turã tuchi ra aico jêje. Paba turâte riqui jêje co. Paba que jêirabo nyii mbae ao nonde ra. Jêingo sacua serese. ³⁵ Seriãcuã mose que mbae jemee seje ra. Seisei mose que sembiu ra. Sechuchua eã mose que seisi turã no nda. ³⁶ Seirao eã mose que tiru jemee seje ra. Serasi mose que jêso mae serese ra. Seico mose cárcel que jêso mae serese no nda”, ae ra ñee sequiatio cutinda je. ³⁷ Sequiatio cutinda ra ñee seje cote. “¿Manose mbae uremee ndeje nderiãcuã mose re? ¿Manose ureso nembiu ndeisei mose re? ³⁸ ¿Manose ure ndeisi turã ndechuchua eã mose re? ¿Manose tiru uremee ndeje ndeirao eã mose re? ³⁹ ¿Manose ureso mae nderese nderasi mose re? ¿Manose ureso mae nderese ndeico mose cárcel re?” i tuchi ra ñee seje. ⁴⁰ Aque mose ra acheẽ ee. “Tacheẽ nyecua jêje. Senongue mo mbaech a reã ndaque. Ae turã jêsaã senongue mo je nae, seje eraã naanguia chõ ùquĩ nde”, ae ra ñee ee. ⁴¹ Acheẽ nda sequiatio cutiã quitinda je cote. “Jêso sesi. Mbae turã nda jêisiã seo jenda. Jêso tata cuásuu. Ae Dios chíao tata, diablo mbasi sacua. Diablo rimb a abe mbasi sacua. Ùquĩ tata ra uqueã mbei. ⁴² Seriãcuã mose que mbae mo jemee eãte seje ra. Seisei mose que sembiu eãte no nda. ⁴³ Sechuchua eã mose que seisi turã eã nda. Seirao eã mose que tiru jemee eãte seje ra. Serasi mose que jêso eãte mae serese ra. Seico mose cárcel que jêso eãte mae serese no nda”, ae ra sequiatio cutiã quitinda je. ⁴⁴ Sequiatio cutiã quitinda ra ñee seje cote. “¿Manose mbae mo uremee eã ndeje nderiãcuã mose re? Ndeisei mose abe no. Ndechuchua eã mose abe no. Ndeirao eã mose abe no. ¿Manose uresoã nderea nderasi mose re? ¿Manose uresoã nderea ndereco mose cárcel nde no?” i ra sequiatio cutiã quitinda ñee seje. ⁴⁵ Acheẽ nda ee. “Mbae turã jêsaã eã mose emo je, seje eraã eã naanguia chõ ùquĩ nde”, ae ra sequiatio cutiã quitinda je. ⁴⁶ Ùquĩ nda nyoi ja tata cuasu cote. Huee ra mbae rasi raã mbei tuchi cote. Sequiatio cutinda quia ra siqui turã mbei ibate cote, i que Jesús ñee nda.

26

Jesú nandehi tarō, i ja ererecua nyue

¹ Aquere que Jesús ñee uchimbacuaquiatu je cote ra. ² —Dos días mose ra fiesta de la pascua cote. Aque mose ra mbia icuã semee ererecua je seiquia sacua, i que Jesús ñee nda. ³ Sacerdote rerecua que ñumunua ja cote ra. Amei ja rese. Embesasa rese abe no. Ùquĩ ngue ñumunua ja u Caifás itaicuee ra. Caifás rei sacerdote rerecua tuchi. ⁴ Caifás itaicuee que ùquĩ nyi ñee ñee Jesús rĩĩ nda. —Jesús nandembĩrĩ irĩ jê. Eisi sacua. Etarō sacua. Eiquia sacua cote, i que u ñee ñee nyue ra. ⁵ —Fiesta mose eã ño nandehi jê. Mbia ra paama i tuchi nande je, i que u ñee ñee nyue ra.

Cuña mo aba mbusimbusa turã ichusẽ Jesús aqũ ndese

⁶ Jesús que siqui Simón Leproso chuchúaa ra. Betania, i que hue je ra. ⁷ Cuña mo ngue tu erea hue ra. Aba mbusimbusa mo ngue equeru Jesús je ra. Embisẽ tuchi que equeru ra. Mbae isiquia mumbasa tuchi que ùquĩ nda. Ichusẽ ja que Jesús aqũ ndese equiaru mose ra. ⁸ Echimbacuaquiatu que chí ja mae erese ra. Paama i que cuña je ra. ⁹ —¿Mbaerã eichusẽ ñooño nde? Mbae isiquia ribishorō ño nda aba emondo re. Mbaecha reã je emee

mee sacua, i que echimbaaquiatu ñee nyue ra. ¹⁰ Jesús que echeẽ ñandu ra. Ñee ngue ee ra. —¿Mbaerã jëingo ñee ùquĩ nde? Sã cuña ae riqui ae. Ae esaã seje nae, eturãte seje ùquĩ. ¹¹ Mbaecha reã nguia ra chi arete íbii a. Se quia nda aico bei eã nguia jendese aa. ¹² Seati nonde chõ ngue cuña aba mbusimbusa ichusẽ nguia serese. ¹³ Tacheẽ nyecua jëje. Mbia Dios cheẽ turã nenei nenei mose mangue choõnoa jenda ja je, cuña nyisaã abe ra esenei senei. Mbia ndua turã ja sacua echisaã abe rese, i que Jesús ñee uchimbaaquiatu je ra.

Jesús tamee jëje, i Judas mbia icua je

¹⁴ Judas Iscariote, i rei que Jesús chimbaaquiatu mo je ra. Aque que oso ñee sacerdote rerecua je ra. ¹⁵ —Jesús tamee jëje. ¿Mbae ra jemee seje eribishorõ nde? i que Judas ñee sacerdote rerecua je ra. Sacerdote rerecua que mbae isiquia ata mee ee ra. Treinta que ra. ¹⁶ —Mbia eãsa quiatu Jesús tamee jëje, i que Judas ñee ee ra.

Jesús quiaru uchimbaaquiatu rese

¹⁷ Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. Fiesta nonde que echimbaaquiatu ñee Jesús je ra. —¿Mangue ra oveja urembuchi mangue ndechiurã nde? i que ñee Jesús je ra. ¹⁸ Jesús que ñee ee ra. —Jëso sucha cuasu. Jeñee aque je. “Jesús que urembu ñee ndeje ra. ‘Ndechuchua oveja tau sequiato rese semana nonde’, i que Jesús ucheẽ mbu ndeje ra”, jentye aque je, i que Jesús ñee nda. ¹⁹ Echimbaaquiatu que nyoí erea Jesús cheẽ nguire ra. Oveja que embuchi huee cote ra.

²⁰ Itondaru ramo mose que Jesús chi quiaru uchimbaaquiatu rese huee cote ra. ²¹ Quiaru mose que Jesús ñee ee cote ra. —Tacheẽ nyecua jëje. Jemo nda semondo mbia icua je, i que ñee uchimbaaquiatu je ra. ²² Echimbaaquiatu ia eã tuchi que echeẽ mose ra. —¿Se ra aremondo ee re? i ja jate que ñee Jesús je ra. ²³ Jesús que ñee ee ra. —Ae chĩ quiaru serese aque plato ye sí a nae, aque tuchi ra semondo mbia icua je. ²⁴ Dios cheẽ ndui sí tuchi ra amano ndaque. Ae ra semee mbia icua je, aque ra mbae rasi saã tuchi quia. Aba mbia eã tuchi ra aque. “Taĩ sembuchecua jirichĩ nguia curi”, i chee ra aque, i que Jesús ra. ²⁵ —¿Se ra aremondo mbia icua je re? i que Judas ñee Jesús je ra. Jesús riĩ ñeende mbia icua je nyii. “Ae” i que Jesús echeẽ mose ra.

²⁶ Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —Á mbichae jëu. Serete chõ ã nde, i que Jesús ñee ee ra. ²⁷ Vino mbeisa que esirõ cote no nda. Gracias i que Dios je ra. Mondo que uchimbaa quiatu oo cote ra. —Jembei mbei ja. ²⁸ Seruqui chõ ã nde. Mbia icua mbutiã sacua ño seruqui re. Dios cheẽ yasu rui si chõ seruqui riqui nguia mbia icua mbutiã co. ²⁹ Tacheẽ nyecua tuchi jëje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguia jendese cote, i que Jesús ñee nda.

Jesús aicuayãte resẽ, ichõiño nda Pedro seriĩ, i Jesús

³⁰ Irasei rasei que cote ra. Nyoí que Monte de los Olivos ra. ³¹ Jesús que ñee uchimbaaquiatu je ra. —Jëireĩ ireĩte ra seriĩ co isa. Jeñimboseĩ mboseĩ nda oso serecha co isa. Sã embesa ji riqui ñee no: “Dios ra oveja raarõsa iquia. Oveja ra ñimboseĩ nyoí cote”, sã embesa ji riqui i no. ³² Seraaque quera sire ra aso se rane jendaarõ Galilea, i que Jesús ra. ³³ Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireiã mbei ndesi, i rei que Pedro ñee ee ra. ³⁴ Jesús que ñee ee ra. —Tacheẽ nyecua ndeje, Pedro. Nguira cheẽ nonde ra erecheẽ ñooño tres veces seriĩ namo, Pedro. “Jesús aicuayãte resẽ”, ere choõño ño nda seriĩ, i que Jesús ñee ee ra. ³⁵ Pedro que ñee ee ra. —Mbia seiquia arõte raque nderiĩ, acheẽ ñooño eã nda nderiĩ, i rei que Pedro ra. Eĩ ja que ñee nda.

Jesús ñee ngu je

³⁶ Jesús que oso Getsemaní cote ra. Uchimbbaaquiato rese. —Jengoi rã u aa. Taso rã ñee Paba je pe jiri se, i que Jesús ee ra. ³⁷ Pe quití jiri que Pedro rerao ra. Zebedeo riirí nyeremo ndese. Eya eã ndasi tuchi que tu ee aque mose ra. ³⁸ Ñee ngue ũquí je ra. —Seya eã ndasi tuchi aico co. Seya eã ndasi ra seiquia chee. Jenguchō na jē aa. Jētesa tesa bei u aa, i que Jesús ñee ee ra. ³⁹ Jesús que oso pe quití jiri cot e ra. Nyibi que u ngũã ndese ñee Dios je ra. —Paba, ũquí ndasi asaã sereãte raque quia co. Ae sebite riqui nae, ũquí ndese semingo eã. Ae ndebite riqui nae, ũquí ndese quiato semingo, i que Jesús ñee Dios je ra. ⁴⁰ Nyebi que u uchimbbaaquiato je cote ra. † que eu uque ja ee cote ra. Ñee ngue Pedro je ra. —Jēingo areã ñochí tesa serese se ñee mose Dios je. ⁴¹ Jētesa tesa u. Jengue eã u ñee Dios je. Mbae icuã tã i eã sacuã jēje. Jēingo serete raque serese. Mbae icuã nguiato jembuti mbutite nguiã, i que Jesús ee ra. ⁴² Osobe que ñee Dios je pe jiri cote ra. —Paba, nde ñee mose seje, “mbae rasi ra eresaã” nde i mose seje, asaã nda se, i que ñee Dios je ra. ⁴³ Nyebi que u uchimbbaaquiato je cote ra. † sí que u uque ee no nda. Eresa quiato ngue eshiu shiute nguiã. ⁴⁴ Jesús que osobe erecha ñee Dios je ra. Tres veces que aque cote ra. Hue rí sí que ñee Dios je ra. ⁴⁵ Uchimbbaaquiato jii que esi ñee ee cote ra. —Jengue cote. Jenguenea jēucua cote. Semondo ra mbia icuã je cote. Seiquia sacuã. ⁴⁶ Jēhuã cote. Nyao cote. Ae ra semee mbia icuã je, co eru quia semee sacuã co cote, i que Jesús uchimbbaaquiato je ra.

Mbia icuã Jesús isi suruchoi

⁴⁷ Jesús cheẽ mosebe tuchi que Judas ru erea ra. Jesús chimbbaaquiato rei que ae ra. Aque rese que mbia cuaẽ tuchi quia ra. Tiquise abe que ecurucuaẽ nguia ra. Ira jua abe no. Sacerdote rerecua chō ũquí mbucuaẽ nguia reaẽ. Amei abe. ⁴⁸ Judas ñee nyecuayã nguiato quia ũquí je nyii reaẽ. —Ae ritii ra asiite, aque chō ñene. Aque jēisi serao, i quia equia ee nyii reaẽ. ⁴⁹ Jesús riichã ngue esi saludar i ee cote ra. Jesús ritii que esiite ee cote ra. ⁵⁰ —¿Mbaerã erechu serea re? i que Jesús ee ra. Mbia que ngaẽ Jesús isi ecua cote ra. ⁵¹ ũquí mose que Jesús rimba mo uchuuru sirō tiquise ra. Sacerdote rerecua rimba rese que tiquise uru ra. Eisa que echisia ra. ⁵² Jesús que ñee ee ra. —Ndechuuru emingue chō eriru ye. Nde emo nyiisha mose tiquise je, nde abe ra emo ndeisha. ⁵³ ¿Ndeiranuate ángeles rese re? Se ñee mose Paba je, ángeles tubiriã tuchi nda embu seje re chaẽ. Sereaquiato sacuã. ⁵⁴ “Ángeles embu rã sereaquiato”, ae eã nda Paba je. ũquí mose ra embesa ji ique eã cote. Sã embesa ji riqui ñee no: “Mbae rasi ra esaã tuchi” i no, i que Jesús ñee Pedro je ra. ⁵⁵ Jesús que ñee mbia ja je cote ra. —¿Mbaerã jenyu quia tiquise rurucuaẽ serea co re? Ira jua abe no. Mbae mbuquiachãsa rea rocoĩ jenyuchĩ nguia serea co. Tenda que amumba mumba beite rei quia jendese Dios chuchua resẽ. Mbia que ambaaquiato quiato bei rei quia huee resẽ. ¿Mbaerã seisiã nyucua aque mose re? ⁵⁶ Embesa ji ique sacuã ño jēicuã icuã ndiqui nguiã seje ã, i que Jesús ra. Echimbbaaquiato que nyoĩ ja chee uchã Jesús recha ra.

Jesús mbia curuchoi mbia rerecua je

⁵⁷ Ae Jesús isi nae, ũquí ngue ecuruchoi sacerdote rerecua je ra. Huee que embesasa chi ja ñumunua nda. Amei ererecua ja abe. ⁵⁸ Pedro que embuchurucha rucha oso quia erui ra. Ngasẽ nyee que sacerdote rerecua itaicuee ra. Huee que ngoi sacerdote rimba mo ndese ra. —Mañi nda mbia Jesús je reae, i que huĩ ngoi eraarō arō nda. ⁵⁹ Sacerdote rerecua que chi ja huee ra. Amei mbia rerecua ja abe no. Mbia rerecua ja tuchi. —Jesús nandeiquia, i rei que ñee ñee nyue ra. —¿Mbae i ra aba mbia je Jesús riicharã nde? i rei que u ñee ñee nyue ra. ⁶⁰ Emo emo ngue ngaẽ ndei ñee icuã icuã Jesús ríĩ nda. ũquínde que mbia nyeremo ngaẽ ñee ñooño Jesús ríĩ nda. ⁶¹ —Jesús que ñee ñooño Dios chuchua ríĩ nda. “Dios chuchua ra ambucoi. Tres días mose ra achaobe”, i que urechandu Jesús cheẽ nda, i que ũquí ñee ñooño Jesús ríĩ nda. ⁶² Sacerdote rerecua que juã ñee Jesús je ra. —¿Echeẽ nda eresibishorō eã mbei re? ¿Mbae i equia nderiĩ nde? i que Jesús je ra. ⁶³ Jesús

que ñee eã mbei echeẽ mose ra. Sacerdote rerecua que ñeembe ee ra. —¿Dios rucucha nde re? ¿Cristo nde re? Diósaa echeẽ ure je, i que sacerdote rerecua ñee ee ra. ⁶⁴ Jesús que ñee ee ra. —Ae. Dios rucucha chõ se re. Tacheẽ nyecua jêje. Jemae nda serese se coi mose Dios quirãcuã jii. Sechu mose abe ibeishĩ ndese, i que Jesús ee ra. ⁶⁵ Sacerdote rerecua que paama i tuchi Jesús cheẽ mose ra. Huiĩrao que endoro ndoro chee ra. Ñee ngue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembiirandube eã cote. Nandemae ndei ngue erese re. ⁶⁶ ¿I jêje re? ¿Mañi nande ra equia re? i que sacerdote rerecua ñee ererecua ataque je ra. —Eicua tuchi que ra jê. Sã mbia eiquia, i jate que ererecua ñee Jesús rĩĩ nda. ⁶⁷ Mbiam que ñinimbu nimbu Jesús ruba rese cote ra. Ucuu ucuu abe que erese ra. Emo emo ngue eritii mbeete ete o je ra. ⁶⁸ Ñee ngue ee ra. —“Cristo chõ se re”, ere ñi equia. Aba chõ ucuu nderese chã. Ma eicua no, i que mbiam ñee icuã icuã ee ra.

Jesús aicuayãte reseẽ, ichõĩño Pedro

⁶⁹ Pedro que chĩ mbeite ngoi itaicuee ra. Nyucuaaque mo ngue tu ñee ee mbiam rimba mo nda. —Jesús resenda que nde abe ra. Galilea jenda, i que nyucuaaque ñee ee ra. ⁷⁰ Pedro que ñee ee ra. —Tei. Ndecheẽ aicuayãte, ichõĩño ngue Pedro mbiam rêsaa ñee ee ra. ⁷¹ Pedro que oso quia eiquesa cuti cote ra. Nyucuaaque nongue que ñee mbiam je erĩĩ nda. —Co abe que Jesús resenda ra. Nazaret jenda, i que ñee mbiam je ra. ⁷² —Tei. Jesús aicuayãte, ibe que Pedro ñee icuã ee ra. ⁷³ Ae chi huee nae, ũquĩ mo ngue ñee Pedro je cote ra. —Jesús resenda chõ nde abe resẽ. Ndecheẽ aba chiicuate resẽ, i que ñee ee ra. ⁷⁴ Pedro que jurar i tuchi ñee ee ra. —Aicuayã tuchite se resẽ, i que ñee ñoño nda. Aque mose tuchi que nguira ñee cote ra. ⁷⁵ Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nonde ra erecheẽ ñoño tres veces serĩĩ, sã Jesús i ee nyii no. ũquĩ ndese que Pedro ndua cote ra. Nyebe esi nguiã usẽ nyeseo tuchi.

27

Mbiam Jesús curuchoi Pilato je

¹ Nyaashĩ namo mose que sacerdote rerecua ndua hue rĩĩ ja ra. Amei mbiam rerecua ja abe no. Hue rĩĩ ja ndua Jesús iquia sacua. ² Jesús que echucua suruchoi Pilato je ra. Pilato rei mbiam rerecua, hue jenda ja rerecua.

Judas uchosoi mumbi nyĩiquia

³ Mbiam ra Jesús iquia, i mose Judas je, eya eã tuchi que ũquĩ mose ra. —Jesús amee jirichĩ nguiã mbiam je, i que ra. Nyebe mbae isiquia mondobe nguiã sacerdote rerecua je. Amei ererecua je abe no. ⁴ —Mbae icuã tuchi asaãchĩ. Jesús seteã tuchi ameechĩ jêje. Eiquia sacua, i que Judas ñee nda. —Nde quia rei. Ure eã ñene, i ja que ererecua ñee ee ra. ⁵ Judas que mbae isiquia mbaba asi mombo mondo ibii ra. Dios chuchúaa. Oso que uchosoi mumbi nyĩiquia cote ra. ⁶ Sacerdote rerecua que mbae isiquia sirõ ibi si cote ra. —Mbiam ribishoronda chõ ã mbae isiquia re. Nyebe nandemondo eã ofrendarã, i que ñee ñee nyue ra. ⁷ Aquere que sacerdotes ibi mo isi aque mbae isiquia je ra. Ibi mo ngue eisi mbiamo tiquia tiquia sacua nda. Ñionga, i que hue ibi je ra. ⁸ Nyebe eriqui nguiã “mbiam ruqui rua” i bei hue je. Namonyee. ⁹ Aque mose que Jeremías ñimbese ique cote ra. ã ndei Jeremías ñimbese ã:

ũquĩ mbae isiquia treinta que eisi cote ra.

ũquĩ ndei mbiam ribishoronda ũquĩ.

¹⁰ ũquĩ mbae isiquia que emondo hue ñionga ribishorõ cote ra.

Dios ñee nguia erĩĩ seje nyii nae, ũquĩ ndui si,
i que Jeremías embesa cose ra.

Pilato ñee Jesús je

¹¹ Mbia que Jesús curuchoi Pilato je cote ra. Pilato que ñee ee ra. —¿Judíos rerecua chõ nde re? i que ee ra. —Ae. Judíos rerecua chõ se re, i que Jesús ee ra. ¹² Sacerdote rerecua que ñee icuã ja Jesús je ra. Amei ererecua abe no. Jesús que ñee ãte echeẽ mose ra. ¹³ —¿Erechanuãte equia ñee mose nderĩi nde? i que Pilato ñee Jesús je ra. ¹⁴ Jesús que ñee ãte echeẽ mose ra. Nyebe Pilato nyuruira tuchi nguia echeẽ eã mose.

Jesús jëiquia mbucha ira rese, i ererecua

¹⁵ Pilato que mbia tarõ ji mo mbusẽ mbei quia pascua mose ra. Co mii ngue embusẽ mbusẽ mbei quia pascua mose ra. Ae je mbia riqui ñee, “aque embusẽ mondo” i nae, aque chõ ngue embusẽ mbei quia ee ra. ¹⁶ Barrabás, i que etarõ ji mo je ra. Mbia chiicua tuchi que ae ra. ¹⁷ Mbia ñumunua ja mose que Pilato ñee ee ra. —¿Aba ra ambusẽ mondo jëje re? ¿Barrabás ra re? ¿Jesús ra re? i que Pilato ñee ee ra. ¹⁸ —Sacerdote rerecua riqui paama i chooñote Jesús je ã, i quiatu que Pilato ndua ndua uchiangui re ra. ¹⁹ Pilato que chĩ ngoi ndua ndua ngũenda tose ra. Eninisi que ucheẽ mondo ñee ee ra. —Ehui chõ Jesús si jë. Mbae icuã ngue esaã eãte resẽ. Atea que seque re isa ra jë. Seque re icuã tuchi que aa ra jë, i que Pilato ninisi ñee ngu je ra. ²⁰ Sacerdote rerecua que ñee mbia ja je ra. Amei ndese. —Sã Pilato Barrabás mbusẽ mondo. Sã Jesús quiatu iquia, i que ererecua ñee ja mbia je ra. Nyebe mbia “eno” i chee ee. ²¹ Pilato que ñee si mbia je ra. —¿Aba ra ambusẽ mondo jëje re? ¿Jesús ra re? ¿Barrabás ra re? i que Pilato ra. —Barrabás embusẽ mondo i que mbia ee ra. ²² —¿Mañi ae quia ra Jesucristo je re no? i que Pilato ra. —Embucha ira rese, i ja que mbia ñee ee ra. ²³ —¿Mbae icuã esaã nde? i que Pilato ee ra. —Embucha ira rese jë, ibe que mbia tasẽ tasẽ ee ra.

²⁴ —Mbia riqui “Jesús eiquia” i i tuchichĩ, i que Pilato ndua ndua ra. —I mo embu seje, i que mbia je cote ra. Nyoĩ que mbia résa cote ra. —A aico nyoĩ a. Se ra Jesús aiquiayã. Eseteãte quiatu ngue re. Jë nguia jëingo erese, i rei que Pilato ñee mbia je ra. ²⁵ Mbia que ñee ja Pilato je ra. —¿Eiquia jë! Eicuãte que eriqui ra jë. Dios ra paama i eã eiquia mose. Dios paama i mose, sã ure je quiatu paama i. Ureriirĩ je abe no, i jate que mbia Pilato je ra. ²⁶ Pilato que Barrabás mbusẽ mondo cote ra. Jesús cuasa quiatu que chiño nda. Pilato que Jesús iruã nua cote ra. —Jembucha iquia ira rese, i que ñee soldados je cote ra.

²⁷ Soldados que Jesús cuasa curuchoi ererecua chuchúaa ra. Huee que soldados ataque abe ngaẽ ja Jesús mama nda. ²⁸ Jesús irao que embui esi ra. Tiru ireĩ nguia ngue emingue nguia ee cote. ²⁹ Nyu ritiméi uma ji que emii eãquĩ ndese corona nda. Ira ñetẽ mo abe que emondo éoo ra. Ngoi ja que u ngũia ndese Jesús nonde ra. Ñee icuã icuã ngue u eriĩ nda. —Judíos rerecua tuchi chõ nde re, ichõiño ngue soldados Jesús je ra. ³⁰ Ninimbu nimbu abe que erese ra. Ira abe que euru uru eãquĩ ndese no nda. ³¹ Jesús rimba que esaã saã ee no nda. Iquia iquia que ee no nda. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

³² I rei que echoi quia ra. Mbia mo ngue esobeishĩ nda. Simón, i equia ee. Cirene jenda que ae ra. —Cruz echa rã Jesús mbucha sacua pe, i que soldados ee ra. Nguerao que ee cote ra. ³³ Ngasẽ ngue pee cote ra. Gólgota, i que hue je ra. Eresa cuare, i chõ nguia hue je. ³⁴ Huee que vino ñimocondo tuchi mo mondo Jesús je ra. Ubi rei que erese ra. Aquere que embei eã cote ra. ³⁵ Soldados que Jesús mbucha ira rese ra. Aquere que sita ñetẽ mbaba mbaba o je cote ra. —Aba ra Jesús irao querao ñi ja, i que nyue ra. Aque mose que embesa ji cheẽ ique cote ra.

Seirao que embuchao chao nyue ra.

Sita ñetẽ mbaba mbabare o je,

i que embesa ji ra. ³⁶ Aquere que soldados chi ngoi Jesús raarõ cote ra. ³⁷ Mbia que letrero mii Jesús ãquĩ nguiti ibate ra. JESUS REI JUDIOS RERECUA, i que embesa mii nda. Ñquĩ ñi ño eriqui nguia eiquia hue. ³⁸ Mbia nyeremo abe que embucha ira rese Jesús chabe

ra. Jesús rereco chobei que emii ira rese ra. Mbae mbuquiachãsa tuchi que ùquĩ nda. ³⁹ Mbia que iquia iquia chõ nguia echeẽ naa naa ecuã nda. Ñee icuã icuã ee. ⁴⁰ —“Dios chuchua ra ambucoi. Tres días mose ra ambuchuruambe” ere que equia. Ndequirãcuã tuchi mose, equichi u hue si. Nde Dios rucucha mose, equichi u cruz si, i tuchi que mbia quia iquia iquia ee ecuã mose ra. ⁴¹ Sacerdote rerecua abe que iquia iquia chõ nguia ee ra. Embesasa abe no. Amei ererecua abe no. Ûquĩ ngue ñee icuã icuã ja quia eriĩ nda. ⁴² —Mbia que embuquera quera rei nyii ra. Ae si quia quera aroneate nguiã aque. Judío rerecua mose ae, sã ae ae nguichi ira si. Ñ nda ureicu a cote, i ja que ererecua ñee icuã icuã e eriĩ nda. ⁴³ —“Dios aicuate”, i que equia, sã Dios ae embuquichi eya mose erese. “Dios rucucha rei se” i que equia, i ja que ererecua ñee icuã icuã eriĩ nda. ⁴⁴ Ae mbuchai chi ira rese mbae mbuquiachãsa nae, ùquĩ abe que ñee icuã icuã nyee ee ra.

Jesús mano cote

⁴⁵ Tenda nandeite re mose que itondaru ru ra. Itondaru bei que mbia ja je tres horas ra. ⁴⁶ Tenda cheseco mose que Jesús ñeemombo cote ra. —Elí, Elí, ¿lam a sabactani? i que ñeemombo ra. —Dios sererecua, ¿mbaerã ereico hui sesi re? i chõ ngue ñee nguiã. ⁴⁷ —Elías je eriqui “quiatuchu” i reae, i rei que echeẽ andusa mo nda. ⁴⁸ Aque mose tuchi que emo esponja monde vinagre ye ra. Ira ai rese que embia ji mondo rei Jesús chúruu cote ra. ⁴⁹ —Esecha rei. ¡Sã Elías ruãte quia erea! i que eataque ñee ee ra. ⁵⁰ Jesús que tasẽ mano mbei cote ra.

⁵¹ Aque mosechi tuchi que cortina nyisia Dios chuchua jenda ra. Ibate si que eru nyisia íbii ra. Ibi que nyere nyere cote ra. Sita abe que nyisia sia nyibite bite rĩ nda. ⁵² Mbia tãsa mo abe que nyeequia equia ra. Dios quiato raaque mo ngue quera quera ra. ⁵³ Jesús quera si mose que ùquĩ ndaaque usẽ nyoĩ cote ra. Nyoĩ que Jerusalén cote ra. Mbia tubiriã ngue mae u erese ra. ⁵⁴ Soldados rerecua que chí mae Jesús rese ra. Soldados abe no. Ûquĩ ngue siquichete Jesús mano mose ra. Ibi chere mose. Mae mose mbae ja rese. —Dios ririĩ ño eriqui re, i jate que soldados ñee eriĩ cote ra.

⁵⁵⁻⁵⁶ Cuña ngue chi jate mae Jesús rese isho ra. María Magdalena abe que chí huee ra. María abe no. María rei Jacobo si. José abe si. Zebedeo ririĩ si abe que chí erese huee ra. Ûquĩ ngue siqui bei quia Jesús rui ra. Echiurã ngue emii miĩ mbei quia ee ra. Galiléaa eico mose bei.

Mbia Jesús raaque chati cote

⁵⁷ José, i que mbaecha mo je ra. Arimatea jenda rei ae. Jesús quiato que ae ra. Tenda ireĩ mose que esi ñee Pilato je ra. ⁵⁸ —Jesús raaque emee na seje, i que oso ñee Pilato je ra. Pilato que “eno” i ee ra. ⁵⁹ José que eraaque curuchoi cote ra. Ñuma ngue tirushĩ mo je ra. ⁶⁰ Jesús raaque que eiti suruchoi sita ribicoi ji imi ye ra. José chisaã ye. Nyati rei que sita cuasu mo je cote ra. Nyoĩ que erecha cote ra. ⁶¹ María Magdalena ngue chi ngoi mae Jesús atisa rese ra. María rese.

Soldados Jesús raaque atiquia saarõ u

⁶² Isamami ngue sacerdote rerecua choi ñee Pilato je ra. Fariseos abe no. Sábado isamami ngue ra. ⁶³ Ûquĩ ngue nyoĩ ñee Pilato je Jesús rĩ nda. —Urendua nduachĩ nguiã ñeeñoño je rese. “Tres días mose ra aquera si”, i que equia mano nonde ra. ⁶⁴ Soldados emondo rã eatiquia raarõ. Sã echi bei tres días eraarõ huee. Ñ nda echimbaaquiatu eraaque siroã suruchoi. “Quera si que ra” ¡ichĩ nda ñee ñooño mbia je jê! Ûquĩ mose ra mbia mbiĩrĩ irĩ tuchi cote, i que ñee Pilato je ra. ⁶⁵ Pilato que ñee ee ra. —Soldados jendao rã. Eraaque raarõ tuchi sacua, i que ee ra. ⁶⁶ Soldados que ecuruchoi Jesús atiquiaa cote ra. Eiquesa aronda que ematã tuchi cote ra. —Jësaarõ tuchi jê, i rei que soldados je cote ra.

¹ Jesús raaque ati ji que chibe sábadó mose ra. I nyaashĩ oso quia domingo mose, aque mose que cuña mo nyoĩ mae eatisa rese ra. María Magdaalena, i que emo je ra. María, i que enongue je ra. ² Aque mose tuchi que ibi nyere nyere ee ra. Angel ibatenda mo nguia tu quia eatisa mbuquiata reaẽ. Sita eatiquia que ecuruba ra. Ngoi que etose ra. ³ Enininya tuchi que chĩ ngoi ra. Ama pirirã pirirã i rã tuchi que ra. Eiraoshĩ tuchi que chĩ nda. ⁴ Soldados que titi titi i tuchi chõ mae ùquĩ ndese ra. Emundi tuchi que ra. ⁵ Angel que ñee cuña je ra. —Jësiquiche quichechĩ nguiã. Jëingo raque Jesús raaque requia ã. ⁶ Emoate aa resẽ. Eraaque que quera si no. Ucheẽ ndui si que quera resẽ. Jenyu rei mae eatisa rese ae. ⁷ Jëso asi rã echimbaaquiatu mbiirandu equera si rese. “Jenonde ra esi Galilea. Jemae nda erese huee”, jenyee embiirandu. Ûquĩ ae chõ ngue u nguiã jëje, i que ángel cuña je ra. ⁸ Cuña ngue siquichete echeẽ andu ra. Eyate abe que ra. Uchã ndei que echoi quia Jesús chimbaaquiatu mbiirandu ra. ⁹ Ñeenda cúa chõ ngue Jesús nyecua saluda i ee ra. Cuña ngue nyoĩ oo erese ra. Jesús i que equiaama ama nda. ¹⁰ Jesús que ñee ee ra. —Jësiquichechĩ nguiã sesi. Jëso ñee seresenda je. “Jëso rã Galilea. Hue ra jemae Jesús rese”, jenyee oso ee, i que Jesús ñee cuña je ra.

Soldados ñee ñooño Jesús raaque rĩĩ

¹¹ Soldados eraaque raarõsa que nyoĩ sacerdotes rerecua mbiirandu Jesús quera rese ra. Ae rese mae nae, ùquĩ ngue esenei ja ee ra. ¹² Sacerdotes rerecua que nyoĩ ja ñee amei ererecua je cote ra. —¿Mañi nande ra equia mbia jiranuã sacua Jesús quera rese re? i que ererecua ndua ndua hue rĩ ja ra. Nyebe mbae isiquia mee nguiã soldados je, ñee ñooño sacua mbia je. ¹³ —Jeñee ñooño mbia je jë. “Ureque mose Jesús resenda eraaque suruchoi rei sirõ”, jenyee chooño mbia je jë. ¹⁴ Pilato jirandu mose jendese, urecheẽ nda ee. Paama iã nda jëje chã, i que ererecua ñee ja soldados je ra. ¹⁵ Soldados que mbae isiquia isi cote ra. Ñee ñooño tuchi que mbia je cote ra. Nyebe judíos riqui nguiã ñee mbei ã cote. —Jesús chimbaaquiatu que eraaque sirõ cose ra, nyebe eriqui nguiã i bei ã cote.

Jesús uchimbaaquiatu mondo mbia mbiirandu

¹⁶ Jesús chimbaaquiatu once que nyoĩ ja Galilea ra. Ibi ibate mo ngue echoi Jesús cheẽ nguire ra. ¹⁷ Jesús que nyecu a ee huee ra. Jesús rese mae mose que ngoi ngũĩã ndese ñee ee ra. —Jesús eã ño co reae, i rei que emo emo ñee uchiangui re ra. ¹⁸ Aquere que Jesús si eriichã ñee ee cote ra. —Squirãcuã tuchi chõ se re. Se rei ibi jenda rerecua ja. Ibatenda abe rerecua ja. ¹⁹ Jëso mbia mbaaquiatu quiatu ja seriĩ. Mbua mangue chooñoa jenda ja. Bautizar jenyee ee Paba rĩĩ. Serĩĩ abe. Espíritu Turã nĩĩ abe no. ²⁰ Jembaaquiatu quiatu tuchi secheẽ nĩĩ. Ae asenei senei nguia jëje nae, ùquĩ jësenei senei ja ee. Secheẽ mumbayã sacua. Aico bei ra se quia jendese. Mbae ua j a chee, i que Jesús ñee ee ra. Amén.

EL SANTO EVANGELIO SEGÚN SAN MARCOS

Juan el Bautista Dios cheẽ senei senei

¹ ã tasenei na jẽje. Dios cheẽ turã Jesucristo riĩ. Jesucristo rei Dios riirĩ. ² Sã Isafas Dios cheẽ mbesa cose no:

Secheẽ nderaosa amondo quia nderẽta aque.

Ae ra ñeenda mbuquiche nembraerã, i que Dios ra.

³ Emo ndiqui ñeemombo mombo turúquiaa hue.

“Sã emo ndiqui ñeenda mbuquiche no, eĩ jenyẽ si chõ nguia jẽ abe ico quiatu nanderere-cua raarõ arõ”, i equia turúquiaa hue,

i que Isafas embesa ra. ⁴ Juan el Bautista que tu ùquĩ ñee nguire cote ra. Dios cheẽ ngue esenei senei nguia turúquiaa cote ra. —Jendua si Dios rese. Jẽhui chõ jẽicuã si. Dios jẽicuã mbutiã sacua. Ûquĩ mose nda bautizar ae jẽje chã, i beite que Juan nguia ñee nda. ⁵ Jerusalén jenda que ngaẽ ngaẽ tuchi quia echeẽ andu ra. Judea jenda abe no. Mbia huĩcuã nenei nenei mose Dios je, ùquĩ mose que Juan ndiqui bautizar i ee ra. Ama Jordán ye. ⁶ Quiicuã mbuaera chõ ngue Juan irao ra. Camello. Mbae ire chõ ngue enumbicuaa no nda. Tucu mbuae chõ ngue eu eu quia ra. Irao quiaa riinda abe. ⁷⁻⁸ Dios cheẽ ngue esenei senei nguia ra: —I achõ je chõ aico nguia bautizar i mbia je co. Co chi emo ndu quia serui co. Dios riirĩ tuchi chõ ae re. Ae quia equirãcuã tuchi sesi re. Ae quia eturã tuchi sesi no nde. Ae quia tura bautizar i mbia je Espiritu Turã je. Mbia chiã mbitirõ sacua, i beite que Juan nguia ra.

Juan bautizar i Jesús je

⁹ Aque mose que Jesús ru sucha tubiriã Nazaret si ra. Galilea jenda rei Nazaret. Juan ngue bautizar i Jesús je ra. Ama Jordán ye. ¹⁰ Jesús que usẽ oso ama si cote ra. Ibei que nyeequia ee cote ra. Espiritu Turã ngue nguichi u erese cote ra. Nyurushi rã ngue eru nguichi erese ra. ¹¹ Ibei jenda que ñee ee ra. —Seriirĩ ño nde re. Sechesequa chõ nde re. Seyate nderese, i que Dios ñee ee ra.

Jesús tambhĩ cuã, i raque Satanás

¹² Espiritu Turã ngue Jesús querao turúquiaa cote ra. ¹³ Huee que Jesús riqui arete ra. Cuarenta días. Nyacua risha ite re. Mbia riichare ja ite re. Satanás que tu rei tã i ee cote ra. Angeles que ngaẽ ngaẽ nguia ereaquiato ra.

Jesús mbia mbaaquiato quiato ramo

¹⁴ Mbia rerequa que Juan tarõ cárcel cote ra. Aquere que Jesús si Galiléaa ra. Dios cheẽ turã ngue esenei senei nguia huee ra. ¹⁵ —Achite Dios ñi tu mbia rerecuarã a. Jendua sí Dios rese. Jẽhui chõ jẽicuã si. Dios cheẽ turã jẽicua. Ñ nda Dios jemingo bei, i que Jesús quia ñee mbia je ra.

Jẽingo serui, i Jesús uchimbaaquiaturã je

¹⁶ Jesús que ngata oso quia ama nimia ndui ra. Galilea, i que aque ama ndisha je ra. Huee que mae Simón ndese ra. Enongue abe rese mae. Andrés, i equia ee. I que u sira mbua mbuasa mondo mundo ii ra. Sira resenda bei rei ùquĩ. ¹⁷ Jesús que ñee ee ra. —Serui bei chõ jẽingo jẽ. Taembaaquiato quiato. Mbia teendu endu bei quia seje cote, i que ee ra. ¹⁸ Nyoĩ ja que erui ra. Sira mbuasa si que echoi hui ra. ¹⁹ Pe jiri que mae Jacobo rese ra. Enongue rese abe. Juan, i equia ee. Zebedeo riirĩ ja rei ùquĩ. Huee que echi ja canoa ye sira mbuasa mbitirõ tirõ nda. ²⁰ —Jẽingo serui, i que Jesús ñee ee ra. Echeẽ nduibe tuchi que echoi erui ra. Ngu que esecha choi ra. Eru que siquichõ canoa ye ngũimba rese ra.

Jesús aba checuayã icuã jea mbia mo si

²¹ Nyoï que sucha tubiriã Capernaum nda. Sábado mose que Jesús si judíos chumunua nuásaa ra. Mbia mbaaquiato quiatu sacua. ²² Mbia rerecua rã ño ngue eriqui mbia mbaaquiato quiatu ra. Embesasa rã eã. Nyebe mbia riqui nguiã nyuruira tuchi echeẽ andu. ²³ Huee que amei mo ndiqui mbia chumunuásaa ra. Aba checuayã icuã nyireco rei ae. Ñee asite que Jesús je ra. ²⁴ —¿Mbaerã erechu urerea co re, Jesús? Quiatúae urerecha ae. ¿Urericharã ño erechu quia co re? Dios rucucha chõ nde re. Areicuate se, i rei que aba checuayã ñee asite ee ra. ²⁵ Jesús que ñee asi ee cote ra. —¡Equiriri chõ jẽ! Esẽ oso amei ñiangui si, i que ee ra. ²⁶ Jesús cheẽ mose que aba checuayã amei mburirite cote ra. Tasẽ ngue oso usẽ amei si cote ra. ²⁷ Mbia que nyuruira tuchi mae Jesús rese ra. Ñee ñee ja que nyue cote ra. —Jesús riquichĩ mbia mbaaquiato quiatu ucheẽ namonda je co. Equiracuã ae ñee nguiã. Mbia rerecua rã ño eriqui nguiã ñee aba checuayã icuã je co. Sã aba checuayã echeẽ mumbayãte jẽ, i que mbia ra. ²⁸ Mbia que jirandu jei Jesús rese Galilea jenda ja cote ra.

Jesús Simón ninisi si mbucherõ

²⁹ Jesús que usẽ nyoï mbia chumunua si cote ra. Nyoï que Simón nyuchua ra. Andrés abe que siqui rei huee tuchia ra. Jesús que ique nyoï huee ra. Jacobo rese. Juan ndese abe no. ³⁰ I que Pedro chari rasi u nyaara ee ra. Eracu tuchi que ra. ³¹ Jesús que eo isi embuchuruã nda. Aque mosebe que eracu ti i esi cote ra. Mbae que echao chao quia mbia chiurã cote ra.

Jesús mbia rasi chumumbara mbucherõ

³² Itondaru ramo mose que mbia erasi rurucuaẽ cuaẽ tuchi Jesús je ra. Ae aba checuayã quereco quia nae, ñquĩ abe que ecurucuaẽ cuaẽ tuchi quia ee ra. ³³ Sucha tubiriã jenda ja que chi ñmunua eiquésaa ra. ³⁴ Mbia rasi chumumbara que embucherõ cherõ ja ra. Aba checuayã icuã tubiriã ngue ejea jea quia mbia si ra. Aba checuayã ngue Jesús icuate rei ra. Nyebe Jesús riqui nguiã echeẽ ndiquisã quisãte.

Jesús mbia Galilea jenda mbuchesea sea

³⁵ I nyaashĩ oso quia, aque mose que Jesús juã oso mbia tiásaa ra. Ñee sacua Dios je itondaru bei mose. ³⁶ Simón ngue oso erui emuña nda. Nguesenda rese. ³⁷ Ngasẽ ngue ee ra. —Pe mbia chi nderequia jate pe, i que ee ra. ³⁸ Jesús que ñee ee ra. —Nyao sucha tubiriã mbuchesea sea achi jenda. Dios cheẽ nda asenei senei ee chã. Nyebe achu nguiã, i que ee ra. ³⁹ Galilea jenda que embuchesea sea ja cote ra. Dios cheẽ nenei nenei judíos chumunua nuásaa. Aba checuayã abe jea jea mbia si.

Jesús mbia leproso mbucherõ

⁴⁰ Emo ndasi que ngasẽ Jesús je ra. Leproso, i que ñquĩ erasi je ra. Tu que ngoi ngũĩã ndese ñee Jesús je ra. —Nde sembucherõse mose, sembucherõ se, i tuchi que ñee ee ra. ⁴¹ Jesús ia eã tuchi que erese ra. Ñomee ngue oco erese cote ra. —Eno. Tarembucherõ, i que ee ra. ⁴² Echeẽ nduibe tuchi que nyerõ cote ra. ⁴³⁻⁴⁴ Jesús que ñee ee ra. —Sã jẽ. Ereceẽchĩ nda emo je jẽ. Eso nderasiã ndeacuquia sacerdote je cote. Moisés cheẽ ndui si chõ mbae mo emondo Dios je. Eĩ nda mbia jirandu nderasiã ndese cote, i rei que Jesús ñee emondo ra. ⁴⁵ Mbia que embiirandu ja tuchi chõ oso ra. Nyebe Jesús nyecua aroneate nguiã sucha tubiriã mo. Siquiibi ibi chõ ngue eriqui cote ra. Icuenda ja que ngaẽ ngaẽ nguia erea ra.

2

Jesús emi sayã mo mbucherõ

¹ Emo mose jiri que Jesús nyebi Capernaum nda. Echuchua ereco mose que mbia jirandu erese ra. ² Mbia tubiriã ngue ñmunua ee ra. Mbia chayã tuchi que ra. Ei quesa abe itãyã tuchi que ra. Dios cheẽ ngue esenei senei tuchi quia ee ra. ³ Mbia cuatro que erasi mo curucuaẽ ee ra. Emi sayã. ⁴ Mbia tubiriã ngue tuchia mbiitãyãte eriquisã nda. Nyebe erasi ruruchoi nguiã sui tei quite arõ. Tei que endoro cote ra. Erasi que

embuquichi imbu quisa ye Jesús je cote ra. ⁵ —Erurucuaësa riqui seicuate ùquĩ, i que Jesús ñee uchiangui re ra. Nyebe ñee nguiã emi sayã je. —Echo, ndechisaã mbae icuã ambutiã nguia ndesi a, i que ee ra. ⁶ Embesasa mo abe que chi echeẽ andu ra. Mae icuã icuãte que equia Jesús res e ra. ⁷ —¿Mbaerã Jesús riqui ñee ùquĩ nde? Ñee icuã icuã ñochĩ equia Dios rĩĩ co. Dios ibatenda ae mbi a chiao icuã mbutiã tiã nguia esi resẽ, i rei que ñee icuã icuã Jesús rĩĩ nda. ⁸ Jesús que ùquĩ ndua ndua icuate quia ra. Nyebe ñee nguiã ee cote. —¿Mbaerã jẽingo ndua ndua icuã nde? ⁹ ¿Ma mbaranguiatuã eã jiri jẽje re? ¿Mbia icuã mbutiã esi ere? Mbia rasi mbucherõ ere no ae. ¿Ma mbaranquiãtuã eã jiri jẽje re? ¹⁰ Dios rucucha rei se. Mbia chiao icuã mbutiã aquiãtu chõ se re. Sequirãcuã tateacuquia jẽje, i que Jesús ñee ee ra. Ñee ngue erasi je cote ra. ¹¹ —Ehuã na. Ndechuchua eso cote. Ndequisa abe erao, i que Jesús emi sayã je ra. ¹² Emi sayã ngue juã asi Jesús cheẽ nduibe cote ra. Ngua que esirõ asite serao cote ra. Mbia resa rae ja. —Ã ndese que ureico mae eã tuchi emo mose ra, i tuchi que mbia u mae nyuruirã erese ra. Mbia que ñee turã jate Dios quirãcuã ñii cote ra.

Serui bei eico, i Jesús Leví je

¹³ Jesús que oso si ama ndisha rimíaa nda. Mbia que ngaẽ ngaẽ jate erea ra. Jesús que embaaquiãtu quiãtu ra. ¹⁴ I que Jesús oso quia ra. Mae ngue Leví rese ra. Alfeo ririĩ ngue Leví ra. Ngoi que huĩ plata isi isi impuestorã nda. —Serui bei eico, i que Jesús ñee ee ra. Ae Leví juã oso nguiã eruĩ.

¹⁵ Jesús que nyoĩ quiãru erese ra. Impuestos isi isiquia ata que chi quiãru erese hue ra. Echimbaaquiãtu abe rese. Mbia icuã mo abe que chi quiãru erese no nda. Ùquĩ tubiriãte que siqui eruĩ ra. ¹⁶ Fariseos que ñee icuãte Jesús chimbaaquiãtu je ra. Embesasa abe que ñee icuãte ee ra. —¿Mbaerã Jesús riqui quiãru mbia icuãte rese re? i que ñee nda. ¹⁷ Nyebe Jesús ñee nguiã ee. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. “Jenyu seje” ae eã ngue u nguiã mbia turã je. Mbia icuã je chõ ngue achu nguiã “jenyu seje” i, i que Jesús ra.

Jesús chimbaaquiãtu hui ãte uchiu si

¹⁸ Juan ñimbaaquiãtu que hui uchiu si aque mose ra. Fariseos chimbaaquiãtu abe no. Nyebe mbia ngaẽ nguiã ñee Jesús je. —¿Mbaerã ndechimbaaquiãtu abe riqui hui ãte uchiu si re? i que ñee Jesús je ra. ¹⁹ Jesús que ñee ee ra. —Sã emo ndiqui ngüinisirã isi ramo no. Sã eresenda iate riqui quiãru erese no. Sã eriqui hui aroneate uchiu si aque mose no. ²⁰ Sã eru riqui mano emo mose no. Aque mose ramo nguiãtu ra equiato hui uchiu si cote. ²¹ Sã emo ndiqui tiru yasu miĩ aroneate tiru ima sorei rese no. Eyasu ra nyaacua quiãta eima si. Soro icoi tuchi chõ nda cote. ²² Sã emo mbaeri rasi ramo nderecoquiãtu eã eriru ima ye no. Mbae ire ima ye ererecoquiãtu aronea ño ñene. Eri rasi ra ñimatã ño mbae ire ndoro. Eri ra uchẽ ja. Mbae ire abe mbiãcuãte ra cote. Mbaeri yasu quia nda equerecoquiãtu nguiã mbae ire yasu ye. Soroã sacua, i que Jesús ñee ee ra.

Jesús chimbaaquiãtu mbae a ishão shão sãbado mose

²³ Sãbado mose que Jesús si quia mbiãco ite ite rĩĩ emo mose ra. Echimbaaquiãtu que quiãta a nyiqui nyiqui choi quia eruĩ ra. ²⁴ Fariseos mo ngue ñee ee ra. —¿Mbaerã ndechimbaaquiãtu riqui mbae ishão shão sãbado mose re? Co mose chõ mbia riqui uquenea ucuã resẽ, i que fariseos ñee Jesús je ra. ²⁵ Jesús que ñee ee ra. —¿Embasa ji rese jemaẽ eã David rĩĩ nyii re? David riãcuãte que aque mose ra. Eresenda abe riãcuãte que eriqui aque mose no nda. ²⁶ David que ique Dios chuchua aque mose ra. Abiãtar que sacerdote rere cua aque mose ra. Mbichãe Dios chuchua jenda que David u ra. Mee mee ngue nguesenda abe je ra. Eriãcuãte quiãtu ngue re. Sacerdote mbaerã ja chõ ndaque mbichãe, i que Jesús fariseos je ra. ²⁷ —Sãbado que Dios chão mbia mbaerã nda. Sãbado mbaerã eã ño Dios mbia ao nguiã. ²⁸ Sãbado rerecua bei chõ se re, i que Jesús ñee fariseos je ra.

3

Jesús emo o tomei mo mbucherõ

¹Jesús que oso mbia chumunuásaa cote ra. Huee que eo tomei mo ndiqui ee ra. ²Mbia que mae nguiatute quia Jesús rese ra. —Ma Jesús eo tomei mbucherõ. Sábado mose raque co. Sã embucherõ. Nandechẽ icuã icuã nda ee chã, i que eu mae nguiatute Jesús rese ra. ³Jesús que ñee eo tomei je cote ra. —Ehuã na u aa mbia ite re, i que ee ra. ⁴Jesús que ñee mbia je ra. —¿Mbae eturãte jẽje co tenda sábado mose re? ¿Coche nandeico mbae turã naa naa sábado mose re? ¿Coche nandeico mbae icuã naa naa co mose re no? ¿Coche mbia mbucherõ co mose re no? ¿Coche mbia iquia co mose re no? i que Jesús ñee mbia ja je ra. Mbia que ñee ãte echeẽ mose ra. ⁵Jesús que paama i mae mbia rese ra. Eya eãte que eriqui mbia chiã ãtã ndese ra. Ñee ngue eo tomei je cote ra. —Ndeo emee secuti, i que ee ra. O que emee Jesús cheẽ mose ra. Aque mosechi que eo nyerõ cote ra. ⁶Nyebe fariseos paama i nguiã Jesús je. Mbia mbucherõ mose sábado mose. Ndua ndua ja que Jesús i quia nonde ra. —Jesús nandeiquia rei, i tuchi que equia Herodes resenda ja je ra.

Mbia tubiriã nyoï Jesús rui

⁷Jesús que oso ama ndisha quti ra. Uchimbaaquiaturã rese. Mbia tubiriã Galilea jenda que nyoï quia erui ra. ⁸Mbia que jirandu ja tuchi Jesús chisaã turã ndese ra. Nyebe eriqui nguiã ngaẽ ngaẽ erea. Judea jenda. Jerusalén jenda. Idumea jenda. Ama Jordán ndobeinda abe. Tiro rurubinda abe no. Sidón ndurubinda abe no. Ûquĩ ja que ngaẽ ngaẽ nguia erea ra. ⁹Nyebe Jesús ñee nguiã uchimbaaquiaturã je. —Canoa mo jendu rã ño mbuquiche co rĩ, i que ee ra. Mbia quiaturã ngue emumbite nguiã. ¹⁰Mbia que embucherõ cherõ tuchi quia nyii ra. Nyebe erasi ataque riqui nguiã “taoco erese” i raque. Nyebe eriqui nguiã ñimaña maña tuchi. “Nandeoco Jesús rese” i. ¹¹Aba checuayã icuã mae mose Jesús rese que ngoi ngoi quia nguiã ndese ñee ee ra. —Dios ririĩ ndei nde, i que equia ñeemombo mombo ee ra. ¹²Jesús que ñee asite ee ra. —“Co rei Dios ririĩ co” jenyechĩ nda jẽ, i que ee ra.

Jesús mbia doce irabo uchimbaaquiaturã

¹³Jesús que nyui oso sita ibate mo ndese ra. “Jenyu” i que uchiirabobi je ra. Nyoï que erea ra. ¹⁴Ûquĩ doce que eirabo nguesendacuã nda. Embuchao chao sacuaã mondo Dios cheẽ nenei nenei. ¹⁵Uquirãcuã ngue emondo ee ra. Aba checuayã jea jea sacuaã mbia si. Mbia rasi chumumbara mbucherõ cherõ sacuaã. ¹⁶Ã ndei mbia echiirabo ã:

Simón (Pedro, i abe que ee ra.)

¹⁷Jacobo (Zebedeo ririĩ ndei Jacobo.)

Juan (Jacobo nongue rei Juan. Boanerges, i que ñquĩ ja je ra. “Ama sieu je ririĩ” i chõ nguiã ee.)

¹⁸Andrés

Felipe

Bartolomé

Mateo

Tomás

Jacobo (Jacobo rei Alfeo ririĩ.)

Tadeo

Simón el Cananista

¹⁹Judas Iscariote (Aque que Jesús mondo mbia icuã je ra.)

Ûquĩ ja que Jesús irabo ra.

Aba checuayã quirãcuã Jesús quereco co, i raque mbia

Nyoï que ique tuchúaa cote ra. Uchimbaaquiaturã rese. ²⁰Mbia que ngaẽ ngaẽ tuchi quia erea no nda. Equiaru mose rocoĩ. Echimbaaquiaturã abe quiaru mose rocoĩ. ²¹Jesús nongue jirandu mose que echoi erea ra. Equiachã eriqui rei nguiã ee. Nyebe eriqui rei nguiã “nanderao” i raque. ²²Embesasa ngaẽ nguia Jerusalén si nae, ñquĩ ngue ñee ñee mbia je ra. Mbia mbuqueta queta Jesús rii. —Satanás quirãcuã je chõ Jesús riqui nguiã

aba checuayã icuã jea jea mbia si co, i rei que ñee icuã Jesús je ra. ²³ —Jenyu rã tacheẽ jêje, i que Jesús ee ra. —¿Mañi nda Satanás aba checuayã icuã jea mbia si re? Erimba chõ nyeresẽ. ²⁴ Gobierno icuã icuã mose nyue, ua rae. ²⁵ Tuchuamo jenda icuã icuã mose nyue, ua ra eno. ²⁶ Satanás icuã icuã mose nyue, equirãcuã nda ua no. ²⁷ Satanás quirãcuã tuchite raque. Umbae rese ngueteãte raque. “Sembae chi turãte a”, i raque. Dios quiarei equirãcuã tuchi Satanás si. Dios Satanás mbae sirõ ja arõt e quia esi co. Dios Satanás quirãcuã mbutiã ja arõte quia co.

²⁸ Tacheẽ nyecua jêje. Emo siqui icuã mose, Dios eicuã mbutiã arõte esi. Emo ñee icuã mose, Dios echeẽ icuã mbutiã arõte no. ²⁹ Emo ñee icuã mose Espiritu Turã niñ, ùquĩ icuã nguiatu ra Dios mbutiã eã mbei esi, i que Jesús ee ra. ³⁰ —Jesús chiangui re aba checuayã icuã ndiqui co, i quiatu ngue mbia nguiã. Nyebe Jesús ñee nguiã ùquĩ.

Jesús nongue ngaẽ erea usi rese

³¹ Jesús nongue que ngaẽ ndei erea ra. Usi rese. Chichõ ja chõ ngue itaicuee ra. —“Quiatuchu” ere Jesús je, i que emo mondo ra. ³² Mbia que chi jate ngoi Jesús jii ra. Ùquĩ ngue ñee ee ra. —Hue ndesi riqui nderequia itaicuee hue. Ndenongue rese, i que ee ra. ³³ —¿Aba je chõ aico “taĩ” i chã? ¿Aba je chõ aico “senongue” i no ña? i que Jesús mbia je ra. ³⁴ Jesús que mae ucheẽ andusa rese ra. —Ã je chõ aico nguiã “taĩ” i. Ã je chõ aico nguiã “senongue” i no. ³⁵ Ae Dios cheẽ mumbayã nguia nae, ùquĩ je chõ aico nguiã “senongue” i. Ùquĩ je chõ aico nguiã “taĩ” i no, i que Jesús ñee ee ra.

4

Emo mbae eĩ mombiquia mbiquia

¹ Jesús que mbia mbaaquiato quiatu si ama nimia ndese ra. Mbia que ñmunua tuchi u erese huee ra. Nyebe Jesús si nguiã ua canoa mo ye. Ngoi que huĩ huee mbia mbaaquiato quiatu ra. Mbia que chi jate ama nimia ndese ra. ² Jesús que mbia mbaaquiato quiatu tuchi quia ra. Ejemplos que esaã saã tuchi ee ra. ³ —Jenyisaquia rã serese. Sã emo si rei mbae eĩ mombiquia mbiquia no. ⁴ Sã emo ndiqui uqui uqui ñeenda rui no. Sã nguireĩ ndiqui ngaẽ eu no. ⁵ Sã emo emo ndiqui uqui sãta arõ no. Sãta aronda suri jei raque. Ibi ererate quia ñene. ⁶ Tenda ibate mose que eriqui ñimama mano nda. Erao eãte quia ñene. Nyebe mano jei nguiã. ⁷ Sã emo ndiqui uqui uqui nyu réndaa no. Sã nyu abe riqui suri erese no. Nyu ruri que echati asi cuaẽ eriquisã nda. Nyebe ia eã ño nguiã. ⁸ Sã emo ndiqui uqui uqui ibi turã no. Ùquĩ nguiatu que suri turã nda. I a turã ngue ra. Sã emo ia treinta no. Sã emo ia sesenta no. Sã emo ia cien no. ⁹ Jëisa mose, secheẽ jeñandu turã na, i que Jesús ra.

Jesús ucheẽ mbiasa uchimbaaquiato je mbae eĩ niñ

¹⁰ Mbia ataque nyoĩ mose que Jesús ji jenda ñee ee ra. Echimbaaquiato doce rese. —Ndecheẽ embiasa tuchi rã ure je mbae eĩ niñ, i que ñee Jesús je ra. ¹¹ Jesús que ñee ee ra. —Mbia rerecua tuchi quiarei lbatenda. Ae chõ asenei senei nguiã jêje ã. Secheẽ ambiasa asa bei tuchi quia jêje co. Mbia ataque quia siqui sereã erese co. Mbia ataque je aico ejemplos achõ naa naa mbei co. ¹² Eanduchõ sacua eicua turã nonde rocoĩ. Sã eriqui uba eãte Dios icha rui no. Dios eicuã mbutiã eã sacua esi, i que Jesús ñee nda. ¹³ Jesús que ñee ee ra. —¿Secheẽ jëicuayãte mbae eĩ niñ ñee mose jêje re? ¿Mañi jenyẽ quiatu ra ejemplos ataque icua re no? ¹⁴ Ae mbae eĩ mombiquia mbiquia nae, Dios cheẽ nenei neneisa rã ño aque re. ¹⁵ Ae uqui uqui ñeenda rui nae, mbia Dios cheẽ andu chooñosa rã ño ùquĩ nde. Ae Dios cheẽ andu chooñote quia nae, ùquĩ ñiangui si chõ Satanás ndiqui nguiã Dios cheẽ ndirõ. ¹⁶ Ae uqui uqui sãta arõ nae, mbia mo na ño ùquĩ no nde. Dios cheẽ andu mose, isi turã ndaque. Eyate raque erese nyii. ¹⁷ Mbia icuã icuã mose ee Dios cheẽ niñ, hui jei chõ nguiã esi. Mbae rao eã naanguia chõ ùquĩ nde. ¹⁸ Ae uqui uqui nyu réndaa nae, mbia mo na ño ùquĩ no nde. Dios cheẽ andu turã ndaque. Siqui bei eã ño nguiã erui. ¹⁹ Umbaerã

achõ ndese chõ eriquichĩ nguiã ndua. “Mbaecha tuchite ra se”, i bei chõ nguiã ndua ndua. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbeite ee. ²⁰ Ae uqui uqui ibi túraã nae, mbia mo na ño ũquĩ no nde. Ũquĩ nguiatu Dios cheẽ ñandu turã nguiã. Nyebe eriqui nguiã siqui beite erese. I a ia bei raanguia cote. Emo emo ia treinta. Emo emo ia sesenta no. Emo emo ia cien no, i que Jesús ra.

Tata rendi mbia resae ja

²¹ Jesús que ñeembe ee ra. —Sã nandeico lamparina ati eã no. Sã nandeico emii eã mbaequi re no. Erendi checua chõ nda nandemii. Mbia resae ja sacuaã. ²² Mbae checuayã nda nyecua ja emo mose. Mbia chiangui renda checuayã nda nyecua emo mose no. ²³ Jëisa mose secheẽ jeñandu turã na. ²⁴ Secheẽ nda jeñandu chooñochĩ jẽ. Jẽ secheẽ mumbayã mose, taembaaquiatu i i tuchi. ²⁵ Emo umbae rerequia mose, Dios ra embaerã mo mondobe ee. Emo embae eã mose, Dios ra embae sirõ ja esi.

Dios rimba ñimbeta chõ nguiã mbae eĩ na

²⁶ Dios rimba ñimbeta chõ nguiã mbae eĩ na. Sã emo mbae eĩ tiquia tiquia no. ²⁷ Suri ra itõ mocoinde cote. Eruri cuasu tuchi ra cote. Echa embusuriã ndaque. ²⁸ Dios ae chõ embusuri nguiã. Eracói rane. I a chee. Ea ñetẽ nane. Ea cuasute cote. Ea ireĩ cote. ²⁹ Ea ireĩ tuchi mose ra eishao shao cote.

Mbae eĩ na ño Dios rimba re

³⁰ Mbae rã ño Dios rimba chã. Ejemplo mo tasenei jėje. ³¹ Mbae eĩ na ño Dios rimba re. Sã mbia mo mostaza eĩ tiquia no. Eñetẽ tuchi raque mbae eĩ mo si. ³² Suri oso quia cote. Ecuasu tuchi chee. Ira rã ño cote re. Nguireĩ nguichi quichi chee erãquiã ndese. Eĩ si chõ Dios rimba re. Ũquĩ mi ndaque nyii. Ñimbeta tuchi cote. Mbae eĩ na, i que Jesús ñee mbia mbaaquiatu ra.

Jesús ejemplos senei senei tuchi mbia je

³³ Eĩ ño ngue Jesús quia mbia tubiriã mbaaquiatu quiatu ejemplos je ra. Mbia quenea tuchi chee que ra. ³⁴ Ejemplos achõ ngue esenei senei mbia mbaaquiatu sacuaã nda. Uchimbaaquiatu je quiatu que embiasa turã turã nda.

Jesús quiririã icuã icuã mbutiba; ama ndebera abe

³⁵ Itondaru ramo mose que ñee uchimbaaquiatu je ra. —Nyao ama ndisha robei, i que ee ra. ³⁶ Ae canoa ye Jesús ñi mbia mbaaquiatu quiatu nae, aque ye sí que echimbaaquiatu Jesús rerao ra. Mbia tubiriã ndecha. Canoa mo abe que nyoĩ quia erese ra. ³⁷ Ama ndiite re mose que quiririã icuã icuã ndu ee ra. I rebera que ique ique tuchi quia canoa ye ra. Nyebe canoa ndiqui nguiã ñimi serĩ tuchi ee. ³⁸ Jesús que uque rei oso quia canoa ndiita qiti ra. Uãquĩ ndua arõ ngue esi rei quia ra. Echimbaaquiatu que emumba ra. —Urembaaquiatusa, echumumba. Nandemanochĩ nda re, i que Jesús je ra. ³⁹ Jesús que nyuruã ñee asite quiririã je ra. —Ti ere cote, ama, i que ama ndebera je no nda. Quiririã ngue tiba echeẽ mose cote ra. Ama ndebera abe que tiba ra. ⁴⁰ Ñee ngue uchimbaaquiatu je cote ra. —¿Mbaerã jësiquichete riqui re? ¿Seicuayãte equia ã nde? i que Jesús ñee ee ra. ⁴¹ Siquiche bei que equia ra. Nyuruira tuchi que mae Jesús quirãcuã ndese ra. —Quiririã Jesús cheẽ mumbayã ñochĩ. Ama abe echeẽ mumbayã ñochĩ no, i que ñee nyue ra.

5

Jesús aba checuayã icuã jea

¹ Ngasẽ ngue ama ndobei cote ra. Gadara, i que hue ib je ra. ² Canoa si Jesús nguichi mose que hue jenda mo tu erea ra. Aba checuayã icuã ngue siqui echiangui re ra. Mbia raaque tãsa si chõ ngue eru ngasẽ Jesús je ra. ³ Mbia raaque tãsa bei que eriqui ra. Emo ngue echucua aroneate quia ra. Cadenas je abe que emo ndiqui ecua aroneate ra. ⁴ Nyucua mocoite rei nda cadenas je raẽ. Ei nda echucua rei raẽ. Eo abe. Ucuasa nda

endoso ndoso bei quia ra. Emo nda embutiba aronea tuchi quia ra. ⁵ Ngata bei nda equia itondaru ra. Nyaashĩ mose abe. Tasẽ tasẽ mbei nda equia mbia raaque tãsa ra. Sita ibátee abe no. Sita je nda eriqui ñimbasi mbasite ra. ⁶ Isho que mae Jesús rese ra. Uchã asi que eu ngoi ngũĩã ndese enonde ra. ⁷⁻⁸ Jesús que ñee ee ra. —Esẽ u aque chiã si, aba checuayã, i que Jesús ñee ee ra. Aba checuayã ngue tasẽ tuchi ñee Jesús je ra. —¿Mañi ere ra equia seje re, Jesús? Dios riirĩ ño nde re. ¡Sembasichĩ nda se jê! i tuchi que ee ra. ⁹ —¿Mañi ndeje re? i que Jesús ee ra. —Etubiriã, i chõ nguiã seje. Ure cuabẽte quia ñene, i que ñee Jesús je ra. ¹⁰ —Isho ra uremondochĩ, i tuchi que aba checuayã ñee Jesús je ra. ¹¹ Chiasu socoi tubiriã ngue chi quiaru huee ibi ibátee ra. ¹² Nyebe aba checuayã icuã ñee ja nguiã Jesús je. —Uremondo ja rã chiasu socoi chiangui re, i tuchi que equia Jesús je ra. ¹³ Eno, i que Jesús ee ra. Nyebe aba checuayã usẽ ja nguiã amei ñia si cote. Chiasu chiangui re que echoi ja cote ra. Dos mil rei chiasu. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda.

¹⁴ Chiasu raarõsa mundite que ra. Uchã ngue echoi mbia mbiirandu randu ja ra. Sucha tubiriã jenda mbiirandu. Ishonda abe mbiirandu no. Mbia que ngaẽ ngaẽ nguia jirandu turã cote ra. ¹⁵ Ngasẽ ngue ecuaẽ Jesús je ra. Ae aba checuayã icuã nguereco uchiangui re nyii nae, aque abe que siqui huee ee ra. Huiirao resebe que eñi ngoi ra. Earacuate que ee cote ra. Nyebe mbia riqui nguiã siquichete. ¹⁶ Ae mae erese nae, ùquĩ ngue ñee ñee mbia je ra. Mbia mbiirandu chiasu socoi rese. Ae aba checuayã quereco quia nyii nae, aque rese abe no. ¹⁷ —Eso rã urerecha urerecua si, i jate que hue jenda ñee Jesús je ra. ¹⁸ Ae aba checuayã quereco quia nyii nae, aque que ñee Jesús je ra. Jesús ua mose canoa ye. —Nderese bei chõ taso se jẽ, i rei que ñee Jesús je ra. ¹⁹ Jesús que ñee ee ra. —Tei. Quiatu rei ndechuchúaa. Quiatu ñee nderesenda je. “Dios chõ sembucherõ nguiã. Eya eã tuchite que eriqui serese ra”, ere oso nderesenda mbiirandu, i que Jesús ee ra. ²⁰ Amei ngue oso sucha mbuchesea sea cote ra. Mbia Decápolis jenda mbiirandu randu ja. —Jesús chõ sembucherõ nguiã, i ja jate que equia mbia je ra. Mbia que nyuruirate quia mae erese ra.

Jesús Jairo riirĩ mbucherõ; ari mo abe mbucherõ

²¹ Jesús que tu si iasa sobei si canoa ye ra. Mbia tubiriã ngue ngaẽ ngaẽ nguia erea ra. Ama nimíaa eriquibe mose. ²² Judíos rerecua mo ngue tu erea ra. Jairo, i que ee ra. Judíos munua nuasa que ae ra. Jesús nonde que eru ngoi ngũĩã ndese ñee ee ra. ²³ —Qui seriirĩ si quia mano qui. Nyao rã ndeo terechono earõ. Embucherõ sacua, i tuchi que equia Jesús je ra. ²⁴ Jesús que oso erese cote ra. Mbia tubiriã abe que nyoĩ quia ñimajaã tuchi erui ra. ²⁵ Ari rasi mo abe que oso quia erui ra. Eruqui nda uchẽ mbei quia ee ra. Doce años nyee. ²⁶ Ngasi nda esaã tuchi quia ra. Erasi rea reasa nda etea tea jate rei quia raẽ. Umbae nda emondo mondo ja chee ngasi rea reasa je ra. Nyerõ jiri jiriã tuchi que ra. Erasi i i tuchi chõ ngue ra. ²⁷ Jirandu chee que Jesús rese ra. Equite quti que esi mbia joõ nda. Oco que oso eirao rese ra. ²⁸ —Eirao achõ ndese se oco mose, acherõ nda se, i nda ra. ²⁹ Aque mose tuchi que eruqui ti i ee cote ra. Ngasiã ngue eicua uchiangui re cote ra. ³⁰ —Sequirãcuã ngue mbia mo mbucherõ nda, i que Jesús uchiangui re ra. —¿Aba oco seirao rese re? i que mae uquite quti ra. ³¹ Echimbaaquiato que ñee ee ra. —Mbia tubiriãte nyeresẽ. Ñimajaãte nyeresẽ. ¿Mbaerã ereico “¿aba oco serese re?” i re? i que ee ra. ³² Jesús que nyuruba ruba mae nda. —¿Aba oco serese re? i. ³³ Ari que jirandu tuchi ucherõ ndese ra. Eireĩte que titi titi i huĩ ee ra. Ngoi que ngũĩã ndese Jesús resa quti ra. Mbae que esenei ja ee cote ra. ³⁴ Jesús que ñee ee ra. —Seicuate que se ra. Nyebe arembucherõ nguiã. Ndeya chõ eso cote. Nderasi ra tu si eã ndeje, i que Jesús ñee ee ra.

³⁵ Echeẽ mose chite que emo ngaẽ Jairo chuchua si ra. —Nderiirĩ ngue mano cote ra. ¿Mbaerã nda Jesús ererao ndechuchua cote re? i que ñee ee ra. ³⁶ Jesús que echeẽ ñandu ra. Ñee ngue Jairo je cote ra. —Ndeya eã techĩ nda jẽ. Seicua chõ se jẽ, i que Jesús ee ra. ³⁷ Jesús que oso eraaque rea cot e ra. Uchimbaaquiato tres que equerao ra. Pedro. Jacobo abe. Juan abe no. Jacobo nongue que Juan nda. Ñquĩ miĩ ño ngue equerao erea

ra. ³⁸ Ngasē ngue Jairo chuchua cote ra. Mbia que chi ja nyeseo ãquē ndaaque rese ee ra. Nyiibu tuchi que eu ra. ³⁹ Ique que oso ñee mbia je ra. —¿Mbaerã jëingo nyiibute re? ¿Mbaerã jëingo nyeseo re? ãquē manoãte resē. Uque chō u co resē, i que Jesús ñee mbia je ra. ⁴⁰ Mbia que iquia iquia chō ee ra. Jesús que mbia mondo ja chee itaicuee ra. Eru rese que esi ique eriirĩ ndaaque rea ra. Esi abe rese. Nguesenda abe rese. ⁴¹ Eraaque o que eisi ñee ee ra. —Echuruã, ãquē, i que ee ra. ⁴² Echeē mose tuchi que ãquē juã ngata cote ra. Etiarōte que ra. Doce años que ra. Mbia que nyuruira tuchi mae erese ra. ⁴³ —“Jesús que co raaque mbuquera ra”, jenyechĩ nda emo je jē, i que Jesús mbia je ra. —Nderiirĩ embuquiaru cote, i que ee cote ra.

6

Mbia Nazaret jenda Jesús isiteã

¹ Hue si que esi nguécuaa ra. Echimbaaquiatu abe que nyoĩ erese ra. ² Sábado mose que mbia mbaaquiatu quiatu judíos chumunuásaa ra. Mbia que nyuruira ja tuchi u echeē andu ra. Ñee ñee ngue u nyue ra. —¿Mangue eriqui ñimbaaquiatu tuchite re? ¿Mañi equia mbae icua ja tuchite re? Nandemae sayã naa naa tuchichĩ. ³ Ira mbitirō tirōsa chō ndaque. María riirĩ ño ndaque. Jacobo nongue chō ndaque. José abe no. Judas abe no. Simón abe no. ã echari enongue riqui ja raque nanderese ã, i que mbia ra. Nyebe mbia Jesús cheē andu sereã nea nguiã. ⁴ Jesús que ñee ee ra. —Dios cheē mbuchecuaa ishonda cheē nguia ra mbia isi turã mbei. Nguécua jenda cheē achō nguia ra eisi turã eã. Ngōngue cheē achō nguia ra eisi turã eã no, i que Jesús ñee nguécua jenda je ra. ⁵ Jesús que mbia mae sayã saã saã aroneate quia huee ra. O que echono mbia rasi miĩ miĩ arō embucherō nda. ⁶ Hue jenda mbia que chi Jesús icua eãte ra. Nyebe Jesús nyuruira tuchi nguiã mae erese. Sucha tubiriã mbuchesea sea que equia mbia mbaaquiatu quiatu ra.

Jesús uchimbaaquiatu doce mondo ucheē nenei nenei sacua

⁷ “Jenyu” i que uchimbaaquiatu doce je ra. Nyeremo nemo ngue embuchao chao mondo ra. Uquirãcuã ngue emee mee ee ra. Aba checuayã icuã jea jea sacua mbia chiangui si. ⁸⁻⁹ —Mbae mo nda jendaochĩ icua. Mbae riru mo abe ra jendaochĩ. Jenyiurã mo abe ra jendaochĩ no. Mbae isiquia abe ra jendaochĩ. Jëiyao nongue mo nda jendaochĩ. Jëirao nongue mo abe ra jendaochĩ no. Jenyitochoquia miĩ ño jenda. ¹⁰ Jengasē mose sucha tubiriã mo, aque tuchia miĩ ño jëingo uque. Tuchia ra jembuchesea seate chĩ jëingo mose huee. Ae ra jengue nyii nae, hue tuchia bei chō jëingo uque. ¹¹ Sucha tubiriã jenda mo jëisi sereã nea mose, jëhui chō esi. Hue jenda jeñee andu sereã mose, jëso chō hue si. Jëi tubi jembutomo tomo ee. Hue jenda huĩcuã icua sacua. Tacheē nyecua jëje. Ae ra jeñee isi sereã nae, ũquĩ nda Dios mbasi tuchi. Uquiatoã nda embasi ja aque mose. Sodoma jenda ra Dios mbasi raque. Gomorra jenda abe no. Ae jeñee isi sereã nae, ũquĩ nguia ra embasi tuchi Sodoma jenda si. Gomorra jenda abe si, i que Jesús ñee uchimonobi je ra. ¹² Nyoĩ nyoĩ ja que equia Dios cheē nenei nenei mbia je ra. —Jendua si Dios rese, i ite que equia mbia ja je ra. ¹³ Aba checuayã icuã ngue ejea jea tuchi quia mbia chiangui si ra. Mbae eĩ quira que equiti qiti quia mbia rasi rese ra. Mbucherō ja que ra.

Mbia Juan el Bautista iquia

¹⁴ Mbia que jirandu ja Jesús rese cote ra. Herodes abe que jirandu erese ra. Ererecua que ae ra. Juan el Bautista Jesús riqui reĩ Herodes je reaē. —Juan ndaaque que quera si ra. Nyebe eriqui nguiã mbae raã jate, i rei que Herodes ra. ¹⁵ Elías Jesús riqui reĩ emo je reaē. Dios cheē mbuchecuaa ñiinda Jesús riqui reĩ emo je re no aē. ¹⁶ Herodes que jirandu Jesús rese ra. Juan el Bautista eriqui reĩ nguiã ee. —Juan ño eriqui re. Ae ãquĩ achisia. Quera si chōchĩ ere, i rei que Herodes ra. ¹⁷⁻¹⁸ Herodes Juan mondo quiatu quia carcel nyii reaē. Nyucua nda cadena je ra. Paama i nda Juan je ra. —¿Nde ndenongue ninisi erereco aroneate jē! i quiatu que Juan ñee ee nyii ra. Herodes siqui mose nõngue

ninisi rese. Herodías, i que enongue ninisi je ra. Felipe, i que enongue je ra. ¹⁹ Herodías que Juan ucuayãte quia ra. —Taiquia, i rei que equia ra. ²⁰ Herodes bite rei que Juan ñee andu ra. Icuayã jiri rei que ra. —Juan turãte que ra jẽ, i que equia Juan ñii nda. Nyebe eriqui nguiã ireĩ ireĩte esi. Nyebe Herodías Juan iquia aroneate nguiã. ²¹ —Co mose chõ jẽ, i que Herodías Herodes mbae cumpleaños mose cote ra. —Jenyu quiaru serese, i que Herodes mbia rerecua ja je ra. Ererecua Galilea jenda ja je. ²² Aque mose que Herodías riirĩ nyuruqui ruqui mbia je ra. Nyucuaaque que ae ra. Herodes ia tuchi que mae nyucuaaque nyuruqui rese ra. Ñee ngue nyucuaaque je ra. —¿Mbae ra amee ndeje re? Echeẽ ño seje. ²³ “Sebite co” nde i mose, aque tamondo ndeje. Sembae ataque tamondo ja ndeje ndebi mose. Acheẽ ñooñoa ño nguiã ndeje a, i que Herodes ñee nyucuaaque je ra. ²⁴ Nyucuaaque que oso ñee usi je ra. —¿Mbae “embu seje” ae ra ee re? i que ñee usi je ra. —“Juan el Bautista ãquĩ ño embu seje”, ere chõ ee, i que esi ra. ²⁵ Nyebe que esi ñee Herodes je cote ra. —Juan el Bautista ãquĩ emee na seje plato ye, i que ñee ee ra. ²⁶ Herodes chosoi que oso serĩ tuchi echeẽ andu mose ra. —Acheẽchĩ se quia ee. A seresenda chi ja quiaru serese a resẽ. ã seandu ja chõchĩ. Nyebe ra secheẽ ambuchebi eã ee, i que Herodes uchiangui re ra. ²⁷ Soldado mo ngue emondo cote ra. —Quiatu Juan iquia. Eãquĩ eru seje, i que ñee soldado je ra. ²⁸ Cárcel que esi Juan ãquĩ sia cote ra. Eãquĩ ngue equeru plato ye nyucuaaque je cote ra. Nyucuaaque que emee usi je cote ra. ²⁹ Juan ñimbaaquiato jirandu mose que echoi eraaque rea cote ra. Ñono ngue sita ndoro ji ye ra.

Jesús mbichae tubiriã saã mbichae mii je

³⁰ Ae Jesús mondo quia uchimbaaquiato, ùquĩ ngue ngaẽ si ee cote ra. Uchisaã ngue esenei senei cuaẽ ee ra. —Eĩ ure que mbia mbaaquiato quiato ra, i que ecuaẽ Jesús mbiirandu ra. ³¹ Mbia tubiriãte que ngaẽ ngaẽ nguia ñindecua ndecua erea ra. Equiaru mose rocoĩ abe. Nyebe ñee nguiã uchimbaaquiato je. —Nyao rã mbia eãsa, jenguenea ucu mbirĩ, i que ra. ³² Ae ae que nyoĩ canoa ye mbia eãsa ra. ³³ Mbia tubiriã tuchi ngue mae ñochĩ nguiã echoi rese. Jesús icua chõ ngue ra. Mbia que nyoĩ uchã ibi rĩ nda. Sucha jenda ja. Ùquĩ nane ngue nyoĩ ngasẽ Jesús raarõ ama nimia nda. ³⁴ Jesús que usẽ canoa si cote ra. Mbia tubiriã ndese que mae nda. Eya eã tuchite que erese ra. Oveja raarõ iriã na nguiatu que mbia chi ee ra. Mbia que embaaquiato quiato tuchi cote ra. ³⁵ Tenda oso mose que echimbaaquiato ñee ndei ee ra. —Tenda osote resẽ. Mbia chuchua mo ãte a resẽ. ³⁶ Mbia chiurã eã abete a resẽ. Mbia embui mondo uchiurã ndequia requia sacua sucha achi jenda rea rea, i que ñee Jesús je ra. ³⁷ —Jeño mbae jemondo ee echuurã, i chõ ngue Jesús ñee ee ra. —Tei. Mbae quia ra aba mundo ee. Mbia tubiriã tuchite quia ñene. Mbae isiquia tubiriã tuchi je quia nda aba mbae isi rei nguiã ña. Mbia chayãte chõ eno nde, i que ñee Jesús je ra. ³⁸ —¿Manya mbichae jendeco ùquĩ nde? Jẽso mae erese no, i que Jesús ee ra. Emo ngue oso mae erese eicua ra. —Cinco mbichae riqu i co. Sira nyeremo abe, i que echimbaaquiato mo ñee ee ra. ³⁹ —Sã mbia ngoi ngoi ja quiata tose. Echesea sea, i que Jesús ra. ⁴⁰ Mbia que ngoi ngoi ja nyesea sea cote ra. Cincuenta jaaja. Cien abe no. ⁴¹ Jesús que mbichae cinco sirõ cote ra. Sira nyeremo abe no. Ibei rese que mae gracias i Dios je ra. Mbichae que esiquio quio cote ra. Mee mee ngue uchimbaaquiato je ra. —Jemee mee mbia je, i que uchimbaaquiato je ra. Sira nyeremo abe que esiquio quio mbia ja je ra. ⁴² Mbia ja que eu tuchi ra. Ñimbio chee que ra. ⁴³ Mbia chiu sique tubiriã tuchi que ra. Mbichae rire. Sira rire abe no. Doce iru que mbia mombisẽ esique sique je ra. ⁴⁴ Cinco mil hombres que mbia mbichaecua ra.

Jesús ngata i arõ

⁴⁵ Aquere que Jesús uchimbaaquiato mundo ja canoa ye ra. —Jẽ nane jẽso Betsaida sobei. Mbia tambui turã na mundo uchuchúaa se nyii, i que ra. ⁴⁶ Jesús que mbia mbui turã mundo cote ra. Ae ae que oso sita ibátee cote ra. Ñee sacua Dios je. ⁴⁷ Huee que ae ae riqui itondaru chee ra. Canoa yenda que chi bei ama ndiite rĩ nda. ⁴⁸ Echimbaaquiato

que pare pare i canoa ibu ra. Quiririã ngue eichu ichute eruba quiti ra. Jesús que mae erese ishote ra. Ngaira ñee mose que esi eriichã nda. I arõ ngue esi quia ngata ra. Nyucuaño nda eña nde. ⁴⁹ Mbia aingue eriqui reĩ nguiã echimbaaquiato je. Ngata mose i arõ. Nyebe tasẽ tasẽ nguiã. ⁵⁰ Echimbaaquiato chiã ngue cuãacuã i tuchi mae erese ra. —Jêsiquichechĩ nguiã. Jêya chõ ae. Se chõ nyeresẽ, i que Jesús ñee ee ra. ⁵¹ Ua que canoa ye embirõ cote ra. Quiririã ngue tiba cote ra. Echimbaaquiato que nyuruirã tuchi u mae erese ra. ⁵² Jesús mbichae mbeta quia nae, ùquĩ ngue echimbaaquiato icuayãte uchiangui re ra. —Dios riirĩ ño eriqui reaẽ, i ãte que eicuayã nda. Eãquĩ ãtãte chõ ngue ra.

Jesús mbia Genesaret jenda mbucherõ cherõ

⁵³ Ngasẽ nyee que sobei cote ra. Genesaret, i que hue ibi je ra. ⁵⁴ Jesús usẽ mose canoa si que mbia eicua jei ra. ⁵⁵ Mbia que nyoĩ ja uchã tuchia mbuchesea sea ra. Erasi rurucuaẽ cuaẽ sacua Jesús je, erua resebe. ⁵⁶ Jesús cuatásaa que mbia riqui erasi rurucuaẽ cuaẽ ee ra. Sucha tubiriã jenda jaaja. Sucha mii mii jenda jaaja abe no. Turuquia jenda abe no. Ûquĩ ja que erasi curucuaẽ cuaẽ nguia ñono Jesús jii ra. —Sã erasi oco oco ja rã ndeirao ai rese, i jaaja que ñee Jesús je ra. Ae oco erese nae, ùquĩ ngue nyerõ ja ra.

7

Mbia chiangui renda ae chõ embiicua nguiã

¹ Aquere que fariseos mo ngaẽ ñee Jesús je ra. Embesasa mo abe, ae ngaẽ Jerusalén si. ² Jesús chimbaaquiato mo ngue quiaru quiaru echoi quiiriã ee ra. —¿Mbaerã jẽingo quiaru jenyoi quiiriã nde? Nanderamei ñee ndui si eã ño jẽingochĩ nde, i que ñee asite ee ra. ³ Fariseos quiarei nyoĩ bei quiaru nonde. Judíos ja abe no. —Nandechoi eã mose ra nandechiã mondeite, i rei equia ã. Ngãmei ñee nguire eriqui ùquĩ naa naa mbei ã. ⁴ Echoi quiiriã mose eriqui quiaruã ã. Ngaẽ mose plaza si eriqui nyoĩ nyoĩ tuchi quiaru nonde ã. Ngãmei ñee nguire chõ eriqui nguiã mbae raã ja ã. Sã eriqui uyuquia irei irei no. Ñio abe no. Irachaẽ abe no. Uquisa abe no. ⁵ Nyebe fariseos ñee nguiã Jesús je. —¿Mbaerã ndechimbaaquiato riqui eĩ eã nanderamei ñee nguire re? ¿Mbaerã eriqui quiaru uchoi quiiriã nde? i que fariseos ñee Jesús je ra. Embesasa abe no. ⁶ Jesús que ñee ee ra. —Isaías que embesa jeniĩ cose ra. Eĩ ngue embesa ra:

Á mbia riqui ñee turãte raque seje ã.

Uchiangui re quia eriquiãte nguiã serese ã.

⁷ Ñee turãte raque equia seje ã. Amei ñee achõ ño esenei seneichĩ nguiã mbia je.

Dios cheẽ mii nenei nenei ndocoĩ ee,

i que Isaías embesa jeniĩ nda. ⁸ Jenamei ñee achõ ño jesenei seneichĩ nguiã mbia je ùquĩ.

Dios cheẽ nenei nenei ndocoĩ ee.

⁹ Dios cheẽ jemumba mumba chõ chĩ nguiã ã. Nanderamei ñee ndese chõ jẽingochĩ oote ã. ¹⁰ Moisés cheẽ ndui turã eã ño jẽingochĩ ã. Sã Moisés ñee mbia je no: “Jeturã ño nguia jendu je jẽ. Jêsi je abe no. Emo ñee icuã mose ngu je, ùquĩ jẽiquia chõ. Emo ñee icuã mose usi abe je, ùquĩ abe jẽiquia no”, sã i Moisés no. ¹¹ Jẽ nguia jẽingo nguiã Moisés cheẽ abi abite ã. Sã jẽingo ñee no. “Ae nda amee nei jêje, ùquĩ ngue amondo ja Dios je ra”, i mose emo ñee ngu je, “coche ñene” jenyẽ chõchĩ nguiã ee. Mbae mee eã mose ngu je. Usi abe je. Nyebe jẽingo nguiã mbia mbaaquiato icuã icuã ùquĩ. ¹² ¿Mbaerã jẽingo mbia riquisã quisãte mbae meese mose usi je re? Ngu je abe no. ¹³ Nanderamei ñee achõte jẽsenei seneichĩ nguiã jendiirĩ je ã. Nyebe jẽingo nguiã Dios cheẽ mbuquiachãte jendiirĩ si ã. Mbae icuã atate jêsaã saã nguia ã, i que Jesús fariseos je ra. Embesasa abe je. ¹⁴ —Jenyu secheẽ andu, i que Jesús mbia ja je ra. —Secheẽ jêicua rã. ¹⁵ Mbia chiu embiicua eã nguiã. Echiangui renda chõ embiicua nguiã. Echiangui renda chõ usẽ nguiã echuru rĩ echeẽ mose. Ûquĩ ño embiicua nguiã. ¹⁶ Jêisa mose, secheẽ jeñandu turã na, i que Jesús ra. ¹⁷ Jesús que mbia secha oso ique tuchúaa ra. Echimbaaquiato que ñee ee cote ra. —Erecheẽ ngue namo, “ùquĩ nda mbia mbiicua” ere que, ùquĩ embuchecua rã ndecheẽ ure

je, i que ñee Jesús je ra. ¹⁸ Jesús que ñee ee ra. —¿Jẽ abe jẽicuayãte quia re? Ae mbia u quia nae, ùquĩ mbia mbiicua eã nguiã. ¹⁹ Iqueã nda oso echiangui re. Eriye ye chõ eriqui nguiã oso. Echiique rui chõ eriqui nguiã oso. Usẽ nyee, i que Jesús ñee uchimbaaquiatu je ra. —Mbia chiũ turã ja, i chõ nguiã. ²⁰ —Mbia chiangui renda chõ embiicua nguiã usẽ mose echuru rĩ. ²¹ Aba chiangui renda quia aba mundua icua icuãte nguiã. Nyebe eriqui nguiã siqui emo ninisi rese. Emo ndu rese abe no. Siqui siqui eruã ndese abe no. Mbia abe iquia iquia. ²² Mbae abe mbuquiachã quiachã no. “Aque raã nda sembaerã ña”, i emo mbae je no. Mbae icua ñnumbarã raã naa ja. Mbia abe mbiĩrĩ irĩ no. Mbae icua oseĩ oseĩ bei. “Se quiatu ae”, i mbae je. Ñee icua icua no. Ucuasu abe raã naa no. Mbae icua naa ja chooño. ²³ Mbia chiangui renda icua ja chõ ùquĩ nde. Ùquĩ ño mbia mbiicua icua nguiã ùquĩ ao ao mose, i que Jesús ra.

Ari mo Jesús icua

²⁴ Jesús que nyoĩ hue recha cote ra. Ngasẽ ngue Tiro jii cote ra. Sidón jii abe no. Ique que oso tuchia mo nda. —Sã mbia jiranua serese, i rei que ra. Mbia qu e jirandu chõ erese ra. ²⁵ Ari mo abe que jirandu erese ra. Eriirĩ ngue aba checuayã nguereco uchiangui re ra. Ari que tu Jesús rea ra. Ngũĩã ndese que ngoi ejii ra. ²⁶ Sirofenisia jenda que ae ra. Judío eã tuchi que ae ra. Griego cheẽ ño ngue echeẽ nde. —Aba checuayã icua eja rã seriirĩ si, i tuchi que Jesús je ra. ²⁷ Jesús que ñee ee ra. —Judíos rese rane taico mbae raã naa. Ahuĩ aronea judíos si, mbae raã naa mbiamo je, i que Jesús ee ra. ²⁸ Ari que ñee ee ra. —Aicuate raque se, Sererecua. Mbiamo ndaque ure. Judíos eã ndaque ure. Ure je abe chõ mbae esaã ae. Seriirĩ embucherõ seje ae, i que ari ñee ee ra. ²⁹ Jesús que ñee ee ra. —Erecheẽ turãte. Quiatu rei. Nderiirĩ ngue nyerõ no, i que ee ra. ³⁰ Ari que oso uchuchúaa cote ra. I que eriirĩ u ngua ye ee cote ra. Aba checuayã icua usẽ ño ngui a esi reaẽ.

Jesús eisayã mbucherõ

³¹ Jesús que nyebi Tiro rurubi si ra. Sidón ngue etasamo nda. Ama ndisha Galiléaa que esi ra. Decápolis rĩ ngue esi ra. ³² Eisayã mo ngue mbia curucuaẽ ee ra. Echeẽ aquiatuãte abe que ra. —Ndeo echono earõ embucherõ, i tuchi que mbia Jesús je ra. ³³ Jesús que eisayã nguerao pe jiri mbia recha ra. O que emingue mondo eisacua rereco chobeĩ ra. O que embia ngũendi je ra. Mondo que echuru rĩ cote ra. ³⁴ Soboiba que ibate cote ra. Jiabute que ñee ee ra. —Esoro, eisacua, i que ee ra. ³⁵ Eisacua que soro cote ra. Echuru abe que nyerõ cote ra. Ñee ngue cote ra. ³⁶ —Emo nda jembiiranduchĩ jẽ, i rei que Jesús ñee mbia je ra. Mbia que ñimbiirandu i i tuchi ra. ³⁷ Mbia que ñee ñee nyue Jesús rĩĩ nda. —Mbae raã turã turã ja tuchichĩ equi a co. Eisayã abe isa ndoro chee no. Echeẽ ngũĩã abe mbucheẽ nyee no, i ja tuchi que mbia quia nyuruira mae erese ra.

8

Jesús mbichae tubiriã saã mbichae mii je

¹ Mbia que ñmunua tuchi Jesús je aque mose ra. Ñee ngue uchimbaaquiatu je ra. ² —Seya eãte aico ã mbia tubiriã ndese co. A echi arete serese tres días a. Echiurã mo eãte mbae mo aa. ³ Eriãcua amondo sereãte echuchúaa. Ngasẽ ãte chõ ndae. Ishote si ecuaã aa resẽ. Nandembuquiaru chõ aa, i que Jesús ra. ⁴ Echimbaaquiatu que ñee ee ra. —Turuquia re chõ nandeico a resẽ. ¿Mañi nda aba ã mbuquiaru ja re? i que ñee Jesús je ra. ⁵ —¿Manya mbichae jendeco re? i que Jesús ee ra. —Siete, i que ee ra. ⁶ Jesús que mbia mbucoi ja íbii ra. Mbichae siete que eisi ja o je cote ra. Gracias i que Dios je cote ra. Mbichae qu e esiquio quio mee uchimbaaquiatu je cote ra. Ùquĩ ngue embuchao chao mbia tubiriã je cote ra. ⁷ Sira ñetẽ mii abe que equereco ra. Gracias i que Jesús Dios je cote ra. —Sira abe jembuchao chao mbia je, i abe que ee ra. ⁸ Mbia que eu ja ñimbio chee ra. Echiu sique que emunua nua ja ra. Siete iru que emombisẽ nyee ra.

⁹ Mbichaecua rei mbia cuatro mil. Jesús que embui turã mondo cote ra. ¹⁰ Canoa ye que Jesús ua uchimbaaquiату rese cote ra. Nyoï que Dalmanútaa ra.

Mbia mae sayã eteacuquia ure je, i fariseos

¹¹ —Tã nande rã Jesús je, i que fariseos cuaẽ ñee ñee ee ra. —Mbia mae sayã esaã na ure je. Ì nda “Dios chimbu” ure tuchi ndeje, i rei que ñee Jesús je ra. ¹² Jesús que iabu tuchi ñee nda. —¿Mbaerã mbia riqui “mbia mae sayã esaã ure je” i tuchi re? Tacheẽ nyecua jêje. Mbia mae sayã mo nda atecuquia eã tuchi jêje, i que Jesús ñee ee ra. ¹³ Oso que mbia recha cote ra. Iasa que echoï sobei cote ra.

Fariseos mbia mbaaquiату icuã, i Jesús

¹⁴ Jesús chimbaaquiату que uchiurã curuchoï eã nda. Tesarei que esi ra. Mbichae mii tuchi que equeru huee ra. ¹⁵ Jesús que ñee ee ra. —Mbichae mbuchimatãsa rã ndei fariseos cheẽ. Herodes chimbaaquiату cheẽ abe no. Ûquĩ ñee ndese ra jëingochĩ jê, i que Jesús ee ra. ¹⁶ —Mbichae quiату ngue nanderuã nguiã. Nyebe eriqui nguiã ñee nande je ùquĩ, i rei que echimbaaquiату ñee nyue ra. ¹⁷ Jesús que echeẽ ñee icuate ra. Nyebe ñee nguiã ee. —¿Mbaerã jëingo “mbichae nanderuãchĩ” i re? ¿Ae rĩ aico ñee jêje nae, ùquĩ jëicuayã mbeite quia re? ¿Jeñia átã mbeite eriqui re? ¹⁸ Jëisate raque. ¿Secheẽ jeñanua mbeite quia re? Jendesate raque. ¿Sechisaã jëicuayã mbeite quia re? ¹⁹ Se mbichae cinco mbeta mose mbia cinco mil je, ¿manya iru jemombisẽ mbichae sique sique je re? i que Jesús ee ra. Doce, i que ee ra. ²⁰ —Mbichae siete mbeta mose mbia cuatro mil je, ¿manya iru jemombisẽ esique sique je re no? i que Jesús ee ra. Siete, i que ee ra. ²¹ —¿Jëingo secheẽ icuayã i ite ã nde? i que Jesús ee ra.

Jesús eresayã mo mbucherõ

²² Nyoï que Betsaida cote ra. Mbia que amei ndesayã mo ngurucuaẽ Jesús je ra. Oco sacua ere se embucherõ. ²³ Jesús que eo isi serao pe jiri sucha si cote ra. Ngüendi que equiti eresa rese ra. O que echono earõ nda. —¿Eremaete mbae rese cote re? i que ee ra. ²⁴ Eresayã ngue mae cote ra. —Mbia rese amaete cote. Ecuata rese amaete. Ira raãte mbia seje, i que eresayã nda. ²⁵ Jesús que o chonombe eresa rese ra. Mae turã ngue cote ra. Nyerõ tuchi que cote ra. ²⁶ Jesús que embui mondo uchuchúaa ra. —Eresochĩ nda sucha ite rĩ jê, i que ee ra.

Cristo chõ nde resẽ, i Pedro Jesús je

²⁷ Jesús que nyoï Cesarea de Filípoo cote ra. Huee que ñee uchimbaaquiату je cote ra. —¿Aba aico reĩ mbia je re? i que ee ra. ²⁸ Echimbaaquiату que ñee ee ra. —Juan el Bautista ereico reĩ nguiã mbia je co. Elías ereico reĩ nguiã emo je no. Dios cheẽ nenei neneisa mo ereico reĩ nguiã emo je no, i que echimbaaquiату ñee Jesús je ra. ²⁹ —¿Aba aico reĩ jêje co re? i que Jesús ee ra. —Cristo chõ nde resẽ, i que Pedro ñee ee ra. ³⁰ —Jeñeechĩ nda mbia mo je ùquĩ jê, i que Jesús ee ra.

Mbia ra sei quia, i Jesús

³¹ Jesús que umano nonde senei senei uchimbaaquiату je ra. —Mbae rasi ra asaã tuchi. Judíos ramei icuã icuã tuchi ra seje. Sacerdotes rerecua abe no. Embesasa abe no. Sei quia rae. Tres días mose ra aquera si, i que ñee uchimbaaquiату je ra. ³² Jesús que ñee nyecua tuchi ee ra. Nyebe Pedro Jesús rerao nguiã suruicha. —¿Mbaerã erecheẽ ùquĩ nde? Mbia ra ndei quiyã, i rei que Pedro ñee asite Jesús je ra. ³³ Jesús que uba mae uchimbaaquiату rese ra. Ñee ngue Pedro je ra. —Ehui chõ sesi, Satanás. Mbia ndua ndua rã ño ereico nguiã ndua. Dios ndua ndua rã eã, i que ñee Pedro je ra.

³⁴ Jesús que ñee uchimbaaquiату ja je cote ra. Mbia abe je. —Emo siquise mose serui, sã hui ja mbae ubi si. Sã cruz rui umbaerã se rã si. Sã eriqui serui bei cote. ³⁵ Emo ndua bei mose ngueco rese, ereco ra ua esi. Emo hui mose ngueco si seje, ùquĩ nda siqui bei. ³⁶ Emo ngueco mumba chooño mose, eya eã mbei rae. Mbaecha rete raque. ³⁷ Emo

ngueco mumba choño mose, mbae mo eãte ereco ribishorõ sacua. ³⁸ Emo ireĩ ireĩ mose sesi mbia icua ndésaa, se abe ra aireĩ ireĩ esi. Emo ireĩ ireĩ mose secheẽ si, se abe ra aireĩ ireĩ esi, sechu mose mbia rerecuarã. Dios ra sembu si íbii uquirãcuã je aque mose. Ibatenda rese ra achu ángeles, i que Jesús ee ra.

9

¹ —Tacheẽ nyecua jêje. A jengu a nae, jemo nda jemaẽ sechu rese. Achu ra mbia rerecuarã tuchi cote. Jemo jemano eã mose ra achu mbia rerecuarã tuchi cote, i que Jesús ee ra.

Jesús nyicuabo uchimbaaquiato résaa

² Tenda seis uare que Jesús uchimbaaquiato mo nderao sita ibátee ra. Pedro. Jacobo. Juan abe no. Ũquí ngue equerao ja mbia tiásaa ra. Jesús que nyicuabo erésaa huee ra. Enininya tuchi que ee ra. ³ Eirao abe nininya tuchi que ra. Eiraoshĩ nininya tuchi que ee ra. ⁴ Mbia nyeremo ngue ngaẽ ibate si ra. Ñee ñee ngue ecuaẽ Jesús nininya rese ra. Moisés que ũquí nda. Elías rese. ⁵ Pedro que ñee Jesús je ra. —Sererecua, nandecu turãte a. Sucha ñetẽ uresaã saã na. Enongue nembraerã. Enongue Moisés mbaerã. Enongue Elías mbaerã no, i rei que Pedro ñee Jesús je ra. ⁶ Echimbaaquiato siquichete quiato ngue re. Nyebe Pedro riqui nguiã “mañi nda aba re” ite. ⁷ Ibeishĩ ngue tu nguichi eite re cote ra. Moisés mbuchecuyã ee. Elías abe no. Echeẽ mo ngue echandu ibeishĩ qui re ra. —Co rei sebi tuchi seriirĩ co. Echeẽ jeñandu bei quia, i que Dios ñee ee ibeishĩ qui re ra. ⁸ Echimbaaquiato mae mose que Jesús miĩ ndiqui ee cote ra. Moisés que nyecuyã asi ee ra. Elías abe.

⁹ Ecuã mose nguichi sita ibate si que Jesús ñee ee ra. —Ae rese jemaẽ namo nae, ũquí je jenyecuachõ jẽ. Sequera si mose quiato teñee ñee mbia je cote. Semano nonde eã, i que Jesús ñee uchimbaaquiato je ra. ¹⁰ Nyebe ñee eã nguiã emo je. —¿Mbaerã eriqui “se quera si mose” i re? i que ndua ndua ñee nyue ra. ¹¹ Ñee ngue Jesús je cote ra. —¿Mbaerã embesasa ñee nde? “Elías rane nda tu Cristo si” i re, i que ñee Jesús je ra. ¹² Jesús que ñee ee ra. —Ae bei. Coche Elías rane tu nguiã mbae mbitirõ ja. ¿Mbae i chõ embesa ji quia Cristo rĩ ña? “Mbae rasi ra esaã tuchi”, i chõ nguiã. “Mbia ra eucuyã tuchi”, i chõ nguiã no. ¹³ Elías que tu no. Mbia icua icua tuchi que ee ra. Sã embesa ji ñee nyii no. Eĩ sí tuchi que ra, i que Jesús ñee ee ra.

Jesús aba checuayã jea mbia ririĩ mo si

¹⁴ Ngasẽ ngue echoi echimbaaquiato ataque je cote ra. Mbia tubiriã tuchi que chi echimbaaquiato mama huee ra. I que embesasa u ñee icua icua echimbaaquiato je huee ra. ¹⁵ Jesús ngasẽ mose que mbia nyuraira tuchi mae erese ra. Oo tuchi que erese ra. ¹⁶ —¿Mbae rĩ jẽingo ñee icua icuaẽ jenyue re? i que Jesús ñee mbia je ra. ¹⁷ Emo ngue ñee Jesús je ra. —Sererecua, seriirĩ aru quia ndeje co. Nde embucherõ sacua. Aba checuayã icua equereco uchiangui re co. Nyebe eriqui nguiã ñee eãte co. ¹⁸ Aba checuayã icua ndiqui seriirĩ isi isi beite co. Mbucoi coi beite equia íbii co. Echuru abe mbichoite. Ureĩ abe qiti quitite. Nyebe equirãcuã neate riqui nguiã co. “Aba checuayã jêjea seriirĩ si”, ae rei que ndechimbaaquiato je ra. Eaquiatuãte chõ ngue ra, i que eru ñee Jesús je ra. ¹⁹ Jesús que ñee cote ra. —¿Mañi jenyue quia seicuayãte re? ¿Ñimbirãcuã mbeite ra aba quia jêje re? i que Jesús ra. —Eriirĩ jendu rã seje, i que cote ra. ²⁰ Eriirĩ ngue ecurucuaẽ ee cote ra. Aba checuayã ngue eriirĩ mburirite Jesús rese mae mose ra. Mbucoi que íbii ra. Mbuchiishao shao tuchi que ra. Echuru mbichoĩ tuchi que ra. ²¹ —¿Manosete aba checuayã ndiqui ererequia re? i que Jesús eru je ra. —Eñetẽ mosebe bei, i que eru ra. ²² —Tátaa eriqui emondo mondo beite co. Ama ye abe. Eriicharã. Nde ejea aquiato mose, ejea rã esi ure je, i que eru ñee Jesús je ra. ²³ Jesús que ñee ee ra. —¿Mbaerã ereico “ndequiatu mose” i seje re? Ae seicua quia nae, ũquí je aico mbae raã aquiato jate co resẽ, i que Jesús ee ra. ²⁴ Eru que ñee ee ra. —Areicuate se resẽ. Semingo uquiabe jiri nderese ae, i que eru ucheẽ mumbebote ñee Jesús je ra. ²⁵ I que mbia cuaẽ nguia

ñumunua nua tuchi huee ra. Nyebe Jesús ñee asi nguiã aba checuayã icuã je. —Aba cheuayã, mbia isa erembiitaote quia hue. Erembucheẽ ngüiãte abe equia hue. Esẽ oso esi. Ereique sichĩ nda oso echiangui re jẽ, i que Jesús ee ra. ²⁶ Aba checuayã ngue tasẽte eriirĩ mburiri cote ra. Usẽ oso cote. Eraaque rã ngue eriirĩ nyi cote ra. Mano nei nguiã mbia je. ²⁷ Jesús que emua eo rese ra. Juã turã ngue cote ra. ²⁸ Jesús que oso ique tuchúaa cote ra. Echimbaaquiato que ñee ee mbia tímbaa cote ra. —¿Mbaerã aba checuayã useã oso urecheẽ mose ure re? i que ñee ee ra. ²⁹ Jesús que ñee ee ra. —Jeñee eã mose Dios je, ã jẽjea aroneate. Jẽhui eã mose jenyiu si, ã jẽjea aroneate no, i que Jesús ee ra.

Mbia ra seiquia, i si Jesús

³⁰ Galilea rĩ ngue echoi hue si ra. —Sã mbia jiranua nanderese, nandeso mose hue rĩ, i que Jesús ñee uchimbaaquiato je ra. ³¹ Uchimbaaquiato ae que embaaquiato quiato oso quia ñeenda rui ra. —Emo nda semee mbia icuã je seiquia sacua. Seiquia ji ra aquera si tres días mose, i que equia embaaquiato quiato ñeenda rui ra. ³² Echimbaaquiato que echeẽ icuayãte quia ra. —Ndecheẽ embiasa asa tuchi rã ure je, i ãte que equia ee ra. Ireĩ ireĩte quiato que equia esi ra.

Ererecua tuchi ra se, i jaaja Jesús chimbaaquiato nyue

³³ Ngasẽ ngue Capernaum nda. Tuchúaa ique mose que ñee uchimbaaquiato je ra. —¿Mbae rĩ jenyu quia ñee icuã icuãte jenyue ñeenda rui re? i que ee ra. ³⁴ Quiriri ja chõ ngue u ñee ndocoĩ ee ra. —Ererecuarã nda se cote, i jaaja chõ equia nyue ñeenda rui reaẽ. Nyebe eriqui ireĩ ireĩte Jesús si re. ³⁵ Jesús que ngoi cote ra. —Jenyu ja rã. Tacheẽ jẽ ja je, i que uchimbaaquiato doce je ra. —“Ererecuarã se” i mose emo, sã uataque rimbarã ño eriqui, i que Jesús ee ra. ³⁶ Aquẽ mo ngue emii eite re cote ra. Sui que ñee uchimbaaquiato je ra. ³⁷ —Ae siqui turã nguia mbi a riirĩ je seriĩ nae, seje abe chõ eriqui nguiã siqui turã. Ae eturã ndiqui seje nae, semondosa abe je chõ eturã ndiqui nguiã, i que Jesús ee ra.

Emo icuã eã mose nande je, nanderesenda chõ ùquĩ nde

³⁸ Juan ngue ñee Jesús je ra. —Pe emo nyi aba checuayã ndirõ ndirõ mbia si nderiĩ pe. Uremae ngue erese ra. Aque eriqui ãte nanderese aque. Nyebe uresiquisã nguiã, i que Juan Jesús je ra. ³⁹ Jesús que ñee ee ra. —Tei. ¡Jësiquisã quisãchĩ nda jẽ! Emo mbia mae sayã naa mose seriĩ, ñee icuã eã nda seje aquere. ⁴⁰ Emo icuã eã mose nande je, nanderesenda chõ ùquĩ nde. ⁴¹ Emo sechimbaaquiato isei mbiu turã mose seriĩ, Dios abe ra mbae turã mondo aque je.

Mbae icuã nda nandesã uquiachĩ emo je

⁴² Ae ra mbae icuã saã uquia seicuasa mo je nae, ùquĩ nda mbae rasi saã tuchi cote. Ùquĩ nda aba mombo chõ ama ndisha ye nyii re chã. Sita resebe ecua ji mondo. Ì nda mbae icuã naa uquia eãte rei seicuasa je. ⁴³ Ndeo nemingo mose mbae icuã ndese, ndeo echisia mombo. Coche rei ra ereso ibate ndeo mii Nderequia, siqui bei sacua huee. Oso rocoĩ tata cuásuu, ndeo nyeremo nderao. Tata mungue aronea tuchi chõ hue jenda re. ⁴⁴ Mbae rosei ra manoa mbei huee. Tata ra uqueã mbei huee no. ⁴⁵ Ndei nemingo mose mbae icuã ndese, ndei echisia mombo. Coche rei ra ereso ibate ndei mii nderequia, siqui bei sacua huee. Nemombo rocoĩ tata cuásuu, ndei nyeremo nderao. Tata mungue aronea tuchi chõ hue jenda re. ⁴⁶ Mbae rosei ra manoa mbei huee. Tata ra uqueã mbei huee no. ⁴⁷ Nderesa nemingo mose mbae icuã ndese, nderesa echoo. Coche rei ra ereso Dios recua nderesa mii nderequia. Nemombo rocoĩ tata cuásuu, nderesa nyeremo nderao. ⁴⁸ Mbae rosei ra manoa mbei huee. Tata ra uqueã mbei huee no. ⁴⁹ Tata ra mbia sei bei huee. ⁵⁰ Embiquesa rã ño jëingo nguiã mbia je ã. Sã embiquesa turãte no. Eise quiachamba mose, eicuã tuchi ra cote. Embiquesa rã tuchi chõ jëingo mbia je. Jëingo turã ño nguia jenyiese, i que Jesús ee ra.

10

Jesús ñee mbia ngüinisi mombo je rñi

¹ Jesús que ngata si oso cote ra. Judéaa que esi ra. Ama Jordán ndobei que esi sobei cote ra. Mbia que ñumunua nua tuchi quia ee ra. Mbaaquiato quiato que equia ra. Sã eriqui mbia mbaaquiato quiato beite no. ² Fariseos mo abe que ngaẽ erea ra. —Tã nande Jesús je no. Ma ñee Dios cheẽ abi, i que ñee nyue ra. —¿Coche mbia ngüinisi jea ubiã mose re? i que ñee Jesús je cote ra. ³ —¿Mbae i Moisés embesa re? i que Jesús ee ra. ⁴ Fariseos que ñee ee ra. —“Jeninisi jea nonde, papel mbesa ji jemondo ee”, i que Moisés ra, i que ra. ⁵ Jesús que ñee ee ra. —Jeãquĩ átãte quiato ngue re. Nyebe Moisés ũquĩ mbesa nguiã jẽje. ⁶ ũquĩ i áte que Dios quia mbia ao ramo mose nyii ra. Dios mbia ao mose, nyeremo ngue echao ra. Erãcuẽ ngue echao ra. Eninisirã abe que echao no nda. ⁷ Nyebe ra emo ndiqui ngüinisi rese bei. Ngu si isho. Usi si abe no. Ngüinisi miĩ ndese siqui bei sacua. ⁸ Co miĩ na siqui sacua nyiese cote. Nyeremo siqui rã eã ño cote re. Co miĩ siqui rã ño ũquĩ cote re. ⁹ Ae Dios mbucha nyiese nae, sã ũquĩ hui eã mbei nyesi, i que Jesús ñee fariseos je ra. ¹⁰ Ngasẽ mose tuchúaa que echimbaaquiato ñeembe ee ra. —Ndecheẽ embiasa turã na ure je, i que ee ra. ¹¹ Jesús que ñee ee ra. —Ae ngüinisi jea nae, emo ndese siqui sacua nae, eicua tuchi chõ ũquĩ nde. Adulterio i que ũquĩ je ra. ¹² Cuña mo ngu jea mose siqui sacua emo ndese, eicua tuchi chõ ũquĩ no nde, i que Jesús ee ra.

Jesús mbia riirĩ isi turã turã

¹³ Mbia que nguiirĩ ngurucuaẽ cuaẽ nguia Jesús je ra. Jesús oco oco sacua ere. —¿Mbaerã jendiirĩ jendu quia co re? i rei que echimbaaquiato ñee mbia je ra. ¹⁴ Jesús que paama i ñee uchimbaaquiato je ra. —Jeñeechĩ nguiã ee. Sã ae ae riqui nguiirĩ ndurucuaẽ cuaẽ seje. Eĩ ño Dios rimba nguiã. Ucuasu raã naa eã. Mbia riirĩ na. ¹⁵ Mbia riirĩ na ño jẽingo Dios isi turã. I mose ra Dios rimba tuchi jẽ cote, i que Jesús ra. ¹⁶ Mbia riirĩ ngue esui sui ra. O que echono ñono earõ nda. Ñee turã ngue Dios je eriĩ nda.

Acuanĩndu mbaecha mo ñee Jesús je

¹⁷ Acuanĩndu mo ngue tu Jesús je ra. —Mbia mbaaquiatusa turãte nde. ¿Mbae turã mo nda asaã Dios je semingo bei sacua nde? i que ñee Jesús je ra. ¹⁸ Jesús que ñee ee ra. —¿Mbaerã ereico “eturã” i seje re? Dios miĩ ño eturã ndesẽ. ¹⁹ Dios cheẽ emumbayã. Echeẽ ereicuate quia co resẽ: “Emo ninisi rese ra ereicochĩ. Mbia ra ereiquiachĩ. Mbae ra erembuquiachãchĩ. Erecheẽ ñooñochoĩ nda emo niĩ. Emo nda erembiirĩ irĩchĩ. Ndeturã ño nderu je. Ndesi abe je”, i que Dios cheẽ nda, i que Jesús ñee ee ra. ²⁰ Acuanĩndu que ñee ndei ee ra. —Ũquĩ ngue amumbayã ja bei quia ra. Señetẽ mosenda bei, i rei que ñee Jesús je ra. ²¹ Jesús que nyesecua tuchi mae mose ere. —Ã miĩ mo abe eresaã eãte. Nembae emondo mondo ja mbia mbaecha reã je. Nde ũquĩ naa mose, mbae tubiriã nda nembae ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²² Acuanĩndu Jesús cheẽ andu mose que echiã ndoso tuchi cote ra. Eya eã tuchi que oso Jesús recha ra. Mbaecha tuchite quiato ngue ae re.

²³ Jesús que mae mbia rese ra. —Mbaranguiato áte mbaecha je ngasẽ sacua ibate, siqui bei sacua huee, i que ñee uchimbaaquiato je ra. ²⁴ Echimbaaquiato que nyuruira tuchi eandu ra. Jesús que ñeembe ee ra. —Ae ndua ndua beite quia umbae tubiriã ndese, mbaranguiato áte ũquĩ je oso sacua ibate Dios rese. ²⁵ Sã ticuas mo ndiqui oso aroneate ique aguja sorei rĩ no. Eĩ si chõ mbaecha no nde. Oso aronea ibate Dios rese, i que Jesús ee ra. ²⁶ Echimbaaquiato que nyuruira tuchibe u eandu no nda. —¿Aba quiato ra oso Dios rea ibate re no? i que ñee nyue ra. ²⁷ Jesús que mae ere ñee ee ra. —Ae mbia saã aroneate quia nae, Dios miĩ ño nda esaã, i que Jesús ee ra. ²⁸ Pedro que ñee Jesús je ra. —Ure que urembae uresecha ja ra. Siqui sacua nderui, i que Pedro ñee nda. ²⁹ Jesús que ñee ee ra. —Tacheẽ nyecua jẽje. Emo umbae secha ja mose siqui sacua serui, embae ra asibishorõ tuchi ee cote. Ae uchuchua secha. Ae ngõngue secha. Ae ngu secha. Ae usi

secha. Ae nguiirĩ secha. Ae umbae ibi secha no. ³⁰ Ũquĩ mbae ja ra asibishorõ tuchi cien veces ereco mose fbii. Echuchua ata. Enongue ata. Esi ata. Eriirĩ ata. Ibi ata abe no. Ũquĩ ja ra asibishorõ tuchi ee. Mbia icuã icuã tuchi ra ee serĩ. Aquere ra siqui bei tuchi Dios rese ibate cote. ³¹ Ae ererecua saã saã nguia namo nae, ererecua eã tuchi ra ũquĩ m o cote. Ae ererecua eã namo nae, ũquĩ mo nda ererecua cote, i que Jesús ra.

Mbia ra seiquia, i si Jesús

³² Jerusalén ngue echoi quia ra. Jesús que oso quia enonde ra. Echimbaaquiatu que siquichete nyoĩ quia ra. Nyebe Jesús ererao nguĩ mbia tiãsa ñee sacua ee. ³³ —Co nyao quia Jerusalén co. Huee ra mbia semee sacerdotes rerecua je. Embesasa abe je. “Jesús jẽiquia”, i ra serĩ. Semee nda judíos eã je cote. Seiquia sacua. ³⁴ Mbia ra secheẽ saã saã. Seiruã nua abe ra eno. Sembucha chee ra iquia ira rese. Tres nyaashĩ mose ra aquera si, i que Jesús ñee ee ra.

Ererecuarã se, i raque Jacobo, Juan ndese

³⁵ Jacobo que oso Jesús riichã ngõngue rese ra. Juan, i equia ee. Zebedeo riirĩ ndei ũquĩ. —Urechu ñee ndeje aa, Urembaaquiatusa. Ae riĩ nda urecheẽ ndeje nae, ũquĩ je “eno” ere rã ure je, i rei que ee ra. ³⁶ —¿Mbae ra aba saã jẽje re? i que Jesús ee ra. ³⁷ —Ndeico mose ererecua tuchi, sã ure abe ureico ererecuarã nderese. Sã urecoi ja u ndejii. Co miĩ chĩ ndequiato cuti. Enonge chĩ ndequiato cutiã no, i rei que ñee Jesús je ra. ³⁸ Jesús que ñee ee ra. —Ae riĩ jẽingo ñee seje nae, jẽirandu turã eãte ũquĩ ndese. Ae rasi ra asaã tuchi nae, ¿ũquĩ ndasi ra jẽsaã jẽ abe re? Bautizar i ra seje, ¿eĩ nda bautizar i jẽ abe je re? i que Jesús ee ra. ³⁹ “Ae” i que ñee ee ra. Jesús que ñee ee cote ra. —Ae bei. Ae rasi ra asaã tuchi nae, ũquĩ ndasi ra jẽsaã tuchi rei jẽ abe. Bautizar i ra seje, eĩ si rei ra bautizar i jẽje no. ⁴⁰ “Ererecuarã ure”, jenyere rei que seje, ũquĩ asaã aroneate se jẽje. Paba ae quiatu ra ũquĩ saã. A e ebite, ũquĩ nda emiĩ ererecuarã, i que Jesús ra. ⁴¹ Echimbaaquiatu ataque que jirandu erese ra. Echimbaaquiatu diez. Paama i que Jacobo je ra. Juan je abe. ⁴² Jesús que “jenyu” i ñee uchimbaaquiatu ja je cote ra. —Mbia ataque rerecua riqui ucuasu raã naa tuchi ngũimba je ũquĩ. ⁴³ Ũquĩ nda jẽsaã eã jẽ. “Ererecua ra se”, i mose jemo, sã ũquĩ siquichõ uataque rimbarã. ⁴⁴ Jemo “se rane jẽ” i mose, sã ũquĩ ndiqui bei mbae turã naa naa uataque je no. ⁴⁵ “Sã mbia mbae turã naa naa seje”, ae eã ngue u ra. “Se quiatu mbae turã tasaã saã oso mbia je”, ae u nguĩã. Co achu quia mano mbia tubiriã ndiquicharõ sacua co, i que Jesús ñee nda.

Jesús Bartimeo ndesayã mbucherõ

⁴⁶ Jesús que ngasẽ Jericoo ra. Uchimbaaquiatu rese. Jesús ngata mose hue si, mbia tubiriãte que nyoĩ quia erui ra. Eresayã mo ngue chĩ ñeenda jie huee ra. Ache ache i que huĩ nda. Bartimeo, i equia ee. Timeo ndiirĩ ngue ae ra. ⁴⁷ Jirandu mose Jesús rese que ñeemombo mombo ee ra. —¡Jesús! ¡David nducucha! ¡Ndeya eã ño serese jẽ! i que ee ra. ⁴⁸ —¡Equiriri chõ jẽ! i tuchi rei que mbia ñee ee ra. —¡Sererecua! ¡David nducucha! ¡Ndeya eã ño serese jẽ! ibe que eresayã ñee Jesús je ra. ⁴⁹ Jesús que tiba ra. —Eresayã jendu rã, i que ra. Mbia que ñee eresayã je ra. —Ndeya chõ jẽ. Ehuã. Jesús riqui ñee ndeje a, i que ee ra. ⁵⁰ Juã asi que oso oo Jesús rese ra. Uchiatiquia recha. ⁵¹ —¿Mañi ae ra ndeje re? i que Jesús ñee ee ra. —Serese embeturã na, Sererecua, i que ra. ⁵² Jesús que ñee ee ra. —Eso cote. Seicuate que se ra. Nyebe nderesa nyerõ nguĩã cote, i que ee ra. Aque mose tuchi que eresayã ndesa turã ja cote ra. Jesús rui que esi quia cote ra.

11

Jesús ngasẽ Jerusalén

¹ Jesús que Jerusalén curubite nyoĩ quia ra. Betfagé, i que hue sucha je ra. Ibi ibate mo abe que chĩ huee ra. Monte de los Olivos, i que ee ra. Hue si que Jesús uchimbaaquiatu nyeremo mo mondo ra. ² Ñee ngue ee ra. —Achi sucha chõ jẽso rã. Jengasẽ namo mose

ra burro riirĩ cuasa mo ñi jêje huee. Emo ngue nyui eâte eátoo ra. Jenyura seru seje. ³ Emo ñee mose jêje, “¿mbaerã nda jenyura re?” i mose jêje, jeñee ee. “Nandererecua que ‘jendu’ i ra. Mondo jeibe ra jêje”, jenyee ee, i que Jesús ñee ũquĩ nyeremo mondo ra. ⁴ Nyoĩ que erea cote ra. Burro riirĩ ngue etea Jesús cheẽ nguire cote ra. Ecuasa que chĩ taicuee eiquesa jii ra. Nyura que cote ra. ⁵ Ae mbia chi huee nae, ũquĩ mo ngue ñee ee ra. —¿Mbae rese jêingo hue re? ¿Mbaerã jêingo era era re? i que ee ra. ⁶ Jesús cheẽ ndui si que ũquĩ ñee ee ra. “Eno” i que mbia ee cote ra. ⁷ Burro riirĩ ngue ecuruchoi Jesús je cote ra. Huiirao que echono ñono earõ nda. Jesús que nyui eátoo cote ra. ⁸ Jesús que ngata oso quia burro átoo cote ra. Mbia tubiriã ngue huiirao mbiitee tee nyoĩ quia ibi rĩ enonde ra. Emo ngue sindo mbiitee tee choi quia enonde no nda. Jesús oso sacua hue rĩ. ⁹ Mbia ia tuchi que tasẽ tasẽ nyoĩ quia enonde ra. Eruĩ abe no. —Co nandererecua ru quia ngasẽte co. Co Dios chimbu ru quia ngasẽte nande je co. ¹⁰ David nducucha ru quia co. Nandererecua turã sacua. Dios turã tuchi riqui nande je co, i tuchi que mbia quia ñee nda. ¹¹ Jesús que ngasẽ Jerusalén cote ra. I que que oso Dios chuchua cote ra. Mae ja mose mbae rese que esi Betania uchimbacquiato rese cote ra. Tenda quiato ngue osote nguiã ee.

Jesús ñee icua higo i je

¹² I que Jesús choi quia Betania si isamami nda. Eriacuãte que oso quia ra. ¹³ Isho que mae higo i mo ndese ra. Ero rerecua que ra. —Ea mo tau, i rei que oso erea ra. Ero achõte chõ ngue ee ra. Aque mose que eriqui ia eã nda. ¹⁴ Jesús que ñee higo i je cote ra. —Mbia ra ndea u eã mbei cote, i que ee ra. Echimbacquiato abe que echeẽ ñandu ra.

Jesús mbia mbusẽ Dios chuchua si

¹⁵ Ngasẽ ngue Jerusalén cote ra. Jesús que oso Dios chuchuaa ra. Huee que mbia riqui mbae isi isi bei ra. Mbae mondo mundo abe mbae isiquia ribishorõ. ũquĩ ja que Jesús mbusẽ mondo ra. Ae mbae isiquia sibishorõ shorõ nguia, ũquĩ mbae abe que embuchiichere chere ja mesa ra. Mbae ja resebe. Ae nyurushi cuasu mondo mundo mbia je mbae ribishorõ nae, ũquĩ nenda abe que embuchiichere chere ja ra. ¹⁶ Jesús que ñee ũquĩ je ra. —Dios chuchua ite rĩ jêingochĩ nguiã mbae rerao rao. ¹⁷ “Mbia cheẽsa Dios je”, i ra mbia Dios chuchua je”, i rei que embesa ji huĩ nda. Jẽ nguia jêicuã tuchite Dios chuchua je re. Mbae mbuquiachãsa chuchua jêsaãte chĩ nguiã ee, i que Jesús ñee asite ũquĩ je ra. ¹⁸ Sacerdote rerecua que chi Jesús cheẽ andu ra. Embesasa abe no. —¿Mañi nda aba Jesús iquia re? i que eu ndua ndua ra. Mbia quiato que oote Jesús cheẽ ndese ee ra. Nyebe eriqui nguiã Jesús ucuayãte. ¹⁹ Hue sucha qu e Jesús secha oso eresaitõ cote ra.

Higo i mano cote

²⁰ I que Jesús nyoĩ quia isamami nda. Higo i cutite que echoi quia ra. Higo i ñimama ño nguia reaẽ. Erao abe mano ño nguia re no aẽ. ²¹ Pedro que ndua ñee Jesús je ra. ¡—Sã Sererecua! Higo i je que erecheẽ asi nae, mano ño equia cote reaẽ, i que ñee Jesús je ra. ²² Jesús que ñee ee ra. —Dios jêicua tuchi. ²³ Tacheẽ nyecua jêje. Jemo ñee mose sita ibate mo je, “esiri rã oso ama ndisha ye” i mose sita ibate mo je, sã Dios icua tuchi rã nyii. “Dios ra secheẽ mumbayã” i tuchi mose uchiangui re, Dios ra echeẽ mumbayã. Sita ra siri ee. ²⁴ “A emondo seje”, jenyee mose Dios je, mondo ra jêje. “Dios ra emondo seje”, jenyee mose jeñiangui re, mondo ra jêje. ²⁵ Emo mbae icua naa mose jêje, ũquĩ ñee chĩ mose jendese, jêtesarei chõ ũquĩ si. Jêtesarei chõ esi ñee nonde Dios je. ũquĩ mose ra jendu ibatenda abe jêicuã mbutiã no. ²⁶ Jêtesareiã mose emo icua si, Dios abe ra jêicuã mbutiã eã mbei jêsi, i que Jesús ee ra.

¿Aba nembu re? i mbia ñee Jesús je

²⁷ Nyebibe que echoi Jerusalén nda. Dios chuchuaqui rĩ ngue Jesús riqui ngata ra. Sacerdote rerecua que nyoĩ ñee ee ra. Embesasa rese. Amei ndese. ²⁸ —¿Mbaerã ereico

mbia mbaaquiātu quiātu Dios chuchúaa re? ¿Aba “ũquĩ esaã saã” i quia ndeje re? i que ũquĩ ererecua ñee ja Jesús je ra. ²⁹ Jesús que ñee ee ra. —Se rane tacheẽ jêje. Se rane preguntar tae jêje. Secheẽ jēsibishorō na nyii. Aquere quiātu ra jeñee asibishorō cote. ³⁰ ¿Aba ñee Juan je re? “Eso bautizar i mbia je” i ee re. ¿Dios eã ño ere? Jeñee seje, i que Jesús ee ra. ³¹ Ererecua que ndua ndua ja u cote ra. Ñee ñee ngue u nyue ra. —¿Mañi nande ra echeẽ ndibishorō nde? “Dios que Juan mbu ra”, nande aroneate ee. Nyebe ra ñee nande je. “¿Mbaerã jẽingo eãte erui re no?” i quiarei ra nande je. ³² “Dios que embu eã nda”, nande aroneate ee no. Mbia ataque ra paama i tuchi nande je. Juan quiatote quia mbia re, i que ererecua ñee ñee nyue ra. ³³ Ñee nyee que Jesús je cote ra. —Ureicuayãte. Aba chō Juan mbu bautizar i sacua mbia je, i que ee ra. Nyebe Jesús ñee nguiã ee. —Se abe quiātu tacheẽ eã jêje no. Ae “ã esaã” i seje nae, erĩ nda acheẽ eã jêje no, i que Jesús ũquĩ ererecua je ra.

12

Uva raarōsa icuã icuã nguerecua je

¹ Jesús que ejemplos saã saã mbia je ra. —Sã mbia ibicha mo ndiqui no. Sã eriqui uva i tiquia tiquia no. Sã etarō no. Uva rique rirurã abe que echao ra. Sucha ibate mo abe que echao no nda. Uco raarō turã ja sacua. Ibicha que “sembae uvas jësaarō” i emo je cote ra. Al partido. Ae que oso isho itōte cote ra. ² Uva quiche mose que ngũimba mo mondo rei umbaerã ndea ra. ³ Uva raarōsa que erimba mbucuasẽ icuã ño nda. Iruã nua ño ngue ra. Eochi chō ngue emondo mbuchebe ra. ⁴ Echa que ngũimba mo mondo rei ereabe no nda. Aque abe que embucuasẽ icuã no nda. Sita que emombo mombo erese no nda. Eãquĩ nduqui tuchi que ra. ⁵ Ngũimba mo ngue emondobe aquere no nda. Aque quiātu que eiquia tuchi cot e ra. Eĩ eĩ mbei que eraarōsa quia echa rimba je ra. Emo emo ngue eiruã nua nda. Emo emo ngue eiquia no nda. ⁶ Aque miĩ tuchi que siquichō echa rese cote ra. Eriirĩ tuchi chō ngue aque re. Nyesecua tuchi que equia aque rese ra. Aque que emondo chee uva rea cote ra. “Ireĩ ireĩ jiri ra seriirĩ si”, i rei que ra. ⁷ Eriirĩ ngasẽ mose que uva raarōsa ñee nyue ra. —¡Co eriirĩ ndu quia co cote jê! ¡Nandeiquia rei jê! ĩ nda uvas nandembaerã ae tuchi cote, i que ñee nyue ra. ⁸ Eraarōsa que eriirĩ isi icuã cote ra. Curuchoĩ que iquia pe jiri ra. Mano ngue cote ra. ⁹ ¿Mañi nda echa quia eraarōsa je cote re? Echa ra eraarōsa icuã iquia ja cote. Uva i ra emondo ja emo je eraarō sacua cote. ¹⁰ ¿Ã mbesa ji rese jemaẽ ãte re?

Sã emo ndiqui tuchia ao sita je no.

Sita mo ngue equirirō mombo ra.

Eicuãte eriqui reĩ nguiã ee.

Aquere ndua si erese.

“Earonda sacua turambi chō eriqui re”, i ndua si uchimombo rese.

Uchimombo que esirō si cote ra.

¹¹ Dios chiao chō ũquĩ nde.

Dios chiao turã tuchi riqui nande je ã,

i ñi embesa ji re, i que Jesús ee ra.

¹² —Nanderĩ ño eriqui nguiã ñee, i que ũquĩ ererecua ra. —Nandeisi rei serao jê, i rei que nyue ra. Jesús isi aronea tuchi que mbia résa ra. Eireĩte quiātu ngue mbia tubiriã si re.

¿Impuestos ra uremee ererecua je re? i mbia ñee Jesús je

¹³ ũquĩ ererecua que fariseos mo mondochoi ñee Jesús je ra. Herodes chimbaaquiātu abe mondochoi erea. —Jesús nandembucheẽ icuã na. ĩ nda mbia paama i ee, i rei que ra. ¹⁴ Uturã ngue esaã ñooño Jesús je ra. —Jesús, co ereico mbia mbaaquiātu turãte co. Mbia jaje ndeturãte riqui co. Co ereico turãte mbia mbuchiabiã co. Mbia erembaaquiātu quiātu turãte quia Dios icha riĩ co. Nyebe urechu nguiã ñee ndeje a. ¿Coche mbia

mbae isiquia mee mee Romanos nderecua je re? Impuestos. ¹⁵ ¿Uremee mee nda ee re? ¿Uremee eã nda ee re no? i que ñee Jesús je ra. Jesús que ùquĩ ìcuã ìcuate ra. Nyebe ñee nguiã ee. —¿Mbaerã jëingo “ĩ nda Jesús ucheẽ nyabi”, i serĩ nde? Mbae isiquia jëteacuquia imbu seje. Tamae erese, i que ee ra. ¹⁶ Mbia que eteacuquia ee ra. —¿Aba mbae nombre ñi mbae isiquia rese a re? ¿Aba ãquĩ aingue abe ñi a re? i que Jesús ee ra. Romanos nderecua, i que mbia ee ra. ¹⁷ Jesús que ñee ee cote ra. —Romano s nderecua mbaerã jemondo chõ ee. Dios mbaerã jemondo chõ ee no, i que Jesús ee ra. Mbia que nyuruira jate u Jesús cheẽ andu ra.

Mbia raaque ra quera si, i Jesús

¹⁸ —Mbia raaque ra quera eã mbei, i que mbiamo nguia ñee nda. Saduceos i que ùquĩ mbia je ra. Ùquĩ mo ngue nyoĩ ñee Jesús je ra. Tã i sacua ee. ¹⁹ —Sererecua, ã ngue Moisés mbesa nande je ra: “Emo ndiiriã mano mose, sã enongue mano je ninisi rerequia erendaque re. Sã tiirĩ ngõngue raaque rĩ”, i que Moisés embesa nande je ra. ²⁰ Eriqui mo ngue siqui urerese ra. Seis que eribi ra. Eriqui que ngũinisiã quereco rei ra. Mano ño ngue tiirĩ ndocoĩ ngũinisi recha ra. ²¹ Enongue que nguiqui checha quereco rei cote ra. Ae abe que mano ño tiirĩ ndocoĩ no nda. Enongue que equereco no nda. ²² Ùquĩ seis que ngõngue checha quereco ja rei ra. Mano ja chõ ngue erecha tiirĩ ndocoĩ no nda. Eninisi eru checha que mano nyee chõ cote no nda. ²³ Siete rei que eru nyii ra. Mbia raaque quera si ja mose, ¿abate ra equereco cote re? i que saduceos ñee Jesús je ra. —Ma Jesús ñee ìcuã, i chõ ngue re.

²⁴ Jesús que ñee ee ra. —Jëingo Dios cheẽ icuayãte ã. Jëingo Dios cheẽ abi tuchi ã. Jëingo Dios quirãcuã icuayãte ã. ²⁵ Ae raaque ra Dios mbuquera si nae, ùquĩ nda ngũinisi quereco eã mbei huee cote. Ùquĩ nda ngu quereco eã mbei huee cote no. Angeles rã mbei ra mbia riqui huee ibate cote. ²⁶ ¿Moisés chimbese rese jemaẽ ãte re? Mbia raaque quera si rĩ ño ngue embesa nguiã. Ira ruri sendi quia, aque mose que Dios Moisés mbiirandu ùquĩ ndese ra. “Abraham nderecua chõ aico nguiã se co. Isaac nderecua abe. Jacob nderecua abe no”, i que Dios Moisés je aque mose ra. ²⁷ ã ngue mano ndei nyii ra. Eresco siqui bei chõ nguiã namo ã. Mbia raaque rerecua eã ño Dios re. Mbia reco rerecua chõ ae re. ¿Ùquĩ jëicua eãte quia ã nde? i que Jesús ñee mbia je ra.

Echesequa tuchi quia Dios rese

²⁸ Embesasa mo ngue chí echeẽ andu ra. —Jesús ñee turã tuchichĩ saduceos je, i que uchiangui re ra. Nyebe esi nguiã ñee ee. —Jesús, Dios cheẽ tubiriãte riqui ã ndesẽ. Mbia echeẽ mumbayã sacua. ¿Ma Dios cheẽ ndiita tuchi ma nde? i que embesasa ñee Jesús je ra. ²⁹ Jesús que ñee ee ra. —ã ño Dios cheẽ ndiita ã nde: “Secheẽ jeñandu rã, Israelitas. Dios miĩ tuchi chõ nandererecua re. ³⁰ Echesequa tuchi quia Dios rese. Ndechiã je. Neaĩ je. Nendua ndua abe je. Ndequirãcuã abe je”, i chõ Dios cheẽ ndiita nguiã. ³¹ ã abe rei ùquĩ nduinda ã no: “Sã ereico nyesequa ndechiese no. Eĩ ere si chõ nyesequa mbia rese”, i. Ùquĩ nyeremo ndei Dios cheẽ i tuchi ùquĩ, i que Jesús ee ra. ³² Embesasa que ñee Jesús je cote ra. —Ae bei, Sererecua. Dios miĩ tuchi chõ nandererecua re. Emo abe mo eãte. ³³ Nandechesequa tuchi mose Dios rese, ùquĩ eturãte ee. Nandechesequa tuchi mose nandechiã je. Nandendua ndua je. Nandeaĩ je. Nandequirãcuã je abe no. Nandechesequa tuchi mose mbia rese, ùquĩ eturãte Dios je mbae mo si. Sacrificio mo si. Ofrenda mo si, i que embesasa ñee Jesús je ra. ³⁴ —Ñee aquiature equia seje co, i que Jesús uchiangui re ra. —Dio s rimbarã tuchi chee ra nde, i que ee cote ra.

¿Aba rucucha Cristo re?

³⁵ Jesús que mbia mbaaquiato quiato quia Dios chuchúaa ra. —¿Mbaerã embesasa riqui ñee nde? “David rucucha chõ Cristo re” i re. ³⁶ David abe que “sererecua” i Jesús je ra. Sã embesa ji ñee no: Dios que ñee Cristo sererecua je ra:

“Ecoi sejii. Nde abe ra ererecua serese.

Ae ndeucuyãte quia nae, ũquĩ je ra ndequirãcuã atecuquia tuchi.

Ndequirãcuã tuchi chee ra ũquĩ si”, i que Dios ñee sererecua je ra,

i que Espiritu Turã David mbucheẽ nda. ³⁷ David sí chõ “sererecua” i nguiã Cristo je. Cristo David rucucha mose, ¿mbaerã David “sererecua” i ee re? i que Jesús embesasa je ra. Mbia tubiriã ngue Jesús cheẽ chandu turã jate ra.

Jesús ñee asi embesasa je

³⁸ Jesús que uchimbaaquiatu mbaaquiatu quiatu ra. —Embesasa rã nda jẽingochĩ jẽ. ũquĩ ucuasu saã saã mbeite quia ã. Huiirao turã equereco beite quia ã. “Sã mbia ererecua i nande je”, i beite equia ã. ³⁹ Mbia renda turã abe eirabo rabo beite quia mbia si ã. “Fiestacha jii quia taĩ jẽ”, i abe beite equia ã no. ⁴⁰ Ari eru cheecha mbae abe embutiã tiãte quia ã no. Ucheẽ oco abe esaã saã mbeite quia Dios je ã no. “ĩ nda mbia mae nanderese”, i chõ nguiã. ũquĩ nda Dios mbasi tuchi cote, i que Jesús mbia je ra.

Eru cheecha mbaecha reã mo mbae mee Dios je

⁴¹ Emo mose que Jesús ñi Dios chuchúaa ra. Ofrenda riru nonde que eñi ngoi ra. Mae ngue mii mbia mbae isiquia mondo mondo mose eriru ye rese ra. Mbaecha atate que mbae isiquia tubiriã mondo mondo quia eriru ye ra. ⁴² Eru cheecha mo ngue ngasẽ u cote ra. Nyeremoño tuchi que ae mbae isiquia mondo ra. Centavo mii mbuchecha tuchi que ra. ⁴³ Jesús que ñee uchimbaaquiatu je ra. —Jenyu. Tacheẽ nyecua jẽje. Eru cheecha mbaecha reã ngue mbae isiquia mondo tuchi mbia ataque si ra. ⁴⁴ Mbaecha quiatu que umbae rire ñetẽ mondo mondo ra. Eru cheecha quiatu que umbae mii mondo ja ra, i que Jesús ra.

13

Mbia ra Dios chuchua mbucoi ja, i Jesús

¹ Jesús que oso usẽ Dios chuchua si cote ra. Echimbaaquiatu mo ngue ñee ee ra. —Sã Dios chuchua turã tuchite jẽ. Eao ji turã tuchi sita je, i que echimbaaquiatu mo ñee ee ra.

² Jesús que ñee ee ra. —Ã ndese jẽingo mae ã nae, ũquĩ nda mbia mbucoi ja cote. Sita mo nda chi eã nyuchuarõ Dios chuchua cote. Mbia ra Dios chuchua mbucoi ja tuchi cote, i que Jesús ñee nda.

Mbae ua ja nonde chõ ã nde

³ Jesús que chĩ ngoi huee ibi ibate mo nda. Monte de los Olivos, i que hue je ra. Dios chuchua checuate que ee hue si ra. Echimbaaquiatu que ngasẽ ñee ee ra. Pedro. Jacobo. Juan. Andrés. ũquĩ ja que ñee eĩsaa ra. ⁴ —¿Manosete ra ũquĩ nde? ¿Mañi ure ra equia jirandu mbae ua nonde re? i que ñee Jesús je ra. ⁵ Jesús que ñee ee ra. —Jẽtesa jiri quia jẽ. Mbia mo nda jembĩĩrĩ irĩchĩ ñee jẽje jẽ. ⁶ “Cristo chõ se re” i ra mbia ñee ata atate jẽje. ũquĩ nda jeñanduchĩ jẽ. ũquĩ nda mbia mbĩĩrĩ irĩ jate. Ñee ñooño je chõ ũquĩ nde. ⁷ Mbia ra guerras saã saã tuchi. Mbia ra ñee ñee tuchi quia nyiiquia iquia je riĩ. ũquĩ mose ra jẽsiquichechĩ jẽ. ũquĩ ja rane nda nyecua raque. Aque mose r a mbae ja ua eã ná. ⁸ Mbia ra guerras saã tuchi chee. Nyiiquia iquia tuchi rae. Mbia riãcuã tuchi ra aque mose no. Emo ñooñoa tuchi ra mbia rasi. Mangu chooñoa tuchi ra ibi nyere nyere. Jembasi ramo mose chõ nda ũquĩ nde. Aquere ra jembasi tuchi cote.

⁹ ¡Sã jẽ! Mbia icuã icuãte ra jẽje. Jembĩĩrĩ irĩ ndae. Jemee mee icuã nda mbia rerecua je. Jẽiruã nua nda mbia chumunuásaa. Nguerecua je ra mbia jenderao rao tuchi. Ererecua abe je chee ra secheẽ jẽsenei senei. ¹⁰ Sequiato ra Dios cheẽ turã senei senei ná mbia ja je nyii. Mangu chooñoa jenda ja je. Aquere ra mbae ua ja cote. ¹¹ Jemee mose mbia rerecua je, pare pare jenyechĩ nda jẽ. “¿Manyae ra ũquĩ ñee ndibishorõ nde?” jenyechĩ nda pare pare i jẽ. Espiritu Turã ae chõ nda jembucheẽ turã nguiã mbia je aque mose. Jẽ ae ra jeñee eã. Espiritu Turã ae chõ nda jembucheẽ nguiã. ¹² Jenongue ra jemondo

chee mbia icuã je. Jêiquia sacuã. Jendu abe ra jemondo chee mbia icuã je. Jendiirĩ abe ra jemondo chee mbia icuã je. Mbia icuã nda jemo iquia iquia chee. ¹³ Mbia mangue chooñoa jenda ra jêucuyã tuchi seriĩ. Ae ra siqui bei serese, ũquĩ nda Dios mingo bei.

¹⁴ Daniel que embesa Mbae Mbutiãsa Icuã nĩi nda. Mbae Mbutiãsa Icuã nda siqui nguecuáyaã. “Dios rendaque re taico se quiatu”, i ra equia huee. (Ae ra mae nguia sechimbese rese nae, sã ũquĩ eicua.) Jemae mose Mbae Mbutiãsa Icuã ndese, jeña esi. Ae siqui quia Judéaa, sã ũquĩ uchã jei choi ibi ibátee mo. ¹⁵ Ae ra siqui tuchia quite rese, sã ũquĩ iqueã nyoĩ uchuchua uquichi mose. Sã echoi chõ uchã hue si bei, umbae rirõ ndocoĩ. ¹⁶ Ae ra siqui úcoo, sã ũquĩ nyebiã ngaẽ huiirao rea. Sã hue si bei chõ echoi uchã. ¹⁷ Aba mbia eã tuchi ra emo áquẽ ndiru rerequia mose aque mose. Nguirĩ mbuquiambu je abe no. ¹⁸ “Nyiiseĩ mose eã urechã” jenyee Dios je. ¹⁹ Mbia ra mbae rasi saã tuchi aque mose. Mbae rasi que mbia saã eã jiri nyii ra. Aque ramo mose ra mbae rasi raã tuchi cote. Mbae ua bei sacuã ño ũquĩ nde. ²⁰ Ae rasi ra mbia saã tuchi nae, ũquĩ nda Dios mbujua jiri uquiato riĩ. ĩ nda emo ñimbirãcuã eã tuchi rei ũquĩ ndasi je. ²¹ “A Cristo riqui a jẽ” i mose emo jẽje, “nyia” jenyechĩ nda ũquĩ ñee mose jẽ. “Hue Cristo riqui hue jẽ” i mose emo jẽje, “nyia” jenyechĩ nda eno jẽ. ²² “Cristo chõ se re” ichõiño nda mbia ñee ata atate jẽje. “Dios cheẽ mbuchecuasa chõ se re” ichõiño nda mbia ñee ata atate jẽje no. Mbia mae sayã nda esaã saã tuchi mbia mbiirĩ irĩ sacuã. ũquĩ Dios quiato abe chee mbiirĩ irĩ arõte. ²³ ũquĩ nonde chõ aico nguia jembiirandu randu co.

Dios riirĩ nda tube ibate si

²⁴ Mbia ũquĩ ndasi raã ja mose ra tenda checuayã mbei cote. Nyasi abe no. ²⁵ Nyasitata ra ngoĩ ngoĩ. Ibei jenda abe ra quiata quiata chee cote no. ²⁶ Aque mose ra achu ibei rese. Senininya tuchi ra sechu mose. Sequirãcuã tuchi ra sechu mose no. ²⁷ Angeles serimba ra amondo mbia sechiisirõ munua nua sacuã. Ishonda ja. Mangue chooñoa jenda ja. Mbia sechiisirõ nda emunua nua ja seje cote.

²⁸ Sã higuera riqui no. Sã ira mo ndiqui no. Ero quira usẽ ja mose, “iraro itõ ndacu ra cote”, i chõ mbia nguia aque mose. ²⁹ Eĩ sí ra mbae ua ja nonde. Ae riĩ aico ñee jẽje nae, ũquĩ ndese jemae mose, “mbae ra ua ja cote” jenyee ra cote. ³⁰ Tacheẽ nyecua jẽje. Ā mbia riqui ngata ibi ã nae, ũquĩ emo emo nda manoa mbae ua ja nonde. ³¹ Ibei ra ua. Ibi abe ra ua no. Secheẽ nguia ra ua eã mbei.

³² Manosete chõ nda mbae ua ja. Aico eicuayãte co. Mbia mo abe eicuayãte quia ã no. Angeles abe eicuayãte quia ã no. Paba mii ño eicua nguia co. ³³ Nyebe jẽingo quiatu quia eraarõ arõ mbei. Jêtesa tesa bei quia. Ma nyaashĩ ño nda equeru. Jêicuayãte equia ã. ³⁴ Sã ererecua mo oso isho itõte no. Sã ñee ngũimba je oso nonde no. —Sembae jẽsaarõ ja. Ā ndese jẽingo. Co rese eico nde. Qui rese eico nde no, i que ñee ngũimba mii mii je ra. —Etesa tesa bei quia, i que eiquesa raarõsa je ra. ³⁵ Manosete chõ nda tuchuacha ru. Jêicuayãte equia ã. Itondaru ramo mose eru arondete. Itondii mose eru arondete. Nguira cheẽ mose eru arondete no. Eresaitõ ndabe mose eru arondete no. Nyebe jêtesa tesa bei quiatu quia. ³⁶ Jengue mose ra eruchĩ jembuate jẽ. ³⁷ “Jêtesa tesa bei quia” ae chõ nguia mbia ja je co. Jẽ mii je eã, i que Jesús ra.

14

Jesús nandesi tarõ, i ja ererecua nyue

¹ Sacerdote rerecua que ñee ja nyue ra. Embesasa abe no. —¿Mañi nande ra equia Jesús isi nonde re? Eiquia sacuã. ¿Mañi nande ra embiirĩ irĩ nde? i que equia ñee ñee nyue ra. Achite que fiesta de la pascua ñi tu ee cote ra. Dos días. ² —Fiesta mose eã nandesi jẽ. Mbia ra paama ichĩ nande je jẽ, i que u ñee ñee nyue ra.

Cuña mo aba mbusimbusa turã ichusẽ Jesús áquĩ ndese

³ Jesús que siqui Simón Leproso chuchúaa ra. Betania, i que hue je ra. Cuña mo ngue tu erea huee ra. Aba mbusimbusa mo ngue equeru ee ra. Sita ao ji ye que ereru ra. Embisē tuchi que equeru ra. Mbae isiquia mumbasa tuchi que ũquĩ nda. Eriru churui que esiquio eichusē nonde Jesús āquĩ ndese equiaru mose ra. ⁴ Mbia que chi ja mae erese ra. Paama i que cuña je ra. —¿Mbaerā eichusē ñooño nde? ⁵ Mbae isiquia ribishorō ño nda aba emondo re. Mbaecha reã je emee mee sacua, i que ñee icua icua cuña je ra. ⁶ Jesús que ñee cote ra. —¿Mbaerā jëingo ñee ũquĩ nde? Sã cuña ae riqui ae. Ae esaã seje nae, eturãte seje ũquĩ. ⁷ Mbaecha reã nguia ra chi arete íbii a. Jë mbae raãse mose ee, mbae jësaã turã mbei ee ae. Se quia nda aico bei eã nguia jendese aa. ⁸ Seati nonde chõ ngue cuña aba mbusimbusa ichusē ja nguia serese. ⁹ Tacheẽ nyecua jëje. Mbia Dios cheẽ turã nenei nenei mose mbia ja je, cuña nyisaã abe ra esenei senei mangue chooñoa jenda ja je. Mbia ndua turã ja sacua echisaã abe rese, i que Jesús ñee mbia je ra.

Jesús tamee jëje, i Judas mbia icua je

¹⁰ Judas Iscariote, i rei que Jesús chimbaaquiato mo je ra. Aque que oso ñee sacerdote rerecua je ra. Jesús mee nonde ee. ¹¹ Sacerdote rerecua ia ja que ũquĩ andu ra. —Mbae isiquia uremee tuchi ndeje jë, i que ee ra. Nyebe Judas riqui nguia ndua ndua. —Mbia eãsa quiatu Jesús tamee ee, i.

Jesús quiaru uchimbbaaquiato rese

¹² Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia aque mose querabe no nda. —¿Mangue ra oveja urembuchi mangue ndechiurã nde? i que echimbbaaquiato ñee Jesús je ra. ¹³ Ñee ngue uchimbbaaquiato nyeremo je ra. —Jëso sucha cuasu. Huee ra jemaemo i rerao rese. I ra equerao quia irasa mo ye. Aque rui jëso. ¹⁴ Eique mose, aque tuchuacha je jeñee. “Jesús que urembu ñee sacua ndeje ra. ‘¿Ma cuarto ra urecu quiaru oveja u que re? Sechimbaaquiato rese’, i que Jesús ñee ndeje ra”, jentye tuchuacha je. ¹⁵ Tuchuacha ra cuarto cuasu mee jëje. Mbia quesa ibatenda ra emee jëje. Embuquiche ji. Huee chõ oveja jembuchi nandequiato sacua, i que Jesús ñee ee ra. ¹⁶ Nyebe echimbbaaquiato nyoĩ nguia sucha cuasu. Jesús cheẽ ndui si tuchi que mbae chi ja ee huee ra. Huee que oveja mbuchi huee cote ra.

¹⁷ Itondaru ramo mose que Jesús ru uchimbbaa quiato ataque rese ra. ¹⁸ Quiaru mose que Jesús ñee ee cote ra. —Tacheẽ nyecua jëje. A jëingo quiaru serese a nae, jemo nda semondo mbia icua je, i que ñee uchimbbaaquiato je ra. ¹⁹ Echimbbaaquiato ia eã tuchi que echeẽ mose ra. —¿Se ra aremondo ee re? i ja jate que ñee Jesús je ra. ²⁰ Jesús que ñee ee ra. —Doce jëingo quiaru serese a nae, jemo ño ñene. Ae chí quiaru serese aque plato ye sí a nae, aque chõ ñene. ²¹ Dios cheẽ ndui sí tuchi ra amano ndaque. Ae ra semee mbia icua je, aque ra mbae rasi saã tuchi quia. Aba mbia eã tuchi ra aque. “Taĩ sembucueca jirichĩ nguia curi”, i chee ra aque, i que Jesús ra.

²² Quiaru que u ra. Jesús que mbichae sirõ nda. Gracias i que Dios je ra. Siquio que mbuchao chao ee cote ra. —Á mbichae jëu. Serete chõ ã nde, i que Jesús ñee ee ra. ²³ Vino mbeisa que esirõ cote no nda. Gracias i que Dios je ra. Mondo que uchimbbaaquiato oo cote ra. Mbei mbei ja que cote ra. ²⁴ Jesús que ñee ee ra. —Seruqui chõ ã nde. Mbia icua mbutiã sacua ño seruqui re. Dios cheẽ yasu rui si chõ seruqui riqui nguia mbia icua mbutiã ã. ²⁵ Tacheẽ nyecua jëje. Vino mo nda ambei eã mbei cote. Paba mbia rerecua tuchi mose, aque mose ramo nguia nda ambei nguia cote, i que Jesús ñee nda.

Jesús aicuayãte resẽ, ichõiño nda Pedro serĩ, i Jesús

²⁶ Irasei rasei que cote ra. Nyoĩ que ibi ibate mo cote ra. Monte de los Olivos, i que huee ibi je ra. ²⁷ Jesús que ñee uchimbbaaquiato je huee ra. —Jëireĩte ra eriqui serĩ. Jeñimboseĩ mboseĩ nda oso serecha. Sã embesa ji riqui ñee no: “Mbia ra oveja raarõsa iquia. Ovejas ra ñimboseĩ nyoĩ cote”, sã embesa ji riqui i no. ²⁸ Seraaque quera sire ra aso se rane

jendaarõ Galilea, i que Jesús ee ra. ²⁹ Pedro que ñee ee ra. —Seataque ra ireĩ ireĩte raque ndesi. Se quia ra aireĩ ireiã mbei ndesi, i rei que Pedro ñee ee ra. ³⁰ Jesús que ñee ee ra. —Tacheẽ nyecua ndeje. Nguira cheẽ nyeremo nonde ra erecheẽ ñooño tres veces seriĩ namo, Pedro. “Jesús aicuayãte resẽ”, ere chooño ño nda seriĩ, i que Jesús ñee ee ra. ³¹ Pedro que ñee ee ra. —Mbia ra seiquia arõte raque nderiĩ, acheẽ ñooño eã nda se nderiĩ, i rei que Pedro ra. Eĩ ja que ñee nda.

Jesús ñee ngu je

³² Jesús que oso Getsemaní cote ra. Uchi mbaaquiato rese. —Jengoi rã u aa. Tacheẽ na oso Paba je pe jiri se, i que Jesús ee ra. ³³ Pe quiti jiri que Pedro rerao ra. Jacobo rese. Juan abe no. Eya eã ndasi tuchi que tu ee aque mose ra. ³⁴ Ñee ngue ũquĩ je ra. —Seya eã ndasi tuchi aico co. Seya eã ndasi ra seiquia chee. Jenguchõ na jẽ aa. Jẽtesa tesa bei u aa, i que Jesús ñee ee ra. ³⁵ Jesús que oso pe quiti jiri cote ra. Nyibi que u ngoi ngũiã ndese ñee Dios je ra. —Mbae rasi asaã sereãte, i rei que ñee Dios je ra. ³⁶ —Paba, mbae eresaã ja arõte nde. ũquĩ ndasi asaã sereãte raque quia co. Ae sebi riqui nae, ũquĩ ndese semingo eã. Ae ndebite riqui nae, ũquĩ ndese quiato semingo, i que Jesús ñee Dios je ra. ³⁷ Nyebi que u uchimbaaquiato je cote ra. I que eu uque ja ee cote ra. Ñee ngue Pedro je ra. —Simón, ¿ereque huĩ a re? Ereico areã ñochĩ tesa tesa s e ñee mose Dios je. ³⁸ Jẽtesa tesa u. Jengue eã u ñee Dios je. Mbae icuã tã i eã sacuaã jẽje. Jẽingo serete raque serese. Mbae icuã nguiato jembuti mbutite nguiã, i que Jesús ee ra. ³⁹ Nyebi si que oso ñee Dios je ra. Hue rĩ si que ñee ee ra. ⁴⁰ Nyebi que u uchimbaaquiato je cote ra. I sí que u uque ee no nda. Eresa quiato ngue eshiu shiute nguiã. —¿Mañi nda aba ñee nde? i ja tuchi que echimbaaquiato ra. ⁴¹ Osobe que ñee Dios je pe jiri cote ra. Tres veces que aque cote ra. Uba rei que u ñee uchimbaaquiato je ra. —Jengue tuchi cote. Jenguena jẽucua cote. Semondo ra mbia icuã je cote. Seiquia sacuaã. ⁴² Jẽhuã cote. Nyao cote. Ae ra semee mbia icuã je, co eru quia semee sacuaã co cote, i que Jesús uchimbaaquiato je ra.

Mbia icuã Jesús isi suruchoi

⁴³ Jesús cheẽ mosebe tuchi que Judas ru erea ra. Jesús chimbaaquiato rei que ae ra. Aque rese que mbia cuaẽ tuchi quia ra. Tiquise abe que ecurucuaẽ nguia ra. Ira jua abe no. Sacerdote rerecua chõ ũquĩ mbucuaẽ nguia reaẽ. Embesasa abe. Amei abe. ⁴⁴ Judas ñee nyecuayã nguiato quia ũquĩ je nyii reaẽ. —Ae ritii ra asiite nae, aque chõ ñene. Aque jẽisi quiato tuchi serao, i quia equia ee nyii reaẽ. ⁴⁵ Jesús riichã ngue esi saludar i ee cote ra. Jesús ritii que esiite ee cote ra. ⁴⁶ Mbia que Jesús isi cuaẽ ecua cote ra. ⁴⁷ ũquĩ mose que Jesús rimba mo uchuuru sirõ tiquise ra. Sacerdote rerecua rimba rese que tiquise uru ra. Eisa que echisia ra. ⁴⁸ Jesús que ñee mbia ja je cote ra. —¿Mbaerã jenyu quia tiquise rurucuaẽ serea co re? Ira jua abe no. Mbae mbuquiachãsa rea rocoĩ jenyuchĩ nguia serea co. ⁴⁹ Tenda que amumba mumba beite rei quia jendese Dios chuchua resẽ. Mbia que ambaaquiato quiato bei rei quia huee resẽ. ¿Mbaerã seisiã nyucua aque mose re? Embesa ji ique sacuaã ño jẽicuã icuã ndiqui nguiã seje ã, i que Jesús ñee ee ra. ⁵⁰ Echimbaaquiato que nyoi ja chee uchã Jesús recha ra. ⁵¹ Acuanindu miĩ mo ngue oso erui ra. Tiru miĩ ngue equereco nyiati ra. Mbia que acuanindu abe isi rei ra. ⁵² Huiirao que esecha oso uchã nda. Eirao eã tuchi que oso uchã nda.

Jesús mbia curuchoi mbia rerecua je

⁵³ Mbia que Jesús curuchoi sacerdote rerecua je cote ra. Huee que sacerdote rerecua ja chi ñumunua nda. Embesasa abe. Amei ererecua ja abe no. ⁵⁴ Pedro que embuchurucha rucha oso quia erui ra. Ngasẽ nyee que sacerdote rerecua itaicuee ra. Hue que ngoi sacerdote rimba mo ndese ra. Nyee que huĩ huee ra. ⁵⁵ Sacerdote rerecua que chi ja huee ra. Amei mbia rerecua ja abe no. Mbia rerecua ja tuchi. —Jesús nandeiquia, i rei que ñee ñee nyue ra. —¿Mbae i ra aba mbia je Jesús riicharã nde? i rei que u ñee ñee nyue ra. ⁵⁶ Emo emo ngue ñee icuã icuã ndei Jesús riĩ nda. Ucheẽ ngue etasa tasa tuchi chõ

nda. ⁵⁷ Mbia mo abe que juã ñee ñooño eriñ nda. ⁵⁸ —Jesús cheẽ ngue urechandu ra. Ñee icuãte que Dios chuchua riñ nda. “Dios chuchua tambocoi mbia chiao. Tres días mose ra Dios chuchuarã asaã no. Mbia chiao eã nda ùquĩ cote”, i que urechandu Jesús cheẽ nda, i que ùquĩ ñee ñooño Jesús riñ nda. ⁵⁹ Ucheẽ ngue etasa tasa bei chõ nda. ⁶⁰ Sacerdote rerecua que juã ñee Jesús je ra. —¿Echeẽ nda eresibishorõ eã mbei re? ¿Mbae i equia nderiñ nde? i que ñee Jesús je ra. ⁶¹ Jesús que ñee eã mbei echeẽ mose ra. Sacerdote rerecua que ñeembe ee ra. —¿Dios rucucha nde re? ¿Cristo nde re? i que ñee Jesús je ra. ⁶² Jesús que ñee ee ra. —Ae. Dios rucucha chõ se re. Jemae nda serese s e coi mose Dios quirãcuã jii. Sechu mose abe ibeishĩ ndese, i que Jesús ee ra. ⁶³⁻⁶⁴ Sacerdote rerecua que paama i tuchi Jesús cheẽ mose ra. Huiirao que endoro ndoro chee ra. Ñee ngue ererecua ataque je ra. —Jesús riqui Dios rucucha raã naa co. Jeñandu jate equia ã. Sã mbia mo nandembiirandube eã cote. Nandemae ndei ngue erese re. ¿Í jêje re? ¿Mañi nande ra equia re? i que sacerdote rerecua ñee mbia rerecua ataque je ra. —Eicuã tuchi que ra jê. Sã mbia eiquia, i jate que ererecua ñee Jesús riñ nda. ⁶⁵ Mbia que ñinimbu nimbu Jesús ruba rese cote ra. Eresa que echati mbae mo je ra. Ucuu ucuu tuchi que erese cote ra. —¿Aba ucuu ucuu u nderese a re? Eicua no, i que equia eresa ati ji je ra. Soldados abe que ucuu ucuu tuchi eresa rese ra.

Jesús aicuayãte resẽ, ichõiño Pedro

⁶⁶ Pedro que chĩmbeite ngoi itaicuee ra. Nyucuaaque mo ngue tu huee sacerdote rerecua rimba ra. ⁶⁷ Pedro que chĩ nyee tata jii ee huee ra. —Jesús resenda que nde abe ra, i que nyucuaaque ñee mae mose Pedro rese ra. ⁶⁸ —Tei. Ndecheẽ aicuayãte, ichõiño ngue Pedro ñee ee ra. Hue si que esi eiquesa quitu cote ra. Usẽ mose que nguira ñee cote ra. ⁶⁹ Nyucuaaque que maembe erese ra. —Co abe que Jesús resenda ra, i que mbia ataque je ra. ⁷⁰ —Tei. Aicuayãte se, ichõiño ngue Pedro ee no nda. Ae chi huee nae, ùquĩ mo ngue ñee ee cote ra. —Jesús resenda chõ nde abe resẽ. Galilea jenda chõ nde resẽ, i que ñee Pedro je ra. ⁷¹ Pedro que jurar i tuchi ñee ee ra. —Aicuayã tuchite se resẽ, i que ñee ñooño si no nda. ⁷² Aque mose tuchi que nguira ñee sí cote ra. Pedro que ndua Jesús cheẽ ndese cote ra. Sã Jesús ñee ee nyii no. —Nguira cheẽ nyeremo nonde ra erecheẽ ñooño tres veces serĩ, sã Jesús i ee nyii no. Ùquĩ ndese que Pedro ndua cote ra. Nyebe nyeseo tuchi nguia cote.

15

Mbia Jesús curuchoi Pilato je

¹ Nyaashĩ namo mose que sacerdote rerecua ñumunua ja ra. Amei ererecua abe no. Embesasa abe no. Mbia rerecua jate que ñumunua nda. Jesús que echucua suruchoi Pilato je ra. Pilato rei mbia rerecua hue jenda ja. ² —¿Judíos rerecua chõ nde re? i que Pilato ñee ee ra. —Ae. Judios rerecua chõ se re, i que Jesús ee ra. ³ Sacerdote rerecua que ñee ñooño tuchi Jesús riñ nda. Ñee icuã tuchi que eriñ nda. ⁴ —Sã ñee icuã icuãte nderiñ jê. ¿Echeẽ nda eresibishorõ eã nde? i que Pilato ñee Jesús je ra. ⁵ Jesús que ñee ãte echeẽ mose ra. Nyebe Pilato nyuruira tuchi nguia echeẽ eã mose.

Jesús jëiquia mbucha ira rese, i ererecua

⁶ Pilato que mbia tarõ ji mo mbusẽ mbei quia pascua mose ra. Co miñ ngue embusẽ mbusẽ mbei quia pascua mose ra. Ae je mbia riqui ñee, “aque embusẽ mondo” i nae, aque chõ ngue embusẽ mbei quia ee ra. ⁷ Barrabás, i que etarõ ji mo je ra. Emo abe que chi huee erese ra. Mbia iquiasa que ùquĩ nda. ⁸ Mbia que ñee ngaẽ Pilato je ra. —Mbia miñ tarõ ji que erembusẽ mbeite quia, einyere si emo mbusẽ namo, i ja que mbia ñee Pilato je ra. ⁹ —¿Judío rerecua ra ambusẽ mondo jêje Jesús re? i rei que Pilato ra. ¹⁰ —Sacerdote rerecua riqui paama i choñote Jesús je ã, i quiatu que Pilato ndua ndua uchiangui re ra. ¹¹ —Sã Pilato Barrabás mbusẽ mondo Jesús rendaque re, i tuchi que sacerdotes ñee ja mbia je ra. Nyebe que mbia “Barrabás embusẽ mondo” i chee Pilato je ra. ¹² —¿Mañi ae

quia ra Jesucristo je re no? i que Pilato ñee ee ra. ¹³—Embucha ira rese, i ja que mbia ñee ee ra. ¹⁴—¿Mbae icuã esaã nde? i que Pilato ñee ee ra. —Embucha ira rese jê! i bei bei que mbia ra. ¹⁵—Mbia turã jiri nda seje chã, i chee que Pilato ra. Nyebe Barrabás mbusê mondo nguiã. Jesús quiatu que eiruã nua cote ra. —Jembucha iquia ira rese, i que mbia je cote ra.

¹⁶ Soldados que Jesús cuasa curuchoi ererecua chuchúaa ra. Huee que soldados ataque abe ngaẽ ja Jesús mama no nda. ¹⁷ Tiru ireĩ ngue emingue ee cote ra. —Ererecua chõ nde re, ichõiño iquia iquia ee. Nyu ritimei uma ji que emii eãquĩ ndese corona nda. ¹⁸—Judío rerecua tuchi chõ nde re, ichõiño ngue iquia iquia ee ra. ¹⁹ Ira que euru uru eãquĩ ndese ra. Ñinimbu nimbu abe que erese no nda. Ngoi ngoi que ngúia ndese erimba raã naa ee ra. ²⁰ I quia iquia tuchi que eu ee ra. Aquere que tiru ireĩ mbui esi cote ra. Eiraote que emingue ee cote ra. Curuchoi que embucha nonde ira rese cote ra.

Mbia Jesús mbucha ira rese

²¹ I rei que emo u quia uco si ra. Simón, i que ee ra. Cirene jenda mo ngue ae ra. Alejandro ru que ra. Rufo ru abe no. Aque que soldados isi ira mbuchicuasada ji rerao sacua ee ra. Cruz, i equia ee. Nguerao que cote ra. ²² Ngasê ngue pee cote ra. Gólgota, i que hue je ra. Eresa cuare, i chõ nguiã hue je. ²³ Huee que vino mondo rei Jesús je ra. Mirra je emumbarai. Mbei eã ngue ra. ²⁴ Soldados que Jesús mbucha ira rese ra. Aquere que sita ñetê mbaba mbaba o je cote ra. —Aba ra Jesús irao querao ñi ja, i que nyue ra. ²⁵ Tenda chui ite ramo mose que embucha ira rese ra. ²⁶ Mbia que letrero mii Jesús ãquĩ nguiti ibate ra. JESUS REI JUDIO RERECUA i que embesa mii nda. Ûquĩ nii ño eriqui nguiã eiquia hue. ²⁷ Mbia nyeremo abe que embucha ira rese Jesús chabe ra. Jesús rereco chobei que emii ira rese ra. Mbae mbuquiachãsa tuchi que ùquĩ nda. ²⁸ Embesa ji cheẽ nguire que Jesús iquia mbia icuã ndese cote ra. Sã embesa ji riqui ñee no: “Mbia icuã ndese ra eiquia, sã embesa ji i ñee nyii no. ²⁹ Mbia que iquia iquia quia Jesús cheẽ naa naa ecuã mose ra. Ñee icuã icuã ee. —“Dios chuchua ra ambucoi. Tres días mose ra ambuchuruambe” ere que equia. ³⁰ Equiche u nde ae hue si no, i tuchi que mbia quia iquia iquia ee ecuã mose ra. ³¹ Sacerdote rerecua abe que iquia iquia chõ nguiã ee ra. Embesasa abe no. Ûquĩ ngue ñee icuã icuã ja quia eriĩ nda. —Mbia que embuquera quera rei nyii ra. Ae sí quera aroneate nguiã aque. ³² Judío rerecua mose ae, sã ae ae nguichi ira sí. Cristo mose ae, sã ae ae nguichi no. Ì nda uremae erese. Ì nda ureicua cote, i ja que ererecua ñee icuã icuã eriĩ nda.

Jesús mano mose cote

³³ Tenda nandeite re mose que itondaru tu ra. Itondaru bei que mbia ja je tres horas ra. ³⁴ Tenda cheseco mose que Jesús ñeemombo cote ra. —Eloi, Eloi, ¿lama sabactani? i que ñee mombo ra. —Dios sererecua, ¿mbaerã ereico hui sesi re? i chõ ngue ñee nguiã. ³⁵—Elías je eriqui “quiatushu” i reae, i rei que echeẽ andusa mo nda. ³⁶ Emo ngue esponja monde vinagre ye ra. Ira ai rese que embia ji mondo rei Jesús chúruu cote ra. —Esecha rei. Sã Elías ruãt e quia erea, i que emo ñee ee ra. ³⁷ Jesús que tasê mano mbei cote ra. ³⁸ Aque mosechi tuchi que cortina nyisia Dios chuchua jenda ra. Ibate si que eru nyisia íbii ra. ³⁹ Soldado rerecua que chĩ Jesús nonde mae erese ra. Emano ndese que eñi mae nda. —Dios riirĩ ño eriqui re, i que cote ra.

⁴⁰ Cuña ngue chi jate ma e Jesús rese isho ra. María Magdalena abe que chĩ huee ra. Salomé abe no. María abe no. María rei José si. Jacobo Ñetê si abe no. ⁴¹ Ûquĩ ngu e siqui bei quia Jesús rui ra. Echiurã ngue emii mii mbei quia ee ra. Galiléaa eico mose bei. Cuña tubiriãte abe que chi mae Jesús mbuchai rese huee ra. Ae nyoĩ Jesús rese Jerusalén, ùquĩ.

Mbia Jesús raaque chati cote

⁴² Tenda que oso cote ra. Sábado nonde. Aque mose bei que mbia riqui mbae mbuquiche ja sábado sacua nda. ⁴³ Aque eresaitõ mose que José si ñee Pilato je ra. Judío turã ngue ae ra. Arimatea jenda que ae ra. Judío rerecua que ae no nda. —Dios ra

ererecua, i beite que equia eraarõ arõ nda. Aque que ireĩ ireĩ ãte oso ñee Pilato je ra. —Jesús raaque emee na seje, i que oso ñee ee ra. ⁴⁴ —¿Mano jei tuchi ere? i tuchi que Pilato uchiangui re ra. —Quiatuchu rã sembiirandu. ¿Jesús mano cote re? i que Pilato ñee soldado rerecua je ra. ⁴⁵ —Mano ngue cote ra, i que soldado rerecua ñee ee ra. Nyebe Pilato eraaque mondonguiã José je cote. ⁴⁶ José que Jesús raaque mbuquichi cote ra. Tirushĩ turã mo ngue eisi ra. Eraaque que echuma aque je cote ra. Iti que echoi sita ribicoi ji imi ye ra. Nyati que sita cuasu mo je cote ra. ⁴⁷ María Magdalena ngu e mae mi eati rese ra. María rese. José si que ae ra.

16

Jesús raaque quera si

¹ Jesús raaque ati ji que chibe sábado mose ra. I nyaashĩ oso quia domingo mose, aque mose que cuña mo nyoĩ mae eatisa rese ra. María Magdalena. Salomé abe no. María abe no. Jacobo si rei ae. Ñquĩ ja que aba mbushimbusa isi rei eichusẽ chusẽ sacua Jesús raaque rese ra. ² Tenda nyui ramo mose que echoi eatísaa ra. ³ —¿Aba ra sita curuba nande je eatiquia re? i rei que echoi quia ñee ñee nyue ra. ⁴ I que sita rurubai u ee cote ra. Sita cuasute quiatu ngue re. ⁵ I que rei que echoi sita imi ye ra. Acuanindu mo ngue chĩ ngoi huee equiatocuti qiti ra. Huiiraoshĩ oco tuchi que ecunui huee ra. Cuña ngue siquiche tuchi ra. ⁶ Acuanindu que ñee ee ra. —¿Mbaerã jẽingo siquiche re? Jesús raaque jẽsequia raque quia ã. Emoate a resẽ. Eraaque que quera si no. Jemae eatisa rese ae. ⁷ Jẽso asi rã echimbaaquiatu mbiirandu erese. Pedro abe jembiiirandu. “Jenonde ra esi Galilea. Jemae nda erese huee. Sã ñee jẽje nyii no”, jenyẽ embiiirandu, i que acuanindu ee ra. ⁸ Cuña ngue siquichete echeẽ andu ra. Uchã ngue echoi eatisa si ra. Ñee eã tuchi que mbia mo je ra. Esiquichete quiatu ngue re.

Jesús nyecua María Magdalena je

⁹ Jesús que quera si nyaashĩ namo mose domingo mose ra. María Magdalena nane je que nyecua ra. Aque si chõ eriqui siete aba checuayã icuã jea nyii reaẽ. ¹⁰ Ae que oso Jesús quiato mbiirandu ja cote ra. Ngasẽ mose ee que echi nyeseo jate eya eã ee ra. ¹¹ — Jesús que quera si ra. Amae ngue erese ra, i rei que embiiirandu ra. Quera aroneate que ñquĩ je ra.

Jesús nyecua uquiato nyeremo je

¹² Aquere que nyecua uquiato nyeremo je ra. Ishotte que sucha tubiriã si ra. Emo na tuchi que ee ra. ¹³ —Jesús que quera si nyecua ure je ra, i rei que echoi uataque mbiirandu ra. Quera aroneate que ee no nda.

Jesús uchimbaaquiatu mondo mbia mbiirandu

¹⁴ Aquere que Jesús nyecua uchimbaaquiatu ja je no nda. Once je. Ñquĩ quiaru mose que nyecua ee ra. Ñee asi asi que ee ra. —¿Mbaerã jeñia ãtãte riqui re? ¿Mbaerã “nyia” jenyẽ eã jembiiirandu mose sequera rese re? i que ñee ee ra. ¹⁵ —Jẽso secheẽ nenei nenei mbia ja je. Mbiamangue chooñoa jenda ja je. ¹⁶ Mbiamo nda seicua icua. Ñquĩ je bautizar jenyẽ. Ñquĩ nda siqui bei cote. Ae ra seicuayã, ñquĩ nda mbae rasi saã mbei. ¹⁷ Seicuasa ra mbiamae sayã saã saã tuchi. Aba checuayã icuã nda eja jea mbia si seriĩ. Mbiamcheemo nda esaã. ¹⁸ Mbei ra eisi isi o je. Aba iquiasa mbei mose ra erasiã. O ra echono ñono erasi arõ embucherõ sacua, i que Jesús uchimbaaquiatu mondo ra.

Jesús nyui oso ibate

¹⁹ Jesús ñee ja mose que Dios equerao ibate cote ra. Siqui bei sacua Dios jii cote. ²⁰ Echimbaaquiatu que nyoĩ Dios cheẽ nenei nenei mbia ja je ra. Mangue chooñoa jenda ja je. Dios que siqui tuchi quia erese ra. Mbiamae sayã tuchi que esaã saã nguia ra. Mbiam Dios cheẽ icua sacua. Amén.

EL SANTO EVANGELIO SEGÚN SAN LUCAS

Lucas ucheẽ mbesa Teófilo je

¹ Jesucristo que mbae saã saã tuchi quia huiico mose íbii ra. Mbia atate que echisaã mbesa mbesa rei ra. ² Mae ndei equia erese nyii. Dios cheẽ esenei senei mbei rei quia nyii. Jesucristo chisaã ndese que urembiirandu cote ra. ³ Se abe que airandu tuchi cote ra. Ae esaã saã nguia nyii nae, aque mosenda bei rese que airandu cote ra. Se abe ùquĩ tambesa ja ndeje, Teófilo. Tasenei turã ja embuchiabiã ndeje. ⁴ Ae rese ereirandu randu nae, ùquĩ ereicua tuchi sacua ño aico nguia embesa mbesa ndeje. Eĩ nda “ae bei” ere chõ nguia Jesucristo chisaã saã je.

“Juan el Bautista ra nyecua u mbia je”, i que ángel mo nda

⁵ Zacarías, i que emo je ra. Sacerdote que ae ra. Herodes que siqui Judea mbia rerecuarã aque mose ra. Abías resenda rei Zacarías. Aarón ndiirĩ nducucha rei Zacarías. Eninisi abe rei Aarón ndiirĩ nducucha no. Elisabet, i que eninisi je ra. ⁶ Zacarías turãte que eriqui Dios je ra. Ngüinisi rese. Ùquĩ ngue Dios cheẽ mumbayã mbei quia ra. Eicuãte, i aroneãte que mbia mo nguia erĩ nda. ⁷ Eriiriã mbei que eriqui ra. Tiiriã je rei Elisabet. Ari chee. Zacarías abe que ameite chee ra.

⁸⁻⁹ Sacerdotes que nyuuru uru beite quia querabe mbae raã naa Dios chuchúaa ra. Nyebe que Zacarías abe riqui mbae raã naa Dios chuchúaa emo mose ra. Zacarías que oso ique tuchi Dios chuchua ra. Mbae mo ndei sacua embushimbu. ¹⁰ Zacarías que mbae shimbu sei cote ra. Mbia cuabẽ ngue chi ja taicuee ñee ñee Dios je ra. ¹¹ Angel ibatenda mo ngue tu nyecua Zacarías je cote ra. Chĩ ngue juã mbae shimbu reisa ji ee ra. ¹² Zacarías mae mose ángel rese, siquiche tuchi que ra. ¹³ Angel que ñee Zacarías je cote ra. —¿Mbaerã ereico siquiche re? Dios que ndecheẽ ñandu ra. Elisabet nda tiirĩ ndeje cote. Juan, ere nderiirĩ je nyaacuquia mose. ¹⁴ Ndeyate ra cote. Nderiirĩ nyaacuquia mose ra mbia ia tuchi cote. ¹⁵ Nderiirĩ nda mbae turã saã saã tuchi quia Dios je. Mbaeri rasi mo nda embei eã tuchi. Espíritu Turã nda siqui tuchi erese. Esi rie ye ereco mose bei. ¹⁶ Nderiirĩ nda mbia Israel jenda mbuchebi ja Dios je. Dios ra ùquĩ nderecuarã. ¹⁷ Nderiirĩ nda mbae mbuquiche ja Cristo tu nonde. Sã Dios Elías mbuquirãcuã no, eĩ si ra Dios uquirãcuã mee nderiirĩ je. Nderiirĩ nda mbia mbuturã turã nyiese. Eru mbuturã turã nguiri ndese. Eriirĩ mbuturã turã ngu rese no. Nderiirĩ nda aba cheẽ mumbasa mbaaquiatu quiatu. Aba cheẽ mumbayã sacua cote. Nderiirĩ nda mbia mbuquiche ja Cristo tu nonde, i que ibatenda ñee Zacarías je ra. ¹⁸ Zacarías que ñee ángel je ra. —¿Mañi nda ùqui nde? ¿Ndecheẽ nda ique seje re? ¿Manyae ra eicua re? Ameite se. Seninisi abe arite, i que Zacarías ee ra. ¹⁹ Angel que ñee Zacarías je ra. —Se rei Gabriel. Dios rimba chõ aico co. Dios quia semondo rei nguia ñee turã sacua ndeje. ²⁰ “Nyia” ere eã ñochĩ secheẽ je. Nyebe ra ndeisayã. Ndecheẽ ngüfã nda eno. Nderiirĩ nda nyaacuquia chee. Nderiirĩ nyaacuquia mose ra erecheẽ nyecua cote. Secheẽ nda io ja ndeje cote, i que ángel Zacarías je ra. ²¹ Mbia que chi bei taicuee huee ra. Zacarías raarõ arõ. —¿Mbaerã Zacarías riqui itõ tuchite Dios chuchúaa re? i que mbia ñee jate ra. ²² Zacarías que usẽ nyee ra. Echeẽ ngüfã. O que emumbate mbate chõ nguia mbia je ra. —Zacarías mbae mo tea cuu Dios chuchua reae, i que mbia ñee ñee nyue ra. ²³ Zacarías que umbae tarea saã ja Dios chuchúaa ra. Tenda nongue mose. Emo ngue tu euru cote ra. Zacarías que oso uchuchua cote ra.

²⁴ Aquere qu Eya uchi que cote ra. Eninisi que useã mbei tuchua si cinco meses ra. ²⁵ —Dios seriirina meeñi seje cote. Mbia ra iquia iquia eã seje cote, i que Elisabet ra.

“Dios riirĩ nda nyecua u mbia je”, i que ángel mo nda

²⁶ Nyasi nongue mose que Dios ibatenda mondo mbia mo je ra. Gabriel, i que aque ángel je ra. Aque que emondo sucha Nazaret ra. Galilea, i que aque ibi je ra. ²⁷—Eso rã ñee nyucuaaque María je, i que Dios ángel mondo ra. Emo ngue siquiã tuchi María rese ra. Eruã mbei. José ninisibi rei María. José siquiã ndaque erese. David riirĩ nducucha rei José. ²⁸ Angel que ique María ch María chuchua cote ra. —Acheẽ ngue u ndeje ra. Dios turã tuchi riqui ndeje co. Ndua bei nderese. Dios ia tuchite nderese acuaní mo sí, i que ángel María je ra. ²⁹ María mae mose ibatenda rese que ñee uchiangui re ra. —¿Mbaerã eru quia serea co re? ¿Mbaerã eru quia ñee seje co re? i que María uchiangui re ra. ³⁰ Angel que ñeembe ee ra. —María, siquichechĩ nda sesi re. Dios turã tuchi riqui ndeje co. ³¹ Dios cheẽ turã ngue asenei u ndeje ra. Nanĩmbae ra nde cote. Nderiirina nda eretea cote. Jesús, ere nderiirĩ je. ³² Nderiirĩ quirãcuã tuchi rae. Dios quirãcuã ndiirĩ nda erereco. Mbia rerecua tuchi ra ae. Sã David riqui mbia rerecua nyii no, eĩ nda nderiirĩ mbia rerecua tuchi cote. ³³ Nderiirĩ nda judíos rerecua bei cote. Ua eã mbei rae, i que ángel ñee María je ra.

³⁴ María que ñee ángel je ra. —¿Mañi nda serío re? Seru eãte nyeresẽ, i que María ee ra. ³⁵ Angel que ñee María je ra. —Espíritu Turã ae ra Dios riirĩ mondo nderie ye. Espíritu Turã nda ndereaquiato bei quia. Dios quirãcuã nda siqui bei nderese. Nyebe ra Dios mbaerã tuchi nderiirĩ. Dios rucucha, i ra nderiirĩ je. ³⁶ Ndesi nongue ndiirĩ abe ra tiirĩ cote. Elisabet, i equia ee nae, aque abe ra tiirĩ. Arite raque. Erie cuasu cote. Tiirĩ mbae, i mbia quia ee nyii nae, aque ra tiirĩ cote. ³⁷ Dios quiarei mbae ao ja, i que ángel ñee María je ra. ³⁸ María que ñee ee ra. —Dios rimba chõ aico nguiã co. Sã ndecheẽ ique quia seje, i que María ra. Angel que oso erecha cote ra.

María oso Elisabet ndea

³⁹ María que oso Elisabet ndea cote ra. Ñeenda ishote que ee ra. Sita ibate bate rĩ ngue esi quia ra. Judea, i hue ibi je. ⁴⁰ María que ngasẽ Elisabet ndu chuchúaa ra. Zacarías, i equia eru je. Ique que ñee Elisabet je ra. ⁴¹ Elisabet María cheẽ andu mose, erie yenda que umi nda. Espíritu Turã ngue ique tuchi Elisabet chiangui re cote ra. ⁴² Elisabet que ñee nyecua tuchi María je ra. —Nde rese chõ Dios ia tuchi acuaní mo sí re. Dios ia tuchi nderie yenda rese abe no. ⁴³ ¿Mbaerã Cristo si ru serea se re? Mbia rerecua eã ño se resẽ. ⁴⁴ Se ndecheẽ andu mose que serie yenda ia tuchi umi nda. ⁴⁵ Dios cheẽ ngue ereisi turã nda. Nyebe Dios iate riqui nderese co. Nyebe ra Dios cheẽ ique tuchi ndeje cote, i que Elisabet ñee María je ra. ⁴⁶ María que ñee cote ra.

Acheẽ turã mbei quia Dios riĩ co.

⁴⁷ Seya bei riqui Dios rese co.

Ae que serirõ mbae icuã si ra.

⁴⁸ Dios que nduate quia serese ra.

Seaquiataũ ndaque.

Nyebe ra mbia ia jate serese cote. ⁴⁹ Dios quirãcuã ngue mbae turã saã tuchi seje ra.

Ae miĩ ño eturã tuchi emo si re.

⁵⁰ Ae ndua turã nguia Dios rese nae, ũquĩ ndese chõ Dios ia eã tuchi riqui nguiã.

Eĩ mbei chõ Dios nguiã mbia je co.

⁵¹ Dios quirãcuã ngue mbae saã ja ra.

Ucuasu raã naasa chõ Dios mboseĩ nguiã.

⁵² Siqui mingue je chõ Dios miĩ miĩ nguiã mbia rerecuarã.

Ae ererecua uaqiataũ saã saã nguia nae, ũquĩ ño Dios sirõ nguiã.

Ererecua eã ño ũquĩ cote re.

⁵³ Dios que mbae mee mee nguia mbaecha reã je ra.

Mbaecha quia emboochi nguiã.

⁵⁴ Dios que siqui tuchi judíos rese ra.

Tesareiã mbei esi.

Eyayã mbei erese no. ⁵⁵ Sã Dios ñee Abraham je no, ũquĩ ngue embuchebiã mbei ra.

Ae ucheẽ mondo judíos jaje nae, ùquĩ ngue embuchebiã mbei no nda, i que María ñee turã Dios riĩ nda. ⁵⁶ María que siqui arete Elisabet rese ra. Tres meses. Aquere que eru nyebi uchuchúaa cote ra.

Juan el Bautista nyaacuquia

⁵⁷ Elisabet rasi rasite que cote ra. Nyaa cuquia que cote ra. ⁵⁸ Mbia que nyoi ja Elisabet ndea cote ra. Ejii jenda. Eresenda ja. —Dios turã tuchi riqui ndeje co. Áquẽ mondo ndeje, i ja que ee ra. Eya ja tuchi que erese ra. ⁵⁹ Ocho días mose que circuncisión naa eririĩ je ra. Zacarías, i nda mbia eririĩ je chã nde. Eru rã si. ⁶⁰ Esi quia que ñee nda. —Tei. Juan nande chõ ee, i que esi ra. ⁶¹ Mbia que ñee esi je ra. —¿Mbaerã nda “Juan” ere ndeririĩ je re? Juan mo eã nderesenda mo aa resẽ, i rei que mbia esi je ra. ⁶² Mbia que o mbaaba aba Zacarías je ra. —¿Mañi nda ndeririĩ je re? i ee. ⁶³ Zacarías que ñomee mbia je ra. Nyebe mbia embesa sacua mee nguiã ee. —Juan, i chõ seriiriĩ je, i que Zacarías embesa ra. Mbia que nyuruira ja u mae erese ra. ⁶⁴ Aque ruibe que Zacarías ñee aquiatu cote ra. Ñee turã tuchi que equia Dios riĩ cote ra. ⁶⁵ Zacarías cheẽ andure que mbia nyuruira jate ndua ndua hue jenda ra. Nyebe mbia ñimbiirandu ja nguiã sita ibate bate jenda. Judea, i que hue ibi je ra. ⁶⁶ Ae jirandu quia erese, ùquĩ ngue ndua tuchi quia erese ra. —Mañi nda Zacarías riiriĩ nguia reae. Nandemae nguia erese no, i que mbia quia ndua ndua ra. Dios que siqui tuchi Zacarías ndiriĩ ndese ra.

Zacarías ia tuchi ñee Dios je

⁶⁷ Espíritu Turã ngue siqui tuchi Zacarías rese ra. Nyebe Zacarías Dios cheẽ nenei nguiã.

⁶⁸ Sã mbia ñee turã Dios riĩ judíos rerecua riĩ.

Uturã ngue eteacuquia nande je ra.

Nanderirõ ngue mbae icua si ra.

⁶⁹ Nanderirõ sacua nandeicua si que Dios mondo nande je ra.

David riiriĩ nducucha que nanderirõ sacua nda.

⁷⁰ Sã Dios ñee cose no.

“Mbia rirõ sacua nda ambu íbii”, i cose no.

Ucheẽ nenei neneisa que embuchecua mbia je cote ra.

⁷¹ “Jëucuãyãsa si ra jendirõsa jendeaquiatu bei”, i que Dios nande je ra.

⁷²⁻⁷³ Dios turãte que eriqui nandei ñiinda je ra.

Abraham je abe que eturãte riqui ra.

Ae Dios ñee Abraham je nyii nae, echeẽ ngue io cote ra.

⁷⁴ Dios que ñee Abraham je nanderiĩ nyii ra.

“Taendeaquiatu jëucuãyãsa si, jësiquicheã sacua ico mose serese”, i que Dios nanderiĩ cose ra.

⁷⁵ Nyebe ra nandeico turã mbei Dios je.

Ae ra nandemingo bei icue umbaerã.

⁷⁶ Nde ra Ibatenda cheẽ esenei senei nguia mbia je, Áquẽ.

Dios riiriĩ ndetã nda Dios cheẽ eresenei senei nguia mbia je, Áquẽ.

Mbia icoquiatu sacua Dios riiriĩ je. ⁷⁷ Eĩ mose ra Dios mbia rirõ eicua si.

Eĩ mose ra Dios mbia icua mbutiã esi.

⁷⁸ Dios turãte quia eriqui nguiã nande je.

Eriiriĩ nda tu ibate si mbae mbuchecua nande je.

⁷⁹ Nandeaquiata mbaaquiata sacua ño eru nguiã aque.

Nandemingo sacua nyaashĩ naanguia chõ eru nguiã aque,

i que Zacarías ñee áquẽ je ra. ⁸⁰ Áquẽ ngue tiarõ i i oso quia cote ra. Dios rese que eriqui i i cote ra. Siqui bei que equia turúquiaa ra. Dios cheẽ ngue esenei senei nyee mbia je cote ra.

2

Jesús nyaacuquia

¹ Aque mose que ererecua ñee nda. Augusto, i que ee ra. —Censo nandesaã na mbia ja je, i que ra. Mbia mbae nombre mbesa mbesa ja mose, “censo” i que ũquĩ je ra. ² Censo raã namo mose rei ũquĩ. Cirenio ngue Siria jenda rerecua aque mose ra. ³ —Jenyusua sua jẽso ja pueblo. Nombre mbesa mbesa ja sacua jembae, i que ererecua mbia ja je ra. ⁴ Nyebe José choi nguiã Judea. Belén, i que sucha je ra. Belén ño David chusua re. José i chõ David re. Nyebe José choi nguiã Belén. Umbae ibi recha. Nazaret recha. Galilea abe recha no. ⁵ José que nyoi Belén umbae nombre mii sacua nda. María rese. María que eninisibi ra. María riote que ra. ⁶ Siqui mose Belén ngue ãquẽ ndasi rasite María je ra. ⁷ Aque ramo ngue María nguiĩ mbua ra. Ñuma ngue tiru je ra. Ticuasú quiarusa ye que eno nda. Mbia chuchua quiatu que eitãyãte ee ra.

Oveja raarõsa ngaẽ mae Jesús itãqueĩ ndese

⁸ Hue jii que oveja raarõsa mo nyi isa ra. Ovejas que esaarõ arõ nguia turuquia rĩ nda. ⁹ Angel ibatenda mo ngue tu embua tuchi ra. Dios nininya tuchi que tu overja raarõsa resae ra. Nyebe siquiche tuchi nguiã esi. ¹⁰ Angel que ñee ee ra. —¿Mbaerã jẽsiquichete riqui re? Mbae turã nii ño achu nguiã ñee jẽje co. Ae ra asenei jẽje, mbia mbia sacua tuchi chõ ũquĩ nde. ¹¹ Dios riirĩ ngue nyaacuquia namo Belén nda. Cristo, i equia ee. Mbia rirõsa mbae icua si chõ ae re. ¹² Aque echi ticuasú quiarusa ye aque. Ema ji tiru je. Jemae nda erese huee. Jemae mose sechienei ndese, “Cristo chõ eriqui re”, jenyera cote, i que ángel ñee oveja raarõsa je ra. ¹³ Angeles tubiriãte que nyecua oveja raarõsa je cote ra. Angel ñiinda ndese. Ñee turã ja que Dios rĩ nda. ¹⁴ Sã mbia ñee turã ja Dios ibatenda rĩ. Sã Dios uquiato mbia ja ibi jenda, i que ángeles ñee nyecha ee ra. ¹⁵ Angeles que nyoi ibe ibate cote ra. Oveja raarõsa que ñee ñee nyue cote ra. —Nyaso rã Belén. Ae Dios senei senei nguia nande je nae, nyaso rã mae erese. Ae nyaacuquia namo nae, nyaso rã mae erese, i que oveja raarõsa ñee nyue ra. ¹⁶ Nyoi asi tuchi que mae erese ra. Ngasẽ ngue María je ra. José abe je. ãquẽ abe je. I que ãquẽ u ticuasú quiarusa ye ee ra. ¹⁷ Oveja raarõsa que mbia mbiirandu ja erese ra. Ae ángel senei senei nguia ee María riirĩ nii, ũquĩ ngue oveja raarõsa senei senei tuchi mbia je cote ra. ¹⁸ Eandusa que nyuruiãra ja tuchi eandu ra. ¹⁹ María que ndua ndua tuchi quia ũquĩ ja rese uchiangui re ra. ²⁰ Oveja raarõsa ia tuchi que nyoi nyebi ovejas je ra. Ñee turã turã tuchi que echoi quia Dios rĩ nda. —Angel que ñee nande je, echeẽ ndui si tuchi chõchĩ mbae eĩ ja, i que ñee ñee nyue ra.

Jesús ruruchoi Dios chuchúaa

²¹ Ocho días mose que circuncisión naa ãquẽ je cote ra. Jesús, i que ãquẽ je cote ra. Angel cheẽ ndui si tuchi chõ “Jesús” ichĩ ãquẽ je. Ae ángel ñee María je erio nonde nae, echeẽ ndui si tuchi chõ “Jesús” ichĩ María riirĩ je. ²² Aquere que María ñimbitirõ Moisés cheẽ ndui si cote ra. Aquere que ãquẽ nduruchoi Jerusalén cote ra. ãquẽ mee sacua Dios je. ²³ Embesa ji cheẽ ndui si que ãquẽ mee Dios je ra. —Ae eriirĩ i erãcuẽ nae, ũquĩ jemondo tuchi Dios je, i quiatu ngue embesa ji rese re. ²⁴ Jerusalén José riqui mose que sacrificio mee Dios je ra. Embesa ji cheẽ ndui si. Sã embesa ji riqui ñee no: —Nyurusĩ nyeremo jemee Dios je. ũquĩ eã mose, nyurusĩ ñetẽ jemee ee no ae, i que embesa ji cheẽ nda. ²⁵ Amei mo ngue siqui hue Jerusalén nda. Simeón, i que ee ra. Ae que eturã tuchi ra. Ñee mbei que equia Dios je ra. Ae que Dios riirĩ saarõ arõ tuchi quia ra. Judíos mbui sacua mbae icua si. Espiritu Turã abe que siqui Simeón ndese ra. ²⁶ Espiritu Turã nguia ñee ndei Simeón je nyii. —Eremae nda Dios riirĩ ndese. Ndemano nonde ra eretea. Dios ra embu ibii, i que Espiritu Turã ñee Simeón je nyii ra. ²⁷ Espiritu Turã ngue Simeón querao Dios chuchúaa ra. Embesa ji cheẽ ndui si que José ãquẽ nduruchoi Dios chuchúaa

aque mose si ra. María reses. ²⁸ Simeón ngue ãquẽ sui ra. Eya tuchi que erese ra. —¿Co chõ jê! i que Simeón ñee turã Dios je ra.

²⁹ Dios, ndecheẽ ngue io seje cote ra.

Seyate aico co cote Sererao se cote.

³⁰ Nderiirĩ ndese que amae cote ra.

³¹ Ae erembu mbia rirõ sacua mbae icua si nae, aque rese aico mae co cote.

³² Mbia resae sacua tuchi chõ nderiirĩ ndiqui re.

Judíos eã abe ra etesae tuchi.

Judíos abe je ra eturã tuchi no,

i que Simeón ñee Dios je ra. ³³ Simeón ñee mose María rirĩ ñi, José que nyuruira tuchi echeẽ andu ra. María rese. ³⁴ Simeón ngue ñee turã María je ra. —Nderiirĩ nda judíos tubiriã mingo turã. Ae siqui sereãte quia erese, ãquĩ nguia ra emingo icua. Mbia ra ñee icua icua nguia nderiirĩ turã je. Eicua je rocoĩ. ³⁵ Ae ndua turãte quia nderiirĩ ñi nae, ãquĩ ndua ndua turã nda nyecua mbia je cote. Ae ndua ndua icua nguia, ãquĩ ndua ndua abe ra nyecua mbia je cote no. Mbia icua nda nemundite nderiirĩ ndese, i que Simeón María je ra. ³⁶ Huee que arite mo ndiqui ra. Dios cheẽ nenei neneisa que ae ra. Ana, i equia ee. Fanuel, i que eru eiruã siasa je ra. Aser, i que ei ñiinda je ra. Ana yasu mose que ngurã ndea nyii ra. Siete años que eriqui ngu rese nyii ra. ³⁷ Eru eã ngue cote ra. Eru cheecha que siqui beite ra. Ochenta y cuatro años. Dios chuchúaa que eriqui beite ra. Ñee ñee mbei Dios je. Quiaru rocoi. Isa abe. ³⁸ Ana ngue mae ãquẽ Jesús rese Dios chuchua cote ra. —¿Co chõ jê! i tuchi que Dios je ra. Ñee turã tuchi que ãquẽ ñi mbia jaje cote ra. Ae Dios rirĩ saarõ arõ nguia nae, ãquĩ jaje que Ana ñee turã turã ãquẽ ñi nda.

José nyebi Jesús rerao Nazaret

³⁹ José que mbae saã ja embesa ji cheẽ nguire ra. Aquere que echoi nyebi Galiléaa ra. Nazaret, i equia echuchua je. ⁴⁰ María rirĩ ngue tiarõ cote ra. Ñimbaaquiatu quiatu que equia cote ra. Ñimbirãcuã nacuate que equia cote ra. Dios turã ngue siqui tuchi quia erese ra.

Jesús ñimbaaquiatu quiatu Dios chuchúaa

⁴¹ Aque tenda bei que José riqui nyoĩ choi Jerusalén nda. Fiesta de la pascua mose bei. María rese. ⁴² Jesús tiarõ namo mose, doce años mose que echoi si fiesta de la pascua mose no nda. Jerusalén. ⁴³ Fiesta ua mose que ecuaẽ ndei quia nyebi ra. Jesús que siquichõ Jerusalén nda. Jesús abe oso reĩ nguia usi je. Ngu abe je. ⁴⁴ Jerusalén ño eriquichõ neaẽ. Mbia ataque rese eru reĩ nguia esi je. Mbia que ngaẽ ngaẽ bei quia tenda mumba chee ra. —Ma Jesús ñi, i rei que nguesenda je ra. ⁴⁵ Tea eã mbei que ra. Erea eã mose que eru si chee nyebi Jerusalén nda. María rese. Erequia sacua huee cote. ⁴⁶ Tres días mose que erea huee cote ra. Dios chuchúaa que eriqui ee ra. Ñimbaaquiatu quiatu. Mbia mbaaquiatusa cheẽ andu andu que Jesús riqui ngoi huee ra. —¿Mañi equia re? Tachandu tuchi rã, i i que equia ee ra. ⁴⁷ Jesús cheẽ aracua tuchi que eriqui mbia je ra. Nyebe mbia nyuruira nguia echeẽ aracua andu. ⁴⁸ Eru erea mose huee, ae abe que nyuruira ra. Esi abe nyuruira no. Esi que ñee ee ra. —¿Mbaerã eresoã urerese re, Echo? Ureya eã tuchi que eriqui nderequia asi asi ra, i que María nguiirĩ je ra. ⁴⁹ Jesús que ñee ee ra. —¿Mbaerã serequia mámbii re? Paba chuchua chõ ngue aico resẽ, i que Jesús usi je ra. ⁵⁰ María que Jesús cheẽ icuayãte ra. José abe echeẽ icuayã no. ⁵¹ Jesús que oso uchuchua erese cote ra. Nazaret, i equia sucha je. Usi cheẽ ngue emumbayã mbei quia ra. Ngu cheẽ ngue emumbayã mbei quia no nda. Esi que ndua ndua bei quia ãquĩ Jesús chisaã ndese ra. ⁵² Jesús rete que siri siri oso quia cote ra. Ñimbaaracua racua que equia no nda. Dios iate que eriqui erese ra. Mbia abe iate que eriqui erese no nda.

¹⁻² Aquere que Dios ñee Juan je ra. Zacarías riirĩ je. Tiberio siqui bei mose mbia ja rerecuarã. Quince años ereco mose mbia rerecuarã. Poncio Pilato que Judea jenda rerecua aque mose ra. Herodes que Galilea jenda rerecua ra. Felipe que Herodes nongue ra. Felipe que Iturea jenda rerecua ra. Traconite jenda rerecua abe que Felipe no nda. Lisantias que Abilinia jenda rerecua ra. Anás que sacerdote rerecua ra. Caifás abe que sacerdote rerecua ra. Ûquĩ ererecua sique mose que Dios ñee Juan je turuquia re ra. ³ Nyebe que Juan Dios cheẽ senei senei nguia mbia je ra. Ama Jordán ndurubinda jaje. Eĩ ño ngue Juan nguia ñee mbia je ra. —Jêhui chõ jêicuã si. Dios jêicuã mbutiã sacua. Ûquĩ mose nda bautizar ae jêje chã, i que Juan nguia ñee mbia ja je ra. ⁴ Isaías chimbese io sacua ño ngue Juan Dios cheẽ nenei nenei nguia. Isaías chimbese chõ ã nde:

Emo nda ñeemombo mombo quia mbia je turúquiaa.

“Ñeenda nandererecua mbaerã jembuquiche.

Jéingo quiatu nandererecua tu nonde.

⁵ Ñeenda jembuturã turã nandererecua mbaerã.

Ibi cuaacua jembato mbato.

Ibi ati ati jêsimiambo ambo.

Ñeenda chaa chaa jeñeengo.

Ibi rashĩ ndashĩ jêiti iti.

⁶ ‘Mbia mingo beisa’, i ja ra mbia ñee Dios je cote”, i ra emo nguia turúquiaa, i que Isaías embesa cose ra. ⁷ Mbia que nyoĩ nyoĩ ja quia Juan ndea ra. Juan bautizar i sacua ee. Juan ngue ñee ee ra. —Mbei rá ño jéingo nguia. Mbae icua nda jeĩ jeĩ mbia je, ¿ũquĩ si jenyu quia seje co re? ⁸ Jê mbae icua ndecha mose Dios je, mbae turã jêsaã saã mbei quia ee cote. “Abraham ndiirĩ nducucha chõ nande re. Nyebe ra Dios nandemingo bei” jjenyechĩ nda jê! Dios Abraham ndiirĩ nducucha chao arondete raque sita je. ⁹ Ira rá si chõ mbia re. Sã ira mo ia eã no. Sã ea eã maña ño no. Sã eréi chõ no. Eĩ serĩ serĩ ño Dios mbia je, mbia mbae turã naa eã mose, i que Juan ñee mbia je ra. ¹⁰ —¿Mbae rese ra ureico Dios je re? i que mbia Juan je ra. ¹¹ Juan ngue ñee ee ra. —Ndeirao nyeremo mose, enongue emondo eirao eã je. Ndechĩurã mose, emo emondo mbaecha reã je, i que Juan mbia mbaaquiato quiato ra. ¹² Impuestos isi isiquia mo abe que nyoĩ Juan je ra. Juan bautizar i sacua ee. —¿Mbae rese ra ureico ure re? i que ñee Juan je ra. ¹³ —¿Mbae ra jembatachĩ jê! ¿Cobrar jenyé turã ño jê! Jêicua quiato chõ, i que Juan ee ra. ¹⁴ Soldados mo abe que ñee Juan je ra. —¿Mbae rese ra ureico ure re no? i que soldados ñee Juan je ra. Juan ngue ñee ee ra. —¿Mbia mbae ra jêisi chooñoichĩ jê! “Co que mbae icua saã nda” jjenyé chooñoichĩ nda emo je jê! Jembae ae chõ jendeco, i que Juan ñee soldados je ra. ¹⁵ Mbia que mae quiato quiato quia Juan ndese ra. —Cristo chõ co reae, i raque mae quiato quiato erese. ¹⁶ Juan ngue ñee mbia jaje ra. —I achõ je chõ aico nguia bautizar i mbia je co. Co chi emo ndu quia serui co. Ae quia equirãcuã tuchi sesi re. Ae quia eturã tuchi sesi re. Ae quia ra bautizar i mbia je Espiritu Turã je. Mbia chiã mbitirõ sacua. Sã tata riqui mbae mbitirõ no. ¹⁷ Ae ra mbia umbae miĩ icúe. Etureã achõ ño embae re. Ae embae eã nae, ùquĩ nda esei cote. Ûquĩ ndeisa ra ua eã mbei tata. Sã mbia quiata a chiqui chiqui no. Sã ea miĩ icúe no. Sã echuruique mombo tátaa no, i que Juan ñee mbia je ra. ¹⁸ Eĩ ngue Juan nguia Dios cheẽ turã nenei nenei mbia je ra. Mbia mbaaquiato tuchi. ¹⁹ Ererecua Herodes je que Juan ñee nyee ra. Felipe ninisi rese siqui mose. —¿Mbaerã ereico ndenongue ninisi rese re? i que Juan ererecua je ra. —Mbae icua eresaã saã ja techĩ nguia re, i tuchi que Juan ee ra. ²⁰ Ererecua que Juan ñee mumba bei chõ nda. Ererecua que Juan tarõ nyee cárcel nda.

Juan bautizar i Jesús je

²¹ Juan bautizar i mose mbia jaje, Jesús je abe que bautizar i ra. Jesús que ñee ñee nguia ngu je ra. Ibei que obo ee ra. ²² Espiritu Turã ngue nguichi Jesús rese ra. Nyurusĩ rá ño

nguichi checua erese. Ibatenda que ñee ee ra. —Seriirĩ ño nde re. Sechesequa chõ nde re. Seyate nderese, i que Ibatenda Jesús je ra.

Mbia ñiinda Jesús i

²³ Jesús treinta años mose que mbia mbaaquiatu quiatu ramo nda. —José riirĩ, i ja que mbia Jesús je ra. Elí riirĩ nguia José re. ²⁴ Elí rei Matat ndiirĩ. Matat ndei Leví riirĩ. Leví rei Melqui riirĩ. Melqui rei Jana ndiirĩ. Jana ndei José riirĩ. ²⁵ José rei Matatías riirĩ. Matatías rei Amós ndiirĩ. Amós ndei Nahum ndiirĩ. Nahum ndei Esli riirĩ. Esli rei Nagai riirĩ. ²⁶ Nagai rei Maat ndiirĩ. Maat ndei Matatías riirĩ. Matatías rei Semei ndiirĩ. Semei ndei José riirĩ. José rei Judá riirĩ. ²⁷ Judá rei Joana ndiirĩ. Joana ndei Resa riirĩ. Resa rei Zorobabel riirĩ. Zorobabel rei Salatiel riirĩ. Salatiel rei Neri riirĩ. ²⁸ Neri rei Melqui riirĩ. Melqui rei Adi riirĩ. Adi rei Cosam ndiirĩ. Cosam ndei Elmodam ndiirĩ. Elmodam ndei Er riirĩ. ²⁹ Er rei Josué riirĩ. Josué rei Eliezer riirĩ. Eliezer rei Jorim ndiirĩ. Jorim ndei Matat riirĩ. ³⁰ Matat rei Leví riirĩ. Leví rei Simeón ndiirĩ. Simeón ndei Judá riirĩ. Judá rei José riirĩ. José rei Jonán ndiirĩ. Jonán ndei Eliaquim ndiirĩ. ³¹ Eliaquim ndei Melea riirĩ. Melea rei Mainán ndiirĩ. Mainán ndei Matata riirĩ. Matata rei Natán ndiirĩ. ³² Natán ndei David riirĩ. David rei Isaí riirĩ. Isaí rei Obed riirĩ. Obed rei Booz riirĩ. Booz rei Salmón ndiirĩ. Salmón ndei Naasón ndiirĩ. ³³ Naasón ndei Aminadab riirĩ. Aminadab rei Aram ndiirĩ. Aram ndei Esrom ndiirĩ. Esrom ndei Fares riirĩ. Fares rei Judá riirĩ. ³⁴ Judá rei Jacob riirĩ. Jacob rei Isaac riirĩ. Isaac rei Abraham ndiirĩ. Abraham ndei Taré riirĩ. Taré rei Nacor riirĩ. ³⁵ Nacor rei Serug riirĩ. Serug rei Ragau riirĩ. Ragau rei Peleg riirĩ. Peleg rei Heber riirĩ. Heber rei Sala riirĩ. ³⁶ Sala rei Cainán ndiirĩ. Cainán ndei Arfaxad riirĩ. Arfaxad rei Sem ndiirĩ. Sem ndei Noé riirĩ. Noé rei Lamec ndiirĩ. ³⁷ Lamec ndei Matusalén ndiirĩ. Matusalén ndei Enoc ndiirĩ. Enoc ndei Jared riirĩ. Jared rei Mahalaleel riirĩ. Mahalaleel rei Cainán ndiirĩ. ³⁸ Cainán ndei Enós ndiirĩ. Enós ndei Set riirĩ. Set rei Adán ndiirĩ. Adán ndei Dios riirĩ.

4

Satanás tã i Jesús je

¹ Jesús que nyebi Ama Jordán si ra. Espíritu Turã ngue siqui tuchi quia erese ra. Turúquiaa que Espíritu Turã Jesús rerao ra. ² Huee que eriqui arete ra. Cuarenta días. Mbae mo ngue eu eã mbei aque mose ra. Eriãcuâte que cote ra. —Tã tae rã Jesús je. Ma Jesús mbae icuã naa, i rei que diablo Jesús riĩ nda. ³ —Nde Dios riirĩ mose, mbichae esaã co sita je no, i rei que diablo Jesús je ra. ⁴ Jesús que ñee ee ra. —Tei. Eĩ ngue embesa ji ñee nda: “Mbia chiu achõ nda mbia mingo eã. Dios cheẽ nguia ra mbia mingo nguã”, i que embesa ji ra, i que Jesús diablo je ra. ⁵ Aquere que diablo Jesús rerao ibi ibate mo nda. Ibate tuchi. Diablo que ibi teacuquia ja Jesús je ra. Ishonda abe reacuquia ja ee. Aque mose bei que ereacuquia ja ee ra. ⁶⁻⁷ Diablo que ñee Jesús je ra. —Sembae ja chõ ibi re. Se emondose mose emo je, amondo ra ee. Tamondo tuchi ndeje. Mbia ja rerecuarã nda aremĩ. Ndeico mose serese, tamondo ja ndeje. Serimbarã mose nde, tamondo ja ndeje no, i rei que diablo ñee Jesús je ra. ⁸ Jesús que ñee diablo je ra. —Quiatúae sesi ae, Satanás. ¿Mañi nda nderimba se re? “Dios ae rese chõ jẽingo”, i que embesa ji ñee ndesẽ, i que Jesús diablo je ra. ⁹ Aquere que diablo Jesús rerao Jerusalén nda. Querao que suruchui ibate Dios chuchua arõ nda. Ibate tuchi echuchua. —Nde Dios riirĩ mose, eo oso íbii. Dios ra ndereaquiatu. Eremanoã nda oso ngoi. ¹⁰ Sã embesa ji riqui ñee no:

Dios ra ángeles mondo ndereaquiatu sacuã.

¹¹ Oje ra ndeisi.

Nembuquichi mingue rae.

Sita ra cua iã ndei je,

i que embesa ji ra, i rei que diablo Jesús je ra. ¹² Jesús que ñee diablo je ra. —Sã embesa ji ñee no: “ ‘Ma Dios sereaquiatu. Tã tae ee no’, jenyechĩ nda Dios je”, i ñi Dios cheẽ nde, i que Jesús ñee diablo je ra. ¹³ Diablo Jesús mbĩcuã aronea mose, secha chee que oso ra. —Emo mose jiri ra tã aebe ndeje jẽ, i rei que uchiangui re ra.

Jesús mbia mbaaquiату quiatu ramo

¹⁴ Jesús que oso nyebi Galiléaa cote ra. Espíritu Turã quirãcuã ngue siqui tuchi quia erese ra. Mbia hue jenda ja que jirandu ja tuchi quia erese ra. ¹⁵ Judíos chumunuásaa que Jesús riqui mbia mbaaquiату quiatu ra. Mbia que ñee turã ja quia erĩ nda.

Nazaret jenda Jesús isiteã

¹⁶ Jesús que ngasẽ Nazaret cote ra. Hue rei etiarõsa hue. Sábado mose que esi judíos chumunuásaa ra. Sábado mose bei que eriqui oso oso huee ra. Juã ngue embesa ji renei nonde mbia je ra. ¹⁷ Mbia que Isaías chimbesa mondo Jesús oo ra. Isaías chimbesa que eequia cote ra. ã embesa ji que esaã saã mbia je ra:

¹⁸ Espíritu Turã ndiqui tuchi serese co.

Dios que sererecúe ra.

Echeẽ turã nenei nenei sacua mbaecha reã je.

Etarõi mbusẽ sacua ño ngue Dios sererecúe ra.

Eresayã ndesa ira sacua ño ngue sererecúe no nda.

Ae je ererecua icuãte riqui nae, ùquĩ mbusẽ sacua ño ngue Dios sererecúe nguiã no.

¹⁹ Mbia je ñee ñee sacua ngue Dios sererecúe no nda.

“Namo ño Dios turã ndiqui nguiã”, i sacua mbia je,

i que Jesús embesa ji mbuchecua mbia je ra. ²⁰ Jesús que embesa ji mumbi cote ra. Mondo que emo oo cote ra. Ngoi que cote ra. Mbia que mae mbei quia erese ra. ²¹ Jesús que ñee mbia je ra. —Embesa ji que ambuchecua jẽje namo, aque io quia jẽje a cote, i que Jesús mbia je ra. ²² Mbia que ñee turã ja quia Jesús rĩ nda. —Jesús cheẽ turã tuchi quia eriqui re, i ja tuchi que mbia nyuruira ra. —¿José riirĩ ño co re? i que mbia quia ee ra. ²³ Jesús que ñee mbia je ra. —“Mbia mae sayã ngue eresaã saã Capernaum nae, ùquĩ mo esaã aa ndechuchúaa no”, jenyẽ arõte seje sechuchúaa. ²⁴ Tacheẽ nyecua rã jẽje. Dios cheẽ mbuchecuasa ishonda cheẽ nguia ra mbia isi turã mbei quia. Nguécua jenda cheẽ nguia ra eisi turã eã. ²⁵ Tacheẽ nyecua rã jẽje. Elías reco mose íbii, ama ngue nyaaquíã mbei ra. Tres años ndobei. Mbia riãcuã ja que aque mose ra. Eru cheecha tubiriãte que chi rei hue Israel jenda ra. ²⁶ “Ùquĩ eru cheecha mo je mbae echao turã”, i ãte que Dios quia Elías je ra. “Sarepta jenda je quia mbae echao eru cheecha je”, i quiatu que Dios ee ra. Judío eã je quiatu que Dios Elías mondo ra. ²⁷ Eliseo reco mose íbii, leprosos tubiriãte que chi rei hue Israel jenda ra. Eliseo que hue jenda mo mbucheroã no nda. Ishonda mo nguiatu que embucherõ Siria jenda ra. Naamán, i que ee ra, i que Jesús ñee mbia je ra. ²⁸ Judíos chumunuasa que Jesús riqui ñee mbia je ra. Mbia Jesús cheẽ andu mose que paama i ee ra. ²⁹ Mbia paama i je que Jesús mombo sucha tubiriã si ra. Sita ibate que sucha tubiriãte ra. Sita rimia mbucu que mbia Jesús rerao rei ra. Hue si nda emombo nguiã ña. ³⁰ Jesús que oso chee mbia tubiriã ite re si ra.

Jesús aba checuayã icuã jea amei mo si

³¹ Jesús que oso Capernaum cote ra. Sucha tubiriã mo. Galilea jenda. Sábado mose que mbia mbaaquiату quiatu ra. ³² Ererecua rã ño ngue Jesús riqui mbia mbaaquiату quiatu ra. Nyebe mbia riqui nguiã nyuruira tuchi echeẽ andu. ³³ Huee que amei mo ndiqui mbia chumunuásaa ra. Aba checuayã icuã nyireco rei ae. Aque que ñee asite Jesús je ra. ³⁴ —¿Mbaerã erechu quia urerea co re, Jesús? Quiatúae urerecha ae. ¿Urerĩcharã ño erechu quia co re? Dios rucucha chõ nde re. Areicuate se, i rei que aba checuayã icuã Jesús je ra. ³⁵ Jesús que ñee ee ra. —Equiriri chõ jẽ. Esẽ oso amei ñiangui si, i que Jesús ee ra. Jesús cheẽ mose que aba checuayã amei mombo íbii ra. Mbia tubiriãsa. Usẽ ngue u amei mbasiã cote ra. ³⁶ Mbia tuririã ngue nyuruira ja u erea ra. —Jesús quirãcuã ae ñee nguiã. Mbia rerecua rã ño eriqui nguiã ñee aba checuayã icuã je. ¿Sã aba checuayã echeẽ mumbayã jẽ! i tuchi que mbia nyuruira erea ra. ³⁷ Mbia que ñimbiirandu randu ja Jesús rese ra. Erurubinda jenda abe jirandu ja erese.

Jesús Simón ninisi si mbucherõ

³⁸ Jesús que usẽ mbia chumunuasa si cote ra. Oso que ique Simón nyuchua cote ra. I que Simón nyari rasi u ee ra. Eracu tuchi que ee ra. —Embucherõ na, i tuchi que mbia Jesús je ra. ³⁹ Jesús que oso nyibi earõ nda. Ñee ngue eracu je ra. —Etiba, i que ee ra. Eracu que hui esi Jesús cheẽ nguire ra. Ari que juã cote ra. Mbae que echao chao mbia chiurã cote ra.

Jesús mbia rasi chumumbara mbucherõ

⁴⁰ Tenda ireĩ mose que mbia nguesenda rasi rurucuaẽ cuaẽ ja Jesús je ra. Erasi chumumbara tuchi que ra. Jesús que o chono ñono ja erasi arõ embucherõ cherõ ja ra. ⁴¹ Aba checuayã icuã ngue usẽ usẽ nguia mbia si Jesús cheẽ mose cote ra. —Nde rei Cristo Dios riirĩ, i que usẽ usẽ mbia si ra. —¡Jẽñee eã ño jẽ! i tuchi que Jesús quia aba checuayã icuã je ra. Ûquĩ ngue Cristo icua chõ nda.

Jesús mbia Galilea jenda mbuchesea sea

⁴² Nyaashĩ namo mose que Jesús si turuquia a. ra. —Se ae taico mbirĩ na, i rei que ra. Mbia que nyoi erui erea chee ra. —¡Eresochĩ nda urerecha jẽ! Ure rese bei chõ eico, i rei que mbia ñee Jesús je ra. ⁴³ Jesús que ñee ee ra. —Dios cheẽ tasenei senei pe quitinda je abe. Nyebe sembu nguia, i que Jesús ra. ⁴⁴ Jesús que mbia mbuchesea sea quia Galilea jenda ra. Dios cheẽ nenei nenei judíos chumunuásaa.

5

Jesús sira tubiriã mbua uquia mbia je

¹ Emo mose que Jesús riqui ama ndisha rimia ndese ra. Genesaret, i que ama ndisha aque je ra. Mbia cuabẽ ngue ngaẽ ee huee ra. Dios cheẽ anduse rete que ra. Nyebe mbia tubiriã Jesús mumbi i i tuchi nguia. ² Canoa nyeremo abe que chi hue erimia ndese ra. Eoreã ja que ra. Echa que chi sira mbuasa irei irei ra. ³ Jesús que ua canoa nongue ye ra. Simón mbae que aque canoa nda. —Ama nimia ndecha jiri sererao mingo, i que Jesús Simón je ra. Canoa ye que Jesús ñi erimia ndesenda mbaaquiату quiatu ra. ⁴ Mbia mbaaquiату jare que ñee Simón je ra. —Eriquiraa rĩ canoa jendao. Huee tarafa jemondo ii. Sira mbuasa jemondo ii, i que Jesús ee ra. ⁵ Simón ngue ñee ee ra. —Nyaashĩ nyee que ureico rei embuasa rerequia isa ra. Emo ngue uresiroã mbei ra, Sererecua. Ma ndecheende tasaambe no, i que Simón Jesús je ra. ⁶ Mbia que tarafa mondo ii cote ra. Sira tubiriã mbua nonde. Tarafa soro serĩ sira usi je. ⁷ Nyueru eru que canoa nongue yenda je ra. —Sira usite ure je. Jenyu rã. Nandembua ja rã canoa ye, i que canoa nongue yenda je ñee nda. Canoa nyeremo puk i ja sira je. Aete ñiimi sira usi je. ⁸ Sira tubiriãchĩ sira eande nyii. Nyebe Simón Pedro nyuruira tuchi nguia mae Jesús chimondo rese. Ngoi que ngũia ndese ñee ee ra. —Seicuãte aico co, Sererecua. Serecha rei se ae, i rei que Simón Pedro ñee Jesús je ra. ⁹ Echiã nguia cuaãcuã i tare nguia. Eresenda abe chiã cuaãcuã i ja. Sira tubiriã ndea. Sira mbua eande nyii. ¹⁰ Zebedeo riirĩ abe que chi ja Simón ndese huee ra. Jacobo, i que enongue je ra. Juan, i que enongue je no nda. Ûquĩ chiã abe que cuaãcuã i ra. Jesús que ñee Simón je ra. —¡Eresiquichechĩ nda jẽ! Sira rese ra ereicoã cote. Mbia ra ereru reru bei quia seje cote, i que Jesús ee ra. ¹¹ Canoa yenda ngasẽ mose ama nimiaa, umbae que esecha ja nyoi bei nonde Jesús rese cote ra.

Jesús mbia leproso mbucherõ

¹² Jesús que siqui tuchia mo nda. Hee que emo ndasi riqui ee ra. Leproso. Jesús rese mae mose que ngoi ngũia ndese ee ra. Nyibi que ñee Jesús je ra. —Sererecua, nde sembucherõse mose, sembucherõ se, i que leproso ñee Jesús je ra. ¹³ Jesús que oco erese ra. —Echerõ cote, i que ee ra. Echeẽ mosebe que nyerõ nda. ¹⁴ Jesús que ñee ee ra. —¡Erecheẽchĩ nda mbia mo je jẽ! Eso nderasiã ndeacuquia sacerdote je cote. Moisés cheẽ ndui si mbae mo emondo Dios je. Eĩ nda mbia jirandu nderasiã ndese cote, i que Jesús ñee ee ra. ¹⁵ Mbia que ñimbiirandu i i tuchi quia Jesús rese ra. Ngaẽ ngaẽ ja que equia

echeẽ andu ra. Umbucherõ cherõ sacuaã abe que eriqui ngaẽ ngaẽ erea ra. ¹⁶ Jesús que oso oso quia mbia tiámbaa ra. Ñee ñee Dios je.

Jesús emi sayã mo mbucherõ

¹⁷ Emo mose que Jesús riqui mbia mbaaquiato quiato ra. Huee que fariseos mo nyi echeẽ andu andu ra. Embesasa abe que chi ra. Galilea jenda chõ ùquĩ nde. Judea jenda abe no. Jerusalén jenda abe no. Huee que echi ja Jesús cheẽ andu ra. Dios quirãcuã ngue siqui tuchi Jesús rese ra. Erasi mbucherõ cherõ sacuaã. ¹⁸ Mbia que erasi mo curucuaẽ quisa ye ra. Emi sayã ngue ae ra. —Nandemingue serao Jesús je, i rei que ra. ¹⁹ Tuchua mbaranguiatuãte que ee ra. Mbia tubiriã ngue tuchia mbiitãya ee ra. Nyebe erasi ruruchoi nguiã sui tuchia arõ. Tei que endoro ra. Erasi que embuquichi imbu quisa ye Jesús rimbe ra. Mbia ite rĩ. ²⁰ —Ererucuaẽsa riqui seicua ùquĩ, i que Jesús ñee uchiangui re ra. Nyebe ñee nguiã emi sayã je. —Ndechisaã mbae icuaã ambutiã nguiã ndesi co, i que Jesús ee ra. ²¹ Fariseos que ñee ñee nyue ra. Embesasa rese. —Jesús ñee icuaã ñochĩ nguiã Dios rĩ co. Dios ibatenda ae mbia chiao icuaã mbutiã nguiã esi. Jesús aquiatuã ño ñene, i rei que eu ñee ñee nda. ²² Jesús que ùquĩ ndua icuaã icuate ra. Nyebe ñee nguiã ee cote. —¿Mbaerã jẽingo ndua icuaã nde? ²³ ¿Ma mbaranguiatuã eã jiri jẽje re? ¿Mbia icuaã mbutiã ere? ¿Mbia rasi mbucherõ ere no? ¿Ma mbaranguiatuã eã jiri ùquĩ jẽje re? ²⁴ Dios riirĩ ndei se. Mbia chiao icuaã mbutiã aquiato chõ se re. Sequirãcuã tateacuquia jẽje, i que Jesús ñee ee ra. Ñee ngue erasi je cote ra. —Ehuã na. Ndechuchua eso cote. Ndequisa abe erao, i que Jesús emi sayã je ra. ²⁵ Jesús cheẽ ndurucha reã ngue emi sayã juã nda. Mbia que mae ja tuchi u erese ra. Uquisa abe que equerao ra. Eya tuchi que oso uchuchúaa ra. Ñee ñee turã ngue equia Dios rĩ nda. ²⁶ Mbia que nyuruira ja u mae emi sayã ngata rese ra. —Emi sayãte rei nyii. Ngata chõchĩ cote, i ja que mbia u mae nguiatu erese ra. Mbia ñee turã ja Dios rĩ cote.

Serui bei eico, i Jesús Leví je

²⁷ Leví, i que emo je ra. Ae que impuestos isi isi bei quia ererecua mbaerã nda. Jesús que ngasẽ ee emo mose ra. Huee que eñi ngoi plata isi isi ra. —Serui bei eico, i que Jesús ñee ee ra. ²⁸ Ae Leví juã oso nguiã Jesús rui. Mbae recha ja umbae. ²⁹ Leví que fiesta saã tuchi Jesús je ra. Embuquiaru turã sacuaã uchuchua. Impuestos isi isiquia ata que chi quiaru erese huee ra. Mbiamo abe que chi no nda. ³⁰ Fariseos que ñee icuaãte Jesús chimbaaquiato je ra. Embesasa rese ñee icuaã ee. —¿Mbaerã jẽingo quiaru impuestos isi isiquia rese re? Mbia icuaã ndese abe jẽingochĩ nguiã quiaru, i que ñee nda. ³¹ Jesús que ñee ee ra. —Sã mbia rasiã ndiqui aba mbucherõsa requia eãte no. Sã erasi chõ ndiqui erequia no. ³² “Jenyu seje”, aeã ngue u nguiã mbia turã je. Mbia icuaã je chõ ngue achu nguiã “jenyu seje” i. “Jẽicuaã si jẽhui”, ae chõ ngue u nguiã eicuaã je, i que Jesús ee ra.

Jesús chimbaaquiato hui ãte uchiu si

³³ Mbia que ñee Jesús je ra. —Juanñimbaaquiato hui hui uchiu si. Ñee nonde Dios je. Fariseos chimbaaquiato abe hui hui uchiu si no. ¿Mbaerã ndechimbaaquiato riqui hui ãte uchiu si re? i que mbia Jesús je ra. ³⁴ Jesús que ñee ee ra. —Sã emo ngũinisirã isi ramo mose no. Sã eresenda iate riqui quiaru erese no. Sã hui aroneate uchiu si aque mose no. ³⁵ Sã eru riqui mano emo mose no. Aque mose quia ra equiato hui uchiu si cote, i que Jesús ñee ee ra. ³⁶ Jesús que ejemplo saã mbia je ra. —Sã emo ndiqui tiru yasu mii aroneate tiru ima sorei rese no. Ùquĩ mose eicuaãte cote. Eyasu ra quiata chõ esi. ³⁷ Sã emo eri rasi ramo nderecoquiato eã eriru ima ye no. Mbae ire ima ye erecoquiato aronea. Eri rasi ra ñimatã ño mbae ire ndoro. Eri ra uchẽ ja. Mbae ire abe mbiicuaãte ra cote. ³⁸ Eri yasu quia nda equerecoquiato nguiã mbae ire yasu ye. Soroã sacuaã. ³⁹ Emo eri ima mbei mose, eyasu ra embei sereã cote. “Eima ño eturã nde”, i chõ nguiã cote. Nyebe mbia riqui nguiã secheẽ yasu isi sereãte, i que Jesús ñee mbia je ra.

6

Jesús chimbaaquiatu mbae a ishao shao sábadu mose

¹ Sábado mo mose que Jesús si quia mbiaco ite rĩ nda. Uchimbaaquiatu rese. Echimbaaquiatu que quiata a ucua mĩ mĩ nyoĩ quia ecuã mose ra. Equiti quitire oo je que echoĩ quia eachãaña cote ra. ² Fariseos mo ngue ñee ee ra. —¿Mbaerã jéingo mbae ishao shao sábadu mose re? Co mose chõ mbia uquenea ucua resẽ, i que fariseos ee ra. ³ Jesús que ñee ee ra. —¿Embasa ji rese jemae eã David rĩĩ nde? David riãcuãe que aque mose ra. Eresenda abe riãcuã ngue aque mose ra. ⁴ David que ique Dios chuchúaa ra. Mbichae Dios chuchua jenda que eu ra. Mee mee ngue nguesenda je ra. Eriãcuãte quia ñene. Sacerdote achõ mbaerã ndaque mbichae. ⁵ Sábado rerecua bei chõ se re, i que Jesús ñee fariseos je ra.

Jesús eo tomei mo mbucherõ

⁶ Sábado nongue mose que Jesús si judíos chumunuasa ra. Mbía que embaaquiatu quiatu huee ra. Huee que eo tomei mo ndiqui ee ra. Equiatao cutinda tomei ngue ra. ⁷ Fariseos que mae nguiatu quia Jesús rese ra. Embesasa abe que mae nguiatu quia erese ra. —Mañi nda Jesús quia eo tomei je reae. Co sábadu mose reae. Sã embucherõ jẽ. Nandechẽ icuã nda ee chã jẽ, i que eu mae nguiatu Jesús rese ra. ⁸ Ñquĩ ndua icuã ngue Jesús icua ra. Ñee ngue eo tomei je cote ra. —Ehuã na u mbia ite rĩ, i que Jesús ee ra. Eo tomei ngue juã uã cote ra. ⁹ Jesús que ñee mbia je ra. —¿Mbae eturãte jẽje co tenda mose re? Sábado mose bei. ¿Coche mbae turã naa naa sábadu mose re? ¿Coche mbae icuã naa naa co mose re no? ¿Coche mbia mbucherõ co mose re no? ¿Coche mbia iquia co mose re no? i que Jesús ñee mbia ja je ra. ¹⁰ Jesús que mae mbia ja rese cote ra. —Echomee secuti, i que eo tomei je cote ra. Eo tomei ngue ñomee Jesús cheẽ mose ra. Aque mosechi que eo nyerõ cote ra. ¹¹ Nyebe fariseos paama i tuchi nguiã Jesús je. Sábado mose mbia mbucherõ mose. —¿Mañi nande ra Jesús je re? Nandẽiquia chõ nda reae, i tuchi que eu ñee nyue ra.

Jesús mbia doce irabo uchimbaaquiatu rã

¹² Jesús que oso mbia tiãmbaa ra. Sita ibátee. Huee que eñi ñee mbei Dios je nyaashĩ nyee ra. ¹³ Nyaashĩ mose que uchimbaaquiatu munua ja cote ra. Ñquĩ doce mo ngue eirabo ra. —Sechimondo sacua jẽ. Jaemondo ra secheẽ nenei nenei sacua mbia je, i que ñquĩ doce je ra. ¹⁴ Ñ mbia que eirabo ra:

Simón (Pedro, i abe que ee ra.)

Andrés (Simón nongue rei ae.)

Jacobo

Juan

Felipe

Bartolomé

¹⁵ Mateo

Tomás

Jacobo (Alfeo ririĩ ndei ae.)

Simón el Cananista

¹⁶ Judas (Jacobo nongue rei ae.)

Judas Iscariote (Aque que Jesús mondo mbia icuã je ra.)

Ñquĩ ja que Jesús irabo ra.

Jesús mbia tubiriã mbaaquiatu

¹⁷ Jesús que nguichi u sita si cote ra. Uchimbaaquiatu rese. Ibi túraã ngue ecuaẽ ngasẽ cote ra. Mbía tubiriãte abe que chi huee ra. Judea jenda. Jerusalén jenda abe no. Tiro jenda abe no. Sidón jenda abe no. Ama nimia jenda rei ñquĩ. Ñquĩ ngue ngaẽ nyiisaquia Jesús cheẽ ndese ra. Jesús embucherõ abe sacua ngue ecuaẽ nda. ¹⁸ Ae rese

aba checuayã icuã ndiqui nae, ùquĩ abe que Jesús mbucherõ nda. ¹⁹ Jesús quirãcuã ngue mbia mbucherõ ja quia ra. Nyebe mbia riqui nguiã ocase ja Jesús rese.

Ae eyate riqui

²⁰ Jesús que mae uchimbaaquiatu rese ñee nonde ee ra. —Jeyate riqui ã. Jẽ mbaecha reã ndaque. Dios quiatu ra jenderecuarã tuchi cote. ²¹ Jẽyate riqui ã. Jeniãcuã ndaque. Jendio rete ra cote. Jẽyate riqui ã. Jenyeseo seo raque. Jẽiquia iquia ra emo mose cote.

²² Mbia jemo ucuãyã mose, jemo mombo mose, ñee icuã mose jẽje serĩ, jẽyate jẽingo ùquĩ. ²³ Jeñimbia tuchi chõ aque mose. Mbia icuã mose jẽje. Dios quia ra mbae turã mondo jẽje ibate. Mbia icuande jẽje nyii. Eĩ si que mbia icuã nguia Dios rimba ñiinda je no nda.

Ae aba mbia eãte quia

²⁴ Aba mbia eã tuchichĩ jẽ, Mbaecha. Mbae icuã nda tu jẽje. Jẽyare nyii. ²⁵ Aba mbia eã tuchichĩ jẽ, quiaru tuchi je. Jeniãcuã tuchi ra cote. Aba mbia eã tuchichĩ jẽ, iquia iquia je. Jenyeseo ra cote. ²⁶ Aba mbia eã tuchichĩ jẽ mbia ñee turã mbei mose jeni. Eĩ si rei que equia ñee turã turã dios abareã nimba je cose ra.

Jẽingo turã ño nguia jẽucuãyãsa je

²⁷ Aico ñee jẽje a. Ae eicuãte riqui jẽje, ùquĩ ndese jenyeseo chõ. Jẽingo turã ño nguia jẽucuãyãsa je. ²⁸ Emo ñee icuã mose jeje, jeñee turã ño ee. Jeñee turã ño Dios je eri. ²⁹ Emo ucua mose jenditii rese, “tasaã se abe”, jenyechĩ ndae. Jenditii ribisho abe jẽteacuquia ee. Emo jẽirao rirõ mose jẽsi, jẽirao nongue abe rese jengueteã eã ño ee.

³⁰ Emo ache ache i mose jẽje, jemondo chõ ee. Emo jembae reraochõ mose, “emondobe seje”, jenyechĩ nda ee. ³¹ Sã jẽyate riqui mbia siqui turã mose jẽje no. Eĩ jenyete si chõ nguia siqui turã mbia je no.

³² Ae eicuãte riqui jẽje nae, ùquĩ ndese jenyeseo chõ. Ae nyeseo quia jendese nae, ùquĩ mii ndese jenyeseo mose, eicuãte ùquĩ. Mbia ja rese quiatu jenyeseo.

³³ Jẽingo turã nguia quia mbia ja rese. Ae eturã ndiqui jẽje, ùquĩ mii ndese jẽingo turã mose, eicuãte ùquĩ. Jesús quiatoã abe chee siqui turã uquiato je. ³⁴ Emo prestar i mose jembae je, jemondo chõ ee. Ae mbae mondo aroneate eribishorõ nae, jemondo bei chõ ee. “Cobrar tae ee”, jenyechĩ ndae. Jesús quiatoã abe chee mbae mondo eribishorõsa je. “Mbae mo nda emondobe seje”, i. ³⁵ Eĩ jenyechĩ nda jẽ abe. “Mbae mo nda emondobe seje chã” jenyechĩ nda jẽ abe jẽ! Jemondochõ ño ee. Ae eicuãte riqui jẽje, ùquĩ ndese jenyeseo chõ. Ùquĩ mose ra Dios mbae mee tuchi jẽje. Dios rã tuchi ra jẽ cote. Dios ia eãte quia eriqui nguiã eicuã ndese. Dios turãte quia eicuã je re. Eicuã ñee turã eã ndaque ee. ³⁶ Jẽyayã ño mbia rese. Sã Dios abe eya eãte nanderese no.

“Eicuãte que co ra”, jenyechĩ nda emo niii

³⁷ “Co que eicuãte ra”, jenyechĩ nda emo niii. “Jẽicuãte”, iã nda Dios jẽje chã. ¡Condenar jenyechĩ nda emo je jẽ! Dios nda condenar iã jẽje chã. Emo icuã mose jẽje, jẽtesarei chõ eicuã si. Dios nda tesarei jẽicuã si no ña. ³⁸ Mbae jeme mee ño mbia je. Dios quia ra mbae mee tuchi jẽje cote. Mee turã nda jẽje. Eñetẽ nda emee eã jẽje. Embisẽ ño nda emee jẽje. Jẽ embisẽ mee mose emo je, Dios ra embisẽ mee jẽje no, i que Jesús mbia mbaaquiatu quiatu ra. ³⁹ Jesús que ejemplo saã mbia je ra. —Sã eresayã ja nyiruchoi aronea no. Ngoi ja chõ nda echoi ibicua rie. ⁴⁰ Embaaquiatusa quiarei earacua tuchi uchimbaaquiatu si. Embaaquiatu ja ji mose, earacua tuchi cote. Umbaaquiatu rã si cote. ⁴¹ ¿Mbaerã nda “eicuã” jenyete emo je re? Jẽ jẽicuã tuchi mose esi. “Mbae ñetẽ ndiqui nderesaa aque”, jenyechĩ nda emo je. Mbae cuasu siqui mose jendésaa jẽ quiatu. ⁴² “Mbae turã ndese chõ jẽingo”, jenyechĩ nda jẽingo icuã mose jẽ. Jẽturã nda jẽsaã ñooñochoĩ jẽ. “Mbae ñetẽ tasirõ nderesa si”, jenyechĩ nda mbae cuasu siqui mose jendésaa jẽ. Jẽ nane nguia jẽturã ndiqui. Aquere quiatu jeñee emo mingo turã cote.

Sã ira ae ia ae ae no

⁴³ Ira turã mose, ea abe turã ndae. Ira icuã mose, ea abe icuã ño nda eno. ⁴⁴ Sã ira ae ea ae ae no. Higo a rã eã nda nyu a no. Ea ae eno nde. Uva a rã eã nda isio rashĩ a no. Ea ae eno nde. ⁴⁵ Eĩ si chõ mbia no nde. Mbia turã nda ñee turã. Echiangui renda quia eturãte re. Nyebe eriqui nguiã ñee turã. Mbia icuã nda ñee icuã no. Echiangui renda quia eicuãte riqui nguiã. Nyebe eriqui nguiã ñee icuã. Nandechuru achõ ñee eã nguiã. Nandechiangui renda quia ñee nguiã.

Tuchua nyeremo

⁴⁶ “Sererecua” jenyẽ chõchĩ seje secheẽ mumba mumbare. ⁴⁷ Ae siqui serese secheẽ mumbayã nae, eturã tuchi chõ ãquĩ nde. ⁴⁸ Sã emo uchucharã ao no. Sã ibi ribicoi tuchi no. Sita je ngasẽ nyee. Sita arõ tuchua ao cote. Nyebe echuchua ãtãte riqui nguiã. Ama ndicuasú mose, iãcuã irãtã ndaque echuchua ite rĩ. Tuchua mbuquiata aroneate iãcuã irãtãte raque. Sita arõ nguia ngue uchuchua ao nguiã. Eĩ si chõ secheẽ mumbasa reã nde. Tuchua ãtã aosa rã si. ⁴⁹ Sã emo uchucharã ao no. Aque quiarei ibi ribicoi tuchiã. Ibi arõchi chõ uchuchua ao nguiã. Iãcuã ngasẽ mose aque chuchua, mbucoi asi que mondo ra. Eĩ si chõ secheẽ mumbasa re. Ae uchuchua saã ibi arõchi nae, aque rã si chõ ñene, i que Jesús ra.

7

Jesús soldados rerecua rimba mbucherõ

¹ Jesús cheẽ ngue tiba mbia je cote ra. Oso que Capernaum cote ra. ² Soldados rerecua mo ngue siqui hue ra. Capitán ngue ae ra. Roma jenda que ae ra. Aque rimba rasi que chi hue erese ra. Ebite que erimba ra. Erimba rasi tuchi. Mano serĩte que equia ee ra. ³ Capitán ngue jirandu Jesús rese cote ra. Ñee ngue judíos ramei je ra. —“Echu serimba mbucherõ”, i que capitán ñee ndeje ra”, jenyẽ oso Jesús je, i que capitán nda. ⁴ Judíos ramei ngue ngasẽ Jesús je ra. —Capitán nimba embucherõ na oso ee. Capitán turãte quiatu ngue eriqui nguiã ure je. ⁵ Nandequiato turã tuchi que aque ra. Judíos quiato ja. Urechumunua nua sacuã ngue ae chao tuchua ra, i que amei ñee Jesús je ra. ⁶ Jesús que oso amei ndese ra. Capitán nyuchua rurubi mose que capitán uquiato mo mondo Jesús robeishĩ nda. —Seicuãte se, Jesús. Sechuchua ra ereiquechĩ. ⁷ Nyebe se asoã nguiã nderea. Ndecheẽ achõ je chõ nda serimba erembucherõ. ⁸ Se abe sererecua no nde. Se echeẽ amumba aroneate. Soldados rerecua se no nde. Secheẽ abe emumbayã nguiã no. Eso, i mose, secheẽ mumbayã no. Echu, i mose, secheẽ mumbayã no. Se ñee mose serimba je, secheẽ mumbayãte no. Ndequirãcuã na eãte raque se, i que capitán ucheẽ mondo Jesús je ra. ⁹ Echeẽ andu mose que Jesús nyuruirate ra. Uba que ñee nguesenda je ra. —Tacheẽ nyecua jẽje. Capitán seicua tuchite quia co. Israel jenda mo embuchechea aroneate quia co, i que Jesús ra. ¹⁰ Capitán nyimondo que nyebi nyoĩ uchuchúaa cote ra. Erimba mbucherõ ji que ee cote ra.

Jesús eru cheecha riirĩ ndaaque mbuquera

¹¹ Isamami ngue Jesús choi quia Naín cote ra. Echimbuaquiato abe que nyoĩ quia erese ra. Mbia tubiriãte que nyoĩ quia erese ra. ¹² Sucha ata rurubi mose que ngasẽ mbia tubiriã je ra. I que eraaque ruruchoi quia etã sacuã nda. Aque miĩ tuchi rei ngue cuña ndiirĩ mo nde. Eru cheecha riirĩ. Aque que mano ño ee ra. Hue jenda mbia que nyoĩ jate quia esi rese ra. Eraaque rui. ¹³ Jesús que mae esi nyeseo rese ra. Jesús ia eãte que erese ra. —¡Echeseo eã ño jẽ! i que ee ra. ¹⁴ Jesús que oco eraaque rese ra. Eruruchoisa que tiba ee cote ra. —Echuruã, Acuanĩndu, i que ñee eraaque je ra. ¹⁵ Eraaque que nyuruã ñee cote ra. Jesús que embuquera ji mondo esi je cote ra. ¹⁶ Mbia que nyuruira ja erea ra. Ñee turã ja Dios rĩ. —Dios chimondo chõ co re, i que mbia quia ñee Jesús rĩ nda. —Dios riqui tesareiã nande si co, i que mbia quia nyue ra. ¹⁷ Jesús chumbucherõ ndese que mbia riqui ñimbiirandu jate ra. Judea jenda jirandu ja erese. Erobeinda ja abe que jirandu erese ra.

Juan el Bautista mbia mondo ñee Jesús je

¹⁸ Juan abe que jirandu Jesús chiaio rese ra. Erimba quiatu ngue embiirandu nguiã erese. ¹⁹ Nyebe Juan ñee nguiã ngũimba nyeremo je. —Nyeremo jëso ñee Jesús je. “‘Cristo ra tu’, i bei equia nae, ¿ae chõ nde re?” jenyee oso ee. “¿Cristo ra uresaarõ arõ si quia re?” jenyee oso Jesús je, i que Juan ngũimba mondochoi ra. ²⁰ Juan ñimondo que nyoï ngasë Jesús je ra. —Juan el Bautista que urembu ñee ndeje ra. ¿Cristo chõ nde re? ¿Cristo ra uresaarõ arõ si quia re no? ¿Ae chõ nde re? i que Juan nimba ñee Jesús je ra. ²¹ Juan nimba ngasëte mose que Jesús riqui mbia rasi mbucherõ cherõ nda. Erasi chumumbara. Erasi cuabë. Aba checuayã icuã abe que embusë mbusë nguia mbia si ra. Eresayã abe que embu cherõ nyerõ nguia ra. Juan nimba que mae ja quia ùquĩ mbucherõ ndese ra. ²² Jesús que ñee Juan nimba je ra. —Ae rese jemae nae, ùquĩ jësenei oso Juan je. Ae jeñandu nae, ùquĩabe no. “Jesús que eresayã mbucherõ nyerõ nguia ra. Ecuatayã abe mbucuata cuata. Eire ndasi abe mbucherõ nyerõ. Eisayã abe mbucherõ nyerõ. Eraaque abe mbuquera. Ucheë turã esenei senei tuchi mbaecha reã je”, jenyee oso Juan mbiirandu. ²³ Emo hui jei eã mose sesi, aque iate ra siqui cote, i que Jesús ucheë mondo Juan je ra.

²⁴ Juan ñimondo que nyoï nyebe ee cote ra. Jesús que ñee mbia ja je Juan ñii cote ra. —¿Mbae rese mae jëso turúquiaa re? ¿Quiririã idioi ichu ichu rese jëso mae nde? ²⁵ ¿Mbae rese mae jëso re? ¿Emo irao turã ndese jëso mae nde? Tei. Eirao turã siquiã nguiã turuquia ñi. Ae siqui quia mbia rerecua chuchua nae, ùquĩ ño eirao turã ndiqui nguiã. ²⁶ Juan ndese mae ño ngue jëso turúquiaa resë. Dios cheë nenei neneisa tuchi chõ ae emo si re. Ae chõ mbia mingoquiato quiatu nguiã se ñee sacua ee aque. ²⁷ Sã embesa ji riqui ñee no:

Secheë nderaosa tamondo nderëta.

Ae ra mbia mingoquiato ndeje,

i que embesa ji ñee nda. Juan ñii ño embesa ji ñee nguiã. ²⁸ Juan el Bautista quiarei i tuchi raque mbia ñiinda ja si. Dios cheë nenei neneisa ataque si. Ae ra siqui tuchi Dios rese erimbarã cote nae, ùquĩ nguia ra i tuchi Juan si cote, i que Jesús ñee nda. ²⁹ Mbia que Jesús cheë ñandu turã ja ra. Impuestos isi isiquia abe chee que echeë ñandu turã nda. —Dios turã tuchi, i ja que mbia ra. Juan ngue bautizar i ja ee nyii ra. ³⁰ Fariseos achõ ño ngue Jesús cheë isi sereã nda. Embesasa rese. ùquĩ ngue siqui sereãte Dios cheë ndese ra. Nyebe Juan bautizar i eã nguiã ee.

³¹ Jesús que ñeembe ee ra. —Mbia namonda siqui turã eãte quia aba cheë ndui ã. Mbia riirĩ na ño eriqui nguiã. ³² Sã mbia riirĩ ndiqui ñibusarei sarei no. Sã eriqui ñee ñee nyue no. “Flauta que asaã saã ndei jëje ra. ¿Mbaerã jenyuruqui sereã nea nde?” sã i chõ nyue no. “Mbae aba mbia eã ngue asaã ndei jëje resë. ¿Mbaerã jëyate erese re?” sã i chõ mbia riirĩ nyue no. ùquĩ na si chõ jëingo nguiã aba cheë mumba ã. ³³ Juan el Bautista que tu rei jëje ra. Jëisi turã eã ngue ra. “Co eriqui quiaru sereãte nanderese co. Co eriqui mbae mbei sereãte nanderese co”, jenyee chõchĩ ee. “Aba checuayã ndesenda”, jenyee chõ ngue ee ra. ³⁴ Se abe que achu rei jëje ra. Aquiaru rei quia jendese co. Mbae abe ambei rei quia jendese co. Se abe que jë seisi turãya nda. “Quiaru tuchi je”, jenyee chõchĩ seje. “Mbae mbeisa”, jenyee chõ ngue seje no nda. “Mbia icuã quiato chõ ñene”, jenyee que seje resë. ³⁵ Ae earacuate nae, Dios aracua abe ra eicua, i que Jesús mbia je ra.

Jesús quiaru fariseo chuchua

³⁶ —Nandequiaru sechuchua, i que fariseo mo ñee Jesús je ra. Jesús que oso erese ra. Ngoi que quiaru nonde ra. ³⁷ Cuña icuã mo ngue siqui hue jenda huee ra. Jirandu que Jesús rese ra. Oso que erea cote ra. Aba mbushĩmbusa que equerao erea ra. (Sita ao ji rei aba mbushĩmbusa riru.) ³⁸ Jesús quite qiti que eñi nyeseo ra. Nguesari je que Jesús i irei irei ra. Ua je que embiiru iru cote ra. Uchuru que embucha Jesús i rese eriite ra. Aba mbushĩmbusa que eicherë ei rese cote ra. ³⁹ Jesús mbuquiarusa que ñee nguia uchiangui re ra. —¿Mbaerã Jesús ñee asiã cuña icuã je re? Jesús Dios riirĩ mose, ñi nda ñee asi rei ee, i que fariseo uchiangui re ra. ⁴⁰ Jesús que ñee fariseo je ra. —Tacheë ndeje, Simón,

i que ee ra. —Eno. Echeẽ seje no, Sererecua, i que fariseo ee ra. ⁴¹ Jesús que ñee ee ra. —Sã mbia nyeremo deber i ererecua mo je no. Sã enongue deber i ee quinientos no. Sã enongue deber i ee cincuenta no. ⁴² Ñquĩ ja que pagar i aronea ja. Nyebe ererecua ñee nguiã ee. “Mbae jemondo eã ño seje”, sã i chõ ererecua ee no. ¿Aba eya tuchi nguerecua rese re? i que Jesús ñee Simón je ra. ⁴³ Simón ngue ñee ee ra. —Ae deber i tuchi ee nae, aque eya tuchi erese cote reae, i que Simón ee ra. —Ae bei, i que Jesús ñee ee ra. ⁴⁴ Jesús que mae cuña ndese ñee Simón je ra. —Ndechuchúaa sei que mose que sei ereirei eã nda. Co cuña nguiatu que sei irei nguesari je ra. Ua je que sei mbiiru ra. ⁴⁵ Nde quiatu que seritii eresiite eã ndesẽ. Cuña nguiatu que sei siite nguiã. ⁴⁶ Nde que aba mbushimbua ereichereã sea rese resẽ. Cuña nguiatu ngue aba mbushimbua icherẽ nguiã sei rese. ⁴⁷ Tacheẽ nyecua ndeje, Simón. Cuña icuã tuchi raque. Eicuã ngue ambutiã ee namo nda. Nyebe eriqui nguiã nyesequa tuchi serese a. Ae “seicuã eã jiri se”, i quia nae, ñquĩ nguiã ra nyesequa eã jiri serese. Se eicuã ambutiã ndaque, i que Jesús Simón je ra. ⁴⁸ —Ndeicuã ngue ambutiã ndesi ra, i que Jesús ñee cuña je cote ra. ⁴⁹ Ae que chi quiaru erese nae, ñquĩ ngue ñee nyecuayã cuayã u nyue ra. —¿Mañi nda Jesús mbia icuã mbutiã esi re? i que eu ñee ñee nyue ra. ⁵⁰ Jesús que ñee cuña je ra. —Seicuasa chõ nde re. Nyebe arerirõ nguiã ndeicuã si. Ereico bei ra cote. Ndeya eso cote, i que Jesús cuña je ra.

8

Cuña mo nyoĩ ngata Jesús rui mbae raã naa ee

¹ Jesús que sucha tubiriã mbuchesea sea quia ra. Dios cheẽ turã ngue esenei senei nguia mbia je ra. Echimbuaquiato doce abe que ngata quia erese ra. ² Cuña echimbucherõ mo abe que ngata quia erese ra. Ae si aba checuayã icuã ndirõ nyii, ñquĩ mo abe que ngata quia erese ra. María Magdalena que ngata quia erese ra. Ae si aba checuayã siete rirõ nyii nae. ³ Juana abe que ngata quia erese ra. Chuzã ninisi que aque ra. Herodes resenda rei Chuzã. Susana abe que ngata quia erese ra. Cuña ata que ngata quia erese ra. Ñquĩ ngue umbae mee mee mbei quia Jesús je ra.

Emo mbae eĩ mombiquia mbiqui

⁴ Mbia que ngaẽ ngaẽ ja quia Jesús rea ra. Suchamo jenda abe. Mbia ñumunua ja mose que Jesús ejemplo raã ee ra. ⁵ —Sã emo si mbae eĩ mombiquia mbiquia no. Emombiquia mbiquia mose sã emo uqui uqui ñeenda rui no. Sã mbia riqui irõ irõ erese no. Sã nguireĩ abe eu chee no. ⁶ Sã emo uqui uqui sita arõ no. Sita aronda suri raque. Ibi irute quia ee re. Nyebe ñimama nguiã mano. ⁷ Sã emo ndiqui uqui uqui nyu réndaa no. Sã nyu abe suri erese no. Nyu ruri que echati asi u eriquisã nda. ⁸ Sã emo uqui uqui ibi túraã no. Ñquĩ nguiatu que ia turã nda, i que Jesús mbia je ra. Aquere que ñee asite mbia je ra. —Jéisa mose ¡secheẽ jeñandu turã na! i que Jesús mbia je ra.

⁹ —Eresenei ngue mbae eĩ ñii, ñquĩ embiasa turã na ure je, i que echimbuaquiato ñee ee ra. ¹⁰ Jesús que ñee ee ra. —Mbia rerecua tuchi quiarei Dios. Ae riqui nguiã ucheẽ mbiasa asa ja jêje co. Mbia ataque quia siqui sereã erese co. Mbia ataque je quia eriqui nguiã ucheẽ mbiasa eã jiri. Ejemplos achõ esenei senei nguiã ee co. Eanduchõ sacuã. Eicua turã ndocoĩ.

Jesús ucheẽ mbiasa uchimbuaquiato je mbae eĩ ñii

¹¹ Secheẽ tambiasa jêje cote. Dios cheẽ na si chõ mbae eĩ nde. ¹² Ae uqui uqui ñeenda rui nae, ñquĩ ndei mbia Dios cheẽ andu chooñosa rã ñquĩ. Ae Dios cheẽ andu chooño nae, ñquĩ ñiangui si chõ diablo riqui nguiã Dios cheẽ ndirõ. Nyebe eriqui nguiã Dios icuayã mbei. Nyebe Dios riqui nguiã emingo bei eã. ¹³ Ae uqui uqui sita arõ nae, mbia mo na ño ñquĩ no nde. Dios cheẽ andu mose, isi turã ndaque. Eyate raque erese. Mbae mo embiayã mose, hui jei chõ esi cote. Mbae rao eã naanguia chõ ñquĩ nde. ¹⁴ Ae uqui uqui nyu réndaa nae, mbia mo na ño ñquĩ no nde. Dios cheẽ andu turã ndaque. Siqui bei eã ño nguiã erese. Umbaerã achõ ndese chõ eriquichĩ nguiã ndua. Ñimbusarei sarei bei chõchĩ

nguiã. Nyebe hui chõ nguiã Dios cheẽ si. Nyebe Dios cheẽ ndiqui nguiã ia eã mbei ee. ¹⁵ Ae uqui uqui ibi túraã nae, mbia mo na ño ùquĩ no nde. Echiã quishĩ ño ùquĩ nde. Dios cheẽ andu mose, siqui bei erese. Ia ia bei raanguia cote.

Tata rendi mbia resae ja

¹⁶ Sã nandeico lamparina mendi no. Sã nandeico eati eã no. Sã nandeico emii eã mbaequi re no. Erendi checua chõ nda nandemii nguiã. Mbia resae ja sacua. ¹⁷ Mbae checuayã nda nyecua ja emo mose. Ñeminde ra nyecua ja. ¹⁸ Secheẽ jeñandu tuchi. Aba mo umbae rerequia mose, Dios ra emo mondobe ee. Emo embae eã mose, Dios ra embae sirõ ja esi.

Jesús nongue ngaẽ erea usi rese

¹⁹ Jesusi que ngaẽ ndei ee ra. Jesús nongue ja rese. Mbia tubiriãte que esiquisãte esi ra. ²⁰ —Hue ndesi riqui nderequia taicuee hue. Ndenongue rese, i que mbia Jesús mbiirandu ra. ²¹ Jesús que ñee mbia je ra. —Ae Dios cheẽ andu turã nae, ae Dios cheẽ mumbayã nguia nae, ùquĩ je chõ aico nguiã “senongue” i. Ùquĩ je chõ aico nguiã “taĩ” i no, i que Jesús ñee nda.

Jesús quiririã icuã icuã mbutiba; ama ndebera abe

²² Emo mose que Jesús ua canoa ye ra. Uchimbaaquiato ja rese. —Nyao ama ndisha robei, i que Jesús ee ra. Nyoĩ que cote ra. ²³ Ama ndisha rasa mose que Jesús si quia uque ra. Ama ndiite re mose que quiririã icuã icuã ndu ee ra. I rebera que ique ique tuchi quia canoa ye ra. Nyebe canoa ñiimi serĩ tuchi nguiã ee. ²⁴ Nyebe mbia Jesús mumba nguiã. —Urembaaquiatusa, echumumba. Nandemanochĩ nda re, i que ñee Jesús je ra. Jesús que nyuruã cote ra. Ñee quiririã je. Ama mbutiba. Quiririã ngue ti i ee cote ra. Ama abe que ti i no nda. ²⁵ —¿Mbaerã jẽingo siquichete re? ¿Seicuayãte equia re? i que Jesús uchimbaaquiato je ra. Siquiche bei que equia ra. Nyuruira tuchi Jesús quiracuã ndese mae. —Quiririã Jesús cheẽ mumbayã ñochĩ. Ama abe echeẽ mumbayã ñochĩ, i que ñee nyue cote ra.

Jesús aba checuayã icuã jea Gadara jenda mo si

²⁶ Ngasẽ nyee que sobei ra. Gadara, i que hue ibi je ra. Galilea mbuchecha tuchi que huee ra. Ama ndisha rasa. ²⁷ Canoa si Jesús nguichi mose, hue jenda amei mo ngue tu ee ra. Aba checuayã icuã ngue siqui quia echiangui re ra. Cosete ngue eriqui rei nguiã echiangui re. Eirao eã mbei que eriqui ra. Tuchuaqui re que eriqui uqueã nda. Mbia raaque tãsa bei chõ eriqui nguiã. ²⁸ Tu que ngoi ngũã ndese Jesús resa quiti ra. Ñee asite que eu ee ra. —¿Mañi ere ra seje re, Jesús? Dios ibatenda riirĩ ño nde re. ¿Sembasichĩ nda se jẽ! i que ñee tuchi Jesús je ra. ²⁹ —Esẽ esi, i chõ Jesús aba checuayã icuã je reaẽ. Aba checuayã ño aque amei isi isi bei quia embiicuã icuã neaẽ. Mbia eo cuaacua raque quia cadenas je. Ei abe cuaacua raque no. Ucuasa ndoso ndosochõ mbei que equia ra. Aba checuayã ño equerao rao quia turuquia ñi neaẽ. ³⁰ —¿Mañi ndeje re? i que Jesús ñee ee ra. —Etubiriã, i que seje ra. Ure cuabẽte quia ure re, i que aba checuayã ñee Jesús je ra. ³¹ —Uremondochĩ nda tata cuasu, i que aba checuayã ñee tuchi Jesús je ra. ³² Chiasu socoi tubiriã ngue chi quiaru huee ra. Sita ibate rese. Nyebe aba checuayã ñee Jesús je. —Chiasu chiangui re ureso rã, i tuchi que equia ñee Jesús je ra. —Eno, i que Jesús ee ra. ³³ Aba checuayã icuã ngue usẽ ja amei ñia si cote ra. Chiasu chiangui re que echoi ra. Chiasu que uchã ja choi nyiichere ama nimia mbucu rĩ nda. Ama ndisha ye que echoi ja mano nda.

³⁴ Chiasu raarõsa que chi mae erese ra. Emundite que ra. Nyoĩ que uchã mbia mbiirandu ja chiasu rese ra. Sucha tubiriã jenda mbiirandu. Mbia ataque abe mbiirandu no. ³⁵ Mbia que ngaẽ ja mae erese ra. Huee que Jesús riqui beite ra. Ae rese aba checuayã ndiqui nyii amei nae, aque abe que chĩ ngoi Jesús i jii ra. Huiirao resebe cote. Earacuate que mbia je cote ra. Nyebe mbia nyuruira tuchi nguiã erea. ³⁶ —Jesús que amei mbucherõ aba checuayã ndirõ esi ra, i que maesa erese ñee mbia ataque je ra. Maesa erese que

esenei ja mbia je ra. ³⁷ Mbia hue jenda que siquiche ja Jesús si cote ra. —Eso rã urerecha urerecua si, i ja que hue jenda ñee Jesús je ra. Nyebe Jesús ua nguiã canoa ye. Oso que nyebi sobei cote ra. Gadara recha. ³⁸ Ae rese aba checuayã ndiqui nyii nae, aque que ñee Jesús je ra. —Nderese taso bei, Jesús, i rei que ee ra. Jesús que ñee ee ra. ³⁹ —Eso chõ ndechuchúaa. Mbae esenei ja nderesenda je. “Dios que sembucherõ nda”, ere oso mbae renei nenei ja nderesenda je, i que Jesús ee ra. Umbucherõsa renei nenei ngue oso mbia ja je cote ra. Jesús renei nenei ja sucha jenda ja je.

Jesús Jairo riiri mbucherõ; ari mo abe mbucherõ

⁴⁰ Jesús chebi si mose sobei si, mbia que chi eraarõ arõ nda. Ñquĩ nguiatu que eisi turãte ra. ⁴¹ Emo ngue tu ñee Jesús je ra. Jairo, i que ee ra. Judio munua nuasa que ae ra. Jesús i jii que ngoi ñee ee ra. —Nyao rã sechuchúaa. ⁴² Seriiĩ nguasu jiri si quia mano serĩte seje qui. Seriiĩ mii tuchi se, i tuchi que Jesús je ra. Jesús que oso erese ra. Mbia cuabẽ ngue nyoĩ ja eruĩ ra. Jesús mbiitãyãte que echoĩ quia ra. ⁴³ Ari mo abe que oso quia mbia ite rĩ nda. Eruqui nda uchẽ uñe mbei quia ee ra. Doce años nyee nda eruqui tibayã mbei ee ra. Aba mbucherõsa abe nda embucherõ aroneate quia ee ra. Ari umbae mondo mondo ja raque quia ee. ⁴⁴ Ari que tu Jesús quite qiti eriichã nda. Eirao ai rese que oco ra. Aque mose tuchi que eruqui tiba ee cote ra. ⁴⁵ —¿Aba oco serese re? i que Jesús mbi je cote ra. —Tei. Aba ãte, i ja rei que mbia ee ra. Pedro que ñee ee ra. —Mbia tubiriãte nyeresẽ. Mbia cuaẽ nguia ñimaña maña jate co resẽ. ¿Mbaerã ereico “¿aba oco serese re?” i re? i que echimbaaquiatu ñee ja ee ra. ⁴⁶ Jesús que ñee ee ra. —Tei. Emo ngue oco serese ra. Sequirãcuã ngue emo mbucherõ nda i que Jesús ra. ⁴⁷ —Jesús jiranduchĩ serese, i que ari uchiangui re cote ra. Nyebe ngoi nguiã ngũĩã ndese Jesús resa qiti. Titi titi i ete que ra. Ñee nyecua que ee ra. —Sembucherõ sacua ño aoco nguiã nderese. Aque mose tuchi chõ acherõchĩ, i que ari erenei ja Jesús je ra. Mbia que echandu ja u ra. ⁴⁸ Jesús que ñee ee cote ra. —Seicuasa chõ nde re. Nyebe arembucherõ nguiã. Ndeya tuchi eso cote, i que Jesús ee ra.

⁴⁹ Jesús cheẽ mosete que emo ndu Jairo chuchua si ra. —Nderiĩ ngue mano cote ra. ¿Mbaerã nda Jesús ererao ndechuchua cote re? i que ñee Jairo je ra. ⁵⁰ Jesús que echandu ra. Ñee ngue Jairo je ra. —¡Ndeya eã techĩ nda jẽ! Seicua chõ se. Nderiĩ nda quera si, i que eru je ra. ⁵¹ Ngasẽ ngue echuchúaa cote ra. Jesús que ique eraaque rea cote ra. Pedro rese. Jacobo abe rese. Juan abe rese. Eraaque ru abe rese no. Esi abe rese. Ñquĩ achõ ngue emingue ra. ⁵² Mbia que chi ja nyeseo ãquẽ ndese ra. —Jenyeseochĩ nguiã. Mano eã ño ñene. Uque chõ ñene, i que Jesús ñee mbia je ra. ⁵³ Mbia que iquia Jesús cheẽ mose ra. —Eraaque nyeresẽ. ¿Mañi nda nyuruã nde? i que mbia ra. ⁵⁴ Jesús que eraaque o isi ra. —Echuruã na, Echo, i que ñee asite ee ra. ⁵⁵ Quera si que nyuruã cote ra. —Nderiĩ embuquiaru cote, i que Jesús ee ra. ⁵⁶ Eru que nyuruĩra tuchi mae erese ra. Esi abe nyuruĩra tuchi. —¡Emo nda jembiianduchĩ jẽ! i que Jesús ee ra.

9

Jesús uchimbaaquiatu doce mondo ucheẽ nenei nenei sacua

¹ —Jenyu, i que Jesús uchimbaaquiatu doce je ra. Uquirãcuã ngue emee mee ee ra. Aba checuayã icua jea jea sacua mbia si. Mbia rasi mbucherõ cherõ sacua. ² —Jẽso Dios cheẽ nenei nenei mbia je. Jẽso mbia rasi abe mbucherõ cherõ. “Mbia rerecuarã tuchi ra Dios cote”, jenyese oso secheẽ nenei nenei mbia je. ³ Mbae mo nda jendaochĩ icua. Jenyitochoquia ra jendaochĩ. Mbae riru mo abe ra jendaochĩ no. Jenyurã mo nda jendaochĩ no. Mbae isiquia mo abe ra jendaochĩ no. Jẽirao nongue abe ra jendaochĩ no. ⁴ Emo nyuchúaa jengue mose, huechõ ño jẽingo uque. Jemba jembatechĩ nda uque tuchia raamba amba. Hue si chõ jẽso sucha tubiriã mo secheẽ nenei nenei cote. ⁵ Sucha tubiriã mo jenda jẽisi sereã mose, jẽsecha chõ. Jẽi tubi jembutomo tomo ee. Hue jenda huĩcuã icua sacua, i que Jesús uchimbaaquiatu je ra. ⁶ Echimbaaquiatu que nyoĩ choĩ bei

quia sucha tubiriã mbuchesea sea ra. Dios cheẽ turã nenei nenei mbia ja je. Mbia rasi mbucherõ cherõ no.

Mbia Juan el Bautista iquia

⁷ Herodes abe que jirandu Jesús chiao rese ra. Embusiquichete que ra. Emo ngue ñee ndei ee ra. —Ae ereiquia nae, Juan i equia ee nae, aque que quera si ra, i rei que emo ñee Herodes je ra. Juan Jesús riqui reĩ nguiã mbia je. ⁸ Elías Jesús riqui reĩ nguiã emo je no. —Dios cheẽ nenei neneisa ima quera si je chõ ñene, i rei que emo emo Jesús rĩ no nda. ⁹ Herodes que ñee nda. —Juan ãquĩ ngue achisiamo tuchi. ¿Mañi nda quera si re? ¿Aba Jesús re? Ae rese aico jirandu tuchite. Tamae erese no, i que ndua ndua uchiangui re ra.

Jesús mbichae mbeta tuchi mbia je

¹⁰ Jesús chimondo ucheẽ nenei neneisa que nyebi ngaẽ ee ra. —Ã ngue uresaã saã nda, i que mbae renei ja Jesús je ra. Mbia tiãmbaa que Jesús ũquĩ nderao ja rei ra. Betsaida rurubi jiri. ¹¹ Mbia ataque jirandu mose que nyoĩ eruĩ ra. Jesús que eisi turã Dios cheẽ nenei nenei ee ra. Erasi abe mbucherõ cherõ ee. ¹² Tenda oso mose que echimbaaquiato ñee ndei ee ra. —Mbia emondo rã sucha tubiriã nia. Sã echoi bei quiaru huee. Uque bei abe huee no. Mbae ãte nandecu a, i rei que echimbaaquiato Jesús je ra. ¹³ —Jeño mbae jemondo ee echiurã, i que Jesús ee ra. —Tei. Mbae quia ra aba mondo ee. Cinco chõ ngue mbichae ra. Sira abe nyeremoñote nyeresẽ, i que echimbaaquiato Jesús je ra. ¹⁴ Mbia tubiriã tuchi que chi ra. Cinco mil ndobei. —Mbia jembucoi ja ñno íbii. Eata jaaja jeñono mbucoi. Sã echi ngoi icúe cúe cincuenta jaaja, i que Jesús uchimbaaquiato je ra. ¹⁵ Jesús cheẽ nguire que ngoi ja cote ra. ¹⁶ Jesús que mbichae sirõ cote ra. Sira abe rirõ. Mae ngue ibate ra. —Gracias, i que ñee Dios je ra. Mbichae que esiquio quio ra. Sira abe no. Mondo mondo ja que uchimbaaquiato je cote ra. —Jembuchao chao mbia tubiriã je cote, i que Jesús ra. ¹⁷ Mbia que embuquiaru ja tuchi ra. Miãtã tuchi que ra. Mbia huisa tubiriã ngue cote ra. Sira rire. Mbichae rire abe no. Doce iru que mbia mombisẽ esique sique je ra.

Cristo chõ nde resẽ, i Pedro Jesús je

¹⁸ Emo mose que Jesús ae riqui ñee ñee Dios je ra. Echimbaaquiato abe que chi huee ra. —¿Aba aico reĩ mbia je re? i que Jesús ee ra. ¹⁹ Echimbaaquiato que ñee ee ra. —Juan el Bautista ereico reĩ nguiã emo je co. Elías ereico reĩ nguiã emo je no. Dios cheẽ nenei neneisa quera si je ereico reĩ nguiã emo je no, i que echimbaaquiato ee ra. ²⁰ —¿Aba aico reĩ jẽje co re? i que Jesús ee ra. —Cristo chõ nde resẽ. Dios riirĩ ño nde resẽ, i que Pedro Jesús je ra.

Mbia ra seiquia, i Jesús uchimbaaquiato je

²¹ —Ũquĩ nda jeñeechĩ emo je jẽ, i tuchi que Jesús ee ra. ²² Jesús que uchimbaaquiato mbaaquiato quiato ra. —Mbiarã ngue Dios sembu ra. Mbia ra sembasi mbasi tuchi. Amei nda hui ja sesi. Sacerdotes rerecua abe ra hui ja sesi. Embesasa abe ra hui ja sesi. Mbia ra seiquia chee. Tres tenda mose ra aquera si, i que Jesús mbia eiquia nonde ra.

²³ —Emo siquise mose serui, sã hui ja mbae ubi si. Sã cruz umbaerã ndui bei se rã si. Sã eriqui serui cote. ²⁴ Emo ndua bei mose nguenco rese, ereco ra ua esi. Emo hui mose nguenco si seje, ũquĩ nda siqui bei. ²⁵ Emo nguenco mumba chooño mose, eya eã mbei rae. Mbaecha rete raque. ²⁶ Emo ireĩ ireĩ mose sesi, se abe chõ nda aireĩ ireĩ esi. Emo ireĩ ireĩ mose secheẽ si, se abe chõ nda aireĩ ireĩ esi, sechu mose mbia rerecuarã. Dios quirãcuã nda sembu. Angeles rese ra achu aque mose. ²⁷ Tacheẽ nyecua jẽje. ã jẽingo serese ã nae, jemo nda jemaie Dios quirãcuã ndese jemano nonde. Mbia rerecua tuchi ra Dios, jemo mano nonde, i que Jesús ee ra.

Jesús nyicabo uchimbaaquiato je

²⁸ Ocho tendare que Jesús choi sita ibátee ra. Ñee sacua Dios je huee. Pedro que oso erese ra. Jacobo abe. Juan abe. ²⁹ Jesús ñee mose Dios je que eruba ñimbiasu ra. Eirao

abe que enininya ra. Eiraoshĩ nininya tuchi que ra. ³⁰ Mbia nyeremo ngue nyecua u ibate si ra. Jesús nininya mose que eriqui ñee ñee nyue erese ra. Moisés que enongue ra. Elías que enongue no nda. ³¹ Ũquĩ ja que enininya Jesús rese ra. —Mbia ra Jesús iquia mbucha ira rese Jerusalén, i que equia ñee nyue ra. ³² Pedro reesite raque. Eresenda abe reesi esite raque. Uqueã mbei quera. Jesús nininyate quiatu ngue ee re. Moisés abe nininyate quiatu ngue ee re. Elías abe nininya no. ³³ Ibatenda que nyoĩ quia Jesús recha cote ra. —¿Manyae ra ñee Jesús je re? i que Pedro ra. Nyebe ñee iru chõ nguĩã ee. —Nandecurãte aa, Sembaaquiatusa. Sucha ñetẽ uresaã saã na. Enongue nembraerã. Enongue Moisés mbaerã no. Enongue Elías mbaerã no, i rei que Pedro ñee Jesús je ra. ³⁴ Pedro cheẽ mosete que ibeishĩ ndu eite ñi nda. Ibeishĩ ngue Moisés mbuchecuayã ee ra. Elías abe mbuchecuayã ee. Nyebe esiquiche nguĩã. ³⁵ Echeẽ mo ngue echandu ibeishĩ qui re ra. —Co rei sebi tuchi seriirĩ co. Echeẽ jeñandu bei quia, i que Dios ee ibeishĩ qui re ra. ³⁶ Aquere que Jesús miĩ ndiqui uchimbaaquiatusa rese ra. Umaesa que esenei eã ja emo je ra. Ñee ãte que emo je ra.

Jesús aba checuayã jea mbia riiri mo si

³⁷ Isamamimbe que ecuaẽ nguichi sita ibate si ra. Mbia tubiriã ngue ngaẽ Jesús rea ra. ³⁸ Ũquĩ mo ngue ñee Jesús je ra. —Seriirĩ ndese emae, Urembaaquiatusa. Seriirĩ miite que se co ra. ³⁹ Aba checuayã icuã ndiqui eisi isi co. Embaasẽ asẽ mbei. Emburiri riri. Echuru mbichoĩ. Erete munumbi numbi. Aba checuayã hui sereã mbei seriirĩ si. ⁴⁰ “Aba checuayã embusẽ seriirĩ si”, ae rei ngue ndechimbaaquiatusa je re. Embusẽ aroneate esi, i que eru ñee Jesús je ra. ⁴¹ —¿Mañi jentye quia seicuayãte re? ¿Secheẽ jemumba tuchi chõ nguia re? ¿Ñimbirãcuã mbeite ra aba quia jẽje re? i que Jesús ñee ee ra. —Nderiirĩ eru rã seje, i que eru je cote ra. ⁴² Jesús rurubite mose que aba checuayã eriirĩ mbucoi mondo ra. Mburiri tuchi que ra. Jesús que ñee asite aba checuayã icuã je ra. Eriirĩ ngue embucherõ nda. Embucherõ ji que emondo eru je cote ra. ⁴³ Dios quirãcuã ndese mae ngue mbia nyuruira tuchi ra.

Mbia ra sei quia, i si Jesús

Jesús chiao rese mae ngue mbia nyuruira tuchi ra. Mbia nyuruira mose que Jesús ñee uchimbaaquiatusa je cote ra. ⁴⁴ —Mbiarã ngue achu ra. Mbia ra semee mbia icuã je. Sericharã. Ũquĩ si ra jẽtesareichĩ, i rei que Jesús uchimbaaquiatusa je ra. ⁴⁵ Echimbaaquiatusa que Jesús cheẽ icuayãte ra. Echecuayãte que ee ra. —Ndecheẽ embiasa ure je, iã ngue ñee ee ra. Ireĩ ireĩ ño ngue ñee ee ra.

Ererecua tuchi ra se, i jaaja Jesús chimbaaquiatusa nyue

⁴⁶ —Se quia ra ererecuarã tuchi jẽsi, i jaaja que echimbaaquiatusa ñee nyue ra. Ñee icuã icuã nyee nyue. ⁴⁷ Jesús que ũquĩ ndua ndua icuate ra. Nyebe ãquẽ mo mbucoi miĩ nguĩã ujii. ⁴⁸ Jesús que ñee ee ra. —Sã ãquẽ mo ndiqui siqui mingue no jẽ. Ae eturã ndiqui mbia riirĩ je serĩ nae, seje abe chõ eturã ndiqui nguĩã. Ae eturã ndiqui seje nae, semondosa je abe chõ eturã ndiqui nguĩã. Ae ererecua sereãte riqui jemo nae, ũquĩ nguia sebi re. ¿Mbaerã jẽingo “ererecuarã se” i nyue re? i que Jesús ee ra.

Emo icuã eã mose nande je, nanderesenda chõ ũquĩ nde

⁴⁹ Juan ngue ñee Jesús je ra. —Pe emo nyi aba checuayã ndirõ ndirõ mbia si nderĩ pe. Uremae ngue erese ra. Aque eriqui ãte nanderese aque. Nyebe uresiquisã nguĩã, i que Juan Jesús je ra. ⁵⁰ Jesús que ñee ee ra. —Tei. ¡Jẽsiquisã quisãchĩ nda jẽ! Emo icuã eã mose nande je, nanderesenda chõ ũquĩ nde, i que Jesús ñee ee ra.

Jesús ñee asi Jacobo je; Juan abe je

⁵¹ —Namo jiri ra aso ibate cote, i que Jesús ndua ndua cote ra. —Taso Jerusalén, i tuchi que equia ra. ⁵² Jesús que mbia mo mondo unonde ra. Ũquĩ ngue ngasẽ sucha tubiriã mo nda. Samaria jenda rei sucha. —Jesús ra uque aa jendese, i rei que hue jenda je ra. ⁵³ Hue

jenda que Jesús isi turã sereãte ra. —Jerusalén Jesús si quia qui reae. Nyebe ureico nguiã eisi sereã aa, i que hue jenda ñee icuã Jesús chimondo je ra. ⁵⁴ Jacobo jirandu mose que paama i hue jenda je ra. Juan abe que paama i hue jenda je ra. Ñquĩ ngue ñee Jesús je ra. —Sã Elías tata mbu ibate si mbia icuã je cose no. ¿Eĩ ure si ra tata mbu ã iquia sacuã nde? i que echimbaaquiatu ñee Jesús je ra. ⁵⁵ Jesús que uba ñee asite ee ra. —Jêsecha chõ. Aba mingosa riirĩ ño jëingo ã ndesẽ. ¿Jêtesarei chõ nguia ñquĩ si re? ⁵⁶ Mbia iquia sacuã ngue achuã ndesẽ. Mbia mingo bei sacuã ño ngue achu nguia, i que Jesús ra. Sucha tubiriã mo ngue echoi cote ra.

Jesús rui taico, i raque emo

⁵⁷ Jesús ngata mose que mbia mo ñee ee ra. —Taico bei nderese. Ndeso mose manguiti, se abe ra aso bei quia nderese, i que ñee Jesús je ra. ⁵⁸ Jesús que ñee ee ra. —¿Mbae rasi ra eresaã saã serese re? Eoita quia ecua jiri re. Nguireĩ nguia equisa jiri no nde. Se quia sequisayã mbei re, i que Jesús ee ra. ⁵⁹ —Serui eico bei, i que Jesús emo je ra. —Sã seru mano na. Aquere quia ra aico bei nderui, i rei que aque ñee Jesús je ra. ⁶⁰ Jesús que ñee ee ra. —Sã mbia ataque chõ nderu chati. Nde quia eso Dios cheẽ nenei nenei mbia je, i que Jesús ee ra. ⁶¹ Emo ngue ñee Jesús je ra. —Aico jee ra nderui. “Co acua quia co”, tae rã oso sechuchua jenda je, i que ñee Jesús je ra. ⁶² Jesús que ñee ee ra. —“Achu jirichĩ nguia Jesús rui”, i mose sequiato mo, aque ra ngaseã Dios je, i que ra.

10

Jesús mbia setenta mondo ucheẽ nenei nenei sacuã

¹ Aquere que Jesús mbia setenta irabo no nda. —Serêta chõ jëso jëso quia sucha mbuchesea sea, i que ee ra. Nyeremo nemo ngue embuchao chao quia mondo ra. ² —Secheẽ andusa reã ndei etubiriã. Secheẽ nenei neneisa rei co mi jiri. “Dios, ndecheẽ nenei neneisa mo emondo tuchi. Mbia mbiirandu randu sacuã”, jenyê chõ nguia Dios je. Sã echa mbae a ishao shaosa mondo ea ireĩ mose no. ³ Jëso cote. Sã nyacua icuã ndiqui oveja je no. Eĩ si ra mbia icuã icuã jêje. Nyacua rã si. ⁴ Jëochi chõ jëso. Mbae riru ra jendaochĩ. Mbae isiquia abe ra jendaochĩ no. Jëiyao abe ra jendaochĩ. Jëitõ itõchĩ nda ñeenda cúa ñee sacuã mbia je. ⁵ Jëique mose emo nyuchúaa, jeñee turã huee tuchua jenda je. “Dios nda jembia bei quia chã”, jenyê hue jenda je. ⁶ Hue jenda ia mose Dios rese, Dios ra siqui tuchi erese. Eya eã mose Dios rese, emo je quia jeñee. ⁷ Jemba jembatechĩ nda uque tuchua raamba amba. Jengue mocoĩ jiri quia huee. Ae hue jenda u u quia nae, jê abe jêu quia erese. Jëingo mose secheẽ nenei nenei mbia je, sã mbia mbae mondo mondo jêje. ⁸ Sucha tubiriã jenda jëisi turã mose, jëquiaru quiaru erese. ⁹ Hue jenda ndasi jembucherõ nyerõ ee. Hue jenda je secheẽ jësenei senei. “Namo jiri ra jenderecuarã Dios cote”, jenyê chõ hue jenda je. ¹⁰ Sucha tubiriã jenda mo jëisi sereã nea mose, jeñee asi ee etaicúee. ¹¹ “Urei tubi urembutomo nguia jendique jie a. Jêtesareiã sacuã urecheẽ si. Jenderecuase rete raque Dios. Jëisiã ñochĩ”, jenyê chõ hue jenda mbiirandu. ¹² Se mbia icuã mbasi mbasi mose, hue jenda ra ambasi mbasi tuchi Sodoma jenda si.

Jesús ia eã mbia sucha tubiriã jenda rese

¹³ Seya eãte jendese, Corazín jenda. Seya eãte jendese, Betsaida jenda. Jendasi tuchi chõ ndae. Mbia mae sayã ngue asaã saã jêje nae, ñquĩ naa mose Sidón jenda je, eĩ nda hue jenda huĩcuã ndecha rei. Eĩ nda Tiro jenda abe huĩcuã ndecha rei. Eĩ nda eya eãte rei huĩcuã ndese. ¹⁴ Jê nguia jëicuã jêsecha sereãte rei. Nyebe ra Dios jembasi mbasi tuchi ñquĩ si quiatu. Dios mbia icuã mbasi mbasi mose. ¹⁵ Jëcuasu jësaã saã tuchi techĩ nguia re, Capernaum jenda. Nyebe ra Dios jemondo tuchi tata cuasu. ¹⁶ Secheẽ nenei neneisa chõ jê nde. Ae ra jeñee ñandu quia nae, secheẽ abe ra echandu. Ae ra jëucuãyãte quia nae, se abe ucuãyã ndae. Ae ra seucuãyãte quia nae, sembusa abe ucuãyã nda eno, i que Jesús ñee uchimondo setenta je ra.

Jesús chimondo mbia setenta nyebi ngaã ee

¹⁷ Ñquĩ setenta nyebi si mose que eyate ra. —Aba checuayã icuã urecheẽ mumbayã ñochĩ nderĩ, Urererecua, i que ñee Jesús je ra. ¹⁸ Jesús que ñee ee ra. —Satanás que ngoi tuchi u ibei si ra. Sã ama piriã i asi no, eĩ si que eu ngoi ra. Amae tuchi que ecoi rese ra. ¹⁹ Sequirãcuã ngue amee tuchi jẽje ra. Jendeaquiato sacua. Jẽirõ sacua mbei tásie rese. Quiraẽ ndese. Seucuayãsa riquisã sacua. Sequirãcuã nda jendea quiato mingo. ²⁰ Ñquĩ ndesechĩ nda jẽya. Serese quia jẽya. Aba checuayã jeñee mumbayã mose ñquĩ ndesechĩ nda jẽya no jẽ! Paba que nombre jembae mbesa mbesa mii ibate ra. Ñquĩ ndese quia jẽya, i que Jesús ee ra.

Jesús ia tuchi

²¹ Aque mosete que Espiritu Turã Jesús mbia tuchi ra. Ñee ngue ngu je ra. —Seyate aico nderese co, Paba. Ibi jenda rerecua ja chõ nde re. Ibei jenda abe rerecua ja chõ nde no nde. Ndecheẽ ngue erembuchecuayã mbia aquiato tuchi je ra. Mbia riirĩ naanguia je chõ ngue erembuchecua nguiã. Ñquĩ ño ngue eturã ndeje ra, Paba, i que Jesús ra. ²² —Seru que mbae mondo ja seje ra. Paba mii ño seicua tuchi nguiã. Paba riirĩ mii ño se re. Se mii ño Paba aicua tuchi nguiã no. Ae je ra Paba ateacuquia nae, ñquĩ mii ño nda Paba icua tuchi nguiã serese, i que Jesús ñee nda. ²³ Jesús que uba mae uchimbaaquiato rese ra. Eísaa que ñee nda. —Coche jemaie nguiã ã sechiao rese. ²⁴ Mbia rerecua ñiinda mae ja bite raque ã sechiao rese. Dios cheẽ nenei neneisa abe mae ja bite raque ã ndese. Mae eã mbei que equia sechiao rese ra. Secheẽ andu bite raque. Secheẽ ngue echanuate ra, i que Jesús ra.

Samaria jenda mo turã erasi je

²⁵ —Ma Jesús ucheẽ nyabi, i que embesasa mo ñee oso Jesús rea ra. —¿Mbae rese ra aico siqui bei nonde re? i que ñee Jesús je ra. ²⁶ —¿Mañi ño Voisés chimbasa re? i que Jesús ee ra. ²⁷ Embesasa que ñee ee ra. —Eĩ ño ngue Moisés embesa ra: “Echesequa tuchi quia Dios rese. Ndechiã ja je chõ eico nyesequa erese. Neaĩ abe je. Ndequirãcuã abe je. Nendua ndua abe je. Sã erechesequa ndechiese no, eĩ ere si chõ nyesequa nde ji jenda rese”, i que embesa ji ñee ndesẽ, i que embesasa ñee Jesús je ra. ²⁸ Jesús que ñee ke ra. —Erecheẽ turãte. Ndkico mose ñquĩ ndese, Paba ra nemingo bei, i que Jesús ee ra.

²⁹ Embesasa que uturã saã saã Jesús je ra. —¿Aba se ji jenda re? ¿Aba rese ra achesequa re? i que ñee Jesús je ra. ³⁰ Jesús que ñee ee ra. —Sã emo oso quia Jericó quiti no. Jerusaén si. Sã mbia icuã nyarõ erese ñeenda cúa no. Ucuu tuchi que erese ra. Embae que embuquiachã ja ra. Eirao abe rirõ ja esi no. Ecura curái que esecha ino ñeenda cúa rĩ nda. ³¹ Aque ñeenda aui que sacerdote mo si ra. Maeño ngue ecura curái rese ra. Nyucuaño ngue oso ra. ³² Levita mo abe que oso rei hue rĩ no nda. Aque abe que maeño si erese no nda. Ñeenda ibi chõ esi nguiia kcuano no. ³³ Aquere que Samaria jenda mo oso hue rĩ nda. Aque mae mose ecura curái rese, eya eã tuchi que aque quiato ra. Aque quia echucuaño eã nguiã cote. ³⁴ Aque que tiba erese ra. Mbae quira que equiti quiti eiruã nua ji rese ra. Vino abe quiti erese. Esia ji que echucua chucua ee ra. Caballo umbae rese que erasi mbuchui cote ra. Tuchua mo ngue ererao ra. Huee que eriqui eraarõ isa ra. ³⁵ Isamami ngue ñee tuchuacha je ra. —Taso cote. Ecura curái embucherõ nguia aa. Co mbae isiquia nyeremo tamondo ndeje. Embucherõ sacua eisi co je. Co nyeremo chayã mose, mbae isiquia mo nda amondobe ndeje sechube mose, i que Samaria jenda ñee tuchuacha je ra. ³⁶ ¿Aba nyesequa ecura curái rese re? ¿Sacerdote ere? ¿Levita ere? ¿Samaria jenda ere? i que Jesús embesasa je ra. ³⁷ Embesasa que ñee ee ra. —Samaria jenda chõ ngue nyesequa erese resẽ, i que embesasa ñee Jesús je ra. Jesús que ñee ee ra. —Ae rã si chõ eico nyesequa, i que ee ra.

Jesús oso Marta rea; María abe rea

³⁸ Jesús que ngasẽ sucha tubiriã mo nda. Cuña mo ngue eisi turã uchuchúaa ra. Marta, i equia ee. ³⁹ María, i que Marta nongue je ra. Jesús i ji bei que María riqui ngoi ra. Jesús cheẽ ndese nyiisaquia bei. ⁴⁰ Marta que mbae chao chao ja tuchi quia ra. Erecoteã tuchi que eriqui ra. Oso que ñee Jesús je ra. —Mbae mo ndese senongue riquiã ño co resẽ. Echeẽ na ee. Siqui sacua mbae mo ndese seje, i rei que Marta Jesús je ra. ⁴¹ Jesús que ñee Marta je ra. —¿Mbaerã ereico siqui jate mbae rese re, Marta? ⁴² Aque mii ndese chõ eico ndenongue rã si ae, Marta. María riqui secheẽ andu andu a resẽ. Emo nda embui eã secheẽ si, i que Jesús Marta je ra.

11

Jesús mbia mbaaquiato quiato ñee tura sacua Dios je

¹ Emo mose que Jesús chi ñee ngu je ra. Hui mose que echimbaaquiato ñee ee cote ra. —Urererecua, urembaaquiato rã ñee Dios je. Sã Juan uchimbaaquiato mbaaquiato no, i que Jesús chimbaaquiato ñee ee ra. ² Jesús que ñee ee ra. —Eĩ jenye chõ nguia Dios je ñee mose:

Paba ibatenda, sã mbia ñee turã ja bei quia nderĩ.

Mbia rerecuarã ja sacua echu jei íbii.

Sã mbia ibatenda siqui beite ndebi rese no.

Sã mbia ibi jenda abe riqui ndebi rese.

³ Ae ra ureu namo, ùquĩ embu rã urechiurã.

⁴ Ae uresaã icuã icuã ndeje nae, ùquĩ embutiã ná uresi.

Sã ureico tesarei mbia icuã icuã mose ure je no.

“Mbae icuã jësaã” ¡ichĩ nda emo ure je jẽ!

Urereaquiato mbae icuã si.

Eĩ jenye chõ ñee mose Dios je, i que Jesús embaaquiato ra. ⁵ Jesús que ñeembe ee ra. —“Mbae embu seje”, jẽ i mose jẽquiato je, ¿mee nda jẽje re? Sã jẽingo oso jẽquiato rea itondiite rete mose no. “Mbichae prestar ere rã seje. ⁶ Sequiato mo ngue tu serea ra. ¿Mbae ra amee ee re?” jenye chõ ee. ⁷ Ae je jẽingo ñee nae, ¿mee eã nda jẽje re? Sã ñee jẽje no. “Jëso rei. Seiquesa átãte. Co achu seriirĩ ndese quisa ye co. Sehuã sereãte. Mbae mo amondo aronea tuchite ndeje”, ¿i ra jẽje re? ⁸ Mondo eã aroneate jẽje jeñee mbei bei mose ee. Nyuruã sereãte raque uquiato je. Ñee mbei mose ee, nyuruã nda mbae mondo turã ee. ⁹ Eĩ si chõ Dios no nde. Jeñee i i mose Dios je, mbae ra emondo jẽje no. Jẽ mbae mo ndequia i i mose, jẽtea rae. Jẽ eiquesa mbu i i mose, mbuquiata ra jẽje cote. ¹⁰ Ae ñee i ite quia Dios je nae, mbae ra Dios mondo ee. Ae mbae mo sequia i ite quia nae, tea rae. Ae eiquesa mbu i ite quia nae, equia ra ee. ¹¹ Jendiirĩ “mbichae embu seje” i mose, ¿sita ra eru mee ee re? Jendiirĩ “sira embu seje” i mose ¿mbei ra eru mondo ee re? ¹² Jendiirĩ “nguira chia embu seje” i mose, ¿quiraẽ nda eru mondo ee re? ¹³ Mbia icuã nyee mbae turã mondo mondo quia nguiirĩ je ã. Jendu Ibatenda quia ra mbae turã tuchi mee jẽje. Jendu ra Espiritu Turã mee jẽje, jeñee mose ee, i que Jesús ee ra.

Aba checuayã quirãcuã Jesús quereco co, i raque mbia

¹⁴ Emo mose que Jesús aba checuayã icuã mbusẽ emo ñia si ra. Aque aba checuayã nguia echeẽ mbaaquiataate nguia. Jesús embusẽ mose que ñee cote ra. Ñee mose que mbia nyuruira tuchi mae erese ra. ¹⁵ Emo emo ngue ñee nda. —Aba checuayã icuã nderecua tuchi chõ Satanás nde. Satanás quirãcuã je chõ Jesús riqui nguia aba checuayã icuã mbusẽ mbusẽ mbia si co, i rei que emo emo nda. ¹⁶ —Ma Jesús aquiature, i que mbia ñee nyue ra. —Jesús, mbia mae sayã mo esaã na ure je, i que mbia ñee Jesús je ra. ¹⁷ Jesús que ùquĩ ndua ndua icuate ra. Nyebe ñee nguia ee. —Gobierno icuã icuã mose nyue, ua rae. Tuchuamo jenda icuã icuã mose nyue, ua ra eno. ¹⁸ Satanás icuã icuã mose nyue, Satanás quirãcuã nda ua no. Jeñee ñooño ño nguia seje ã. “Satanás quirãcuã je chõ Jesús riqui nguia aba checuayã mbusẽ mbusẽ mbia si”, jenye chõchĩ nguia seje ã. ¹⁹ ¿Aba jeñimbaaquiato mbirãcuã jẽ nde? Aba checuayã icuã mbusẽ nonde re. ¿Satanás

jeñimbaaquiātu mbirācuā serese re? ²⁰ Dios quirācuā je quiātu aico aba checuayā mbusē mbusē mbia si ā. “Dios quirācuā ndese chō ureico nguiā mae”, jenyē eā ñochĩ nguiā ā. ²¹ Satanás quirācuā tuchite raque. Umbae raarō tuchite raque. “Sembae chi turāte a”, i raque. ²² Dios quiarei equirācuā tuchi Satanás si. Dios Satanás mbae sirō ja arōte quia esi co. Dios Satanás mbae mbutiā ja arōte quia co. ²³ Ae siqui āte quia serese nae, ũquĩ icuā ño eriqui nguiā seje. Ae mbae a ishao shao raanguia eāte quia seje nae, ũquĩ icuā ño eriqui nguiā seje.

Aba checuayā icuā nyebi u mbia chiangui re

²⁴ Aba checuayā icuā usē mose emo ñia si, ngata bei chō nguiā. “¿Mangue ra sequenea aucua que re?” i chō nguiā. Uquenea ucua sacuā ngue etea eāte ra. “Tasobe rei nyebi. Ae si achu usē, aque chiā ye si taso”, i que aba checuayā nda. ²⁵ Aba checuayā nyebi si mose u, mbia chiā ndecoteā eāte que ee ra. Tuchua tii ji raāte que ee ra. ²⁶ Aba checuayā icuā ngue nguesenda siete queru cote ra. Ique ja que echoi aque chiangui re cote ra. Ae chiangui re aba checuayā icuā siete riqui nae, aque icuā i i tuchi que cote ra. Ñiinda si. Aba checuayā miñ ngue siqui eye nyii ra. Etubiriāte cote, i que Jesús ee ra.

Dios cheē andusa je quiātu mbae roonde

²⁷ Jesús cheē mose que cuña mo tasē tuchi ñee mombo ra. —Mbae roonde tuchiñi ndesi je nye. Ae nambuquiambu quia, i que cuña mo ñee mombo Jesús je ra. ²⁸ Jesús que ñee ee ra. —Dios cheē andusa je quiātu mbae roonde riqui nguiā. Dios cheē mumbasa reā je quiātu mbae roonde riqui nguiā, i que Jesús ra.

Mbia mae sayā esaā ure je, i bei mbia Jesús je

²⁹ Mbia que ngaē tuchi Jesús riichā nda. Jesús que ñee mbia je ra. —Co mosenda mbia icuāte riqui ā. “Mbia mae sayā esaā ure je”, i beite equia seje ā. Mbia mae sayā miñ ño nda asaā ee. Jonás na si. ³⁰ Sā Jonás ndiqui raque sira rie ye tres días nae, sā mbia Nínive jenda echeē andu cote nae. Jonás na si ra asaā mbia je. Mbia co mosenda je mae sayā tasaā. ³¹ La reina de Seba quia eturā jiri mbia co mosenda si re. Dios ra co mosenda mbasi tuchi la reina de Seba si. Sā la reina de Seba tu isho tuchi si Salomón ñee andu no. Se quia acheē ndaque quia jēje. Searacua tuchi raque se quiātu Salomón si. Secheē jemumbate chōchĩ NGUIA Ñ: Nyebe ra Dios jembasi tuchi mbia icuā ndea rea mose. ³² Nínive jenda quia eturā jiri co mosenda si re. Dios ra co mosenda mbasi tuchi Nínive jenda si. Sā Nínive jenda huiicuā ndecha Jonás ñee mose ee no. Aico raque ñee jēje, co mosenda je. Jē secheē jemumbate chōchĩ nguiā ā. Se quia raque ererecua tuchi Jonás si. Nyebe ra Dios jembasi tuchi mbia icuā ndea rea mose.

Nanderesa quiarei mbae resae nanderete je

³³ Nande lámpara mendi mose, nandemiñ aroneate mbaequi re. Nandemiñ aroneate mbae mo ye. Nandemingo quia ibate erenda rese. Mbia resae ja sacuā. ³⁴ Nanderesa quiarei mbae resae nanderete je. Nanderesa turā mose, nanderete abe ra oso turā. Naneeresa icuā mose, nanderete abe ra oso icuā icuā no. ³⁵ Tata rendi rā jēingo bei. ³⁶ Tata rendi rā jēingo bei mose, jemaē turā nda mbae ja rese cote. Sā tata rendi riqui nanderesae no, i que Jesús mbia mbaaquiātu ra.

Jesús ñee asi fariseos je

³⁷ Jesús ñee jare que fariseo mo ñee ee cote ra. —Nyao rā sechuchúaa. Terequiaru serese, i que ñee Jesús je ra. Jesús que oso erese ra. Ngoi que quiaru cote ra. ³⁸ Fariseo que ñee uchiangui re ra. —Jesús choi quiiriā ño quiaruchĩ, i que uchiangui re ra. ³⁹ Jesús que ñee asi ee cote ra. —Jēo achō ño jēirei ireichĩ nguiā. Jeñiangui renda quia eicuāte re. Jeñiangui renda quia jēirei āte nguiā. Abei chiāte chō jēingochĩ jeñiangui re. ⁴⁰ Nandeo achō eā ño ngue Dios saā nguiā. Nandechiangui renda abe chō ngue Dios saā ndesē. ⁴¹ Abei chiāte chō jēingochĩ jeñiangui re ā. Jeñiangui renda turā mose, eĩ nda jēturā ja rei. ⁴² Aba mbia eā tuchichĩ jē, Fariseos. Mbae a jemondo mondo tuchi raque Dios je.

Jenyesequa eãte quia erese jeñiangui re re. Jẽingo turã eãte quia mbia rese no nde. Ûquĩ jẽsaã jiri ae. Mbae a abe jemondo Dios je. ⁴³ Aba mbia eã tuchichĩ jẽ, Fariseos. “¡Serendarã turã nguiatu se jẽ!” jenyete chĩ nguiã mbia ñumunua mose. “Sã mbia sererecua i nande je”, jenyete chĩ nguiã no. ⁴⁴ Aba mbia eã tuchichĩ jẽ, Fariseos. Embesasa abe no. Jenguasu jẽsaã saã techĩ nguiã mbia je. Mbia raaque tãsa rã ño jeñiangui renda re. Jeñiangui renda soõ ño nguiã. Erondete. Sã eraaque tãsa yenda soõ no. Mbia jirandu eã ndaque jeñiangui renda soõ ndese, i que Jesús ñee fariseos je ra. Embesasa je abe no. ⁴⁵ Embesasa mo ngue ñee Jesús je cote ra. —¿Mbaerã ereico ñee ure abe je re? i que ra. ⁴⁶ Jesús que ñee ùquĩ abe je ra. —Aba mbia eã tuchichĩ jẽ abe. Jeñee tuchite quia mbia je ã. Dios cheẽ jembeta mbeta tuchichĩ nguia mbia je ã. Mbia echeẽ mumbayã aroneate chee quia ã. Jẽ si chõ jeñee jemumba mumba nguiã ã. ⁴⁷⁻⁴⁸ Cose ndare rã si jẽingo nguiã ã. Jenamei na si. Sã ñi jenamei icuã icuã ndiqui Dios cheẽ mbuchecuaa je cose no. Eĩ jenyete si chõ nguiã ã no. ⁴⁹ Dios quiarei earacua tuchi. Ae que ñee jẽje ra. “Secheẽ mbuchecuaa emo emo nda amondo mbia je. Mbia icuã icuãte ra secheẽ mbuchecuaa je. Secheẽ mbuchecuaa mo iquia chee, i que Dios ñee nda. ⁵⁰⁻⁵¹ Ae Dios quiato iquia iquia quia cose nae, ùquĩ ñi nda Dios jembasi cote. Sã mbia Abel iquia cose no. Sã mbia Zacarías abe iquia altar jii no. Sã mbia Dios quiato iquia iquia bei cose no. Ûquĩ ja rĩi nda Dios jembasi cote. ⁵² Aba mbia eã tuchichĩ jẽ. “Ure mii ño Dios cheẽ ureicua nguiã ã”, jenyete choõño ño nguiã ã. Dios cheẽ jẽisi turã eãte quia ã. Mbia siquise mose Dios rese, jẽingo emingo eãte erese ã no. Jẽ abe chee jẽingo eãte erese ã no, i que Jesús ñee embesasa je ra.

⁵³⁻⁵⁴ Jesús ñee jare que fariseos paama i tuchi ee ra. Embesasa abe paama i nguiã ee no. Ûquĩ ngue ñee ñee tuchi Jesús je ra. —Sã Jesús ucheẽ tasa tasa nande je no. Ûquĩ mose nandeisi serao policíaa, i tuchi que ra. Nyebe eriqui nguiã Jesús rea chemi ñemi.

12

Jeturã nda jẽsaã ñooño chĩ je

¹ Mbia tubiriã ngue ngaẽ ngaẽ nguia Jesús rea cote ra. Cuaacua i tuchi que equia nyuera. Mbia tubiriã tuchi. Jesús que ñee uchimbacuaquiatu je cote ra. —¡Fariseos rã nda jẽingochĩ jẽ! Uturã naa ñooño mbei. ² Ae mbia saã nyecuayã cuayã nguia nae, ùquĩ nda nyecua ja cote. Ûquĩ nda mbia icua ja cote. ³ Ae jeñee nguia itondaru jẽingo mose, ùquĩ nda nyecua ja mbia je cote. Jeñee equia nyiisa isa nae, ùquĩ abe ra nyecua ja mbia je no.

Dios riqui jendeaquiatu bei co

⁴ Tacheẽ nyecua jẽje, Sequiato. Ae “taiquia” i quia jeni nae, ¡ùquĩ si ra jẽsiquichechĩ jẽ! ⁵ Ae aba mombo serĩte quia tata cuasu nae, aque si quiatu jẽsiquiche. ¡Aque si quiatu jẽsiquiche tuchi jẽ! ⁶ Nguireĩ ndei aba queteamba eã jiri. Mbae isiquia mumba eã jiri raque. Dios quia nguireĩ icua jate nguiã. Dios ra tesareĩã nguireĩ mo si. ⁷ Dios riqui jẽ mii mii icua ja co. Dios riqui ngueteã jiri jendese nguireĩ si co. Nyebe jẽsiquicheã mbae mo si.

Jesús quiato chõ se re, jenyete checua chõ nguia mbia je

⁸ “Jesucristo quiato chõ se re”, ae i quia mbia je nae, ùquĩ ñi nda acheẽ turã se abe. “Sequiato chõ ã nde”, ae ra se. Angeles ra ambiirandu ja ùquĩ ndese. ⁹ “Jesucristo quiato chõ se re”, ae iã nguia mbia je nae, ùquĩ ñi nda acheẽ turã eã. “Sequiato eã ño ùquĩ nde”, ae ra se. Angeles nda ambiirandu ja sequiato eã ndese. ¹⁰ Emo ñee icuã mose serĩ, Dios ra echeẽ icuã mbutiã arõte. Emo ñee icuã mose Espiritu Turã ñi, ùquĩ icuã nguia ra Dios mbutiã eã mbei. ¹¹ Mbia icuã icuã nda jẽje serĩ. Jenderao mose mbia rerecua je, ¡jẽquicoi coichĩ nda jẽ! “¿Mañi nande ra ñee ee re?” ¡jenyechĩ nda jẽ! ¹² Huee quia ra Espiritu Turã ñee nguiã jẽje jembucheẽ sacua, i que Jesús ñee uchimbacuaquiatu je ra.

Mbaecha aracuayã

¹³ Emo ngue ñee Jesús je ra. —Sererecua, senongue icuã icuãte seje. Echeẽ na senongueje. Ae ureru secha ure je nae, senongue embuchecha turã eãte seje, i que mbia mo ñee Jesús je ra. ¹⁴ Jesús que ñee ee ra. —¿Mbaerã nda re? “Mbia mbae embuchecha turã turã ee”, iã ngue Dios seje ra, i que Jesús ee ra. ¹⁵ —¿Emo mbae rese ra jemaie maechĩ eosei sacua jẽ! “Sembae tubiriã mose ra seyate cote”, jjenyechĩ nda jẽ! i que Jesús ee ra. ¹⁶ Jesús que ñee ee ra. —Sã mbaecha mo ndiqui no. Ibicha. Sã embae ia tuchite no. ¹⁷ “¿Mañi ae ra se re? ¿Mangue ra aba ererecoquiato re?” i tuchi que mbaecha uchiangui re ra. ¹⁸ “Sembae ruacuã tambucuasutuchi. Quiata a ruacuã. Ì nda sembae ique ja tuchi huee. Ae arecoquiato quia ã nae, ùquĩ nda tenda ata jiri tea seje chã. ¹⁹ Aquiei quiei eã mbei ra se quia cote. Aquiaru quiaru chõ nda se quia cote. Mbae ra ambei mbei chõ nguia cote. Achimbia mbia chõ nda se quia cote”, i raque mbaecha ñee uchiangui re. ²⁰ Dios que ñee ee ra. “Ndearacuayãte ereico co. Co isa chõ nda eremano. Ae ererecoquiato quia nae, aba je chio nda ùquĩ cote”, i que Dios ñee mbaecha je ra. ²¹ Ae mbae munua nua mbei quia nae, ererecoquiato sacua nae, earacuayã tuchi chõ ùquĩ nde. Dios quiato eã ño ùquĩ nde, i que Jesús mbia mbaaquiato quiato ra.

Dios uquiato reaquiato bei

²² Jesús que ñee uchimbaaquiato je ra. —“¿Mbae ra nandeu re?” jjenyechĩ nda quicoi coi jẽ! “¿Ma tiru ra nandemingue re?” jjenyechĩ nda quicoi coi jẽ! ²³ Mbia chiu ae ra mbia mingo eã. Mbia irao abe ra mbia mingo eã no. ²⁴ Sã nguireĩ no. Mbae tiquiayã ndaque. Mbae ishao eã ndaque no. Mbae ruacuã eãte raque embae. Dios quiarei embuquiaru quiaru. Jẽ nguiaerei Dios queteamba tuchi nguireĩ si. Nguireĩ ja si. Jẽ abe Dios ae jembuquiaru nguia jẽ no. ²⁵ Mbia ae ra tiarõ eã. “Se ra atiarombe”, i raque ndua ndua uchiangui re. Dios ae mbia mbutiarõ arõ nguia. ²⁶ Jẽ mbae ñetẽ naa aquiatoã mose, ¿mbaerã jẽingo “mbae cuasu tasaã” i re? Dios quia ra mbae saã ja jẽje. ²⁷ Sã mbae uti turãte riqui no. Mbae ao ao eã ndaque. Ñinyu mburirã eã ndaque. Mbae uti quiarei eturã jiri Salomón si. Salomón turãte raque. ²⁸ Sã Dios quiata mbuturã no. Quiata mano jeite raque. ¿Mañi nda Dios jembuiraõ eã jẽ nde no? ¿Mbaerã jẽingo Dios icuayãte re? ²⁹ “¿Mbae ra nandeu re?” jjenyechĩ nda pare pare i jẽ! “¿Mbae ra nandembei re?” jjenyechĩ nda quicoi coi no jẽ. ³⁰ Eĩ ño Dios quiatoã nguia. Jẽ nguia jendu tesareia mbeite nguia jẽsi. ³¹ Jẽ nguia jẽingo tuchi Dios rese jendecuarã. Ùquĩ mose ra Dios mbae mee mee mbei jẽje. Jenyiurã. Jeñimbeirã abe no.

Jembae jemondo ja Dios je

³² Jẽsiquichechĩ nda mbae mo si, Seriirĩ. Jendu ra umbae mondo ja jẽje. Dios iate ra umbae mondo mose jẽje. ³³ Jembae jemondochõ ño mbaecha reã je. Ì nda jembae tubiriã jẽingo mose ibate cote. Mbae riru ra soro soroã mbei jembae ibate cote. Mbae ra ua eã mbei huee. Mbia ra mbae mbuquiachãyã huee. Chicuaquiareĩ eãte ra huee no. ³⁴ Jẽ jembae mondo mondo mose ibate, jendua ra ibatenda rese cote. Jẽ jembae monoã mose emo je, ibatenda rese ra jendua eãte.

Jẽingoquiato bei chõ nguia

³⁵ Jẽingoquiato bei quia jẽ! Itondaru abe jẽingoquiato quia. ³⁶ Sã ererecua mo no. Oso nguĩnisirã nderequia no. Huee erimba mo ndiqui echuchua raarõ huee. Aque ererecua ru quia eiquesa mbuu mbuu aque cote. Erimba eequia asi ee cote. ³⁷ Erimba uqueã mose nguerecua tu mose, ererecua ia tuchi ra erese. Ererecua ra embuquiaru turã. Ae sí chõ echara chara nguia nguimba je hue no. ³⁸ Ererecua ra tu arõte itondáruu. Itondiite mose abe no. Erimba uqueã mose nguerecua tu mose, ererecua ia tuchi ra erese. ³⁹ Sã emo ñee ndeje no. “Co mose ra mbae mbuquiachãsa ru nembae rirõ”, i ndeje no. Ùquĩ mose ra erequeã. Nembae ra eresarõ mbei esi. ⁴⁰ Eĩ jenyẽ jẽ abe icoquiato. Eĩ ae ra u ibate si. “Tu eãte rei rae”, i mose quia ra achu, i que Jesús ra.

Erimba echeë mumbayã mose, eya tuchi rae

⁴¹ Pedro que ñee Jesús je ra. —¿Aba je ereico ñee ũquí nde? ¿Ure mii je ere? ¿Mbia ja je ere? i que Pedro ee ra. ⁴² Jesús que ñee ee ra. —Dios rimba aba cheë mumbayã nii aico ñee co. Dios rimba aracua riiãico ñee co. Sã ererecua ñee ngũimba turã je no. “¿Sembae esaarõ ja jẽ!” i ee. “Serimba ataque embuquiaru quiaru ja quia no”, i ee. ⁴³ Erimba echeë mumbayã mose, ererecua ia tuchi ra tu mose. Erimba abe ra eya no. ⁴⁴ Ererecua ra ngũimba mii mbei cote, umbae raarõ sacua. ⁴⁵ Sã erimba ndua ndua uchiangui re no. “Sererecua ra tu jei äte”, i ndua ndua. Hue ñee icua icua uataque je huee cote. Iruã nua cote. Quiaru chooño cote. Mbae mbei chooño abe cote. Quiacua quiacua cote. ⁴⁶ Sã ererecua ru quia ngũimba mbuate aque cote no. Ñee ee. “Mbae ra eresaarõ mbei seje cote”, i ngũimba je cote. Ngũimba iruã nua tuchi cote. Ae aba cheë mumbate quia, ũquí ndese ra mbae rasi raã naa cote. ⁴⁷ Ae nguerecua cheë icuate quia nae, ũquí nda ererecua mbasi mbasi bei ucheë mumba mose. ⁴⁸ Ae nguerecua cheë icua eäte quia nae, ũquí nguia ra ererecua mbasi mbasiã jiri ucheë mumba mose. Ae Dios cheë icua tuchi quia nae, ũquí je ra Dios “mbae esaã tuchi seje”, i. Ae je Dios mbae mondo tuchi nae, ũquí je ra Dios “mbae esaã tuchi seje”, i.

Achu chõ ngue mbia mbuchao chao nyesi resẽ, i Jesús

⁴⁹ Ibate si que achu ibii ra. Mbia mae sacua sequirãcuã ndese. Mbia sequirãcuã icua eã ñochĩ namo nyee. ⁵⁰ Mbia ra sembasi tuchi cote. Pare pare aete se quia ndua erese co. ⁵¹ ¿Achu reĩ mbia mbuturã turã sacua serimba je jẽje re? Tei. Achu chõ ngue mbia mbuchao chao nyesi resẽ. ⁵² Mbia chuchua jenda ra ñimbuchao chao nyesi. Nyeremo nda siqui serese serimbarã. Eataque ra ñimbuchao esi. ⁵³ Emo nda eicuãte ngu je seriĩ. Emo nda eicuãte nguiirĩ je seriĩ no. Emo nda eicuãte usi je seriĩ no. Acuani abe ra eicuãte uchari je no. Ari mo abe ra eicuãte nguiirĩ ninisi je no. Eĩ si ra mbia icua icua uchue seriĩ no, i que Jesús ra.

Ae ibatenda ra tu icuãte mbia je nae, aque jëicua eäte chõchi

⁵⁴ Jesús que ñeembe mbia je ra. —“Ama nda nyaaqui”, jenyee bei quia pã i mose ã. Ibei jëicuate raque quia ã. ⁵⁵ “Tenda rasite ra cote”, jenyee bei quia quiririã ichu ichu mose ã no. ⁵⁶ Ibei jëicuate raque quia ã. Tenda abe jëicuate raque quia ã no. Ama abe no. Dios rucucha ra tu mbia je, ¿mbaerã jëingo ũquí icuayãte quiatu re? ¿Mbaerã jëingo jëaracua raã naa nde?

Ae eicuãte riqui jẽje nae, “nandeico turã ño nguia”, jenyee chõ nguia ee

⁵⁷ ¿Mbaerã jëingo mae sereãte mbae turã ndese re? ⁵⁸ Emo ñee icua mose jeniĩ mbia rerecua je, jëturã ño ee. Jeñee turã ño ee. Jë ae chõ jeñimbuturã nguia erese. Ñ nda jenderao icua eã. Jenderao mose ra jëtarõ mbei cárcel. ⁵⁹ Huee ra jëingo bei. Jembae mondo ja tuchi chee ee, i que Jesús ra.

13

Jëhui chõ jëicuã si

¹ Aque mose que mbia Jesús mbiirandu Pilato riĩ nda. Pilato nda mbia Galilea jenda mo iquia iquia ra. Mbia ticuasu iquia iquia mose Dios mbaerã. ² Jesús que ñee mbia je ra. —Ae Pilato iquia iquia quia nae, ¿ũquí icuãte riqui reĩ mbia ataque si re? Tei. Jëicuã ja chõ jëingo nguia ã no. ³ Jëhui eã mose jëicuã si, jemano ja chõ nda jë abe. ũquí na si. ⁴ Sã torre de Siloé ngoi mbia ati no. Dieciocho iquia. ¿ũquí eicuãte riqui reĩ mbia ataque si re? Tei. ⁵ Eĩ ja chõ ñene. Jëhui eã mose jëicuã si, jemano ja chõ nda jë abe. ũquí na si, i que Jesús ra.

Ira ia ea mbei

⁶ Jesús que ñee mbia je ra. —Sã amei mo ira tiquia rei no. Ia eã mbei chõ ee no. “Ma taso erea no. Ia cote reae”, i rei que amei nda. Ei oreãte que ee ra. ⁷ Nyebe amei ñee nguia

ngũimba je cote. “Ira a rea ngue aso rei nguiã. Ìa eã mbei chõchĩ seje tres años. ¡Echisia chõ oso jẽ! Ibi riquisã ñooño uã aque”, i que amei ngũimba je ra. ⁸ Sã erimba ñee amei je no. “Co tenda mose nandechisia eã na. Equi tambuturã. Mbae ruusi tachono ñono erao rese. ⁹ Ma ìa eãte co tenda. Ìa eã mose, nandechisia chõ cote”, i que erimba amei je ra, i que Jesús mbia mbaaquiату ra.

Jesús ari rasi mbucherõ

¹⁰ Sábado mose que Jesús chi mbia mbaaquiату quiату ra. Judíos chumunuásaa. ¹¹ Cuña ndasi mo ngue siqui hue ra. Nyiituquia bei dieciocho años nyee. Aba checuayã icuã nguia embasi nguiã. Ari que nguete isoã mbei quia ra. ¹² Jesús que mae ari rasi rese ra. —Echu rã aa, i que ee ra. —Cuña, nderasi ãte cote, i que Jesús ee ra. ¹³ Jesús que o chono erese ra. Aque mose tuchi que ari nguete iso turã cote ra. Ari que ñee turã turã Dios je cote ra. ¹⁴ Ererecua judíos munuasa que paama i tuchi Jesús je ra. Ari mbucherõ mose sábado. —Sábado eã mose chõ nandeico mbae rese ae. Sábado eã mose chõ nandeico erasi mbucherõ ae. Sábado mose chõ Dios mbae resẽ. Erasi mbucherõ aroneate co mose resẽ, i rei que ererecua mbia je ra. ¹⁵ Jesús que ñee ee ra. —¿Mbaerã ereico ndeturã naa ñooño nde? ¿Sábado mose jẽingo ticuasu mbui eã mbei embiu sacuã nde? ¹⁶ ¿Mañi nande ra cuña ndasi mbucheroã co sábado mose re? Judía sí chõ nyeresẽ. Jẽ na si. Satanás que embasi cosete ra. Dieciocho años chee. ¿Mañi ae ra erasi mbui eã esi sábado mose re? i que Jesús ñee nda. ¹⁷ Mbua ataque iate que Jesús cheẽ mose ra. Jesús chiao rese abe eyate no. Ae Jesús ucuãyãte quia, ùquĩ ngue eireĩ tuchi Jesús cheẽ mose ra.

Mbae eĩ na ño Dios rimba re

¹⁸⁻¹⁹ Jesús que ñeembe mbia je cote ra. —¿Mbae rã ño Dios rimba chã? Mbae eĩ na ño Dios rimba re. Sã mbia mostaza eĩ tiquia no. Ieĩ ñetẽte raque etiquia ramo mose. Suri oso quia cote. Ecuasu tuchi chee cote. Nguireĩ uquisa saã nyee erãquiã ndese. Eĩ si chõ Dios rimba re. Ùquĩ miĩ ndaque nyii. Nimbeta tuchi cote. Mbae eĩ na.

Levadura rã ño Dios rimba re

²⁰⁻²¹ ¿Mbae rã ño Dios rimba chã? Levadura rã ño Dios rimba re. Sã mbia levadura ñetẽ mondo mbichae ao ramo mose no. Levadura oso quia mbichae mbuchimatã ja no. Eĩ si chõ Dios rimba re, i que Jesús ra.

Eiquesa chumumbi

²² Jesús que oso quia Jerusalén nda. Tiba tiba que oso quia mbia chuchua mbuchesea sea ra. Mbua mbaaquiату quiату. ²³ Emo ngue ñee Jesús je ra. —Sererecua, ¿mbia miĩ miĩ ño nda siqui ibate nderese re? i que emo ñee Jesús je ra. ²⁴ Jesús que ñee ee ra. — ¡Eiquesa chumumbi rĩ ño jẽso ique jẽ! “Hue rĩ nda aso se abe ique”, i ja jate raque rae. Tei. Ique ja eã nguia nda re. ²⁵ Emo mose ra eiquesa amatã mbei cote. Emo nda iqueã mbei cote. Eiquesa ra jembuu mbuu raque cote. “Sererecua, eiquesa embuquiata rã ure je”, jenyere raque ra seje cote. Acheẽ nda jẽje. “¿Mangue jenda jẽ nde? Jaẽicuayãte se”, ae ra jẽje cote. Eiquesa ra ambuquiatayã mbei jẽje cote. ²⁶ Jeñee tuchi raque ra seje cote. “Urequiaru que equia nderese. Nde que urembaquiату quia. ¿Mañi ere ra urerecha re?” jenyere raque ra seje cote. ²⁷ Acheẽ nda jẽje cote. “Jaẽicuayãte se. Jẽso serecha. Mbae icuã ngue jẽsaã saãte quia resẽ”, ae ra se hue cote. ²⁸ Hue ra jenyeseo seo seje huee cote. Jeñee nda seje. “Abraham ño siquichĩ nderese hue. isaac abe no. Jacob abe no. Dios cheẽ mbuchecuasa ja abe no. Ure chõ urecuchi taicuee a”, jenyere ra nyeseo seo seje huee. ²⁹ Mangue jenda chooñoa nda ngaẽ ngaẽ Dios riichã aque mose. Quiaru quiaru ra equia Dios rese. ³⁰ Ae eaquiature riqui raque namo nae, ùquĩ mo nda eñetẽ na pee cote. Ae eaquiature riqui raque namo nae, ùquĩ mo nguia ra siqui ecuasurã tuchi pee cote, i que Jesús ñee nda.

Jesús ìa eã tuchi Jerusalén jenda rese

³¹ Aque nyaashĩ mose que fariseos ngaã ñee Jesús je ra. —¡Eso a si jẽ! Herodes ndei quia serĩte quia co, i que Jesús mbiirandu ra. ³² Jesús que ñee ee ra. —Eoita rã ño Herodes re. Jẽso ñee ee. “Jesús que ñee nde je ra. ‘Taico mbĩrimbe rã aba checuayã icuã jea jea mbia si. Taico mbĩrimbe rã mbia rasi mbucherõ cherõ. Namõ. Isamami abe. Isamami nongue ra ahui erecha cote’, i que Jesús nde je ra”, jenyẽ oso Herodes je. ³³ Taicobe jiri namõ. Isamami. Isamami nongue abe no. Jerusalén nguia nda sei quia nguia. Sã Dios cheẽ mbuchecuaa mano ja Jerusalén no. ³⁴ Tacheẽ na jẽje, Jerusalén jenda. Seya eãte aicochĩ jendese co. Hue jẽingo mbia iquia iquia beite hue. Dios cheẽ mbuchecuaa iquia iquia. Dios chimondo abe iquia iquia no. Sã nguira riqui nguire reaquiato mundo ujequi re no. “Eĩ tae jendeaquiato”, ae beite rei nguia jẽje co. Secheẽ jẽisi sereã mbei chõchĩ nguia ã. ³⁵ ¡Aico jendecha a cote jẽ! Jemae mae eã nda serese cote. “¡Co chi Dios rucucha ru quia co cote jẽ!” jenyẽ mose, hue ramo nguia ra jemae serese cote.

14

Jesús mbia rete ruru mbucherõ

¹ Jesús que oso rei quiaru fariseo rerecua mo nyuchúaa ra. Sábado mose. Fariseos mo ngue chi erea chemi ñemi nda. ² Huee que emo ndasi riqui Jesús je ra. Erete ruru ja que ra. ³ Jesús que ñee fariseos je ra. Embesasa je abe. —¿Eicuãte se erasi mbucherõ mose sábado mose re? † ere. Jeñee seje, i rei que Jesús ee ra. ⁴ Jesús cheẽ mose que mbia mo ñee eãte ee ra. Jesús que erasi mbucherõ mundo cote ra. ⁵ Jesús que ñee fariseos je ra. —Sã jenimba ticuasú riqui jaã no, ngoi oso ibicua rie. ¿Sábado mose ra jẽsiquiã nde? i que Jesús ee ra. ⁶ Fariseos que ñee sereãte echeẽ mose ra.

Jẽcuasu ra jẽsaã saãchĩ, i Jesús mbia je

⁷ Mbia que erenda turã isirõ sirõ nguia ra. Ngoi sacú ererecua ji. Ucuasu raã naa sacú. Nyebe Jesús ñee nguia ee. ⁸ —Jẽingo mose fiesta, jerenda turã mo nda jẽisirõchĩ jẽ! Mbia chiicuate mo nda tu arõ nde je cote. ⁹ Fiestacha ra ñee arõte nde je. “Ehuã na nde. Erenda turã tamondo sequiato je”, i arõte ra nde je. Ndeireĩte ra huee cote. Pe quiti jiri ra nembucoi cote. ¹⁰ Jẽingo mose fiesta, pe quiti jiri chõ jengoi. Erenda turã isirõ nocoĩ. Ñ nda fiestacha ñee nde je. “Quiatuchu a jiri, Sequiato. Erenda turã tose”, i sacú nde je. Ñ nda mbia mae ja nderese. ¹¹ Ae ererecua saã saã nguia nae, ùquĩ nda siqui eñetẽ na cote. Ae siqui mingüete quia nae, ùquĩ nda siqui ererecuarã cote, i que Jesús mbia je ra.

¹² Fiestacha abe je que ñee cote ra. —Nde fiesta raã mose, “jenyu quiaru serese”, jerechĩ nda mbaecha jiri je jẽ! Erechĩ nda ndenongue je. Erechĩ nda ndequiato tuchi je. ùquĩ mose ra embuchebi nde je. Dios quia ra embuchebiã nde je cote. ¹³ Nde fiesta raã mose, “jenyu quiaru serese”, ere chõ mbaecha reã je. Ere chõ mbia rasi rasi je. Mbia cuatayã je. Mbia resayã je. ¹⁴ Nde fiesta raã naa mose ùquĩ je, ùquĩ nda embuchebiã nde je. Dios quia ra embuchebi nde je, Dios quiato quera si mose. ùquĩ mose ra ndeya tuchi, i que Jesús fiestacha je ra.

Ererecua quiaru mbaecha reã ndese

¹⁵ ùquĩ andu mose que emo ñee Jesús je ra. —Ababi tuchi siqui Dios rese ae ererecua tuchi mose, i que emo ñee Jesús je ra. ¹⁶ Jesús que ñee ee ra. —Sã emo fiesta raã no. “Jenyu quiaru serese”, i sacú mbia tubiriã je. Mbia chiurã ngue esaã tuchi ra. ¹⁷ Echiurã quiche ja mose que ngũimba mo mundo cote ra. “Ae je acheẽ, sã ecuaẽ quiaru cote”, i que ngũimba je ra. ¹⁸ “Ateẽ. Aso eã nda se. Serecoteãte chõchĩ”, i ja ja que ra. “Ibi mo ngue aisi ramote ra. Taso rã erea”, i que emo ucheẽ mundo fiestacha je ra. ¹⁹ “Ticuasú mo ngue aisi ramote ra. Cinco yuntas. Taso rã erea”, i que emo ucheẽ mundo no nda. ²⁰ “Seninisirã mo areco ramote co. Nyebe ra asoã quiaru nderese huee”, i que emo ee no nda. ²¹ Erimba que tu nyebi ñee nguerecua je ra. “Erecoteã ja jate que ra. Quiaru eã nda nderese”, i que erimba embiirandu ja ra. Ererecua que paama i ra. Ngaã eã mose erea.

Ae ñeembe nguiã ngũimba je. “Eso ñee ũquĩ je quiatu no. Mbaecha reã je. Mbia rasi rasi je. Mbia cuatayã je. Mbia resayã je. Ũquĩ ja je echeẽ. Sã ecuaẽ quiaru serese”, i que ererecua ra. ²² Emo mose jiri que erimba ru ñee nyebi ee ra. “Acheẽ ñee ja que ee ra. Co ecuaẽ ndaque nguiã co. Mbia miite que ra”, i que erimba ñee fiestacha je ra. ²³ Ererecua que ñeembe ee ra. “Esobe ñee ñee emo je no. Eru ja sechuchua. Quiaru sacua serese. Ĩ nda sechuchua mbiitãyã jiri. ²⁴ Ae je acheẽ nyii, ũquĩ nda quiaruã tuchi serese cote”, i que ererecua ñee asi ra, i que Jesús ñee nda.

Jesús rui aba siqui jei aronea

²⁵ Mbia tubiriã ngue siqui quia Jesús rui ra. Jesús que uba ñee ee ra. ²⁶ —Ae nyesecua tuchi quia ngu rese sesi, ũquĩ nda serimba eã. Ae nyesecua tuchi quia usi rese sesi, ũquĩ nda serimba eã no. Ak nyesecua tuchi quia ngũinisi rese sesi, ũquĩ nda serimba eã no. Ae nyesecua tuchi quia nguiĩ ndese sesi, ũquĩ nda serimba eã no. Ae nyesecua tuchi quia ngõngue ndese sesi, ũquĩ nda serimba eã no. Ae nyesecua tuchi quia ngueco rese sesi, ũquĩ nda serimba eã no. Ũquĩ ja ra serimba eã. ²⁷ Ae mano sereãte serĩ, ũquĩ nda serimba eã no. Ae siqui sereãte quia serui, ũquĩ nda serimba eã no. ²⁸ Sã emo ñee no. “Sechuchua tasaã na”, i. “¿Manya mbae isiquia ra amumba sechuchua raã sacua nde?” i nyii eao nonde. ²⁹ Sã uchuchua raã naa ndaque no. Ihuaẽ tiquia tiquia raque. Hui bei chõ esi cote. Hue mbia iquia iquia ee cote. ³⁰ “Co uchuchua saã saã ndei cose. Saã ja eã mbei chõchĩ nae”, i ra mbia iquia iquia ee. ³¹ Sã soldados rerecua icua icua emo je no. Guerra raã serĩ ee. Guerra raã nonde ra ndua ndua. “Ae quiatu que soldados tubiriãte embae sesi ra”, i uchiangui re cote. ³² Nyebe guerra raã eã nguiã ee. Nyebe ucheẽ turã mondo nguiã ee. Isho mose. “¿Nandeico turã ño nyiese jẽ!” i ee. ³³ ¡Eĩ jenyi si chõ nguia jẽ! Jendua rã nguia nyii. Jẽ jembae recha ja eã mose, serimbarã eã nda jẽ.

Embiquesa ise quiachamba mose

³⁴ Embiquesa turãte raque. Embiquesa ise quiachamba mose, eicua tuchi cote. ³⁵ Ñio ye echã aronea cote. Eicuãte cote. Emombo bei chõ cote. Ae eisate riqui, secheẽ jeñandu, i que Jesús ra.

15

Oveja quiachã je

¹ Mbia icua ngue Jesús siichã nguia ra. Ae impuestos isi isi quia, ũquĩ abe que Jesús siichã nguia ra. Echeẽ andu sacua. ² Nyebe fariseos ñee icua icua nguiã Jesús riĩ. Embesasa abe ñee icua icua nguiã eriĩ no. —¿Mbaerã Jesús riqui mbia icua isi turã turã nde? ¿Mbaerã eriqui quiaru erese re? i que equia ñee Jesús mbutereã tuchi ra. ³ Nyebe Jesús ñee nguiã ee. Embaaquiato sacua.

⁴ —Sã emo nimba quiachã oveja no. Cien ndei erimba. Co miĩ ngue quiachã ee ra. Aque esi quia quiachã je requia aque. Eataque recha. Noventa y nueve recha. ⁵ Quiachã je rea mose, sui cote. Equiaama cote. Eya tuchi erese cote. ⁶ Tu uchuchua cote. “Quiatuchu rã”, i uquiato je cote. Nguesenda je abe no. “Quiachã je que atea cote ra. ¡Sã jẽ! Jẽya tuchi serese cote”, i que uquiato je ra. ⁷ Tacheẽ nyecua jẽje. Quiachã je mo nyebi mose, Dios iate riqui co. Mbia icua tu mose ee, Dios iate riqui erese co. Ae uturã saã saã nguia nae, ae huiicua secha sereãte quia nae, ũquĩ ndese quia Dios ia eãte re.

Mbae isiquia quiachã je

⁸ Sã cuña mo mbae isiquia diez quereco no. Sã aque miĩ quiachã ndaque ee no. Lamparina ngue emendi eresae sacua nda. Sã uchuchua tii no. Mbae isiquia rea chee. ⁹ Ereare que ñee uquiato ja je ra. “Quiachã je que atea cote ra. ¡Sã jẽ! Jẽya tuchi serese cote, i que uquiato je ra. ¹⁰ Aico ñee nyecua jẽje a. Mbia mo hui mose huiicua si, ángeles ibatenda ia tuchi erese, i que Jesús ra.

Ae ngu secha

¹¹ Jesús que ñeembe ee ra. —Sã amei mo eririĩ nyeremo no. ¹² Eriiriĩ ndiquii que ñee ngu je ra. “Paba, mbae isiquia ataque embu rã se sembaerã. Ndemano nonde”, i que ñee ngu je ra. Ae eru mbae isiquia mbuchecha nguiã ee. Mondo eo cote. ¹³ Isamami nongue que eririĩ nduinda umbae rerecoquiato ra. Ae oso nguiã isho cote. Ngu recha. Huee que mbae isiquia umbae mumba chooño ja ra. Mbae icuã ndibishorõ. ¹⁴ Hue jenda mbia chiu que uate cote ra. Amei ndiriĩ abe riãcuã nyee que ra. Umbae mumba chooño jare. ¹⁵ “Taquiei quiei rã oso ererecua mo je”, i chee. “Teasu socoi esaarõ na serimba”, i chee ererecua mo ee. ¹⁶ “Teasu chiu au chõ mbichĩ ira a. Seriãcuã tuchichĩ”, i chee amei ndiriĩ. Emo ngue embuquiaruã mbei ra. ¹⁷ “Paba rimba chichĩ quiaru turãte sechuchua huee, seriãcuã mose aa. ¹⁸ Tasobe rei Paba rea. Tacheẽ ndei oso ee. ‘Seicuã tuchite que ndeje curi ra, Paba. Paba ibatenda je abe no. ¹⁹ Seriiriĩ ere eã seje cote. Nderimbarã taico cote’, tae rã oso Paba je”, i que ndua ndua uchiangui re cote ra. ²⁰ Ngu rea que esi cote ra. Isho ereco mose que eru mae erese ra. Amei ia eã tuchi que eriqui erese ra. Amei ngue oso uchã nguiiriĩ ndese oo ra. Equiaama. Eritii riite no. ²¹ Ngu je que eririĩ ñee ndei cote ra. “Seicuã tuchite que ndeje curi ra, Paba. Paba ibatenda je abe no. Seriiriĩ ere eã seje cote”, i rei que ngu je ra. ²² Eru que ñee ngũimba je cote ra. “Eirao turã mo emondo seriiriĩ je. Eiyorã abe mo emingue ee. Anillo mo abe emingue eo rese. ²³ Ticuasú quira mo jẽquishĩ echo je. Nandequiaru tuchi erese. Fiesta nandesã ee. ²⁴ Seriiriĩ ngue mano naanguia oso curi resẽ. A eru quera si raanguia seje a. Quiachã tuchi que oso serecha ra. A erube seje a cote”, i que amei ngũimba je ñee nda. Eya tuchi cote. Nyebe fiesta raã nguiã nguiiriĩ je.

²⁵ Amei ndiriĩ nongue que siqui úcoo ra. Ngasẽ ndaque u quia uchuchúaa cote. Tõotõ i que ehandu ra. Mbia cheĩ cururi abe andu. ²⁶ Ñee ngue erimba mo je ra. “¿Mbaerã eriqui toõtõ i re? ¿Mbaerã mbia riqui nyuruqui re?” i que amei ndiriĩ ndiquii ra. ²⁷ Erimba que ñee ee ra. “Ndenongue que tu ngasẽ nderu je ra. Nyebe ticuasú iquia nguiã ee”, i que erimba ñee ee ra. ²⁸ Ae enongue paama i nguiã ngu je. Ique sereã nea ngu chuchúaa. Ae eru tu nguiã usẽ ñee ee taicuee. “Eique rã mae ndenongue rese”, i rei que eru ee ra. ²⁹ Eriiriĩ ngue ñee ngu je ra. “Cosete que aico rei quiei quiei ndeje. Ndecheẽ ngue amumba mumba eãte quia emo mose. Mbae mo ngue ereiquia eã mbeite seje. Sembae fiesta raã sacuã sequiato rese. ³⁰ Ae tu ramo ndeririĩ, ¿mbaerã ticuasú mo ereiquia ee re? Umbae que emumba chooño oso curi resẽ. Siqui siqui cuña icuã ndese. ¿Mbaerã ereico fiesta raã ee re?” i que eririĩ ngu je ra. ³¹ Eru que ñee echeẽ mose ra. “A ereico beite serese a resẽ, Echo. Sembae ja chõ nembraerã ndesẽ. ³² Ndenongue quiatu que quiachã nandesĩ resẽ. Mano naanguia oso nandesĩ. A eru si quera raanguia nande je a. Nyebe fiesta nandesã ee. Nandeya tuchi rã erese”, i que eru nguiiriĩ nongue je ra, i que Jesús mbia je ra.

16

Ererecua rimba mo icoquiato

¹ Jesús que ñee uchimbãaquiato je ra. —Sã ererecua mo mbaechate riqui no. Erimba mo ngue embae saarõ ja quia ra. “Nderimba que nembãe mbuquiachã quiachã nguia ra”, i que mbia mo ererecua mbiirandu cote ra. ² Ererecua que ñee ee ra. “¿Mbaerã mbia riqui ñee nderĩ seje re? ¿Cuentas esaã saã mbia mbae ja jẽ! Sembae raarõsa eã nda nde cote”, i que ererecua ngũimba je ra. ³ Erimba que ndua ndua uchiangui re cote ra. “¿Mañi ae ra sequia sererecua se mombo mose re? Sequirãcuã neate quiei quiei sacuã ndesẽ. Seireĩte ache ache i mbia je. ⁴ Ñũquĩ ño nda asaã ee nda. Ñ nda mbia seisi turã uchuchúaa sembae eã mose”, i que erimba uchiangui re ra. ⁵ Ae deber i quia ererecua je, ñũquĩ je que erimba ñee nda. Co miĩ miĩ je. “¿Manya deber ere sererecua je re?” i que erimba emo je ra. ⁶ “Cien latas de aceite que deber ae ee ra”, i que erimba je ra. Erimba que ñee ee ra. “Nembãe cuenta nandemombo chõ. Emo nandesã asi. Cien eã nda cote. Cincuenta achõ ño nda cote”, i que erimba ee ra. ⁷ Ae deber i quia ererecua je, ñũquĩ mo je que erimba ñee no nda. “¿Manya deber ere sererecua je re?” i ee. “Cien bolsas de trigo que deber ae ee ra”, i que erimba je ra. Erimba que ñee ee ra. “Nembãe cuenta nandemombo chõ. Emo nandesã

asi. Cien eã nda cote. Ochenta achõ ño nda cote”, i que erimba ñee ee ra. ⁸ Ererecua que jirandu erese cote ra. “Serimba aracua chõ eriquichĩ nde no”, i que ererecua ra. Mbia ibi jenda aracua tuchi chõchĩ Dios quiato si. ⁹ Acheẽ tuchi quia jêje co. ¡Mbae isiquia jemondo mondo quia ibatenda je jẽ! Eĩ nda jẽquiato jiri. Eĩ nda Dios jẽisi quiatu turã ibate jembae ua mose. Huee ra jẽingo bei cote.

¹⁰ Ae mbae ñetẽ saarõ turãte quia, mbae tubiriã abe ra esaarõ turã nguia. Ae mbae ñetẽ saarõ turã eãte quia, mbae tubiriã abe ra esaarõ turãya nguia no. ¹¹ Jẽ jembae mondo turã eã mose Dios je, Dios ra mbae turã mondo eã jêje ibate. ¹² Jẽ Dios mbae raarõ turã eã mose, ¿aba quia ra mbae mondo jêje jembraerã tuchi cote re? ¹³ Co mi erimba siqui aronea ererecua nyeremo ndese. Ererecua nyeremo mose, huee ra erimba nguerecua nongue ucuãya. Ererecua nongue ra ebite. Ae ndua beite quia mbae isiquia rese nae, ùqui siqui aroneate Dios rese. Ae siqui beite quia Dios rese nae, ùqui ndei ndua eã jiri mbae isiquia rese, i que Jesús ra.

¹⁴ Fariseos que chi Jesús cheẽ andu ja ra. Mbae isiquia quiato tuchi que ùqui nda. Nyebe ñee icuã nguia Jesús cheẽ mose. ¹⁵ Nyebe Jesús ñee asite nguia ùqui je. —Jẽ nguiarei jeturã jembuchecua tuchi mbia résa. Dios quiarei jeñiangui renda icua tuchi quia co. Ae eturã abareãte riqui mbia je nae, ùqui Dios ucuãyaate quia co.

Dios cheẽ nda io ja

¹⁶ Moisés chimbessa que mbia mbaaquiato quiatu nyii ra. Dios cheẽ mbuchecua chimbessa abe que mbia mbaaquiato quiatu nyii ra. Juan tu nonde. Juan ngue Dios cheẽ turã senei senei cote ra. “Mbia rerecuarã tuchi ra Dios cote”, i bei que Juan nguia ee cote ra. Nyebe mbia riqui nguia ñee. “Dios rimba ra se”, i tuchi mbia quia ã cote. ¹⁷ Ibei ua arõte quia co. Ibi abe ua arõte quia co no. Embesa ji Dios cheẽ nguia ra uayã mbei. Io ja rae.

Eicuãte ngüinisi mombo mose

¹⁸ Mbia ngüinisi mombo mose, ngüinisirã mo nderequia mose, eicuã tuchi ùqui. Adulterio, i que ùqui je ra. Ae eru mombo, emo aque rerequia mose, eicuãte ùqui abe no.

Mbaecha mo oso tata cuasu

¹⁹ Sã mbaecha tuchi mo ndiqui no. Huiirao turã mingue mingue bei. Huiirao nininya mingue mingue bei. Fiesta que esaã saã mbei quia ra. Umbae mbae isiquia mumba choño mbae rese. ²⁰ Sã mbaecha reã mo abe riqui no. Lázaro, i que ee ra. Erete reechu echu que ra. Huee que Lázaro riqui chĩ mbei ngoi ra. Mbaecha chuchua taronda jii. ²¹ Lázaro riãcuã ngue ñee mbei quia ra. “Mbaecha chiu rire nda au rã ña”, i tuchi que equia uchiangui re ra. Nõoño ngue ngaẽ ngaẽ nguia erete reechu rere rere ra. ²² Lázaro mbaecha reã ngue mano cote ra. Angeles que equerao mbae turãsa Abraham ndea ra. Mbaecha abe que mano nda. Mbia que echati ra. ²³ Mbaecha que oso tata cuasu cote ra. Isho que mae Abraham ndese ra. Lázaro abe. ²⁴ Sã ñeemombo mombo Abraham je no. “Paba Abraham, ndeya eã jiri serese ae. Serasite aico tata réndii a. Lázaro embu rã. Sã o mbia rã i je sechuru mbia sacua”, i rei que mbaecha ñeemombo Abraham je ra. ²⁵ Abraham ngue ñee ee cote ra. “Mbae tubiriãte que nembae nyii resẽ. Lázaro quiato que mbae rasi saã tuchi quia nyii ra. A eriqui turãte a cote, nde nderasi rasi mose cote. ²⁶ A jenda mo oso aroneate erasa ndeje hue. Hue jenda abe tu aroneate erasa ure je aa no”, i que Abraham mbaecha je ra. ²⁷ Mbaecha que ñeemombobe Abraham je ra. “Lázaro chõ emondo Paba chuchúaa no, Abraham. ²⁸ Hue senongue cinco chi hue. Sã Lázaro si ñee ee. Embiirandu. Ñ nda ecuaẽ eã mbae rasi raã a”, i rei que mbaecha ñee Abraham je ra. ²⁹ Abraham ngue ñee ee ra. “Ndenongue Moisés chimbessa rerequia hue. Dios cheẽ mbuchecua cheẽ abe rerequia hue no. Sã ùqui mumbayã”, i que Abraham ee ra. ³⁰ Mbaecha que ñeembe Abraham je ra. “Embessa ji rerequia raque. Mano je oso mose ñee ee, aque cheẽ nguia ra emumbayã cote. Huiicua nda esecha cote”, i rei que mbaecha

ñee Abraham je ra. ³¹ Abraham ngue ñee ee ra. “Ndenongue Moisés chimbese mumba mumba mose, mano je cheẽ abe ra emumba no. Eraaque mo quera si je ñee mose ee, aque cheẽ abe ra emumba no”, i que Abraham ñee mbaecha je ra, i que Jesús ra.

17

Mbae icuã nda nandesaã uquiachĩ emo je

¹ Jesús que ñee uchimbaaquiato je ra. —Mbae icuã nguiarei siqui bei tuchi mbia mbiicuã nonde. Ae ñee nguia mbia je nae, “mbae icuã esaã” i nae, eicuã tuchi chõ ùquĩ nde. Ae “mbae icuã esaã” i nae, ùquĩ nda mbae rasi saã tuchi cote. ² Ae ra mbae icuã saã uquia seicua mo je nae, ùquĩ nda mbae rasi saã tuchi cote. Ùquĩ nda aba mombo chõ ama ndisa ye nyii re chã. Sita resebe ecua ji mondo. Ñ nda mbae icuã naa uquia eãte rei seicua je. ³ ¡Jẽingo choõnoa ño nguia jẽ! Nderesenda icuã mose ndeje, echeẽ ño ee. “Nandeico turã ño”, ere ee. Hui mose huicuã si, eicuã si etesarei chõ nde. ⁴ Sã nderesenda mbae icuã naa naa siete veces ndeje no. Sã ñee ndaque siete veces ndeje no. “Mbae icuã nda asaã eã ndeje cote”, sã i raque ndeje no. Eicuã si etesarei chõ, eicuã mbei bei raque, i que Jesús ñee ee ra.

Jẽ Dios icua jiri mose, eĩ nda mbae mo jeñee mumba eãte rei

⁵ Jesús chimbaaquiato je ra. —Dios eicua tuchi rã ure je, i que ñee Jesús je ra. ⁶ Jesús que ñee ee ra. —Jẽ Dios icua jiri mose, ñ nda mbae mo jeñee mumbayãte rei. Ñ nda jeñee ndei ira je. “Nde ae echisiqui. Nde ae si echitiquia ama ndisha ite re”, i ira je. Ñ nda ira jeñee mumbayãte rei, jẽ Dios icua jiri mose.

Dios rimbachõ ño nande re, jenyẽ chõ nguia

⁷ Sã emo nimba mo ndiqui bei turuquia rĩ ticuasuarã arõ no. Ecuasẽ mose tuchúaa, ¿mañi nda ererecua ñee jei ee re? “Equiaru rã”, i jei ee re. ⁸ Tei. I jei eã nda ee. “Sechiurã esaã naa seje. Sequiaru eteaquiato rã nyii. Aquere quia terequiaru nde”, i chõ nda ererecua ee. ⁹ Ererecua ra gracias i eã ngũimba je. Erimbachõ ño ñene. ¹⁰ Eĩ si chõ jẽ no nde. Dios rimbachõ ño jẽ no nde. Ae rĩ Dios riqui ñee jẽje, ùquĩ naa ja mose, ¡jẽingo mingue chõ nguia ee jẽ! “Ae rĩ Dios ñee nande je nae, ùquĩ mii ño ngue nandesaã nda. Erimbachõ ño nande re”, jenyẽ chõ nguia ico mingue, i que Jesús ra.

Jesús mbia leproso ata mbucherõ

¹¹ Jesús que ngata si Jerusalén icha rui ra. Galilea rĩ ngue écoi quia ra. Samaria rĩ abe que écoi quia ra. ¹² Jesús que ngasẽ sucha tubiriã moo nda. Hue que mbia rasi mo chi ee ra. Diez que ra. Eire rasi ja que ra. Lepra, i que ùquĩ mbia rasi je ra. Erasi que chi icúe isho jiri Jesús si ra. ¹³ Ùquĩ mbia rasi que ñeemombo mombo Jesús je ra. —¡Jesús! ¡Mbia mbaaquiatusa! Urembucherõ na ae, i que ñeemombo mombo ee ra. ¹⁴ Jesús que mae erese cote ra. Ñee ngue ee ra. —Eno. Jẽso jendete reacquia sacerdotes je, i que Jesús ee ra. Ecuata mose chõ ngue nyerõ ja ra. ¹⁵ Ucherõ ndese mae mose que co mii ndu nyebi ñee Jesús je ra. Eya tuchi que ñeemombo mombo Dios rĩ nda. ¹⁶ Ngoi que ngũã ndese Jesús resa quitu ra. Nyibi que u ñee ee ra. Gracias i tuchi que Jesús je cote ra. Samaria jenda que ae ra. Judío eã ngue ra. ¹⁷ Jesús que ñee nda. —Eatate que ambucherõ. ¿Ma eataque ma nde? ¿Ma nueve ma nde? Nyebiã ñochĩ ecuaẽ gracias i seje. ¹⁸ Co mii tuchi chõ tuchĩ nyebi gracias i Dios je co. Judío eã ndaque, i que Jesús ra. ¹⁹ Jesús que ñee erasi je cote ra. —Ehuã. Eso cote. Nde que seicua ra. Nyebe arembucherõ nguã, i que Jesús ee ra.

Mbia chiangui re quiato Dios riqui nguã mbia rerecuarã

²⁰ —¿Manosete ra Dios ru íbii mbia rerecuarã tuchi re? i que fariseos ñee Jesús je ra. Jesús que ñee ee ra. —Mbia ra mae eã erese. ²¹ “¡Aa chõ Dios riqui mbia rerecuarã jẽ!” iã ndae. “¡Pee chõ Dios riqui mbia rerecuarã jẽ!” iã nda eno. Mbia chiangui re quiato Dios riqui nguã mbia rerecuarã, i que Jesús ra.

²² Jesús que ñee uchimbaaquiatu je cote ra. —Namo jiri ra jẽ seosei osei setiã mose cote. “Jesús nda siqui mbirĩ na nanderese chã”, jenye rei nda re. ²³ “Hue Cristo riqui hue”, ichõĩño nda mbia jẽje serĩ. “Pe eriqui pe”, ichõĩño nda jẽje no. “Nyia” jenyechĩ nda ee jẽ. Ñeeñoõno ndae. ²⁴ Sechecuayã nguia ra achuã. Mbia ra mae ja quiatu senininya rese seru mose. Sã mbia riqui mae jate ama pirirã i rese no. Eĩ ae quia ra u mbia mumae ja. ²⁵ Sechube nonde ra mbia icuã tuchi seje. Mbae rasi ra asaã tuchi rã. Ae siqui namo ã mbia, ùquĩ nda seririrõ tuchi rã. ²⁶ Sã Noé mosenda mbia siqui sereã tuchi Dios rese no. Eĩ si ra mbia siqui sereã Dios rese sechu nonde no. ²⁷ Sã Noé mosenda mbia quiaru chooño no. Ndua rocoĩ Dios rese. Sã ngũinisirã nderequia chooño no. Sã mbae raã ñooño ndua rocoĩ Dios rese no. Sã Noé ique chee arca ye no. Sã ama ndicuas tu cote no. Sã mbia mano ja no. ²⁸ Sã Lot mosenda abe mbia no. Sã quiaru chooño no. Sã mbae isi isi chooño no. Sã mbae eĩ tiquia chooño no. Sã uchucharã naa ñooño no. Sã mbae raã ñooño no. Ndua rocoĩ Dios rese no. ²⁹ Sã Lot usẽ nyee hue si cote no. Sã Dios tata mbu ibate si cote no. Sã Sodoma jenda oquei ja aque mose no. ³⁰ Eĩ si ra mbia mbae raã ñooño. Seru mose chee. Ndua rocoĩ serese. ³¹ Emo siqui mose taicuee se tu mose, ique eã nda uchuchua umbae rerecoquiatu. Ae siqui úcoo, nyebiã nda u uchuchua no. ³² ¡Lot ninisi rã nda jẽingochĩ jẽ! ³³ Ae ngueteãte quia ngueco rese nae, ereco ra quiachã esi. Ae ngueteã eãte quia ngueco rese nae, aque reco quia ra quiachãysi. ³⁴ Sechu mose, aque isa ra nyeremo chí uque quisa ye. Co miĩ nda arao. Enongue ra siquichõ. ³⁵ Cuña nyeremo nda chí mbua tocho no. Co miĩ nda arao. Enongue ra siquichõ no. ³⁶ Mbia nyeremo nda chí úcoo no. Co miĩ nda arao. Enongue ra siquichõ no, i que Jesús ra. ³⁷ —¿Mangue ra ùquĩ mangue re, Jesús? i que echimbaaquiatu ra. Jesús que ñeembe ee ra. —Ae rĩ mbae raaque riqui chí nae, huee ra urubu choi ja tuchi, i que Jesús ra.

18

Eru cheecha ñee chiibe ibe ererecua mo je

¹ Jesús que ñee uchimbaaquiatu je ra. —Sã mbia riqui ñee mbei Dios je. Sã tesareia mbei ñee Dios je. ²⁻³ Sã eru cheecha mo ndiqui no. Oso chiibe ibe ñee ererecua je no. “Ae sembae quereco nae, sã aque sembae meembe seje”, i chiibei ibei ererecua je. Dios quiatoã ndaque ererecua. Mbia quiato biãte raque aque ererecua. ⁴⁻⁵ Ererecua que eru cheecha cheẽ ñanduchõ nyii ra. Eru cheecha que ñee i i tuchi ee ra. Ererecua que ndua chee uchiangui re ra. “Ari riqui ñee chiibei ibei tuchichĩ seje co. Echeẽ tamumbayã na”, i chee que ererecua ra, i que Jesús ñee uchimbaaquiatu je ra. ⁶ Ñeembe que ee ra. —Sã ererecua ari cheẽ mumbayã nyee no. Ererecua icuãte raque. ⁷ Eĩ nda Dios uquiato cheẽ mumbayã no. Dios quiato riqui ñee ñee mbei Dios je co. Arõ mose. Isa abe. Dios riqui uquiato ucuãyãsa riisu isu raque co. ⁸ Dios ra uquiato cheẽ mumbayã nyee cote. Se tube mose íbii manya sequiatio ra chí bei ñee Dios je reae, i que Jesús ra.

Mbia nyeremo ñee Dios je

⁹ Ucuasu raã naasa mo ngue chí Jesús je ra. Mbia ataque ririrõte que equia ra. Mbia ataque isi teã teã mbei. Nyebe Jesús ñee nguia ùquĩ je. ¹⁰ —Sã mbia nyeremo nyoĩ ique Dios chuchua no. Ñee Dios je no. Co miĩ ngue fariseo ra. Enongue que impuestos isi isi quia ererecua mbaerã nda. Mbia mbiirĩ irĩsa que ae ra. ¹¹ Fariseo que ñee ndei Dios je ra. “Dios, seturãte se. Mbia icuã na eã ño se re. Co mbia mbiirĩ irĩsa rã eã ño se re. Mbae mbuquiachãsa eã ño se no nde. Acheẽ ñooño eã ño se re. Emo ninisi rese aicoãte se. Mbia mbiirĩ irĩ ãte quia co. ¹² Aquiaruã mocoĩte quia ndua bei nderese co. Diezmos amee mee mbeite quia ndeje co”, i rei que fariseo ñee Dios je ra. ¹³ Aba mbiirĩ irĩsa que chí isho ra. Uãquĩ ngue embucheseco ibi quitu ra. Uchiã ngue eisi ñee Dios je ra. “Ndeyayã ño serese, Dios. Mbae icuã asaã saã mbei chõchĩ nguia co. Seyayã tuchichĩ seicuã ndese”, i que ñee Dios je ra. ¹⁴ Tacheẽ nyecua rã jẽje. Dios que aba mbiirĩ irĩsa cheẽ isi turã nda. Ico minguate quiatu nguia ñee ñee Dios je. Fariseo quiatu ngue uturã saã saã mbeite

nguiã ñee Dios je. Nyebe Dios echeẽ ñanuate nguiã. Ae ucuasu saã saã nguia nae, ùquĩ nda Dios isiãte. Ae ico tochei quia Dios je, ùquĩ nguiatu ra Dios isi, i que Jesús ra.

Jesús mbia riirĩ isi turã turã

¹⁵ Mbia que nguiirĩ ngurucuaẽ cuaẽ nguia Jesús je ra. Jesús oco oco sacua ere se. —¿Mbaerã jendiirĩ jendu quia co re? i rei que Jesús chimbaaquiatu ñee mbia je ra. ¹⁶ Jesús quiatu que ñee nda. —Tei. Jêsecha. Sã nguiirĩ ndurucuaẽ seje. Eĩ ño Dios rimba re. Mbia riirĩ na. Ucuasu raã naa eã. ¹⁷ Mbia riirĩ na ño jẽingo Dios isi turã. Eĩ jenyê mose, Dios rimba tuchi ra jẽ cote, i que Jesús ra.

Acuanĩndu mbaecha mo ñee Jesús je

¹⁸ Ererecua mo ngue ñee Jesús je ra. —Mbia mbaaquiatusa turãte nde. ¿Mañi ae ra se siqui bei nonde ibate re? i que ererecua ñee Jesús je ra. ¹⁹ Jesús que ñee ee ra. —¿Mbaerã ereico eturã i seje re? Dios miĩ ño eturã ndesẽ. ²⁰ Dios cheẽ ereicuate resẽ: “Emo ninisi rese ra ereicochĩ. Mbia mo nda ereiquiachĩ no. Mbae ra erembuquiachãchĩ. Erecheẽ ñooñochoĩ nda emo niĩ. Ndeturã ño nderu je. Ndeturã ño ndesi abe je”, i que Dios cheẽ nda, i que Jesús ñee ererecua je ra. ²¹ Ererecua que ñee ndei Jesús je ra. —Ùquĩ ngue amumbayã ja bei quia ra. Señetẽ mosenda bei, i rei que ererecua ra. ²² Jesús eandu mose que ñee ee ra. —Mbae miĩ mo abe eresaã eãte. ã abe esaã. Nembae emondo mondo ja mbia mbaecha reã je. Nde ùquĩ naa mose, mbae tubiriã nda nde, ndeico mose ibate. Nembae mondo ja mose mbaecha reã je, serui eico cote, i que Jesús ee ra. ²³ Ererecua Jesús cheẽ andu mose que echosoi oso serĩte cote ra. Mbaecha tuchite quiatu ngue ae re. ²⁴ Jesús que mae mbaecha ia eã ndese ra. Ñee ngue mbia je cote ra. —Mbaranguiatu ãte mbaecha je ngasẽ sacua ibate Dios rese. ²⁵ Sã ticuasú mo ndiqui oso aroneate aguja sorei rĩ no nae. Eĩ si chõ mbaecha no nde. Oso aronea ibate Dios rese, i que Jesús ra. ²⁶ —¿Aba quia ra oso Dios rea re no? i que mbia Jesús je cote ra. ²⁷ Jesús que ñee ee ra. —Ae mbia saã aroneãte quia nae, Dios miĩ ño nda esaã, i que Jesús ee ra. ²⁸ Pedro que ñee Jesús je ra. —Ure que urembae uresecha ja ra. Siqui sacua nderui, i que Pedro ee ra. ²⁹ Jesús que ñee ee ra. —Emo umbae recha ja mose Dios riĩ, Dios ra esibishorõ tuchi ee. Ae uchuchua secha. Ae ngu secha. Ae usi secha. Ae ngõngue secha. Ae ngũinisi secha. Ae nguiirĩ secha. ³⁰ Ùquĩ mbae ja ra Dios sibishorõ tuchi. Ibii mbia reco bei mose. Aquere ra Dios emingo bei ibate cote, i que Jesús ra.

Mbia ra seiquia, i si Jesús

³¹ Jesús que ñee icúee uchimbbaaquiatu doce je ra. —Co nandesó quia Jerusalén co. Ae Dios cheẽ mbuchecua mbesa mbesa quia serĩ nyii nae, ùquĩ nda io ja cote. ³² Mbia ra semee judíos eã je cote. Mbia ra secheẽ naa naa. Ñee icuã tuchi ra seje. Ñinimbu nimbu ra serese. ³³ Seiruã nua ndae. Seiquia ra cote. Tres nyaashĩ mose ra aquera si, i que ñee ee ra. ³⁴ Echimbbaaquiatu que echeẽ icuayãte ra. —¿Mbae riĩ eriqui ñee nande je re? i que nyue ra.

Jesús eresayã mo mbucherõ Jericoo

³⁵ Jesús Jericó rurubi mose que eresayã mo ndiqui ee ra. Ñeenda jie que eñi ache ache i mbia je ra. ³⁶ Eresayã ngue mbia tubiriã quicoi chandu ra. —¿Mbae ere? i que eresayã emo je ra. ³⁷ —Co Jesús coi quia co. Nazaret jenda coi quia co, i que emo eresayã je ra. ³⁸ Eresayã ngue ñee mombo ra. —¡Jesús! ¡David rucucha! ¡Ndeya eã ño serese jê! i que eresayã ñee Jesús je ra. ³⁹ Ae rane nyoĩ quia, ùquĩ ngue ñee ndei eresayã je ra. —¡Equiriri chõ jê! i rei que ee ra. —Jesús, ¡ndeya eã ño serese jê! i bei bei que Jesús je ra. ⁴⁰ Jesús que tiba cote ra. —Eresayã jendu rã, i que mbia je ra. Eresayã ngue oso Jesús riichã cote ra. ⁴¹ —¿Mañi ae ra ndeje re? i que Jesús ñee ee ra. —Serese embaturã na, Sererecua, i que eresayã nda. ⁴² Jesús que ñee ee ra. —Nderesa que cote ra. Seicuate quiatu ngue se re. Nyebe arembucherõ nguiã, i que Jesús ee ra. ⁴³ Aque mose tuchi que eresayã ndesa turã cote ra. Mae turã ngue cote ra. Jesús rui que esi quia cote ra. Ñee turã turã tuchi

que equia Dios riĩ cote ra. Ae mae erese nae, ũquĩ abe que ñee turã ja quia Dios je cote ra.

19

Taico nderese, i Zaqueo Jesús je

¹ Jesús que ngasẽ Jericoo cote ra. Sucha tubiriã ite riĩ ngue esi quia ra. ² Mbia mbaecha mo ngue siqui ee huee ra. Zaqueo, i que ee ra. Aba mbiĩri irĩsa que ae ra. Impuestos isi isiquia rerecua que ae ra. ³ —Jesús rese tamae. Jesús taicua rã, i rei que Zaqueo ra. Mbia tubiriã ngue Jesús chatite esi ra. Zaqueo jua tuchi que ra. Nyebe mae aroneate nguiã Jesús rese. ⁴ Zaqueo que oso uchã Jesús nonde ra. Nyui que oso ira mo ñi nda. Jesús ucuá rese mae sacua. ⁵ Jesús que ngasẽ Zaqueoqui re cote ra. Soboiba que mae erese ra. —Equichi, Zaqueo. Taso ndechuchua nderese, i que Jesús ee ra. ⁶ Zaqueo que nguichi asi u cote ra. Eyate que Jesús rerao uchuchúaa ra. ⁷ Mbia que ñee ñee tuchi Jesús riĩ cote ra. —¿Mbaerã Jesús si quia mbia icuã nyuchúaa aque re? i tuchi que mbia ñee nda. ⁸ Zaqueo que juã ñee Jesús je ra. —Sererecua, tacheẽ ndeje. Sembae tachisia nyibite riĩ mondo sacua mbia mbaecha reã je. Ae asirõ ñooño mbia si nae, ũquĩ tambuchebibe ee. Eata tambuchebibe ee, cuatro veces, i que Zaqueo Jesús je ra. ⁹ Jesús que ñee ee cote ra. —Arerirõ ngue mbae icuã si namo nda. Judiate quiatu nde re. ¹⁰ Quiachã je requia chõ achu nguiã ibate si co. Quiachã je mingo bei sacua abe chõ achu nguiã ibate si co no, i que Jesús ra.

Mbae isiquia jembaata, i ererecua ngũimba je

¹¹ Mbia que Jesús cheẽ ñandu turã nguia ra. Jerusalén ndurubite que echoi quia ra. —Mbia rerecuarã ja ra Jesús cote reae, i rei que mbia quia ndua ndua ra. Nyebe Jesús ñee nguiã ee. ¹² —Sã mbia mo ndiqui oso ibimo isho tuchi no. “Mbia rerecuarã eico nde cote”, i nonde mbia pe jenda ee. Aquere ra eru mbia rerecuarã cote. ¹³ Sã ñee ja ngũimba je oso nonde no. Diez rei erimba. Mbae isiquia atate que embuchao chao ngũimba je ra. “Ã mbae isiquia jembaata ata oso quia. Sechu mose chee”, i que ngũimba je ra. ¹⁴ Sã hue jenda mbia aque ucuãyãte no. Comisión ngue emondo ra. “Aque urebiãte urererecuarã”, i rei que comisión mondo ra. ¹⁵ Gobierno ngue emiĩ mbei chõ ererecuarã nda. Nyebe uba bei u nguiã uchuchua cote. Ngũimba je que ñee cote ra. Ũquĩ diez. Ae je eriqui mbae isiquia mondo nae, ũquĩ. “¿Sechimee mbae isiquia jembaata ata rei re?” i jaaja que ngũimba je ra. ¹⁶ Erimba mo ngue ñee ee ra. “Ae. Aque miĩ ngue eremeẽ ndei seje nyii, ambaatate que se cote ra. Diez que cote ra”, i que nguerecua je ra. ¹⁷ Ererecua que ñee ee ra. “Coche ñene. Serimba turãte nde. Mbae ñetẽ ngue eresaã turãte quia secheẽ nguire ra. Nyebe mbae cuasu tamondo ndeje cote. Diez pueblos rerecuarã nda nde cote”, i que ererecua ngũimba ñiinda je ra. ¹⁸ Erimba nongue que tu ñee ee cote ra. “Aque miĩ ngue eremeẽ ndei seje nyii, ambaatate que se cote ra. Cinco que cote ra”, i que nguerecua je cote ra. ¹⁹ Ererecua que ñee ae abe je no nda. “Eno. Cinco pueblos rerecuarã nda nde cote”, i que aque ngũimba je ra. ²⁰ Erimba nongue que tu ñee ee cote ra. “Co nembae mbae isiquia co. Tiru ye que areco bei ra. ²¹ Sesiquichete quiatu ngue ndesi re. Erequeteãte quiatu nguiã mbae rese. Ndechitiquia eã abe ereishao shaote quia co. Nyebe nembae mbae isiquia areco quiatuchõ ño nguiã ndeje”, i que aque nguerecua je ra. ²² Ererecua que paama i tuchi ñee ee ra. “Serimba icuã tuchichĩ nde re. Nde sí chõ erecheẽ nguiã sembiirandu. ‘Nembae que ambaata eãte ra’, ere chõchĩ. ‘Areco quiatuchõ ño nguiã’, ere chõchĩ. Se ngueteã mose mbae rese ndeje ¿mbaerã secheẽ eremumba re? ²³ ¿Mbaerã sembae mbae isiquia eremondo eã banco re? Ñi nda ñimbaata jiri rei seje”, i que ererecua ñee asi aque ngũimba je ra. ²⁴ Ae chi huee, ũquĩ je que ererecua ñee nda. “Ae sembae quereco choño nguia nae, jẽsirõ na esi. Ae diez quereco quia nae, aque je jemondo”, i que ererecua ra. ²⁵ Mbia que ñee ererecua je ra. “¿Mbaerã nda re? Eatate ae resẽ. Diez que ae resẽ. ¿Mbaerã nda emo abe eremondo ee re?” i que mbia ñee ererecua

je ra. ²⁶ Ererecua que ñee ee ra. “Ae embaete nae, mbae tamondobe ee. Ae mbae quereco ãte quia nae, embae tasirõ ja esi. ²⁷ Seucuãyãsa jendu ja rã. Ae ñee nguia seriĩ. ‘Aque urebiãte urererecuarã’, ae i quia seriĩ. Ûquĩ jendu ja. Ûquĩ jẽiquia ja sésaa”, i que ererecua ra, i que Jesús ñee mbia mbaaquiату ra.

Jesús ngasẽ Jerusalén

²⁸ Jesús cheẽ jare que ngata si Jerusalén icha rui ra. ²⁹ Jerusalén ndurubite que echoi ngasẽ nda. Betfagé, i que hue sucha je ra. Betania, i que hue sucha erurubinda je no nda. Ibi ibate abe que chĩ huee ra. Monte de los Olivos, i que ee ra. Hue si que uchimbaaquiату nyeremo mondo cote ra. ³⁰ —Aichi súchaa chõ jẽso rã. Burro riiĩ cuasa ra chĩ jẽje hue. Ae ato emo nyui ãte. Jenyura seru seje. ³¹ “¿Mbaerã nda jenyura re?” i mose emo jẽje, jeñee ee. “Nandererecua que jendu i ra”, jenyee ee, i que Jesús ùquĩ nyeremo mondo ra. ³² Nyoĩ que súchaa ra. Ae riĩ Jesús ñee ee nae, ùquĩ ngue nyecua ja ee cote ra. ³³ Burro riiĩ ngue etea ra. Era mose que echa ñee ee ra. —¿Mbaerã jẽingo era era re? i que ee ra. ³⁴ Jesús chimbaaquiату que ñee ee ra. —Nandererecua que jendu i ra, i que echa je ra. ³⁵ Burro riiĩ ngue ecuruchoi Jesús je cote ra. Echimbaaquiату que huiĩrao chono ñono burro arõ nda. Mbia que Jesús mbuchui burro ato cote ra. ³⁶ Jesús ngata mose burro ato, mbia que huiĩrao mbiitee ee ibi rĩ nda. Jesús nonde. Jesús oso sacua hue rĩ. ³⁷ Jesús quiato tubiriã tuchi que nyoĩ quia erese ra. Monte de los Olivos icha re ngasẽ mose, Jesús quiato que tasẽ tasẽ tuchi ra. Eya tuchi que ra. Ñee mombo mombo turã ngue Dios je cote ra. —Jesús riqui mbia mae sayã naa naa tuchi mbia je co, i que ñee mombo mombo turã Dios je ra. ³⁸ Mbia ia tuchi que tasẽ tasẽ nda. —Co nandererecua ru quia ngasẽte co. Co Dios chimbu ru quia ngasẽte nande je co. Dios turã tuchite nande je, i que mbia ia tuchi ra. ³⁹ Fariseos mo abe que chi huee ra. Ûquĩ ngue ñee ndei Jesús je ra. —Ndechimbaaquiату embaasẽ asẽ eã jiri ae, i rei que Jesús je ra. ⁴⁰ Jesús que ñee ee ra. —Sequiato ñeemombo mombo eã mose seriĩ, eĩ ndei ra sita ñeemombo mombo seriĩ cote, i que ñee nda.

⁴¹ Jesús que ngasẽ serĩte oso quia Jerusalén cote ra. Sucha checuate que esi quia ee cote ra. Jesús ia eã tuchi que Jerusalén ndese ra. Nyeseo que erese cote ra. ⁴² Jesús que ñee sucha tubiriã je cote ra. Jerusalén je. —Seyayã tuchi aico nderese co, Jerusalén. Mbia mbiãsa ereicuayã mbei chõchĩ nguia co. Echecuayã mbei chõ eriquichĩ ndeje co. ⁴³ Mbae rasi ra eresaã tuchi cote. Ndeucuãyãsa ra nderiquisã tuchi cote. Nemama nda ecuaẽ. ⁴⁴ Sucha ra embucoi ja ndeyenda. Sita ra embucoi ja tuchi mbia chuchua si. Mbia ra mano ja ndeyenda cote. Dios quiatu ngue ereisiã mbeite nguia. Dios sembu mose nderea, aque mose abe que seisiãte no nda, i que Jesús ñee Jerusalén je ra.

Jesús mbia mbusẽ Dios chuchua si

⁴⁵ Jesús que oso Dios chuchúaa ra. Huee que mbia riqui mbae isi isi querabe ra. Mbae mondo mondo abe mbae isiquia ribishorõ. Jesús que ùquĩ mombo ja Dios chuchua si ra. ⁴⁶ Jesús que ñee mbia je ra. —“ ‘Mbia cheẽsa Dios je’, i ra mbia Dios chuchua je”, i que embesa ji ra. Jẽ nguia jẽicuã tuchite Dios chuchua je re. Mbae mbuquiachãsa chuchuarã ño jẽsaãte chĩ nguia Dios chuchua je, i que Jesús ùquĩ je ra. ⁴⁷ Jesús que mbia mbaaquiату quiatu bei quia Dios chuchúaa ra. Ererecua cuabẽte que mae icua icua nguia erese ra. Sacerdote rerecua. Embesasa abe no. Mbia rerecua ja. Ûquĩ ererecua ja que ñee ñee nguia nyue ra. —¿Mañi nande ra equia Jesús iquia sacua nde? i que ererecua quia ñee ñee nyue ra. ⁴⁸ Ererecua que Jesús iquia aroneate ra. Mbia tubiriãte quiatu que Jesús chandu quia ra.

20

¿Aba nembu re? i mbia ñee Jesús je

¹ Emo mose que Jesús riqui mbia mbaaquiату quiatu Dios chuchúaa ra. Ererecua que ngaẽ ja ñee ee ra. Sacerdote rerecua. Embesasa abe no. Amei abe no. ² Ûquĩ ngue ñee ja Jesús je ra. —¿Mbaerã ereico mbia mbaaquiату quiatu re? ¿Aba “mbia embaaquiату

quiatu” i ndeje re? i que ererecua ja Jesús je ra. ³ Jesús que ñee ee ra. —Se rane tacheẽ jêje. Se rane preguntar tae jêje. ⁴ ¿Aba ñee Juan je re? “Eso bautizar i mbia je” i ee re. ¿Dios eã ño ere no? Jeñee seje, i que Jesús ee ra. ⁵ Ererecua que ndua ndua ja u ra. Ñee ñee ngue u nyue ra. —¿Mañi nande ra echeẽ ndobeishĩ nde? “Dios que Juan mbu ra”, nande aroneate. Eĩ nda ñee nande je. “¿Mbaerã jêingoãte erui re no?” i quiarei ra nande je. ⁶ “Dios eã ngue embu ra”, nande aroneate no. Mbia ataque ra paama i tuchi nande je. Nandeĩ ei ra sita je. Juan quiato tuchi que mbia, i que ererecua ñee ñee nyue ra. ⁷ Ererecua que ñee nyee Jesús je ra. —Ureicuayãte. Aba chõ Juan mbu. Bautizar i sacuaã, i que ererecua ñee ja ee ra. ⁸ Jesús abe que ñee ee cote ra. —Se abe ra acheẽ eã jêje no. Aba chõ “ã esaã” i seje. Acheẽ eã nda jêje no, i que ererecua je ra.

Uva raarõsa icuã icuã nguerecua je

⁹ Jesús que mbia mbaaquiato quiatu cote ra. —Sã mbia mo ndiqui no. Sã ibicha mo ndiqui no. Sã ibicha riqui uva i tiquia tiquia no. Sã ibicha riqui “sembae uvas jësaarõ”, i emo je no. Sã eriqui oso itõte no. ¹⁰ Uva quiche mose que echa ngũimba mo mondo rei umbaerã ndea ra. Ae uva saarõ nguia nae, ùquĩ ngue eisi icuã tuchi ra. Ucuu ucua que erese ra. Eochi que emondo mbuchebe ra. ¹¹ Echa que ngũimba mo mondo rei ereabe no nda. Aque abe que eraarõsa isi icuã no nda. Ucuu ucua que aque abe rese no nda. Eochi que emondo mbuchebe ra. ¹² Echa que emo abe mondo rei ra. Aque abe que eiruã nua mondo mbuchebe no nda. ¹³ Echa ia eãte que ra. “¿Mañi ae ra se re? Seririĩ quiatu tamondo erea cote. Ùquĩ nda ireĩ ireĩ jiri esi cote reae”, i rei que echa ra. ¹⁴ Uva raarõsa mae mose erese que ñee nyue ra. “¿Co eririĩ ndu quia co cote jê! ¿Nandeiquia rei jê! Ì nda uvas nandembaerã ae cote”, i que ñee nyue ra. ¹⁵ Eraarõsa que eririĩ querao pe jiri eiquia ra. Eriiriĩ ngue mano cote ra. ¿Mañi nda echa quia eraarõsa je cote re? ¹⁶ Echa ra oso eraarõsa iquia ja cote. Ibi ra emondo emo je cote. Eraarõ sacuaã, i que Jesús mbia je ra. —¿Ùquĩ nda iquechĩ jê! i que mbia ra. ¹⁷ Jesús que mae erese ñee ee cote ra. —¿Ã embesa ji rese jemae ãte re?

Sã emo ndiqui tuchua ao sita je no.

Sã sita mo ndirirõ mombo no.

Eicuãte eriqui reĩ nguia ee.

Aquere Dios emundua si erese.

“Earonda sacuaã turambi chõ eriqui re”, i ndua si uchimombo rese.

Sã uchimombo rirõ si cote no,

i que embesa ji ra. ¹⁸ Ae ra nyoi ngoi aque sita arõ nae, ùquĩ nda huẽ. Aque sita ngoi mose emo arõ, ùquĩ nda mano, i que Jesús ra. —Aque sita rã ndei se, i chõ ngue re.

¿Impuestos ra uremee ererecua je re? i mbia ñee Jesús je

¹⁹ —Nanderĩ ño Jesús riqui nguia ñee a. Nandeisi rei serao jê, i rei que sacerdotes rerecua ñee nyue ra. Embesasa abe no. Ùquĩ ngue paama i ja Jesús je ra. Jesús isi aronea tuchite que mbia résaa ra. Eireĩte quiatu ngue mbia tubiriã si re. ²⁰ Ererecua que mbia icuã mondo mondo quia Jesús cheẽ andu andu ra. —¿Jêturã jësaã saã oso Jesús je jê! ¿Echeẽ ndese jenyiisaquia quiatu ure je jê! Mbae mo ñi ñee icuã mose, ¿nandeisi rei jê! Ererecua tuchi je nandemondo cote, i ja que ererecua ñee nda. ²¹ Ae chí uturã naa naate Jesús je nae, ùquĩ ngue ñee ee ra. —Jesús, co ereico mbia mbaaquiato quiatu turãte co. Mbia jaje ndeturãte riqui co. Mbia erembaaquiato quiatu turãte quia Dios icha riĩ co. ²² Nyebe ureico nguia ñee ndeje a. ¿Coche mbia mbae isiquia mee mee mose Romano nderecua je re? ¿Uremee nda ee re? ¿Uremee eã nda ee re no? i que ñee Jesús je ra. ²³ Jesús que ùquĩ icuã icuate ra. Nyebe ñee nguia ee. —¿Mbaerã jêingo “ĩ nda Jesús ucheẽ nyabi”, i seje re? ²⁴ Mbae isiquia mo jêteacuquia imbu seje. ¿Aba mbae nombre ñi mbae isiquia rese a re? ¿Aba ãquĩ aingue abe ñi a re? i que Jesús ee ra. —Romano nderecua, i que ñee Jesús je ra. ²⁵ Jesús que ñee ee cote ra. —Romano nderecua mbaerã jemee ño ee.

Dios mbaerã jemee ño ee, i que Jesús ee ra. ²⁶ Jesús que ucheẽ nyabi aroneate ee ra. Ûquí ngue nyuruira jate u Jesús cheẽ andu ra. Nyebe eriqui ñee eã ee cote.

Mbia raaque ra quera si, i Jesús

²⁷ —Mbia raaque ra quera eã mbei, i que mbiamo nguia ñee nda. Saduceos i que ùquí je ra. Ûquí mo ngue nyoï ñee Jesús je ra. ²⁸ —Ã ngue Moisés mbesa nande je ra: “Emo eriiriã mano mose, ngüinisi recha mose, sã enongue mano je ninisi rerequia. Sã tiirĩ ngõngue raaque riĩ”, i que Moisés embesa nande je ra. ²⁹ Sã eriqui mo ndiqui no. Eribi que seis ra. Eriqui que ngüinisirã quereco rei ra. Mano ño ngue tiirĩ ndocoĩ ngüinisi recha ra. ³⁰ Enongue que nguiqui cheecha quereco rei cote ra. Ae abe que mano ño tiirĩ ndocoĩ no nda. ³¹ Enongue abe que equereco rei cote no nda. Ae abe que mano ño tiirĩ ndocoĩ no nda. Ûquí seis ja que ngõngue cheecha quereco ja rei ra. Mano ja tuchi chõ ngue tiirĩ ndocoĩ no nda. ³² Eninisi eru cheecha abe que mano ño nyee cote ra. ³³ Siete que eru nyii resẽ. Mbia raaque quera si mose, ¿abate ra equereco cote re? i que saduceos ñee Jesús je ra. —Ma Jesús ñee icuã no, i chõ ngue re.

³⁴ Jesús que ñee ee ra. —Aa chõ mbia riqui nguia ngüinisi rerequia querabe. Siqui mose íbii. ³⁵ Ae raaque ra Dios mbuquera si nae, ae ra Dios mingo bei nyiese nae, ùquí nda ngüinisi quereco eã mbei huee cote. Ûquí nda ngu quereco eã mbei huee cote no. ³⁶ Huee quiatu ra mbia manoã mbei. Angeles rã mbei ra mbia riqui huee cote. Dios riirĩ tuchi ra eriqui huee mose cote. Embuquerái quiatu ra cote. ³⁷ Moisés abe que mbia mbiirandu ra. “Mbia raaque quera quera bei quia co”, i que Moisés ra. “‘Se rei Dios. Abraham nderecua chõ aico nguia co. Isaac nderecua abe. Jacob nderecua abe no’, i que Dios ra”, i que Moisés embesa ra. Ira ruri rendi mose que Dios Moisés mbiirandu ùquí ndese ra. ³⁸ Ûquí mano ndaque nyii. Ûquí ndeco siqui bei chõ nguia ùquí. Mbia raaque rerecua eã ño Dios re. Mbia reco rerecua chõ ñene. Mbia reco ja chõ siqui nguia Dios je ã, i que Jesús ee ra. ³⁹ —Ndecheẽ turãte, i que embesasa mo ñee Jesús je ra. ⁴⁰ Ae “Jesús nandembiiçuã” i rei quia, ùquí ngue ñee eã Jesús je cote ra.

¿Aba rucucha Cristo re?

⁴¹ Jesús que ñee mbia je ra. —Se abe tacheẽ jêje cote. ¿Mbaerã mbia riqui ñee nde? “David rucucha chõ Cristo re” i re. ⁴² David si que “sererecua” i Cristo je ra. Sã David chimbese Salmos no: Dios que ñee Cristo sererecua je ra. “Ecoi seji.

Nde abe ra ererecua serese.

⁴³ Ae ndeucuãyãte quia nae, ùquí je ra ndequirãcuã atequia tuchi.

Ndequirãcuã tuchi chee ra ùquí si”, i que Dios sererecua je ra,

i que David embesa ra. ⁴⁴ David si chõ “sererecua” i nguia Cristo je. ¿Mañi nda David rucucha Cristo re? Jeñee ño seje, i que Jesús ùquí je ra.

Jesús ñee asi embesasa je

⁴⁵ Mbia ja résa que Jesús ñee uchimbãquiatu je cote ra. ⁴⁶ —¿Embesasa rã ño nda jẽngochĩ je! Ûquí ucuasu saã saã mbeite quia ã. Huiirao turã equereco beite quia ã. “Sã mbia ererecua i nande je”, i beite equia ã. Mbia renda turã abe eirabo rabo beite quia mbia si ã. “Fiestacha jii quia taĩ jẽ”, i abe bei equia ã no. ⁴⁷ Ari eru cheecha mbae abe embutiã tiã nguia ã no. Ucheẽ oco abe esaã saã mbeite quia Dios je ã no. “Í nda mbia mae nanderese”, i chõ nguia. Ûquí nda Dios mbasi tuchi cote, i que Jesús uchimbãquiatu je ra.

21

Eru cheecha mbaecha reã mo mbae mo mee Dios je

¹ Jesús que nyoï nyoï quia Dios chuchúaa ra. Hue que mbia mbaecha riqui ofrenda mondo mondo ofrenda riru ye ra. ² Eru cheecha abe que siqui ra. Ae que centavos

nyeremoño mondo ofrendarã nda. Mbaecha reãte quiatu ngue ae re. ³ Jesús que ñee nda. —Tacheẽ tuchi jêje. Eru cheecha mbaecha reã ngue mbae mondo tuchi mbia ataque si ra. ⁴ Mbaecha quiatu que umbae rire ñetẽ mondo mondo ra. Eru cheecha quiatu nbbbbknnnknnnnnnn gue umbae mii mondo ja nguiã, i que Jesús ra.

Mbia ra Dios chuchua mbucoi ja, i Jesús

⁵ Mbia que ñee ñee Dios chuchua turã nii nda. Tuchua mbarõ ji sita turã nii. Mbae aba queteamba riĩ abe no, Dios chuchua jenda. Jesús que ñee mbia je cote ra. ⁶ —Ae rese jẽingo mae nae, ùquĩ nda mbiamo mbutiã ja cote. Sita mo nda chi eã nyuchuarõ cote. Mbia ra tuchia mbucoi ja tuchi. Dios chuchua ra chĩ eã juã cote, i que Jesús ra.

Mbae ua ja nonde

⁷ —¿Manose ra ùquĩ nde? ¿Mañi ure ra equia irandu mbae ua nonde re? i que Jesús chimbaaquiatu ee ra. ⁸ Jesús que ñee ee ra. —Jêtesa jiri quia jẽ. Mbia ra jembiiĩ irĩchĩ jẽ. “Cristo chõ se re”, i ra mbia ñee ata atate jêje. “Co rei é co cote”, i ra mbia ñee ata atate jêje no. Ùquĩ nda jeñanduchĩ. Ñeeñoño je chõ ùquĩ nde. ⁹ Mbia ra ñee ñee tuchi nyiiquia iquia je riĩ. Guerra riĩ abe no. Ùquĩ mose ra jësiquichechĩ jẽ. Ùquĩ ja rane nda nyecua raque. Aque mose ra mbae ja ua eã ná, i que Jesús mbia mbaaquiatu ra.

¹⁰ —Mbia ra guerra saã tuchi chee. Nyiiquia iquia tuchi rae. ¹¹ Ibi ra nyere nyere tuchi. Mbia mo abe riãcuã tuchi ra aque mose. Emo ñooñoa tuchi ra mbia rasi. Mbia mae sayã nda nyecua tuchi ibei rĩ cote. ¹² Ùquĩ nonde ra mbia icuã icuã tuchi jẽ je seriĩ. Nguerecua je ra mbia jenderao rao tuchi. Ererecua abe icuã icuã tuchi ra jêje. Jêtarõ tarõ tuchi ra seriĩ. ¹³ Ùquĩ mose nda secheẽ jëseni senei tuchi mbia je chã. ¹⁴ ¿Manyae ra ùquĩ ñee ndibishorõ nde? jenyechĩ nda ñee ùquĩ nonde jẽ. ¹⁵ Se chõ nda jaembucheẽ turã nguiã aque mose. Nyebe ra jëucuayãsa jeñee ndibishorõ aroneate aque mose. ¹⁶ Jendu ra jemondo chee mbia icuã je. Jenongue abe ra jemondo chee mbia icuã je no. Jendesenda abe ra jemondo chee mbia icuã je no. Jêquiato abe no. Ùquĩ nda jemo iquia chee no. ¹⁷ Mbia ra jëucuayã tuchi seriĩ. ¹⁸ Jësiquichechĩ nda esi. Jaendeaquiatu tuchi ra aque mose. ¹⁹ Jeñimbirãcuã mose ra Dios jemingo turã mbei.

Jerusalén tiã tuchi rae, i Jesús

²⁰ Soldados Jerusalén mama mose, aque mose ra Jerusalén mbutiã cote. ²¹ Sã Judea jenda choi uchã ibi ibate riichã aque mose. Sã Jerusalén jenda abe choi uchã hue si. Ae chi isho isho Jerusalén si nae, sã ùquĩ nyebibe eã Jerusalén ndiichã aque mose. ²² Aque mose ra mbia mbae icuã ja irara tuchi huiicuã nii. Embesa ji cheẽ nda ique ja aque mose. ²³ Aba mbia eã tuchi ra emo ãquẽ ndiru rerequia mose aque mose. Nguiĩrĩ mbuquiambu je abe no. Mbia ra mbae rasi saã tuchi aque mose. Mbae icuã nda irara tuchi huiicuã nii. ²⁴ Aque mose ra mbia guerra raã tuchi. Mbia ra nyiiquia iquia aque mose. Jerusalén jenda ra sasẽ tuchi aque mose. Mbia ra ecuruchoi choi tuchi tarõ isho. Judfos eã nda chi tuchi Jerusalén aque mose. Dios ra emondochoi chee hue si cote.

Dios riĩrĩ nda tube ibate si

²⁵ Mbia mae sayã ndese ra mbia mae tuchi ibei rĩ cote. Tenda rese. Nyasi rese abe no. Nyasi tata rese abe no. Ama ndisha ra sieu tuchi quia aque mose cote. Mbia ra titi titi i tuchi aque mose. Quiachã tuchi rae. ²⁶ Mbia chiã nda cuaãcuã i tuchi aque mose. “Mbae rasi ra nandesã tuchichĩ nde”, i tuchi ra titi titi i. Ibei jenda abe chee ra quiata quiata cote. ²⁷ Aque mose tuchi ra achube ibii cote. Ibeishĩ ndese ra achu. Senininya tuchi ra achu. Sequirãcuã tuchi ra achu. ²⁸ Ùquĩ ndese jemae mose, jẽo jẽo tuchi aque mose jẽ. Dios ra jendirõ jei mbae icuã si aque mose cote, i que Jesús ra. ²⁹ Jesús que ñeembe ee ra. —Sã higuera riqui no. Sã ira mo ndiqui no. ³⁰ Ero quira usẽ ja mose, “iraro itõ ndacu ra cote”, i chõ mbia nguiã aque mose cote. ³¹ Eĩ si chõ nda mbia mae mbae ja rese cote. Ùquĩ ndese mae mose, “achite Jesús ñi tu a cote”, jenye rae. “Mbia rerecua tuchi ra Dios

cote”, jenyé ra aque mose. ³² Ae siqui quia mbia aque mose nae, ùquĩ nda manoã mbae ua ja mose chee. ³³ Ibei ra ua. Ibi abe ra ua. Secheẽ nguia ra uayã mbei.

³⁴⁻³⁵ Mbia ndua eã mose serese ra achu cote. Ibi jenda ja ra ambua tuchi u. Jẽ nguia seraarõ arõ mbei quia. Mbae icuã ndese siqui rocoĩ. Quiacua siqui rocoĩ. Mbae rese ndua ata ata rocoĩ. Ûquĩ icuã ndese jẽingo mose, jaembuate ra u. ³⁶ Jẽtesa bei quiatu quia serese. Jeñee mbei quiatu quia Dios je. ã mbae icuã jeĩ eã sacua jẽje. Jẽingo turã sacua serese sechu mose, i que Jesús ra.

³⁷ Nyaashĩ mose que Jesús riqui mbia mbaaquiato quiato Dios chuchua ra. Isa que eriqui oso oso bei Monte de los Olivos ra. ³⁸ Isamamimbe que mbia riqui ngaẽ ngaẽ ja bei echeẽ andu ra. Dios chuchúaa.

22

Jesús nandeisi tarõ, i ja mbia rerecua ñee nyue

¹ Achite que fiesta de la pascua cote ra. Mbichae mbuchimatã iriã ngue mbia u u quia aque fiesta mose querabe ra. ² Sacerdotes rerecua que ñee ja nyue ra. Embesasa abe no. —Jesús nandeiquia. ¿Mañi nande ra equia eiquia nonde re? i que equia ñee ñee nyue ra. Eireĩte que eriqui mbia tubiriã si ra. ³ Judas Iscariote, i que Jesús chimbbaaquiato mo je ra. Satanás que ique aque chiangui re cote ra. ⁴ Nyebe aque si nguiã ñee sacerdotes rerecua je. Dios chuchua raarõsa je abe no. —Jesús tamondo jẽje. ¿Mañi nande ra equia ee re? i que Judas ñee ee ra. ⁵ Ûquĩ iate que Judas ñee mose ee ra. —Mbae isiquia ra uremee ndeje, i que Judas je cote ra. ⁶ Judas que eno i mbia ñee mose ee ra. —Jesús tamondo rã jẽje mbia tiãsa, i que ñee nda.

Jesús quiaru uchimbbaaquiato rese

⁷ Fiesta que tu cote ra. Aque fiesta mose bei que mbia riqui oveja iquia iquia querabe ra. Mbichae mbuchimatã iriã ngue eu eu quia no nda. ⁸ Jesús que ñee Pedro je ra. Juan abe je. —Jẽso oveja mbuchi nande je, i que Jesús ee ra. ⁹ Ûquĩ ngue ñee echeẽ mose ra. —¿Mangue ra aba embuchi mangue re? i que Jesús cheẽ mose ra. ¹⁰ Jesús que ñee ee ra. —Jengasẽ mose sucha cuasu, emo i rerao rese ra jema. I ra equerao quia irasa mo ye. Aque rui jẽso bei quia ique chee echuchua. ¹¹ Tuchuacha je jeñee. “Jesús que urembu ñee ndeje ra. ¿Ma cuarto ra urecu quiaru oveja u que re? Sechimbbaaquiato rese”, i que Jesús ñee ndeje ra”, jenyé tuchuacha je. ¹² Tuchuacha ra cuarto cuasu mee jẽje. Mbia quesa ibatenda ra emee jẽje. Embuquiche ji. Huee chõ oveja jembuchi nandequiaru sacua, i que Jesús ñee ee ra. ¹³ Pedro que nyo i cote ra. Juan abe. Jesús cheẽ ndui si tuchi que mbae eĩ ja cote ra. Huee que oveja mbuchi cote ra.

¹⁴ Mbae quiche ja mose que Jesús ngoi uchimbbaaquiato rese quiaru sacua cote ra. ¹⁵ Jesús que ñee ee ra. —Co oveja que ause tuchi quia jendese semana nonde ra. Co mose pascua mose. ¹⁶ Pascua mo nda au eã mbei jendese cote. Dios mbia rerecua tuchi mose chee, i que Jesús ee ra. ¹⁷ Jesús que vino mbeisa isi cote ra. Gracias i que Dios je ra. Ñee ngue uchimbbaaquiato je cote ra. —Co jẽisi. Jembei jaaja jẽ. ¹⁸ Vino mo nda ambei eã mbei cote. Dios mbia rerecua tuchi mose chee, i que Jesús ra. ¹⁹ Jesús que mbichae isi cote ra. Gracias i que Dios je ra. Siquio que mbuchao chao ee cote ra. Ñee ngue ee cote ra. —ã ndei serete rã ã. Serete ra mano jẽje cote. Jendua serete riquio ji rese ã mbichae u mose, i que Jesús ñee ee ra. ²⁰ Eĩ si que Jesús vino mbeisa isi no nda. Quiaru jare. —ã ndei seruqui rã ã. Mbia icuã mbutiã sacua tuchi chõ seruqui re. Dios cheẽ yasu rui si chõ seruqui riqui nguiã mbia icuã mbutiã co. ²¹ Ae ra semee mbia icuã je nae, aque abe riqui quiaru serese a. ²² Co acua raque quia mano nonde co. Dios cheẽ ndui si co. Ae semee nguia mbia icuã je a nae, aque ra mbae rasi saã tuchi. Aba mbia eã tuchi rae, i que Jesús ee ra. ²³ Echimbbaaquiato que mae jaaja nyiese ra. —Aba tuchi ra emee mbia icuã je reae, i ja jate que nyue ra.

Jesús chimbbaaquiato mbia rerecua saã saã tuchi nyue

²⁴ Aquere que Jesús chimbbaaquiatu ñee icuã icuã tuchi nyue ra. —Se quia ererecua tuchi ndesi re, i jaaja que nyue ra. ²⁵ Jesús que ñee ee ra. —Mbia ataque rerecua riqui ucuasu raã naa tuchi ngũimba je ũquĩ. ²⁶ Eĩ jenyechĩ nda jẽ jẽ. “Ererecuarã se”, jenyechĩ nda jẽ. Ae equiatu jiri jemo nae, sã ũquĩ ndiqui uñetẽ naa naa ño. Sã ũquĩ ndiqui tochei chõ nguia. Ae ererecua jemo nae, sã ũquĩ ndiqui ererecua rimba rã tuchi chõ. ²⁷ Ererecua ngoi chõ nguia. Erimba mbae mee mee ño nguia ee. Eĩ eã ño se re. Se quia mbae amee mee nguia jẽje co.

²⁸ Jẽ nguia tu ngue jẽingo beite nguia serese. Se mbae icuã irara tuchi mose. ²⁹ Nyebe ra jaemii tuchi mbia rerecuarã. Sã seru semii tuchi mbia rerecuarã no. ³⁰ Jẽingo tuchi ra serese, se ererecua tuchi mose. Jẽquiaru ra serese. Mbae mo abe ra jembei serese no. Israel ndiirĩ nderecua ja ra jẽ. Judíos rerecua ja ra jẽ, i que Jesús ee ra.

Jesús aicuayãte resẽ, i ra Pedro seriĩ, i Jesús

³¹ Jesús que ñee Pedro je cote ra. —Simón, Satanás que ñee jenii nda. “Ndechimbbaaquiatu emee na seje. Tã tae rã ee. Ma siqui beite Dios rese”, i rei ngue Satanás jenii nde. ³² Acheẽ tuchite que Dios je nderĩĩ nda. Nde Dios icua tuchi sacua. Nde ubabe mose serese, nderesenda abe je echeẽ emingo sacua serese, i que Jesús Pedro je ra. ³³ Pedro que ñee ee ra. —Sererecua chõ nde re. Aico bei ra se quia nderese. Mbia nda sematã ndei nguia. Mbia nda seiquia rei nguia nderese, i que Pedro ra. ³⁴ Jesús que ñee ee ra. —Tacheẽ nyecua ndeje, Pedro. Nguira cheẽ nonde ra erecheẽ ñooño tres veces seriĩ namo, Pedro. “Jesús aicuayãte resẽ”, ere chooño ño nda seriĩ, i que Jesús Pedro je ra.

Embesa ji chee nda ique ja seriĩ cote, i Jesús

³⁵ Jesús que ñee uchimbbaaquiatu je ra. —Jaemondo que mbia mbbaaquiatu quiatu sacua nyii, jëochi que jaemondo. Mbae isiquia mo ngue jendao eã tuchi icua. Mbae rirurã mo abe que jendao eãte. Jëiyao eã abe no. ¿Aque mose mbae eãte jẽje re? i que Jesús ee ra. —Tei. Urembae tubiriãte que ra, i que echimbbaaquiatu ñee Jesús je ra. ³⁶ Jesús que ñee ee ra. —Ae jemo embae rirurã mo nae, jendao cote ae. Ae mbae isiquia mo nae, jendao cote ae. Ae echuuru eãte tiquise mo nae, sã emo isi huiirao ribishorõ ae. ³⁷ Sã embesa ji riqui ñee seriĩ no. “Mbia icuã ndese ra Dios riirĩ mingo chee”, i. ũquĩ nda ique cote. Embesa ji cheẽ nda ique ja tuchi seriĩ cote, i que Jesús ñee nda. ³⁸ —Co tiquise nyeremo ñi co resẽ, i que echimbbaaquiatu echeẽ mose ra. —Coche ñene, i que Jesús ee ra.

Jesús ñee ngu je

³⁹ Jesús que oso usẽ taicuee cote ra. Oso que Monte de los Olivos cote ra. Eĩ mbei que ae quia oso oso huee ra. Echimbbaaquiatu que nyoĩ erese ra. ⁴⁰ Ngasẽ mose que ñee uchimbbaaquiatu je ra. —Jeñee tuchi Dios je. Satanás tã i eã sacua jẽje, i que Jesús ñee ee ra. ⁴¹ Jesús que oso pe quiti jiri esi ra. Ngoi que ngũĩã ndese ñee Dios je ra. ⁴² —Paba, ndebi mose sereaquiatu se, mbae rasi raã eã sacua. Ae sebite nae, ũquĩ esaã eã seje. Ae ndebite nae, ũquĩ nguia tu esaã, i que Jesús Dios je ra. ⁴³ Aque mose que ángel mo tu ibate si ee ra. Embirãcuã sacua. ⁴⁴ Jesús ia eã tuchite que ra. —Mbae rasi ra asaã tuchichĩ nde, i tuchi que ndua ndua ra. Ñee tuchi que Dios je ra. Eiriei ruqui que tiqui tiqui tuchi quia íbii ra. ⁴⁵ Jesús ñee jare Dios je que juã cote ra. Uchimbbaaquiatu rea que esi ra. I que u uque ee ra. Eya eãte quiatu ngue re. ⁴⁶ Ñee ngue ee ra. —¿Mbaerã jẽingo uque a re? Jenyuruã eae. Jeñee na Dios je. Satanás tã i eã sacua jẽje, i que Jesús ee ra.

Mbia Jesús nyucua serao

⁴⁷ Jesús cheẽ ua eã mose que mbia ngaẽ jate ee ra. Judas que tu quia mbia nonde ra. Jesús chimbbaaquiatu raque que ae ra. Ae que Jesús siichã u eritii riite sacua nda. ⁴⁸ Jesús que ñee Judas je ra. —¿Ereico seritii riite mbia icuã je sereacuquia sacua a re? i que Jesús ee ra. ⁴⁹ Jesús resenda que mae u erese ra. Ñee ngue Jesús je ra. —Urererecua, ¿tiquise ra ureuru uru mbia rese re? i que ñee Jesús je ra. ⁵⁰ Jesús resenda mo ngue tiquise uru

sacerdote rerecua rimba rese ra. Eisa sia. Eisa equiatocuti quitinda. ⁵¹—Jêhui esi ae. Coche ñene, i que Jesús ee ra. Oco que eisa rese embucherõ nda. ⁵²Jesús rerao sacua ño mbia ngaẽ nguia reaẽ. Sacerdotes rerecua. Policía abe no. Judíos rerecua abe no. Nyebe Jesús ñee nguia ee. —¿Mbaerã jenyu quia tiquise reru serea co re? Ira jua abe no. Mbae mbuquiachãsa isi rã ño jenyuchĩ nguia serea co. ⁵³Tenda que amumba mumba beite rei quia jendese resẽ. Mbia mbaaquiato quiato Dios chuchúaa resẽ. ¿Mbaerã jẽingo seisiã secua aque mose re? Isa chõ jenyuchĩ serea co, mbia mae eã sacua jendese. Itondaru riinda chõ jẽ nde, i que Jesús ee ra.

Jesús aicuayãte resẽ, ichõiño Pedro

⁵⁴Mbia que Jesús isi nyucua cote ra. Sacerdotes rerecua chuchua que eruruchoi cote ra. Pedro que oso quia ishote erui ra. ⁵⁵Itaicuee que mbia tata mbucha ra. Hue que echĩ ngoi tata jii ra. Pedro abe que ngoi embirõ nda. ⁵⁶Nyucuaaque mo ngue chĩ mae nguia tuchi Pedro rese ra. Tata rendi que etesaete ee ra. —Aque abe que Jesús resenda, i que mae Pedro rese ra. ⁵⁷Pedro que ñee ee ra. —Tei. Jesús aicuayãte resẽ, ichõiño ngue Pedro nyucuaaque je ra. ⁵⁸Emo jiri mose que mbia mo mae Pedro rese ra. —Nde abe que Jesús resenda ra, i que Pedro je ra. —Tei. Eresenda eã ño se resẽ, ichõiño ngue Pedro ee ra. ⁵⁹Emo mose jiri que emo ñee ee no nda. —Jesús resenda chõ nde resẽ. Galilea jenda chõ nde abe resẽ, i tuchi que Pedro je ra. ⁶⁰Pedro que ñee ee ra. —Tei. Ndecheẽ aicuayãte resẽ, ichõiño ngue Pedro ee ra. Pedro cheẽ mose tuchi que nguira ñee cote ra. ⁶¹Jesús que uba mae Pedro rese nguira cheẽ mose cote ra. Pedro que ndua Jesús cheẽ ndese cote ra. —Nguira cheẽ nonde ra echeẽ ñoño tres veces serĩ, sã Jesús i Pedro je nyii no. ⁶²Pedro ndua mose ũquĩ ndese que esi nyeseo pe jiri ra.

Mbia iquia chooño Jesús je

⁶³Ae Jesús isi miĩ nae, ũquĩ ngue iquia iquia tuchi u Jesús je ra. Ucuu ucuu tuchi que u erese ra. ⁶⁴Jesús resa abe que echati ra. Eruba rese que ucuu ucuu tuchi ra. —¿Aba ucuu ucuu quia nderuba rese a re? i abe que equia Jesús resa ati ji je ra. ⁶⁵Ūquĩ miĩ eã ngue eriqui ñee ee ra. Mbae ja riĩ ngue embuqueta ra.

Mbia Jesús ruruchoi ererecua chumunua mose

⁶⁶I que nyaashĩ u quia ra. Aque mose que ererecua ñumunua ja ra. Judíos rerecua. Sacerdotes rerecua abe no. Embesasa abe no. Ūquĩ ñumunua mose que Jesús ruruchoi ee cote ra. Ererecua que ñee ja Jesús je cote ra. ⁶⁷—¿Cristo nde re? Echeẽ tuchi ure je no, i que ererecua ñee Jesús je ra. —“Cristo chõ se re”, ae raque ra jẽje, “nyia”, jenyẽ ãte ra secheẽ mose. ⁶⁸Se abe preguntar i mose jẽje mbae mo niĩ, jeñee ãte chõ nda secheẽ ndibishorõ. Jêhui eã abe ra sesi no. ⁶⁹Namo jiri ra acoi Dios quiatocuti cote. Hue bei ra aĩ cote. Dios quirãcuã na si ra aico mbia rerecua cote, i que Jesús ñee ererecua chumunua mose ra. ⁷⁰Ñee ja que Jesús je cote ra. —¿Dios rucucha chõ nde re? i ja que ñee Jesús je ra. —Ae. Dios rucucha rei se, i que Jesús ee ra. ⁷¹Ererecua que ñee ja nyue ra. —¿Mbaerã nda mbia Jesús icuã nenei i ite nande je re? Jesús cheẽ icuã ngue nandechandu rei nande abe resẽ. Sã mbia eiquia, i que ererecua ñee ja nyue ra.

23

Mbia Jesús ruruchoi Pilato je

¹Judíos rerecua que juã ja cote ra. Jesús que ecuruchoi Pilato je cote ra. ²Ūquĩ ngue ñee icuãte Pilato je Jesús riĩ nda. —Jesús que mbia mbaaquiato icuã icuãte quia ra jẽ. “Impuestos ra jemee meecheẽ mbia rerecua je”, i chõ ngue equia mbia je ra jẽ. “Se chõ Cristo re. Mbia rerecuarã nda se”, i que equia ra, i que judíos rerecua ñee icuã Jesús riĩ nda. ³—¿Judíos rerecua nde re? i que Pilato ñee Jesús je ra. —Ae. Judíos rerecua chõ se re, i que Jesús ee ra. ⁴Pilato que ñee mbia je cote ra. Sacerdotes rerecua je abe no. —“Mbae icuã mo ngue Jesús saã nda”, ae aroneate eriĩ, i que Pilato ra. ⁵Judíos que ñee

asite ee ra. —Jesús riqui mbia mbaaquiato icuã icuã tuchi co. Mbia mbesa chooño. Judíos mbaaquiato icuã icuã ja. Galilea jenda rane. A jenda abe chee cote, i que ñee asite Pilato je ra.

Mbia Jesús ruruchoi Herodes je

⁶ Galilea jenda, i mose que Pilato ñee ee ra. —¿Galilea jenda chõ Jesús re? i que mbia je ra. ⁷ —Ae. Galilea jenda chõ Jesús re, i que mbia Pilato je ra. Nyebe Pilato Jesús mondo nguiã Herodes je. Galilea jenda rerecua quiatu ngue Herodes re. Herodes que siqui Jerusalén aque mose ra. ⁸ Herodes que maese beite quia Jesús rese ra. Jesús rese que eriqui jirandu beite ra. —Jesús nda mbia mae sayã mo saã na serésaa chã, i beite que equia ra. Nyebe eya tuchi nguiã mae mose Jesús rese cote. ⁹ Herodes que ñee atate rei Jesús je ra. Jesús que ñeeã mbeite echeẽ ndibishorõ nda. ¹⁰ Sacerdotes rerecua abe que chi ra. Embesasa abe no. Ñquĩ ngue ñee icuã icuãte quia Jesús riĩ nda. ¹¹ Herodes que iquia iquia chõ nguia Jesús riĩ nda. Erimba soldados abe no. Jesús ririrõ tuchi que equia ra. Tiru nininya tuchi que emingue Jesús je ra. Ererecua raã naa tuchi Jesús je. Aquere que Herodes embuchebi mondo Pilato je cote ra. ¹² Aque mose ramo ngue Herodes quiato Pilato cote ra. Eicuã icuã mbeite que eriqui nyue nyii ra.

Jesús jëiquia mbucha ira rese, i ererecua

¹³ Pilato que mbia rerecua munua ja ra. Sacerdote rerecua. Judíos rerecua abe no. Mbia ja abe no. ¹⁴ Ñee ngue mbia je cote ra. —Jë ngue Jesús jendu rei seje ra. “Mbia mbiirĩ irĩsa chõ Jesús re”, jenye rei que seje ra. Acheẽ ocote rei que ee jësaa ra. Ae jeñee ndei seje nae, ñquĩ icuã mo eãte seje Jesús riĩ. ¹⁵ Herodes je abe mbae icuã mo eãte Jesús riĩ. Herodes que Jesús mbube chõ nande je ra. ¿Mbaerã nda nandeiquia re? Mbae icuã mo ngue esaã eãte resẽ. ¹⁶ Tairuã nua ño. Aquere tambui mondo, i rei que Pilato ñee mbia je ra. ¹⁷ Pascua mose bei que Pilato riqui mbia matã ji miĩ mbui bei ra.

¹⁸ Mbia que tasẽ tasẽte ñeemombo mombo Pilato je ra. —Jesús eiquia. Barrabás quia embui ure je, i tuchi que mbia quia Pilato je ra. ¹⁹ Barrabás tarõ ji que chí nda. Mbia iquiasa tuchi que ae ra. Romanos nderecua je abe que eicuã icuã tuchi riqui ra. ²⁰ —Jesús quia tambui, i rei que Pilato ñeembe mbia je ra. ²¹ —Jesús embucha ira rese, i tuchi que mbia quia tasẽ i ra. ²² Pilato que ñee si ee ra. Tres veces cote. —¿Mbaerã nda Jesús aiquia re? ¿Mbae icuã esaã nde? Mbae icuã esaã eãte umano sacua. Tairuã nua ño. Aquere tambui mondo, i rei que Pilato ra. ²³ Mbia que ñee mombo mombo tuchite ee ra. — ¡Eiquia jë! ¡Ira rese embucha jë! i tuchi que mbia quia tasẽ tasẽ ee ra. Sacerdotes rerecua abe que tasẽ i ite ra. Eno i chee que Pilato cote ra. ²⁴ Pilato que mbia cheẽ mumbayã nyee ra. ²⁵ Pilato que Barrabás mbui mondo cote ra. Mbia iquia iquiasate raque ae. Ñee icuã icuãate raque ererecua je. Pilato que Jesús mee mbia je cote ra. Eiquia sacua.

Mbia Jesús mbuchesechoi ira rese

²⁶ Soldados que Jesús curuchoi eiquia sacua cote ra. I rei que emo u quia uco si ra. Simón, i que ee ra. Cirene jenda mo ngue ae ra. Aque que soldados isi ra. Ira mbuchicuandasa ji rerao sacua Jesús rui. Cruz, i equia ee. ²⁷ Mbia tubiriã ngue nyoĩ quia erui ra. Cuña abe tubiriã. Ñquĩ ngue nyoĩ quia tasẽ tasẽ tuchi nyeseo erese ra. ²⁸ Jesús que uba mae ñee ee ra. —Cuña, jenyeseochĩ nguiã serese. Jenyiese quia jenyeseo. Jendiirĩ abe rese quia jenyeseo, Jerusalén jenda. ²⁹ Mbae icuã nda tuutu tuchi jëje cote. Ae eririĩ nderecua nae, ñquĩ nda mbae rasi saã tuchi aque mose cote. Aque mose quiatu bichĩ mbia ririĩ eã ja mbite re. Mbae icuã tuchite quia nda aque mose cote re. ³⁰ “Amano ño mbichĩ se”, i tuchi ra mbia aque mose cote. “Sita ibate tu chõ mbichĩ seati”, i tuchi ra mbia aque mose cote. ³¹ Se chee mbia riquichĩ sembasi mbasi a. Seicuã eã ndaque se. Mbia quiatu ra mbae rasi saã tuchi huĩcuã niĩ cote, i que Jesús ñee nda.

³² Soldados que mbia icuã nyeremo curuchoi Jesús rese eiquia sacua nda. ³³ Ngasẽ ngue ibi ibate mo cote ra. Eresa cuare, i que hue je ra. Huee que Jesús mbucha ira rese cote ra. Ñquĩ mbia icuã abe que embucha ira rese ra. Enongue que emiĩ Jesús quiatocuti ra.

Equiatocutiã ngue enongue mii no nda. ³⁴ Mbia Jesús mbucha mose ira rese que Jesús ñee Dios je ra. —Paba, ã icuã embutiã esi. Ñimbaaquiātuãte equia sei quia ã, i que Jesús Dios je ra. Soldados que sita ñetẽ mbaaba aba o je ra. —Aba ra ja. Aba mbaerã nda Jesús irao reae, i que nyue ra. ³⁵ Mbia que chi ja tuchi mae erese ra. Ererecua abe chee que chi iquia iquia Jesús je ra. —Ma ndequirãcuãte. Mbia que erembucherõ cherõ tuchi quia. ¿Mbaerã ereico eĩ ãte ndechue nde abe re? Dios ririĩ nde reaẽ, i que ererecua u iquia iquia Jesús je ra. ³⁶ Soldados abe que iquia iquia chõ nguia ee ra. Vinagre chiquino ngue emee ndei ee echimbei sacua nda. ³⁷ —¿Mbaerã ereico nguichi ãte ira si nde ae re? Judíos rerecua rei nde reaẽ, i que soldados iquia iquia Jesús je ra. ³⁸ Mbia que embesa ji mii Jesús ãquĩ quti ibate ra. JUDIOS RERECUA CHÕ CO RE, i que embesa ji huĩ nda. Griego cheẽ. Latín ñee abe no. Hebreo cheẽ abe no.

³⁹ Ae mbia icuã mbucheseco ji chi Jesús rese nae, ùquĩ mo ngue ñee icuã Jesús je ra. —¿Mbaerã ereico nguichiã nde ae re? ¿Mbaerã ereico urembuquichiãte ure abe re? Dios ririĩ nde reaẽ, i que ùquĩ mo ñeemombo Jesús je ra. ⁴⁰ Enongue que ñee ee ra. —¿Mbaerã ereico ñee ùquĩ Jesús je re? ¿Ndesiquiche ãte eriqui Dios si re? Ereico mano Jesús rã si a resẽ. ⁴¹ Nandeico mano nandeicuã nii a resẽ. Jesús quiatu que mbae icuã saã eãte rei resẽ, i que enongue ñee ee ra. ⁴² Aque sí que ñee Jesús je cote ra. —Jesús, endua serese nde ererecuarã mose, i que ñee Jesús je ra. ⁴³ Jesús que ñee ee ra. —Tacheẽ nyecua ndeje. Ereico ra serese namo Dios rese seico mose, i que Jesús ee ra.

Jesús mano cote

⁴⁴ Tenda chĩ mose nandeite re que itondaru ru cote ra. Ibi ja que itondaru ra. Itondaru beite que ra. Tenda nyesecho chee. Tres horas que ra. ⁴⁵ Tenda cuute que aque mose ra. Tiru mbucheseco ji Dios chuchua jenda que nyisia turã nda. ⁴⁶ Jesús que ñee mombo ngu je ra. —Paba, aso quia nderea aque, i que ra. Mano ngue cote ra. ⁴⁷ Soldado rerecua que mae tuchi huĩ erese ra. Ae que ñee turã Dios rii cote ra. —Mbae icuã naasa eã tuchi chõ Jesús riqui re, i que maende erese ra. ⁴⁸ Mbia tubiriã chi quia mae ja erese nae, ùquĩ ia eã tuchi que nyoĩ quia uchiã isi cote ra. ⁴⁹ Mbia Jesús chiicua ja que chi isho mae erese ra. Ae cuña nyoĩ beite quia erese Galilea si nae, ùquĩ abe que chi isho mae erese ra.

Mbia Jesús raaque chati cote

⁵⁰ I que mbia turã mo nguia huee ra. José, i que ee ra. Judío mo ngue ae ra. Arimatea jenda que ae ra. Judíos rerecua mo ngue ae ra. ⁵¹ José ia eãte que ererecua ataque rese Jesús iquia mose ra. Ae que Dios quiatote ra. —Dios ra ererecua, i beite que equia eraarõ arõ nda. ⁵² —Jesús raaque emee na seje, i que José oso ñee Pilato je ra. ⁵³ José que Jesús raaque mbuquichi cote ra. Tiru je que ema nda. Sita ribicoĩ ji imi ye que emondo ra. Mbia raaque mo ngue emondo eãte huee nyii ra. ⁵⁴ Viernes que aque mose ra. Mbia que icoquiātu ja quia sábadonon de ra. ⁵⁵ Ae cuña nyoĩ beite quia Jesús rese Galilea si nae, ùquĩ ngue nyoĩ sita imi ndese mae nda. Jesús raaque iti ji rese que mae tuchi ra. ⁵⁶ Nyebi que echoĩ uchuchua ra. Aba mbushimbusa que esaã nyoĩ ra. Sábadonon de mose que ùquĩ uquenea ucua cote ra. Dios cheẽ si.

24

Jesús raaque quera si

¹ Isamamimbe tuchi que cuña nyoĩ domingo mose sita imi ndese mae nda. Aba mbushimbusa que ecuruchoĩ rei eichusẽ chusẽ sacua Jesús raaque rese ra. Cuña mo abe que nyoĩ quia erese ra. ² I que sita eraaque atiquia ruruba ji u ee ra. ³ Cuña ngue ique rei nyoĩ sita imi ye ra. Jesús raaque oreãte que ee ra. ⁴ Tiri i tuchi que ra. —¿Mañi nda aba re? i tuchi que ra. Aque mose que mbia nyeremo chi juã ee ra. Eirao nininya tuchi que chi ee ra. ⁵ Cuña ngue titi titi i tuchi u ra. Nyebe echi nguia nyibi beite. Angeles que ñee ee ra. —¿Mbaerã jẽingo Jesús raaque requia requia a re? Quera si que resẽ. ⁶ Emoate a resẽ. Quera si que resẽ. Sã ñee jẽje siqui mose Galilea no. ⁷ “Mbia icuã nda seisi iquia.

Sembucha ra ira rese. Tres días mose ra aquera si”, i que jêje nyii resê, i que ángeles ñee cuña je ra. ⁸ Ũquĩ ndese que cuña ndua cote ra. ⁹ Cuña ngue nyebi cuaẽ mbia mbiirandu ja cote ra. Jesús chimbaaquiato once abe mbiirandu. ¹⁰ María Magdalena i que mbia mbiirandusa je ra. Juana i que emo je ra. María i que enongue je ra. Jacobo si que María ra. Cuña mo abe abe que ra. ¹¹ Nyia iã ñochĩ Jesús chimbaaquiato cuña ñee mose ee. Cuña ñee ñooño nei nguiã ee. ¹² Pedro que oso uchã sita imi ndese mae nda. Nyurucua que mae erese ra. Jesús umanda achõ ngue chi ee ra. Pedro que nyebi oso quia ndua ndua Jesús oreã ndese ra.

Jesús ngata querare uquiato rese

¹³ I que Jesús quiato nyeremo nyoĩ quia aque mose ra. Emaús quiti que echoi quia ra. Dos leguas que Jerusalén si ra. ¹⁴ Ũquĩ ngue nyoĩ quia ñee ñee nyue ra. Jesús mano ñii. Jesús raaque oreã ñii abe no. ¹⁵ Ũquĩ ñee ñee ndiichã ngue Jesús si ra. Erese que Jesús si quia ngata cote ra. ¹⁶ Ũquĩ ngue mae ndei Jesús rese ra. Icuã eãte chõ ngue ra. Mbiamo nda eriqui reĩ ee raẽ. ¹⁷ Jesús que ñee nyee ee ra. —¿Mbae riĩ jẽingo ñee nyue ã nde? ¿Mbaerã jẽya eãte riqui re? i que Jesús ñee ee ra. ¹⁸ Ũquĩ mo ngue ñee Jesús je cote ra. Cleofas, i equia ee. —¿Ereiranuate erese re? ¿Nde miĩ ño ereiranua erese ndeico mose Jerusalén nde? i que Cleofas ñee ee ra. ¹⁹ —¿Mbae rese? i que Jesús ee ra. Ũquĩ ngue ñeembe ee ra. —Jesús rese. Nazaret jenda rese. Dios cheẽ nenei neneisa tuchi rei que ae ra. Equirãcuã tuchi rei que ae ra. Mbia que mae ja tuchi rei equirãcuã ndese ra. ²⁰ Mbia rerecua que Jesús iquia cote ra. Sacerdotes rerecua abe chõ ngue Jesús iquia nguiã. Nyebe soldados ei quia nguiã mbucha ira rese cote. ²¹ Israel jenda rerecua reĩ nda ure je. Tres días chee namo cote emano mosenda bei. ²² Uresenda cuña mo ngue ñee uremundi tuchi ra. Ũquĩ ngue nyoĩ rei eatísaa nyaashĩ namo mose ra. ²³ Jesús raaque oreãte nda ee ra. Nyebe ecuaẽ nguiã urembiirandu cote. Angeles mo nda chi ee eatísaa ra. “Jesús que quera si ra”, i nda ángeles ñee ee ra. ²⁴ Aquere que uresenda mo abe nyoĩ eatísaa ra. Cuña ñee ndui si que Jesús raaque oreãte ee ra. Jesús rese quiato que mae eã nda, i que Cleofas ñee Jesús sí je ra. Jesús eã nda eriqui reĩ ee raẽ. ²⁵ Jesús que ñee ee cote ra. —¿Mbaerã jẽaquiataate riqui re? ¿Mbaerã jẽingo Dios cheẽ icuayãte re? ¿Mbaerã jẽingo Dios cheẽ nenei neneisa chimbasa icuayãte re? ²⁶ Sã embesa ji ñee no. “Cristo ra mbae rasi saã ja oso nonde ibate”, i que embesa ji no, i que Jesús ee ra. ²⁷ Jesús que Dios cheẽ mbuchecua ja ee cote ra. Ngasi riĩ. Umano ñii abe no. Uquera riĩ abe no. Moisés chimbasa que embuchecua ee ra. Aquere que Dios cheẽ nenei neneisa chimbasa abe mbuchecua ja ee ra.

²⁸ Ngasẽ ngue ũquĩ nyuchúaa cote ra. Jesús que ngata i abareã oso ra. ²⁹ Jesús ngata i abareã mose que ũquĩ eriquisã nda. —Eitõ urerese aa ae. Tenda osote resê. Itondarute ra ndeje resê, i que ñee ee ra. Nyebe Jesús ique nguiã echuchúaa erese. ³⁰ Ngoi ja que quiaru nonde cote ra. Jesús abe que ngoi erese ra. Mbichae que esirõ o je cote ra. Gracias i que Dios ibatenda je mbichae riĩ nda. Mbichae que esiquio mondo ee cote ra. ³¹ Ũquĩ mose tuchi que Dios mbia mumae turã tuchi Jesús icua sacua cote ra. Jesús icua ramo sacua cote. Jesús que quiachã asi esi cote ra. ³² Ũquĩ ngue ñee ñee nyue cote ra. — Jesús chõ eriqui reaẽ. Nyebe nandeya tuchite riqui nguiã Dios cheẽ mbuchecua checua mose nande je ñeenda cúa, i que equia ñee ñee nyue ra. ³³ Nyebe echoi jei nguiã nyebi si Jerusalén. Huee que Jesús chimbaaquiato chi ñumunua ee ra. Eresenda mo abe rese. ³⁴ Ũquĩ ñumunua je que ñee ee ra. —Jesús que quera si ra. Ae bei. Simón ngue mae erese ra, i que ñumunua je ee ra. ³⁵ Aquere que ũquĩ nyeremo ñee mbia chumunua je cote ra. —Jesús rese que uremae ñeenda cúa ra. Urembaaquiato quiato que umano ñii nda. Uquera riĩ abe no. Mbichae riquio mose ure je, aque mose ramo ngue Jesús ureicua ra, i que mbia mbiirandu ja ra.

Jesús nyecua uchimbaaquiato je

³⁶ Ūquĩ ñee ua eã mose que Jesús nyecua ee ra. Mbia ite re. —Jěya chõ serese, i que ñee ee ra. ³⁷ Mbia que titi titi i tuchi u mae erese ra. Aba checuayã nda Jesús riqui reĩ ee raẽ. ³⁸ Jesús que ñee ee ra. —¿Mbaerã jěsiquichete riqui re? ¿Mbaerã “Jesús chõ eriqui re” jenyẽ eã seje re? ³⁹ ¡Sã jě! Jemaẽ seo rese. Jemaẽ sei abe rese ae. Jěoco serese ae. ¡Sã se si chõ jě! Aba checuayã nguia eroo eã nde. Equianguẽ eã abe no. Se rã eã, i que Jesús ee ra. ⁴⁰ O que eteacuquia ee cote ra. Hui abe que eteacuquia ee ra. ⁴¹ —Jesús chõ eriqui re, i eã ngue ra. Ndua ndua chõ erese. Eyate raque erese. Jesús que ñeembe ee ra. —¿Mbae mo ndei eu sacuaã aa re? i que ee ra. ⁴² Sira resi ji que emee ee ra. Irao abe que emee ee eretã ndesebe ra. ⁴³ Jesús que eisi eu bei ũquĩ ndesaa cote ra.

⁴⁴ Jesús que ñee ee cote ra. —Sã acheẽ jěje seico mose jendese nyii no. “Ae Moisés mbesa serĩĩ nae, ũquĩ nda ique ja serĩĩ cote. Dios cheẽ nenei neneisa chimbesa abe ra ique ja cote. Salmos ndesenda cheẽ abe ra ique ja serĩĩ cote”, ae que se quia jěje nyii. Ūquĩ ngue ique ja semana mose cote ra. Sequera mose abe no, i que Jesús ñee ee ra. ⁴⁵ Dios cheẽ ngue embuchecua checua ee cote ra. ⁴⁶ Jesús que ñeembe ee ra. —Sã embesa ji riqui ñee no: “Cristo ra mbae rasi saã tuchi mano nonde. Tres días mose ra quera si. ⁴⁷ Mbia ra echeẽ senei senei tuchi cote. Jerusalén jenda je rane nda erenei nenei. Mbia ja je ra erenei nenei cote. ‘Jěicuã si jěhui rã. Cristo jěicuã mbutiã sacuaã’, i tuchi ra mbia ja je Cristo riĩ cote”, i que embesa ji quia nae. ⁴⁸ Ūquĩ ique quia ã cote. Jemaẽ nguia erese ã cote. ⁴⁹ Ae je Paba ñee jěje nae, “Espíritu Turã tamondo jěje”, i equia jěje nae, aque tameẽ jěje cote. A jenguchõ na Jerusalén. Paba ibatenda uquirãcuã mee nyee jěje, i que Jesús ñee uchimbaaquiatu je ra.

Jesús nyui oso ibate

⁵⁰ Jesús que equerao ja pe jiri Jerusalén si cote ra. Betania i que hue sucha je ra. Jesús que o mumbate ñee uchimbaaquiatu je cote ra. —Sã Dios jendeaquiatu turã, i ee. ⁵¹ Aque mose tuchi que Jesús si nyui ibate erecha cote ra. ⁵² Ūquĩ ngue ñee turãte Jesús riĩ nda. Eya tuchi que nyebi nyoĩ Jerusalén nda. ⁵³ Dios chuchua que eriqui bei nyoĩ ñee turã Dios riĩ nda. Amén.

EL SANTO EVANGELIO SEGÚN SAN JUAN

Jesucristo rane ngue siqui nyii ra

¹ Dios cheẽ nane tuchi que nyii ra. Mbae ja si. Dios cheẽ ndei Jesús. Ae que siqui bei Dios rese ra. Dios si rei Jesús. ² Ae chõ ngue siqui bei Dios rese nyii ra. ³ Dios que mbae chao eã ae ae ra. Jesús rese ae mbae ao ja nguiã. ⁴ Jesús chõ mbia mingo nguiã ã. Nandemingosa chõ nanderesae nguiã ã. ⁵ Nandemingosa chõ mbae tesae tuchi nguiã itondaru. Itondaru quia ra emungue aroneãte. ⁶ Dios que emo mbu cote ra. Juan, i que ee ra. ⁷ Juan ngue tu aba resaesa renei nenei mbia je ra. Mbia mbiirandu randu ja. Ì nda mbia aba resaesa icua ja, Juan ñee nguire. ⁸ Aba resaesa eã ño Juan nde. Emo mii ño Juan ndiqui nguiã ñee. —Ae chõ nanderesae nguiã co, i que Juan nda. ⁹ Aba resaesa que tu ibi cote ra. Aba resaesa chooñoã tuchi que ra. Ae chõ aba resae ja nguiã ã. ¹⁰ Aba resaesa que siqui íbii cote ra. Mbia que eicua eãte chõ nda. Mbae aosa ja raque ae. ¹¹ Aba resaesa que tu rei nguesenda mbirõ nda. Eresenda que eisiteã ñochĩ nguiã. ¹² Mbia mii mii ño ngue eisi turã turã nguiã. Mbia mii mii ño ngue eicua icua nguiã. Ũquĩ je quia Dios riqui nguiã “seriiri” i. ¹³ Mbia riiri na eã ño Dios riiri ndiqui nguiã nyaacuquia cuquia ã. Ñquẽ nyaacuquia rã eã ño Dios riiri ndiqui nguiã nyaacuquia cuquia ã cote. Sã emo ndiqui ngũinisi rese embiiri nae, ũquĩ na eã ño Dios riiri ndiqui nguiã nyaacuquia cuquia ã. Dios ae chõ “seriiri” i nguiã ee Dios icua mose. ¹⁴ Jesús rei Dios cheẽ. Jesús que tu mbiarã cote ra. Mbia tuchi que ae cote ra. Siqui que equia urerese cote ra. Echisaã turã ndese que ureico mae cote ra. Etura tuchi chõ ae re. Ngu rã si chõ ae re. Ichõiñosa reã tuchi chõ ae re. ¹⁵ Juan ngue Jesús senei senei nguia mbia je ra. —Co riĩ ngue acheẽ jẽje resẽ. “Ae ra tu serui, aque quiarei ererecua tuchi sesi. Ae rane nguia siqui rei seã mose nyii”, ae rei que jẽje resẽ. Ae siqui co cote, i que Juan mbia je ra. ¹⁶ Jesús turã tuchi que ra. Nyebe eriqui nguiã mbae turã mee mee mbei nande je. ¹⁷ Dios cheẽ mumbayã sacua ngue Moisés ñee ndei nguiã nande je. Jesús quiatu ngue tu nguiã cote. Dios turã nenei nenei nande je. Jesús quiatu ngue Dios cheẽ ñooñoa senei senei nguiã nande je no. ¹⁸ Emo maeãte Dios rese. Eriiri ae que nandembiirandu randu quia Dios rese ra. Eriiri nguiarei ngu rã si.

Juan el Bautista ñee turã Jesús riĩ

¹⁹ Judíos Jerusalén jenda que mbia mondochoi ñee Juan je ra. Sacerdotes mondo era. Levitas mo ndese. —¿Aba nde re? i sacua Juan je. ²⁰ Juan ngue ñee nyecua tuchi ee ra. —Christo eã ño se re, i que ee ra. ²¹ —¿Abate nde re? ¿Elías chõ nde re? i que judíos chimondo ñeembe Juan je ra. —Tei. Elías eã ño se re, i que Juan ee ra. —Dios cheẽ mbuchecua ra tu, i equia nae, ¿ae chõ nde re? i que mbia ñee Juan je ra. —Tei, i que Juan ee ra. ²² Judíos chimondo que ñeembe Juan je ra. —Ndecheẽ embuchecua ure je. ¿Abate nde re? Ì nda ndecheẽ uresenei ũquĩ je, ae urembu. ¿Mañi ure ra nderiĩ nde? i que Juan je ra. ²³ Juan ngue ñee ee ra. —Tacheẽ jẽje cote. Aba chõ se chã. Mbia amingo quiatu quiatu quia co. Ae ñee mombo mombote quia mbia je turuquia ite re nae, ae chõ se re. —“Ñeenda jembuquiche nandererecua mbaerã”, ae i quia, aque chõ se re, i que Juan nda. (Isaías chimbesa rui si chõ Juan ñee nguiã.) ²⁴ Ae ñee ñee nguia Juan je nae, ũquĩ ndei fariseos chimondo ũquĩ. ²⁵ Fariseos chimondo que ñee ee ra. —¿Mbaerã ereico bautizar i re? Cristo eã ño nde resẽ. Elías eã ño nde resẽ. Dios cheẽ mbuchecua eã ño nde resẽ, i que Juan je ra. ²⁶ Juan ngue ñee ee ra. —I je chõ aico nguiã bautizar i. Emo nguia siqui raque quia jẽite re. Aque quia jẽicuayãte nguiã co. ²⁷ Enonde aico co. Aque ra tu serui. Ae quia ererecua tuchi sesi re. Erã si eã ño se re, i que Juan fariseos chimondo je ra.

Jesús rei oveja rã

²⁸ Betábara, i que hue sucha je ra. Huee quia fariseos chimondo ñee nguiã Juan je. Ama Jordán ndobei. Ae Juan ndiqui bautizar i, huee. ²⁹ Isamami nongue que Juan mae Jesús rese ra. Jesús que tu quia Juan ndiichã nda. —Co mbia icuã ndiquicharõ sacua ndu quia co. Oveja riirĩ na eriqui Dios je. Ae ra nandeicuã mbutiã nandesí. ³⁰ Erĩ ngue aico ñee jêje. “Ae ra tu serui, aque quiarei ererecua tuchi sesi. Ae rane nguia siqui rei seã mose nyii”, ae que se quia jêje. Co chi eru quia co cote. ³¹ Se sí que aicuayãte nyii ra. I je que bautizar ae quia mbia je cote ra. Ñ nda Israel jenda Cristo icua, i que Juan nda. ³² Juan ngue ñee mbei quia ra. —Espíritu Turã ndese que amae nda. Nguichi que u Jesús arõ nda. Nyurusĩ rã ngue eru nguichi earõ nda. Ibate si. ³³ “¿Aba ra Cristo re?” ae beite que se quia ra. Dios que ñee seje ra. “¡I je eico bautizar i mbia je jê! Ae arõ nda Espíritu Turã ndu nguichi bei nae, ae quiatu bautizar i sacua mbia je Espíritu Turã je”, i que Dios seje ra. ³⁴ Atea que se cote ra. Ae rei Dios riirĩ. Aicuate se cote, i que Juan nda.

Jesús mbia irabo uchimbbaaquiaturã

³⁵ Isamami nongue que Juan ndiqui hue sí no nda. Nguesenda nyeremo ndese que eriqui ra. ³⁶ I que Jesús ucua quia ra. —Qui mbia icuã ndiquicharõ sacua coi quia qui. Oveja riirĩ na eriqui Dios je, i que Juan Jesús riñ nda. ³⁷ Juan ndesenda nyeremo ngue Juan ñee ñandu ra. Nyoĩ que Jesús rui cote ra. ³⁸ Jesús que mae nguique quití ra. —¿Mbae jêsequia quia re? i que mae erese ra. Ñquĩ ngue ñee Jesús je ra. —Mbia mbaaquiatusa, ¿ma ndechuchua ma nde? i que ee ra. ³⁹ —Jenyu mae erese, i que Jesús ee ra. Nyoĩ que mae echuchua rese ra. Tenda nyeseccote mose que echoĩ erese ra. Tenda oso cheete que echĩ erese cote ra. ⁴⁰ Ñquĩ nyeremo ngue Juan ñee ñandu ra. Siqui que Jesús rui cote ra. Andrés, i que ñquĩ mo je ra. Simón Pedro nongue que ae ra. ⁴¹ Andrés que oso asite ngõngue requia ra. Simón ndequia. —Dios chimondo que uretea ra. Cristo que uretea ra, i que Andrés ngõngue je ra. ⁴² Andrés que ngõngue querao Jesús rea cote ra. Jesús que mae erese ra. Ñee ngue ee ra. —Simón ño nde re. Jonás ndiirĩ ño nde re. Cefas, i ra ndeje cote. Cefas, i chõ Pedro re, i que Jesús ee ra.

Jesús Felipe irabo; Natanael abe

⁴³ Isamami nongue que Jesús ñee nda. —Taso Galilea, i que ra. Ngasẽ ngue Felipe je ra. —Serui eico, i que ee ra. ⁴⁴ Betsaida jenda que Felipe ra. Hue jenda si chõ Andrés re. Pedro rese. ⁴⁵ Felipe que oso Natanael ndequia cote ra. —Ae riñ Moisés riqui embesa mbesa cose, aque que uretea ra. Ae riñ Dios cheẽ mbuchecuada riqui embesa mbesa cose, aque que uretea cote ra. Jesús chõ eriqui re. Nazaret jenda chõ eriqui re. José riirĩ ño eriqui re, i que Felipe Natanael je ra. ⁴⁶ Natanael que ñee Felipe je ra. —¿Mbae turã mo nda tu Nazaret jenda re? i que ra. —Echu erea ae, i que Felipe ee ra. ⁴⁷ Natanael que tu Jesús riichã nda. Jesús que mae erese ra. —Co israelita turã tuchi mo ndu quia co. Aba mbiirĩ irĩsa reã tuchi mo ndu quia co, i que Jesús Natanael niñ nda. ⁴⁸ —¿Mañi ere quia seicuate re? i que Natanael Jesús je ra. —Amae ngue nderese ra. Felipe ‘quiatusu’ i nonde ndeje. Iraqui re que amae nderese ra. Higo iqui re, i que Jesús ee ra. ⁴⁹ Natanael que ñeembe ee ra. —Mbia mbaaquiatusa, Dios ndiirĩ ño nde riqui re. Israel jenda rerecua tuchi chõ nde riqui re, i que Natanael Jesús je ra. ⁵⁰ Jesús que ñee ee ra. —¿Seicuate se re? “Iraqui re que amae nderese ra”, ae que ndeje, ¿aque bei bei seicua quia co re? Mbae turã tuchi rese ra eremae cote, aque si, i que Jesús Natanael je ra. ⁵¹ Jesús que ñee si ee ra. —Tacheẽ nyecua jêje. Ibei ra obo jêje. Angeles nda nguichi quichi quia seje. Nyoĩ nyoĩ si ra equia ibate. Angeles ibatenda. Dios rimba. Jemae nda erese, i que Jesús ee ra.

2

Emo ngüinisirã nguereco

¹ Tres días mose que emo ngüinisirã isi ra. Galilea. Caná, i que hue sucha tubiriã je ra. Mbia que ñumunua nua fiesta raã ngüinisirã isi mose ra. Jesús si abe que siqui huee ra. ² Jesús abe que siqui huee no nda. Uchimbaaquiatusu rese. ³ Mbia que uva rique mbei u

huee ra. Ua jei que mbia je ra. Jesús si que ñee nda. —Uva rique que ua jeite ra, i que ñee Jesús je ra. ⁴ Jesús que ñee ee ra. —¿Mbaerã ereico ñee seje ũquĩ nde, Taĩ? Achecua jei eã nda mbia je, i que Jesús usi je ra. ⁵ Esi que ñee mbia rimba je ra. —¿Jesús cheẽ ndui si chõ jëingo jê! i que ee ra. ⁶ Cántaro atate que chi ra. Seis que cántaro ra. Sita ao ji. Ũquĩ jie que judíos riqui nyoï nyoï querabe ra. Ũquĩ cántaro jie que cien litros jaaja ra. ⁷ Jesús que ñee mbia rimba je ra. —Cántaro jemombisẽ mbisẽ ja i je, i que Jesús ee ra. Nyebe emombisẽ ja nguiã. ⁸ Jesús que ñeembe ee ra. —Embisengue jenyarabe jiri mondo fiesta raã naasa je, i que ee ra. Erimba que echara serao ee cote ra. ⁹ Uva rique rã si chõ ngue i fiesta raã naasa je cote ra. Fiesta raã naasa que ubi erese ra. Eiranuã ngue ubi erese ra. Erimba achõ ño ngue jirandu ja nguiã. Ae ngüinisirã isi quia nae, aque je que fiesta raã naasa ñee nda. ¹⁰ —Mbia ja quiarei uva rique turã nane mee mee nguia mbia je querabe. Etura mbei ja mose, ereã jiri mbei ruquia ruquia mbia je cote. Nde quia eturã tuchi ererecoquiato nguiã. Hui bei sacua cote, i que ra. Jesús chisaã ñi ño eriqui nguiã ñee. ¹¹ Ũquĩ nane ngue Jesús saã mbia mae sayã nyii ra. Uva rique rã si tuchi que i raã nda. Ũquĩ ngue esaã Galiléaa eriqui mose ra. Caná, i que hue sucha tubiriã je ra. Hue rane ngue Jesús uquirãcuã ndeacuquia mbia je ra. Echimbaaquiato que Jesús icua tuchi cote ra. ¹² Huesi que Jesús choi Capernaum nda. Usi rese. Ngõngue rese. Uchimbaaquiato abe rese. Hue que echi itõ mocoite ra.

Jesús oso Dios chuchúaa

¹³ Fiesta rurubite mose que Jesús si Jerusalén nda. Pascua, i que judíos aque fiesta je ra. ¹⁴ Jesús que oso Dios chuchúaa ra. Huee que mbia chi ticuasú mee mee nyue mbae isiquia ribishorõ nda. Ovejas abe no. Nyurusi cuasu abe no. Emo ngue chi ngoi ra. Mbae isiquia que esibishorõ shorõ u ra. ¹⁵ Mbia iruã nuãsa que Jesús saã nda. Esa nderecua. Aque je que Jesús mbia mbusẽ ja mondochoi Dios chuchua si ra. Ticuasú abe. Ovejas abe. Ae mbae isiquia sibishorõ shorõ nguia, ũquĩ mbae abe que embuchiichere chere ja mesa ra. Mbae isiquia mombo mombo íbii. ¹⁶ Ae nyurusi cuasu mee mee nguia mbia je nae, ũquĩ je que Jesús ñee asite ra. —Ñ nyurusi cuasu jendao Dios chuchua si. Mbae isi isisa jësaã saã ñochĩ u Paba chuchúaa a, i que Jesús ñee ee ra. ¹⁷ Jesús chimbaaquiato que ndua ndua quia embesa ji rese ra. —Sebi tuchi ndechuchua, i que embesa ji huĩ nda. Ũquĩ ndese que echimbaaquiato ndua ndua ra. Jesús mbia icuã mbusẽ mondochoi mose Dios chuchua si. ¹⁸ Judíos que ñee Jesús je ra. —¿Ma mbia mae sayã nda eresaã ure je re? Ure ndeicua sacua. “Ererecua chõ eriqui re”, ure nda ndeje chã, i que judíos ñee Jesús je ra. ¹⁹ Jesús que ñee ee ra. —Jê Dios chuchua mbutiã mose, asiquicharõ nda se. Tres días mose ra asiquicharõ, i que Jesús ra. ²⁰ Judíos que ñeembe Jesús je ra. —Tenda atate que nanderu riqui itõte Dios chuchua ao ao resẽ. Cuarenta y seis años. ¿Mañi ere ra tres días eao ja nde re? i que judíos Jesús je ra. ²¹ Nguete riñ ngue Jesús riqui ñee nda. Mbia chumunuasa riñ eã ño ngue ñee nguiã. ²² Jesús quera si mose ramo ngue echimbaaquiato ndua aque echeẽ ndese cote ra. Embesa ji rese ndua. —Ĩ nguia equia re, i que echimbaaquiato ndua ndua cote ra. Jesús quera si mose.

Jesús mbia chiã icuate

²³ Mbia tubiriã ngue Jesús icuate aque mose ra. Fiesta de la pascua mose. Siqui mose Jerusalén. Mbia mae sayã naa naa mose que mbia eicuate cote ra. ²⁴ Jesús que mbia ndua ndua icuate quia ra. Nyebe ñee tuchi eã nguiã mbia je. ²⁵ —Ëi ño mbia nguiã ã, i aronea mbia mo Jesús mbiirandu. Jesús quiato que mbia chiã icuate quia ra.

3

Nicodemo oso ñee Jesús je

¹ Mbia mo ngue siqui ra. Nicodemo, i que ee ra. Fariseo que ae ra. Judíos rerecua que ae ra. ² Itondaru mo ngue esi Jesús rea ra. —Mbia mbaaquiatusa chõ nde re. Dios chimbu chõ nde re. Ureicuate que ra. Mbia mae sayã nda mbia mo saã eã, Dios siquiã

mose erese, i que Nicodemo Jesús je ra. ³ Jesús que ñee ee ra. —Tacheẽ nyecua ndeje. Ae nyaacuquia si eã, ùquĩ nda siquíã Dios rese, i que Jesús ee ra. ⁴ Nicodemo que ñee Jesús je ra. —¿Mañi nda mbia cuasu nyaacuquia si re? ¿Usi riequi rĩ nda esi si re? ¿Nyaacuquia si nonde re? i que Nicodemo Jesús je ra. ⁵ Jesús que ñee ee ra. —Tacheẽ nyecua ndeje. Ae nyaacuquia i achõ je nae, ùquĩ nda siquíã Dios rese. Ae nyaacuquia Espiritu Turã abe je nae, ùquĩ nguia ra siqui Dios rese cote. ⁶ Mbia nyaacuquia mose, mbia sí chõ eriirĩ nde. Emo nyaacuquia mose Dios riirina, Dios rã si chõ eno nde. ⁷ “Nducuã”, erechĩ nda secheẽ mose jẽ. “¿Jenyaacuquia si ja chõ jẽ!” se i mose. ⁸ ¿Mbaranguiti si quiririã ndiqui ichu re? ¿Mbaranguiti ra esi re? Ereicuayãte. Quiririã erechandu raque. Eremae ãte erese. Eĩ si chõ Dios riirĩ nde. Ae nyaacuquia Dios je nae, i que Jesús ee ra. ⁹ —¿Mañi ùquĩ nde? i que Nicodemo Jesús je ra. ¹⁰ Jesús que ñee ee ra. —¿Secheẽ ereicuayãte quia re? Mbia mbaaquiatusa raque nde. Judíos mbaaquiatusa raque nde. ¹¹ Tacheẽ nyecua ndeje. Ae ureicua, ùquĩ ño uresenei senei ndei nguĩã jẽje. Ae rese uremae, ùquĩ ño uresenei senei ndei nguĩã jẽje. “¿chõĩño nguĩã”, jenyẽ chõchĩ nguĩã urecheẽ mose. ¹² “¿chõĩño nguĩã”, jenyẽ chõchĩ nguĩã secheẽ mose. Ibi jenda renei nenei mose jẽje. Secheẽ nda jemumba tuchi cote, ibatenda nenei nenei mose jẽje. ¹³ Emo nguichiãte ibei si. Se miĩ ño ngue achu nguĩã nguichi ibei si. Mbiarã ño ngue achu nguĩã. Asobe ra ibei. Ibei jenda chõ se re. ¹⁴ Sã Moisés mbei raanguia mbuchecua mbia je turuquia re cose no. Eĩ si ra mbia sembucha ira rese. ¹⁵ Ñ nda seicuasa quiachã eã mbei sesi. Ñ nda seicuasa siqui bei ibate serese.

Dios nyesequa ja mbia rese

¹⁶ Dios que nyesequa tuchite mbia ja rese ra. Nyebe nguiriĩ miĩ mbu nguĩã mbia je. Eriirĩ icua sa ra manoa. Siqui bei rae. ¹⁷ Mbia mbasi sacua eã ngue Dios nguiriĩ mbu íbii ra. Mbia rirõ sacua mbae icua si quia ñi ngue Dios nguiriĩ mbu nguĩã. ¹⁸ “Eso tata cuasu”, i eã nda Dios nguiriĩ icuasa je. “Eso tata cuasu”, i Dios quia nguiriĩ icuasa reã je ã. Jesús icua eãte quia ñene. ¹⁹ “Eso tata cuasu”, i Dios quia nguiriĩ icuasa reã je. Ebite quia ñi itondaru nyaashĩ si re. Nyaashĩ tu mose íbii, isiteã ngue ra. Mbae icua ndese quia eriqui beite nguĩã. ²⁰ Ae siqui beite quia mbae icua ndese, ùquĩ nguia siquichete nguĩã nyaashĩ si. Nyaashĩ ndiichã sereãte quia ñene. “Ñ nda mbia mae eã nandechisaã ndese mbae icua ndese”, i ñene. ²¹ Ae mbae turã saã mbeite quia nae, ùquĩ nguiatu nyaashĩ siichã sete nguĩã. Ñ nda echisaã saã nyecua mbia je. Ñ nda mbia ñee, “Dios quirãcuã nguia siquite nguĩã erese”, i ra mbia ñee, i que Jesús ra.

Juan el Bautista ñee turã Jesús rĩ

²² Jesús que nyoĩ Judéaa cote ra. Uchimbaaquiato rese. Huee que eriqui mocoĩte ùquĩ ndese ra. Huee que eriqui bautizar i mbia je ra. ²³ Juan abe que bautiza r i quia mbia je ra. Enón, i que sucha tubiriã je ra. Salim ndurubi que ra. Hue quiatu ngue i tubiriãte re. Mbia que ngaẽ ngaẽ nguia erea ra. Juan ngue bautizar i quia ee ra. ²⁴ Mbia Juan tarõ nonde miĩ ngue eriqui bautizar i huee nyii ra.

²⁵ Judío mo ngue ñee icua icua Juan ñimbbaaquiato je ra. Bautizar i rĩ. —¿Aba quia ra bautizar i mbia mbitirõ sacua nde? i que ñee icua icua nyue ra. ²⁶ Nyebe Juan ñimbbaaquiato nyoĩ nguĩã ñee Juan je. —Ae rese ereico Ama Jordán ndobei, ae abe riqui bautizar i mbia je huee. Ae eresenei senei turã nguia ure je, aque. Mbia riqui tuchite erui ã, i que Juan ñimbbaaquiato ñee ee ra. ²⁷ Juan ngue ñee ee ra. —Coche ñene. Dios ibatenda quiarei. Emo siqui aroneate mbia rerecuarã, Dios emingo sereã mose. ²⁸ Cristo tu nonde que Dios sembu resẽ. Mbae mbuquiche ja sacua Cristo tu nonde. “Cristo eã ño se resẽ”, ae checua rei que jẽje resẽ. ²⁹ Jesús rui ra mbia siqui ja. Sã emo ngüinisirã nguereco no nae. Sã eninisi riqui ngu rese no. Sã eru quiato abe eya erese no. Eru quiato rã ño seya riqui Jesús rese co, mbia siqui mose erui. ³⁰ Jesús quia ererecua tuchi riqui nguĩã sesi co. Ererecua eã ño aico nguĩã se co, i que Juan nda.

Jesús rei ibatenda

³¹ Jesús rei ibatenda. Nyebe eaquiato riqui nguiã mbia si co. Ibi jenda chõ nande re. Ibi jenda rese achõ ño nandeaquiato nande re. Ae quiarei ibatenda. ³² Ibatenda umaesa senei senei nguia mbia je co. Ae echandu ibate nae, ùquĩ abe esenei senei nguia mbia je co. Mbia miĩ jiri riqui echeẽ andu andu ã. ³³ Ûquĩ miĩ miĩ ño Jesús cheẽ isi turã nguiã ã. Ûquĩ miĩ “Dios ichõĩñosa reã”, i tuchi nguiã ã. ³⁴ Dios quiato que Jesús mbu ra. Nyebe Jesús riqui Dios cheẽ nenei nenei co. Dios que Espiritu Turã mondo tuchite Jesús je ra. ³⁵ Jesús rese Paba riqui nyesequa tuchite co. Erucucha quia ae re. Nyebe Paba uquirãcuã mee tuchi nguiã ee. Ì nda Jesús riqui mbae rerecuarã ja. ³⁶ Ae Dios rucucha icua nae, ùquĩ nda siqui bei Dios rese. Ae Dios rucucha icuayã nae, ùquĩ nda siquifã tuchi erese. Nyoĩ eã mbei ra ibate. Dios ra ùquĩ mondo tata cuásuu.

4

Jesús ñee acuanĩ mo je

¹⁻² Mbia que siqui tuchite Jesús rui cote ra. Bautizar i sacua mbia je. Jesús sí que bautizar i eã nda. Echimbaaquiato quia ngue bautizar i nguiã ee. —Fariseos riqui ndeucuayãte ã. Mbia siqui tuchi mose nderuĩ, i que mbia mo Jesús mbiirandu ra. ³ Jesús jirandu mose que esi Judea recha cote ra. —Tasobe Galilea, i que ra. ⁴ Samaria ni ngue esi ra. ⁵ Ngasẽ ngue Samaria ra. Sucha tubiriã mo ngue ngasẽ nda. Sicar, i que hue je ra. Jacob chimee ibi ndurubite que huee ra. Ae emee nguiĩ José je. ⁶ Jacob chibicoĩ ibi que chĩ huee ra. Noria. Jesús que ngoi huĩ uquenea ucua huee ra. Noria ji. Tenda nandeite re mose. Ñeenda ishote que ee ra.

⁷⁻⁸ Jesús ae que tiba huee ra. Echimbaaquiato que nyoĩ sucha tubiriã nda. Mbae mo isi uchiurã. Acuanĩ mo ngue tu ngasẽ i rea huee ra. Samaria jenda que ae ra. —I embu rã. Tayu, i que Jesús ñee ee ra. ⁹ Judíos que ñee eã mbei quia mbia Samaria jenda je querabe ra. Isho bei que eriqui nyesi ra. Nyebe acuanĩ ñee nguiã Jesús je. —Judiotte nde resẽ. ¿Mbaerã ereico ñee seje re? ¿Mbaerã ereico “i embu” i seje re? Samaria jenda chõ se resẽ, i que acuanĩ Jesús cheẽ ndibishorõ nda. ¹⁰ Jesús que ñee ee cote ra. —Dios chimee ereicuayãte quia co. Co ereico seicuayãte co. Eĩ nda “i raanguia embu seje” ere rei seje. Seicua mose. Eĩ nda i mbia mingo beisa amee ndeje, i que Jesús acuanĩ je ra. ¹¹ Acuanĩ ngue ñee si Jesús je ra. —Noria cuate nyeresẽ. I arasa ereru eãte quia a resẽ. Ma je quia ra i raanguia erechara seje. ¹² Nanderu ñiinda abe nda íu íu quia a yenda ye resẽ. Jacob. Nguiĩ ndese. Erimba abe nda íu íu quia a yenda ye resẽ. ¿Ndeaquiato ae si nde re? i que acuanĩ Jesús je ra. ¹³ Jesús que ñee acuanĩ je ra. —Mbia íu mose a yenda jie, eisei jei chõ nda eno. ¹⁴ Ae i raanguia mbei quia nae, ùquĩ nda eisei chiã mbei cote. I raanguia sechimee nguia ra siqui bei echiangui re. Uchi uchi bei ra equia echiangui re. Emingo bei sacua, i que Jesús acuanĩ je ra. ¹⁵ Acuanĩ ngue ñeembe Jesús je ra. —I raanguia embu nmbae seje no. Eĩ nda seisei chiã mbei. Eĩ nda achu achu eã a jenda ara, i que acuanĩ ee ra.

¹⁶ —Eso nderu rea. Eru seje a, i que Jesús ee ra. ¹⁷ —Seru eãte nyeresẽ, i que acuanĩ nda. Jesús que ñee ee ra. —Ae beite. Nderu eãte que ereico namo co ra. ¹⁸ Nderurã ngue eretea mocoĩte rei resẽ. Cinco. Ae erereco co nae, nderu tuchi eã ño aque re. Erecheẽ ñooño ãte rei nguiã seje a, i que Jesús acuanĩ je ra. ¹⁹ Jesús cheẽ mose que acuanĩ ñeembe ee no nda. —Mbae mbuchecuada nde reae. Dios resenda nde reae. ²⁰ Uramei nda ngaẽ ngaẽ nguia a ibi ato ra. Ñee ñee sacua Dios je. “Jerusalén quiato mbia cheesa Dios je re” jenyẽ chõchĩ nguiã judíos, i que acuanĩ Jesús je ra. ²¹ Jesús que ñee acuanĩ je ra. —Tacheẽ nyecua ndeje. Mangue chooño ãte ra mbia ñee Dios je cote. Namojiri. Jerusalén miĩ eã. A ibi ato miĩ eã no. ²² Jeñee mbeite raque equia Dios je ã. Dios icuare rocoĩ. Ure quia ureico nguiã Dios icuate ã. Judíos chõ ure re. Judío rei mbia rirõsa mbae icua si. ²³ Namojiri ra Dios quiatote ñee turã turã Dios rĩũ uchiangui re. Mangue chooñoa cote. Dios quiatote ra ñee turã bei quia Dios rĩũ cote. Echeẽ nguire. ²⁴ Dios rei espíritu. Mae aronea erese.

Nandechiangui re chõ nandeico Dios andu ã. Nandechiangui re nandechẽ turã turã Dios rĩĩ. Dios cheẽ nguire, i que Jesús ra. ²⁵ Acuanĩ ngue ñee Jesús je ra. —Mesías ra tu ibate si. “Cristo”, i equia ee nae, aque ra tu íbii cote. Tu mose ra mbae mbuchecua ja mbia je. Ūquĩ aicuate quia co, i que acuanĩ nda. ²⁶ —Cristo chõ se re. Ae je ereico ñee, i que Jesús acuanĩ je ra.

²⁷ Aque mose que Jesús chimbaaquiatu ngaẽ ngasẽ cote ra. —Jesús riquichĩ ñee acuanĩ je a re, i que eu nyuruirate mae erese ra. —¿Mbae jenyẽ quia ñee nde? i eã ngue emo nda. Ireĩ ireĩte quiatu ngue ñee Jesús je re. ²⁸ —Se rei Cristo, i mose que acuanĩ ía tuchi ra. Nio ngue esecha oso ra. Mbia mbiirandu randu sucha tubiriã jenda. ²⁹ —A emo ndiqui a. Semumbusẽ ja que ra. Cristo chõ ae reae. Nyao rã mae erese, i que acuanĩ mbia je ra. ³⁰ Nyebe mbia nyoĩ ja nguiã ícuua. Jirandu mae Jesús rese. Acuanĩ ñee nguire.

³¹ —Mbae mo eu, i chiibe ibe que echimbaaquiatu Jesús je ra. Acuanĩ oso mose sucha tubiriã. ³² —Tei. Sechiu jẽicuayãte jẽ, i que Jesús ee ra. ³³ —Emo mbae mo queru echiurã ndeae, i que echimbaaquiatu ñee ñee nyue ra. ³⁴ Jesús que ñee ee ra. —Ae rĩĩ Paba ñee seje nae, ũquĩ tasaã mbei quia ee. Paba cheẽ mumbayã mose, ũquĩ ño sechiu riqui nguiã. ³⁵ “Pete mbae ishao shao ñi pe”, jenyẽ chõchĩ nguiã ã. Mbiaco yenda ea ireĩ ishao iriã na ño mbia riqui nguiã ã. Sã mbia riqui nyoĩ mbae a ishao shao no. Eĩ jenyẽ si chõ nguia nyoĩ mbia reru reru seje. Serese siqui sacua. ³⁶⁻³⁸ Sã emo ndiqui mbae a ishao shao no. Sã mbae acha riqui mbae mondo mondo ee eishao shao ribishorõ no. Sã emo ndiqui mbae eĩ tiquia tiquia no. Sã emo ndiqui eishao shao equiche mose no. Eĩ si chõ secheẽ no nde. Sã emo ndiqui secheẽ nenei nenei nyii no. Aquere emo mbia reru reru seje no. Ae secheẽ nenei nenei quia nyii nae, ae mbia queru queru quia seje cote nae, ũquĩ ia jate nyiese cote. Ae emo ndiqui secheẽ nenei nenei nyii, huee jaemondo quia aque. Mbia reru reru sacua seje. Se mbia mingo bei sacua. Emo nane serenei nenei nguiã ee nyii. Jẽ jẽingo ereru reru seje ã cote. Jẽya jate riqui jenyiese ã cote. Ae secheẽ nenei nenei quia nyii, ũquĩ ndese jẽya jate, i que Jesús ra.

³⁹ —Jesús que semumbusẽ ja ra, i que acuanĩ ñee sucha tubiriã jenda je ra. Nyebe mbia tubiriã siqui nguiã Jesús rui hue jenda cote. ⁴⁰ Samaria jenda que nyoĩ Jesús rea cote ra. —Eico are jiri ure rese, i que mbia Jesús je ra. Nyebe Jesús itõ nguiã nyeremo huee. ⁴¹ Jesús sí que mbia mbaaquiatu quiatu cote ra. Nyebe mbia tubiriã siqui tuchi nguiã erui cote. ⁴² Mbia que ñee acuanĩ je cote ra. —Nde chõ ngue urembiirandu rei nyii ra. Uremae ngue erese cote ra. Echeẽ ngue urechandu cote ra. Nyebe ureico nguiã eicua tuchi ã cote. Ereceẽ ñooñoa ngue ra. Cristo tuchi chõ ae re. Mbia rirõsa mbae icua si chõ ae re, i que mbia ñee acuanĩ je ra.

Jesús ererecua mo ndiirĩ mbucherõ

⁴³ Huee que Jesús itõ nyeremo nda. Samáriaa. Hue si que esi si nyuruã Galilea qiti ra. ⁴⁴ —Mbia ra Dios cheẽ nenei neneisa quereco turã eã hue jenda sí mose, i que Jesús nyii ra. Nyebe esi nguiã Galiléaa. ⁴⁵ Jesús que ngasẽ Galiléaa cote ra. Mbia hue jenda que embucuasẽ turã nda. Mae nguiatu equia erese Jerusalén neaẽ. Pascua mose. Mbia mae sayã nguiatu ngue Jesús saã saã nguiã ee nyii. Nyebe eyate nguiã Jesús cuasẽ mose cote.

⁴⁶ Jesús que oso si Caná de Galilea no nda. Ae eriqui i mbuchiicabo uva rique rã mbia je nyii nae, huee que esi si ra. Hue rurubi que ererecua mo ndiirĩ ndasi riqui ra. Capernaum, i que hue je ra. ⁴⁷ —Jesús ru Judea si a cote, i que mbia ererecua mbiirandu ra. Nyebe ererecua si nguiã Jesús rea cote. —Seriirĩ chĩ mano serĩte qui. Nyao terembucherõ seje, i que ererecua ñee ee ra. ⁴⁸ —Mbia mae sayã naa eã mose ra jẽ seicuayã ñochĩ nde, i que Jesús ee ra. ⁴⁹ —Nyao jei rã. Seriirĩ nda mano nyee re, i que ererecua Jesús je ra. ⁵⁰ —Esobe nyebi ndechuchúaa. Nderiirĩ ngue nyerõ nda, i que Jesús ee ra. —Jesús ñee ñooño aroneate, i que ererecua oso nyebi ra. ⁵¹ Echuchua rurubi que erimba ngaẽ erobeishĩ ñee nda. —Nderiirĩ ngue nyerõte ra, i que ñee embiirandu ra. ⁵² —¿Ma tenda seriirĩ ngasi ucua re? i que ererecua ra. —Tenda nyiichere ramo mose que nderiirĩ ngacu ucua curi ra,

i que mbia ñee ee ra. ⁵³—Hue tenda tuchi que Jesús ñee seje curi ra. “Nderiirĩ ngue nyerõ nda”, i seje curi, i que ererecua ra. Nyebe eriqui nguiã Jesús icua tuchi cote. Echuchua jenda abe que Jesús icua ja cote ra. ⁵⁴Judea si que Jesús ru Galiléaa ra. Mbia mae sayã nyeremo ngue Jesús saã Galilea jenda je ra. I que esaã uva riquerã nyii ra. Ererecua riirĩ ngue embucherõ namo no nda.

5

Jesús Amei mbucherõ

¹Aquere que judíos mbae fiesta ra. Jesús que oso Jerusalén fiesta mose ra. ²Oveja iquesa que chĩ huee ra. Mbia icua abe que chĩ huee ra. Cinco tei que chĩ hue eicua mama nda. Betesda, i que judíos hue mbia icua je ra. ³Mbia rasi que chi jate nyaara huee ra. Taiqui re. Eresayã. Ecuatayã. Echaacua. Mbia rasi chumumbara que chi huee ra. I rebera raarõ arõ. ⁴Angel mo nda nguichi quichi quia ra. I mumbera sacua mbia rasi je. —Ae rane nda ua ama ndebera mose nae, aque rane nda nyerõ, i que mbia ra. ⁵Amei ndasi ima mo ngue chi bei aque rĩ nda. Treinta y ocho años que amei ndasi ra. ⁶Aque que chi nyaara Jesús je ra. —Aa chõ erasi riqui bei a cose re, i que Jesús uchiangui re ra. —¿Erecherõ sete ere? i que ee ra. ⁷Amei ndasi que ñee ee ra. —Aba quia ra sembua i ye, i rebera mose. Mbia rane ngue secuã secuã nguia ra. I rebera mose, i que erasi Jesús je ra. ⁸Jesús que ñee ee ra. —Èhuã. Ndequisa erao. Eso, i que Jesús ee ra. ⁹Echeẽ mose que nyerõ nda. Uquisa que esirõ serao ra. Erasiã ngue oso cote ra. Sábado mose que Jesús embucherõ nda. ¹⁰Nyebe judíos paama i nguiã embucherõ mose sábado mose. —Co mose que mbia uquenea ucua ra. ¿Mbaerã nda ndequisa ererao re? i que judíos Jesús chimbucherõ je ra. ¹¹—Ae sembucherõ, aque que ñee seje ra: “Ndequisa erao. Eso”, i que sembucherõsa seje ra, i que judíos cheẽ mose ra. ¹²Judíos que ñee ee ra. —¿Aba aque re? ¿Aba “ndequisa erao”, i ndeje re? i que ra. ¹³—Aicua eãte se. Aba chõ sembucherõ. Mbia tubiriãte quiatu ngue re, i que erasi judíos je ra. Jesús oso rei. ¹⁴Emo mose que Jesús ngasembe uchimbucherõ je ra. Dios chuchúaa. Ñee ngue ee ra. —¡Sã jẽ! Arembucherõ ngue se resẽ. ¡Mbae icua nda eresaã sichĩ jẽ! Mbae mo nda jeĩ tuchi ndeje cote, i que Jesús ee ra. ¹⁵Amei ngue oso judíos mbiirandu cote ra. —Jesús chõ sembucherõ nguia reaẽ, i que judíos je ra. ¹⁶Nyebe judíos paama i nguiã Jesús je. Nandequia, i. Sábado mose quia Jesús riqui nguiã mbia mbucherõ cherõ judíos je. Judíos uquenea ucua mose. Nyebe judíos paama i nguiã ee. ¹⁷Jesús que ñee judíos je cote ra. —Paba recoteã mbeite riqui co. Namu abe. Se abe Paba rã si serecoteã teã mbeite riqui co, i que Jesús ee ra. ¹⁸Nyebe judíos riqui nguiã paama i tuchi Jesús je. Iquia serĩ serĩte que cote ra. Jesús que judíos cheẽ mumba mumba ra. Mbia rasi mbucherõ cherõ sábado mose. —Dios rã si aico co. Paba rei Dios, i que Jesús ra. Nyebe judíos paama i tuchi nguiã ee.

Jesús rei Dios rucucha

¹⁹Jesús que ñeembe judíos je ra. —Dios rucucha rei se. Dios rucucha ae ra mbae saã eã. Se ae ra mbae asaã eã. Paba chisaã ndese maende ae aico nguiã mbae raã naa se abe co. Ae Paba saã saã nguia, ũquĩ asaã saã ja quia se abe co. ²⁰Dios rucucha rei se. Paba riqui nyesequa tuchi serese co. Paba riqui uchiao reacuquia tuchi seje co. Uchiao ra eteacuquia tuchi seje cote. Mbia mae sayã tuchi. Jenyuruira tuchi ra mae erese cote. ²¹Paba mbia raaque mbuquera quera. Se abe ra mbia raaque ambuquera quera. Ae amingo bei sete, ũquĩ abe ra amingo bei. ²²Paba ra mbia mo mondo eã tata cuásuu. “Nde chõ mbia equirirõ ndirõ mondo tata cuásuu”, i que Paba seje ra. ²³ĩ nda mbia ñee turã serĩ. Sã mbia riqui ñee turã Paba rĩ no. Ae ñee turã eã nguia serĩ, ũquĩ ñee turã eãte Paba abe rĩ no. Dios rucucha rei se. Dios chimee ndei se. ²⁴Tacheẽ nyecua jẽje. Secheẽ andusa ra siqui bei. Paba icuasa ra siqui bei. Nyoĩ eã mbei ra tata cuásuu. Paba ra emingo bei cote.

²⁵Tacheẽ nyecua jẽje. Namu jiri ra mbia raaque secheẽ andu. Secheẽ mumbasa reã nda siqui bei. ²⁶Paba quiarei mbia mingo beisa. Se abe rei mbia mingo beisa Paba rui si. ²⁷Se

abe ra mbia amondo tata cuásuu. “Nde chō mbia equirirō ndirō mondo tata cuásuu”, i que Paba seje ra. Se chí erucucha. ²⁸ ¡Jenyuruirā techĩ nda secheē mose jē! Mbia raaque ra secheē ñandu ja chee. ²⁹ Júã ja ra ngua si. Ae siqui turã, ũquĩ nda Dios mingo bei cote. Ae siqui icuã icuã nguia, ũquĩ nda nyoi tata cuásuu.

Serĩĩ ño embesa ji ñee, i Jesús

³⁰ Se ae ra mbae asaã eã. Paba cheē ndui si chō aico nguiã mbia mondo tata cuásuu. Paba cheē ndui si chō aico nguiã mbia mingo bei no. Paba cheē nda achabiã. Paba cheē nguire chō aico nguiã mbae raã naa co. Se ae eã ño ñene. ³¹ Se ae eã ño acheenei enei nguiã mbia je co. ĩ nda “ichōĩño” jenyere rei seje. ³² Aque emo ndiqui serenei nenei mbia je aque. Aque eriqui ñee ñooño eã serĩĩ aque. ³³ Jemo ngue jemondo Juan je. Jēirandu sacua serese. Juan ngue ñee ñooño eãte jēje ra. ³⁴ Ae mbia ñee ñee serĩĩ, ũquĩ ñee ndeseã aico nguiã se. “Dios riirĩ eã ño co re”, i mose mbia serĩĩ, Dios riirĩ mbei chō se re. Jēicuã mbutiã sacua ño aico rei nguiã ñee jēje. ³⁵ Tata rendi rã ndei Juan. Mbae resae ja raque. Huee que jengu mbirĩ ndei erese ra. Jēhui jei chōchĩ esi. ³⁶ Juan ñee ngue mbia mbiirandu rei serese ra. Sechisaã nguia mbia mbiirandu tuchi serese Juan ñee si. Dios cheē nguire ae aico nguiã mbae ao ao co. Sechisaã ndese mae jee mbia jirandu nguiã serese cote. “Dios chimondo quiarei Jesús”, i mbia cote. ³⁷ Paba abe riqui serenei nenei mbia je co. Paba cheē jeñanuate raque. Jemae sayãte raque Paba no. ³⁸ Jē nguia seicuayãte nguiã co. Paba chimondo chō se re. Nyebe Paba cheē chí eãte jendese. ³⁹ Embesa ji rese jēingo mae tuchite raque. “Embesa ji ra nandemingo beite”, jenyechĩ nguiã. Serese jembiiirandu sacua ño embesa ji re. Se quiatu mbia mingosa tuchi re. ⁴⁰ Jē nguia jēingo sereãte nguiã serese. ĩ nda se jaemingo beite rei. ⁴¹ Jēingo eã mose Dios rese, sebiãte jeñee turã turã mose serĩĩ. ⁴² Co aico jēicuate co resē. Jenyesecua eãte quia Dios rese co resē. ⁴³ Paba que sembu resē. Jēo eã ñochĩ serese. Paba chimondo eã tu mose, aque rese quia ra jēo tuchite cote. ⁴⁴ Mbia resa rae jēingochĩ nguiã jēturã naa naa. Dios je quiarei jēturã eãte. ¿Mañi jenyere quiatu ra equia seicua re? ⁴⁵ Se quia ra jēicuã ambuchecua eã Paba je. Moisés chimbesa quia jēicuã mbuchecua nguiã. “Moisés chimbesa rei mbia mingo beisa”, jenyechĩ nguiã. ⁴⁶ Moisés chimbesa jēicua eãte quia ã. Nyebe jēingo nguiã seicua eãte ã. Serĩĩ ngue Moisés embesa ra. ⁴⁷ “Nyia” jenyere eã mose Moisés chimbesa je, “nyia” jenyere eã nda secheē mose abe no, i que Jesús judíos je ra.

6

Jesús mbichae mbeta tuchi

¹ Aquere que Jesús choi ama ndisa rasa ra. Galilea, i que ama ndisa je ra. Tiberias, i abe que ee ra. Hue robei que echoi ra. ² Mbia que nyoi tuchite Jesús rui ra. Mbia mae sayã ngue Jesús saã saã nguia ra. Echisaã ndese que mbia mae mae nda. Mbia rasi mbucherō cherō mose. ³ Sita ibate rĩ ngue Jesús choi ra. Huee que echi ngoi uchimbaaquiato rese ra. ⁴ Fiesta de pascua rurubi que ra. ⁵ Mbia tubiriã ngue ngaã nguia Jesús rui ra. Jesús que mae erese ra. Ñee ngue Felipe je ra. —Mbia tubiriã tuchi. ¿Mangue ra echiurã nandei mangue re? i que Jesús ee ra. ⁶ Jesús eicuate raque. —Mañi nda Felipe quia secheē mose reae, i que Jesús ra. ⁷ Felipe que ñee ee ra. —Doscientos plata mbia chayãte mbia chiurã isi sacua. Echayã tuchite, i que Felipe ra. ⁸ Andrés abe que chi ra. Jesús chimbaaquiato. Simón Pedro nongue. Ae que ñee nda. ⁹ —A ãquē mo ndiqui a. Cinco mbichae rerequia a. Sira nyeremo abe rerequia a. Echayãte quiatu nda re. Mbia tubiriãte quia ñene, i que Andrés Jesús je ra. ¹⁰ —“Jengoi ja”, jenyere mbia je, i que Jesús ra. Quiata turã ngue huee ra. Quiata tose que mbia ngoi ja ra. Mbia cuabē. Cinco mil que mbia ra. ¹¹ Jesús que mbichae isi cote ra. Ianye, i que ngu je cote ra. Mbichae rĩ. Mbichae que embuchao chao cote ra. Uchimbaaquiato je que emondo mondo ra. Echimbaaquiato que emondo mondo mbia je cote ra. Ae chi ngoi. Sira abe que embuchao chao mbia je ra. Mbia que eu ja ra. Mbia que echosei chiã chiã nyee ra. ¹² Mbia rio ja mose que Jesús ñee uchimbaaquiato je cote

ra. —¡Mbia chiu sique jemunua nua jê! ¡Jendecoquiato ja jê! i que ra. ¹³ Echiu sique que emunua ja ra. Doce irairu que puk i ja ra. Mbichae sique sique. Cinco chõ ndei que mbichae nyii aẽ. ¹⁴ Mbia que mae tuchi Jesús rese ra. Mbichae mbeta rese ra. Ñquĩ ndese que mbia riqui mae eã tuchi nyii ra. —Dios cheẽ nenei neneisa chõ co riqui re. Ae uresaarõ arõ nguia, ae chõ eriqui re, i que mbia Jesús rĩĩ nda.

¹⁵ Jesús que mbia icua ra. —Mbia ra seisichĩ suruchoi ererecuarã nde, i que ra. Nyebe esi si nguia mbia recha. Sita ibate rĩ ngue esi erecha ra.

Jesús ngata i arõ

¹⁶ Itondaru ndaru que Jesús chimbaaquiato choi ama ndísaa ra. ¹⁷ Nyui nyui que canoa ye cote ra. Aque echoichĩ nguia iasa Capernaum aque. Jesús que nyebi eã mbeite u ee ra. Itondaru chee. Nyoĩ chee que erecha ra. ¹⁸ Quiririã ngue tu icuã icuã ee ra. Ama ndiite re mbia reco mose. I rebera que tu asi asi tuchi ra. ¹⁹ Mbia que nyoĩ choi bei canoa ye ra. Una legua. Jesús que canoa curubite cote ra. I arõ ngue esi quia ngata ra. Canoa yenda que mae erese ra. Echiã ngue cuaãcuã i tuchi ra. ²⁰ —Se chõ nyeresẽ. ¿Mbaerã jẽingo siquiche sesi re? i que Jesús ee ra. ²¹ Canoa yenda que oote erese cote ra. Mbia que canoa ye ra. Ngasẽ asi que ecuaẽ ìbii cote ra.

Mbia cuabẽ Jesús requia

²² Mbia cuabẽ ngue chi sobei ra. Isamami ngue Jesús tiãte ee ra. Nyebe ñee nguia nyue. —Canoa miĩ ño ngue chi resẽ. Canoa ye eã ño Jesús si iasa resẽ. Echimbaaquiato achõ ño ngue nyoĩ iasa canoa ye resẽ. ¿Mangue Jesús riqui mangue re? i que mbia cuabẽ u ñee Jesús requia ra. ²³ Aque mose que canoa mo ngaẽ ngasẽ ee ra. Tiberias si que canoa cuaẽ nda. Mbia mbichae usa rurubi que ecuaẽ tiba ra. ²⁴ Jesús tiã mbei que mbia je huee ra. Mbichae úsaa ra. Echimbaaquiato abe tiã ngue mbia je ra. Nyebe mbia choi nguia erequia canoa ye. Ngasẽ ngue coquimo cote ra. Capernaum, i que hue sucha je ra.

Mbichae rã ndei Jesús

²⁵ Mbia cuabẽ ngue ngaẽ ama ndasa coquimo ngote ra. Ngasẽ ngue Jesús je cote ra. —Mbia mbaaquiatusa, ¿manose erechu ngasẽ aa re? i que mbia cuabẽ Jesús je ra. ²⁶ Jesús que ñee ee ra. —Tacheẽ nyecua jêje. Se jembuquiarure chõ jẽingo nguia serese. Se jembiore chõ jẽingo nguia serese. Sechisaã icuare rocoĩ. Jemae sayã ngue asaã saã ndei quia resẽ. ²⁷ Jenyurã ndese jẽingochĩ nguia ndua tuchite. Ñquĩ nda ua jeite. Ae ua eã mbeite quia, ñquĩ ndese quiato jendua. Mbia mingo beisa rese quiato jendua. Se rei mbia mingo beisa. Se rei Dios rucucha. Paba que uquirãcuã mondo seje ra, i que Jesús ee ra. ²⁸ Mbia que ñeembe Jesús je ra. —¿Mañi ure ra equia re? ¿Mbae rese ra aba riqui Dios mbia re? i que mbia Jesús je ra. ²⁹ Jesús que ñeembe ee ra. —Dios que sembu ra. Seicua quia se. Seicua mose ra Dios ia tuchi jendese cote, i que Jesús mbia je ra. ³⁰ —¿Mbae mo nda eresaã na ure je re, uremae sayã nde? Ñnda uremae nderese. Eĩ ure ra ndeicua cote. ³¹ Cose nda nanderamei ndiqui maná u u turuquia rĩ nda. Sã embesa ji no: “Dios que mbichae mbu ibei si mbia je ra”, sã embesa ji riqui i no, i que mbia Jesús je ra. ³² Jesús que ñee ee ra. —Tacheẽ nyecua jêje. Moisés eã ño ngue mbichae mondo nguia mbia je ibei si. Paba chõ ngue emondo nguia ibei si mbia je. Aque mbichae ra mbia mingo bei eã. Paba ra mbia mingo beisa mondo mbia je cote. ³³ Dios riqui mbichae mbuae mondo mondo mbia je co. Ae Dios mondo mundo nguia mbia je co nae, aque que tu ibei si ra. Aque rei mbia mingo beisa, i que Jesús ra. ³⁴ Mbia que ñee Jesús je ra. —Aquembichae mbichae emondo mondo bei quia ure je, Urererecua, i que mbia Jesús je ra.

³⁵ Jesús que ñee ee cote ra. —Mbichae rã ño se re. Mbia mingo beisa chõ se re. Serese siqui mose ra jeniãcuã eã mbei. Serese siqui mose ra jẽisei eã mbei. Jeya bei rae. ³⁶ Jemae ndei que equia serese resẽ. Seicuayã mbei chõchĩ nguia ã. Acheẽ ndei que jêje nyii resẽ. ³⁷ Ae Paba mee seje mbia nae, ñquĩ nda siqui bei serese. Ñquĩ nda aisi teã eã mbei. ³⁸ Paba que sembu ibei si resẽ. Secheẽ nguire eã ño aico nguia mbae raã naa. Paba cheẽ nguire

ae chõ aico nguiã mbae raã naa co. ³⁹ “Ae amondo ndeje nae, ùquĩ mo nda quiachãchĩ”, i que Paba seje ra. Ambuquera ja ra se, se tube mose íbii. ⁴⁰ Se rei Dios rucucha. Paba que sembu ra. Ae seicuate nae, ùquĩ nda siqui bei. “Ûquĩ nda amingo bei”, i que Paba ra. Ûquĩ ndaambuquera ja, se tube mose íbii, i que Jesús ra.

⁴¹ Judíos que paama i Jesús je ra. —Se rei mbichae rã. Ibei si que achu ra, i mose que judíos ñee icuã icuã Jesús je ra. ⁴² —Jesús chõ co re. José riiĩ ño co re. Eru rese que nandemae ndesẽ. Esi abe rese que nandemae ndesẽ. ¿Mbaerã eriquiñee nande je re? “Ibei si que achu ra”, i nande je re, i que mbia ñee ñee nyue ra. ⁴³ Jesús que ñee ee cote ra. —¿Mbaerã jẽingo ñee icuã icuã serĩĩ nde? ⁴⁴ Mbia ae ra siqui eã serese. Paba emingo mose serese, aque mose ra eriqui tuchi serese cote. Ûquĩ ndaambuquera si mingo sechube mose íbii. ⁴⁵ “Dios ra mbia mbaaquiato ja”, sã embesa ji riqui i no. Nyebe ra Paba cheẽ andusa siqui bei serese. Nyebe ra Paba cheẽ mumbasa reã siqui bei serese. ⁴⁶ Emo ngue mae eãte Paba rese ra. Se miĩ ño ngue amae erese ra. Esi chõ ngue achu resẽ. ⁴⁷ Tacheẽ nyecua jẽje. Ae seicuate quia nae, ùquĩ nda siqui bei. ⁴⁸ Se rei mbichae rã. Mbia mingo beisa rei se. ⁴⁹ Nanderamei ngue maná u u turã ndei quia turuquia re ra. Emo mose que mano mano ja ra. ⁵⁰ Mbichae mbuae chõ asenei senei nguiã jẽje co. Mbia mingo beisa rei mbichae mbuae. Aque que tu ibei si ra. Ae mbichae mbuae u nae, ùquĩ nda siqui bei. Ûquĩ nda ua eã mbei. ⁵¹ Se rei mbichae. Ibei si que achu ra. Mbia mingo beisa rei se. Ae seu nae, ùquĩ nda siqui bei. Mbichae ra amee mbia mingo bei sacua. Aque mbichae rei serete sí. Seroo sí, i que Jesús judíos je ra.

⁵² Judíos que ñee icuã icuã nyue cote ra. —¿Mañi nda nguete mee nandechiurã nde? i que nyue ra. ⁵³ Jesús que ñee ee cote ra. —Tacheẽ nyecua jẽje. Mbiarã ngue achu ra. Serete jẽu eã mose, jẽingo bei eã ndae. Seruqui jembei eã mose, jẽingo bei eã ndae. ⁵⁴ Ae serete u quia nae, ùquĩ nda siqui bei. Ae seruqui mbei quia nae, ùquĩ nda siqui bei. Ûquĩ ndaambuquera si mingo, sechube mose íbii. ⁵⁵ Serete rei mbia chiu rã. Seruqui rei mbia chimbei rã. ⁵⁶ Ae serete u quia nae, ae seruqui mbei quia nae, ùquĩ nda siqui bei sechiangui re. Se abe ra aico bei echiangui re. ⁵⁷ Paba riqui bei co. Paba riqui semingo se abe co. Eĩ nda serete usa abe siqui bei. Amingo bei ra se. ⁵⁸ Mbichae mbuae chõ asenei senei nguiã jẽje co. Ae tu ibei si. Maná na eã ño aque mbichae re. Maná ngue nanderamei u u rei ra. Maná ngue mbia mingo bei eã nda. Emo mose que mano ja chõ nda. Ae sechimée u quia nae, ùquĩ nguia ra siqui bei, i que Jesús judíos je ra. ⁵⁹ Eĩ ngue Jesús quia judíos mbaaquiato quiato ra. Capernaum. Judíos chumunuásaa.

Mbia tubiriã hui Jesús si

⁶⁰ Jesús cheẽ andusa que ñee tuchi nyue ra. —Mbaranguiatuã tuchi chõ Jesús cheẽ ndiqui re. Echeẽ nandemumba eã aroneate quiato quia re, i que nyue ra. ⁶¹ —Mbia riqui ñee icuã icuã tuchi chõ secheẽ nii, i que Jesús uchiangui re ra. Nyebe ucheẽ mbuchecua ee cote. —¿Mbaranguiatuãte secheẽ jẽje re? ⁶² ¿Mañi jenyee ra mae mose serese re? Seso si mose ibate re. ⁶³ Nande rete nandemingo eã nguiã. Nande aĩ ño nandemingo nguiã. Secheẽ nguia ra mbia mingo bei íbatee. ⁶⁴ Seicua ja eãte quiato nguiã ã. Jemo seicua eãte quia ã, i que Jesús ee ra. Mbae ao ramo mosenda bei que Jesús mbia icua uchiangui re ra. —Ã nda seicua. ã nda seicua eã. Co ra semondo mbia icuã je, i que Jesús mbia icua uchiangui re nyii ra. ⁶⁵ —Acheẽ ngue jẽje nyii, ùquĩ sí aico ñee jẽje a. Mbia ae ra siqui eã serese. Paba emingo mose serese, aque mose ra eriqui tuchi serese cote, i que Jesús ra.

⁶⁶ Aque mosebe bei que mbia tubiriã hui Jesús si cote ra. Ae siqui erese nyii nae, ùquĩ mo ngue hui ja esi cote ra. Ngatayã ngue equia erui cote ra. ⁶⁷ Jesús que ñee uchimbaaquiato je cote ra. Doce je. —¿Jẽ abe ra jẽhui sesi re? i que uchimbaaquiato je ra. ⁶⁸ Simón Pedro que ñee ee ra. —Tei, Urererecua. Aba rui quia ra ureico cote. Ndecheẽ ño mbia mingo beisa resẽ. ⁶⁹ Ureico ndeicua ã cote. Cristo rei nde. Dios rucucha rei nde, i que Pedro ra. ⁷⁰ Jesús que ñee ee cote ra. —Jẽ doce que jaẽirabo rei ra. Sechimbaaquiato sacua. Jemo ngue diablo rã nda, i que ra. ⁷¹ Judas Iscariote riĩ ngue eriqui ñee nda. Diablo,

i. Simón ndiirĩ ndei Judas. Ae quia Jesús mee nguiã mbia icuã je. Jesús chimbaaquiatu mo ndaque.

7

Jesús nongue siquã Jesús rese

¹—Jesús nandei quia, i rei que judíos quia ñee ñee nyue ra. Nyebe Jesús si eã nguiã Judea cote. Galilea bei que eriqui ngata ra. ²Fiesta rurubi mose que cote ra. Tuchua ñetẽ ngue judíos saã saã mbei quia aque fiesta mose ra. Curubite que cote ra. ³Jesús nongue que ñee ja ee ra. —Eso rã Judea. Ñ nda ndechimbaaquiatu mae ja ndechisaã ndese Judea jenda. ⁴¡Mbae esaã nyecua chõ mbia resa rae jê! Ñ nda mbia ndeicua ja. Co ereico mbia mae sayã naa naa co. Mbia resa rae quiatu esaã saã, i que enongue ee ra. ⁵Jesús nongue abe que Jesús icuayãte ra. Nyia, i eã Jesús cheẽ je. ⁶Jesús que ñee ee cote ra. —Emo mose quia ra aso nyecua mbia je cote. Jê jêso jê ae ae, jêsose mose. ⁷Dios cheẽ mumbasa riqui jêucuyã eãte raque jê. Se quia eriqui nguiã seucuyãte ã. “Jenyisaã saã nguia eicuãte riqui nguiã”, ae quiatu nguiã ee co. Nyebe eriqui nguiã seucuyãte ã. ⁸Jê ño jêso fiesta rea. Se ra asoã. Emo mose quia nda achecua nguiã mbia je cote, i que Jesús ngõngue je ra. ⁹Jesús que siqui are jiri Galilea cote ra.

Jesús mbia mbaaquiatu quiatu fiesta mose

¹⁰Jesús nongue que nyoĩ fiesta rea cote ra. Aquere que Jesús abe si mingue cote ra. Ngasẽ nyecuyã ño ngue oso ra. —Mbia ra jiranduchĩ serese re, i que uchiangui re ra. ¹¹Judíos rerecua que Jesús sequia sequia ja u ra. —¿Ma Jesús riqui ma nde? i ja que fiesta mose ra. ¹²Mbia que ñee ata atate Jesús rĩĩ nda. —Jesús turãte que, i que emo emo nda. —Jesús turã eã ngue ra. Mbia mbiĩĩ irĩte que equia no nda, i que emo emo no nda. ¹³Mbia que siquichete judíos rerecua si ra. Nyebe mbia ucheẽ mbuchecua eã nguiã Jesús rĩĩ.

¹⁴Fiesta ite mose que Jesús si Dios chuchua mbia mbaaquiatu quiatu cote ra. ¹⁵Judíos que nyuruirã tuchi Jesús cheẽ andu ra. —Eaquiatute quia eriqui re. ¿Mangue eriqui ñimbaaquiatu mangue nyii re? i que mbia ra. ¹⁶Jesús que ñee ee ra. —Secheẽ ae eã asenei senei nguiã jêje co. Paba cheẽ ño asenei senei nguiã jêje. Ae sembu. ¹⁷Emo siquise mose Dios cheẽ ndui, aque ra Dios cheẽ icua tuchi. Aque ra ñee. “Ucheẽ ño eã Jesús senei senei nguiã mbia je co. Dios cheẽ ño esenei senei nguiã mbia je co”, i ra aque ñee serĩ. ¹⁸“¡Sã mbia ñee turã mbe i serĩ jê!” i ra emo ucheẽ achõ nenei nenei. “¡Sã mbia ñee turã mbei Dios rĩĩ nguiatu jê!” ae chõ nguiã Dios cheẽ nenei nenei se co. Acheẽ ñooño eã ño nguiã co. Mbia ambĩĩĩ irĩ eã ño nguiã co. ¹⁹Moisés que Dios cheẽ mbesa rei nande je ra. Nande emumbayã sacua. Jê nguia rei Dios cheẽ mumba. ¿Mbaerã jêingo sei quia serĩte re? i que Jesús ee ra. ²⁰Mbia que ñee ee cote ra. —Emo ndiqui ndei quia serĩ eãte co. Aba checuyã icuã ae nembĩcuã ndeae, i que mbia Jesús je ra. ²¹Jesús que ñee ee cote ra. —Mbia rasi mo ngue ambucherõ sábadõ mose. Aque mĩĩ ño ngue asaã ndei nguiã. Aque mĩĩ je chõ jêingochĩ nguiã nyuruirate mae serese. ²²Moisés que circuncisión teacuquia jêje ra. Nanderamei nane ngue circuncisión saã nguiĩĩ je ra. Nyebe jêingo nguiã sábadõ mose abe circuncisión naa naa jendiĩĩ je. ²³Moisés cheẽ nguire chõ jêingo nguiã circuncisión naa naa jendiĩĩ je ã. Sábado mose abe. ¿Mbaerã jêingo paama i seje mbia mbucherõ mose sábadõ mose re? ²⁴“Aque eicuãte”, jenyje jei chõchĩ nguiã. Jêirandu turã na erese nyii, i que Jesús ee ra.

Ibatenda chõ se re, i Jesús

²⁵Jerusalén jenda que ñee ñee Jesús rĩĩ cote ra. —A Jesús riqui ñee mbia je a. ¿Nandererecua ra Jesús iquã eã si chõ nde? ²⁶A eñi nyecua ñee mbia ite re a. Nandererecua ñee eã tuchi chõchĩ ee. Teachõ tuchi chõchĩ. ¿Cristo eriqui reĩ nandererecua je re? ²⁷Cristo eã ño Jesús re. Galilea jenda chõ ae re. Cristo tu mose quiatu ra nandeiranuate. Ma si chõ nda eru, i que Jerusalén jenda ñee nda. ²⁸Jesús que echeẽ ñandu ja ra. Dios chuchúaa eriqui mose mbia mbaaquiatu quiatu. Nyebe Jesús

echeẽ ndibishorõ nguiã cote. —¿Ma si achu co re? ¿Jẽ seicuate re? Se ae achu eã nguiã co. Sembu ji ae aico nguiã co. Ichõĩñosa reã ae ngue sembu nguiã. Ae rese jemaẽ ãte nae, ae chõ sembu nguiã. ²⁹ Se ae que amae erese ra. Esi que achu ra. Ae chõ sembu nguiã co, i que Jesús ee ra. ³⁰ Mbia que paama i Jesús cheẽ mose ra. —Jesús nandeisi etarõ sacua, i rei que mbia ñee nyue ra. Ae mbia eisiã ño nguiã. —Aque mose ra eremano, i ãte quiarei Dios ee. ³¹ Mbia tubiriã ngue Jesús icua icua ramo nguia cote ra. Nguerecuarã. —Cristo tuchi rei co. Co eriqui mbia mae sayã naa naa tuchi co. Emo aquiatu mo nda tuãte rei. Co miã tuchi chõ ndei Dios chimbu co, i que mbia tubiriã nguia ñee ñee Jesús rĩĩ nda.

Fariseos paama i Jesús je

³² Fariseos que nyiisaquia mbia cheẽ ndese ra. Mbia ñee turã turã mose Jesús rĩĩ. Nyebe fariseos paama i nguiã Jesús je. Policía jenda mo ngue emondo rei Jesús isi sacua nda. Sacerdote rerecua abe que policía jenda mondo rei Jesús isi sacua nda. ³³ Jesús que ñee nda. —Aico mbĩrĩ ño nguiã jendese a cote. Aquere ra aso si Paba rea. Ae sembu. ³⁴ Jẽ nda serequia cote. Serea eãte ra se cote. Ae ra aso nae, huee jengasẽ aroneate, i que Jesús ee ra. ³⁵ Judíos que ñee nyue ra. —Manguiti ra esi reae. Manguiti ra nandecuasẽ aroneate ee reae. Judíos siqui quia griegos rese nae, ũquĩ ndea ra esi reae. Griegos mbaaquiatu sacua ndeae. ³⁶ “Serequia ra se cote. Serea eãte ra se. Ae ra aso nae, huee jengasẽ aroneate”, i chõchĩ nguiã nande je. ¿Mbaerã eriqui ñee nande je ũquĩ nde? i que judíos u ñee nyue ra.

Jesús icuasa rei i riõ na

³⁷ Fiesta ua nonde que mbia ñumunua tuchi cote ra. Fiesta mumba bei. Aque mose que Jesús ñi juã ñee mbia ite re ra. —“Emo isei mose, sã eru serea. Ambiu ra se. ³⁸ Ae ra seicua nae, i riõ na nda ũquĩ. Iãcuã turã na nda ũquĩ”, sã embesa ji riqui i no, i que Jesús ucheẽ mbirãtãte mbia je ra. ³⁹ —Ae ra seicua nae, ũquĩ je ra Espiritu Turã amondo, i ñene. Espiritu Turã mbu nonde chõ eriqui nguiã ñee. Jesús oso eã mose ibate chõ eriqui nguiã ñee.

Mbia ñee atate Jesús rĩĩ

⁴⁰ Mbia tubiriã ngue chi Jesús cheẽ andu ra. ũquĩ mo ngue ñee nyue ra. —Co rei Dios cheẽ nenei neneisa co. Ae uresaarõ arõ nguia co, i que u ñee Jesús rĩĩ nda. ⁴¹ Emo emo ngue ñee nda. —Co rei Cristo tuchi co, i que ra. Emo emo ngue echeẽ sibi shorõ no nda. —Tei. ¿Mañi nda Galilea jenda Cristo re? Hue jenda eã ño nda Cristo ndesẽ. ⁴² “David riirĩ nda Cristo. Belén jenda ra Cristo, David rã si”, sã embesa ji riqui i no, i que mbia ñee ñee nyue ra. ⁴³ Hue rĩ ja mbia ñee eãchĩ Jesús rĩĩ. Mbia que ñee ata ata Jesús rĩĩ nda. ⁴⁴ —Jesús nandeisi serao tarõ, i rei que emo emo ñee nda. Isiã si que ra.

Fariseos Jesús icuayã

⁴⁵ Policía jenda ochi que nyoĩ nyebi fariseos je cote ra. Sacerdotes rerecua je abe nyebi. —¿Mbaerã Jesús jendu eã ure je re? i que ererecua policía jenda je ra. ⁴⁶ Policía jenda que ñee ee ra. —Aque Jesús riqui mbia mbaaquiatu turã tuchi aque. Ae rã si emo mbia mbaaquiatu turã aronea, i que policía jenda ñee mbia rerecua je ra. ⁴⁷ Fariseos que ñee policía jenda je cote ra. —¿Jẽ abe chee chõ Jesús jembĩrĩ irĩ nguia re? ⁴⁸ Nandererecua mo ngue “coche rei” iã tuchi Jesús je resẽ. Fariseos mo abe que “coche rei” iã tuchi Jesús je resẽ. ⁴⁹ ã mbia ataque riqui Dios cheẽ icua eãte ã. Quiachã ja ra Dios si, siqui mose Jesús rese, i rei que fariseos ra. ⁵⁰ Nicodemo abe rei fariseo. Ae tu Jesús je isa nae, aque que ñee fariseos je ra. Uataque je ra. ⁵¹ —Emo nandembasi mbasi chooño aroneate. Echeẽ nandechandu rane nguiatu. Nandeirandu ja rã nguiatu erese. Embasi nonde. Eĩ ngue Moisés embesa miã nande je ra, i que Nicodemo uataque je ra. ⁵² Fariseos que ñee ee cote ra. —¿Nde abe chõ Galilea jenda Jesús rese re? Embesa ji rese emae mae. Dios cheẽ nenei neneisa mo eãte que Galilea jenda resẽ, i rei que fariseos ñee asi Nicodemo je ra. ⁵³ Mbia que nyoĩ ja uchuchua cote ra.

8

Cuña mo siqui emo ndu rese

¹ Jesús que oso Monte de los Olivos ra. ² Isamami ngue Jesús si nyebi si Dios chuchúaa ra. Eresaitō ndabe. Mbia que esiichā tuchi ra. Jesús que ngoi ra. Mbia mbaaquiātu quiātu. ³ Fariseos que cuña mo curucuaē Jesús je ra. Embesasa rese que cuña ndurucuaē ee ra. Cuña nda siqui emo ndu rese mbia je ra. Mbia ite re que fariseos cuña mii nda. ⁴ Ae cuña curucuaē nae, ūquĩ ngue ñee Jesús je ra. —Urembaaquiātusa, mbia que mae cuña ndese ra. Emo ndu rese siqui mose. ⁵ Moisés que ñee nande je ra. “À jēiquia sita je”, i que Moisés quia ā mbia riĩ nda. ¿Mañi ere ra ā nii ñee nde re? i que cuña ndurucuaēsa ñee Jesús je ra. ⁶ —Jesús nandembĩri. Ī nda ñee icuā. Ī nda mbia nandembĩicuā Jesús je cote, ichō equia nyii reaē. Nyebe cuña ndurucuaēchĩ ee reaē. Jesús que nyatiquio chō nda. Ibi que embesa mbesa o je ra. ⁷ —¿Mañi ere ra nde cuña je re? i bei que mbia quia Jesús je ra. Jesús que juā ñee mbia je cote ra. —Jemo turā mbeite mose, sã aque rane cuña chei sita je, i que Jesús ee ra. ⁸ Nyatiquio si que ibi mbesa ra. ⁹ Jesús cheē andu mose que mbia rerecua ireĩ ireĩ ja chō nda. —Nandeicuā jate que, i ja chō ngue ñee uchiangui re ra. Nyebe ehoi nguiā usē ja. Amei nane ja que ra. Eataque quia usē nguiā erui cote. Ererecua que usē ja ra. Jesús ae que siquichō nda. Cuña ndesechō. ¹⁰ Jesús que juā mbia rerecua ruibe cote ra. Cuña je que ñee cote ra. —¿Ma nderurucuaēsa ma nde? “Nandechei rã sita je”, ¿iāte emo nguiā nderĩĩ co re? i que Jesús ñee cuña je ra. ¹¹ —Tei. Emo ñeeāte, Sererecua, i que cuña Jesús je ra. Jesús que ñee ee cote ra. —Se abe ra acheē eā ndeje. Eso rei. ¡Mbae icuā nda eresaā sichĩ jē! i que Jesús cuña je ra.

Tata rendi rã ndei Jesús

¹² Jesús que ñee si mbia je ra. —Mbia ja mbaaquiātusa chō se re. Tata rendi rã ño aico nguiā mbia je co. Ae siqui serui nae, ūquĩ nda siquiā itondáruu. Ūquĩ amingo bei quia querabe co, i que Jesús mbia mbaaquiātu ra. ¹³ Fariseos que ñee Jesús je cote ra. —Ndechue chō ereico nguiā ñee mbia je. Nyebe mbia “coche rei” i aronea ndechē je, i que fariseos ñee Jesús je ra. ¹⁴ Jesús que ñee echeē ndibishorō nda. —Sechue acheē ndaque mbia je. “¡Ae bei jē!” i chō mbite raque aba secheē mose. Ae si achu nae, huee jēicuayāte. Ae ra aso nae, hue abe ra jēicuayāte no. Se ae aicua nguiā co. ¹⁵ Jeñee icuā jei chōchĩ nguiā aba riĩ. Mbae mumbusē ja mose rocoĩ. Eĩ ae eā ño nguiā se. ¹⁶ “Co eicuāte”, ae eā nguiā se ae co. Paba rese chō aico nguiā mbia mumbusē ja co. Nyebe aico nguiā ñee Paba cheē ndui si co. ¹⁷ “Mbia nyeremo ñee mose hue rĩ si, ‘ae beite’ jenyē chō”, i que Moisés jēje ra. ¹⁸ Sã ure nyeremo ure no. Paba rese. Ae sembu. Sã ureico ñee serĩĩ Paba rese no. Ure nyeremo, i que Jesús fariseos je ra. ¹⁹ —¿Ma nderu riqui ma nde? i que fariseos Jesús je ra. Jesús que ñee ee ra. —Paba jēicuayāte quia ā. Se abe seicuayāte quia ā. Jē seicua mose, Paba abe ra jēicua, i que Jesús ra. ²⁰ Eĩ ngue Jesús quia mbia mbaaquiātu quiātu Dios chuchúaa ra. Ofrenda no nosa jii que eriqui mbia mbaaquiātu quiātu ra. Emo ngue Jesús isi āte etarō sacuā nda. —Aque mose ra eremano, i āte quiarei Dios ee.

Aso si ra ibate Paba rea, i Jesús

²¹ Jesús que ñee si fariseos je ra. —Aso si ra Paba rea cote. Serequia requia rei nda se re. Jēicuā mbei ra jemano nyee. Ae ra aso nae, huee jengasē aroneate, i que Jesús ee ra. ²² Judíos que ñee ñee nyue ra. —¿Mbaerā nda nandecuasē aroneate ee re? Nyiiquia ra reae, i rei que ñee nyue ra. ²³ Jesús que ñee ee ra. —Ibi jenda chō jē nde. Ibatenda chō se re. Ibi jenda eā ño se re. ²⁴ Nyebe aico nguiā ñee jēje nyii. “Jēicuā mbei ra jemano nyee”, ae que jēje nyii. Seicuayā mbei mose ra jemano nyee jēicuā mosebe, i que Jesús ee ra. ²⁵ —¿Aba tuchi nde re? i que mbia Jesús je ra. Jesús que ñee ee ra. —Cose ndare bei chō aico nguiā serenei nenei jēje co. ²⁶ Mbae ra asenei tuchi jēje reae. Secheē nda jēicuā mbuchecua tuchi jēje. Ae sembu nae, aque quiarei ñee ñooño aronea. Echeē ngue achandu ra. Ae cheē ño asenei senei mbei nguiā mbia je co, i que Jesús mbia je ra. ²⁷ Mbia rerecua que Jesús cheē icuayā mbei ra. —Dios riĩ ño eriqui nguiā ñee, iā mbei que mbia

ra. ²⁸ Jesús que ñeembe ee ra. —Mbiarã ngue achu ra. Jẽ nda sembucha ira rese cote. Aque mose ra mbae jẽicua jiri seriĩ cote. “Dios cheẽ nguire chõ eriqui mbia mbaaquiату quiatu re”, jenye ra seriĩ cote. “Dios rucucha chõ eriqui re”, jenye ra seriĩ cote. ²⁹ Ae sembu nae, aque riqui bei serese co. Echeẽ nguire aico bei embia co. Nyebe eriqui nguiã serechayã mbei co, i que Jesús ra. ³⁰ Jesús cheẽ mose que mbia Jesús icua icua cote ra.

Jẽingo bei mose serui, sechimbaaquiату tuchi chõ jẽ nde

³¹ Ae Jesús icua quia judíos nae, ũquĩ je que Jesús ñee nda. —Secheẽ si jẽhui eã mose, sechimbaaquiaturã tuchi ra jẽ. ³² Jẽ nda ichõĩñosa reã jẽicua tuchi cote. Mbia icuã nderecua rimba eã nda jẽ cote, i que Jesús ee ra. ³³ Mbia que ñee Jesús je ra. —Abraham nducucha rei ure. Mbia mo nimba eã mbei que ureico resẽ. ¿Mbaerã ereico ñee ure je re? “Mbia si taembui mingo cote”, i ure je re, i que mbia Jesús je ra.

³⁴ Jesús que ñee ee cote ra. —Ae mbae icuã saã saã nguia nae, ũquĩ ndiqui bei eicuã nimbarã ã. ³⁵ Erimba ra siqui bei eã nguerecua rese. Nguirĩ tuchi quiatu ra equereco bei nyiese. ³⁶ Se jembui mose mbae icuã si, eicuã nimbarã eã nda jẽingo cote. ³⁷ Abraham nducucha raque jẽ. Ũquĩ aicuate raque. ã jẽingo secheẽ isi turã eãte ã. Secheẽ jẽucuyã nguia ã. Nyebe jẽingo nguiã seiquia serĩte ã. ³⁸ Ae Paba teacuquia seje nae, ũqui ño asenei senei nguiã jẽje co. Ae jendu teacuquia jẽje nae, ũquĩ ndese chõ jẽingo nguiã jẽ ã no, i que Jesús ee ra.

³⁹ —Abraham ño ureru resẽ. Urei resẽ, i que mbia Jesús je ra. Jesús que ñee ee cote ra. —Abraham nducucha turã mose jẽ, eĩ nguia nda jẽingo turã nguiã ña. Abraham ndui si. ⁴⁰ Dios que sembaaquiату ra. Dios quiarei ñee ñooño eã. Echeẽ ño asenei senei nguiã jẽje co. Ũquĩ je chõ jẽingo nguiã seiquia serĩte ã. I ãte que Abraham quia seje ra. ⁴¹ Jendu rã si chõ jẽingo nguiã ã, i que Jesús ee ra. Mbia que ñee Jesús je cote ra. —Ureru ata ata eãte nyeresẽ. Dios miĩ ño ureru re, i que ñee Jesús je ra. ⁴² Jesús que ñeembe ee ra. —Dios jendu tuchi mose, eĩ nguia nda jẽingo nguiã nyesecua serese chã. Ae quiarei sembu. Se ae eã achu nguiã. ⁴³ ã jẽingo secheẽ andu sereãte ã. Nyebe jẽingo nguiã secheẽ icua aroneate ã. ⁴⁴ Aba checuayã nderecua rei jendu. Erese bei chõ jẽingo nguiã ã. Echeẽ jemumbayã mbei chõ nguiã ã. Mbia iquia iquiasa bei que ae ra. Cose ndare mosenda bei. Ñee ñooñosa reã quiato aronea tuchi quiarei ae. Ñee ñooño mbeite equia co. Ucheẽ achõ ño esenei senei nguiã mbia mbiĩrĩ irĩ querabe co. Ñee ñooñosa rerecua chõ aque re. ⁴⁵ Se quia acheẽ ñooño ãte rei nguiã jẽje. Secheẽ jẽucuyãte chõchĩ nguiã. ⁴⁶ Mbae icuã ngue asaã eãte ra. Ũquĩ jẽicuate raque. Acheẽ ñooño ãte sequia co resẽ. ¿Mbaerã jẽingo secheẽ andu sereã neate ã nde? ⁴⁷ Dios quiato quia Dios cheẽ ñandu turã nguiã. Dios quiato eã ño jẽ nde. Nyebe jẽingo nguiã Dios cheẽ andu sereãte ã, i que Jesús mbia je ra.

Jesús rane siqui Abraham si nyii

⁴⁸ Judíos que ñee si Jesús je ra. “Samaria jenda chõ nde reae. Aba checuayã nyireco chõ nde reae”, ure que nderĩ nda. ¿Ae tuchi nde re? i que judíos ñee Jesús je ra. ⁴⁹ Jesús que ñee ee ra. —Aba checuayã nyireco eã ño se resẽ. Co aico ñee turã tuchi Paba rĩĩ co resẽ. Jẽ nguia jeñee icuã mbeite nguiã seriĩ. ⁵⁰ “¿Sã mbia ñee turã seriĩ jẽ!” ae eã ño nguiã se co. Paba quia siqui nguiã ñee turã turãte seriĩ co. Ae quia ra mbia icuã mbasi. ⁵¹ Tacheẽ nyecua jẽje. Ae secheẽ mumbayã nguia nae, ũquĩ nda amingo bei. Ũquĩ nda manoã mbei, i que Jesús ra. ⁵² Judíos que ñee Jesús je ra. —Aba checuayã nyireco tuchi chõ ereico nguiã co. ¿Mbaerã ereico ñee nde? “Mbia ra manoã, secheẽ mumbayã mose”, i re. Abraham ngue mano. Nandei. Dios cheẽ nenei neneisa que mano ja resẽ. ⁵³ ¿Nde ndeaquiату tuchi Abraham si re? Ae chee que mano. Dios cheẽ nenei neneisa chee que mano. ¿Abate nde re? “Mbia ra manoã”, ere chõte equia co, i que judíos Jesús je ra. ⁵⁴ Jesús que ñee ee cote ra. Se ae secheẽ turã mose seriĩ, mbia ra seanduchõ. Paba quia ñee turã mbei nguiã seriĩ co. Ae je jẽingo ñee. “Dios urererecua” i raque eriĩ. ⁵⁵ ã jẽingo Dios icuayãte ã. Se quia

aicuate nguiã co. “Dios aicuayã”, se i mose, eĩ nda acheẽ ñooñote rei jẽ na si. Dios aicua tuchite. Echeẽ ndui chõ aico bei nguiã co. ⁵⁶ Abraham ngue seraarõ arõ mbei quia ra. “Tu rae”, i bei que equia ñimbia seriĩ nda. Secuasẽ mose que eyate mae serese cote ra, i que Jesús mbia je ra. ⁵⁷ Mbia que ñee Jesús je ra. —Cosete que Abraham mano ndesẽ. ¿Mañi ere mae erese re? Cincuenta años eãte nde resẽ, i que ra. ⁵⁸ Jesús que ñee ee ra. —Tacheẽ nyecua jẽje. Cose ndare bei chõ aico nguiã co. Abraham tiã mosenda bei, i que Jesús ra. ⁵⁹ —¿Sita je Jesús nandechei jẽ! i rei que mbia sita isi isi ra. Jesús que ñimi ñimi oso ra. Usẽ Dios chuchua si.

9

Jesús emo ndesayã mbucherõ

¹ Ñeenda rui que Jesús mae emo ndesayã ndese ra. Echaacuquia mosenda bei que eresayã nyobei ra. ² Jesús chimbaaquiatu que ñee ee ra. —Urembaaquiatusa, ¿abate mbae icuã saã nyii re? Co resayã nonde re. Eru ereae. Esi ere no ae. Ae si ere no ae. ¿Abate ere? i que Jesús je ra. ³ Jesús que ñee ee ra. —Tei. Emo ngue mbae icuã saã eãte rei ra. Mbia ra mae ja Dios quirãcuã ndese chã. Embucherõ mose. Nyebe eresayã nyaacuquia nguiã. ⁴ Arõ ño nandeico nguiã mbae raã naa. Itondaru mose, mbae rese nandeico aroneãte cote. Nyebe aico bei nguiã mbae rese Paba je co. Semano mose quia aico aroneãte nguiã mbae rese íbii cote. ⁵ Seico mose íbii, aico mbia resaete co, i que Jesús ra. ⁶ Jesús que ñinimbu íbii cote ra. Tuchu que esaã nguendi je ra. Nguiti que eresayã ndesa rese cote ra. ⁷ —Eso nderuba irei cote. Ama Siloé eso eirei, i que Jesús eresayã je ra. (“Echimondo”, i chõ nguiã Siloé je.) Eresayã ngue oso nguesa irei huee ra. Obei que eru quia mae turã cote ra. ⁸ Hue jenda que nyuruira jate mae erese ra. Ae mae nguia erese nyii nae, ùquĩ ngue nyuruira tuchi mae erese cote ra. Eresa cherõ mose. —¿Co resayã ño ache ache i quia nyii re? ¿Ae chõ ere? i que mbia ñee ñee nyue ra. ⁹ —Ae eã ño ñene, i que emo nda. —Ae chõ ñene, i que emo emo no nda. Eresayã ngue ñee cote ra. —Se chõ nyeresẽ, i que ñee mbia je ra. ¹⁰ —¿Mañi nderesayã mae nde? i que mbia ee ra. ¹¹ Eresayã ngue ñee nda. —Ae eriqui “Jesús” i nae, aque que tuchu saã nda. Nguiti que seresa rese ra. “Eso nderuba irei Ama Siloé”, i que seje cote ra. Aso que se ra. Seruba irei ji que amae cote ra, i que eresayã mbia je ra. ¹² —¿Ma nderesa mbucherõsa riqui ma nde? i que mbia eresayã je ra. —Qui chõ esi, i que ee ra.

Fariseos ñee eresayã je

¹³ Mbia que eresayã curuchoi fariseos je cote ra. ¹⁴ Ae mose Jesús eresayã mbucherõ nae, sábado mose que ra. Tuchu que esaã, aque mose que ra. ¹⁵ —¿Mañi ere nderesa ira re? i que fariseos ee ra. —Tuchu que equiti seresa rese ra. Ae seresa airei nguiã. Co aico mae co cote, i que eresayã nda. ¹⁶ Fariseos mo ngue ñee nyue ra. —Ae eresa mbucherõ sábado mose nae, Dios cheẽ nenei neneisa eã ño aque re, i rei que nyue ra. Emo emo ngue ñee no nda. —Eĩ nguia nda eicuã mose mbia mae sayã naa naa eã nguiã nande je chã, i que fariseos mo ñee nyue ra. Hue rĩ ja eã ngue fariseos ñee Jesús rĩ nda. ¹⁷ Fariseos que ñee si eresayã je ra. —Ae nembucherõ nae, ¿mañi ee re? ¿Mañi ere quia nde eriĩ co re? i que ra. Eresayã ngue ñee nda. —Dios chimondo que ae ra, i que eresayã nda.

¹⁸ Judíos que echeẽ ñandu sereã nda. Eresa turã mbei mo eriqui reĩ nguiã ee. Nyebe “jenyu” i nguiã eresayã ndu je. Esi je abe no. —Nandeirandu rã erese, i que ra. ¹⁹ —¿Co nderiirĩ co re? ¿Eresayã nyobei nyii re? ¿Eresayã nyaacuquia nyii re? ¿Mbae emumae nguia co cote re? i que ñee eru je ra. Esi je abe. ²⁰ Eru que ñee ee ra. —Co rei seriirĩ co. Eresayã ngue nyaacuquia rei ra. ²¹ Mañi ño equia mae co cote. Aba chõ embucherõ. Ureicuayãte. Jeñee nguia ee. Etiarõte nyeresẽ. Ae ra ñee jẽje, i que eru ñee judio rerecua je ra. Esi abe. ²² Judíos rerecua quia ñee nguia nyue nyii reaẽ. —Emo ñee turã mose Jesús rĩ, ùquĩ nandemombo bei mbia chumunuasa si. “Dios chimbu rei Jesús”, i mose, nandemombo bei mbia chumunuasa si, i quia ererecua quia ñee nyue nyii reaẽ. Nyebe

eresayandu siquichete nguiã ñee turã Jesús rĩĩ. Esi abe no. ²³ Nyebe eru riqui nguiã ñee ererecua je. —Jeñee nguia seriirĩ je. Etiarõte nyeresẽ, i ee. Esiquichete quia ñene.

²⁴ —Quiatuchu, i si que judíos rerecua eresayã je no nda. —Echeẽ turã Dios mii je. ¡Jesús abe je ra erecheẽ turãchĩ jẽ! Eicuãte ae resẽ, i rei que judíos rerecua eresayã je ra. ²⁵ Eresayã ngue ñee ee ra. —Aicuayãte se. Eicuãte ereae. Eturãte ere no ae. Aicuayãte se. Seresayã ngue nyii ra. Co aico mae co cote. Ũquĩ mii ño aicua nguiã co, i que eresayã judíos rerecua je ra. ²⁶ —¿Mañi equia ndeje re? ¿Mañi nderesayã ira re? i si que eresayã je no nda. ²⁷ Eresayã ngue ñeembe ererecua je ra. —Acheẽ ndei que jẽje resẽ. Secheẽ ngue jemumb resẽ. ¿Mbaerã jẽingo “echeembe” i seje ã nde? ¿Jẽ abe jẽingose rete sembucherõsa rui re? i que eresayã judíos rerecua je ra. ²⁸ Ererecua que ñee icuãte ee cote ra. —Ae rui chõ ereicochĩ nguiã nde co. Moisés rui chõ ureico nguiã ure ã. ²⁹ Moisés je quiatu que Dios ñee nyii resẽ. Ũquĩ ño ureicua nguiã ã. Ae nembucherõ nae, ma si quiatu ñi ae ru. Ae quia ureicuayãte nguiã, i que judíos rerecua ra. ³⁰ Eresayã ngue ñee ee ra. —Seresa que embucherõ ndesẽ. “Dios chimbu”, jenyẽ eã ñochĩ equia ã. Seresa mbucherõsa raque ae. ³¹ Dios ra mbia icuã ñee ñanuã. Ae Dios cheẽ mumbayã nguia nae, ũquĩ ñee nguia ra Dios ñandu. ³² Seresayã ngue achaacuquia rei nyii ra. Ae que sembucherõ nda. Emo abe ra ũquĩ saã eã. ³³ Dios chimbu eã mose, eĩ nguia nda mbae raã eãte nguiã ña, i que eresayã judíos rerecua je ra. ³⁴ Judíos rerecua que ñee eresayã je ra. —Ndechaacuquia mosenda bei chõ ndeicuã ndiqui nguiã co. ¿Mbaerã ereico urembaaquiату sete re? i que judíos rerecua eresayã je ra. Nyebe que judíos rerecua eresayã mombo bei judíos chumunuasa si cote ra.

Ureaquiature ure, i chõchĩ fariseos

³⁵ Jesús que jirandu erese ra. Emombo mose. Nyebe esi nguiã ñee eresayã je. —¿Dios rucucha ereicuate quia co re? i que ee ra. ³⁶ —¿Aba chõ Dios rucucha re? Aicua sete quia co, i que eresayã nda. ³⁷ —Ae chõ se resẽ. Ae je chõ ereã ñee a resẽ. Eremae ndei serese resẽ, i que Jesús ee ra. ³⁸ Eresayã ngue ngoi nguiã ndese Jesús ji cote ra. —Areicua tuchi se cote, i que Jesús je ra. ³⁹ Jesús que ñee ee ra. —Achu que íbii ra. Mbia icuã mbuchecua mbia je ra. Achu que eresayã ndesa mumae mae nda. Ae eresa nae, ũquĩ mumae eã sacua abe que achu ra, i que ra. ⁴⁰ Fariseos mo abe que chi hue ra. Jesús cheẽ andu que ñee Jesús je ra. —¿Ureresayã ureico ure abe ã nde? i que fariseos ee ra. ⁴¹ Jesús que ñee ee ra. —Jendesayã mose, eĩ nda jẽicuã ambuchecuayã ndei. “Seaquiature”, jenyechĩ equia ã. Nyebe aico nguiã jẽicuã mbuchecua jẽje co, i que Jesús judíos rerecua je ra.

10

Ovejas ucha cheẽ icuate

¹ Jesús que ñee nda. —Tacheẽ nyecua jẽje. Ae iqueã nguia oveja chiquesa rĩĩ nae, mbae mbuquiachãsa chõ ũquĩ nde. Echiquesa eã ñi ique ique mose. ² Ae ique ique quia oveja chiquesa rĩĩ nae, aque quia oveja raarõsa aque re. ³ Ae echiquesa saarõ nguia nae, aque ra echiquesa equia oveja raarõsa je cote. Eique sacua. Oveja raarõsa cheẽ nda oveja icua ja. Ñee mii mii nda umbae oveja je. Oveja icua ja. Ae ra oveja nyoĩ usẽ erui. ⁴ Eraarõsa embusẽ ja mose etaronda si, ae rane nda ngata oso quia erẽta. Oveja ra nyoĩ ja quia erui. Echeẽ nguia eicuate nguiã. ⁵ Emo ndui ra echoĩ eã. Uchã ño nda emo si. Echeẽ nguia eicuayãte nguiã, i que Jesús ñee nda. ⁶ Jesús que eĩ ndei ñee fariseos je ra. Ejemplo je. Oveja renei nenei ee. Jesús cheẽ andusa que echeẽ icuayãte ra.

Jesús rei oveja raarõsa

⁷ Jesús que ñee si ee ra. —Tacheẽ nyecua jẽje. Oveja chiquesa rã ño se re. ⁸ Ae ngaẽ senonde nyii nae, mbae mbuquiachãsa ja chõ ũquĩ nde. Nyebe ovejas eche siichã eã nguiã. ⁹ Oveja chiquesa chõ se re. Ae seicua quia nae, ũquĩ nda ateaquiату bei mingo. Sã oveja mo ndiqui oso quiaru quiaru no. Sã eriqui cuaẽ nyebi chebi bei utaronda no. Eĩ si ra

seicuaa quia siqui bei serese. ¹⁰ Mbae mbuquiachãsa quia ra tu mbae rirõ sacuaã. Mbae mbutiã sacuaã. Mbae iquia sacuaã. Se quia ni achu nguiã mbia mingo bei sacuaã. Mbia mbia tuchi nonde que achu ra. ¹¹ Oveja raarõsa rei se. Ovejas ateaquiatu bei quia co. Amano nda emingo bei sacuaã. ¹² Ae ovejacha eã nae, aque ra ovejas saarõ ndaque, saarõ turã eã ndae. Uchã ño nda nyacua tu mose ovejas je. Nyacua ra ovejas isi embuquiachamba u quia. ¹³ “Echa eã ndei se re”, i ra eraarõsa uchã erecha. Esiquiche mose. Oveja raarõ turã eã. ¹⁴⁻¹⁵ Se quiarei oveja raarõsa turã. Sã Paba riqui seicuate co no. Sã aico Paba icuate se abe co no. Eĩ ae chõ nguiã oveja icua sembae co no. Sembae abe seicua quia ã. Sembae ovejas mingo bei sacuaã nda amano. ¹⁶ Ovejas mo abe que sembae no nda. A jenda eã ño ùquiã nde. Ûquiã abe ra aru a. Ûquiã nda secheẽ mumbayã no. Sembae oveja ra chi ja serese cote. Se mii ño nda asaarõ ja cote. ¹⁷ Sesiquiche eã semana ndese. Sembae ovejas mingo sacuaã. Nyebe Paba iate riqui nguiã serese co. Semanonde ra aquera si. ¹⁸ Semano sereã mose, eĩ nda mbia seiquia aroneate rei. Se ae chõ amanosete nguiã mbia je. Se ae chõ nda aquera si no. Paba quia uquirãcuã meete nguiã seje, i que Jesús mbia je ra.

¹⁹ Judíos que ñee ata atate nyue ra. Jesús cheẽ mose. Hue rĩ si ñee ja eã. ²⁰ —Aba checuayã siquite Jesús rese co resẽ. ¿Mbaerã jẽingo echeẽ andu re? i que emo emo uataque je ra. ²¹ Emo emo ngue ñee no nda. —Ae rese aba checuayã ndiqui nae, ùquiã nda ñee turã eã ndesẽ. Aba checuayã nda mbia resayã mbucherõ eã ndesẽ, i que emo emo no nda.

Judíos Jesús osei chiã

²² Mbia que ñumunua nua nguia Jerusalén cote ra. Dios chuchua ao mosenda ndese ndua ndua. Nyiiseite que aque mose ra. ²³ Jesús que oso Dios chuchúaa ra. Portal de Salomón ngue eriqui ngata ra. ²⁴ Judíos que ngaẽ Jesús mama nda. Ñee ngue ee ra. —Ureico ndeicuayãte ã. ¿Manosete ra erecheẽ tuchi ure je re? Nde rĩ. Echimbu checua jiri ure je. Nde Cristo mose, ndecheẽ embuchecua ure je, i que judíos ñee Jesús je ra. ²⁵ Jesús que ñee ee ra. —Acheẽ ndei que jẽje resẽ. Secheẽ jẽñanuã ño nguiã ã. Paba quirãcuã je chõ aico nguiã mbia mae sayã naa naa co. ã ndese mae nda seicua nguiã ña. ²⁶ Acheẽ ndei que jẽje nyii resẽ. Serimba eã ño jẽ nde. Nyebe jẽingo nguiã secheẽ anuã. ²⁷ Serimba secheẽ icua ja quia ã. Serimba aicua ja quia ã. Serui ja serimba riqui ã. ²⁸ Serimba amingo bei quia co. Serimba ra quiachã eã mbei. Emo eisi aronea tuchi sesi. ²⁹ Paba que emee serimbarã nda. Emo eisi aroneate Paba o si. Ae quiarei equirãcuã tuchi. ³⁰ Aque mii ño ureico nguiã ã. Paba rese. Eĩ si tuchi ureico nguiã ã, i que Jesús ee ra.

³¹ Nyebe judíos paama i nguiã ee. Sita que esirõ sirõ nda. —Jesús nandechei, i rei que ra. ³² Jesús que ñee ee ra. —Paba que sembuquirãcuã tuchi ra. Nyebe jemaẽ sayã asaã saã tuchi nguiã jẽje. ¿Ûquiã mo nii jẽingo “nandechei” i seje re? i que Jesús judíos je ra. ³³ Judíos que ñee Jesús je ra. —Ndechiao turã mo je eã ño ureico nguiã “nandechei” i ndeje. Erecheẽ icuãte que Dios rĩ ñdesẽ. Dios eresaã saãte quia ure je co resẽ. Mbia si chõ ndaque nde, i que judíos Jesús je ra. ³⁴ Jesús que ñee ee ra. —Sã embesa ji riqui i no: “Jẽ ndei dioses, i que Dios ra”, sã embesa ji riqui i no. ³⁵ Embesa ji ñeeñoño aronea. “Dioses rei jẽ”, i que Dios ucheẽ nenei neneisa je ra. ³⁶ Dios que seirabo ra. Sembu que íbii cote ra. ¿Mbaerã jẽingo paama i secheẽ mose re? “Dios riiirĩ ño se re”, i mose re. “Ndeicuãte chõchĩ Dios je”, jenyẽ chõchĩ nguiã seje. ³⁷ Se mbae raã naa eã mose Paba rã si, ùquiã mose quia secheẽ jeñanua. ³⁸ Paba rã si mose, “coche ñene” jenyẽ chõ sechisaã je. Secheẽ jeñandu sereã ndaque. Paba riqui serese co. Se abe aico Paba rese co. Ûquiã nda jẽicua cote, “coche ñene” i mose sechisaã je, i que Jesús ee ra. ³⁹ —Jesús nanderao etarõ sacuaã, i rei que mbia ra. Jesús que oso chee hue si ra.

⁴⁰ Jesús que oso Ama Jordán ndobei ra. Ae Juan ndiqui bautizar i nyii nae, huee que esi ra. Huee que Jesús riqui arete cote ra. ⁴¹ Mbia que nyoĩ nyoĩ tuchite erea huee ra. Ñee ñee ngue nyue ra. —Juan ngue nandemaẽ sayã mo saã eãte rei nande je. Nandembiirandu

turã tuchichĩ Jesús rĩĩ. Ichõĩño eã ño equia ñee nande je reaẽ, i que mbia ñee nyue ra.
⁴² Mbia tubiriã ngue Jesús icuua huee ra.

11

Lázaro mano

¹ Emo ndasi que chi ra. Lázaro, i que ee ra. María, i que enongue je ra. Marta, i que enongue je no nda. Echari ja que ũquí nda. Betania jenda ja que ũquí nda. ² María rei aba mbushimbusa ichusësa Jesús i rese. Ua je que esi esi ra. Enongue quia erasi re. Lázaro, i que ee ra. ³ Nyebe echari mbia mo mondo nguiã Jesús mbiirandu sacuaã. —Ndequiato rasi que chi aque rĩ nda, i que echoi Jesús mbiirandu ra. ⁴ Jirandu mose que Jesús ñee cote ra. —Mano sacuaã eã ño erasi chi nguiã aque. Dios quirãcuã ndese mbia mae sacuaã ño erasi chi nguiã aque. Se abe sequirãcuã ndese mae sacuaã ño erasi chi nguiã aque, i que Jesús ra. ⁵ Jesús que nyesequa tuchi Marta rese ra. María rese. Lázaro rese abe no. ⁶ Lázaro rasi rese jirandu mose que esi jei eã erea ra. Siquichõ ngue ra. Itõ nyeremo ngue huee ra. ⁷ —Nyaobe Judea cote, i que uchimbbaaquiato je cote ra. ⁸ Echimbbaaquiato que ñee ee ra. —Namote que judíos ndeiguia serĩte sita je. ¿Mbaerã nda ereso si huee re? i que Jesús je ra. ⁹⁻¹⁰ Jesús que ñee ee ra. —Dios quiato que sembu ra. Mbae raã naa sacuaã ee. Echeẽ ngue asaã ja eãte ra. Nyebe emo seiquia aroneate namo. Se echeẽ naa ja mose quia ra mbia seiquia arõte cote, i que ñee uchimbbaaquiato je ra. ¹¹ Aquere que ñee si uchimbbaaquiato je ra. —Nandequiato que uque cote ra. Lázaro. Taso emumba cote, i que ra. ¹² —Uque mose u, ae ae ra ñumumba rei, i que echimbbaaquiato ee ra. ¹³ —Lázaro que mano nda, i eã ngue Jesús ucheẽ mbuchecua tuchi ee ra. Lázaro mano tuchi raque. Lázaro uquechõ nei nguiã echimbbaaquiato je. ¹⁴ Jesús que ucheẽ mbuchecua ramo ee cote ra. —Lázaro que mano nda. ¹⁵ Coche aico eã nguiã huee. Jẽ nda seicua tuchi cote. Nyao erea cote, i que Jesús uchimbbaaquiato je ra. ¹⁶ Tomás que ñee echimbbaaquiato ataque je ra. —Nyao erese nande abe no. Sã mbia nandeiquia nande abe rõ, i que Tomás ra. “Eata”, i que mbia quia Tomás je ra. Eata rei ae.

Jesús mbia raaque mbuquerasa

¹⁷ Ngasẽ ngue Betania cote ra. Mbia hue jenda que ñee Jesús je cote ra. —Co Lázaro ati ji chi itõ mocoĩte co resẽ. Cuatro días tuchite nyeresẽ, i que mbia ñee Jesús je ra. ¹⁸ Aichite que Betania Jerusalén si ra. Tres kilómetros que ra. ¹⁹ Nyebe judíos rane ngaẽ jate nguiã ngasẽ Jerusalén si. María mbia jiri sacuaã. Marta abe no. Enongue raaque ati ji mose. ²⁰ Marta jirandu mose Jesús rese que esi erobeishĩ nda. Oo que erese ra. María quiato que siquichõ tuchúaa ra. ²¹ Marta que ñee Jesús je ra. —Sererecua, ndeico mose a, eĩ nda senongue manoãte rei. ²² Dios ra ndecheẽ ñandu. “Mbae mo embu seje”, i mose, i que Marta Jesús je ra. ²³ —Ndenongue ra quera si, i que Jesús ee ra. ²⁴ Marta que ñee ee cote ra. —Ae bei. Mbia raaque quera ja mose, aque mose ra senongue abe quera si. Mbae ua ja mose ra quera si. Aicuate raque se quia co, i que Marta ra. ²⁵ Jesús que ñee ee ra. —Mbia raaque mbuquerasa rei se. Mbia mingosa rei se. Ae seicua quia nae, ũquí nda mano ndaque, quera si rae. ²⁶ Ae seicua quia nae, ũquí nda uayã mbei. ¿Ũquí ereicua quia co re? i que Jesús ee ra. ²⁷ Marta que ñee ee ra. —Ae. Cristo chõ nde re. Dios rucucha chõ nde re. “Dios rucucha ra tu íbii”, i que mbia quia nyii nae, ae chõ nde re, i que Marta Jesús je ra.

Jesús nyeseo

²⁸ Aquere que Marta si María mbiirandu ra. —Nandembbaaquiatusa que tu ra. Hue que eriqui nderequia ra, i que Marta ñee ngõngue ísaa ra. ²⁹ Echeẽ nduibe tuchi que María si juã asi Jesús rea ra. ³⁰ Jesús ngasẽ mose rocoĩ mbia chuchua ite re. Marta erobeishĩsa bei que Jesús riqui ra. ³¹ Mariaso rese que judíos chi mae ja ra. —Ngõngue atisa chõ María si nguiã nyeseo qui, i rei ngue judíos choi nguiã erui. ³² María que ngasẽ Jesús je ra. Ngoi que nguiã ndese ejii ra. Ñee ngue ee ra. —Ndeico mose a senongue ndasi mose, eĩ nda

manoãte rei, i que María Jesús je ra. ³³ María que nyeseo ra. Judíos que chi erese, ùquĩ abe que nyeseo no nda. Nyebe que Jesús abe ia eãte ra. Echiã ngue ngoi eã tuchi ra. ³⁴ —¿Mangue jenyati mangue re? i que Jesús mbia je ra. —Nyao erea ae, i que mbia ee ra. ³⁵ Jesús que nyeseo ra. ³⁶ Judíos que ñee nyue ra. —¡Sã jê! Nyesequa tuchi Lázaro rese. Eya eãte riqui erese co, i que mbia ra. ³⁷ Emo emo ngue ñee nda. —Jesús que eresayã ndesa mbucherõ. Eĩ nda Lázaro rasi mbucherõ nde chaẽ. Eĩ nda manoãte, i que mbia ra.

Jesús Lázaro mbuquera si

³⁸ Jesús ia eãte que ngasẽ Lázaro atiguia ra. Sita imi ye. Sita chõ ngue eatiquia no nda. ³⁹ —¡Sita eatiquia jêjea jê! i que Jesús mbia je ra. Marta que ñee Jesús cheẽ mose ra. —¡Enete ra nande je jê! Curite que mano ndesẽ. Cuatro días tuchi que ra, i que Jesús je ra. ⁴⁰ Jesús que ñee ee ra. —“Seicua tuchi mose ra eremae Dios quirãcuã ndese”, ae rei que ndeje nyii, i que Jesús ra. ⁴¹ Sita eatiquia que mbia jea cote ra. Jesús que mae ibate quiti ra. Ñee Dios je. —Paba, secheẽ ngue erechandu. “Iaanye”, ae bei quia ndeje co. ⁴² Nde quiarei seandu bei. Mbia resa rae aico ñee ndeje a. “Dios chimondo chõ eriqui re”, i nda ã serĩ ña, i que Jesús ñee Dios je ra. ⁴³ Jesús que ñeemombo Lázaro raaque je cote ra. —Lázaro, jechu usẽ! i que ra. ⁴⁴ Eraaque que usẽ u juã cote ra. Eo cuasa resebe que usẽ nda. Ei abe ecua ji tiru je. Eruba abe ecua ji tiru je. —Jenyura mondo, i que Jesús mbia je ra.

Jesús nandeiquia, i judíos

⁴⁵ Judíos que nyoĩ María rese, ùquĩ ngue mae ja Jesús rese ra. Lázaro mbuquera mose. Ùquĩ tubiriã ngue Jesús icua cote ra. ⁴⁶ —Jesús que Lázaro raaque mbuchuruã nda, i que emo nyoĩ fariseos mbiirandu ra. ⁴⁷ Fariseos que ñumunua ja cote ra. Sacerdotes rerecua ja rese. Mbia rerecua ja. Ñee tuchi Jesús riĩ. —¿Mañi nande ra equia ee re? Mbia mae sayã naa naa tuchichĩ equia aque. ⁴⁸ Nande ereachõ mose ra mbia siqui ja techĩ erui re. ¡Roma jenda ra nandembae isichĩ ibi jê! ¡Dios chuchua ra embucoichĩ ngaẽ jê! i que ererecua ñee nyue ra. ⁴⁹ Caifás que sacerdote rerecua tuchi aque mose ra. Ae que ñee uataque je ra. —Mbae jêicuayã tuchichĩ nguia ã. ⁵⁰ Jendua eã ñochĩ equia ã. Aque miĩ ño nda mano nguia nande ja je chã. Eĩ nda judíos ua tuchi eã, i que Caifás uataque je ra. ⁵¹ Caifás ae que ñee eã nda. Dios ae quiatu ngue embucheẽ nguia ùquĩ. Sacerdote rerecua tuchite quiatu ngue ae re. Nyebe Dios embucheẽ nguia. —Jesús ra mano judíos mingo ja sacua. ⁵² A jenda achõ je eã nda Jesús mano. Dios riirĩ mangue choñoa jenda je abe chõ nda Jesús mano nguia. Dios riirĩ munua ja sacua, i que Caifás ñee nda. ⁵³ Aque mose bei que judíos rerecua ñee ñee nyue ra. —¡Jesús nandeiquia rei jê! i que equia ñee ñee nyue ra. ⁵⁴ Jesús que nyecua eã judíos je cote ra. Judea si que esi cote ra. Turuquia rurubi que esi ra. Efraín, i que sucha tubiriã je ra. Huee que eriqui arete uchimbuaquiato rese cote ra. ⁵⁵ Fiesta de la pascua que ecurubite ra. Nyebe judíos nyoĩ choi ja nguia Jerusalén. Suchamo jenda emo emo ngue nyoĩ jate ra. Pascua nonde que echoi huicua mbitirõ sacua nda. ⁵⁶ Mbia que Jesús sequia quia ra. —¿Tu ra fiesta re? ¿Tu eã nda re? ¿Tu aroneate jêje re? i que mbia ñee ñee nyue Jesús riĩ nda. I que mbia u ñee Dios chuchúaa ra. ⁵⁷ Mbia rerecua que ñee mbia je nyii ra. —Emo jirandu mose Jesús rese, sã urembiirandu jei. Eĩ nda ureisi. Eĩ nda uretarõ miĩ, i que sacerdote rerecua ñee nyii ra. Fariseos abe no.

12

María aba mbushimbusa ichusẽ Jesús i rese

¹ —Seis días mose ra pascua cote, i que mbia ra. Aque mose que Jesús si Betania nda. Huee que Lázaro riqui ra. Ae Jesús mbuquera erua si. ² Mbia que ñio miĩ Jesús chiurã nda. Marta que echiurã mondo mondo ee ra. Mbia je abe. Lázaro abe que chĩ quiaru erese ra. ³ María que aba mbushimbusa queru Jesús je cote ra. Medio litro. Nardo, i que ùquĩ je ra. Mbae isiquia mumba tuchi que ùquĩ nda. María que eichusẽ Jesús i rese ra. Ua je que esi esi ra. Tuchua mbushimbu ja que ra. ⁴ Judas Iscariote abe que siqui ra. Simón ndiirĩ ngue

aque ra. Jesús chimbaaquiatu mo ndei que aque ra. Ae quiatu que Jesús mee mbia icuã je emo mose cote ra. Ae que ñee nda. ⁵ —¿Mbaerã eichusẽ ñooño nde? ¿Mbae isiquia ribishorõ ño nda aba emondo re? Tres cientos ribishorõ. Mbaecha reã je emee sacuaã, ùquĩ mbae isiquia, i que Judas ra. ⁶ Judas ndua eã ndaque mbaecha reã ndese. Mbae mbuquiachãsa tuchi que ae ra. Mbae isiquia riru que equereco quia Jesús je ra. Eyenda que esirõ sirõ nguia mbuchemi chemi nda. ⁷ Jesús que ñee Judas je ra. —¡Erecheẽchĩ nda María je jê! ¡Sã ae ae riqui jê! Seati nonde chõ aba mbushimbusa icherẽ nguia serese. ⁸ Mbaecha reã nguia nda chi are jiri nguia a. Se quia nda aico bei eã nguia jêje a, i que Jesús ra.

Lázaro nandei quia, i rei judíos rerecua

⁹ Judíos que jirandu jate Jesús rese ra. Eriqui mose Betania. Nyoï jate que erea ra. Lázaro abe rea. Ae Jesús mbuquera erua si. ¹⁰ Nyebe judíos rerecua ñimbiirandu nguia. —¡Lázaro abe nandei quia rei jê! i que ererecua ñee nyue ra. ¹¹ Judíos que siqui tuchite Jesús rese cote ra. Nguerecua que esecha jate cote ra. Lázaro que embuquera erua si nyii. Ûquĩ mbei bei que nyii ra. Jesús oso Jerusalén

¹² Mbia tubiriã ngue nyoï Jerusalén nda. Pascua raã naã sacuaã huee. Jesús abe que oso ra. Mbia que jirandu erese ra. Ecuasẽ nonde. ¹³ Mbia yate que Jesús cuasẽ mose ra. Sindo que ecuruchoï erobeishĩ nda. Mbia que tasẽ tasẽ tuchi ra. —Eturã tuchi ruchĩ nguia co. Dios rucucha ruchĩ nguia co. Israel rerecua ruchĩ nguia co cote, i que mbia tasẽ tasẽ tuchi ee ra. ¹⁴ Jesús que ngasẽ burro riirĩ mo je ra. Nyui que eato ra. Embesa ji rui si. ¹⁵ i que embesa ji quia nyii ra:

¡Jêireĩ ireĩchĩ nda, Sion jenda!

Co jenderecua ru quia co.

Co eru quia burro átoo co,

i que embesa ji quia nyii ra. ¹⁶ Jesús chimbaaquiatu que ã icuayãte nyii ra. Embesa ji. Jesús quera si mose que ã icua cote ra. —Embesa ji rui si chõ eriqui rei reaẽ, i que echimbaaquiatu eicua ramo cote ra. ¹⁷ Jesús que Lázaro mbuquera, ùquĩ ndese maesa que mbia mbiirandu randu tuchi quia ra. ¹⁸ Nyebe mbia nyoï ja tuchi nguia Jesús robeishĩ. Jirandure Lázaro raaque mbuquera rese. ¹⁹ Fariseos que ñee ñee si nyue no nda. —Jesús rui ja tuchichĩ mbia. ¿Mañi nda aba mbia je re? i que ñee nyue ra.

Griegos mo Jesús requia

²⁰ Griegos mo abe que nyoï Jerusalén nda. Pascua raã naa Dios je. ²¹ Ûquĩ ngue nyoï ñee Felipe je ra. Felipe que Betsaida jenda ra. Galilea jenda. —Uremaese rete Jesús rese, i que griegos Felipe je ra. ²² Felipe que oso Andrés mbiirandu ra. Ûquĩ ja que nyoï Jesús mbiirandu cote ra. ²³ Jesús que ñee ee ra. —Mbiarã ngue achu ibate si ra. Semano nonde arubite cote. Sequera si nonde arubite cote. ²⁴ Tacheẽ nyecua jêje. Ibasĩ eĩ tiquia eã mose ra ia eã mbei. Chi chooño mbei rae. Etiquia mose ra suri cote. I a tuchi ra cote. Eĩ ae ra se. Ibasĩ eĩ na si. Amano nda se. Mbia ra setiquia. ²⁵ Ae nduate quia nyiese nae, ùquĩ nda nyoï eãte ibate. Ae ndua eãte quia nyiese nae, ùquĩ nguia ra nyoï ibate. Siqui bei sacuaã huee. ²⁶ Ae secheẽ mumba sereãte quia nae, sã ùquĩ ndiqui bei serui. Ae ra aico nae, huee ra ùquĩ abe riqui. Ae secheẽ mumba sereãte quia nae, ùquĩ niĩ nda Paba ñee turã.

Amano nda se, i Jesús mbia je

²⁷ Seya eãte aico co. ¿Mañi ae ra ñee Paba je re? “Semingobe rei se ae. Sembasiã ndei se ae”, ae aroneate Paba je. ã sacuaã ño ngue achu resẽ. Sembasi sacuaã ño ngue achu resẽ. ²⁸ Paba, ndequirãcuã eteacuquia mbia je, i que Jesús ra. Ûquĩ mose que echeẽ mo ndu ee ibate si ra. —Sequirãcuã ngue ateacuquia mbia je ra. Ateacuquia si ra mbia je, i que ibatenda ñee ee ra. ²⁹ Mbia que ibatenda cheẽ ñandu ja rei ra. Ae chi Jesús rese, ùquĩ. —Ama ndieu ereae, i que mbia ra. —Tei. Angel mo ño ngue ñee nguia Jesús je, i que emo no nda. ³⁰ Jesús que ñee mbia je cote ra. —Seje eã ño ngue ibatenda ñee ndesẽ. Jê

eandu sacua ño ngue ñee ndesë. ³¹ Paba ra seicuasa reã mbasi ja cote. Mbia icua nderecua ra Paba mombo ibi jenda cote. ³² Sembucha mose miñ ibate, mbia ra siqui tuchi serese cote. Sucha mo jenda ja abete ra siqui serese cote, i que Jesús ra. ³³ —Mbia ra sei quia miñ sembucha ira rese, i ñene. ³⁴ Mbia que ñee Jesús je cote ra. —“Cristo ra siqui bei”, i que Dios cheë embesa ji urembiirandu. ¿Mbaerã erecheë nde? “Mbia ra sembucha ira rese”, i re. ¿Aba quia Cristo re? ¿Aba quia tu mbiarã nde? i que mbia ñee Jesús je ra. ³⁵ Jesús que ñee ee ra. —Taico mbirimbe jendese jembaaquiato quiato. Jendesaebe mbirĩ. Tata rendi rãte aico co. Tata rendi siqui mose jendese, jengata turã ño nguia jẽ! Seicuasa reã ño siqui nguia itondaru. Uquĩ quiachã ño nguia uquĩ. ³⁶ Tata rendi raãte aico co. Seico beebe mose jendese, seicua tuchi rã. Eĩ nda jẽingo turã jendesae ji, i que Jesús mbia je ra. Aquere que esi ñemi mbia si cote ra.

Judíos Jesús icua eã mbei

³⁷ Jesús que mbia mae sayã saã saã tuchite rei mbia je ra. Mbia que Jesús icuayã mbei chõ nda. ³⁸ Ae Isaías mbesa miñ nyii nae, uquĩ na si chõ ngue mbia Jesús icuayã cote ra. Eĩ ngue Isaías embesa miñ nda:

Sererecua, ae uresenei senei nguia mbia je nae, uquĩ mbia icua sereãte quia ã.

Ndequirãcuã mbia tea sereãte quia ã,

i que Isaías embesa ra. ³⁹ Mbia que Jesús icua aroneate ra. Isaías chimbese rã si chõ ngue ra. Eĩ ngue Isaías embesa miñ no nda:

⁴⁰ Dios que mbia chiã matã nda.

Nyebe eriqui mbae icuayãte ã.

Nyebe eriqui nguia uba eãte serese.

Se embetirõ sacua,

i que Isaías chimbese huĩ nda. ⁴¹ Isaías que Cristo quirãcuã tea nyii ra. Nyebe ã mbesa miñ nguia Jesús rĩ a. ⁴² Judíos tubiriãte que Jesús icua ra. Judíos rerecua emo emo abe que Jesús icua rei ra. Siqui checuayã ño ngue Jesús rui ra. Esiquichete quiato ngue fariseos si re. —¡Fariseos ra nandemombochĩ mbia chumunuasa si jẽ! i que ra. ⁴³ —Dios cheë nandemumbayã jẽ, iã ñochĩ ngue re. —¡Mbia cheë nguiato nandemumbayã jẽ! i chõchĩ ngue re.

Secheë nguia ra seucuayãsa mbasi, i Jesús

⁴⁴ Jesús que ñee irãtã mbia je ra. —Ae seicua quia nae, se miñ icua eã. Paba abe icua. Ae sembu ibate si. ⁴⁵ Ae mae nguia serese co nae, Paba abe rese mae. ⁴⁶ Mbia resae sacua ño achu nguia co. Eĩ nda seicuasa siquía itondáruu. ⁴⁷ Jẽingo secheë andu ã. Jemo secheë mumba mose, se ra ambasiã. Secheë ae ra embasi. Mbia mingo bei sacua ño achu nguia co. Mbia mbasi sacua eã ño achu nguia. ⁴⁸ Secheë nguia ra seucuayãsa mbasi, mbae ua mose. Ibi ua mose. Secheë ae ra secheë mumbasa mondo tata cuasu. Secheë andu choño nguiato ngue re. ⁴⁹ Se ae eã ño acheë nguia mbia je. Paba quia ñee nguia seje. “Eĩ ere mbia mbaaquiato quiato”, i que Paba sembu ra. ⁵⁰ Paba cheë ndei mbia mingo beisa. Echeë mumbayã mose. Nyebe aico nguia Paba cheë nenei nenei co. Secheë ae eã ño ñene.

13

Jesús mbia i irei irei

¹ —Namo jiri ra Paba sererao ibate ibi si cote, i que Jesús uchiangui re ra. Nyese-cua tuchi que equia uchimbaaquiato rese ra. Mano nyee. ² Jesús que quiaru u uchimbaaquiato rese isa ra. Pascua nonde. —Jesús emondo mbia icua je, i que diablo Judas Iscariote je nyii ra. Simón ndiirĩ ndei aque. ³ Jesús que mbae icua jate ra. —Dios si chõ achu nguia co. Asobe ra erea. Paba que uquirãcuã mee tuchi seje ra, i que Jesús uchiangui re ra. ⁴ Quiaru jare que Jesús juã huiirao mbui ra. Ngũmbi que echucua toalla je ra. ⁵ I que eichusẽ mbae mo ye ra. Uchimbaaquiato i que eirei irei ra. Mbiiru iru que toalla je ra. ⁶ Pedro i nda eirei nguia cote chã. —Sererecua chõ nde resë. ¿Mañi ere ra sei

irei re? i que Simón Pedro ñee Jesús je ra. ⁷ Jesús que ñee ee ra. —Ñ ereicuayâte. Ae asaã saã nguia ã. Ereicua rei ra cote, i que Jesús ñee Pedro je ra. ⁸ —Sei ra ereirei eã mbei, i rei que Pedro Jesús je ra. —Ndeirei eã mose, serese eã nda nde cote, i que Jesús Pedro je ra. ⁹ —Sei achõ eã eirei rõ. Seo abe eirei no. Seãquĩ abe no, i chee que Pedro ee cote ra. ¹⁰ Jesús que ñee ee ra. —Ae echasu quiite, equishĩte ũquĩ ndesẽ. Jẽi miĩ ño tairei. Jẽquishĩ ja eãte raque. Aque miĩte raque echiã nondei, i que Jesús uchimbaaquiato je ra. ¹¹ Jesús que jirandu Judas rese ra. Nyebe eriqui nguia ñee. —Aque miĩte raque echiã nondei, i.

¹² Ei irei jare que huĩrao mingue cote ra. Ngoi si que ra. Ae ñee nguia nguesenda je. —Jẽi que airei, ¿ũquĩ jẽicuate rei quia re? ¹³ Nyebe jẽingo nguia ñee seje. “Sererecua, Sembaaquiatusa”, i seje. Coche jeñee nguia seje. Ererecua rei se. ¹⁴ Jẽi que airei irei. Ererecua raque se. Nyebe jẽ abe jemo i jẽirei irei ae. ¹⁵ Nyebe que atacuquia jẽje resẽ. Serui sichõ jẽingo emo i irei irei ae. ¹⁶ Tacheẽ nyecua jẽje. Se rei jenderecua. Se chõ aemondo mondo nguia mbia mbaaquiato sacua. Jengasu ra jẽsaã saachĩ sesi jẽ. ¹⁷ Jẽ secheẽ icua mose, secheẽ mumbayã mose, jẽya tuchi ra jẽingo. ¹⁸ Jẽ ja je eã aico nguia ñee a. Jaĩrabo que se resẽ. Jaĩcuate que se resẽ. “Ae quiaru serese nae, aque icuãte ra seje cote”, sã embesa ji i no. Embesa ji rui si ra jemo icuã seje cote. Quiarure serese. ¹⁹ ¡A aico ñee jei jẽje a jẽ! Eicuã nonde seje. Eicuã mose seje, jẽ nda seicua cote. “Dios nducucha” jenyetuchi ra seje cote. ²⁰ Tacheẽ nyecua jẽje. Ae secheẽ nenei neneisa isi quia nae, ũquĩ nda seisi se abe. Ae seisi quia nae, Paba abe isi rae, i que Jesús uchimbaaquiato je ra.

Jemo nda semondo mbia icuã je, i Jesús

²¹ Jesús ia eã tuchi que cote ra. —Tacheẽ nyecua jẽje. Jemo nda semondo mbia icuã je cote, i que ñee nyecua uchimbaaquiato je ra. ²² Echimbaaquiato que mae mae ja chõ nyiese ra. —¿Aba ra re? ¿Aba ra re? i jaaja nyue. ²³ Jesús chesecua tuchi que chĩ ngoi ejii ra. ²⁴ Aque je que Simón Pedro o mee mee nda. —“¿Aba ra re?” ere ee, i que Pedro ra. ²⁵ Jesús chesecua que ñimbucha i i ñee Jesús je ra. —¿Aba ra re? i ee. ²⁶ Jesús que ñee ee ra. —Mbichae monde ji ra amee jemo je. Ae je ra amee, aque ra semee mbia icuã je, i que Jesús ra. Mbichae que emonde mondo Judas Iscariote je cote ra. ²⁷ Judas mbichae u mose que Satanás ndu embiicua tuchi cote ra. Jesús que ñee ee ra. —Ae ra eresaã nae, ¡ũquĩ esaã jeichõ jẽ! i que Jesús Judas je ra. ²⁸ —¿Mbae riĩ Jesús riqui ñee Judas je re? i que eataque ra. Mbia iranuã ja que ra. ²⁹ Judas que mbae isiquia quereco ja quia ra. —Mbae mo eisi rã nandechiurã, i rei Jesús quia Judas je uchimbaaquiato je. —Mbae mo emondo rã mbaecha reã je, i rei Jesús quia Judas je uchimbaaquiato mo je. Echeẽ ngue eicuayã ja ra. ³⁰ Mbichae ure que Judas si usẽ cote ra. Itondarui rĩ.

Jesús ucheẽ yasu renei mbia je

³¹ Judas usẽ mose que Jesús ñee nda. —Mbiarã ngue achu ra. Sequirãcuã ndese ra mbia mae cote. Dios quirãcuã abe areco co. Dios quirãcuã abe rese ra mbia mae cote. ³² Aico Dios quirãcuã ndeacuquia mbia je a cote. Dios abe ra sequirãcuã teacuquia mbia je cote. Sequirãcuã nda eteacuquia jei mbia je cote. ³³ Seresenda, aico mbirĩ ño nguia jendese a cote. Serequia rei ra se cote. Acheẽ ngue judíos je, ũquĩ sí aico ñee jẽje a. Ae ra aso nae, huee jengasẽ aroneãte. ³⁴ Aico secheẽ yasu nenei jẽje a. Secheẽ mumbayã sacua. ¡Jenyesequa ja jenyiese jẽ! Sã ñi aico nyesequa tuchi jendese no. ¡Eĩ jenyetuchi jenyiese jẽ! ³⁵ Jenyesequa tuchi mose jenyiese, mbia ra ñee ja tuchi jeniĩ. “Eĩ nguia Jesús chimbaaquiato quia re”, i ra mbia jẽje, i que Jesús uchimbaaquiato je ra.

Pedro ra ñee ñooño seriĩ, i Jesús

³⁶ —¿Manguiti ra ereso re? i que Simón Pedro ñee Jesús je ra. —Ae ra aso nae, huee ereso aroneate namo. Emo mose jiri ra ereso serui cote, i que Jesús Pedro je ra. ³⁷ Pedro que ñeembe ee ra. —¿Mbaerã nda asoã nderese namo nde? Seso sete nderese. Semano sete nderese, i que Pedro Jesús je ra. ³⁸ Jesús que ñee ee ra. —“Semano sete nderese”,

erechĩ nguiã seje. Co isa ra erecheẽ ñooño seriĩ tres veces. “Jesús aicuayãte resẽ”, ere chooño nda seriĩ nguira cheẽ nonde, i que Jesús Pedro je ra.

14

Jesús rei ñeenda Dios icha

¹ Jesús que ñee uchimbaaquiatu je ra. —Jëya eã eriquichĩ nguiã. Dios jëicua chõ ae. Se abe jëicua chõ ae. ² Ae Paba riqui, huee tuchia tubiriãte. Ûquĩ eande rae, eĩ nda acheẽ eãte rei jëje. Aso ra tucharã naã jëje. ³ Jenyucharã naa jare ra achube jendea cote, jenderao bei serese cote. Jë nda jëingo bei serese pee cote, ae ra aico. ⁴ Ae ra aso, huee jëicuate resẽ. Ñeenda abe jëicuate resẽ, i que Jesús ee ra. ⁵ Tomás que ñee ee ra. —Ureicuayãte nyeresẽ. ¿Mangue ra ereso mangue re? Ñeenda ra ureicua eãte chi nde, i que Tomás Jesús je ra. ⁶ Jesús que ñee ee ra. —Ñeenda rei se. Ñee ñooñoã je rei se. Mbia mingo beisa rei se. Ae ra seicuayãte, ùquĩ nda ngaseã mbei Paba je. ⁷ Jë seicua mose, Paba abe jëicuate quia ã. Jë Paba jëicuate quia cote resẽ. Jemae ngue erese namo ndesẽ, i que Jesús ee ra.

⁸ Felipe que ñee ee cote ra. —Nderu eteacuquia rã ure je. Ûquĩ mii ño ureico nguiã ñee ndeje, i que Felipe ra. ⁹ Jesús que ñee Felipe je ra. —Aico tuchite que jendese, Felipe. ¿Mbaerã ereico seicuayãte re? Ae mae nguia serese, Paba abe rese maete. ¿Mbaerã ereico ñee seje re? “Nderu eteacuquia ure je”, i seje. ¹⁰ Co aico Paba rese co resẽ. Paba abe riqui serese co. ¿Ûquĩ ereicuayãte re? Ae aico ñee jëje nae, secheẽ ae eã ño ùquĩ nde. Paba riqui serese co. Ae abe riqui mbae raã naa serese co. ¹¹ Secheẽ jëicua rã. Co aico Paba rese co. Paba abe riqui serese co. “Nyia”, jenyee eã mose secheẽ je, sechisaã je chõ “nyia” jenyee.

¹² Tacheẽ nyecua jëje. Ae seicua quia nae, ùquĩ nda sechisaã saã saã se rã si cote. Ûquĩ nda mbae saã saã tuchi sesi. Co quia aso nguiã Paba rea se co. ¹³ “Mbae emondo ure je” i mose seje, amondo ra jëje. Jë seicua mose. Eĩ ae ra Paba quirãcuã ndeacuquia mbia je. ¹⁴ “Mbae emondo ure je”, i mose seje, amondo ra jëje. Jë seicua mose.

Espíritu Turã tamondo jëje, i Jesús

¹⁵ Jenyesequa mose serese, secheẽ jemumbayã ae. ¹⁶ Tacheẽ Paba je. “Espíritu Turã emondo sechimbaaquiatu je”, ae ra Paba je. Espíritu Turã nda siqui bei jendese cote. Jëquiato tuchi ra ae cote. ¹⁷ Espíritu Turã nda ñee ñooñoã jëje, jembraaquiatu quiatu. Ae ra siqui eã tuchi Dios quiatoã ndese. Espíritu Turã icuayãte quia ñe ne. Jë nguia jëicuate nguiã. Co Espíritu turã ndiqui jendese co. Siqui bei ra jendese.

¹⁸ Aso raque quia co. Esi cheecha rã nda jëingoã. Achube ra jembirõ. ¹⁹ Aichite aĩ oso a cote. Dios icuasa reã nda mae eã serese cote. Jë nguia nda jemae nguiã serese. Aquera si ra siqui bei nonde. Jë abe ra jëingo bei seriĩ cote. ²⁰ Espíritu Turã tu mose ra jëicuate cote. “Jesús riqui ngu rese co. ã ureico Jesús rese ã. Jesús riqui urerese co”, jenyee ra seriĩ cote. ²¹ Ae secheẽ icua quia nae, ae secheẽ mumbayãte quia nae, ùquĩ nguia nyesequate nguiã serese. Paba nyesequate ùquĩ ndese. Se abe achesequate ùquĩ ndese. Tachecua ñimbucha ùquĩ ndese, i que Jesús uchimbaaquiatu je ra. ²² Judas, i que echimbaaquiatu mo je ra. Judas Iscariote eã ño aque re. Judas mo ño aque re. Judas que ñee Jesús je ra. —¿Mbaerã nda erehecua ure je re? Mbia ja je nyecua rocoĩ, i que Judas ra. ²³ Jesús que ñee ee ra. —Ae nyesequate quia serese, ùquĩ secheẽ mumbayãte quia ã. Paba abe ra nyesequate ùquĩ ndese. Paba ra siqui ùquĩ ndese. Se abe ra aico ùquĩ ndese. ²⁴ Ae nyesequa eãte quia serese, ùquĩ secheẽ mumba mumbate quia ã. Secheẽ ae eã asenei senei nguiã jëje co. Paba cheẽ ño asenei senei nguiã jëje. Ae chõ sembu nguiã.

²⁵ Seso nonde aico co renei nenei jëje a. Sereco mosebe jendese. ²⁶ Paba ra Espíritu Turã mondo jëje secheẽ ndui si. Jëquiato tuchi ra Espíritu Turã cote. Ae ra jembraaquiatu tuchi mbae ja riĩ cote. Ae ra jemundua tuchi secheẽ ndese cote. ²⁷ Co aso quia co. Jëyayã eã taemingo a. Seicua sa reã na si eã taemingo. Ûquĩ nguia eya eãte riqui nguiã. Sã seyate

se no. Eĩ tae jembia mingo a. ¡Jěya bei chō jě! ¡Jěsiquicheã ño jě! ²⁸ Aso ra Paba rea cote. Aquere ra achube jembirō. Ūquĩ ndese que jěirandu resē. Jenyesequa mose serese, eĩ ndei ra jěyate secheē ndese. “Taso Paba rea”, i mose. Ae quiarei i tuchi sesi. ²⁹ Seso nonde aico ñee tuchi jěje a cote. “Ñee ñooñoã tuchi quia equia re”, jenye tuchi ra seso mose cote. Huee ra jě seicua tuchi cote. ³⁰ A nda aicobe ñee ñee jěje chã. Diablo quia tu nguiã co. Mbia icuã nderecua ru quia co. Ae quiarei equirãcuã neã jiri sesi. ³¹ Paba cheē ndui si taico. Mbia seiquia arondete raque. “Nyesequa tuchi quia equia ngu rese re”, i ra mbia seje cote. Paba cheē mumbayã mose. Jěhuã. Nyao, i que Jesús uchimbaaquiatu je ra.

15

Jesús rei ira i rã

¹ Jesús que ñeembe uchimbaaquiatu je ra. —Se rei ira i rã. ² Paba rei ira raarōsa rã. Ira rãquiã ndibisho ia eã mose, nyisia rae. Erãquiã ia mose, saarō turã ndae. Mbeerera rera rae. Embitirō sacua. Ia tuchi sacua cote. ³ Jě ngue secheē jěisi turã ndesē. Nyebe Paba jembitirō secheē je resē. ⁴ Jěingo bei ñimbucha serese. Sã aico ñimbucha jendese no. Ira rãquiã ae ra ia eã. Siquiã mose ñimbucha hui rese. Eĩ jenye ra jě. Mbae turã nda jěsaã eã jě ae. Siquiã mose ñimbucha serese. ⁵ Se rei ira i rã. Erãquiã na ndei jě. Jěingo mose ñimbucha serese, seico mose ñimbucha jendese, jěturã tuchi ra jěingo cote. Jě ae ra mbae turã jěsaã eã, siquiã mose ñimbucha serese. ⁶ Ae siquiã ñimbucha serese nae, ūquĩ nda siqui ira rãquiã sia ji rã. Eiru mose ra mbia emunua nua. Eréi sacua. ⁷ Jěingo bei mose serese, jeñee nda amumbayã. “Mbae embu ure je”, i mose, amondo ra jěje. Jětesareia mose secheē si. ⁸ Jěingo turã mbei mose, mbia ra ñee turã turã mbei Paba rñ. Jěingo turã mbei mose, “Jesús chimbaaquiatu tuchi quia eriqui re”, i ra mbia jeni. ⁹ Sã Paba riqui nyesequa serese nae, eĩ ae si equia nyesequa jendese co. Jěingo bei ñimbucha serese. Eĩ nda achesecua bei jendese. ¹⁰ Paba cheē amumbayãte quia co. Nyebe Paba riqui nguiã nyesequate serese co. Jě secheē mumbayã mose, achesecua bei tuchi ra jendese. ¹¹ Aico ñee jembaaquiatu co. Jembia sacua. Sã seyate se no, se rã si ra jěya.

¹² Æ ndei secheē ã: ¡Jenyesequa tuchi quia jenyiese jě! Sã aico nyesequa tuchi jendese no. ¹³ “Se tamano sequiato ribishorō”, i mose emo, aque quiarei nyesequa tuchite uquiato rese. ¹⁴ Sequiato rei jě, secheē mumbayã mose. ¹⁵ “Serimba” aeã nda jěje cote. Ererecua quiatu “sequiato” i ãte nguiã ngũimba je. Ñee ja eãte ngũimba je. Sã eriqui ñee ja uquiato je no. Se quia ñi Paba cheē asenei senei jate nguiã jěje. Nyebe “sequiato” tae jěje cote. “Serimba” i rocoĩ. ¹⁶ Jě ngue seirabo eã ndesē. Se quiatu ngue jaẽirabo nguiã. ¡Mbae turã ño jěsaã saã mbei quia seje jě! ¡Jenyisaã nda uachi jě! Jě ngue seicuate. Nyebe jě “mbae mo embu ure je”, i mose Paba je, mondo ra jěje. ¹⁷ Æ ndei secheē jěje ã: ¡Jenyesequa tuchi quia jenyiese jě!

Mbia ataque Jesús rimba ucuayã

¹⁸ Dios icuasa reã nda jěucuayãte cote. ¡Jěicua quiatu jě! “Eĩ ngue equia Jesús ucuayã nyii resē”, jenye ra cote. ¹⁹ Jaẽirabo que se ra. Nyebe jěingo nguiã Dios icuasa reã na eã. Nyebe eriqui nguiã jěucuayãte ã. Jě ūquĩ na mose, eĩ nda eriqui turãte rei jendese. ²⁰ Acheē ngue jěje nyii, ¡ũquĩ ndese jendua jě! ¡Jengasu ra jěsaã saãchĩ sesi jě! Mbia icuã mose seje, jěje abe ra eicuã. Mbia secheē mumbayã mose, jě abe cheē mumbayã ndae. ²¹ Serĩ nda Dios icuasa reã jeĩ jeĩ jěje. Dios icuayãte quiatu nguiã ã. Nyebe ra eicuã icuãte jěje. ²² Achu que mbia mbaaquiatu quiatu ra. Nyebe ra Dios eicuã tea chooñoã cote. Eĩ nda Dios eicuã tea chooño ndei. Se embaaquiatu eã mose. “Ureicuã ureicuayãte quia ã”, i aronea ño emo cote re. ²³ Ae seucuayãte quia, Paba abe ucuayãte equia ã. ²⁴ Mbia mae sayã ngue atecuquia tuchi rei ee ra. Sechisaã nda mbia mo saã eã. Eĩ nda Dios mbia icuã tea chooño ndei. Sechisaã ndese mae eã mose. Sechisaã ndese mae ndaque, seucuayã ño nguiã ã. Paba abe ucuayã ño nguiã ã. ²⁵ Mbia riqui seucuayãte ã. Sã embesa ji riqui

ñee no: “Mbia seucuyâte. Se mbae icuã asaã eãte raque”, sã embesa ji riqui i no. Ûquĩ iquechĩ cote. ²⁶ Seso mose Paba rea, Espíritu Turã tamondo jêje. Jêquiatorã. Ae ra tu Paba si jêje. Ae ra ñee ñooñoã jêje. Ae ra jembaaquiato quiatu turã seriĩ. ²⁷ Nyii mosenda bei chõ jêingo nguiã serese. Nyebe ra jê abe mbia jembaaquiato quiatu turã seriĩ, i que Jesús ra.

16

¹ Jesús que ñee i i uchimbaaquiato je ra. —A aico ñee jêje a. Eĩ nda jêhui eã sesi, mbia icuã icuã mose jêje. ² Mbia ra jendiquisã quisã, jêso jêso mose mbia chumunuasa. “Ã ureico rei nguiã mbae turã naa naa Dios je ã”, i ra mbia jêiquia iquia mose. ³ Seicuyâte quia ñe ne. Paba abe icuyâte quiato nguiã ã. Nyebe ra eriqui mbae raã icuã icuã jêje. ⁴ Eĩ ae chõ nguiã ñee jêje co. Eĩ nda jendua secheẽ ndese, mbia icuã icuã mose jêje. “Jesús cheẽ iquechĩ cote”, jenyete ra cote.

Espíritu Turã nda jembaaquiato quiato, i Jesús

Acheẽ jei eã ngue jêje ùquĩ cose resẽ. Aicote quiato ngue jendese re. ⁵ Co quia asote nguiã Paba rea co cote. Ae sembu. “¿Manguete ra ereso mangue re?” i eã ñochĩ jemo seje. ⁶ Se “taso” i mose jêje, jêya eãte chõ jêingochĩ nguiã ã. ⁷ Tacheẽ nyecua jêje. Coche aso nguiã jendecha co. Espíritu Turã nda ambu jêje. Jêquiatorã. Ae ra siqui jendese. Eĩ nda Espíritu Turã tuãte rei. Seso eã mose jêsi. ⁸ Espíritu Turã tu mose ra ñee ñee mbia je. “Mbia icuã ja chõ ñe ne. Jêingo turã Dios resa rae. Dios ra Jesús icuasa reã mbasi ja”, i ra Espíritu Turã ñee mbia mbaaquiato quiato. ⁹ “Jê nguia Jesús jêicuyâte nguiã ã. Nyebe jêicuã ndiqui nguiã”, i ra Espíritu Turã ñee mbia mbiirandu. ¹⁰ Aso ra Paba rea cote. Mbia ra mae eãte serese cote. Nyebe ra Espíritu Turã mbia mundua mbae turã ndese cote. ¹¹ “Dios ra diablo mondo tata cuasu. Nyebe ra mbia icuã abe mondo tata cuasu”, i ra Espíritu Turã ñee mbia mbiirandu.

¹² “Taembaaquiato jiri”, ae rei se. Jêicuyã jeite chõ ndae. ¹³ Espíritu Turã tu mose, ae ra jembaaquiato quiato turã mbae ja rese. Ñee ñooñoa tuchi rae. Ucheẽ ae ra esenei seneiã. Paba cheẽ ño esenei senei nguiã. Mbae tu nonde ra Espíritu Turã jembiiirandu erese. ¹⁴ Espíritu Turã nda jembaaquiato quiato secheẽ nii. Ûquĩ mose ra mbia ñee turã turã seriĩ cote. ¹⁵ Ae Paba senei senei nguia, ùquĩ asenei senei nguia se abe co. Nyebe ra Espíritu Turã jembaaquiato quiato secheẽ nii.

Jêya eande nyii ra jêya tuchi cote, i Jesús

¹⁶ Namu jiri ra jemaẽ eã serese cote. Aquere ra jemaembe serese cote. Aso ra Paba rea, i que Jesús uchimbaaquiato je ra. ¹⁷ Echimbaaquiato que ñee ñee nyue ra. —¿Mbae i Jesús quia re? “Namu jiri ra jemaẽ eã serese cote. Aquere ra jemaembe serese cote. Aso ra Paba rea”, i chõchĩ. ¿Mbae ùquĩ nde? ¹⁸ ¿Mbaerã eriqui “namo jiri” i re? ¿Mbae riĩ eriqui ñee nde? Nandeiranuã tuchichĩ, i que echimbaaquiato ñee nyue ra. ¹⁹ Jesús que jirandu erese ra. —“Ndecheẽ embiasa jiri ure je” ¿jenye sete seje re? “Namu jiri ra jemaẽ eã serese cote. Aquere ra jemaembe serese cote”, ae que jêje, ¿aque jêicuyâte re? ²⁰ Tacheẽ nyecua jêje. Namu jiri ra jenyeseo. Jêya eãte rae. Sequiatoã nda eya tuchi. Aquere ra jêya tuchi cote no. Jêya eande nyii. ²¹ “Serasichĩ nda cote re”, i ra esi ndua ndua ãquẽ nyaacuquia seriĩ mose. Eyayã tuchi ae. ãquẽ nyaacuquia mose cote, eya tuchi ra cote. Ndua eã tuchi ra ngasi rese cote. Eya tuchi chõ nda nguiĩ ndese cote. ²² ãquẽ ndasi rã ño jê nde. Jêya eãte namo. Setube mose jendea, jêya tuchi ra cote. Emo nda jembia eã eã cote. ²³ “Ndecheẽ embiasa jiri ure je”, jenyete eã nda seje cote. Tacheẽ nyecua jêje. Jê seicuate. Nyebe jê “mbae mo embu ure je”, i mose Paba je, mondo ra jêje. ²⁴ “Mbae mo embu ure je. Jesús icuasa je”, jenyete eã mbeite equia Paba je ã. Jeñee ee. Jeñee mose ee, mondo ra jêje. Jêya tuchi ra cote.

Jesús quirãcua tuchi ibi jenda si re

²⁵ Acheẽ tuchi rei que jêje ra. Secheẽ ngue ambiasa tuchiã jiri jêje ra. Emo mose jiri quia ra secheẽ ambiasa tuchi jêje cote. Paba riĩ. ²⁶ Aque mose ra jeñee Paba je. “Mbae embu rã ure je”, jenyere ra Paba je serĩ. Aque mose ra acheẽ eã ee jeni cote. Jê ae chõ nda jeñee ee cote. ²⁷ Paba sí nyesequa tuchite quia jendese co. Jenyesequate quiatu nguiã serese ã. “Dios que Jesús mondo nande je resẽ”, jenyere quiatu nguiã seje ã. Nyebe Paba riqui nguiã nyesequa tuchi jendese. ²⁸ Paba si que achu íbii resẽ. Asobe ra ibi recha cote. Paba rea ra asobe íbátee cote, i que Jesús ñee uchimbaaquiato je ra.

²⁹ Echimbaaquiato que ñee ee ra. —Ereicochĩ ñee nyecuate ure je a cote. Ndecheẽ erembiasa tuchichĩ nguia ure je a cote. ³⁰ Mbae ereicua ja tuchi quiato quia nde reaẽ. Mbia ndua ndua ereicuate quia equia co reaẽ. Ñee nonde ndeje. Nyebe ureico nguiã ndeicuate ã. “Paba si chõ erechu nguiã co”, ure equia ndeje ã, i que echimbaaquiato ee ra. ³¹ Jesús que ñee ee cote ra. —Jê ngue seicuate rei nguiã. ³² Seandu rã se. Namu jiri ra jeñimbuchao chao oso sesi. Jêso ja ra serecha namu. Se ae eã nda aico. Paba riqui nguiã serese co. ³³ Jê seicua mose, mbae ra jembia eã eã. Nyebe aico nguiã jembirandu randu beite co. Mbia icuã icuã mbeite ra eriqui jêje a íbii. ¡Jeñimbiracuã jiri quia jê! Se quia sequiracuã tuchi ibi jenda si re, i que Jesús ñee uchimbaaquiato je ra.

17

Sechimbaaquiato etequiatio, i Jesús Dios je

¹ Jesús ñee jare uchimbaaquiato je que soboiba mae ibate ñee Dios je ra. —Paba, ndecheẽ ndiquichĩ io a cote. Seturã etequiquia mbia je cote. Eĩ nda se abe ndeturã atequiquia mbia je. ² Nde chõ ngue semiĩ mbia rerecurã, Paba. Mbia mingo bei sacuã. Mbia que ereme seje, ùquĩ mingo bei sacuã. Se rei nderucucha. ³ Paba, nde miĩ ndei Dios tuchi ereico co. Se rei Jesucristo ndechimbu ibate si. Ae ndeicuate quia nae, se abe icua equia nae, ùquĩ nda siqui bei. ⁴ Ndeturã ngue atequiquia mbia je ra. “Ã esaã íbii”, ere que seje, ùquĩ ngue asaã ja cote ra. ⁵ Paba, seturã etequiquiabe mbia je. Cose ndare rã. Mbae eã mosenda rã. Asobe ra siqui nderese. MSã ndeturã eretequiquia mbia je nae, seturã abe etequiquia mbia je.

⁶ Mbia que ereme seje, ùquĩ ngue ambiirandu tuchi nderese ra. Nembae rei que nyii ra. Ereme ngue seje cote ra. Ndecheẽ ngue emumbayã nda. ⁷ Nde chõ ngue sembaaquiato quiato nguiã, Paba. Ndecheẽ ae chõ ã nde. Secheẽ eã ño ñe ne. Ùquĩ ngue sechimbaaquiato icuate ra. ⁸ Eresenei senei ngue seje, ùquĩ ngue asenei senei ja ee ra. Ndecheẽ ngue eisi ja turãte ra. “Paba si que Jesús ru ra. Paba que embu ra”, i equia nderĩ ã. ⁹ Sechimbaaquiato etequiatio, Paba. Seicuaa reã je eã ño aico nguiã “etequiatio” i ndeje. Ae ereme seje nae, ùquĩ je chõ aico nguiã “etequiatio” i ndeje. Nderimbate quia ñe ne. ¹⁰ Ae nderimba nae, serimba chõ se abe re. Ae serimba nae, nderimba chõ ùquĩ no nde. Serimba riqui ñee turã mbei serĩ ã. ¹¹ Asobe ra ndeje, Paba. A ra aicoã íbii cote. Serimba quia ra chichõ íbii. Etequiatio, Paba. Ae ereme seje, ùquĩ etequiatio ndequiracuã je. Mbae miĩ ndese ja chõ emundua ndua mingo. Sã nande nandendua ndua mbae miĩ ndese no nae. ¹² Ae ereme seje, ùquĩ ngue atequiatio quiato quia ndequiracuã je ra. Seico mose íbii. Emo ngue quiachã eãte sesi ra. Aque miĩ nda quiachã. Embesa ji cheẽ ndui si ra aque miĩ quiachã. Huĩcuã je. Emo ngue quiachãya cote ra. ¹³ Aso ra nderea cote. Seico beebe mose íbii, aico ñee ñee ndeje serimba riĩ a. Ĩ nda eya quiato chi a. Sã seyate se no. ¹⁴ Ndecheẽ ngue asenei senei ee ra. Ibi jenda eã ño se re. Serimba abe rei ibi jenda eã. Nyebe ibi jenda riqui nguiã serimba ucuayã. ¹⁵ “Serimba erao ibi si”, ae eã ño nguiã ndeje co, Paba. “Etequiatio diablo si”, ae chõ nguiã ndeje co. ¹⁶ Se rã si rei serimba. Ibi jenda eã ndiqui ã. ¹⁷ Serimba emingo tuchi icúe nembraerã. Ndecheẽ je emingo icúe. Nde quia erecheẽ ñooño eãte nguiã. ¹⁸ Sã nde sembu mbia je no, eĩ ae si chõ nguiã serimba mondo mondo mbia mbaaquiato quiato

co. ¹⁹ Aico ñimondo tuchi ndeje co, Paba. Mano sacua serimba je. Ñi nda serimba abe ñimondo tuchi ndeje.

²⁰ Ñi achõ eã aico ñee ndeje. “Eteaquiato” i ndeje. Ñi nda secheẽ senei senei emo je abe cote. Ñiqui abe ra seicua cote. Serimbarã. Ae ra seicua icua nae, ñiqui abe eteaquiato. ²¹ Mbae mii ndese ja chõ ñiqui emundua ndua mingo. Mbae mii naanguia tuchi emingo nanderese, Paba. Sã ereico serese no nae. Sã aico nderese no nae. Eñ nyere si ñiqui mingo mbae mii na. Eñ nda mbia seicuasa reã ñee seriñ. “Dios chimbu quia eriqui re”, i nda mbia ñee seriñ ña. Seicuasa siqui mose mbae mii ndese. ²² Ndeturã ngue ereme seje, eñ ae que seturã mondo seicuasa je ra. Eñ nda eriqui mbae mii na. Sã nandeico mbae mii na nande no, Paba. ²³ Nyebe aico nguiã seicuasa rese co. Nde ereico serese co no. Nyebe seicuasa riqui mbae mii na co. Eñ nda seicuasa reã ñee nderiñ. “Dios quia Jesús mbu quia reaã. Dios quia nyesequa quia Jesús icuasa rese re. Jesús rese rã si nyesequa”, i nda mbia ñee nderiñ ña. ²⁴ Paba, serimbarã ngue ereme seje. Ae ra aso, sã echoi serea siqui bei huee serese cote. Ndecheẽ turã andu sacua seriñ huee. Erecheẽ turã mbeite seriñ. Ibi eã mosenda bei chõ ereico nguiã nyesequa serese co. ²⁵ Ndeturã tuchi, Paba. Seicuasa reã ndeicuayãte quia ã. Se quia areicuate nguiã co. Serimba abe que ndeicuate quia ã no nda. “Dios chimbu”, i seje nderiñ. ²⁶ Arerenei nenei tuchi que serimba je ra. Tarerenei nenei tuchi be ee. Eñ nda nyesequa tuchi nyiese. Sã ereico nyesequa tuchi serese no nae. Taico bei serimba rese cote, i que Jesús Dios je ra.

18

Mbia icuã ngaẽ Jesús ruruchoi

¹ Jesús ñeende ngu je que echoi ama ñetẽ ndobei ra. Cedrón, i que aque ama je ra. Aque robei que esi uchimbaaquiato rese ra. Iraqui turã mo ngue echoi ra. ² Jesús que oso oso beite quia huee ra. Iraqui re. Uchimbaaquiato rese. Nyebe Judas riqui nguiã hue icuate. —Jesús tateacuquia checuayã mbia je, i que Judas ra. ³ Nyebe Judas mbia ruruchoi nguiã huee Jesús isi sacua. Soldados que ecuruchoi ra. Policía jenda abe que ecuruchoi no nda. Sacerdotes rerecua chimondo rei policía. Fariseos chimondo abe no. Ñiqui ja que nyoĩ ngasẽ Jesús je ra. Tiquise que ecuruchoi quia ra. Lámparas abe no. Mbae rendi abe no. ⁴ Jesús que mbae icuate ra. —Mbia ra jeñ jeñ seje, i que eicuate ra. —¿Aba rea jenyu quia co re? i que oso ñee ee ra. ⁵ —Jesús rea urechu quia co. Nazaret jenda, i que mbia ñee nda. —Se chõ Jesús resẽ, i que ee ra. Judas abe que siqui mbia rese huee ra. Ae que siqui Jesús mee mbia icuã je huee ra. ⁶ —Se chõ Jesús resẽ, i mose que mbia siri siri choi uquite qiti ra. Ngoi ngoi chee que echoi ra. ⁷ —¿Aba rea jenyu quia co re? i be que Jesús ñee ee ra. —Jesús rea urechu quia co, i que ra. ⁸ Jesús que ñeembe ee ra. —“Se chõ nyeresẽ”, ae que jẽje. Serequia mose, sererao se ae. Sã seresenda chichõ, i que Jesús ee ra. ⁹ —Ae Paba mee seje serimbarã, ñiqui mo quiachãyãte sesi, i que Jesús nyii ra. Nyebe ñee nguiã mbia je cote. —Sã seresenda chichõ, i mbia je cote. ¹⁰ Simón Pedro que uchuuru siqui tiquise ra. Sacerdote rerecua rimba rese que tiquise rerequie requia ra. Eisa que echisia equiatocuti quitinda ra. Malco, i que aque je ra. Ae isa Pedro chisia. ¹¹ Jesús que ñee Pedro je ra. —Ndechuuru emingue chõ eriru ye. Paba cheẽ tamumbayã na. Tachecuachõ na mbia je. Sã mbia icuã sembasi tuchi cote, i que Jesús Pedro je ra.

¹² Soldados que Jesús isi cote ra. Soldados rerecua rese. Policía rese. Ñiqui ja que Jesús isi ra. Nyucua que suruchoi ra. ¹³ Anás chuchua rane ngue eruruchoi ra. Anás ndiirĩ ngue Caifás ninisi ra. Caifás que sacerdote rerecua aque mose ra. ¹⁴ Caifás sí quia que ñee nyii ra. —Aque mii ño nda mano nguiã nande ja je chã, i que judíos je nyii ra.

Jesús aicuayãte, ichõiño Pedro

¹⁵ Mbia Jesús ruruchoi mose que Simón Pedro nyoĩ erui ra. Jesús chimbaaquiato nongue rese. Co mii ndese. Enongue que sacerdote rerecua icua ra. Nyebe ique oso nguiã Jesús rui. Sacerdote rerecua itaicue. ¹⁶ Mbia que Pedro siquisã mii etaronda

robei ra. Sacerdote chiicua que tu nyebi ñee echiquesa raarõsa je cote ra. —Sã Pedro ique rã serese, i que ra. Nyebe emingue nguiã cote. ¹⁷ Echiquesa raarõsa que ñee Pedro je ra. —¿Jesús resenda nde re? i que nyucuaaque Pedro je ra. Echiquesa raarõsa. —Tei, ichõiño ngue Pedro ee ra. ¹⁸ Nyiiseite mose que ra. Nyebe policia jenda tata mbucha nguiã. Sacerdote rimba rese. Ûquiã ja que chi nyee ra. Pedro que chí nyee erese ra.

Sacerdote rerecua ñee Jesús je

¹⁹ Sacerdote rerecua que ñee Jesús je ra. —¿Aba ndechimbaaquiatu re? ¿Mbae riñ ereico mbia mbaaquiatu quiatu re? i que ererecua ra. ²⁰ Jesús que ñee ee ra. —Se que acheẽ ja mbia resa rae ra. Mbiam chumunua nuásaa ja que aico mbiambaaquiatu quiatu ra. Dios chuchúaa abe no. Acheẽ nyecuayã cuayã eã ngue se quia mbia ísaa ra. ²¹ ¿Mbaerã ereico ñee seje re? Secheẽ andusa je quia echeẽ. Sã ùquiã ñee. Mbae riñ acheẽ ee re. Ûquiã ngue secheẽ ñandu ja quia ra, i que Jesús ererecua je ra. ²² Jesús cheẽ mose que policia jenda mo ucua eritii rese ra. —¿Mbaerã ereico ñee sacerdote rerecua je ùquiã nde? i que policia mo ñee ucua Jesús rese ra. ²³ Jesús que ñee ee ra. —Secheẽ icuã mose quia echeẽ seje. Mbae icuã niñ aico ñee nde. Secheẽ turã mose chõ erecuachĩ nguiã serese, i que Jesús ee ra. ²⁴ Anás que Jesús mondo Caifás je cote ra. Ecuasa que ecuruchoi Caifás je ra. Caifás que sacerdote rerecua ra.

Jesús aicuayãte, i si Pedro

²⁵ Pedro que nyee beite u tata ra. Mbiam mo ngue ñee ee ra. —¿Jesús resenda nde re? i ee. —Tei, ichõiño ngue Pedro ee ra. ²⁶ Ae isa Pedro chisia nae, aque resenda que siqui huee ra. Sacerdote rerecua rimba chõ ae re. Ae que ñee Pedro je ra. —Nde rese amae iraqi re Jesús rese reae, i que Pedro je ra. ²⁷ —Tei, ichõiño ngue Pedro ee no nda. Aque mose tuchi que nguira ñee cote ra.

Pilato ñee Jesús je

²⁸ Policia jenda que Jesús curuchoi Caifás chuchua si cote ra. Ererecua tuchi chuchúaa que eruruchoi cote ra. Pretorio, i que hue tuchia je ra. I que nyaashĩ u quia cote ra. Judíos que iqueã ererecua chuchua ra. Mbaeiaete que abae chuchua ee ra. Pascua raã nonde. —Eĩ nda oveja roo nandeuãte rei pascua mose, ique mose abae chuchua, i que ra. ²⁹ Nyebe Pilato si nguiã usẽ ñee ee. —¿Mbaerã jẽingo ñee Jesús je re? ¿Mbae icuã esaã nde? i que Pilato ra. ³⁰ Mbiam que ñee ee ra. —Jesús que mbae icuã saã saãte ra. Eĩ nda uremondoãte rei ndeje. Mbae icuã naa naa eã mose, i que mbiam Pilato je ra. ³¹ Pilato que ñee mbiam je ra. —Jẽ ae Jesús jendao ae. Jẽ ae jẽingo erese ae. Jẽ ae Jesús jembasi mbasi ae. Jenamei ñimbasa mumba mose, i que Pilato ee ra. Judíos que ñee Pilato je ra. —Ure rei judíos. Ure mbiam mo ureiquia aroneate. Nde chõ echb ẽ. “Jẽiquia” ere chõ soldados je, i que mbiam ñee Pilato je ra. ³² Jesús cheẽ iquechĩ cote. —Mbiam ra seiquia sembucha ira rese, i rei nyii. Echeẽ iquechĩ cote.

³³ Pilato que ique si oso uchuchúaa ra. Ae “quiatuchu” i nguiã Jesús je. —¿Judíos rerecua tuchi nde re? i que Pilato Jesús je ra. ³⁴ Jesús que ñee ee ra. —¿Nde ae erecheẽ nguia seje a re? Emo ñee ndeje nyii reae, i que Jesús ee ra. ³⁵ Pilato que ñee ee ra. —Judío eã ño se resẽ. Judíos sí chõ ngue nemondo seje resẽ. Sacerdote rerecua abe no. ¿Mbae icuã eresaã nde? i que Pilato ra. ³⁶ Jesús que ñee ee ra. —Ererecua raque se. Ererecua eã ño se a íbii re. Eĩ nda serimba nyarõ tuchi rei serese, judíos ndiquisã quisã tuchi sesi. Ibi jenda rerecua eã ño se re, i que Jesús Pilato je ra. ³⁷ —¿Ererecua rei nde re? i si que Pilato ñee Jesús je ra. Jesús que ñeembe ee ra. —Ae. Achu que íbii ra. Sechusua rei íbii. Achu que mbiam mbiirandu randu Dios cheẽ niñ nda. Ichõiñosa reã ñee niñ. Ichõiñosa reã ndesenda ra seandu ja, i que Jesús Pilato je ra. ³⁸ —¿Mbae ichõiñosa reã nde? i que Pilato ee ra.

Jesús jembucha iquia ira rese, i ererecua

Aquere que Pilato usẽ si oso ñee judíos je ra. —Mbae icuã Jesús saã eãt e reae. ³⁹ Pascua mose bei que aico etarõ ji mbusẽ mondo bei jẽje ra. ¿Aba ra ambusẽ mondo jẽje namo nde? ¿Judíos rerecua ra ambusẽ mondo jẽje re? i que Pilato ñee mbia je Jesús rĩĩ nda. ⁴⁰ Mbia que ñee mombo mombo ja Pilato je ra. —Tei. Aque eã. Barrabás quia embusẽ imbu ure je, i ja que mbia ñee nda. Mbae mbuquiachãsa tuchi rei Barrabás.

19

¹—Jesús jẽiruã nua, i que Pilato ra. Mbia que Jesús iruã nua cote ra. ² Nyu ritiméi uma ji que soldados mĩi Jesús ãquĩ ndese ra. Tiru ireĩ ngue emingue ee ra. ³—Judíos rerecua tuchi chõ nde re, ichõĩño ngue soldados ucua ucua Jesús rese ra. ⁴ Pilato que usẽ si oso ñee mbia je ra. —Secheẽ jeñandu rã. Acheẽ ndei que Jesús je ra. Mbae icuã esaã eãte reae. Nyebe anosembe nguiã jẽje co, i que Pilato ra. ⁵ Jesús que econosẽ mbia je ra. Nyu ritiméi uma ji que equerao quia uãquĩ ndese ra. Tiru ireĩ ngue equerao quia nguete rese ra. —A Jesús a resẽ, i que Pilato Jesús ndeacuquia mbia je ra. ⁶ Sacerdote rerecua que chi ja huee ra. Policía jenda mo abe que chi huee ra. Ñquĩ ja que ñee mombo mombo Pilato je ra. —¡Embucha ira rese! ¡Embucha ira rese! i ja que ñee mombo mombo ee ra. Pilato que ñee ee ra. —Jẽ ño jembucha ira rese ae. Mbae icuã esaã eã arõte seje, i que Pilato mbia je ra. ⁷ Judíos que ñee Pilato je cote ra. —“Dios rucucha rei se”, ichĩ Jesús nguiã. Nyebe eiquia. Sã embesa ji riqui i no: “Ae Dios ririĩ saã saã nguia, aque jẽiquia”, i que embesa ji ra, i que judíos ñee Pilato je ra. ⁸—Dios rucucha, i mose que Pilato siquiche tuchi cote ra. ⁹ Pilato que ique si oso ñee Jesús je ra. —¿Ma jenda rei nde re? i que Pilato Jesús je ra. Jesús que ñee eã tuchi echeẽ mose ra. ¹⁰ Pilato que ñee si ee ra. —¿Mbaerã ereico ñee ãte secheẽ mose re? Arembucha arõte ira rese. Arembui abe arõte se. Se chĩ mbia rerecua, i que Pilato ñee Jesús je ra. ¹¹ Jesús que ñee Pilato je ra. —Dios nemĩ eã mose mbia rerecuarã, eĩ nda ereoco ãte rei serese. Ae semondo ndeje, ae quiarei eicuã tuchi ndesi, i que Jesús ee ra.

¹² Aque mose bei que Pilato ndua ndua Jesús rese ra. —Jesús tambui mondo, i raque ndua ndua. Judíos quiatu que ñee ee ra. —Nya. ¡Erembuichĩ nda jẽ! Nde embui mose, César quiato eã nda nde cote. “Ererecua rei se”, i quia ñi Jesús re. Nyebe eicuãte riqui nguiã César je, i que judíos tasẽ tasẽ Pilato je ra. ¹³⁻¹⁴ Judíos cheẽ andu mose que Pilato ngoi ngũenda tose ra. Huee que eriqui ñee mbeite mbia je ra. Gábata, i que erenda je ra. “Sita mbiitee ji”, i ñi Gábata re. —Jesús jendu rã seje, i que Pilato policía jenda je cote ra. Pascua nonde. Mbia ico quiatu mose pascua nonde. Tenda nandeite re mose. —A jenderecua ñi a resẽ, i que Pilato mbia je ra. ¹⁵ Mbia que tasẽ tasẽ ee ra. —¡Eiquia rei! ¡Embucha ira rese! i que mbia Pilato je ra. —¿Se ra jenderecua aiquia re? i que Pilato mbia je ra. —Urererecua mo eãte nyeresẽ. César mĩi ño nyeresẽ, i que sacerdote rerecua Pilato je ra. ¹⁶ Aque mose que Pilato Jesús mondo mbia je cote ra. —Jẽiquia. Jembucha ira rese, i que mbia je ra. Hue si que mbia Jesús ruruchoi cote ra.

Mbia Jesús mbucha ira rese cote

¹⁷ Jesús que usẽ oso cruz resebe cote ra. Mbia que ecuruchoi ibi ibátee ra. “Eresa cuare” i que hue ibi ibate je ra. “Gólgota” i que judío cheẽ hue je ra. ¹⁸ Huee que soldados Jesús mbucha ira rese ra. mbia nyeremo abe que embucha ira rese ra. Co mĩi Jesús ribisho quti. Enongue eribisho quti no. Jesús que emĩ eite re ra. ¹⁹ Pilato que letrero mbesa ra. JESUS DE NAZARET REI JUDIOS RERECUA, i que embesa ra. Embesa ji que emĩ ibate Jesús ãquĩ nguiti ra. ²⁰ Judíos tubiriã ngue chi mae embesa ji rese ra. Sucha tubiriã jiite quiatu ngue Jesús mbucha nguiã ira rese. Embesa ji que chĩ mbia cheẽ mbuae jaaja ra. Judío cheẽ. Griego cheẽ. Latín ñee. ²¹ Sacerdotes rerecua que ñee ja Pilato je ra. —“Judíos rerecua” erechĩ nguiã embesa. “Judios rerecua raã ñooño” ere chõ embesa mĩi ae, i rei que judíos rerecua Pilato je ra. ²²—Ae ambesa, sã ñquĩ ñi ño, i que Pilato judíos rerecua je ra.

²³ Cuatro soldados que chi huee ra. Ñquĩ ngue Jesús mbucha ira rese ra. Ñquĩ ngue Jesús irao isirõ sirõ ja ra. Jesús irao mii ngue chichõ cote ra. Tejido turã tuchi que aque tiru ra. Eiasa eã tuchi que ra. Eao ji chõ eresebe que ra. ²⁴ Soldados que ñee nyue ra. —Aque ra nandechisia eã. Sita ñetẽ nandesurubaba baba rã nandechue. Aba ra ja. Aba ra eirao querao ja, i que nyue ra. Sita ñetẽ ngue esurubaba baba uchue cote ra. Embesa ji cheẽ iquechĩ cote. Jesús irao soldados mbuchao chao mose. “Seirao que embuchao chao nyue ra. Sita ñetẽ ngue esurubaba baba uchue ra”, i que embesa ji huĩ nyii ra. Embesa ji iquechĩ cote.

²⁵ Jesús mbuchasa ira rese que cuña mo chi ra. Jesús si que ra. Esi nongue abe que ra. María Magdalena abe que ra. Cleofas ninisi abe que ra. María, i que aque je ra. Ñquĩ ngue chi ja Jesús ji ra. ²⁶ Juan abe que chi Jesús si ji ra. Jesús mae mose usi rese que ñee ee ra. —Taĩ, aque quia nderiirina cote, i usi je. Juan ñii eriqui ñee. Jesuubi tuchi quia ñi Juan nde. ²⁷ —Aque ndesirã cote, i que Juan je cote ra. Juan ngue Jesús si querao bei uchuchua cote ra.

Jesús mano cote

²⁸ —Achimbirãcuã tuchi que mbae ja je Dios cheẽ nguire ra, i que Jesús uchiangui re cote ra. —Seisei, i cote. ²⁹ Vinagre mo ngue chĩ mbae mo ye huee ra. Mbia que esponja monde vinagre ye ra. Mondo que Jesús chúruu ra. ³⁰ Jesús que vinagre mocõ esponja resenda cote ra. —Dios cheẽ ngue asaã ja cote ra, i que Jesús ra. Uãquĩ ngue embucheseco cote ra. Mano ngue cote ra.

Soldado Jesús cúa chiõ tiquise je

³¹ Judíos que ñee nyue ra. —Ae embucha ji chi ira rese nae, sã ñquĩ chiã ira rese pascua mose huee, i que mbia ra. Pascua nonde que embucha ira rese ra. Mbia icoquiato mose pascua nonde. Mbia chumunuasa tuchi quiarei pascua. Sábado mose rei pascua. Nyebe mbia ñee nguiã Pilato je. —Sã soldados ira resenda timasiquio ja jẽ. Eĩ nda mano jei. Eĩ nda soldados ecuruchi sábado nonde, i que judíos Pilato je ra. ³² Soldados que nyoĩ ira resenda tima ndiquio ra. Ae chi Jesús rereco chobei. ³³ Ngasẽ mose Jesús je, eraaquete que ee ra. Nyebe etima ndiquio eã nguiã. ³⁴ Soldado mo ngue Jesús cúa chiõ tiquise je ra. Eruqui que uchẽ nda. Eri abe que uchẽ nda. ³⁵ Nyebe aico nguiã ã mbesa mbesa a. Amae jee ngue erese re. Acheẽ ñoñoña se quia a. Eĩ nda jẽ abe “ae bei jẽ” jenyé Jesús rĩĩ. ³⁶ Embesa ji cheẽ ngue ique cote ra. Jesús tima ndiquio eã mose. —Etima nda mbia siquio eã, i que embesa ji nyii ra. ³⁷ —Ae embucha uquia ira rese nae, ñquĩ nda mae si erese, i abe que embesa ji huĩ nyii no nda.

Jesús ruruchoi eraaque atisa

³⁸ José de Arimatea, i que emo je ra. Jesús rimba checuayã ngue ae ra. —Sã judíos jiranuã serese, i que equia uchiangui re ra. Ae que “Jesús rete embu seje” i Pilato je ra. Pilato que “eno” i ee ra. José que Jesús rete curuchi ira si cote ra. Ae equerao nguiã. ³⁹ Nicodemo abe que tu erea ra. Ae tu ñee Jesús je isa nyii nae, aque. Aque que tu aba mbushimbusa tubiriã tuchi reru ra. Eraaque mbaerã ndei aba mbushimbusa. Ira shimbu turã mbucúĩ ji. Mbae a mbucúĩ ji abe no. ⁴⁰ Ñquĩ ja que Jesús rete querao cote ra. José. Nicodemo ndese. Aba mbushimbusa resebe que eraaque uma uma tiru je ra. Eĩ mbei que judíos quia mbia raaque je ra. Eati nonde. ⁴¹ Jesús iquiasa rurubi que sita imi mo ñi nda. Eao ramo ji. Mbia raaque mondosa eã nyii. ⁴² Huee que Jesús raaque nduruchoi nyati ra. —Cochite quia sábado ru nguiã nande je co, i que eati aichi chõ nda.

20

Jesús quera si

¹ Domingo mose que María Magdalena nyoĩ mae Jesús tãsa rese ra. Nyaasĩ nonde. Jesús atiquia nduruba ji que chi sita ra. ² Nyebe echoi nguiã uchã ñee Simón Pedro mbiirandu. Jesús chimbaaquiato nongue abe mbiirandu. Ae Jesús quiato tuchi nae, aque. —Aba chõ

nandererecua raaque sirõ suruchoi. Mangue eno mangue reae, i que María Magdalena nda. ³ Nyebe Pedro si nguiã ea tiquia rea. Uquiato rese. ⁴ Nyoï ja que uchã nda. Enongue rane ngue Pedro chucuã oso ngasẽ nda. ⁵ Nyibi que mae Jesús atiquia rese ra. I que Jesús umanda achõ u tiru ra. Ique tuchiã ngue oso sita imi ni nda. ⁶ Aquere que Simón Pedro ngasẽ cote ra. Ae quiatu que ique oso sita imi ni nda. Ae abe que mae Jesús umanda achõ ndese cote ra. ⁷ Eãquĩ umanda rese abe que mae nda. Tiru ataque rese ja eã ngue eãquĩ umanda chi ra. Eacua ji que chi icúa ra. ⁸ Ae rane ngasẽ nguia nyii nae, aque abe que ique tuchi oso sita imi ni cote ra. Mae tuchi que Jesús oreã ndese cote ra. —Jesús quera chõ nguia re, i que eicua cote ra. ⁹ Ñquĩ ngue embesa ji icuayãte ra. “Jesús ra quera si”, i que eicuyãte ra. ¹⁰ Nyebe si que echoi uchuchúaa ra.

Jesús nyecua María Magdalena je

¹¹ María que chiño nyeseo eatiquia jii ra. Echeseo que nyibi mae Jesús rua rese ra. ¹² Angeles mo ngue chi huee nyeremo ee ra. Eiraoshĩ ja que chi ee ra. Enongue que chĩ ngoi Jesús ãquĩ ndúa qiti ra. Enongue ecuii rúa qiti no. ¹³ Angeles que ñee María je ra. —¿Mbaerã ereico nyeseo re? i que María je ra. —Aba chõ sererecua raaque querao. Nyebe aico nguiã nyeseo. Mangue chõ eriqui ererequia mangue, i que María ra. ¹⁴ Ucheẽ nduibe que mae ndei uquite qiti ra. I que Jesús uã ee ra. Icuã eãte que ra. ¹⁵ —¿Mbaerã ereico nyeseo re? ¿Aba eresequia quia re? i que Jesús María je ra. Ira a raarõsa Jesús riqui reĩ nguiã María je. Nyebe María ñee nguiã ee. —¿Nde Jesús raaque ererao re? ¿Mangue erechono mangue re? Taso erea ae. Tarao ae, i que María ra. ¹⁶ Jesús que “María” i María cheẽ mose ra. María que uba tuchi Jesús icua cote ra. Judíos cheẽ ño ngue María ñee Jesús je ra. —Raboni, i que ra. —Sembaaquiatusa, i ñee Jesús icua re. ¹⁷ Jesús que ñee María je ra. ¡Seisi jeichĩ nda re! ¡Aso ãte Paba rea resẽ! Eso rã ñee senongue je. “Jesús que ñee jẽje ra. ‘Aso ra ibate Paba rea. Dios rea. Ae abe chõ jendu re. Huee ra aso’, i que Jesús ñee jẽje ra”, ere rã senongue je, i que Jesús ñee María je ra.

Jesús nyecua uchimbaaquiatu je

¹⁸ María Magdalena que oso Jesús chimbaaquiatu mbiirandu ra. —Amaechĩ Jesús rese, i que ee ra. Jesús cheẽ ngue esenei ja ee ra. ¹⁹ Aque mose que domingo ra. Aque isa que Jesús chimbaaquiatu chi ñumunua nda. Etaronda matã ji que chĩ nda. Siquichete quia judíos si re. Jesús que oso ique uchimbaaquiatu mbuate ra. Eite re que esi ñee ee ra. —¡Jẽya eãte jirichĩ nda jẽ! i que Jesús ñee ee ra. ²⁰ Aquere que Jesús o iõsa reacuquia ee ra. Ucuã iõsa abe no. Echimbaaquiatu ía tuchi que mae Jesús rese ra. ²¹ Jesús que ñee si ee ra. —¡Jẽya eãte jirichĩ nda jẽ! Sã ñi Paba sembu no, eĩ tae si jemondo secheẽ nenei nenei sacua mbia je, i que Jesús uchimbaaquiatu je ra. ²² Jesús que uchimbaaquiatu ichu ñee nda. —Espíritu Turã ndu jẽje a cote, i que eichu ra. ²³ —“Dios chõ jẽicuã mbutiã nguiã jẽsi co”, jenyẽ mose emo je, Dios ra ñquĩ icuã mbutiã esi cote. “Dios chõ jẽicuã mbutiã eã nguiã jẽsi co”, jenyẽ mose emo je, Dios ra ñquĩ icuã mbutiã eã esi, i que Jesús ra.

Tomás mae Jesús quera si rese

²⁴ Tomás oreãte que Jesús nyecua mose uchimbaaquiatu je ra. Jesús chimbaaquiatu raque Tomás. Eata, i que Tomás je ra. ²⁵ —Jesús rese que uremae nda, i que eataque embiirandu ra. Tomás que ñee nda. —Jesús eã ndei e. Se mae eã mose eo iõsa rese, se ocoã mose eo iõsa rese, se ocoã mose ecúa iõsa rese, “nyia” aeã nda se, i que Tomás ñee nda. ²⁶ Jesús chimbaaquiatu que ñumunua si domingo nongue mose ra. Tomás abe que siqui uataque rese huee cote ra. Etaronda matã ji que chĩ nda. Jesús que ique oso ra. Eite re que esi ñee ee ra. —¡Jẽya eãte jirichĩ nda jẽ! i que ee ra. ²⁷ Ñee ngue Tomás je cote ra. —¡Sã seo jẽ! Seo iõsa rese eoco. Secúa iõsa rese abe eoco ae. “Jesús quera si eãte” jere sichĩ nda jẽ! “Jesús que quera si ra”, ere chõ cote, i que Jesús ñee Tomás je ra. ²⁸ —Sererecua. Nde rei sembae Dios, i que Tomás Jesús icua cote ra. ²⁹ Jesús que ñee Tomás

je ra. —Nde mae mose serese, aque mose chõ seicuachĩ. Mae eã mose serese chõ ngue emo ndiqui seicua ra. Ûquĩ nguiarei eya tuchi ndesi, i que Jesús ee ra.

Je Jesús icua sacua ño co ambesa nguiã jėje

³⁰ Jesús que mbia mae sayã saã saã tuchi uchimbbaaquiato je ra. Ûquĩ ambesa ja eã nguia a. ³¹ Á nguia ambesa ja quia a. Jẽ Jesús icua sacua. —Jesús rei Cristo. Jesús rei Dios rucucha, jenye nda chã. Ûquĩ icua mose ra jëingo bei.

21

Jesús nyecua siete uchimbbaaquiato je

¹ Aquere que Jesús nyecua si uchimbbaaquiato je ra. Ama nimia ndese que eñi nda. Tiberias, i que aque ama ndisa je ra. Eĩ ngue Jesús uã nyecua ee ra. ² Echimbbaaquiato que chi nyiese ra. Simón Pedro. Tomás ndese. Ae je eriqui “Eata” i. Natanael ndese. Caná de Galilea jenda rei Natanael. Zebedeo riirĩ abe que chi ra. Echimbbaaquiato nongue abe que chi nyeremo no nda. ³ —Taso rã sira rea, i que Simón Pedro ra. —Ure abe ra ureson derese, i que eataque ee ra. Nyoj ja rei que sira rea ra. Nyui ja que echoi canoa ye ra. Sira que embua mbua eãte aque isa ra.

⁴ Jesús que chĩ erimia ndese echimbbaaquiato je ra. Jesús eã eriqui reĩ nguiã ee. ⁵ —¿Sira mo jembua re, ãquẽ? i que Jesús ñee mombo ee ra. —Tei, i que echimbbaaquiato ee ra. Jesús icua rocoĩ. ⁶ —Sira mbua mbuasa jenduba canoa quiato cuti. Sira ra jembua cote, i que Jesús ee ra. Jesús cheẽ ngue emumbayã nda. Sira que ua jate embua mbuasa ye cote ra. —Nandenosẽ ama si. Nandechuchã canoa ye, i rei que ra. Eusite que ee ra. ⁷ Ae Jesús quiatote, aque que ñee nda. —Jesús chõ eriqui re, i que uataque je ra. Pedro eandu mose que huiirao mingue asi oso ii ra. Jesús rea. Sira mbua mbua nonde quia huiirao mbui nguiã nyii. ⁸ Isho tuchiã ngue ama nimia nda. Cien metros chõ ngue ra. Pedro ataque que canoa querao ama nimia ndichã nda. Sira mbua mbuasa que ecuruchoi quia mbutiriri sira resebe ra.

⁹ Nguichi que canoa si ibi rĩ cote ra. I que tata u ee ra. Sira miĩ ngue chi tata rĩ ee ra. Mbichae abe que chi ra. ¹⁰ —Sira mo jendu rã. Ae jembua ramo, i que Jesús uchimbbaaquiato je ra. ¹¹ Simón Pedro que nyui oso canoa ye ra. Sira mbua mbuasa que embutiriri serao sonosẽ ama nimia ndese cote ra. Embisẽ sira resebe. Sira mbua mbuasa que soroãte enonosẽ mose ra. Sira cuasu achõte raque. Sira 153 raque. ¹² —Jenyu quiaru cote, i que Jesús ee ra. —¿Aba nde re? i ãte que emo ñee ireĩ nguia ee ra. Mbia que Jesús icua jate ra. ¹³ Jesús que oso tátaa cote ra. Mbichae que esirõ nda. Mbuchao chao que uchimbbaaquiato je ra. Sira abe que embuchao chao ee ra. ¹⁴ Jesús que mano nyii ra. Quera si que ra. Nyecua nyecua que uchimbbaaquiato je cote ra. Co rei tercera vez co.

Jesús ñee Pedro je

¹⁵ Quiaru jare que Jesús ñee Simón Pedro je ra. Jonas ndiirĩ ndei Simón Pedro. —Simón, ¿erechesequa tuchi quia serese ã si re? i que Jesús Pedro je ra. —Ae. Achesequa tuchite sequia nderese co resẽ. Seicuate se resẽ, i que Pedro ñee ee ra. —Oveja raarõsa rã eico no. Seicuasa embaaquiato quiato quia secheẽ je no, i que Jesús Pedro je ra. ¹⁶ —Simón, ¿erechesequate quia serese re? i si que Jesús ñee Pedro je ra. Pedro que ñee ee ra. —Ae. Achesequa tuchite sequia nderese co resẽ. Seicuate se resẽ, i si que Pedro ñee ee ra. —Oveja raarõsa rã eico no. Seicuasa esaarõ turã nguia no, i que Jesús Pedro je ra. ¹⁷ —Simón, ¿erechesequate quia serese re? i si que Jesús ñee Pedro je ra. Co que tercera vez cote ra. Jesús ñee tres veces mose que Pedro ía eã tuchi ra. Pedro que ñee ee cote ra. —Mbae ereicua jate quia co, Sererecua. Achesequa tuchite sequia nderese co resẽ, i que Pedro ñee Jesús je ra. —Oveja raarõsa rã eico no. Seicuasa esaarõ turã nguia no. ¹⁸ Tacheẽ nyecua ndeje, Pedro. Ndeyasu mose que ereico ndeirao mingue oso ngata chooño ndesose quti ra. Nde amei mose ra ndechiba ereira cote. Mbia ra ndecua cote. Ndeso sere ãsa quti ra mbia nderuruchoi cote, i que Jesús Pedro je cote ra. ¹⁹ —Eĩ nda

mbia Pedro iquia, i chõ Jesús re. —Eĩ nda Pedro Dios quirãcuã ndeacuquia mbia je, i chõ Jesús re. —Eico serui, i que Jesús Pedro je cote ra.

*Ae uch*imbaaquiatu rese Jesús nyesequa tuchi

²⁰ Pedro que uba mae serese cote ra. Se rei Juan. Jesús nyesequa tuchi rei se. Se chõ ngue acoi huĩ quiaru Jesús jii aque isa resẽ. Se chõ ngue “¿Aba ra neme mbia icuã je re?” ae Jesús je resẽ. ²¹ Pedro que mae serese cote ra. Ñee ngue Jesús je cote ra. —¿Mañi ite ra mbia quia Juan je re? i que Pedro Jesús je ra. ²² Jesús que ñee ee ra. —¿Mbaete ere? Serui chõ eicochõ nde. “Sechube mose chee ra Juan manoã”, se i mose, manoã ndae. Eico chõ serui nde, i que Jesús Pedro je ra. ²³ —Juan nda manoã mbeichĩ nde, i que Jesús icuasa Juan ñii cote ra. Jesús cheẽ abi chõchĩ. —Juan nda manoã, ire rocoĩ Jesús nyii. —Se cheẽ mose ra manoã, i chõ ndei ngue Jesús re. —Juan nda manoã, i ãte que Jesús ra.

*Juan ñi*mbesa hui bei

²⁴ Jesús chimbaaquiatu chõ se re. Se chõ ã ambesa ja nguiã. Amae jate que se quia Jesús chisaã ndese ra. Acheẽ ñooño eãte se quia ã mbesa mbesa co. ²⁵ Jesús chisaã saã tubiriãte quia ñene. Ambesa ja aroneãte quia a. Jesús chisaã saã mbesa ja mose, eĩ ndei ra papel mbesa ji mbia recua mbiitayã jate. Amén.

LOS HECHOS DE LOS APOSTOLES

Espíritu Turã nda tu, i Jesús

¹⁻² Ambesa que ndeje nyii, Teófilo. Arembiirandu ja que Jesús chiao rese. Eresco mose íbii. Jesús que mbia mbaaquiatsu quiatu ereco mose íbii ra. Dios que equerao bei jiri ibate cote ra. Ũquĩ ngue asenei senei ndeje nyii ra. Oso nonde ibate que ucheẽ nenei nenei sacua irabo ra. Uchiirabo que embaaquiatsu quiatu ra. Siqui que Espíritu Turã ndese mbia mbaaquiatsu quiatu ra. Eaquiatsu que esecha oso ibate cote ra. ³ Manonde que eru si nyecua ũquĩ je ra. Oso nonde ibate. Ngueco que eteacuquia cuquia si ee ra. Cuarenta días que eriqui nyecua nyecua bei uchi mbaaquiatsu je ra. Dios rese que eriqui embiirandu randu ra. Dios rei ererecua tuchi. Ae rĩĩ eriqui embiirandu randu. ⁴ Jesús oso nonde ibate que eriqui ñee ñee uchimbaaquiatsu je ra. —¡Jẽsochĩ nda sucha tubiriã si jẽ! ¡Jẽsochĩ nda Jerusalén si jẽ! ¡Paba cheẽ nguire jengu Espíritu Turã ndaarõ aa jẽ! “Espíritu Turã tamondo jẽje”, i que Paba jẽje ra. Aque rĩĩ ngue acheẽ jẽje nyii resẽ, i que Jesús ee ra. ⁵ —I je que Juan bautizar i mbia je ra. Namu jiri ra Espíritu Turã ndu. Ae ra ique jeñiangui re. Eĩ nda Espíritu Turã bautizar i jẽje. I je eã cote. Espíritu Turã nda ique chõ jeñiangui re cote, i que Jesús uchimbaaquiatsu je ra.

Jesús oso ibate

⁶ Emo mose que Jesús chimbaaquiatsu ñee ee ra. Jesús oso nonde ibate. —¿Manose ra urererecua ishonda erembutiã ure si re? Israel jenda rei ure. ¿Namu nda ure mo eremii urererecuarã nde? i que mbia Jesús je ra. ⁷ Jesús que ñee ee ra. —Manose chõ ndae. Paba mii eicua. Mbia eicuayã. Jẽ nguia jẽicuayãte nguia no. Manosete chõ ndae. ⁸ ¡Co rese chõ jendua jẽ! Espíritu Turã nda tu jẽje cote. Ae ra jembuquirãcuã. Ae ra jembucheẽ ñee serĩĩ. Jẽ nda jẽingo serenei nenei tuchi cote. Serenei nenei Jerusalén jenda je. Judea jenda je abe no. Samaria jenda je abe no. Mbia manguie choñoa jenda ja je abe no. Ũquĩ ja je jẽingo serenei nenei, i que Jesús ra. ⁹ Ñeende que Jesús si ibate cote ra. Uchimbaaquiatsu resa rae que esi erecha ra. Ibeishĩ ngue embuchecuayã cote ra. ¹⁰ Echimbaaquiatsu que soboiba bei u mae ibei rese ra. Ibei rese mae mose que mbia nyeremo ngaẽ erea ra. Ibate si. Huee que echi ra. Eiraoshĩ tuchi que ngaẽ ejii ra. ¹¹ Ibatenda que ñee ee ra. —Galilea jenda, ¿mbaerã jengu beite mae ibei rese a re? Jesús oso quia ibate nae, ae si ra tube no. Jemae ngue u eso rese nae, eĩ si ra u íbii no, i que ibatenda ee ra.

Dios que Matías irabo ra

¹² Jesús chimbaaquiatsu que nyoĩ nyebi hue recha ra. Monte de los Olivos recha. Nyoĩ que sucha tubiriã Jerusalén cote ra. Aichi jiri. Monte de los Olivos rei Jerusalén ndurubi. ¹³ Ngasẽ ngue Jerusalén nda. Nyoĩ que uchuchúaa cote ra. ã ja que ra. Pedro. Juan. Jacobo. Andrés. Felipe. Tomás. Bartolomé. Mateo. Alfeo ririĩ. Jacobo, i ee. Simón el Cananista. Judas. Jacobo ririĩ ndei Judas. ¹⁴ Ũquĩ ja que ñumunua mbei bei quia ñee ñee Dios je ra. Ari abe no. Acuanĩ abe no. María abe no. Jesús si rei María. Jesús nongue abe no. Ũquĩ ja que ñumunua mbei bei quia ñee ñee Dios je ra.

¹⁵ Emo jiri mose que Jesús icuasa ñumunua ja ra. Ciento veinte que ra. Pedro que uã ñee ee ra. ¹⁶ —Seandu rã se, Seresenda. ¡Sã embesa ji ñee ñoño eã ño jẽ! Cose que Espíritu Turã ñee Judas rĩĩ nda. David que embesa Espíritu Turã ñee nguire ra. Judas rĩĩ. Judas rei Jesús reacuquiasa mbia icuã je. Jesús rerao nonde iquia. ¹⁷ Jesús que Judas irabo rei nyii ra. Nanderesendacuã. Nyebe rei Judas nanderesenda nyii. ¹⁸ Judas que mbae isiquia isi icuã nda. Mbae isiquia je que ibi mo isi ra. Hue ereco mose que mano nda. Ibate si eru ngoĩ mano. Uãquĩ nguĩti que eru ngoĩ ra. Erie que oo ra. Echĩque

mburiri. ¹⁹ Jerusalén jenda que jirandu ja erese ra. Acéldama, i que hue ibi je cote ra. Mbia ruqui rua, i chõ nguiã hue je. Ecoisa ibi je. ²⁰ ñi embesa ji Salmos nde: Sã echuchua oreã mbei. Sã mbia mo ndiquiã mbei equi re. Sã eriquicharomba riqui Dios cheẽ nenei nenei cote, i que embesa ji Judas rĩĩ nda. ²¹ Emo nandeirabo Judas riquicharõ. Mbia chi bei quia nanderese nae. Jesús nandembaaquiato quiato bei mose. ²² Juan mbia mbiirandu randu mosenda bei. Dios Jesús querao chee quia ibate. Ae siqui beite quia nanderese nae, ùquĩ mo nandeirabo nanderesendacuã. Jesús quera rese mbia mbiirandu randu sacuã, Judas riquicharõ, i que Pedro ñee ee ra. ²³ Mbia nyeremo ngue etea cote ra. José Justo, i emo je. Barsabás, i abe ee no. Matías, i enongue je. ²⁴ Jesús chimbaaquiato que ñee Dios je cote ra. —Urererecua, aba chiã ereicuate quia co. Ñ nyeremo ndiqui ã. ¿Aba ndechiirabo re? ¿Aba ereirabo urembirõ sacuã nde? ²⁵ ¿Aba eretea ndechimbaaquiaturã nde? ¿Aba eretea Judas riquicharõ nde? Ae hui quia ndecheẽ si. Ae oso quiachã ndesi cote. ¿Aba eretea eriquicharõ nde? i que Dios je ra. ²⁶ Sita que embaba mbaba o ye cote ra. — ¿Aba Dios chiirabo re? i ñene. Eĩ ngue Matías irabo ra. Dios que Matías mingo Jesús chimbaaquiato rese cote ra. Mbia once mbirõ. Docerã. Doce que Jesús chimbaaquiato cote ra.

2

Espíritu Turã tu Jesús icuasa je

¹ Fiesta de Pentecostés mose que Jesús icuasa chi ja ñumunua nda. Hue miĩ ngue echi ja ñumunua nda. ² Ibei rieu que embuate ra. Ama ndieu raanguia. Tuchua mbieu tuchi Jesús icuasa je. ³ Tata rendi raanguia que tu nguichi eãquĩ ndes e ra. Jesús icuasa ãquĩ ja rese. ⁴ Espiritu Turã ngue ique tuchi hue jenda chiangui re ra. Ique ja que Jesús icuasa chiangui re ra. Mbia que echeẽ ata mo saã saã cote ra. Echeẽ uchianuã ngue esaã saã nda. Espiritu Turã nguia rei embucheẽ echeemo. Mbia cheẽ mbuae jaaja que cote ra.

⁵ Aque mose que judíos tubiriã nyi Jerusalén nda. Ishonda tubiriã nyi huee. Mangu chooñoa jenda ja chõ chi nguiã huee. Ûquĩ ndei Dios cheẽ mumbasa reã judíos ataque rã si. ⁶ Ibei rieu andu mose que ùquĩ ngaẽ uchã nda. Nyuruira tuchi eandu. Jesús resenda mbia cheẽ mbuae saã saã ja chõchĩ nguiã u. Espiritu Turã ño ngue embucheẽ nguiã. Mbiamo ñee icuasa reã ndaque. Mbia que ucheẽ ñandu ñandu ja u ra. Jesús icuasa ñee mose. Nyebe que mbia chi nguiã nyuruira eandu. ⁷ Mbia nyuruira ja eandu. —¿Mañi equia mbiamo ñee icua ja re? Galilea jenda achõ ño ndaque ã, i tuchi que mbia u nyuruira eandu ra. ⁸⁻¹¹ —¿Mañi equia nande ja cheẽ naa naa ã nde? Nandecheẽ Jesús icuasa saã jaaja chõchĩ nguiã ã. Partia jenda cheẽ esaã saã ñochĩ nguiã ã. Media jenda cheẽ abe no. Elam jenda cheẽ abe no. Mesopotami a jenda cheẽ abe no. Judea jenda cheẽ abe no. Capadocia jenda cheẽ abe no. Ponto jenda cheẽ abe no. Asia jenda cheẽ abe no. Frigia jenda cheẽ abe no. Panfilia jenda cheẽ abe no. Egipto jenda cheẽ abe no. Libia jenda cheẽ abe no. (Cirene ndobei.) Roma jenda cheẽ abe no. (Roma jenda mo ndei judíos. Roma jenda ataque rei judíos eã.) Creta jenda cheẽ abe no. Arabia jenda cheẽ abe no. Jesús icuasa ùquĩ ñee saã saã ja chõchĩ nguiã ã. Nandecheẽ esaã saã ja chõchĩ nguiã ã. Jesús icuasa riquichĩ nandecheẽ naa naa tuchi Dios chiao turã nenei nenei ã, i ja que mbia ucheẽ andu jaaja mose. ¹² I jate que mbia u nyuruira eandu ra. Ndua ndua tuchi que u eandu ra. —Mañi equia ñee ã nde, i nyue. Jesús icuasa mbia cheẽ mbuae naa naa mose. ¹³ Emo emo ngue ñee icuã icuã Jesús icuasa je ra. —Quiacua chõ eriqui nguiã ã, i raque Jesús icuasa rĩĩ.

Pedro ñee mbia je

¹⁴ Pedro que uã ñee mbia je cote ra. Nguesenda once rese que echi uã ñee mbia je ra. Tasẽ jiri ñee ee. —¿Seandu ja u jẽ! Tacheẽ jẽje, Jerusalén jenda. Judea jenda abe no. ¹⁵ ¿Quiacua reĩ Jesús icuasa riqui jẽje re? Quiacua eã ño ñene. Tenda que nyui ramote

resẽ. Mbia quiacuasa eã ño huee tenda resẽ. ¹⁶ ã nii ngue Joel embesa mbesa cose ra. Dios cheẽ mbuchecua que embesa ã nii nda. Eĩ ngue embesa ra:

¹⁷ “Mbae ua jiri mos e ra Espiritu Turã amondo mbia ja je”, i que Dios ra.

“Jendiirĩ nda secheẽ mbuchecua mbia je.

Acuanĩndu ra serea rea tuchi cuu.

Amei abe ra serea rea cuu no.

¹⁸ Aque mose ra Espiritu Turã amondo serimba ja je.

Serimba ra secheẽ mbuchecua checua mbia je.

¹⁹ Mbia mae sayã nda asaã saã ibi rĩ no.

Eruqui rese ra mbia mae no.

Tata rese ra mbia mae no.

Tatashĩ ndese ra mbia mae no.

²⁰ Mbia rerecua tu nonde ra tenda ñimoo.

Eruqui rã nda nyasi mbia rerecua tu nonde”, i que Dios ra.

²¹ “Ndeya eã ño serese, Sererecua”, i mose emo ñee Dios je, aque ra Dios sirõ eicuã si,

i que Joel embesa ra. ²² Israel jenda, ¡seandu rã! Nazaret jenda rĩĩ aico ñee ñee jẽje a.

Jesús rĩĩ. Dios que Jesús mbuquirãcuã tuchi ra. Nyebe que Jesús mbia mae sayã saã saã

nda. Ñquĩ ndese que jemaẽ nda. ²³ “Mbia icuã nda seriirĩ iquia”, i que Dios Jesús mano

nonde ra. Jẽ nguia Jesús jẽiquia tuchi nguia cote. Jẽ nguia jemee nguia mbia icuã je.

Eiquia nonde. Dios rane ngue jirandu Jesús rese ra. “Mbia icuã nda Jesús iquia”, i que

Dios quia nyii ra. ²⁴ Dios que Jesús mbuquera si ra. Jesús mano mbei aroneãte. ²⁵ David

que Jesús cheẽ senei cose ra. ã ngue ñee nda:

Sererecua riqui sembui eã mbei co.

Eriqui bei serese co.

Mbae riqui sembusiquiche aroneãte co.

²⁶ Nyebe seya tuchite riqui co.

Nyebe aico ñee turãte Dios rĩĩ co.

Semano mose abe ra Dios hui eã mbei sesi.

²⁷ Seaingue ra eresechayã semana mose, Sererecua.

Serete abe ra erembuquera si mingo.

Ndechesequate aico co.

²⁸ Semingosa tuchi rei nde.

Sereco mose nderese ra seya tuchi,

i que David Jesús cheẽ nenei cose ra.

²⁹ Tacheẽ nyecua jẽje, Seresenda. Nanderu David que mano cose resẽ. Mbia que echati

resẽ. Eatisa nandeicua ja quia co resẽ. ³⁰ David rei Dios cheẽ mbuchecua. Dios que

ñee ee ra. “Nderiirĩ mo nda Cristo. Ae ra mbia rerecuarã tuchi. Nderiquicharõ nda mbia

rerecuabi tuchi”, i que Dios David je cose ra. “Dios ñee ñooñoa tuchi chõ nguia”, i que

David ra. ³¹ David que Dios cheẽ icuate quia ra. Nyebe que ñee Jesús rĩĩ nda. “Seaingue

ra eresechayã semana mose. Serete ra erembuquera si mingo”, nyebe David i nguia

Jesús rĩĩ. ³² Dios que Jesús mbuquera si ra. Ñquĩ ureicua ja quia ã. Nyebe ureico nguia

jembiiirandu randu ñquĩ ndese ã. ³³ Dios que Jesús querao ibate nyiese ra. Dios jii eriqui

pee cote. Dios que Espiritu Turã mee Jesús je cote ra. Ucheẽ nguire que emee ee ra.

Jesús riqui Espiritu Turã mondo ure je co. ã Espiritu Turã nyisaã jeñandu ñandu quia ã.

Espiritu Turã ndiqui ã mbucheẽ mbia mo ñee ã. ³⁴⁻³⁵ David osoã ibate aque mose. Jesús

rĩĩ ngue David embesa ra. ã ngue embesa ra:

Dios que ñee sererecua je ra. “Ecoi seji. Nde abe ra ererecua serese.

Ae ndeucuyãte quia nae, ñquĩ je ra ndequirãcuã ateacuquia tuchi.

Ndequirãcuã tuchi ra ñquĩ si”, i que Dios sererecua je ra,

i que David embesa mbesa ra. ³⁶ Jesús jembucha quia ira rese nae, ae si Dios mingo mbia

rerecuarã co. Ae nandesarõ arõ nguia, ae si rei Jesús. Jesús rese tẽirandu ja, Israel jenda,

i que Pedro ñee ocote ra.

³⁷ Mbia ia eã tuchite que Pedro cheẽ andu ra. Ñee ngue Pedro je ra. Pedro resenda je abe. —¿Mañi ure ra equia re? i que Pedro je ra. Jesús chimbaaquiato ja je. ³⁸ Pedro que echeẽ sibishorõ nda. —¡Jẽicuã si jẽhui rã jẽ! Sã bautizar ure jẽje Jesucristo riĩ. Dios jẽicuã mbutiã sacua. Aquere ra Dios Espiritu Turã mondo jẽje. ³⁹ “Espiritu Turã nda amondo jẽje. Jendiiri je abe ra amondo. Ishonda je abe ra amondo. Sechiirabo ja je ra Espiritu Turã amondo”, i que Dios ñee nande je ra, i que Pedro Dios cheẽ nenei nda. ⁴⁰ Eĩ ngue Pedro ñee ocote mbia je ra. Ñee turã ngue ee ra. —Mbia icua achõte eriqui ibi jenda ã. Quiachã ja equia Dios si ã. Uquĩ si jẽhui chõ. Jẽ abe jẽquiachã sacua Dios si, i que Pedro mbia mbaaquiato ra. ⁴¹ —¡Ae beite jẽ! i que mbia tubiriã Pedro cheẽ andu ra. Uquĩ j e que bautizar i ra. Aque mose que mbia tres mil Jesús isi ra. ⁴² Uquĩ abe que ñumunua nua nguia Jesús quiato ataque rese ra. Jesús chimbaaquiato ñee ñee mose mbia je. Ñumunua nua ñee Dios je. Etura mbei que eriqui nyue ra. Mbichae que eu eu quia ndua ndua Jesús rese ra.

Jesús icuasa siqui turã nyue

⁴³ Mbia que siquiche ja Dios si ra. Jesús chimbaaquiato que Dios mbuquirãcuã nda. Nyebe mbia mae sayã naa naa tuchi nguiã. ⁴⁴ Jesús icuasa que ñumunua nua mbei quia ra. Abei tuchi que eriqui nyue ra. ⁴⁵ Umbae je que eriqui vender i tuchi ra. Mbae isiquia que emee mee nguia mbaecha reã je cote ra. ⁴⁶ Ñumunua nua mbei que equia Dios chuchúaa ra. Quiaru quiaru que equia nyiese uchuchúaa ra. Dios riĩ ngue eriqui ñee turã turã nyue ra. Eya tuchi que eriqui Dios rese ra. ⁴⁷ Dios riĩ ngue eriqui ñee turã turã nda. Mbia ataque que ñee turã turã nguia Jesús icuasa riĩ nda. Jesús icuasa que Dios mbeta mbeta bei quia ra.

3

Ecuatayã mbucherõ

¹ Emo mose que Pedro nyoĩ quia Dios chuchúaa ra. Juan ndese. Tenda nyese mose. Hue tenda bei que mbia riqui ñee ñee Dios je ra. ² Huee que amei mo ngatayã ndiqui bei huee ra. Echaacuquia mosenda bei eiquieĩ icua. Mbia que ecuruchoi choi bei quia huee ra. Dios chuchúaa. Eiquesa turã, i que hue eiquesa je ra. Huee que eriqui ecuatayã miĩ miĩ mbei eiquesa jii ra. Ache ache i sacua mbia ique mose Dios chuchúaa. ³ Dios chuchúaa nda Pedro ique nguiã Juan ndese chã. Ecuatayã ngue mae erese ache ache i ee ra. ⁴ Pedro que nguesa mbui reã mae erese ra. Juan abe. —¡Ure rese emae jẽ! i ecuatayã je. ⁵ Eandu mose que mae erese ra. —Mbae mo nda emee seje reae, i mae nguiatu erese. ⁶ Pedro que ñee ee ra. —Mbae isiquia eã ndaque sembae. Mbae mo nda asaã ndeje. Jesucristo quirãcuã nembucherõ na mbucuata. Ehuã na ngata. Nazaret jenda quirãcuã nembucherõ na, i que Pedro ee ra. ⁷ Pedro que eo isi ra. Mua ngue eo rese ra. Aque mosebe que ei nyerõ nda. Eiquieĩ abe nyerõ eo isi ruibe. ⁸ Ecuatayã ngue juã asi cote ra. Ngata cuata que ra. Ique Dios chuchúaa uquĩ ndese. Eya tuchi que ra. Oo oo tuchi que ra. Ianye, i tuchi que equia Dios je ra. ⁹ Mbia que mae ja u ecuatayã ngata rese ra. Ñee turã mose Dios je que mbia nyiisaquia u echeẽ ndese ra. ¹⁰ Mbia que nyurui ra u mae erese ra. Mbia que eicua ja ra. —Ecuatayã ño aque re. Ache ache i beite que equia Dios chuchúaa, ae chõ co re, i que mbia nyurui ra tuchi mae erese ra.

Pedro ñee oco judíos je

¹¹ Embucherõ ji que Pedro chiba isi isi quia ra. Juan chiba abe no. Mbia que ngaẽ ucha mae erese ra. Nyurui ra erea. Portal de Salomón, i eiquesa je. Huee que echi ra. ¹² Pedro que mae mbia chumunua ndese ra. Ñee ngue ee ra. —¿Mbaerã jẽingo nyurui rate mae erese re, Israel jenda? ¿Mbaerã jẽingo nyurui rate mae urerese re? Ure ae eã ño Ecuatayã urembucherõ nguiã. Urequirãcuã eã Ecuatayã mbucuata nguiã. Dios quiarei uquiracuã mee ee embucherõ. Urecuata turã embucherõ eã nguiã. ¹³ Dios rei nanderu rerecua bei. Abraham. Isaac. Jacob. Uquĩ nderecua bei Dios. Dios ñee turã mbei nguiiri niĩ. Jesús riĩ.

Ae que jemee icuã mbia je eiquia sacuã nda. “Jesús tambui”, i mose Pilato, ùquĩ mose que jëisi quiatu quiatu chõchĩ nguiã. ¹⁴ “Embui”, jenyee eã ñochĩ ngue Jesús turã ñii nde. “Embui”, jenyee chõchĩ ngue mbia iquiasa riĩ nde. ¹⁵ Eĩ jenyee chõchĩ ngue mbia mingosa iquia nguiã. Dios que embuquera si ra. Equera si rese que uremae nda. ã ureico mbia mbiirandu randu equera rese ã. ¹⁶ ã jengu mae Ecuatayã ndese ã. Jë Ecuatayã jëicuate resë. Jendesa rae que Dios embucherõ nda. Ure Jesús ureicuate quia ã. Nyebe Ecuatayã mbuquirãcuã nguiã.

¹⁷ Jëaquiatuã ño Jesús jëiquia nguiã, Seresenda. Jenderecua aquiatuã ño Jesús iquia nguiã no. ¹⁸ Dios quia que ucheẽ mbuchecuasa mbucheẽ cose ra. Cristo riĩ embucheẽ. “Mbia icuã icuã nda Cristo je. Cristo mbasi mbasi rae”, i que embuchecuasa cose ra. Ûquĩ ñee nguire quia Cristo mbasi mbasi nguiã cote. ¹⁹ ¡Jëicuã si jëhui chõ jë! Jemba rã Dios icha cuti. Dios jëicuã mbutiã sacuã. Eĩ jenyee mose ra Dios jembiate cote. ²⁰ Dios ra Jesucristo mbuquichi imbu cote. Ae que emii jenderecua rã cos e ra. ²¹ Namõ ño nda Jesús riquichõ ibate. Dios mbae mbitirõ ja mose ra eru cote. Eĩ ngue Dios cheẽ mbuchecuasa ñiinda ñee nda. ²² Nyebe Moisés ñee nguiã nanderu cose ndare je. “Dios ra nanderesenda mo isi. Dios cheẽ mbuchecua sacuã. ¡Ae cheẽ nda jemumba jirichĩ jë! ²³ Echeẽ mumbasa ra Dios mbuquichã nyesi”, i que Moisés ñee nda. ²⁴ Dios cheẽ mbuchecuasa ja que mbia mbiirandu randu mbae riĩ nda. Ae riqui nyecua namõ ã cote. Samuel nane ngue mbia mbiirandu randu ã ñii nda. Samuel nduinda ja abe que embiirandu randu ã ñii no nda. ²⁵ Jëje chõ Dios cheẽ mbuchecuasa ñee ñee nguiã. “Seturãte ra jendiirĩ ja je”, i que Dios ñee nanderu ñiinda je ra. Jëje abe Dios ñee. Ucheẽ nda embuchebi eã. Dios que ñee Abraham je cose ra. “Nderiirĩ mo nda mbia mbia ja tuchi quia. Ibi jenda ra embia ja tuchi”, i que Dios Abraham je ra. ²⁶ Dios que nguiirĩ mondo íbii cote ra. Jë nane je que embu ra. Jembuturã sacuã. Jëhui sacuã jëicuã si, i que Pedro judíos je ra.

4

Ererecua paama i ja Pedro je, Juan abe je

¹ Sacerdotes que ngaẽ cote ra. Pedro ñee mbei mose mbia je. Juan abe ñee mose ee. Dios chuchua raarõsa abe que tu erese huee ra. Saduceos mo abe que ngaẽ erese huee ra. ² Ûquĩ paama i ja Pedro je. Juan abe je. Mbia mbaaquiatu quiatu mose chõ ngue paama i ra. —Jesús que quera si manonde ra. Eĩ nda mbia abe quera si, i que Pedro ee nyii ra. Nyebe ùquĩ ndiqui nguiã paama i ee. ³ Nyebe eisi suruchoi nguiã policíaa. Eresaitõ ño emingue nguiã tarõ. —Isamami nguia nda nandechandu nguiã, i que ererecua nyue ra. ⁴ Mbia tubiriã Dios cheẽ ñandu erenei nenei mose. Eatate que Jesús icua ra. Jesús icuasa rei cinco mil hombres.

⁵ Isamami ngue mbia tubiriã ñumunua nda. Judíos rerecua que ngaẽ ñumunua huee ra. Amei abe que ngaẽ ñumunua erese ra. Embesasa abe que ngaẽ ñumunua erese no nda. Ûquĩ ja que ñumunua Jerusalén nda. ⁶ Anás abe que chĩ erese ra. Ae rei sacerdote rerecua. Caifás abe que chĩ erese ra. Juan abe no. Alejandro abe no. Sacerdotes nducucha ja que chi ñimbaacua ra. ⁷ Pedro que emii mbia ite re ra. Juan ndese. Mbia ñee ee cote. —¿Aba jembirãcuã nde? ¿Aba jembirãcuã nguia ecuatayã mbucuata nonde re? i que ee ra. ⁸ Espíritu Turã ngue Pedro mbucheẽ cote ra. —Tacheẽ jëje, mbia rerecua. Tacheẽ jë abe je, Amei. ⁹ “Ecuatayã ndese urembiirandu rã”, jenyee chõ nguiã ure je ã. “¿Aba jembirãcuã ecuatayã mbucherõ nonde re?” jenyee chõ nguiã ure je ã. ¹⁰ Tacheẽ nyecua jëje. Sã mbia ureandu ja. Sã Israel jenda ureandu ja. A ecuatayã embucherõ ji riqui jendesa rae a. Jesucristo quirãcuã nguiarei embucherõ. Aque sí quirãcuã ño ñene. Ae jëiquia. Ae jembucha ira rese. Ae Dios mbuquera si. Aque quirãcuã ño ñene. Nazaret jenda quirãcuã. ¹¹ ñhuaẽ nandechirirõ na ño Jesús re. Sañi nandeico mae mae ñhuae nandechirirõ ndese no. “Aque chõ ndei que eturã nda”, sañi nandeico erirõ i no. Eĩ nyee ra mbia Jesús ndiichã i no. Mbia ra eisi tuchi nguerecuarã cote. Jesús momboi isi.

Eisire rocoĩ nyii. ¹² Aba mo eã ndei nanderirõsa nandeicuã si. Jesús ae nanderirõ nguiã nandeicuã si. Dios aba mo abe mbu eã nguiã mbia rirõ sacua huiicuã si. Jesús ae ñene, i que Pedro ra.

¹³ Mbia rerecua nyuruira Pedro cheẽ andu. —¿Mbaerã eriqui siquicheãte ñee nde? Papel ndesenda eã ndaque. Mbia ataque rã ño ndaque, i que ererecua nyue ra. Pedro rĩ. Juan ñii. —Jesús resenda quia eriqui reaẽ. Nyebe eriqui siquicheãte ñee nde, i nyue cote. ¹⁴ Hue que embucherõ ji riqui huee ra. Nyebe mbia rerecua ñee icuã aroneate eriĩ. ¹⁵ Ererecua ñee ja cote. —Sã Pedro choi usẽ taicuee. Juan abe no. Nandechẽ nandechue nande ae, i que ererecua nyue ra. ¹⁶ —¿Mañi nande ra Pedro je re? ¿Mañi nande ra Juan abe je re no? Pedro chimbucherõ ndese mbia riqui jirandu randu jate ã. Jerusalén jenda riqui jirandu randu jate ã no. “Mbucheroã ngue ra”, nande aroneate. ¹⁷ Nandembusiquiche rã no. Ñee ñee siã nda equia Jesús rĩ ña. Mbia nda jiranua nguia mámbii chã. Jesús rese chã. “¿Jesús cheẽ nda jēsenei senei sichĩ jẽ!” nande rã ee, i que ererecua nyue ra. ¹⁸ —Jenyu, i Pedro je cote. Juan abe je. —¿Mbia ra jembaaquiatuchi Jesús rĩ jẽ! ¿Jesús ra jēsenei seneichiĩ mbia mo je jẽ! i rei que ee ra. ¹⁹ Pedro que echeẽ sibishorõ nda. Juan ndese. —¿Aba cheẽ nguia ra aba mumbayã nguia re? ¿Jeñee nguiatu ra aba mumbayã nguia re? Dios cheẽ aba mumba aroneate. ¿I jẽje re? ²⁰ ¿Mañi nda aba umaesa reneia nde? ¿Mañi nda aba uchiandu abe reneia ne no? i que Pedro ee ra. Juan abe. ²¹ Ererecua ñee icuã Pedro je. Juan abe je. —Nandembusiquiche nandechesi, i raque. Hui chõ ngue esi cote ra. Embasiã mondo cote. Ererecua ireite mbia tubiriã si. Nyebe eiruã nuã eã nguiã. Pedro ecuatayã mbucherõ mose mbia ñee turã turã ño nguia Dios rĩ neaẽ. Nyebe ererecua ireite riqui nguiã esi. ²² Ae Dios mbucherõ nae, aque amei. Cuarenta años que ae ra.

Urembusiquicheã, i equiato Dios je

²³ Mbia rerecua hui ja Pedro si. Juan abe si. Nyoĩ nguesenda mbiirandu ja mbia rerecua cheẽ ndese. Amei ñee ndese. Sacerdotes cheẽ ndese. Nguesenda mbiirandu ja. ²⁴ Eresenda eandu mose que ñee ja Dios je ra. Ñee nyecha ee. —Dios, urererecua tuchi nde. Nde rei mbae aosã. Ibei aosã. Ibi aosã. Ama abe aosã no. ²⁵ Sã David erembucheẽ nderimba cose no. Sã ei erembucheẽ no:

¿Mbaerã ño mbia pare pare i ja re?

¿Mbaerã mbia riqui ndua ndua chõõnote mbae mo ndese re?

²⁶ Ibi jenda rerecua ja rei eicuã Dios je.

Mbia rerecua ja ñumunua icuã Dios je.

Ñumunua icuã ja eriirí abe je no. Cristo je,

sã David i cose no. ²⁷ Eĩ si tuchi mbia rerecua quia ñumunua icuã Jesús je co. Nderiirí turã je co. Herodes. Poncio Pilato. Judíos. Judíos eã abe no. Ñquĩ ja que siqui icuã icuã nguia Jesús je ra. Ndechiirabo raque Jesús. ²⁸ Eĩ ere que ñee cose, eĩ si eicuã nguia ã namo. ²⁹ Echiisaquia echeẽ icuã ndese, Urererecua. Nandembusiquiche, i tuchi equia ure rĩ ã. Urembusiquicheã na, Urererecua. Urembusiquicheã ndechẽ nenei nenei sacua. ³⁰ Ndequirãcuã embu ure je. Mbia rasi mbucherõ cherõ sacua. Mbia mae sayã naa naa sacua. Jesús rĩ. Nderiirí turã ñii, i que Pedro resenda ñee nyecha Dios je ra. ³¹ Ñeende Dios je que ibi nyere ee ra. Ñumunuásaa que ibi nyere mbia je ra. Espiritu Turã ngue ique tuchi echiangui re ra. Esiquicheãte que mbia mbiirandu randu Dios cheẽ ndese cote ra.

Jesús quiato abeichiã eã

³² Hue rĩ ja Jesús icuasa ndua ndua checha. Eicuasa tubiriã. Ndua ndua ja. —Sembae ae chõ co re, i eã emo umbae je. —Nandembaerã ja chõ ã nde, i umbae ja je nyue. ³³ Jesús chi mbaaquiatu que mbia mbiirandu randu tuchi Jesús quera resera. Jesús que uquirãcuã mee mee nguia uchimbbaaquiatu je ra. Dios que siqui tuchi erese ra. ³⁴⁻³⁵ Mbae tia eã ngue eriqui Jesús icuasa mo je ra. Tuchuacha que vender i jaaja uchuchua je ra. Ibicha abe que vender i jaaja umbae ibi je no nda. Mbae isiquia que emee mee Jesús chimbbaaquiatu je

cote ra. Jesús chimbaaquiato que emee mee mbaecha reã ja je cote ra. Nyebe mbae tiã eãte riqui nguiã emo je. Jesús quiato mo je. ³⁶ Sã José no. Bernabé, i Jesús chimbaaquiato José je. Mbia mbiasa, i chõ nguiã Bernabé i. Ae rei Chipre jenda. Levita mo ngue ae ra. ³⁷ Ae rei ibicha. Ibi umbae je que vender i ra. Mbae isiquia que emee Jesús chimbaaquiato je cote ra.

5

Ananías ñee ñooño

¹ Ananías, i que emo je ra. Safira, i que eninisi je ra. Ñquĩ ngue vender i ibi mo je ra. ² —Mbae isiquia ataque nandembuchimi nandembaerã, i nyue. Eataque que emee Jesús chimbaaquiato je cote ra. Eninisi abe que eicua ja ra. ³ Pedro que ñee Ananías je ra. —¿Mbaerã Satanás ndiqui ique ndechiangui re re? ¿Mbaerã erecheẽ ñooño Espíritu Turã je re? ¿Mbaerã ño mbae isiquia ataque erembuchimi nde? ¿Mbaerã ño ibi ribishoronda erembuchimi nde? ⁴ ¿Mbaerã ño ere? Ibi rei nembae vender i nonde. Mbae isiquia abe rei nembae. Mbia je rocoĩ erecheẽ ñooño chĩ nde. Dios je chõ erecheẽ ñooño nguiã, i que Pedro ra. ⁵ Ananías eandu mose que esi ngoi mano nda. Eandusa que siquiche ja ra. ⁶ Acuanĩndu mo ngue ngaẽ eraaque uma nda. Nguruchoi que nyati ra.

⁷ Emo mose jiri que mano je ninisi ru ra. Tres horas. Jiranuãte que ngu rese ra. ⁸ Pedro que ñee ee ra. —¿Manya rei ibi ribishoronda re? ¿Nderu ibi ribishoronda queru ja rei re? i que Pedro ee ra. —Ae. Ñquĩ ja chõ nyeresẽ, ichõĩño ngue eninisi Pedro je ra. ⁹ Pedro ñee ee cote. —¿Mbaerã ere? ¿Mbaerã jendua nduachĩ ñquĩ ndese re? Jeñee ñooño chĩ nguiã Espíritu Turã je. Ae nderu curuchoi nyati nae, ñquĩ nyi nderaarõ arõ a. Eiquesa ji a. A ecuaẽ ndererao sacua a, i que Pedro ee ra. ¹⁰ Pedro cheẽ mose tuchi que esi ngoi mano nda. Ngu rã si. Pedro resa rae mano. Acuanĩndu que ique ja eraaque rea ra. Nguruchoi que nyati ra. Eru atiquia jii que eruruchoi nyati ra. ¹¹ Jesús icuasa que siquiche jate ra. Eandusa abe que siquiche jate no nda.

Mbia mae sayã

¹² Jesús chimbaaquiato que Dios quirãcuã teacuquia cuquia mbia je ra. Mbia mae sayã ngue esaã saã nguia mbia je ra. Milagros, i que ñquĩ je ra. Jesús icuasa que ñmunua nua ja quia eiquésaa ra. Portal de Salomón, i que eiquesa je ra. ¹³ Jesús icuasa riĩ ngue mbia ñee turã ja quia ra. Mbia ataque que siquichete ra. Nyebe ñmunua eã nguiã erese. ¹⁴ Jesús icuasa tubiriãt e que cote ra. Hombres tubiriã. Mujeres abe tubiriã no. ¹⁵ Erasi abe que mbia curuchoi choi quia ñeenda jie ra. Huee que eriqui eno eno ngua ye ra. —Sã Pedro aĩ ño ubi ubi erasi rese, i que mbia ñee Pedro ucua mose ra. ¹⁶ Jerusalén ndurubinda abe que ngaẽ ngaẽ nguia ra. Erasi rurucuaẽ cuaẽ Jerusalén. Aba checuayã nyireco abe que ecurucuaẽ cuaẽ nguia ra. Dios que embucherõ cherõ ja quia ra.

Jesús quiato tarõ policíaa

¹⁷ Sacerdote rerecua que paama i ra. Saduceos mo abe que chi erese ra. Ñquĩ abe que paama i no nda. ¹⁸ Nyebe que Jesús chimbaaquiato isi icua nda. Tarõ ngue policíaa ra. ¹⁹ Isa que ibatenda mo nguichi ee ra. Angel. Etaronda que embuquiata ra. Jesús chimbaaquiato que equerao itaicuee ra. Ñee nonde ee. ²⁰ —Dios chuchúaa jëso. Mbia je mbiirandu randu tuchi Dios cheẽ ndese. Dios cheẽ ndei aba mingosa. Aque rese mbia jembiiirandu randu, i que ibatenda Pedro je ra. Juan abe je. ²¹ Jesús chimbaaquiato eandu mose que echoi Dios chuchúaa ra. Mbia mbaaquiato quiato que echoi ra. Isamamimbe cote. Isamamimbe echoi mbia mbaaquiato. Sacerdote rerecua que “jenyu” i mbia rerecua ja je ra. Sacerdote resenda abe. Amei je abe ñee. Ñmunua ja u nyiese. Ñee ngue policíaa raarõsa je cote ra. —Jëso policíaa. Jesús chimbaaquiato jendurã ure je, i rei que ee ra. ²² Ecuasẽ mose policíaa que Jesús chimbaaquiato oreã ño ee ra. Ae nyebi chõ ecuaẽ nguiã sacerdote rerecua mbiirandu. Ñee ee. ²³ —Puerta ãtã ngue chĩ ndei nguiã ure je. Soldados ngue chi rei nguiã itaicuee. Eraarõ ndaque. Ureequia rei ngue re. Eoreã

ngue ra. Jesús chimbaaquiato oreâte que ure je ra, i que ra. ²⁴ Sacerdote rerecua que nyuruira eandu ra. Dios chuchua raarõsa abe nyuruira eandu. —¿Mañi mañite equia re? i que u ñee ñee nyue ra. ²⁵ Emo ngue tu ñee ee cote ra. —Huee que jenyitarõ nyi Dios chuchúa ra. Mbia mbaaquiato quiato, i que embiirandu ra. ²⁶ Eandu mose que Dios chuchua raarõsa nyoï erea ra. Nguesenda rese echoï erea. Curucuaẽ ja nguerecua je. Curucuaẽ turã. —Mbia tubiriã nda sita mombo mombochĩ nande je, i ñene. Nyebe eicuã eã ee.

²⁷ Jesús chimbaaquiato que ecurucuaẽ mbia rerecua je ra. Sacerdote rerecua que ñee ee cote ra. ²⁸ —“¡Mbia ra jembiiirandu randuchĩ Jesús rese jê!” ure rei que jêje. Urecheẽ jemumba chõchĩ. Jerusalén jenda ja jembiiirandu randu chõchĩ nguiã. “Jesús iquiasa chõ ñquĩ nde”, ¡jenyechĩ nda ure riĩ jê! i que sacerdote rerecua Jesús chimbaaquiato je ra. ²⁹ Pedro que echeẽ sibishorõ nda. Nguesenda rese echeẽ ndibishorõ. —Dios cheẽ nguia aba mumba aroneate nguiã. Mbia cheẽ nguia nda aba mumba jiri nguiã ña. ³⁰ Jê nguia Jesús jembucha nguiã ira rese. Eiquia sacuaã. Dios que embuquera si ra. Nanderu rerecua que embuquera si ra. ³¹ Dios que nguiirĩ mingo mbia rerecuarã tuchi cote ra. Ujii bei que emingo ra. Mbia rerecuarã. Mbia rirõ sacuaã eicuã si. Israel jenda mbui sacuaã huiicuã si. Dios eicuã mbutiã sacuaã esi. ³² Ñquĩ ndese que uremae ja ra. Nyebe ureico nguiã mbia mbiirandu randu ã. Espiritu Turã abe mae ja erese. Nyebe a e abe riqui nguiã mbia mbiirandu randu co. Dios quia Espiritu Turã mee mee nguiã ucheẽ mumbasa reã je, i que Pedro ra.

³³ Ererecua que paama i ja Pedro cheẽ mose ra. Nyebe eriqui nguiã eiquia ja serĩte. ³⁴ Fariseo mo abe que chĩ erese ra. Gamaliel, i que ee ra. Ae abe que ererecua ra. Mbia chiicua jat e que ae ra. Mbia mbaaquiato quiatusa que ae ra. Dios cheẽ nenei neneisa que ae ra. Ae que juã ñee nda. —Jesús chimbaaquiato jemondo mbiirĩ conosẽ itaicuee, i que ra. ³⁵ Ñee ngue ererecua uataque je cote ra. —Tacheẽ jêje, Israel jenda. ¡Jendua tuchi jê! ¡Jëocochĩ nda Jesús chimbaaquiato rese jê! ³⁶ ¿Teudas si jêtesarei re? ¿Jendua eãte quia erese re? Teudas quiato ucuasu saã saã nguia resẽ. Erimbarã tubiriãte chee. Cuatro cientos chee erimba. Mbia Teudas iquia chee. Teudas mano nyee. Erimba que saseĩ saseĩ ja chee. Erimba que ua ja ra. ³⁷ Aquere que Judas abe riqui ra. Galilea jenda. Censo mose. Mbia que siqui jate erui no nda. Erimbarã. Ae abe que mano cote ra. Erimba abe que saseĩ saseĩ nda. Erimba que ua ja no nda. ³⁸ Nyebe ã jêteachõ. Jesús chimbaaquiato jêteachõ. Sã ae ae quia ua, Dios siquiã mose erese. ³⁹ Dios quirãcuã siqui mose erese ra nandesiquisã aronea. ¿Mañi nande ra eriquisã nde? ¡Jesús rimba nandeteachõ ño jê! Dios quirãcuã nguia siqui rei erese. Dios je ra nandeicuã abareâte, i que Gamaliel ra.

⁴⁰ Gamaliel cheẽ ndui si chõ ngue ererecua siqui ja nguiã cote. —Jenyu, i nguiã Jesús chimbaaquiato je cote. Iruã nua cote. —¡Mbia je ra Jesús cheẽ jêseni senei sichĩ core jê! i rei que ee ra. Ererecua que hui esi cote ra. ⁴¹ Jesús chimbaaquiato que nyoï mbia rerecua recha cote ra. Eyate que nyoï ra. —Jesús riĩ ño ureiruã nua nguiã, i que ra. Eya tuchi chõ ngue ra. ⁴² Mbia que embaaquiato quiato bei ra. Jesucristo riĩ mbia mbiirandu randu bei. Mbia chuchua que embuchesea sea quia mbia mbiirandu randu Jesús riĩ nda. Dios chuchúa abe mbia mbiirandu randu.

6

Mbia siete irabo mbia mbuquiaru sacuaã

¹ Jesús quiato tubiriãte que cote ra. Ae griego cheẽ saã nguia, ñquĩ ngue paama i ra. Ae judío cheẽ saã nguia, ñquĩ je que paama i ra. Jesús quiato ja raque. —Urerenda eru checha ja ngue jembuquiaru icuaã icuaã ñochĩ nguiã, i que griegos judíos je ra. ² Nyebe Jesús quiato rerecua mbia munua nguiã. Jesús quiato munua ja. Ñee sacuaã ee. —Ñ ureico Dios cheẽ nenei nenei mbei mbia je ã. Urehui aronea tuchi quiarei Dios cheẽ si. Mbia urembuquiaru quiaru aroneate. Dios cheẽ nenei nenei ndocoĩ. ³ Nyebe Jesús quiato siete chõ jêirabo. Mbia mbuquiaru sacuaã. Mbia chiicua siete chõ jêirabo. Hombres aracua chõ

jëirabo. Espiritu Turã ndesenda tuchi chõ jëirabo. Sã ùquĩ ño mbia mbuquiaru quiaru quia. ⁴Ure quiatu ra urecheẽ mbei quia Dios je. Ure quiatu ra Dios cheẽ uresenei senei mbei quia mbia je, i que Jesús quiato rerecua ra. ⁵—Coche ñene, i jat e que Jesús quiato ra. Nyebe que siete irabo ra. Esteban irabo. Ae rei Jesús quiato tuchi. Ae rei Espiritu Turã ndesenda tuchi. Felipe. Prócoro. Nicanor. Timón. Parmenas. Nocolás. Ûquĩ ja que eirabo ra. Nicolás ndei Antioquía jenda. Judío eã ngue ae ra. ⁶Curuchoi ja que Jesús quiato rerecua je ra. Jesús quiato rerecua que o chono ñono ja ùquĩ ãquĩ arõ nda. Ûquĩ siete ãquĩ arõ. Ñee ngue Dios je cote ra. ⁷Mbia tubiriã ngue Dios cheẽ isi isi quia ra. Jesús quiato tubiriã tuchi que mbia Jerusalén jenda cote ra. Sacerdote tubiriãte abe que Jesús quiato cote ra.

Mbia icuã tuchi Esteban je

⁸Dios que siqui tuchi Esteban ndese ra. Dios quirãcuã ngue siqui tuchi erese ra. Nyebe eriqui nguiã mbia mae sayã naa naa tuchi mbia je. ⁹Mbia emo emo ngue paama i Esteban je cote ra. Esclavos Libertados, i que mbia chumunuasa mo je ra. Hue jenda que paama i ee ra. Cirene jenda abe no. Alejandría jenda abe no. Cilicia jenda abe no. Asia jenda abe no. Ûquĩ jate que paama i Esteban je ra. ¹⁰Ûquĩ ngue Esteban ñee sobeishĩ aroneate quia ra. Espiritu Turã nguia Esteban mbaaracuate nguiã. Espiritu Turã nguia Esteban mbuch eẽ aquiature nguiã. Nyebe ùquĩ ndiqui Esteban ñee ndibishorõ aroneate. ¹¹Paama isa que mbae isiquia mee mbia mo je ra. Ñee ñooño nonde Esteban nii. —Esteban ngue ñee icuãte Moisés riĩ nda. Esteban ngue ñee icuãte Dios riĩ no nda, ichõiño nonde Esteban nii. ¹²Ñee ñooño je que mbia mbiicuãte Esteban je ra. Amei abe mbiicuãte Esteban je no. Embesasa abe mbiicuãte Esteban je no. Nyebe mbia Esteban isi suruchoi nguiã ererecua je. ¹³Ñee ñooño je que ñee icuã si Esteban nii huee no nda. —¡Esteban ngue ñee icuãte quia Dios chuchua riĩ nda jê! ¡Dios cheẽ nii abe que Esteban ndiqui ñee icuãte ra jê! ichõiño Esteban nii. ¹⁴—¡Esteban ñee ngue urechandu ra jê! “Jesús ra Dios chuchua mbucoi. Moisés cheẽ nda Jesús mbutiã”, ¡i que Esteban nda jê! ¡que ñee ñooño ererecua je ra. ¹⁵Mbia que mae ja u Esteban ndese cote ra. Ererecua abe que mae ja u erese ra. Ibatenda nduba rã tuchi quiarei Esteban. Eruba nininya tuchi quiarei ùquĩ mose.

7

Esteban ñee mbia je

¹Sacerdote rerecua que ñee Esteban je cote ra. —¿Mbia ñee ñooño nguia nderiĩ nde? i Esteban je. ²Esteban ngue ñee oco ee cote ra. —Tacheẽ jêje, Seresenda. Tacheẽ jêje, Amei. Dios Turã ngue nyecua u nanderu Abraham je ra. Abraham siqui mose Mesopotamia. Oso nonde Harán. ³Dios que ñee Abraham je ra. “Ibi mo nguia eso. Nderecua esecha. Nderesenda abe esecha ja. Ibi mo tateacuquia ndeje. Huee eso rã. Huee quia tereico”, i que Dios ee ra. ⁴Abraham ngue oso nguecua recha ja ra. Ibi Caldea recha ja. Oso ibi mo. Harán, i que hue ibi je ra. Emo mose que eru mano ee ra. Aquere que Dios Abraham ndurucuaã aa ra. A nandeico a. Aa que erurucuaã nda. ⁵Dios que ibi mo mee eã Abraham je ra. Ibi boque ñetẽ mo mee eã tuchi ee. “Ibi tamondo nderiirĩ mbaerã. Ndetiã mose ra amee nderiirĩ je”, i que Dios ee ra. Abraham nguiirĩ ndea eã mose qu e Dios ñee ee ra. ⁶“Nderiirĩ nda siqui ja rei mbiamo ndese. Ndetiãmbaa. Mbiamo ndécuaa ra eriqui bei. Mbia icuã tuchi ra eriqui nderiirĩ je. Mbia rimbarã nda nderiirĩ. Cuatro cientos años nda eriqui mbia rimbarã”, i que Dios Abraham je ra. ⁷“Nderiirĩ mbuquiei quieisa ra ambasi mbasi. Ûquĩ mos e ra nderiirĩ cuaẽ usẽ aa. Aa ra ñee ñee turã seje aa cote”, i que Dios ra. ⁸Dios que ñee Abraham je ra. Abraham ngue Dios cheẽ ñanduchõ eã nda. Nyebe Dios circuncisión ndeacuquia Abraham je cote. Erãcoĩ ire ai o ji je chõ eriqui nguiã circuncisión, i ùquĩ je. Dios cheẽ si embutesareiã sacua ndei circuncisión. Nyebe Abraham circuncisión saã nguiirĩ je. Eitãquieĩ mose. Ocho días mose. Isaac, i que eriirĩ je ra. Isaac cuasu mose que ae abenguiirĩ tea ra. Jacob, i que eriirĩ je ra. Isaac abe

que circuncisión saã nguiirĩ je no nda. Embutesareiã sacua Dios cheẽ si. Jacob abe que nguiirĩ tea ecuasú mose ra. Ae abe que circuncisión saã nguiirĩ je no nda. Doce eriirĩ. Ūquĩ ndei nandei cose.

⁹ José, i que Jacob riirĩ mo je ra. José nongue que paama i ja José je ra. Nyebe José mee nguiã mbia rimbarã cote. Mbia que José isi suruchoi Egíptoo ra. Huee ab e que Dios riqui tuchi José rese ra. ¹⁰ Mbia icuã mose José je, huee que Dios riqui eraarõ tuchi ra. José ia eã eãte que eriqui ra. Dios embaaracua tuchi. Nyebe mbia rerecua turãte riqui nguiã ee. Faraón, i Egipto jenda rerecua je. Ererecuabi tuchi que José riqui ra. Nyebe emingo nguiã ererecuarã. Egipto jenda rerecuarã. Nyebe emingo nguiã uchuchua jenda rerecuarã. ¹¹ Emo mose jiri que mbae tiã mbia je ra. Mbia chiurã tiã ngue Egíptoo ra. Canaán abe mbia chiurã tiã. Nandei riãcuã ja que eriqui cose ra. ¹² Quiata a mbuae que Egíptoo ra. Jacob jirandu mose que nguiirĩ mondochoi erea ra. “Nandechiurã mo jëisi rã oso”, i que emondochoi Egíptoo ra. Aque ramo tuchi que eriirĩ nyoi Egíptoo ra. Jacob ndiirĩ ndei nandei ja. ¹³ Aquere que echoi si uchiurã ndea ra. Aque mose chõ ngue José nyecua nguiã ngõngue je cote ra. Nyeb e Faraón José nongue icua nguiã cote. ¹⁴ José que ngõngue mondochoi ngu rea cote ra. Jacob, i que eru je ra. “Nanderu jendu rã. Jeninisi abe jendu rã. Jendiirĩ abe jendu rã”, i que José ee ra. Curucuaẽ ja que ra. Setenta y cinco que mbia ra. ¹⁵ Eĩ ngue Jacob oso siri Egíptoo ra. Huee que eriqui bei ra. Mano nyee. Nandei ja abe que chi bei huee ra. Mano nyee. ¹⁶ Emo mose que mbia Jacob quiangue ruruchoi Siquem nda. Ibicua rie que eno huee ra. Ae Abraham isi ibi nyii, huee que equiangue no nda. Huee que nandei quiangue no nda. Ae ibi Abraham isi quia Hanor ndiirĩ si nae, huee que equiangue no nda.

¹⁷ “Cuatro cientos años nda nderiirĩ nyi bei Egíptoo. Aquere Ibi Canaán tamee ee”, i quia Dios Abraham je nyii reaẽ. Cuatro cientos años ua jiri mose que nandei tubiriãte cote ra. ¹⁸⁻¹⁹ Aque mose que emo Egipto jenda rerecua rã cote ra. Ae que jiranuã José rese ra. Nyebe ngue eriqui nguiã nandei mbiirĩ irĩ. Eicuã tuchi que eriqui nandei je ra. “Jendiirĩ itãquieĩ jësecha chõ. Sã ae ae mano ja”, i que ererecua nandei je ra. ²⁰ Aque mose que Moisés nyaacuquia ra. Diosbi tuchi que Moisés ra. Nyaacuquia ramo mose. Tres nyasi que esi embutiarõ nyecuayã nda. Mbia rerecua si. Eru abe siqui embutiarõ nyecuayã. Eitãquieĩ mose. ²¹ Nguereco checuayã aroneate chee que ra. Nyebe ererecua riirĩ ngasẽ nguiã ee. Isi turã ngue ra. Mbutiarõ ngue nguiirina nda. Nyucuaaque que ererecua riirĩ nda. Ae que Moisés itãquieĩ mbutiarõ cote ra. ²² Nyebe Moisés mbaaquiatu tuchi nguiã Egipto jenda rã si. Earacua tuchi que ecuasú mose cote ra. I tuchi que ra.

²³ Moisés que ndua tuchi uataque rese cote ra. “Taso rã israelitas rea”, i que cuarenta años mose cote ra. ²⁴ Oso que cote ra. Egipto jenda mo icuã icuã mose israelita mo je que Moisés si ngasẽ nda. Moisés que esiquisã nda. Iquia que ra. Egipto jenda iqia que ra. ²⁵ Moisés que ñee uchiangui re ra. “Sere senda ra seisi turã. Seicuate rae. ‘Dios chimbu chõ tu nguiã co. Urerirõ sacua a sí’, i ra seresenda seriĩ”, i rei ngue Moisés uchiangui re re. Eresenda que eisiã ñochĩ nguiã. ²⁶ Isamami nongue que israelitas mo icuã icuã nyue ra. “Tacheẽ turã ee. ĩ nda eturã si nyue”, i rei que Moisés ra. “¿Mbaerã jëicuã icuã ndiqui jenyue re? Nande ja chõ nyeresẽ”, i que Moisés ee cote ra. ²⁷ Ae rane eicuã icuã ndiqui nyue nae, aque que ñee icuã Moisés je ra. Moisés maña mondo. “¿Aba nemingo ererecuarã nde? Urereachõ ño ae”, i que ñee icuã Moisés je ra. ²⁸ “Ae ereiquia curi, ¿aque rã si ra seiquia re?” i que ñee icuã Moisés je ra. ²⁹ Ñ andu mose que Moisés si uchã nda. Ibimo. Madián, i que ibimo je ra. Huee que eriqui arete ra. Nguiirĩ nyeremo ngue etea huee ra.

³⁰ Huee que eriqui arete ra. Cuarenta años. Emo mose que esi turuquia rĩ nda. Ibi ibate jii que eriqui ra. Sinaí, i que hue je ra. Huee que ira ruri riqui sendi ee ra. Tata rendi mbirõ ngue ibatenda mo nyecua ee ra. Angel que nyecua Moisés je ra. Ira ruri rendi ite re que nyecua ee ra. ³¹ Moisés que nyuruira tuchi erea ra. Erurubi que mae tuchi erese cote ra. Dios que ñee ee cote ra. ³² “Dios chõ se re. Ndei rerecua chõ se re.

Abraham nderecua. Isaac abe rerecua no. Jacob abe rerecua no. Ūquĩ nderecua ja chõ se re”, i que Dios ra. Moisés que titi titi i ra. Siquichete que mae ndocoĩ erese ra. ³³ Dios que ñeembe ee ra. “Ndeiyao esirõ na. Seturã ño se re. Sésa ndeiyao esirõ. ³⁴ Serimba rese aico mae mbeite Egíptoo co. Mbia icuã tuchite ee. Mbia embasi mbasi beite. Amae mae mbeite que erese ra. Echeseo seo rese que aico mae mbei ra. A achu erirõ sacuã a. Tasirõ eicuã si cote. Eso Egíptoo. Taremondo Egipto cote”, i que Dios Moisés je cote ra.

³⁵ Dios que Moisés mingo mbia rerecuarã cote ra. Mbia rirõ sacuã Egipto si. Mbae icuã si. Mbia que Moisés isi sereã nea nyii ra. “¿Aba nemingo urererecuarã nde?” i que mbia Moisé je nyii ra. Ūquĩ sí je que Dios Moisés mondo si ra. Ererecuarã. Dios que tata rendi ite renda mbucheẽ Moisés je ra. ³⁶ Moisés que mbia mae sayã saã saã nguia nandei je ra. Mbia mae sayã tubiriãte que esaã saã nguia ra. Moisés que mbia curuchoi Egipto si cote ra. Curuchoi que Ama Ireĩ ndasa ra. Moisés que mbia quereco bei turuquia rui ra. Cuarenta años. Mbia mae sayã tubi riãte que esaã saã nguia ra. ³⁷ Amei mose que Moisés ñee mbia je ra. “Dios ra jemo irabo ucheẽ mbuchecua sacuã jêje. Seraanguia si ra eirabo. ¡Aque cheẽ nda jemumbachĩ jê!” i que Moisés israelitas je ra. ³⁸ Moisés bei chõ ngue ererecua ra. Moisés bei chõ ngue nandei quereco quia turuquia rĩ ndesẽ. Ae je chõ ngue ángel ñee ndesẽ. Mbia chumunua mose Ibi Ibate Sinaí. Ibatenda mo ngue ñee ñee u Moisés je ra. Moisés que ñee ñee nandei je cote ra. Ibatenda cheẽ mbuchecua ee. Mbia mingosa cheẽ nenei nenei mbia je. Nandei je. ³⁹ Nandei que Moisés cheẽ ñandu sereãte quia ra. Echeẽ mumba mumba. “Nyaso rei nyebi Egipto ae”, i que equia ra. ⁴⁰ Nandei que ñee ñee Aarón je ra. Moisés cutiã ngue ñee ñee ee ra. “Mbae raanguia mo esaã jiri ure je ae. Imagen. Urererecuarã. Ae je nda ureico ñee ñee jiri chã. Ae nda urererao Egíptoo chã. Moisés tiãte ure je cote. Ae urereru Egipto si. Maranguiti chõ esi urerecha”, i que mbia Aarón je ra. ⁴¹ Nyebe que Aarón ticuasú raanguia raã ee ra. Imagen. Nandei que mbae iquia iquia ticuasú raanguia je ra. Eroo que emi ticuasú raanguia jii ra. Mendi que ee cote ra. Mbia ia tuchi que uchiao rese cote ra. ⁴² Ūquĩ icuã tuchi que Dios je ra. Nyebe Dios hui nguia nandei si cote. Nandererecua, i chõchĩ mbia tenda je cote. Nyasi je abe no. Nyasi tata je abe no. Ūquĩ je chõ mbia riquichĩ ñee ñee. Ūquĩ mose que Dios ucheẽ mbu cote ra. Dios cheẽ mbuchecua que Dios cheẽ senei senei mbia je ra. Co rei embesa ji co:

Israelitas, ¿aba je jẽingo mbae roo mendi mendi cose re?

Jẽingo mose turuquia cuarenta años mose.

¿Seje chõ jẽingo mbae roo mendi mendi cose re?

⁴³ Tei. Seje eã ñene.

Jenyiao je chõ jẽingo mbae roo mendi resẽ.

Tuchua ñetẽ jendaso raso bei chõchĩ.

Mbae aingue raanguia resebe. Moloc, i ee.

Aque je chõ jẽingochĩ nguia ñee ñee.

Seje ñee ñee ndocoĩ.

Nyasi tata je abe jẽingochĩ nguia ñee ñee.

Nyasi tata rei Refán mbae.

Mbae raanguia jenyiao je abete que jẽingo ñee ñee nda.

Nyebe ra jaemondo jembae ibi si.

Babilonia ndobei ra jaemondo.

Mbia rimbarã nda jaemondo,

i que Dios nandei je cose ra. ⁴⁴ Nandei que chi arete turúquiaa ra. Aque mos e que nandei riqui tuchia rurucuata bei cose ra. Mbae ire que tucharã cose ra. Aque tuchiaqui re que mbia riqui ndua ndua Dios rese ra. Dios que tuchia nyao uquia Moisés je ra. “¡Eĩ ere chõ eao jê!” i que Dios Moisés je ra. Dios cheẽ ndui si tuchi que Moisés eao ra. ⁴⁵ Moisés manonde que Josué nandei rerecua cote ra. Ae que nandei curuchoi turuquia si cote ra. Ngasẽ nonde ibi mo je. Dios chimee, hue ibi je que ngasẽ cote ra. Nandei que guerra saã

saã hue jenda je ra. Dios que mbia mombo ja hue jenda ra. Aque mose que nandei riqui tuchia ruruchoi bei ra. Tuchia, i chõ nguiã mbae ire ao ji je. Aque tuchia que equereco bei quia ra. David abe mbia rerecua mose. ⁴⁶ Dios que siqui tuchi David rese ra. David que ñee ee ra. “Tuchia cuasu tasaã ndeje”, i rei ngue David Dios je re. Jacob nderecua rei Dios. ⁴⁷ David ndiirĩ nguiatu que tuchia saã Dios je ra. Salomón, i que eriirĩ je ra. ⁴⁸ Mbia rã eã ndei Dios. Dios siquiã tuchi chõ nguiã tuchiaqui re. Mbia chiaqui re. Dios cheẽ mbuchecuaa que Dios cheẽ saã nda:

⁴⁹ Se quia ererecua tuchi re.

Ibatenda rerecua abe rei se.

Ibi jenda rerecua abe rei se no.

¿Mañi nda mbia sechucharã ao re?

Equi re ra aicoã ndesẽ.

⁵⁰ Se quiatu que mbae achao ja resẽ,

i que Dios nandei je ra. ⁵¹ Jeñia icuã ñochĩ. Jëisayã ñochĩ. Espiritu Turã jëisiteã teã ñochĩ. Jendu rã si chõ Espiritu Turã jëisiteã teã ñochĩ. ⁵² Jendu icuã bei que eriqui Dios cheẽ mbuchecuaa ja je ra. Jendu que Dios cheẽ mbuchecuaa iquia iquia bei quia ra. Ibatenda Turã nda tu, ae i quia cose nae, ùquĩ abe que jendu iquia iquia quia cose resẽ. Ibatenda Turã tu mose que jemee ñochĩ nguiã mbia icuã je ra. Eiquia nonde que jemee ñochĩ nguiã mbia icuã je. ⁵³ Dios que ángeles mbu rei jêje ra. Ucheẽ nderu raque jêje. Jë echeẽ mumbayã sacua. Echeẽ ngue jemumba mumba bei chõchĩ nguiã, i que Esteban ñee oco tuchi ee ra.

Mbia Esteban iquia sita je

⁵⁴ Eandusa que paama i tuchi Esteban je ra. Esteban i quia serĩ. ⁵⁵ Espiritu Turã ngue siqui tuchi Esteban ndese ra. Esteban ngue mae tuchi ibei rese mbia paama i mose ee ra. Dios Turã ndese que mae ibate ra. Jesús rese abe que mae nda. Jesús que chí juã Dios ji ee ra. ⁵⁶ Esteban ngue ñee nda. —Jemae jë. Ibei nyiequia rese añ mae a. Huee mbia rucucha ñi juã Dios ji huee. Huee Jesús ñi juã Dios ji huee, i que Esteban nda. ⁵⁷ Mbia que tasẽ tasẽ tuchi paama i ra. Huisacua que emitao ja Esteban ñee si ra. —Nandecua recua erese, i que o oe Esteban ndese ra. ⁵⁸ Mbia que Esteban curuchoi sucha tubiriã si ra. Huee que sita mombo mombo erese ra. Sita mombo mombosa que huiirao mbui mbui acuanindu mo je ra. —Esarõ, i que ee ra. Saulo, i que eieirao raarõsa je ra. ⁵⁹ Mbia que sita mombo mombo Esteban ndese ra. Sita mombo mombo mose que Esteban ñee Ibatenda je ra. —Aque aso quia ndeje aque, Sererecua Jesús. Seisi cote, i que Esteban Ibatenda je ra. ⁶⁰ Ngoi que nguiã ndese cote ra. Tasẽ tasẽte que ñee mombo mombo ra. —Sererecua, ã icuã ndaque seje. ¡Erembasi mbasichĩ nda huiicuã ñi jë! i que Esteban Jesús je ra. Esteban ngue mano cote ra.

8

Saulo icuã Jesús quiato je

¹—Coche rei mano, i que Saulo Esteban mano mose ra. Aque mose tuchi que mbia icuã icuã tuchi Jesús quiato je cote ra. Jerusalén jenda. Jesús quiato que nyoĩ ja ñimbuchao Judea rĩ nda. Samaria rĩ abe que echoi ñimbuchao ra. Jesús chimbaaquiato achõ ngue chichõ Jerusalén nda. ² Mbia turã mo ngue Esteban nyati ra. Nyeseo tuchi que eati mose ra. ³ Saulo icuã tuchi que eriqui Jesús quiato je ra. —Jesús quiato tambutiã, i tuchi que Saulo quia ra. Nyebe eriqui nguiã mbia chuchua mbuchesea seate. Jesús quiato rea rea ererao sacua tarõ policiaa. Saulo icuã tuchi que eriqui Jesús quiato je ra.

Samaria jenda Dios cheẽ ñandu

⁴ Ae uchã nyoĩ quia Jerusalén si nae, ùquĩ ngue nyoĩ mbia mbiirandu randu tuchi quia Jesús rĩ nda. Mbia recua ja que eriqui nyoĩ nyoĩ mbia mbiirandu randu Jesús rĩ nda.

⁵ Felipe que oso Samariaa ra. Sucha tubiriã mo. Huee que eriqui mbia mbiirandu randu

Jesús rĩĩ no nda. ⁶ Dios que Felipe mbuquirãcuã nda. Mbia mae sayã ngue esaã saã nda. Mbia tubiriã ngue nyiisaquia tuchi quia echeẽ ndese ra. ⁷ Aba checuayã icuã ngue Felipe jea jea tuchi mbia si ra. Aba checuayã icuã ngue tasẽ tasẽ nguia hui mose mbia si ra. Felipe que mbia cuatayã mbucuata ja quia ra. Mbia umi sayã abe que embucherõ cherõ nguia ra. ⁸ Nyebe hue jenda ia tuchi sucha tubiriã jenda.

⁹ Huee sucha tubiriã ngue Simón ndiqui ra. Brujo que ae nyii ra. Ae que mbia mbiĩĩ irĩ tuchi quia nyii ra. Mbia Samaria jenda chiicua tuchi que ae ra. ¹⁰ Mbia que nyiisaquia tuchi quia Simón ñee ndese cose ra. Mbia riirĩ abe que nyiisaquia quia echeẽ ndese ra. —Dios mbuquirãcuã tuchi quia co, i rei que mbia Simón nĩĩ nda. ¹¹ Simón ngue mbia mbiĩĩ irĩ tuchi quia brujería je ra. Nyebe que mbia riqui nyiisaquia tuchi eres e nyii ra. ¹² Huee que Felipe Jesús renei nenei tuchi cote ra. —Dios ra mbia rerecuarã tuchi, i que Felipe quia hue jenda je ra. Ũquĩ mose que mbia Jesús icua icua tuchi ra. Bautizar i que mbia atate je ra. ¹³ Simón Brujo abe que Jesús icua cote ra. Bautizar i que ee ra. Felipe rui bei que eriqui cote ra. Felipe que mbia mae sayã saã saã nguia ra. Simón ngue nyuruira tuchi quia mae erese ra.

¹⁴ —Samaria jenda riqui Dios cheẽ isi isi tuchi ã, i que mbia Jerusalén jenda mbiirandu randu ra. Nyebe que Jerusalén jenda Pedro mondochoi Samáriaa ra. Juan abe mondo. ¹⁵ Ngasẽ mose que ñee Dios je ra. —Espíritu Turã emondo rã Jesús quiato a jenda je, i que Dios je ra. ¹⁶ Espíritu Turã iqueã mose hue jenda chiangui re que Pedro choi erea ra. Jesús rimbarã ño ngue mbia bautizar i nguia ee nyii. Espíritu Turã iqueã ño nguia echiangui re nyii reaẽ. ¹⁷ Pedro que o chono Jesús quiato ãquí arõ nda. Juan ab e o chono earõ. Espíritu Turã ngue tu Jesús quiato je cote ra. ¹⁸ Simón ngue mae erese ra. O chono mose earõ. Espíritu Turã tu mose ee. Nyebe que mbae isiquia reacuquia Pedro je ra. Juan abe je. ¹⁹ Ñee ngue ee ra. —Sembaaquiato se abe. Ndequirãcuã embu seje. Sã se abe seo tachono ñono mbia arõ. Sã se abe Espíritu Turã quirãcuã tamee mee mbia je. Mbae isiquia tamee jẽje jẽquirãcuã ndibishorõ, i rei que Simón nda. ²⁰ Pedro que ñee asi ee ra. —Sã mbae isiquia nembae quiachã ja. Nde abe equiachã tuchi. ¡Dios ra uquirãcuã mee eã mbae isiquia ribishorõ jẽ! ²¹ Ndeturã eã ñochĩ ndechiangui re. Nyebe ra Dios uquirãcuã mee eã ndeje. ²² ¡Ndeicuã si ehui rã jẽ! Echeẽ ñee Dios je. Sã Dios nendua icuã mbutiã ndesi. ²³ ¡Sã ndeicuã tuchi riqui ndechiangui re jẽ! Ndeicuã aicuate quia co, i que Pedro ee ra. ²⁴ Simón ngue ñee Pedro je cote ra. —Echeẽ turã Dios je serĩ. Sã Dios seicuã mbutiã. Ĩ nda aquiachãyã esi, i que Simón nda.

²⁵ Pedro que Dios cheẽ senei senei nguia ra. Juan abe esenei senei no. Aquere que echoi nyebi Jerusalén nda. Ñeend a cua jenda que embuchesea sea sucha tubiriã nda. Samaria jenda mbuchesea sea Jesús renei nenei mbia je.

Carro yenda Dios cheẽ ñandu

²⁶ Angel mo ngue tu Felipe je ra. Ibate si que eru nguichi ñee ee ra. —Eso chõ turúquiaa. Eso chõ ñeenda icoĩ Jerusalén icha. Gaza icha abe, i que ibatenda Felipe je ra. ²⁷ Felipe que oso Dios cheẽ nguire ra. Echia o ji mo ngue esobeishĩ ñeenda cúaa ra. Etiopía jenda rei echia o ji. Ae rei ererecua resenda. Candace, i que ererecua je ra. Reina. Mbae isiquia Candace mbae que esaarõ arõ tuchi quia ee ra. Echia o ji oso quiatu quia Jerusalén nyii reaẽ. Oso quia equia Jerusalén ñee ñee sacuã Dios je nyii reaẽ. ²⁸ Uba que u quia uchuchua quiti cote ra. Carro ye que eru quia cote ra. Isaías chimbesa rese que eru quia mae mae carro ye ra. Dios cheẽ. ²⁹ Espíritu Turã ngue ñee Felipe je ra. —Eso rã carro jii, i que ee ra. ³⁰ Felipe que oso ra. Oso que Etiopía jenda andu ra. Isaías chimbesa rese que esi quia maemae nda. Nyebe Felipe ñee ee. —¿Isaías chimbesa checuate eriqui ndeje re? i que Felipe ee ra. ³¹ —Tei. ¿Mañi ae ra eicua re? Aba mo eicuayãte seje resẽ. Echui rã. Ecoi sejii. Sembaaquiato rã se, i que carro yenda ee ra. ³² ã Isaías chimbesa rese que eriqui mae mae nda. ã ndei e ã: Nanderiquicharõsa rei oveja rã.

Mbia que oveja querao eiquíasaa ra.

Mbia que ovejara nyisia sia ra.

Oveja ñee ñeeã ee.

Eĩ ngue nanderiquicharōsa ñee ñeeã huiiquia mose ra.

³³ Nanderiquicharōsa turâte raque.

Mbia icuã tuchi ee. Mbia eiquiachō.

Emosenda icuã tuchite ee.

Emosenda eiquia chee.

Nanderiquicharōsa siquía ibi rĩ cote,

i qu e Isaías embesa ra. Embesa ji rese que Etiopía jenda riqui mae mae nda. ³⁴ Etiopía jenda que ñee Felipe je ra. —Embesa ji embuchecua seje. ¿Aba rĩ Isaías riqui embesa mbesa re? ¿Mbiamo nii eriqui embesa re? ¿Ngũĩ eriqui embesa re no? i que Felipe je ra. ³⁵ Felipe que embuchecua ee ra. Mbaaquiato tuchi que Jesús rĩ cote ra. ³⁶ Carro que ngasẽ ama moo cote ra. —¿Co ama ñi co! ¿Aa ra bautizar ere seje re? i que Etiopía jenda Felipe je ra. ³⁷ —¿Jesús ereicua quia cote re? Jesús icua tuchi mose ra bautizar ae ndeje cote, i que Felipe ee ra. Etiopía jenda ñee ee cote. —Jesús aicuate quia co cote. Jesucristo rei Dios ndiirĩ. Aicua sequia co cote, i que ra. ³⁸ Carro que embutiba cote ra. Nguichi que esi ra. Ama ndie que echoi ra. Felipe que bautizar i ee cote ra. ³⁹ Usẽ ngue ama si cote ra. Espíritu Turã ngue Felipe querao hue si cote ra. Etiopía jenda que mae eã mbei Felipe rese cote ra. Etiopía jenda ia tuchi que oso ra. ⁴⁰ Felipe que ngasẽ Azótoo ra. Sucha tubiriã ngue embuchesea sea ra. Mbia mbiirandu randu tuchi Jesús cheẽ ndese. Ngasẽ nyee que Cesarea ra.

9

Saulo uba ramo Dios icha rui

¹ Saulo icuã mbei que eriqui Jesús quiato je ra. Taiquia ja, i rei que equia ra. Nyebe que esi ñee sacerdote rerecua je ra. ² —Papel embesa rã sechiraorã. Tarao Damáscoo. Judíos chumunua mose ereacuquia sacua ee. Jesús quiat o hue jenda taru taru Jerusalén. Ecuasa taru taru quia etarō sacua policíaa. Mujeres abe taru. Hombres abe taru taru no, i rei que Saulo ñee icuã Jesús quiato rĩ nda. ³ Damasco rurubi mose que tata mo tu tuchi ee ra. Tata mo ngue tu tuchi ee ibate si ra. Tata que Saulo tesae tuchi ra. ⁴ Saulo que ngoi oso lbii ra. Echeẽ mo ngue echandu ra. —¿Mbaerã ndeicuãte riqui seje re? i que ibatenda ñee ee ra. ⁵ Saulo que ñee ee ra. —¿Aba nde re? i ee. Ibatenda que ñee ee ra. —Jesús rei se. Seje quia ndeicuãte riquichĩ nguiã. Ndeicuã mose seje, nde sí chõ ereico ñimbasi co. Sã ticuasú riqui nambacua mbuti no. Sã eriqui hui mbaba ira racua echi no. Ũquĩ na tuchi quiarei nde, i que Jesús ee ra. ⁶ Saulo que titi titi i eandu ra. —¿Mañi ae ra sequia se re, Sererecua? i que Saulo Jesús je ra. —Ehuã. Eso sucha tubiriã. Huee ra sequiato mo secheẽ nenei ndeje, i que Jesús Saulo je ra. ⁷ Saulo resend a que siquiche tuchi ra. Echeẽ andu mose. Mbia mo ndese que maeã nda. Nyebe siquichete echeẽ andu. ⁸ Saulo que juã ndei nguesa ira ra. Emae sayã tuchi. Eresayã ngue ra. Nyebe que mbia eo isi suruchoi sucha tubiriã nda. Sucha tubiriã Damáscoo. ⁹ Tres días que eresayã tuchi riqui ra. Aque mose que eresayã mbae mo uãte ra. Aque mose que yu eã no nda.

¹⁰ Huee sucha tubiriã ngue Jesús quiato mo ndiqui ra. Ananías, i que ee ra. Aque nda Dios tea cuu ra. —Ananías, i nda Dios eque re ra. —¿Mbae? i nda Ananías e e ra. ¹¹ —Eso rã Ñeenda Chaa Chaareã. Huee que Judas chuchua ñi nda. Huee eso Saulo rea. Saulo rei Tarso jenda. Hue eriqui ñee ñee seje hue. ¹² Saulo que nderea cuu ra. Ereso que ndeo no erese cuu ra. Eresa que erembucherō cuu ra. Ũquĩ sí esaã oso ee, i nda Dios Ananías je ra. ¹³ Ananías que teã ndei ra. —Mbia Saulo icuã icua tuchi quia co, Dios. Eicuã tuchi Jesús quiato Jerusalén jenda je. Mbia sembiirandu ja quia co, Dios. ¹⁴ A eru Jesús quiato isi ererao sacua a. Ũquĩ je chõ sacerdote rerecua embu nguiã a. Uretarō ja sacua, i que Ananías Dios je ra. Esiquichete que Saulo si ra. ¹⁵ Dios que ñee ee ra. —Eso chõ erea. Ae

quia airabo mingo serimbarã co. Ae ra Israel jenda mbiirandu randu secheẽ ndese. Ae ra mbia mangue choõnoa jenda abe mbiirandu randu secheẽ ndese no. Ae ra mbiamo nderecua abe mbiirandu randu secheẽ ndese no. ¹⁶ Saulo secheẽ nenei nenei mose ra mbia embasi mbasi tuchi. Mbiam icuã icuã tuchi ra ee serĩ mambi. Ûquĩ ndese Saulo tambiiirandu, i que Dios ra. ¹⁷ Ananías que oso cote ra. Dios cheẽ nguire. Ique que Judas chuchúaa ra. O que echono Saulo rese ra. —Seresenda ereico co cote, Saulo. Jesús que nyecua ndeje ñeenda cúaa, ae sí sembu quia ndeje co. Jesús sembu ndeje co. Espíritu Turã ique sacua ndechiangui re. Nemaie sacua abe sembu co no, i que Ananías Saulo je ra. ¹⁸ Aque mose tuchi que sira quiishĩ naanguia tu ngoi eresa si ra. Saulo que mae turã cote ra. Jesús quiato que bautizar i Saulo je cote ra. ¹⁹ Saulo que quiaru ñimbuquirãcuã cote ra. Itõ mocoĩ jiri que Jesús quiato rese huee ra. Damasco jenda rese itõ mocoĩ.

Saulo Dios cheẽ nenei namo

²⁰ Saulo que oso oso quia Jesús renei nenei judíos chumunuásaa ra. —Jesús rei Dios riirĩ, i tuchi que equia mbiam je ra. ²¹ Mbiam que nyuruira tuchi quia echeẽ andu ra. —Co chõ Jesús quiato iquia iquia quia cose nye. Jerusalén jenda. Co chõ tu a Jesús quiato rerao sacua nye. Co chõ Jesús quiato queraose rete quia sacerdote rerecua je nye. Ae Jesús quiato riqui quia namo co cote, i que mbiam nyuruira Saulo rea ra. ²² Saulo quirãcuã tuchi que eriqui cote ra. Ererecua rã ño eriqui nguiã mbiam mbaaquiato quiato Jesús rĩĩ. —Jesús rei Cristo. Ae jësaarõ arõ nguia, aque rei Jesús, i tuchi que Saulo quia judíos je ra. Judíos Damasco jenda que Saulo cheẽ sibishorõ aronea nda.

Saulo uchã judíos si

²³ Emo mose jiri que judío rerecua ñee nyue ra. —¡Saulo nandeiquia jẽ! i rei que ñee nyue ra. ²⁴ Mbiam mo ngue Saulo mbiirandu ra. —Nandeiquia, i nda mbiam nderĩĩ nda. Hue echi nyiquitirõ nderese eiquésaa hue. Isa abe echi nyiquitirõ nderese hue, i que embiirandu ra. ²⁵ Itondaru mose que Jesús quiato mo Saulo mbuchemi nda. Nyuchã ngue iru ye ra. Iru resebe que embuquichi mondo etaronda robei ra. Muralla robei.

Saulo siquibe Jerusalén Jesús quiato ramo mose

²⁶ Saulo que oso Jerusalén cote ra. —Taico Jesús quiato rese, i rei que ngasẽ nda. Jesús quiato que siquiche ja esi ra. —Saulo Jesús quiato saã saã ño nguiã nande je co, i rei que mbiam ra. Nyebe siquiche rei nguiã esi. ²⁷ Bernabé miĩ ngue Saulo isi turã nda. Ae que Saulo querao Jesús quiato rerecua je ra. Embiirandu tuchi Saulo rese. —Saulo que oso rei Damáscoo ra. Nandererecua Jesús que nyecua ee ñeenda cúaa ra. Jesús que ñee ee ra. Saulo que siqui Jesús rui cote ra. Saulo que siquicheã nguia Jesús renei nenei Damasco jenda je cote ra, i que Bernabé uataque je ra. ²⁸ Aquere que Jesús quiato Saulo isi turã cote ra. Saulo que siqui are jiri Jerusalén cote ra. Hue jenda Jesús quiato rese que eriqui tuchi ra. ²⁹ Saulo siquicheã ngue eriqui Jesús renei nenei mbiam je ra. Ae griego cheẽ saã saã nguia nae, ùquĩ je abe que erenei nenei nda. Ñee asi asi que Saulo je Jesús rĩĩ nda. Saulo abe que ñee tuchi ee Jesús rĩĩ nda. Nyebe mbiam riqui nguiã “nandeiquia” i Saulo rĩĩ. ³⁰ Jesús quiato que jirandu erese ra. Nyebe Saulo ruruchoi nguiã Cesarea. Mondo que echuchúaa sí cote ra. Tarso, i que Saulo chuchua je ra. ³¹ Aquere que mbiam icuã icuã eã Jesús quiato je cote ra. Judea jenda je. Galilea jenda abe je. Samaria jenda abe je no. Jesús quiato hue jenda que ñimbuquirãcuã nacua ja ra. Siqui i i tuchi Jesús rese. Espíritu Turã ngue embeta mbeta ra. Etubiriã nyee. Jesús quiato que Dios cheẽ mumba mumbayã nguia ra.

Jesús quirãcuã Eneas mbucherõ

³² Pedro que mbiam mbuchesea sea tuchi quia ra. Oso que Jesús quiato Lida jenda rea no nda. ³³ Hue que umi sayã mo ndiqui ra. Ae ngatayã mbei quia ocho años. Nyaara bei chõ ngue equia ra. Eneas, i que umi sayã je ra. ³⁴ Pedro que ñee ee ra. —¡Jesús riqui nembucherõ a jẽ! Ehuã na. Nderua abe enua, ique Pedro umi sayã je ra. Ûquĩ mose que nyerõ nda. ³⁵ Mbiam que mae ja u umi sayã ngata rese ra. Nyebe que mbiam Jesús icua ja

cote ra. Lida jenda Jesús icua ja. Sarón jenda abe que eicua ja n o nda. Ngãmeĩ ñee si que hui Jesús isi cote ra.

Dios quirãcuã Dorcas mbuquera si

³⁶ Dorcas, i que ari mo je ra. Jope jenda que ra. Dorcas, i que griego cheẽ quiicuã je ra. Jesús quiato que ae ra. Ae que eturã mbei riqui mbia je ra. Ae que mbae mee mee mbei quia mbaecha reã je ra. ³⁷ Dorcas rasi que eiquia cote ra. Mbia que eraaque mbuchasu ra. Mii ngue equesa nongue ibatenda ye ra. Segundo piso. ³⁸ Pedro que siqui aichi ra. Lida, i que sucha tubiriã je ra. Nyebe que Jesús quiato mbia nyeremo mondochoi Pedro reru sacua nda. ³⁹ Pedro que oso erese ra. Ngasẽ mose que mbia eruruchoi equesa ibatenda ra. Dorcas raaque rese mae. Hue eru chiecha tubiriã a nyi nyeseo eraaque res e hue. Dorcas chimee tubiriã ngue eteacuquia cuquia u nyue hue ra. Mbia irao tubiriã ngue Dorcas chiao ra. ⁴⁰ Pedro que mbia mbusẽ ja mondo taicuee ra. Ngũfã ndese que ñee Dios je cote ra. Aquere que ñee eraaque je cote ra. —Ehuã na, Dorcas, i que ee je ra. Eraaque que nguesa ira mae Pedro rese ra. Nyuruã ngue ngoi cote ra. ⁴¹ Pedro que emua eo rese ra. Jenyu, i que Jesús quiato je cote ra. Eru chiecha ja je abe no. Ngaẽ ngue mae equera rese cote ra. ⁴² Mbia Jope jenda que jirandu tuchi erese ra. Nyebe que mbia tubiriã Jesús icua cote ra. ⁴³ Pedro que itõ mocoĩ hue ra. Sucha tubiriã. Simón curtidor chuchúaa que eriqui uque ra.

10

Pedro oso Cornelio rea

¹ Soldados rerecua mo ngue siqui sucha tubiriã Cesaréaa ra. Italia jenda rei ùqui soldados. Cien ngue soldados ra. Cornelio, i que soldados rerecua je ra. ² Ae que ñee ñee mbei quia Dios je ra. Ae que eturã ndiqui Dios je ra. Mbae isiquia que emee mee tuchi quia mbaecha reã je ra. Echuchua jenda abe que eturã ndiqui Dios je ra. ³ Tenda nyeseo ramo mose que Cornelio ibatenda mo ndea cuu ra. Angel. Echecua tuchi que ee cuu ra. Ique que echuchúaa ee cuu ra. —Cornelio, i que ñee ee cuu ra. ⁴ Cornelio que mae quiatu tuchi erese ra. —¿Mbae ere, Sererecua? i que siquiche ñee ee ra. Ibatenda que ñee ee cote ra. —Co ereico ñee ñee mbeite Dios je co. Co ereico mbae mo mee mee mbeite mbaecha reã je co. Nyebe Dios ia tuchi riqui nguiã nderese co. ⁵ Huee que Simón Pedro mo ndiqui Jópee ra. Nderimba mo emondochoi erea. Ereru sacua ñee ndeje. ⁶ Huee eriqui Simón Curtidor chuchúaa huee. Am a ndisha rimia eriqui hue. Sã nderimba ecurucuaẽ hue si. Ñee ñee sacua ndeje, i que ibatenda Cornelio je cuu ra. ⁷ Dios chimondo ibatenda que oso Cornelio recha cote ra. Cornelio que ñumumba cote ra. Jenyu, i que ngũimba nyeremo je ra. Aque mii soldado je abe no. Ae rei Cornelio raarõsa. Ae que ndua ndua bei quia Dios rese ra. ⁸ Ùqui je que Cornelio uquereicuã nenei nenei ja ra. —Jëso Pedro reru Jope si, i que ee cote ra.

⁹⁻¹⁰ Isamami ngue Cornelio rimba ngasẽ Jope rurubi cote ra. Aque mose que Pedro chi tuchia arõ nda. Huee rei equesa no. Huee que Pedro chi ñee ñee Dios je ra. Tenda ibate mose que Pedro riãcuã nda. Echiurã ngue uchi ãte ra. Nyebe que uque u ra. Uchiurã naa mose. Equereicuã ngue cote ra. ¹¹ Ibei que nyiequia ee cuu ra. Tiru icoi que tu ibei si ra. Tiru chimangũiana isi ji que tu nguichi ee cuu ra. Echimangũiana isi ji ja. ¹² Mbae tubiriã ngue tu nguichi tiru icoi y e ee cuu ra. Mbae chumumbara tuchi. Quiaa riinda ja. Mbei abe n o. Nguireĩ abe no. Mbae ibi riinda ja tuchi que chi tiru ye cuu ra. ¹³ Pedro que echeẽ mo ñandu cote ra. —Ehuã na, Pedro. Emo eiquia ndechiurã, i que ra. ¹⁴ —Tei, Sererecua. Urechiu eã ño ã ndesẽ. ã mo ngue ureu eã mbei quia ra. Mbaeia tuchi ure je judíos ja je, i que Pedro ee ra. ¹⁵ Dios que ñeembe ee ra. —¿Sechimee ndechiurã nda ereisiteãchĩ jê! i que ra. ¹⁶ Eĩ si que tiru icoi ru tres veces ra. Mbae chumumba ra ja resebe. Tiru que oso bei ibate cote ra.

¹⁷ Pedro que ñumumba cote ra. Ndua ndua tuchi que uquereicuã ndese ra. Aque mosete que Cornelio rimba ngasẽ nda. —¿Ma Simón chuchua ma nde? i que ngasẽ nda. ¹⁸ —¿Simón Pedro riqui a re? i que ra. ¹⁹ Pedro qu e ndua ndua beite quia uquereicuã

ndese ra. Nyebe Espíritu Turã ñee nguiã ee. —Mbia tres ngaẽ nguia nderequia co. ²⁰ Equichi. Eso rã erese. ¡Esiquicheã oso erese jẽ! Se chõ ngue ambu nderea resẽ, i que Dios Pedro je ra. ²¹ Pedro que nguichi u ee cote ra. Cornelio rimba je. —Serequia chõ jenyu nguiã co. ¿Mbaerã jẽingo serequia re? i que Pedro ra. ²² —Cornelio quia urembu nguiã nderea co. Ae rei soldados rerecua turã. Judío chiicua tuchi que ae ra. Eturãte eriqui Dios je co. Angel que oso ñee Cornelio je ra. “Mbia emondo rã Pedro reru sacuaã. Pedro cheẽ echandu rã”, i que ángel Cornelio je ra, i que Cornelio rimba Pedro je ra. ²³ —Jenyu rã ique. Jengue a, i que Pedro ee ra. Isamami ngue Pedro oso erese cote ra. Jesús quiato Jope jenda abe que nyoi erese ra. ²⁴ Isamami ngue ngasẽ Cesarea cote ra. Cornelio que esaarõ arõ nguia huee ra. Nguesenda rese que eriqui eraarõ arõ nda. Nguiirĩ abe rese que eriqui eraarõ arõ nda. —Jenyu Pedro raarõ serese. Echeẽ andu sacuaã, i nda nguesenda je nyii ra. ²⁵ Pedro que ngasẽ oso Cornelio chuchúaa ra. Cornelio que oo erese ra. Aquere que ngoi ngũĩã ndese ñee ñee ee ra. Ibatenda Pedro riqui reĩ nguiã Cornelio je. ²⁶ Pedro que ñee ee ra. —Ehuã na. Dios eã ño se re. Nderã si chõ se re. Mbia chõ se re, i que Pedro ra. ²⁷ Ñee ñee ngue equia nyue cote ra. Nyoi que ique mbia tubiriãsa cote ra. ²⁸ Pedro que ñee ũquĩ je ra. —Se rei judío. Judío siqui aronea ndaque mbiamo ndese. Judío ique aronea mbiamo nyuchúaa. Ũquĩ jẽicua raque quia ã. Dios que ñee seje cuu ra. Dios que sembaaquiatu cuu ra. “Mbiamo abe que eturãte riqui ra. Mbiamo ndese abe eico jiri”, i que Dios seje ra. ²⁹ Nyebe achu jei nguiã ndecheẽ mose co. ¿Mbaerã “echu” ere seje re? i que Pedro Cornelio je ra.

³⁰ Cornelio que ñee ee cote ra. —Hue tenda bei aico ñee ñee Dios je co. Tenda nyeseco mose aico bei ñee ñee Dios je co. Se cheẽ mose que ibatenda mo ndu seje ra. Angel. Tu que seje hace cuatro días ra. Tirushĩ tuchi que ecunua nda. ³¹ Ibatenda que ñee seje ra. “Cornelio, Dios ndecheẽ ñandu bei quia co. Dios mae mbei quia nderese co. Mbae mee ndese mbaecha reã je eriqui mae co. Dios riqui ndeicuate co. ³² Mbia mo emondo rã Jópee. Hue Simón Pedro ndiqui hue. Hue eriqui Simón Curtidor chuchúaa hue. Ama ndisha rimiã ndese eriqui hue. Sã nderimba mo erurucuaã aa”, i que ángel seje ra. ³³ Nyebe serimba amondo jei nderea. Coche erechu nguiã seje aa. Ndecheẽ andu sacuaã ño urecu nguiã aa. Dios cheẽ esenei na ure je cote. Ae Dios mondo ndeje, erenei sacuaã ure je, i que Cornelio Pedro je ra.

³⁴ Pedro que ñee ee cote ra. —Judíos achõ je eã ño Dios turã ndiqui reaẽ. Mbiamo abe chõ ebi riqui reaẽ. ³⁵ Mbiamo abe ireĩ ireĩ chĩ nguiã Dios si re. Ibimo jenda re. Ũquĩ siqui turã ño nguiã Dios je reaẽ. Nyebe Dios abe eturã ndiqui ũquĩ je reaẽ. Judíos achõ eã ndaque. ³⁶ Dios que ucheẽ turã mondo judíos je ra. Dios cheẽ turã ngue tu Jesucristo rĩĩ nda. Ae rei aba mbiasa. Jesucristo rei mbia rerecua tuchi. ³⁷ Judío recua ja que Dios cheẽ turã ndiqui ã ndesẽ. Juan Bautista reco mose que Dios cheẽ ngasẽ judíos ja je ra. Juan Bautista que Dios cheẽ senei senei Galilea ra. Aque mose rane ngue Dios cheẽ ngasẽ judíos ja je cote ra. Ũquĩ jẽicua tuchi quia ã ndesẽ. ³⁸ Jesús siqui turã jẽicua quia resẽ. Jesús Nazaret jenda siqui turã mbei. Dios que Jesús mbuquirãcuã Espíritu Turã je ra. Dios que siqui tuchi erese ra. Nyebe eriqui nguiã mbae turã naa naa. Nyebe eriqui nguiã aba checuayã icuã jea jea mbia si. Ũquĩ jẽicua quia ã ndesẽ. ³⁹ Jesús chimbbaaquiatu chõ ureico nguiã ã. Jesús chisaã ndese que ureico mae mae huee ra. Judea rui ja. Jerusalén abe que ureico mae mae echisaã ndese ra. Huee Jesús reco mose que mbia eiquia cote ra. Huee que mbia embucha ira rese ra. Eiquia sacuaã. ⁴⁰⁻⁴¹ Dios que Jesús mbuquera si cote ra. Tres días mose. Dios que Jesús mbuchecua ure je cote ra. Mbia ja je embuchecuaã. Ure je achõ ngue embuchecua ra. Uchiirabo achõ je. Jesús renei nenei sacuaã ngue Dios ureirabo ra. Urequiaru que Jesús rese ra. Jesús quera ico. Mbae mo abe que urembei erese ra. ⁴² Jesús que uremondo mbia mbiirandu randu sacuaã ngũĩĩ nda. “Secheẽ turã jẽsenei senei nguia mbia je. ‘Dios que Jesús miĩ nda. Mbia mano je icuã ndea sacuaã. Manoã je abe icuã ndea sacuaã. Jesús r a eicuã tea ja’, jenyu quia mbia mbiirandu randu”, i que Jesús ure je ra. ⁴³ Dios cheẽ mbuchecua ja que embesa mbesa Jesús rĩĩ cose ra:

“Dios turã nda eriqui Jesús icuasa je. Dios ra Jesús icuasa icuã mbutiã tiã esi”, i que Dios cheẽ mbuchecuaa ra, i que Pedro Cornelio je ra.

Espíritu Turã ique judíos eã chianguí re

⁴⁴ Pedro cheẽ mose que Espíritu Turã ndu ique eandusa chianguí re ra. Eandusa chianguí re ja ique. ⁴⁵ Pedro resenda judíos que nyuruira tuchi ra. —Judíos eã je abe chõ Dios riqui Espíritu Turã mondo mondo re, i que judíos Jesús quiato u nyuruira ra. ⁴⁶ Judíos eã ngue mbiamo ñee saã saã nda. Espíritu Turã ique mose echianguí re. Ñee turã ja Dios riĩ. Nyebe judíos ñee. —Ñã ñiangui re abe Espíritu Turã iquechĩ. Judíos eã ndaque, i que eandu ra. Pedro que ñee nguesenda je cote ra. ⁴⁷ —Espíritu Turã ngue ique echianguí re cote ra. Nyebe bautizar tae ee i je cote. Emo nda seriquisãyã, i que Pedro ra. ⁴⁸ Nyebe que Pedro bautizar i ee ra. Jesucristo rimbarã ngue bautizar i ee ra. Aquereque ñee ja Pedro je ra. —Eitõ mocoĩ jiri quia ure rese aa, i que ee ra.

11

Pedro Jerusalén jenda mbiirandu ja

¹ Jesús chimbaaquiato que jirandu erese ra. Judíos eã ndese. Jesús quiato Judea jenda abe que jirandu erese ra. —Judíos eã abe riqui Dios cheẽ isi isi ã, i que mbia ee ra. ² Pedro que oso Jerusalén cote ra. Huee que judíos ñee asi asi ee cote ra. ³ —Mbiamo je ereso chõchĩ. Judíos eã je ereso chõchĩ. Judíos eã ndese ereiaru chõchĩ, i que ñee asi Pedro je ra. ⁴ Pedro que embiirandu tuchi cote ra. ⁵ —Emo mose que aico Jope ra. Huee que aico ñee ñee Dios je ra. Mbae mo ngue atea cuu ra. Tiru icoi mo ngue tu ibate si cuu ra. Echimangũiana isi ji que tu nguichi seje cuu ra. Echimangũiana isi ji ja. ⁶ Mbae chumumbara tuchi que tu aque tiru ye cuu ra. Quiaa riinda ja. Mbei abe no. Nguireĩ abe no. Mbae ibi riinda ja tuchi que chi tiru ye cuu ra. ⁷ Echeẽ mo ngue tu seje cote ra. “Ehuã na, Pedro. Emo eiquia ndechiurã”, i que seje cuu ra. ⁸ “Tei, Sererecua. Urechiu eã ño ã ndesẽ. ã mo ngue ureu eã mbei quia ra. Mbaeia tuchi ure je judíos ja je”, ae rei que ee ra. ⁹ Dios que ñeembe seje ra. “¡Sechimee ndechiurã nda ereisi teãchĩ jẽ!” i que seje ra. ¹⁰ Eĩ si que tiru icoi ru tres veces ra. Oso bei que ibate serecha cote ra. ¹¹ Aque mosete que Cornelio rimba ngasẽ seje ra. Seruruchoi sacua ngue ecuaẽ Cesarea si ra. Tres que ngaẽ seruruchoi sacua nda. ¹² “Eso rã erese. ¡Esiquicheã oso erese jẽ!” i que Espíritu Turã seje ra. ã nanderesenda seis que nyoĩ serese ra. Urecuasẽ ngue emondosa chuchua ra. Cornelio chuchua. ¹³ Cornelio que uquereicua senei ure je ra. “Angel mo ngue tu ñee seje ra. ‘Mbia emondo Jópee Simón Pedro rea. ¹⁴ Ae ra ñee ñee nguia jẽje. Ndechuchua jenda je abe ra eriqui ñee ñee. Dios jendirõ sacua jẽicua si’, i que ángel seje ra”, i que Cornelio seje ra. ¹⁵ Se ñee namo mose ee que Espíritu Turã nguichi ee ra. Ique que echianguí re ra. Ique que nandechianguí re nyii nae, eĩ si que ique Cornelio chianguí re cote ra. Cornelio chuchua jenda chianguí re abe. ¹⁶ Jesús cheẽ ndese que andua ndua cote ra. ã ndei echeẽ ã: “I je que Juan bautizar i rei mbia je ra. Espíritu Turã je bautizar tae jẽje cote”, i que Jesús cose ra. Aque rese que andua ndua cote ra. ¹⁷ Nande judíos achõ je eã ño Dios riqui nguia Espírito Turã mondo. Judí eã je abe chõ eriqui nguia Espírito Turã mondo. Jesús icua mose. ¿Mañi ae ra Dios riquisã se re? i que Pedro ñee oco judíos je ra. ¹⁸ Mbia que Pedro cheẽ sobeishiãte ra. Ñee turã turã ngue Dios je cote ra. —Dios judío eã abe mbui mbui quiato quia huiicua si reaẽ. Judío eã abe chee ra siqui bei Dios rese nye, i que judíos ra.

Antioquía jenda Jesús quiato

¹⁹ Mbia icuã tuchi que eriqui Jesús quiato je cote ra. Esteban iquia mosebe bei que mbia icuã ndiqui Jesús quiato je ra. Nyebe Jesús quiato choi nguia uchã Jerusalén si. Emo nyoĩ Feniciaa. Emo nyoĩ Chipre no. Emo nyoĩ Antioquía no. Huee ja que echi Jesús cheẽ turã nenei nenei nda. Judíos achõ je que echi erenei nenei nda. Judío eã je erenei nenei eã. ²⁰ Chipre jenda rei emo. Cirene jenda rei emo no. Ñquĩ nguia que nyoĩ Antioquíaa ra.

Ūquiŋguiatu que Jesús cheẽ senei senei judío eã je ra. ²¹ Dios quirãcuã ngue siqui tuchi embiirandusa rese ra. Nyebe que hue jenda tubiriã Jesús icua ra. ²² Jesús quiato Jerusalén jenda que jirandu erese ra. Antioquía jenda rese. Nyebe Bernabé mondo Antioquíaa. ²³ Bernabé que ngasẽ ñee Jesús quiato je ra. —Dios turã tuchi riqui nguiã jêje co. Aque rese seyate riqui co. ¡Jêingo tuchi nandererecua rese jê! ¡Jêhuichĩ nda esi jê! i tuchi que Bernabé quia mbia je ra. ²⁴ Bernabé turãt e que eriqui ra. Espíritu Turã ngue siqui tuchi erese ra. Ae que Dios icua tuchi quia ra. Nyebe mbia tubiriã ndiqui nguiã Jesús isi isi. ²⁵ Aquere que Bernabé si Tarso ra. Oso que Saulo requia huee ra. Tea que ra. Nguerao que Antioquíaa ra. ²⁶ Huee que echĩ bei Jesús quiato mbaaquiato quiatu ra. Un año que echĩ huee ra. Mbia tubiriã mbaaquiato quiatu bei. Hue jenda je rane ngue “Cristianos” i Cristo quiato je ra.

²⁷ Aque mose que Dios cheẽ mbuchecuasa mo ngaẽ Antioquíaa ra. Ngaẽ ngue Jerusalén si ra. ²⁸ Emo ngue juã ñee mbia je ra. Agabo, i que ee ra. Espíritu Turã ngue Agabo mbucheẽ ñee nda. —Mbia chiurã eã nda namo jiri. Mbia riãcuã ja ra cote, i que Agabo ra. Echeẽ nguire tuchi que mbae ua cote ra. Mbia riãcuã tuchi que cote ra. Claudio mbia rerecua mose. ²⁹ Nyebe Jesús quiato Antioquía jenda ñee ñee nyue. —Mbae mo nandemondo rã Jesús quiato Judea jenda je. Nandembae mbae mo nandemondo ee, i que nyue ra. ³⁰ Eĩ ngue umbae mondo mundo Judea jenda je ra. Mee mee ja que Saulo je ra. Bernabé abe je. Ūquiŋguiatu que Dios cheẽ mbuchecuasa mo ngaẽ Antioquíaa ra. Ngaẽ ngue Jerusalén si ra. ²⁸ Emo ngue juã ñee mbia je ra. Agabo, i que ee ra. Espíritu Turã ngue Agabo mbucheẽ ñee nda. —Mbia chiurã eã nda namo jiri. Mbia riãcuã ja ra cote, i que Agabo ra. Echeẽ nguire tuchi que mbae ua cote ra. Mbia riãcuã tuchi que cote ra. Claudio mbia rerecua mose. ²⁹ Nyebe Jesús quiato Antioquía jenda ñee ñee nyue. —Mbae mo nandemondo rã Jesús quiato Judea jenda je. Nandembae mbae mo nandemondo ee, i que nyue ra. ³⁰ Eĩ ngue umbae mondo mundo Judea jenda je ra. Mee mee ja que Saulo je ra. Bernabé abe je. Ūquiŋguiatu que Dios cheẽ mbuchecuasa mo ngaẽ Antioquíaa ra. Ngaẽ ngue Jerusalén si ra.

12

Mbia Jacobo iquia; mbia Pedro tarõ

¹ Aque mose que ererecua icuã tuchi riqui Jesús quiato je ra. Herodes, i que ererecua je ra. ² Ae que Jacobo ãquiŋ ndoso ti quise je ra. Jacobo rei Juan nongue. ³ Judíos ia tuchi que Jacobo ãquiŋ ndoso mose ra. —Judíos tambiabe no, i que ererecua ra. Nyebe Pedro abe isi nguiã. Fiesta de Pascua mose que Pedro isi nguiã. ⁴ Tarõ ngue miĩ mbia icuã tarõsaa ra. Diez y seis soldados que chi eraarõ mbei ra. —Pedro tamee je mbia je. Eiquia sacuã. Fiesta ua mose r a amee ee, i rei que ererecua uchiangui re ra. ⁵ Nyebe que soldados Pedro tarõ ji raarõ tuchi u ra. Pedro resenda que ñee ñee tuchi Dios je ra. Jesús quiato mo. Ñee ñee tuchi que equia Pedro riĩ ee ra.

Dios Pedro sirõ nyecuayã etaronda si

⁶ Isamami nda ererecua Pedro mee nguiã mbia je chã nde. Eiquia sacuã. —Isamami nda amee mbia je, i rei que Herodes ra. Aque isa que Pedro uque u soldados joõ ñi nda. Ecuaji que uque u ra. Cadena nyeremo je que ecua ino nda. Soldados nyeremo ngue uqueã u eraarõ nda. ⁷ Ibatenda mo ngue tu Pedro je isa ra. Angel. Nyaashĩ na tuchi que tuchia ra. Mbae resae ja. Ibatenda que oco Pedro rese ra. Emumba. —¡Ehuã asi jê! i que Pedro je ra. Ehuã mose que cadenas nyera eo si ra. ⁸ —Ndeirao emingue ja rã. Ndeiyao abe emingue, i que ibatenda ee ra. Ae que Pedro emingue echeẽ mose ra. —Ndeirao aronda abe emingue. Nyao serese cote, i que Pedro je ra. ⁹ Pedro que oso erese ra. Etaronda si que Pedro rerao cote ra. —Seque re chõ aico rei co, i rei que Pedro ra. Equereicuã eriqui rei nguiã ee. ¹⁰ Eraarõsa cuaãcuã ngue echoi quia ra. Eraarõsa jiranua tuchi erese. Ngasẽ nyee que etaronda icoi ra. Fierro que etaronda ra. Etaronda a e que nyeequia ee ra. Usẽ ngue ra. Pe jiri que echoi nyiese ra. Ibatenda que oso Pedro recha cote ra. ¹¹ —Cu u eã ño eriqui re. Echecua chõ eriqui re, i que Pedro eicua cote ra. —Dios chõ ibatenda mo mbu serirõ sacuã nde. Serirõ ño equia Herodes si re. Judíos ra seiquiayã cote, i que Pedro uchiangui re ra.

¹² Pedro que ndua ndua huĩ nda. Ae esi nguiã María chuchúaa. María rei Juan Marcos si. Mbia tubiriãte que chi ñumunua huee ra. Ñee ñee ngue u Dios je ra. ¹³ Pedro que ngasẽ eiquesa mbuu mbuu ra. Nyucuaaque mo ngue oso rei ee ra. Rode, i que ee ra. ¹⁴ Pedro cheẽ ngue eicua ra. Eya tuchi que nyebi asi oso mbia mbiirandu ra. Eiquesa equia rocoĩ

Pedro je. —Hue Pedro ñi taicuee hue, i que embiirandu ra. ¹⁵ —Tei. Echeẽ ñooñoa na, i chõ ngue mbia Rode je ra. —Ae beite. Acheẽ ñooñoa ño jêje re, i tuchi Rode. —Pedro eã ño ñene. Eãingue chõ ñee ndei ndeje, i ja rei que mbia nyucuaaque je ra. ¹⁶ Eiquesa que Pedro mbuu mbuu bei huĩ mbia je ra. Emo ngue oso cheete rei eequia ee ra. Pedro que ique cote ra. Ñumunua je que nyuruira tuchi mae erese ra. ¹⁷ Pedro que mbia mbuquiriri o je ra. Mbae que esenei ja ee cote ra. —Eĩ ngue Dios serirõ setarõsa si ra, i que erenei nenei ja ee ra. —Jacobó jembiirandu ja rã serese. Jesús quiato ja jembiirandu, i que Pedro ra. Pedro que oso mbia recha cote ra.

¹⁸ Isamamimbe que soldados pare pare i tuchi ra. Pedro oreã ndese mae. —¿Mañi Pedro usẽ nde? i que u ñee ñee nyue ra. ¹⁹ Herodes que ñee nda. Ererecua. —Pedro jendu rã seje, i rei que soldados je ra. Pedro oreã ngue ee ra. —Sembiiirandu ja rã se. ¿Mañi Pedro si usẽ nde? i que ererecua soldados je ra. Soldados que eicuayãte ee ra. Nyebe que ererecua soldados iquia nguiã. Pedro raarõsa iquia ja. Aquere que Herodes si siri Cesaréaa ra. Judea si siri.

Herodes mano

²⁰ Herodes que mbia chiurã mondo mondo Tiro jenda je nyii ra. Sidón jenda je abe no. Paama i que ee cote ra. Nyebe echiurã mondo monoa ee cote. Nyebe que ùquĩ nyoĩ ja Herodes chuchúaa ra. —¿Nandeturã mbei chõ ee jẽ! Ñnda nandechiurã mondobe nande je, i que nyue ra. Herodes resenda mo ngue ñee turã ee ra. Blasto, i que aque je ra. —Echeẽ turã turã Herodes je ure rĩ. Ñnda eturambe ure je, i que mbia Blasto je ra. ²¹ Emo mose jiri que Herodes huĩrao turã mingue ra. Ngoi que ngũenda icoi tose ra. Jenyu seje, i que Tiro jenda je cote ra. Sidón jenda je abe no. Herodes que ñee ocote ùquĩ je cote ra. ²² Mbia abe que ñeete ee cote ra. —Dios chõ nde resẽ. Dios cheẽ na si nde. Mbia cheẽ na eã, i que mbia Herodes mbucuasú i i ra. ²³ —Dios eã ño se re, i eã mbei que Herodes mbia je ra. Ñee turã eã ngue equia Dios rĩ nda. Nyebe Dios embasi nguiã. Nyebe Dios ángel mo mbu nguiã Herodes mbasi tuchi. Erosee que erie u ra. Eiquia nonde. Mano ngue cote ra. ²⁴ Jesús quiato que Jesús cheẽ senei senei tuchi quia ra. Mbia tubiriã ngue echandu chandu quia ra. Mbia tubiriã ngue Jesús icua icua quia cote ra. ²⁵ Bernabé que nyoĩ Jerusalén nda. Saulo rese. Mbae isiquia ruruchoi sacua. Mbae isiquia que emee mee Jesús quiato hue jenda je cote ra. Nyoĩ que Antioquíaa cote ra. Juan Marcos abe que ecuruchoi nyiese ra.

13

Espíritu Turã Bernabé mondo Dios cheẽ nenei nenei sacua, Pablo rese

¹ Jesús quiato que ñumunua nua nguiã Antioquíaa jenda ra. Mbia mbaaquiato quiatusa abe que chi erese ra. Dios cheẽ mbuchecuaa mo abe que chi erese ra. Bernabé, i que emo je ra. Simón nondeĩ abe que ra. Lucio de Cirene abe que ra. Manaén abe que ra. Ae rei que Herodes resenda eñetẽ mose ra. Herodes ererecua nonde. Saulo abe que ra. Ùquĩ ja que mbia mbaaquiato quiatusa ra. ² Emo mose que ùquĩ nyi ñumunua nda. Ñee ñee ngue u Dios je ra. Uchiu si que hui ra. Ndua ndua sacua Dios rese. Aque mose que Espiritu Turã ñee ee ra. —Bernabé jemee na seje. Saulo abe jemee na seje no. Ùquĩ ngue airabo ra. Airabo que secheẽ nenei nenei sacua nda, i que Espiritu Turã ñee ñumunua je je ra. ³ Mbia que ñee turã mbei Dios je ra. Quiaruã mbei que u ra. O que echono ñono Bernabé ãquĩ ndese cote ra. Saulo ãquĩ ndese abe no. Mondo que Dios cheẽ nenei nenei sacua cote ra.

Pablo Dios cheẽ senei senei Chípree, Bernabé rese

⁴ Aquere que Espiritu Turã Bernabé curuchoi Selúciaa ra. Saulo rese. —Ama ndui nyao Chipre, i que ua canoa cuasu ye ra. ⁵ Ngasẽ ngue sucha tubiriã Salamina nda. Salamina ndei Chipre jenda mo. Judíos chumunuasaa que echoi Dios cheẽ nenei nenei nda. Juan Marcos abe que siqui erese Dios cheẽ nenei nenei nda. ⁶ Tuchua que embuchesea sea tuchi ra. Ngasẽ nyee Pafos. Huee que brujo mo ndiqui ee ra. Barjesús, i que brujo je

ra. Judío mo ndei aque brujo. —Dios cheẽ mbuchecuasa rei se, ichõĩño mbei que equia mbia je ra. ⁷ Brujo que siqui ererecua rese ra. Sergio Paulo, i que ererecua je ra. Ererecua aquiatu tuchi que ra. —Jenyu, Dios cheẽ tachandu rã, i que ererecua Bernabé je ra. Saulo je abe no. ⁸ Brujo que Bernabé cheẽ siquisã nda. Pablo cheẽ abe riquisã. —Ĩ nda sererecua Jesús icuayã, i tuchi brujo ũquĩ ñee ndiquisã. Elimas, i abe que brujo je ra. ⁹ Espiritu Turã ngue siqui tuchi quia Pablo rese ra. Pablo, i abe que equia Saulo je ra. Pablo que ma e quiatu brujo rese ra. ¹⁰ Ñee ngue ee ra. —Mbia mbiĩrĩ irĩsa tuchi quiarei nde. Diablo resenda tuchi quiarei nde. Mbae turã ndesenda reã tuchi quiarei nde. ¿Mbaerã ereico mbia riquisã quisã Dios icha si re? ¿Manose ra erehui ũquĩ si re? i que Pablo ñee icuã ee ra. ¹¹ —Dios ra nembasi tuchi cote. Nderesayra cote. Tenda rese ra ereico mae eã are jiri, i que Pablo brujo je ra. Echeẽ mosebe que eresa uque tuchi ra. Mae eã mbae rese cote. —Jenyiba taisi. ¿Sembucuata turã na nguia jẽ! i tuchi eresayã nguia mbia je cote. ¹² Ererecua que echandu ja ra. Nyebe ngue Jesús icua nguia cote. Nyuruira tuchi que huĩ Jesús cheẽ andu ra.

Pablo que siqui Antioquíaa ra; Bernabé rese

¹³ Pablo que nyoĩ Pafos recha cote ra. Nguesenda rese que echoĩ ama ndui ra. Ngasẽ ngue Perge de Panfíliaa ra. Huee si que Juan Marcos si nyebi Jerusalén nda. Pablo recha. Bernabé abe recha. ¹⁴ Emo mose que echoĩ Perge si ra. Ngasẽ ngue sucha tubiriã Antioquíaa ra. Pisidia, i que hue ibi je ra. Sábado mose que ique judíos chumunuásaa ra. Huee que echĩ ngoĩ ra. ¹⁵ Judíos que leer i Dios cheẽ je ra. Moisés chimbesa je. Dios cheẽ mbuchecuasa chimbesa je abe no. Aquere que judíos ñee Pablo je ra. Bernabé je abe no. —¿Mbia ra jembaaquiatu quiatu jẽ nde? i que ee ra. ¹⁶ Pablo que juã cote ra. O je que mbia mbuquiriri ra. Ñee ngue ee cote ra. —Seandu rã se, Israelitas. Seandu rã se, Dios quiato. ¹⁷ Dios que Israelitas rerecua ra. Dios que nanderamei cose ndare irabo ra. Siqui tuchi que equia nanderamei ndese ra. Nanderamei chi mose Egipto. Dios que nanderamei mbeta mbeta ra. Dios quirãcuã ngue nanderamei sirõ nyee Egipto si ra. ¹⁸ Dios que nyecuachõ tuchi quia nanderamei je ra. Cuarenta años que eriqui nyecuachõ tuchi ra. Nanderamei chi mose turuquia. ¹⁹ Sucha tubiriã jenda que mano ja mbiamo nda. Dios que eiquia ja ra. Siete rei sucha tubiriã. Canaán jenda. Dios que ũquĩ iquia ja nanderamei si ra. ũquĩ mbae ibi que Dios mee nanderamei je cote ra. ²⁰ Dios que jueces miĩ miĩ nanderamei nderecuarã cote ra. Jueces que emiĩ miĩ nguia cuatro cientos cincuenta años nda. Aquere que Dios Samuel miĩ nanderamei nderecuarã nda. ²¹ Aquere que nanderamei ñee Dios je ra. “Rey mo nguia emiĩ urererecuarã”, i que Dios je ra. Nyebe que Dios Saúl miĩ ererecuarã nda. Rey. Ae rei Cis ririĩ. Cis rei Benjaminito. Saúl que siqui arete nanderamei nderecuarã nda. Cuarenta años que eriqui ererecuarã nda. ²² Cuarenta años ua mose que Dios Saúl mombo cote ra. Dios que David miĩ nanderamei ndere cuarã cote ra. Saúl rendaque re. David rei Isaĩ ririĩ. Dios que ñee David je ra. “David sebi tuchi. Ae quia ra secheẽ mumba mumbayã”, i que Dios cose ra. ²³ David sí que Jesús ramei nda. Dios que Jesús mbu Israel jenda rirõ sacua huiĩcuã si ra. Ucheẽ nguire que Jesús mbu ra. Dios que ucheẽ mbuchebiã nda. ²⁴ Jesús tu nonde que Juan Bautista riqui ñee ñee nanderamei je ra. Israel jenda je. “Jẽĩcuã si jẽhui. Jemba Dios icha rui. ĩ nda bautizar ae jẽje”, i tuchi que Juan nguia mbia je ra. ²⁵ Umano nonde que Juan ñee mbia je ra. “Ae jësaarõ nguia nae, ae eã ño se re. Ae ra tu serui. Ae rei ererecua tuchi sesi. Se oco aronea eiyao rese”, i que Juan ñee Jesús riĩ nda.

²⁶ Seresenda, Abraham ndiirĩ ndei jẽ. Jemo ndiqui Dios icua ã. Nande je quia Dios ucheẽ mondo nguia. Nanderirõ sacua nandeicuã si. Dios que Jesús mondo nande je ra. ²⁷ Jerusalén jenda que Jesús icuayãte ra. Ererecua ja que chi Jesús icuayãte ra. Dios cheẽ mbesa ji abe que eicuayãte ra. Eraã naa mbei raque sábado mose, eicuayã mbei. Dios cheẽ mbuchecuasa cheẽ nguire que Jesús iquia ra. ²⁸ “Jesús eiquia rã”, i tuchi que mbia quia Pilato je ra. Jesús icuã eã ndaque. ²⁹ Nyebe que Jesús mano ndei ra. Embesa ji cheẽ

nguire que Jesús mano nda. Jesús raaque que embuquichi ira si cote ra. Ñono ngue sita ribicoi ji ye ra. ³⁰ Jesús que quera si manonde cote ra. Dios que embuquera si ra. ³¹ Galilea jenda que siqui bei quia Jesús rese Jerusalén nae, ùquĩ ngue mae mae equera si rese cote ra. Mae mae mbei equia Jesús quera si rese cote. Ûquĩ ñee mbei quia Jesús rĩĩ ã cote. ³² A ureico Dios cheẽ turã nenei nenei jêje a. Dios ñee ñee nguia nanderamei je nyii nae, ùquĩ uresenei senei nguia jêje a. ³³ Nande je que Dios Jesús mbuquera si ra. Ucheẽ nguire que embuquera si ra. Dios ñee ñee nguia nanderamei je nyii nae, eĩ si que Jesús mbuquera ra. “Nde rei serucucha. Namu ngue arembuchecua mbia je ra”, i que Dios Jesús rĩĩ cose ra. Eĩ ngue Salmo dos nda. ³⁴ Dios que Jesús mbuquera si ra. Jesús roo ra soõ eã mbei cote. Nyebe que Dios ñee nyii ra. “Seturãte ra jêje. Seturã David je nyii nae, eĩ si ra seturãte jêje”, i que Dios ra. “Jesús tambuquera si jêje”, i ñene. ³⁵ Co abe rei embesa ji. ã ndei e ã: “Se rei Ibatenda rucucha turã. Ibatenda ra seroo sechayã. Seroo ra emoo eã. Sembuquera si rae”, i que embesa ji ra. ³⁶ David que siqui turã mbei quia uchabenda ja je ra. Dios cheẽ nguire que eriqui turã ee ra. Aquere que mano nda. Mbia que echati ngãmei jii rĩ nda. Aquere que David roo soõ cote ra. ³⁷ Jesús roo quiatu que soõ eã nda. Dios que embuquera si resẽ. Nyebe ae roo soõ eã nguia. ³⁸ Seresenda, Jesús mii ndiqui nandeicua mbutiã sacua co. A ureico ùquĩ nenei nenei jêje a. Jêirandu sacua erese. ³⁹ Dios que ucheẽ senei senei nguia Moisés je nyii nae, aque cheẽ nguia r a aba icua mbutiã eã. Jesús mii ndiqui nandeicua mbutiã sacua co. Nande Jesús icua mose. ⁴⁰ “Mbae icua nda tuchi jêje”, i que Dios cheẽ mbuchecuasa ra. Jêtesa bei u jê. Sã Dios cheẽ mbuchecuasa io eã jêje. Eĩ ngue Dios cheẽ mbuchecuasa ra:

⁴¹ Co jê, mbae turã ucuayãsa.

Je nyuruira rae. Jemano ndae.

Mbia mae sayã nda asaã ndaque jêje.

Jêicua sereãte ra equia.

Mbia embuchecua raque jêje. Nyebe ra jemano,

i que Dios cose ra, i que Pablo ra.

⁴² Pablo que usẽ nyoĩ echumunuasa si cote ra. —Jenyube rã sãbado nongue. Ûquĩ jêsenei seneimbe rã u ure je, i que mbia ee ra. ⁴³ Mbia que usẽ ja echumunuasa si cote ra. Judíos tubiriã ngue nyoĩ Pablo rui ra. Bernabé rui abe no. Judíos resenda tubiriã abe no. Pablo que ñee tuchi mbia je ra. Bernabé rese. —Dios rese jêingo tuchi jê, i tuchi que equia ee ra.

⁴⁴ Sãbado nongue mose que sucha tubiriã jenda ñmunua ja ra. Ñmunua nua ja Dios cheẽ andu. ⁴⁵ Judíos mo ngue chi mae mae mbia chumunua ndese ra. —Pablo cheẽ ño echanduchi nguia. Nandechẽ andu rocoĩ, i que judíos ngueteã mbia rese Pablo si ra. Nyebe judíos ñee icua icua nguia Pablo je. ⁴⁶ Pablo que siquicheã tuchi ñee judíos je ra. Bernabé rese. —Jê nane je ureico rei Dios cheẽ nenei nenei ã. Dios cheẽ nguire ureico rei nguia erenei nenei jê nane je ã. Ibate jêingo bei sereã ñochĩ. Nyebe jêingo nguia Dios cheẽ isiteã teã ã. Nyebe ureso nguia erenei nenei judíos eã je co. ⁴⁷ ã ngue Dios ñee ure je cose ra: “Aremingo que secheẽ nenei nenei sacua mbia ja je ra. Judíos eã ja je. Mbia ibi jenda ja je. Secheẽ isiquia ra siqui bei”, i que Dios ure je ra, i que Pablo ra.

⁴⁸ Judíos eã ia tuchi que Pablo cheẽ ndese ra. Ñee turã turã ngue Dios cheẽ nii nda. Dios que mbia irabo ata ra. Emingo bei sacua ibate. Ûquĩ ngue Jesús icua ja cote ra. ⁴⁹ Hue jenda ja que embucha mbucha quia Dios cheẽ nenei nenei nda. ⁵⁰ Judíos que mbia mbuqueta queta tuchi Pablo je ra. Bernabé je abe. Ari mbia chiicua mbuqueta tuchi que ra. Amei mbia chiicua abe mbuqueta que ra. Nyebe mbia paama i ja Pablo je. Bernabé je abe. Nyebe Pablo mombo nguia hue si. Bernabé abe mombo no. ⁵¹ Nyoĩ nonde que hui tubi mbutomo tomo mbia je ra. —Jêicua têicua, i ñe hue jenda je re. Aquere que echoi Iconio nda. ⁵² Jesús quiato ia tuchi que chi ra. Espíritu Turã ngue siqui tuchi quia erese ra.

14

Pablo que siqui Iconio nda, Bernabé rese

¹ Pablo que ngasẽ Iconio nda. Bernabé rese. Judíos chumunuasa que echoi ra. Dios cheẽ ngue esenei senei huee ra. Nyebe que judíos tubiriã Jesús icua ra. Judíos eã abe que eicua no nda. ² Judíos ataque que Jesús cheẽ isiteã teã no nda. Ûquĩ ngue judíos eã mbiicuã icuã Pablo je ra. Bernabé je abe no. Ñee icuã icuã tuchi eriĩ. ³ Pablo que chi arete huee ra. Bernabé abe no. Siquicheã tuchi que equia Dios cheẽ nenei nenei nda. Ebia tuchi Dios rese. Dios que embuquirãcuã nda. Nyebe que eriqui mbia mae sayã naa naa nda. —Ichõñño eã ño equia re, i chee mbia Pablo cheẽ je. Bernabé cheẽ je abe no. ⁴ Mbia cuabẽ ndua turã ja eã. Emo emo ngue siqui Jesús resenda rui ra. Emo emo ngue siqui judíos rui no nda. ⁵ Nyebe judíos icuã icuã Pablo je. Pablo resenda je abe no. Judíos eã abe eicuã icuã ee no. Mbia rerecua abe que eicuã icuã ee ra. —¡Pablo nandeiquia jê! ¡Bernabé abe nandeiquia jê! ¡Sita nande mombo mombo erese jê! i rei que mbia ra. ⁶ Pablo que jirandu erese ra. Bernabé abe. Nyebe echoi uchã sucha tubiriã mo. Licaonia jenda. Listra, i sucha tubiriã mo je. Derbe, i emo je. Hue rurubi que echoi ra. ⁷ Hue jenda je que Dios cheẽ nenei nenei nda.

Mbia sita mombo mombo Pablo rese

⁸ Ngasẽ ngue Listra ra. Huee que emo ngatayã ñi ee ra. Eitãquieĩ mosenda bei ei icuã. Nyebe ngatayã mbei. ⁹ Aque que Pablo cheẽ ñandu ra. —Sembucherõ arõ, i ndua uchiangui re. Pablo que eicua ra. Nyebe e mae nguiatu erese. ¹⁰ Ñee nyecua que ee ra. —Ehuã ndei rese, i que Pablo ee ra. Ecuatayã ngue juã asi ngata cote ra. ¹¹ Mbia tubiriã ngue chi mae Pablo chimbucherõ ndese ra. Nyebe ucheẽ naa naa u nyue. Pablo rĩĩ ñee ñee. —Dios ngaẽ nguichi nande je mbia rã sí a, i rei que nyuruira ra. Tasẽ tasẽ. Licaonia, i hue jenda cheẽ je. ¹² Mercurio reĩ nda Pablo mbia je. Mercurio, i mbia umbae dios mo je. Pablo que ñee mbeite quia ra. Nyebe “Mercurio” i mbia ee. Jupiter reĩ nda Bernabé mbia je. Jupiter, i mbia umbae dios mo je no. ¹³ Hue jenda que ñumunua nua nguia ñee ñee Jupiter je ra. Ae ñee ñee nguia Jupiter je, aque que ticuasú quimbae queru Pablo je ra. Ira uti resebe ereru ee. —Ticuasú nandeiquia iquia rã Pablo je. Nandesei sei ee, i ja que mbia ra. —Pablo rei Dios rã si. Bernabé rese. Nyebe ticuasú nandeiquia iquia rã ee. Dios raanguia je, i rei que mbia ra. ¹⁴ Pablo que echandu ra. Bernabé rese. Nyebe huiirao ndoro ndoro paama i ee. —Ureya eã jendese, i ñe ne. Ique que echoi mbia ite ite rĩ nda. Ñee asi asi mbia je. ¹⁵ —¿Mbaerã nda re, mbia? ¿Mbaerã nda ticuasú jêiquia ure je re? Mbia chõ ure re. Jẽ na si chõ ure resẽ. Dios eã ño ure resẽ. Nyebe urechu nguia Dios cheẽ turã nenei nenei jêje ã. ã mbae icuã jêsecha ja chõ. Dios quiarei ereco. ¡Ae rui jêingo! Ae que ibei chao ra. Ae que ibi chao no nda. Ae que ama nyao no nda. Ae que mbae chao ja ra. Mbae aosa rui jêingo. ¹⁶ Dios que mbia teachõ cose ra. Mbia tesarei mose esi. ¹⁷ Dios que eturã saã saã mbei quia mbia je ra. Mbi a eicua sacua. Dios chõ ama mbuchaaqui bei nguia nande je. Ae quia mbae a mee mbei nguia nandechiurã. Dios chõ nandembia mbia bei nguia co, i que Pablo mbia je ra. ¹⁸ Eĩ ngue Pablo embiirandu Dios rese ra. Nyebe que mbia ticuasú iquia eã nyee ee ra.

¹⁹ Emo jiri mose que judíos ngaẽ huee ra. Antioquía si. Iconio si abe no. Ûquĩ ngue mbia mbiicuã icuã Pablo je ra. Nyebe que mbia sita mombo mombo tuchi Pablo rese ra. Pablo manote reĩ nguia ee. Mbia que ecuruchoi mbutiriri pe jiri sucha tubiriã si. ²⁰ Hue que Jesús icuasa chi Pablo matãte hue ra. Pablo que juã quera cote ra. Osobe que nyebi sucha tubiriã nda. Isamami ngue esi Derbe ra. Bernabé rese. ²¹ Dios cheẽ turã ngue esenei senei nguia huee ra. Derbe jenda je. Mbia tubiriã ngue Jesús icua hue jenda cote ra. Aquere que nyebi Lístaa ra. Iconio abe. Antioquía abe. Huee sucha tubiriã ngue echoi nyebi ra. ²² Pablo que Jesús icuasa mbaaquiato quiato hue jenda ra. Bernabé rese. —¡Jesús rese jêingo tuchi jê! Mbia ra nandembasi mbasi tuchi. Aquere ra Dios nandererecuarã tuchi cote, i que Pablo mbia je ra. Bernabé rese. ²³ Amei mo ngue

eirabo rabo mii ino huee ra. Jesús icuasa rerecuarã no hue. Ñumunua je rerecuarã jaaja. Aquere que hui uchiu si ra. Quiaruã. Ñee ñee ngue equia Dios je ra. Ñee ñee ee ererecu namonda riñ. —Ã jëingo Dios icuate ã. Sã Dios jendarõ arõ, i que Pablo ererecuarã je ra. Bernabé rese.

Pablo ngãembe Antioquíaa, Bernabé rese

²⁴ Nyoí que erecha cote ra. Pisidia, i equia ibi je, hue rñ ngue echoi ra. Ngasẽ ngue Panfilia no nda. ²⁵ Jesús cheẽ turã ngue esenei senei sucha tubiriã Perge jend a je ra. Aquere que echoi Atalia no nda. ²⁶ Hue si que echoi ama ndui ra. Nguique riita quiti que ecuaẽ tiba Antioquíaa cote ra. Mbia hue jenda rane nguiatu que Pablo mondo Bernabé rese Dios cheẽ nenei nenei sacua nyii ra. —Chã Dios turã jendeaquiato jëso mose, i que ee nyii ra. Huee que tiba obeí cote ra. ²⁷ Ngasẽ mose Antioquíaa, Jesús icuasa que emunua nua cote ra. Mbae ja que esenei tuchi ee ra. —Dios que urereaquiato tuchi quia ra. Dios que urembucheẽ ñee nguia judíos eã je ra. Dios que Jesús icua tuchi ee ra. Nyebe etubiriã ndiqui nguia Jesús icua cote, ure echeẽ nenei nenei mose, i que Pablo ra. Bernabé rese. ²⁸ Chi arete que Antioquíaa ra. Jesús icuasa ja rese echi huee.

15

Jesús quiato rerecu ñumunua ja

¹ Judea jenda mo ngue ngaẽ Antioquíaa ra. Ngaẽ ngue Jesús icuasa mbaaquiato quiatu icua nda. —Circuncisión jësaã saã ja. Moisés cheẽ nguire jësaã saã, i rei que Jesús icuasa je ra. Eracoñ ire o ji je chõ eriqui nguia circuncisión, i ùqui je. —Eĩ jenyee eã mose ra jësoã ibate, i rei que ra. ² —Tei, eĩ eã ñene, i tuchi que Pablo ee ra. Bernabé rese. —Ae beite. Pablo ñee ñooño nguia, i tuchi Judea jenda. Nyebe ñee tuchi nguia nyue circuncisión ni. Nyebe Jesús icuasa mondochoi Jerusalén. Jirandu sacua circuncisión ndese. Pablo mondochoi. Bernabé abe no. Mbia mo abe no. Ûqui mondochoi ja. —Jëso Jerusalén. Jeñee Jesús quiato rerecu je. “¿Circuncisión nda uresaã saã nde?” jenyee oso ee. Sã Jesús quiato rerecu ñee jëje. Jenyu ñee ure je cote, i que ñee uchimondo je ra. ³ Jesús icuasa que embucuata turã cote ra. Mondochoi Jerusalén. Fenicia rui que echoi ra. Samaria rui abe no. Judíos eã je rese que hue jenda mbiirandu randu ra. —Judíos eã abe que Jesús isi isi quia cote ra. Judíos eã ngue hui hui quia huiicua si cote ra, i que hue jenda mbiirandu randu ra. Jesús icuasa ia tuchi que eandu ra. ⁴ Pablo que ngasẽ Jerusalén cote ra. Bernabé rese. Nguesenda rese no. Hue jenda Jesús icuasa que eisi turã nda. Jesús quiato rerecu abe que eisi turã no nda. Pablo que Dios turã senei senei ee ra. —Dios quirãcuã ngue siqui quia ure rese ra. Ure echeẽ naa naa mose, i que embiirandu ra. ⁵ Fariseos Jesús icuasa mo ngue juã ñee cote ra. —Judíos eã Jesús icua mose, circuncisión jësaã saã ee. Jeñee na ee. “Moisés cheẽ ndui jëingo bei”, jenyee chõ ee, i rei que Fariseos ee ra.

⁶ Nyebe Jesús quiato rerecu ñumunua ja aque riñ. ⁷ Ñee ñee tuchi nyue circuncisión ni. Aquere que Pedro juã ñee nda. —Tacheẽ se, Seresenda. Dios que seirabo cose ra. Ucheẽ turã nenei nenei sacua judíos eã je. Ûqui Jesús icua sacua ngue seirabo cose ra. Ûqui jëicuate quia ã. ⁸ Dios quia aba chiã icua jate nguia co. Judíos eã je abe Dios Espíritu Turã mondo mondo cote. Nande achõ je eã emondo. Ûqui abe je emondo mondo Jesús icua mose no. “Judíos eã abe sequiato”, i ñee Dios re. ⁹ Judíos eã Jesús icua mose, Dios ùqui ñia mbiasu cote. Nande rã si. Nyebe Dios riqui nguia judíos eã je abe siqui turã. Nande rã si. ¹⁰ ¿Mbaerã jëingo Dios cheẽ abi abi chõ nde? Dios cheẽ jembeta mbeta chõchĩ nguia re. Judíos eã je chõ jëingochĩ embeta re. Embeta ji chĩ nda eãtã tuchi aba je cot e re. Ûqui nanderu cose ndare saã aroneate. ¹¹ Dios turã nguia nandemingo bei nguia ã. Dios turã nguia nandemingo bei nguia ibate. Nande Jesucristo icua mose. Dios turã nguia judíos eã abe mingo bei nguia ã no. Nande rã si no, i que Pedro ra.

¹² Pablo que mbae senei ja mbia je cote ra. Bernabé rese. Mbia tubiriã ngue quiriri cote ra. Nyiisaquia que Pablo cheẽ ndese ra. Bernabé cheẽ ndese abe. —Dios que urererao

judíos eã je ra. Urembirãcuã tuchi que equia ee ra. Nyebe mbia mae sayã uresaã saã tuchi ee, i que Pablo ra. Bernabé rese. ¹³ Pablo cheẽ huire que Jacobo ñee cote ra. — Seandu rã se, Seresenda. ¹⁴ Pedro que ñee jêje namo nda. Dios turãte que judíos eã je ra. Dios que ùquĩ mo irabo rabo nguesendarã nda. Pedro que jembiirandu erese namo nda. ¹⁵ Eĩ ngue Dios cheẽ mbuchecuasa embesa cosete ra. Nyebe eriqui nguiã eĩ eĩ ã cote. ¹⁶ ã ndei embesa ji ã:

Se rei Dios. David reco mose que serimba siqui tuchi serese ra.

Aquere hui ja sesi cote.

Achube ra echiã mbitirõ si cote.

Siqui si ra serese cote.

¹⁷ Judíos eã abe ra siqui serese cote.

Mbia sembaerã nda siqui ja serese cote,

i que Dios ra. ¹⁸ Eĩ ngue Dios ñee mbia mbiirandu cose ra, i que Jacobo ra. ¹⁹ — Judíos eã mo ngue Dios icua icua quia cote ra. ¡Nandechẽ nandembetayã jiri ee jê! ²⁰ ¡Nandechẽ mii ño nandembesa mondo ee jê! Nandechẽ mumbayã sacua. “Mbia soo mondo mondo mose dios raanguia je, ¡aque soo ra jêuchĩ jê!” nande rã ee. “¡Jeninisi rese siqui rocoĩ nda jêingochĩ emo ndese jê! ¡Jendu rese siqui rocoĩ nda jêingochĩ emo ndes e jê!” nande chõ ee. “¡Eruqui resebe ra soo jêuchĩ jê! ¡Mbae ruqui ra jêuchĩ jê!” nande chõ ee. Ûquĩ mii nandembesa rã mondo ee. Nandechẽ mumbayã sacua. ²¹ Ûquĩ mii nande rã ee. Ûquĩ ño mbia ñandu ñandu mbei quia cose ndare bei. Mbia Moisés chimbesa saã saã sucha tubiriã ja je. Sábado mose bei. Judíos chumunua nua mose, i que Jacobo ra.

²² — Coche ñene, i ja Jesús quiato rerecua Jacobo cheẽ je. Jesús icuasa ja abe. Nyebe mbia nyeremo mondo Pablo rese. Bernabé rese abe. Silas, i que ee ra. Judas, i que enongue je ra. Barsabás, i abe que equia Judas je ra. Ûquĩ ndei Jesús quiato rerecua mo. Ûquĩ ngue emondo Antioquíaa ra. — Urecheẽ jêsenei senei Jesús icuasa hue jenda je, i que Jerusalén jenda ra. ²³ Jesús icuasa que ucheẽ mbesa mondo ee ra. A rei embesai a: — Ure rei Jesús quiato rerecua. Ure rei Jesús icuasa. A ureico embesa mbesa jêje a, Jesús icuasa. Judíos eã je. Antioquíaa jenda je. Siria jenda je. Cilicia jenda je. Saludos. ²⁴ Uresenda mo ngue nyoichĩ jembaaquiatu icua icua nda. Ûquĩ ñee jemingo asi asite rei. “Circuncisión jêsaã saã”, i chõchĩ equia jêje reaẽ. “Moises cheẽ ndui jêingo bei”, i chõchĩ equia jêje re. Ûquĩ uremondo eã ñee jêje. Ae ae chõ nyoĩ nguiã ñee ñooño jêje. ²⁵ Nyebe ureico nguiã ñumunua a. Emo ngue ureirabo emondo sacua jendea ra. Nyeremo uremondo quia aque. Pablo rese. Bernabé abe rese. Urequiatio tuchi que ùquĩ nda. ²⁶ Ûquĩ ireĩ ireĩ eã tuchi nyoĩ Jesucristo cheẽ nenei nenei. Mbia eiquia arondete raque. Siquicheã tuchi. ²⁷ Aque Judas uremondo quia jendea aque. Silas rese. Ûquĩ nda jembiirandu ja. Ûquĩ nda urecheẽ senei senei jêje. ²⁸ Espíritu Turã ngue urembaaquiatu ra. Nyebe ra urecheẽ tuchiã jêje. Echeẽ mumbayã sacua. ã mii ño uremondo quia jêje aque. ²⁹ “Mbia soo mondo mondo mose dios raanguia je, ¡aque soo ra jêuchĩ jê! ¡Eruqui resebe ra soo jêuchĩ jê! ¡Mbae ruqui ra jêuchĩ jê! ¡Jeninisi rese siqui rocoĩ nda jêingochĩ emo ndese jê! ¡Jendu rese siqui rocoĩ nda jêingochĩ emo ndese jê!” Coche ùquĩ jemumbayã nguiã. Aque mii ño urecheẽ urembesa mondo aque, i que embesa ra. Eĩ ngue Jerusalén jenda embesa ee ra.

³⁰ Uchimondo que emondochoi turã nda. Ngasẽ ngue Antioquíaa cote ra. Jesús icuasa hue jenda que emunua ja ra. Embesa ji que emee ee ra. ³¹ Echumunua mos e que leer i ee cote ra. Eya tuchi que erese ra. Eya tuchi Jerusalén jenda chimbesa isi mose. ³² Dios cheẽ mbuchecuasa rei Judas. Silas rese. Nyebe que ùquĩ Dios cheẽ nenei nenei tuchi Jesús icuasa je ra. Jesús icuasa mbaaquiatu quiatu tuchi. ³³ Chi are jiri que huee ra. Jesús icuasa que embuchebi turã mondochoi cote ra. Nyoĩ que nyebi Jerusalén nda. ³⁴ Silas que siquichõ nda. ³⁵ Pablo abe que siquichõ Antioquíaa ra. Bernabé rese. Mbia que embaaquiatu quiatu quia ra. Dios cheẽ turã ngue esenei senei nguiã ra. Jesús icuasa tubiriã ngue esenei senei erese ra.

Pablo nyao Bernabé si

³⁶ Aquere que Pablo ñee Bernabé je ra. —Nyao nanderique rui Jesús icuasa mbuchesea sea mae ja erese. Dios cheẽ ngue nandesenei senei, hue jenda mbuchesea sea nyao. Mañi Jesús icuasa u mambi reae. Nyao erea, i que Pablo ra. ³⁷ —Eno. Juan Marcos abe nanderao, i rei que Bernabé ra. ³⁸ —Tei. Ae que nanderecha Panfíliaa nyii resẽ. Hui jei que nande si resẽ, nande Dios cheẽ nenei nenei mose. ¿Mañi nande ra ererao si re? i que Pablo ra. ³⁹ Ñee asi asi chee que nyue ra. Marcos riĩ. Nyebe que nyao nyesi ra. Bernabé que Marcos querao ra. Ama ndui que echoi Chípree ra. ⁴⁰ Pablo que ñee Silas je ra. —Nyao serese, i que ee ra. Jesús icuasa que ñee ee ra. —Chã Dios turã jendeaquiato bei jẽso mose, i ja que ee ra. Pablo que nyoĩ cote ra. Silas rese. ⁴¹ Siria riĩ ngue echoi ra. Cilicia riĩ abe no. Hue jenda Jesús icuasa mbaaquiato quiato que echoi ra.

16

Pablo resenda bei que Timoteo cote ra

¹ Pablo que nyoĩ Dérbee ra. Lístraa abe echoi. Huee que Jesús icuasa mo ndiqui ee ra. Timoteo, i que ee ra. Esi rei judía. Esi rei Dios icuasa. Judío eã ngue eru ra. ² Jesús icuasa hue jenda que Timoteo icua ja ra. Timoteo turãte, i ja que Jesús quiato quia ee ra. ³ —Timoteo tarao serese, i que Pablo ra. Judíos tubiriã ngue chi aque ibi rui ra. —Judío eã ndei Timoteo ru, i ja judíos. Nyebe Pablo circuncisión naa Timoteo je. Nguerao nguesendarã cote. ⁴ Nyoĩ que sucha tubiriã mbuchesea sea cote ra. Jesús quiato rerecua cheẽ ngue esenei senei ja quia mbia je ra. Jerusalén jenda cheẽ. —¿Ûquĩ ñee nda jemumba mumbachĩ jẽ! i que Pablo nyoĩ quia ra. ⁵ Pablo que Jesús oseĩ uquia Jesús quiato je ra. Jesús icuasa tubiriã nĩa ngue esi quia cote ra.

Echu urembaaquiato quiato, i que Macedonia jenda Pablo je cuu ra

⁶ —Nyao Dios cheẽ nenei nenei Asia, i rei ngue re. Espíritu Turã ngue nya i ee ra. Nyebe echoi nguiã Frígiaa. Galáciaa abe. ⁷ Ngasẽ ngue Mísiaa ra. Nyao Bitinia, i rei ngue re. Espíritu Turã ngue nya i ee ra. ⁸ Misia que echucuaño nyoĩ ra. Ngasẽ nyee Troas. ⁹ Huee que Pablo Macedonia jenda mo ndea isa ra. Tea que cuu ra. Chĩ nda juã ñee ñee Pablo je cuu ra. —¿Echu aa Macedóniaa jẽ! Echu urembaaquiato quiato, i nda Pablo je cuu ra. ¹⁰ Nyebe ureso nguiã ereare. Se abe que aso erese ra. Se rei Lucas. —Dios urererao quia Macedonia co. Ucheẽ nenei nenei sacua, ure que urechue cote ra. Nyebe urecuata nguiã cote.

Pablo tarõ ji que chi Filipos ra

¹¹ Ama ndui que ureso Troas si ra. Eriĩmbe que ureso iasa ra. Urecuasẽ nyee que oso Samotracia ra. Isamami ngue ureso Neápolis cote ra. ¹² Hue si que ureso ibi riĩ nda. Urecuasẽ nyee oso sucha tubiriã tuchi je. Filipos, i hue sucha tubiriã je. Romanos mbae rei sucha tubiriã. Macedonia, i que ibi ja je ra. Huee que urecu arete ra. ¹³ Sábado mose que ureso ama nimíaa nda. Sucha tubiriã ndecha. Huee que judíos riqui ñmunua nua mbei ñee ñee Dios je ra. Ari que ngaẽ ngaẽ nguia huee ra. Acuanĩ mo ndese. Urecoi que Dios cheẽ nenei nenei ee ra. ¹⁴ Lidia, i que urecheẽ andusa mo je ra. Ae rei tiru rubi vender isa. Ae rei Tiatira jenda. Ae rei Dios icuasa. Dios que Pablo cheẽ mbuchecua ee ra. Pablo cheẽ ngue eisi ra. ¹⁵ Nyebe que bautizar i ee ra. Echuchua jenda je abe que bautizar i ra. —Se Jesús resenda tuchi mose jẽje, jenyu uque sechuchúaa, i que Lidia ure je ra. Ñee tuchi ure je. Nyebe urererao nguiã uchuchua.

¹⁶ Emo mose que ureso quia mbia ndua nduásaa Dios rese ra. Nyucuaaque mo ngue uresobeishĩ nda. Aba checuayã icuã ngue siqui tuchi quia erese ra. Aba checuayã icuã ngue mbae icua icua quia ee ra. Nyebe mbia mbae isiquia mee mee tuchi quia nyucuaaque rerecua je. Nyucuaaque cha je. ¹⁷ Nyucuaaque que tu Pablo rui ra. Tu ure ja rui. Ñee ngue urerĩĩ nda. —¿Ñ ndei Dios rimba ã. Ibatenda rimba. A echi aba icuã mbutiãsa nenei nenei jẽje a. A echi Jesús renei nenei jẽje a, i bei que nyucuaaque quia

urerĩ nda. ¹⁸ I bei que nyucuaaque quia urerĩ nda. Pablo que echeẽ nyosei chiã nyee ra. Uba que ñee aba checuayã icuã je cote ra. —Jesús rĩ aico ñee ndeje a. Esẽ nyucuaaque si, i que Pablo aba checuayã icuã je ra. Echeẽ mosebe que usẽ esi ra.

¹⁹ Nyucuaaque rerecua que paama i Pablo je ra. —Mbia ra mbae isiquia mondo monoa techĩ nande je cote re, i nyue. Nyebe que Pablo isi ra. Silas rese. Curuchoi que plaza ra. ²⁰ Mondo que mbia rerecua je ra. —Ã ndei judíos ã. Mbia mbiicuã icuãte equia ñee ñee ã. ²¹ “Ure rã jẽingo”, ichĩ nguiã nande je. Romanos ndaque nande. Uquĩ nandesaã aronea tuchi quiarei, i que mbia nguerecua je ra. ²² Nyebe que mbia paama i Pablo je ra. Silas abe je. Ererecua que eirao mbui asi ra. —Ira je jẽiruã nua, i que ererecua ra. ²³ Mbia que eiruã nua tuchi ra. Tarõ ngue cote ra. —Jësaarõ tuchi, i que ererecua eraarõsa je ra. ²⁴ Echeende que etarõ tuchi cote ra. Ei abe que emumbi ino ira je ra.

²⁵ Pablo que ñee ñee nguia Dios je itondiite mose ra. Silas rese. Irasei rasei abe no. Etarõi que ehandu ja quia ra. ²⁶ Aque mose que ibi titi titi i ra. Etarõsa abe que quiata quiata ja ra. Eiquesa abe que quiata ja ra. Eicuaa que nyera ja cadenas nda. Etarõ ji si que nyera ja ra. ²⁷ Eraarõsa que ñumumba ra. Eiquesa eequia ji rese que mae nda. Etarõ ji uchã nei nguiã ee. Nyebe ñee nguiã. —Tachiiquia, i que tiquise rirõ nda. ²⁸ Pablo que tasẽ ee ra. —¿Mbaerã nda erechiiquia re? ¡A urecu chõte a resẽ! i que Pablo ee ra. ²⁹ —Tata eru, i que eraarõsa mbia mo je ra. Ique que Pablo rea cote ra. Titi titi i tuchi que ra. Ngoi que nguiã ndese Pablo je ra. Silas abe je. ³⁰ Eraarõsa que ecuruchoi taicuee cote ra. Ñee ee. —Sã Dios serirõ seicuã si. ¿Mañi ae ra se re? Siqui bei sacua Dios rese re, i que eraarõsa ra. ³¹ Pablo que ñee ee cote ra. Silas rese. —Jesucristo eicua. Uquĩ mose ra Dios nderirõ ndeicuã si. Uquĩ mose ra Dios ndechuchua jenda abe rirõ huiicuã si, i que Pablo ee ra. ³² Jesús cheẽ ngue esenei senei ee ra. Echuchua jenda je abe que erenei nenei nda. ³³ Pablo iruã nua ji que eraarõsa irei irei ra. Silas iruã nua ji abe. Itondii mose raque. Bautizar i que eraarõsa je cote ra. Echuchua jenda ja je abe que bautizar i ra. ³⁴ Eraarõsa que Pablo querao mbuquiaru uchuchúaa ra. Silas abe no. Ey a tuchi que ra. Echuchua jenda abe ia tuchi. —Nandeico Dios icua co cote, i ñene. Nyebe eya tuchi Dios rese.

³⁵ Isamamimbe que ererecua ñee policía je ra. —Jëso Pablo mbusẽ cote. Silas abe jembusẽ, i que ee ra. ³⁶ Eraarõsa que ñee Pablo je ra. —A policía cuaẽ a. Jembusẽ sacua. Hui que jësi ra. Jëso turã cote, i rei que eraarõsa Pablo je ra. ³⁷ —Nya, i que Pablo ee ra. —¿Mbaerã ererecua ureiruã ñooño nde? Mbiassa. Mbae icuã naa mose rocoĩ. Romanos ndaque ur e abe. Uretarõ ñooño ngue ra. “Nandembusẽ checuayã”, i raque ure je co cote. Tei. Sã uquĩ ngaẽ urembusẽ nyecua, i que Pablo ee ra. ³⁸ Pablo cheẽ ngue policía senei nguerecua je ra. “Romanos”, i mose que ererecua chiã cuaãcuã i ja ra. ³⁹ Ererecua que nyoĩ Pablo rea cote ra. Silas abe rea. —Ureicuã ñochĩ jëje. Ureicuã eã nda cote. Jëso a si cote, i que ererecua embusẽ turã mondo cote ra. ⁴⁰ Pablo que usẽ etarõsa si cote ra. Silas rese. Nyoĩ que Lidia chuchua ra. Hue que echi mbirĩ Jesús icuasa mundua ndua ra. Nyoĩ que hue si cote ra. Sucha tubiriã si.

17

Pablo que siqui Tesalónicaa ra

¹ Pablo que nyoĩ Antípolis rĩ nda. Apolonia ñĩ abe echoi. Silas rese. Hue si que echoi ngasẽ Tesalónicaa ra. Huee que judíos chumu nuasa mo huee ra. Sina goga, i equia tuchua je. ² Pablo que oso hue sábado mose ra. Querabe que eriqui oso oso bei judíos chumunuásaa ra. Tres sábado que Pablo mbia mbaaquiātu quiātu huee ra. ³ Dios cheẽ ngue esenei senei ee ra. —“Mbia ra Cristo mbasi tuchi. Manonde ra quera si”, i que Dios cheẽ nda. Eĩ ngue mbia Jesús je cote ra. Jesús ae rĩ aico ñee ñee jëje, ae rei Cristo. Ae jësaarõ arõ mbeite quia, aque rei Jesús, i que Pablo embaaquiātu quiātu ra. ⁴ Emo emo ngue Jesús isi cote ra. Siqui que Pablo rui ra. Silas rui abe. Griegos tubiriã ngue siqui erui no nda. Dios icuasa rei uquĩ. Griego ninisi tubiriã abe que siqui Pablo rui ra. Mbia chiicua tuchi rei uquĩ. ⁵ Judíos que ngueteãte quia mbia rese Pablo je ra. Mbia siqui mose

Pablo rui. Ae Dios cheẽ andu sereãte quia, ùquĩ ngue ngueteãte quia mbia rese ra. Nyebe ngata chooño je munua nguiã. Ûquĩ ngue sucha tubiriã jenda mbupaama i tuchi ra. Mbia tubiriã ngue mbaba chee Jasón chuchua je cote ra. —¿Ma Pablo ma nde? ¿Ma Silas ma nde? Uremee nda mbia icuã je, i rei que judíos ra. ⁶ Pablo oreã ngue ee ra. Silas abe oreã ngue ee ra. Nyebe que Jasón nduruchoi mbutiriri nguerecua je ra. Jasón ndesenda rese. Ñee nguerecua je. —Pablo ngaẽ ñochĩ mbia mbiicua icuã ja aa. Pe jenda mbiicua icuã jare. ⁷ Jasón eisi turã ñochĩ nguia uchuchúaa a. Ûquĩ icuã ja que eriqui nandererecua je. César cheẽ emumba mumba bei chõchĩ nguiã ã. “Jesús quia ererecua tuchi César si re”, i chõchĩ Pablo, i que mbia paama i Pablo je ra. ⁸ Mbia ataque eandu mose que paama i ra. Ererecua abe que paama i ra. ⁹ Ererecua que mbae isiquia isi Jasón si ra. Jasón ndesenda si abe. —Uremeembe ra jẽje Pablo choi mose, i que ererecua ee ra. Ererecua que hui ja esi cote ra.

Pablo que siqui Beréaa ra

¹⁰ Jesús icuasa que Pablo mondochoi jei Berea ra. Silas rese. Aque isa mose bei. Ngasẽ ngue Berea ra. Nyoĩ que judíos chumunuasa cote ra. ¹¹ Judíos Berea jenda que earacua ra. Tesalónica jenda si. Berea jenda quiatu que Dios cheẽ ñanduse rete ra. Berea jenda que embesa ji tea jei jei ra. —Ma Pablo ñee Dios cheẽ ndui si, i que nyue ra. ¹² Nyebe que mbia tubiriã Jesús icua ra. Griegos tubiriã abe que Jesús icua ra. Griegos ninisi abe. Mbia chiicua rei griego s ninisi. ¹³ Pablo que Dios cheẽ senei senei Berea jenda je ra. Judíos Tesalónica jenda que jirandu ra. Jirandure que echoi Beréaa mbia mbiicua icuã Pablo je ra. ¹⁴ Jesús icuasa que Pablo mondo ama ndisha quti ra. Silas que siquichõ Beréaa ra. Timoteo rese. ¹⁵ Ae Pablo curuchoi, ùquĩ ngue tiba esi ra. Atenas, i que sucha tubiriã je ra. —A ureico nyebi a, i que Pablo je ra. Echebi mose que Pablo ñee ee ra. —Silas jembu jei seje. Timoteo rese, i que Pablo ee ra.

Pablo que siqui Atenas nda

¹⁶ Pablo que siqui Silas raarõ arõ Atenas nda. Timoteo abe raarõ arõ. Dios abareã tubiriã ngue huee ra. Ûquĩ ndese quiatu que mbia riqui oo tuchi ra. Pablo que mae icuã ùquĩ ndese ra. Pablo que paama ite mbia rese mae nda. Mbia Dios abareã nderequia requia mose. ¹⁷ Nyebe Pablo oso oso bei nguiã judíos chumunuasa. Ñee ñee tuchi hue jenda je. Judíos eã je abe ñee ñee tuchi hue jenda mbia je. Dios icuasa je. Plázaa abe que Pablo riqui ñee ñee tuchi mbia je ra. ¹⁸ Epicúreos resenda mo ngue ngaẽ ñee tuchi Pablo je ra. Estoicos resenda mo abe que ngaẽ ñee Pablo je ra. —¿Mbae ichõte Pablo quia nande je re? Echeẽse rete eriqui reae, i que emo emo nda. —Dios mo ñii eriqui ñee ñee nande je reae, i que emo emo nda. Pablo ñee ñee mose Jesús riĩ. Pablo Jesús quera renei nenei mose. ¹⁹ Mbia que Pablo curuchoi ibi ato mo cote ra. Huee que ererecua riqui ñumunua nua mbei ra. Ñee ngue Pablo je cote ra. —¿Mbae riĩ ereico ñee ure je re? Embuchecua ure je. ²⁰ ã ngue urechanuate quia ra. Ndecheẽ embuchecua ure je. ¿Mbae ere quia re? i que mbia Pablo je ra. ²¹ Atenas jenda mingo uquia reã mbae mo ndese. Ae siqui Atenas jenda rese, ùquĩ abe mingo uquia reã mbae mo ndese. Echeemo andu andu bei. Echeemo ndese bei.

²² Nyebe que Pablo juã mbia ite re ra. Ibi ato. Ñe e ngue mbia je cote ra. —Tacheẽ jẽje, Atenas jenda. Dios ata rete rese jẽingo reae. ²³ Secuatasa que amae mae dios tubiriã jembae rese ra. Emo ndese que amae nda. “Co Dios mbia mae sayã”, jenye que embesa mi nda. Ae je jẽingo ñee ñee ùquĩ. Jemae sayã ndaque. Ae riĩ aico ñe e jẽje co. ²⁴ Co Dios que ibi chao ra. Mbae ao ja. Ae rei mbae rerecua. Ibi riinda rerecua. Ibei jenda abe rerecua. Dios siquía ño nguiã tuchiaqui re mbia chiao. ²⁵ —¿Aba ra mbae chao seje re? i eã ngue Dios quia ra. Ae quiarei mbae meesa. Nandembuquiarusa rei ae. Nande mingsa rei ae. ²⁶ Mbia miĩ ngue Dios chao ra. Aque rei mbia i ja aque. Emo eã ño nandeico nguiã ã. Nande ja chõ nandeico nguiã ã. Dios rei nandeaosa. Nyebe Dios mbae rerecua ja. —Co ra nyeacuquia co mose. Co ra mano co mose, i bei que Dios quia ra. Mbia recuarã ngue

Dios mee mee mbia je ra. ²⁷ Dios que mbia mingo ibi rĩ nda. ĩ nda mbia Dios requia. ĩ nda mbia Dios icua. Isho eãte Dios riqui a. Nande ja jii eriqui a. ²⁸ Dios rĩĩ ae nandeico nguiã. Eriĩ ae nandeico nguiã ngata. Jemo abe que ñee nda. “Dios riirĩ ño nandeico ja nguiã ã”, i que jemo nda. ²⁹ Ae bei chõ nandeico nguiã ã. Dios riirĩ. “Dios” nandechĩ nguiã mbia chiao je. Oro ao ji je. Plata ao ji je. Sita ao ji je. ³⁰ Dios que mbia icuã teachõ cose ra. Mbia aquiatuã mose. Namõ ño Dios riqui nguiã ñee mbia je co. “Jẽhui chõ jẽicuã si”, i Dios quia mbia jaje co. ³¹ Dios que Jesucristo irabo ra. Jesucristo turã mbei. Jesucristo ra ñee emo je. “Jẽso tata cuasu”, i ra ee. “Jẽso ibate”, i ra emo je no. Manose chõ nda ñee. Dios miĩ ño eicua nguiã. Dios que Jesucristo mbuquera si manonde ra. Nyebe ra Jesucristo emo mondo ibate. Emo mondo tata cuasu no. ³² —Jesucristo que quera si manonde ra, i que Pablo ee ra. Mbia que iquia iquia chõchĩ nguiã Pablo cheẽ mose. Emo emo ngue ñee ee ra. —Emo mose quiatu ra ndecheẽ urechandu, i que eataque ra. ³³ Pablo que oso mbia recha cote ra. ³⁴ Emo emo ngue siqui erui ra. Ae Jesús cheẽ isi turã, ũquĩ ngue siqui bei erui ra. Dionisio, i que ũquĩ mo je ra. Ae rei mbia rerecua mo. Dámaris, i que cuña mo je ra. Emo emo abe que siqui Pablo rui ra.

18

Pablo que siqui Coríntoo ra

¹ Pablo que oso Atenas ndechea cote ra. Ngasẽ ngue sucha tubiriã mo cote ra. Corinto, i que hue je ra. ² Hue que judío mo ndiqui ee ra. Aquila, i que ee ra. Ponto jenda que ae ra. Priscila, i que eninisi je ra. ũquĩ ngue ngaẽ namo Italia si ra. Italia recha ramo. Claudio judíos mombo ja mose Roma si. Pablo que oso Aquila chuchua ra. ³ Pablo que tuchia saã saã nguia mbae ire je ra. Eĩ ngue Aquila no nda. Tuchua raã naa mbei mbae ire je. Nyebe Pablo siquichõ nguiã erese. Quiei quiei erese. ⁴ Sábado mose que Pablo riqui oso oso judíos chumunuasa ra. Hue que eriqui bei Dios cheẽ nenei nenei judíos je ra. Judíos eã je abe no.

⁵ Silas que ngasẽ Macedonia si cote ra. Timoteo rese. Pablo que Dios cheẽ senei senei tuchi quia judíos je cote ra. Jesús mbuchecua checua tuchi ee. —Jesús rei Cristo. Ae jẽsaarõ arõ mbeit e quia, aque rei Jesús, i tuchi que Pablo ee ra. ⁶ Judíos que paama i Pablo je cote ra. Ñee icuã icuã tuchi que ee ra. Nyebe Pablo huiĩrao mbaaba aba ee. Taso jendechea, i ñene. —“Aemingo bei ra se”, i rei Dios nande je. Jẽ nguiarei Dios cheẽ isi sereã tuchi. “¿Mbaerã Dios cheẽ eresenei eã ure je re?” jenyechĩ nda seje. ¡Dios cheẽ ngue asenei tuchi rei jẽje ra jẽ! Nyebe taendechea. Judíos eã je Dios cheẽ tasenei senei cote, i que Pablo huiĩrao mbaaba aba ee ra. ⁷ Pablo que oso judíos recha cote ra. Judíos chumunuasa jii esi. Justo chuchúaa. Judío eã ndei Justo. Dios quiato que Justo ra. ⁸ Crispo que judíos chumunuasa rerecua ra. Aque que Jesús icua cote ra. Echuchua jenda ja abe que Jesús icua cote ra. Corinto jenda tubiriã ngue Dios cheẽ ñandu ra. Mbia tubiriã ngue Jesús icua cote ra. Bautizar i que cote ra. ⁹ Itondaru mo ngue Pablo Jesús rea ra. Ñee ngue Pablo je cuu ra. —Eresiquichechĩ nda mbia si jẽ. Secheẽ esenei senei mbei. Erehuichĩ nda esi jẽ. ¹⁰ Co aico nderea quiatu co. Mbae icuã nda ĩ eã ndeje. Secheẽ esenei senei mbei. A jenda ra seicua ja jiri cote, i que Jesús Pablo je cuu ra. ¹¹ Pablo que siqui arete Corinto ra. Un año ndobeichõ jiri que eriqui huee ra. Mbia mbaaquiatu quiatu bei Dios rĩĩ.

¹² Galión ngue Acayo jenda rerecua ra. Aque mose que judíos ñimbiicuã tuchi Pablo je ra. Oo que erese ra. Curuchoi que nguerrecua je ra. ¹³ Judíos que ñee ererecua je ra.

—Pablo que mbia mbaaquiatu icuã icuã nguia ra. Dios rĩĩ. Nandererecua cheẽ ndui eã, i que judíos ra. ¹⁴ Pablo nda ñee nguiã ña. Ererecua Galión nane nguia ñee nguiã esi. Ñee judíos je. —Mbae icuã ndese que Pablo riqui ãte. Eĩ nguia nda jeñee achandu nguiã ña. ¹⁵ Mbae icuã ngue esaã eãte. Pablo cheẽ je chõ jẽingo nguiã paama i. Judíos cheẽ niĩ ño jẽingo nguiã paama i Pablo je. Nyebe ra jeñee achana. Jẽ ae jeñee turã jenyue ae, i que Galión judíos je ra. ¹⁶ Mombo ja que uchuchua si cote ra. ¹⁷ Sóstenes, i que judíos

chumunua nuasa rerecua je ra. Judíos eã ngue paama i Sóstenes je ra. Isi icuã ngue ra. Iruã nua tuchi que ra. Ererecua Galión ndésaa que eiruã nua nda. Ererecua que teachõ nda.

Pablo tube Antioquíaa

¹⁸ Pablo que siqui atate Coríntoo ra. —Co acua quia jendecha co, i que uataque je cote ra. Jesús quiato je. Aquila abe que oso erese ra. Priscila abe no. Ngasẽ ngue ama nimíaa nda. Such a tubiriã. Cencrea, i que hue sucha tubiriã je ra. Pablo que ua chisia cote ra. —Acheẽ ngue Dios je, aque que amumbayã nda, i que ua sia cote ra. Siria icha rui que echoi cote ra. Ama ndisha icoi tuchi rui. ¹⁹ Sucha tubiriã je que ngasẽ cote ra. Efeso, i que sucha tubiriã je ra. Aquila que siquichõ eresebe huee ra. Priscila, i que eninisi je ra. Pablo que oso judío s chumunuásaa ra. Ñee ñee tuchi que judíos je ra. ²⁰ —Eico are jiri aa, i rei que judíos ee ra. Pablo que echeẽ mumba bei oso ra. ²¹ —Taso Jerusalén. Mbia chumunua mose taico rã Jerusalén. Achube ra mae jendese. Dios sembu mose ra achube mae jendese, i que Pablo ra. Oso que Efeso si cote ra. Ama ndisha rui bei que echoi ra. ²² Ngasẽ ngue Cesaréaa ra. Hue si que Pablo si Jerusalén cote ra. Hue jenda rese que mae nda. Jesús quiato. Hue si que esi Antioquíaa ra. ²³ Siqui arete que Antioquíaa ra. Oso que Galacia cote ra. Frigia abe no. Sucha tubiriã ngue embuchesea sea tuchi quia hue jenda ra. Jesús quiato mundua ndua hue jenda.

Apolos Dios cheẽ senei senei

²⁴ Aque mose que judío mo ngasẽ huee ra. Efésoo. Apolos, i que ee ra. Alejandría jenda que ae ra. Dios cheẽ nenei neneisa tuchi mbia je. Dios cheẽ icuasa tuchi. ²⁵ Apolos que Dios icha icuate ra. Mbia que embaaquiato quiato turã tuchi quia ra. Mbia mbaaquiato turã Jesús rĩĩ. Juan Bautista cheẽ achõ ngue eicua quia ra. Juan bautizar i mose mbia je. ²⁶ Apolos siquicheã tuchi que eriqui mbia mbaaquiato quiato ra. Judíos chumunuásaa. Aquila que ehandu ra. Priscila rese. Nyebe que ñquĩ Apolos rerao mbaaquiato quiato tuchi ra. Dios icha que embuchecua tuchi ee ra. ²⁷ Apolos que osose Acáyaa ra. Nyebe Jesús quiato emondo turã. Papel que embesa Acaya jenda je ra. Jesús quiato je Acaya jenda je. —Apolos jëisi turã, i ee. Apolos que ngasẽ cote ra. Ae Jesús icua quia, ñquĩ mbaaquiato quiato tuchi. ²⁸ Apolos que judíos cheẽ siquisã tuchi ra. Judíos mbia mbaaquiato choño mose. Jesús rĩĩ eã. Nyebe Apolos echeẽ ndiquisã. Dios cheẽ ngue esenei senei nguia ee ra. —Jesús rei Cristo. Ae jësaarõ arõ nguia, aque rei Jesús i tuchi que Dios cheẽ nenei ee ra.

19

Pablo que siqui Efésoo ra

¹ Sita ibate bate ite rĩ ngue Pablo si ra. Ngasẽ ngue Efeso cote ra. Apolos siqui mose Corinto. Jesús quiato mo je que Pablo ngasẽ Efésoo ra. ² Pablo que ñee ee ra. —Jë Jesús isi mose, ¿Espíritu Turã abe ique jeñiangui re re? i que Pablo ee ra. —Espíritu Turã ndese ureiranuate, i que mbia Pablo je ra. ³ Pablo que ñee ee ra. —¿Mbae rĩĩ bautizar i jëje re? i que ra. —Juan ñee nii ngue bautizar i ure je ra, i que Pablo je cote ra. ⁴ Pablo que ñee ee ra. —Juan ngue bautizar i mbia je ra. Mbia hui mose huiicuã si. “Ae ra tu serui, aque jëicua jë. Jesucristo chõ aque re”, i que Juan nda, i que Pablo ra. ⁵ Pablo cheẽ andu mose que bautizar i Jesús rĩĩ cote ra. ⁶ Pablo que o chono earõ nda. Espíritu Turã ngue ique echiangui re cote ra. Ucheemo ngue esaã saã nguia cote ra. Dios cheẽ ngue embuchecua checua quia mbia je cote ra. ⁷ Doce que ñquĩ nda. Jesús quiato.

⁸ Pablo que oso oso quia judíos chumunuasa ra. Tres meses. Siquicheã tuchi que equia Dios cheẽ nenei nenei nda. —Ererecua tuchi quiarei Dios. Jesús jëicua rã, i que Pablo quia mbia je ra. ⁹ Emo emo ngue Pablo cheẽ ñandu sereã nda. Echeẽ mumba mumba. Jesús rĩĩ ñee icuã icuã mbei mbia ja je. Nyebe Pablo nyao nguia esi. Pablo que Jesús quiato curuchoi esi ra. Curuchoi que Tiranno chuchúaa ra. Huee que eriqui embaaquiato

quiato cote ra. ¹⁰ Dos años ngue Pablo riqui huee ra. Nyebe mbia Asia jenda jirandu ja nguiã Jesús rese. Judíos jirandu ja erese. Judíos eã abe no.

¹¹ Pablo que mbae saã saã tuchi quia Dios quirãcuã je ra. Mbia mae sayã ngue esaã saã nguia ra. ¹² Mbia rasi mbucherõ sacua ngue mbia riqui tiru mbucha mbucha Pablo rese ra. Ûquĩ tiru que ecuruchoi choi quia mbia rasi je cote ra. Ûquĩ tiru ruruchoi mose, mbia rasi que nyerõ nyerõ nguia cote ra. Aba checuayã icuã abe que usẽ usẽ nguia mbia chiã si cote ra. ¹³ Judíos mo ngue ngata beite quia ra. Sucha tubiriã mbuchesea sea bei que equia ra. —Aba checuayã icuã mbusẽ aquiatute que ure ra, i que equia ra. —Jesús riĩ aba checuayã icuã nandembusẽ, i rei que nyue ra. Nyebe que ñee aba checuayã icuã mo je ra. —Jesús quirãcuã niĩ aico jembusẽ mbia si co. Ae Pablo senei senei nguia, i rei que judíos aba checuayã icuã je ra. ¹⁴ Sacerdote rerecua riirĩ abe que eĩ si ra. Siete eririĩ. Esceva, i que sacerdote rerecua je ra. Judío que ae ra. Ae riirĩ ngue eĩ si rei no nda. ¹⁵ Ûquĩ ngue ñee ndei aba checuayã icuã je ra. Aba checuayã icuã ngue echeẽ mumba ra. —Jesús aicua. Pablo abe aicua. ¿Aba chõ jẽ nde? Jaëicuayãte se, i que aba checuayã icuã nda. ¹⁶ Aba checuayã nyireco que oo erese cote ra. Ucuu ucuu tuchi que ùquĩ ja rese cote ra. Ûquĩ siete rese. Aba checuayã icuã nyireco quirãcuã tuchi que esi ra. Aba checuayã nyireco que ùquĩ mbasi ja ra. Nyebe ùquĩ ndasi rasi uchã aba checuayã icuã si. Eirao eã ngu e nyoĩ uchã itaicuee rĩ nda. ¹⁷ Efeso, i que hue sucha tubiriã je ra. Hue jenda que jirandu ja erese ra. Judíos que jirandu ja erese ra. Judíos eã abe no. Nyebe hue jenda siquiche ja. Nyebe mbia ñee turã turã jate Jesús riĩ. ¹⁸ Jesús quiato mo ngue ngaẽ ngaẽ nguia ra. Eya eãte que huiĩcuã ndese ra. Nyebe huiĩcuã nenei nenei. ¹⁹ Mbia tubiriã ngue mbae icuã papel mbesa ji curucuaẽ nda. Libros de brujería. Munua ja que huee ra. Ûquĩ ngue esei sei mbia ja résa cote ra. Mba e isiquia ata tuchi raque que ùquĩ libros isiquia ra. Cincuenta mil plata. ²⁰ Mbia tubiriã ngue Dios cheẽ isi isi quia ra. Dios cheẽ irãtãte que mbia tea quia cote ra.

²¹ Aquere que Pablo ñee nda. —Taso Macedonia. Acaya abe. Aquere ra aso Jerusalén cote. Jerusalén osore ra aso Roma cote, i que ra. ²² Nguesenda nyeremo ngue emondo Macedonia nda. Timoteo. Erasto rese. Pablo que siquichõ are jiri huee ra. Asia.

Efeso jenda paama i ja Pablo je

²³ Aque mose que mbia paama i tuchi Jesús riĩ nda. ²⁴ Demetrio quia rei mbia mbiĩcuã icuã nyii. Dios mbuae chuchua que esaã saã nguia ra. Mbae rendi ãtã je que eriqui sucha ñetẽ naa naa nda. Sucha ñetẽ tubiriã ngue esaã saã nguia ra. Dios mbuae chuchuarã. Diana, i que Dios mbuae je ra. Demetrio que mbae isi tuchi quia sucha ñetẽ ndibishorõ nda. Eresenda tubiriãte que sucha ñetẽ naa naasa ra. ²⁵ Nguesenda ja que emunua nda. Dios mbuae chuchua raãsa que emunua ja ra. Ñee ngue ee ra. —Mbae nandesi turãte rei nguiã nandechiao ribishorõ ã. ²⁶ Pablo riqui ñee ñee mbia je co. “Dios mbuae mbia chia rei eicuãte”, i Pablo quia co. Mbia riqui echeẽ mumbayãte ã. A jendachõ eã ñene. Efeso miĩ eã ñene. Asia jenda abe eriqui echeẽ andu ã. ²⁷ Ûquĩ icuãte nande je. Nandechiao ra mbia isi isiã ñochĩ cote re. Mbia ra hui ja chõchĩ Diana chuchua si cote re. Diana abe si ra mbia hui chõchĩ nde. Nandererecua tuchi que Diana. Mbia chiĩcua tuchi que ae. Asia jenda chiĩcua tuchi que ae. ¡Mbia ra hui chõchĩ esi jẽ! i que Demetrio ra.

²⁸ Demetrio resenda echeẽ andu mose que paama ite ra. —¡Diana quirãcuãte jẽ! ¡Efeso jenda rerecua quirãcuãte jẽ! i tuchi que mbia tasẽ tasẽ nda. ²⁹ Hue jenda que paama i ja ra. Pare pare i tuchi. Pablo resenda nyeremo ngue eisi ra. Gayo. Aristarco rese. Macedonia jenda. Ûquĩ nyeremo ngue ecuruchoi mbia chumunuásaa ra. ³⁰ —Taique se abe. Tacheẽ ñee mbia je, i rei que Pablo ra. Jesús quiato que Pablo siquisã nda. ³¹ Asia jenda rerecua mo abe que ucheẽ mondo Pablo je ra. —¡Ereiquechĩ nda nde jẽ! i Pablo je. Pablo quiato que ùquĩ nda. ³² Mbia que pare pare i tuchi ra. Tasẽ tasẽ ja que ra. Hue rĩ ja mbia ndua eãte. Mbae miĩ ndese ndua eã. Paama i chooño ja. Eaquiata ño ñumunua ñooño nguiã. ³³ Mbia mo ngue mbae senei senei ja Alejandro je ra. Judíos que Alejandro mua mbia ite

re cote ra. —Echeẽ mbia ja je, i que ee ra. Alejandro que o mee mbia je ra. —¡Jẽquiriri chõ jẽ! i rei ngue ee re. —Mbia je tacheẽ. Ì nda paama iã judíos je, i rei ngue re. ³⁴ — Judío chõ Alejandro riqui re, i ja que mbia ra. Nyebe mbia riqui tasẽ tasẽ mbeite re. Dos horas. —¡Diana quirãcuãte jẽ! ¡Efeso jenda rerecua quirãcuãte jẽ! i tuchi que mbia tasẽ tasẽ nda. ³⁵ Secretario rei ererecua mo. Aque que mbia cheẽ siquisã cote ra. Ñee ngue ee cote ra. —Tacheẽ jẽje, Efeso jenda. Efeso jenda chõ nande re. Diana ndei nandererecua. Nande rei Diana ndaarõsa. Diana naanguia ngue tu ibei si, aque raarõsa chõ nande re. Diana chuchua raarõsa abe chõ nande re. Mbia jirandu jate ùquĩ ndese. ³⁶ Emo eicuayã eãte. Nyebe jẽquiriri chõ jẽ. ¡Jẽaquiataã jẽsaã saã eã ño jẽ! ³⁷ Ae jẽisi seru nae, ùquĩ mbae mbuquiachã eãte dios mbuae chuchúaa. Ùquĩ ñee icuã icuã eãte dios mbuae riĩ. Dios mbuae jenderecua riĩ. ³⁸ Demetrio ñee icuãse mose emo niĩ, sã esi nandererecua chuchúaa. Demetrio resenda ñee icuãse mose emo niĩ, sã echoi nandererecua chuchúaa. Huee chõ ererecua riqui nguiã mbia cheẽ andu. Sã echoi ja ererecua je. Sã ñee ñee ja nyue ererecua résaa. Mbae icuã niĩ. ³⁹ Mbae mo niĩ abe mose, jeñee mbia chumunua mose. ⁴⁰ Jesús quiato que nandeisi chooñochĩ nda. Nandechimbiã ñooño ño nguiã. Nandererecua ñee arõte nande je. Echeẽ nda nandesibishorõ eã, i que secretario ra. ⁴¹ Aquere que hui mbia si ra. Mbia mbui que cote ra.

20

Pablo nyoĩ Macedóniaa, Gréciaa abe

¹ Mbia quiriri mose que Pablo Jesús quiato munua nda. Embaaquiato quiato jiri. — Co acua quia co, i que ee cote ra. Macedóniaa ngue echoi cote ra. ² Hue jenda sucha mbuchesea seate que echoi ra. Jesús quiato mundua ndua. Ngasẽ ngue Gréciaa cote ra. ³ Huee que eriqui are jiri ra. Tres nyasi. —Taso Siria ama ndisha rui, i rei que cote ra. Jirandu que judíos icuã ndese cote ra. —Nandeisi, i nda judíos quia Pablo riĩ nda. Nyebe Pablo ru nguiã nyebi si Macedonia. ⁴ ã ngue nyoĩ erese ra. Eata rete. Sópater. Berea jenda. Aristarco. Segundo abe. Tesalónica jenda rei ùquĩ. Gayo. Derbe jenda. Timoteo. Tíquico. Trófimo. Asia jenda rei ùquĩ. ⁵ Ùquĩ ja rane nguia nyoĩ nguiã ure si. Troas que echi nguiã ureraarõ. ⁶ Fiesta de Pascua mose que urecu Filipos ra. Aquere que ureso ama ndisha rui cote ra. Cinco días que tu ure je ama ndisha ite re ra. Urecuasẽ namo ngue Troas cote ra. Ae ureraarõ arõ nguia, ùquĩ ngue uresiiti cote ra. Urecu are jiri que hue cote ra. Siete días.

Pablo nyoĩ Troas

⁷ Jesús quiato que ñumunua ja domingo mose cote ra. Mbichae sia sia nyue. Pablo que embaaquiato quiato quia ra. —Taso isamami, i que ra. Nyebe embaaquiato quiato itondiite mose chee. ⁸ Sucha ibátee que echi ñumunua nda. Eironguia ibate tuchi que ra. Ibate tuchi que echi ñumunua nda. Tata rendi tubiriã ngue etesae tuchi ra. ⁹ Mbia mo ngue chí ibate ra. Ventana tose. Etiarõ namo ngue ra. Eutico, i que ee ra. Uque que huĩ ngoi ibate ra. Pablo que ñee oco tuchi embeesi esi ra. Eque que tu ngoi ibate si ra. Mano ndei que ra. Tambuchuruã, i rei que emo nda. Eraaque chõ eriqui reaẽ. ¹⁰ Pablo que nguichi u erea ra. Oo tuchi que erese ra. Quiaama ngue ra. —¡Jẽsiquichechĩ nda jẽ! Manoãte, i que Pablo mbia je ra. ¹¹ Pablo que osoi nyui ra. Mbichae que echisia sia ra. U que ra. Mbia que embaaquiato quiatube ra. Eresaitõ ndabe chee. Oso que erecha cote ra. ¹² Ae ngoi nae, erasiã ño ngue mbia curuchoichĩ nguiã. Mbia ia tuchi que ngoi je rese cote ra.

Pablo nyoĩ Milétoo

¹³ Pablo que ñee nda. —Ibi rĩ taso se Asón. Hue si ra aso jendese cote. Ama ndisha rui, i que ra. Nyebe ure rane ureso nguiã ama ndisha rui. ¹⁴ Ae urecuasẽ nguiã Pablo je Asón cote. Pablo que oso urerese am a ndisha rui cote ra. Canoa naanguia ye. Urecuasẽ ngue Mitilene cote ra. ¹⁵ Hue si que ureso ra. Isamami ngue ejoõ acua mo urechucuã

cote ra. Quío, i que hue ejoõ acua je ra. Isamami nongue que urecuasẽ Samos cote ra. Hue si que ureso Trogílioo ra. Huee que urequeneã ureucua ra. Isamami ngue urecuasẽ Milétoo cote ra. ¹⁶ Pablo que quicoi asi Asia si ra. Nyebe uresoã Efésoo. —Tacuasẽ quicoi oso Jerusalén. Fiesta de Pentecostés taicusu oso ngasẽ, i que Pablo ra.

Pablo ñee Jesús quiato rerecua je, Efeso jenda je

¹⁷ Mileto si que Pablo emo mundo Efésoo ra. —Jenyu, i que amei je ra. Jesús quiato rerecua je. ¹⁸ Ūquĩ ngue ngaẽ ee ra. Pablo que ñee ee ra. —Cosete que achu Asia ra. Seicuate raque se. Sechisaã jêicuate raque. ¹⁹ Dios cheẽ ngue asenei senei turã tuchi quia jêje. Secuasú que asaã saã eãte quia jêje. Acheseo tuchi que sequia mbia rese. Judíos que sembasi mbasi tuchi quia ra. “Taiquia”, i rei que judíos quia seje ra. ²⁰ Dios cheẽ ngue asenei senei mbeite quia jêje. Asiquicheã mbei que sequia erenei nenei jêje. Jembitirõ sacua. Jeñumunua nua mose. Jenyuchúaa ja abe que aico Dios cheẽ nenei nenei jêje. ²¹ Acheẽ tuchi que jêje. Judíos je. Judíos eã je ab e no. “¡Jêicuã si jêhui rá! Jesucristo jêicua rá”, ae tuchi que sequia jêje. ²² Co aso quia Jerusalén co. Co Espíritu Turã sererao quia Jerusalén co. Mañi ño nda seje pee. ²³ Co mii ño aicua nguiã. Espíritu Turã ngue ñee seje ra. Sucha mbuchesea sea mose que eriqui ñee ñee seje. Mbia icuãte ra seje. Sembasi rae. Sematã ndae. Setarõ ndae. Espíritu Turã ngue sembiirandu ra. ²⁴ Sesiquicheãte ũquĩ si. Sã seiquia quiatu. “Dios turã esenei senei mbei quia mbia je”, i que Jesús seje ra. Aque mii ndese chõ aico nguiã ndu a co. Echeẽ mii ndese. Í nda echeẽ amumba eã. ²⁵ Dios nandererecua que asenei senei tuchi jêje. Jemae eã mbei ra serese cote. Aicuate se quia co. ²⁶ Jemo siqui sereã mose Jesús rese, se eã ño cote re. Jẽ ño cote re. Jẽ ja je chõ ngue asenei senei ndesẽ. ²⁷ Dios cheẽ ngue asenei senei jate jêje. Asiquicheã mbei que sequia erenei nenei jêje. Dios cheẽ mo ngue atibo tibo eãte jêje. ²⁸ ¡Jéingo turã ño nyiese jê! ¡Jesús quiato abe jêteaquiato quia jê! Espíritu Turã ngue ñee jêje resẽ. “Jesús quiato rerecuarã jê”, i que Espíritu Turã jêje resẽ. Jesús quiato jêteaquiato quia jê. Ūquĩ ndibishorõ ngue Jesús nguqui mundo ra. Umano mose. ²⁹ Seso mose ra emo ngaẽ ñee ñooño jêje. Tambiirĩ irĩ, i ra jêje. Eicuã ño ũquĩ nde. Nyacua rá sí. ³⁰ Jendese ra emo ndiqui. Jesús quiato mbaaquiato icuã icuã. Jesús quiato mbiirĩ irĩ. “Í nda Jesús quiato siqui nanderese”, i ra ũquĩ. ³¹ Jêteaquiato jê. Jaembaaquiato quiatu tuchi que se. Tres años. Jẽ ja que jaembaaquiato quiatu. Acheseo tuchi que sequia jendese. ³² Aico jendecha Dios je a. Aico jendecha Dios turã je a. ¡Dios cheẽ turã jemumbayã mbei quia jê! Dios cheẽ nda jembuquirãcuã. Dios cheẽ nda jemingo tuchi Jesús quiato rese. ³³ Mbae isiquia que achosei chosei áte quia mbia mbae aẽ. Mbia irao abe que achosei chiãte quia aẽ. ³⁴ Seicuate rei que equia aẽ. Se sí chõ aquiẽi quieĩ nguiã icua. Seresenda mbaerã abe que aquiẽi quieĩ quia aẽ. ³⁵ Jaembaaquiato quiatu beite que se. “Jêquieĩ quieĩ”, ae beite que sequia jêje. “Mbaecha reã je mbae jemee mee”, ae que sequia jêje. Jesús cheẽ ndese jendua. “Ae mbae meeño nguia emo je, eya tuchi chõ aque re. Ae eo jenda isi, aque quia eya tuchiã jiri”, i que Jesús nande je ra, i que Pablo Efeso jenda je ra.

³⁶ Aquere que Pablo ngoi nguiã ndese ra. Ñee ngue Dios je ra. Ūquĩ ndes e ja. ³⁷ Mbia que nyese o ja Pablo rese ra. Quiaama ama ngue ra. Eritii que esiite it e ra. ³⁸ —Jemae iã nda serese cote, i que Pablo ee ra. Nyebe que eya eã tuchi ra. Pablo rese que echoi erasaa ra. Ama ndisha rimia ndese. Pablo so rese mae.

21

Pablo nyoi Jerusalén

¹ Urecuata que ũquĩ ndecha cote ra. Canoa naanguia ye que ureso cote ra. Cos que ureso ra. Isamami ngue ureso Rodas cote ra. Hue si que ureso Pátaraa cote ra. ² Huee que canoa mo chi ure je ra. Fenisia rĩ ngue esi quia ra. Aque ye que urea cote ra. Eye que ureso cote ra. ³ Chipre rese que uremae nda. Ejoõ acua. Ejii rĩ ngue ureso ra. Síriaa que ureso ra. Tiro que ure cu mbiirĩ cote ra. Huee que canoa yenda jea jea ra. ⁴ Jesús

quiato que urembirō hue jenda ra. Siete días que ureico erese ra. Espíritu Turã ngue hue jenda mbucheẽ Pablo je ra. —¡Eresochĩ nda Jerusalén jê! i rei ngue Pablo je re. ⁵ Aquere que ureso cote ra. Jesús quiato que nyoĩ ja urerese ra. Ama nimia ndese. Eresebe echoĩ urerese. Nguiĩrĩ abe ruruchoĩ. Ama ndisha rimia ndes e que urecoĩ ja urenía ndese ra. Ñee ñee Dios je. ⁶ Urechiquiaama ama ja que cote ra. —Co urecua quia co, ure que ee ra. Canoa ye que ureso cote ra. Hue jenda que nyoĩ nyebi uchuchúaa cote ra.

⁷ Tiro si que ureso cote ra. Ureso que Tolemada ra. Huee que urecheẽ ñee Jesús quiato je ra. Ureitō mii ngue erese ra. ⁸ Isamami ngue ureso cote ra. Cesaréaa que urecuasẽ nda. Felipe chuchúaa que ureso ra. Ae que Jesús cheẽ nenei neneisa ra. Ae que mbaecha reã mbuquiaru sa ra. Diáconos, i que mbaecha reã mbu quiarusa je ra. Aque chuchúaa que urecu ra. ⁹ Cuatro que Felipe rucucha ra. Eruã ja. Dios cheẽ nenei neneisa ja que ũquĩ nda. ¹⁰ Huee urecu are jiri mose que emo ndu ra. Judea si. Agabo, i que ee ra. Dios cheẽ nenei neneisa que ae abe ra. ¹¹ Ae que tu ure je ra. Pablo numbicuaa que eisi ra. O que echucua eye ra. Hui abe que echucua ra. Pablo numbicuaa je. Ñee ngue cote ra. —Espíritu Turã ndiqui ñee ndeje a. “ĩ nda judíos ndecua pee Jerusalén. Neme nda judíos eã je cote”, i que Espíritu Turã nda, i que Agabo Pablo je ra. ¹² Ure eandu mose que urecheẽ Pablo je ra. Cesarea jenda abe que ñee ee ra. —¡Eresochĩ nda Jerusalén jê! ure ja rei ngue ee re. ¹³ Pablo que ñee ure je ra. —¿Mbaerã jẽingo nyeseo seo serese re? ¿Mbaerã jẽingo sembia eãte re? ¿Mbaete ere? Sã secua Jerusalén ae. Sã seiquia Jesús rĩ ae, i que Pablo ra. ¹⁴ Pablo que uresiquisã aroneate ra. Nyebe urecheẽ eã nguiã e e cote. —Sã Dios ae riqui ñee ñee ee no, ure chee que ra.

¹⁵ Ureico quiatu que cote ra. Ureso que Jerusalén cote ra. ¹⁶ Jesús quiato mo abe que nyoĩ urerese ra. Cesarea jenda. Chipre jenda mo ngue siqui Jerusalén nda. Masón, i que ee ra. Jesús quiato tuchi que ra. Cose tuchi que eriqui Jesús rese ra. Cesarea jenda que urererao Masón nyuchúaa ra. Huee que urecu erese ra.

Pablo oso Jacobo rea

¹⁷ Jesús quiato ia tuchi que urecuasẽ mose Jerusalén nda. Ureisi turã ngue ra. ¹⁸ Isamami ngue Pablo si Jacobo rea ra. Ure abe que ureso erese ra. Huee que ameĩ ja chi ra. Jesús quiato rerecua. ¹⁹ Pablo que ñee ee ra. Mba e renei nenei ja ee. —Dios que siqui tuchi serese ra. Se echeẽ nenei nenei mose judíos eã je, i que Pablo Jesús quiato rerecua je ra. ²⁰ Pablo cheẽ andu mose que ñee turã turã Dios je ra. Ñee ngue Pablo je cote ra. —Jesús quiato tubiriãte que judíos cote ra. “¡Moisés cheẽ ndui si chõ nandeico jê!” i tuchi que ũquĩ nguia ra. ²¹ ũquĩ ndiqui ñee icuã icuã nderĩ ũquĩ. “Pablo que judíos ataque mbui Moisés cheẽ si ra”, i equia nderĩ ũquĩ. “ ‘Coche rei Moisés cheẽ jemumba. ¡Circuncisión jësaãchĩ jendiĩrĩ je jê! ¡Judíos ataque chisaã saã nda jësaãchĩ jê!’ , i que Pablo quia judíos je ra”, i rei equia nderĩ ũquĩ. ²² ¿Mañi nande ra re? Jesús quiato ra ñumunua ja judíos. Jirandu mose ndereco mose a. ²³ ¡ĩ ere jê! Mbia cuatro que siqui urerese ra. ũquĩ ngue ñee Dios je ra. “Ã nda uresaã ndeje”, i que ũquĩ Dios je ra. ũquĩ nda esaã ee cote. ²⁴ ũquĩ erao Dios chuchúaa. ũquĩ na si esaã nde abe. Nembuturã sacua. Mbae isiquia emondo ee Dios chuchúaa. Queñi ua sia cote. ĩ ere quiatu. Mbia ra jirandu jate nderese. “Pablo abe riqui Moisés cheẽ mumbayã tuchichĩ nande rã si”, i ra nderĩ cote. ²⁵ Judíos eã je que nandechẽ Jesús quiato je. Nandechẽ mii ño ngue nandemondo ee. ĩ nande chõ ngue ee. “Mbia soo mondo mondo mose dios mo je, ¡aque soo ra jëuchĩ jê! ¡Eruqui resebe ra soo jëuchĩ jê! ¡Mbae ruqui ra jëuchĩ jê! ¡Jeninisi rese rocoĩ nda jëingochĩ emo ndese jê! ¡Jendu rese rocoĩ nda jëingochĩ emo ndes e jê!” nande que judíos eã je, i que Jesús quiato rerecua Pablo je ra.

Soldados rerecua Pablo isi

²⁶ Pablo que ũquĩ cuatro querao cote ra. Dios chuchúaa que ererao ra. Isamami ngue Pablo ñimbitirō nda. ũquĩ cuatro rese. Oso que ñee Dios chuchua rerecua je cote ra.

—Aque mose ra mbae mo ureiquia Dios je cote, i que Pablo ee ra. ²⁷ Siete días que echi huee ra. Judíos mo ngue mae Pablo rese cote ra. Asia jenda mo. Dios chuchúaa Pablo chí mose que judíos mae erese ra. Ũquĩ ngue mbia mbiicuã Pablo je ra. Oo que Pablo rese ra. Isi que ra. ²⁸ Tasē tasē ngue ñee mbia je ra. —¡Israel jenda! Jenyu rã urerese. Pablo nandeisi rã. Ae quia oso oso beite nguiã ñee icuã icuã judíos rĩĩ. Moisés cheẽ ni i abe quia eriqui nguiã ñee icuã icuã mbeite. Dios chuchua rĩĩ abe quia eriqui nguiã ñee icuã icuã mbeite. Judíos eã mo abete quia equeruchĩ nguiã Dios chuchúaa. Dios chuchua mbiicuãte nyeresē, i que mbia paama i Pablo je ra. ²⁹ Pablo quia ñi siquichĩ nguiã Trófimo ndese. Pablo quia Trófimo querao abareãte nguiã Dios chuchúaa judíos je. Nyebe ngue mbia riqui nguiã ñee icuã icuã ee. Judíos eã nguia ñi ngue Trófimo nde. Efeso jenda quia ñi ngue Trófimo nde. Nyebe ngue mbia riqui nguiã ñee icuã icuã Pablo je. ³⁰ Hue jenda que ñimbiicuã tuchi Pablo je ra. Oo ja que erese ra. Isi que ra. Mbutiriri que Dios chuchua si ra. Dios chuchua que ematã cote ra. ³¹ Pablo nda mbia iquia nguiã ña. Emo ngue oso ñee soldados rerecua je ra. —Mbia Pablo iquia serĩte quia pee, i que oso ee ra. ³² Soldados rerecua que soldados munua nda. Oficiales abe no. Nyoĩ asi que mbia icuã ndea cote ra. Mbia que Pablo iruã nua eã cote ra. Soldados rese mae mose. ³³ Ererecua que oso Pablo rea ra. Pablo isi que ra. —Echucua cadenas je, i que soldados je Pablo rĩĩ nda. Ererecua que ñee mbia je cote ra. —¿Aba co re? ¿Mbae icuã esaã jēje re? i que mbia je ra. ³⁴ Hue rĩ ja mbia ñee eã ee. Mbia que ñee ata ata ee ra. Tasē tasēte que ñee ee ra. Ñee ñooño ererecua je. —¿Mbae ra aba icua jeñee nde? i chee que ererecua mbia je ra. —Pablo jjenja mbĩrĩ na cuartel, i que ererecua soldados je ra. ³⁵ Pablo ruruchoi que ra. Ngasē ngue eiquesa rurubi cote ra. Hue que mbia icuã icuã sí Pablo je no nda. Nyebe soldados ecuruchoi nguiã sui cote. ³⁶ Mbia que tasē tasē ngaē nguia erui ra. —¡Jēiquia rei ae! i que mbia cuaē nguia erui ra.

Pablo ñee mbia cuabē je

³⁷ Pablo nda emingue nguiã soldados chuchúaa chã. Ae Pablo ñee ño nguiã ererecua je. —Tacheẽ na, i que ererecua je ra. ³⁸ Ererecua que ñee Pablo je cote ra. —¿Griego cheẽ ereicuate nde re? Egipto jenda ereico reĩ seje. Ae eicuã icuã ndiqui gobierno je, ¿ũquĩ nderecua eã nde re? ¿Nde mbia iquia iquiasa rerecua eã nde re? Cuatro mil mbia iquiasa. ¿Nde ererao eã turúquiaa re? i que ererecua Pablo je ra. ³⁹ Pablo que ñee ee ra. —Tei. Judío chō se re. Tarso jenda chō se re. Sucha tubĩriã tuchi que Tarso de Cilíciaa ra. Tacheẽ na mbia je, aechĩ nguiã ndeje, i que Pablo ererecua je ra. ⁴⁰ —Eno. Echeẽ ee, i que ererecua ra. Eironguia ibate rese que Pablo ñi juã nda. O que emee mbia mbuquiriri ra. Mbia quiriri mose que ñee ee ra. Judíos cheẽ ngue esaã mbia je ra.

22

¹ —Seataque, seandu rã. “Eicuã”, jenyechĩ nguiã seje. Nyebe tacheẽ jēje, i que Pablo ra. ² Pablo judíos cheẽ naa mose, mbia que quiriri ja tuchi cote ra. Pablo que ñee mbei mbia je ra. ³ —Judío chō se re. Társoo que achaacuquia ra. Tarso de Cilicia. Aa que atiarō nda. Jerusalén ngue atiarō nda. Gamaliel que sembaaquiatusa ra. Nanderamei ndui si que sembaaquiatusa quiatusa ra. Eraã si. Dios cheẽ ngue amumba sereã tuchi ra. Sã jēingo namo ã no. ⁴ Seicuã tuchi que eriqui Jesús quiato je nyii ra. Emo emo ngue aiquia chee ra. Emo emo ngue aru aru quia tarō nda. Mbia ninisi abe que atarō tarō nguia ra. ⁵ Sacerdote rerecua que cartas mondo seje ra. Judíos rerecua abe que cartas mondo seje ra. Damáscoo nda aso nguiã ererao chã. Judíos je nda cartas arao nguiã ña. Hue jenda je. Damáscoo nda aso nguiã ña. Jesús quiato requia requia. Aa nda aru nguiã tarō ña. Aa nda aru nguiã eiruã nua ña. Jenderecua ũquĩ icuate raque. Jeñee ee ae.

Aico uba Dios rese co cote, i Pablo

⁶ Acuasē nda Damáscoo chã nde. Tenda ibate que tata mo tu seresae ra. Ibate si que eru ra. Tata rendi que seresae tuchi ra. Sembua tuchi que ra. ⁷ Tata rendi rese mae mose

que acoi oso íbii ra. Echeẽ mo ngue achandu ra. “Saulo, Saulo. ¿Mbaerã ndeicuãte riqui seje re?” i que seje ra. ⁸ “¿Aba nde re?” ae que ee ra. “Jesús rei se. Nazaret jenda. Ae je ndeicuãte riqui”, i que seje ra. ⁹ Seresenda que siquiche tuchi ra. Mae ndei ngue tata rese re. Echeẽ nguia echanuate nguia. ¹⁰ “¿Mañi ae ra se re, Sererecua?” ae que se ra. “Dios que ndeirabo ra. Ehuã cote. Ecuasẽ oso cote. Damáscoo. Mbae riñ nda acheẽ ja ndeje huee cote”, i que Jesús seje ra. ¹¹ Tata rendi que seresa mungue ra. Seresayã. Nyebe seresenda sererao nguia seo rese. Damáscoo.

¹² Huee que emo ndiqu i ra. Ananías, i que ee ra. Moisé s cheẽ ngue emumbayã tuchi quia ra. Judíos hue jenda que ñee turã ja quia ee ra. ¹³ Ananías que tu serea ra. Ñee ngue seje ra. “Saulo, Jesús quiato ereico co cote. Emae cote”, i que seje ra. Seresa turã ngue cote ra. Amae ngue erese cote ra. ¹⁴ Ananías que ñee seje ra. “Nanderu rerecua que Dios ra. Dios que ndeisi cose ra. Ae Dios chosei quia, ùquĩ icua sacua ngue Dios ndeisi cose ra. Jesús turã ndese mae sacua ngue ndeisi cose ra. Jesús cheẽ andu sacua ngue ndeisi cose ra. ¹⁵ Dios cheẽ nda eresenei senei mbia ja je cote. Ae erechandu, ùquĩ nda eresenei senei mbia ja je cote. Ae rese eremae, ùquĩ nda eresenei senei mbia ja je cote. ¹⁶ ¿Mbaerã ereico chõte a re? Ehuã na. Sã Jesús quiato bautizar i ndeje. Echeẽ na Jesucristo je. Sã Dios ndeicuã mbutiã”, i que Ananías seje ra.

Dios que atea cuu ra, i Pablo

¹⁷ Achube que Jerusalén nda. Aso que ñee Dios je ra. Dios chuchúaa. Huee que Jesús atea cuu ra. ¹⁸ Jesús que atea ra. Ñee ngue seje ra. “Eso asi Jerusalén si. A jenda ra ndecheẽ mumba mumbate, nde serenei nenei mose. Eso erecha” i que Jesús seje ra. ¹⁹ Acheẽ ngue Jesús je ra. “Sererecua, a jenda que seicuate nyii ra. Seicuãte que eriqui nyii ra. Jesús quiato que asirõ sirõ nguia judíos chumunuasa si nyii ra. Atarõ tarõ ngue sequia ra. Airuã nua ngue sequia nyii ra. ²⁰ Mbia Esteban iquia mose, seyate que ùquĩ mose ra. Huee que aico ra. Eiquiasa irao que asarõ nda”, ae que Jesús je cuu ra. ²¹ Jesús que ñee seje ra. “Eso. Taremondo isho. Secheẽ nda eresenei seneite judíos eã je”, i que Jesús seje ra, i que Pablo mbia je ra.

²² Judíos eã ñi ñee mose que mbia nyiibute cote ra. Pablo cheẽ andu sereã cote. — ¡Pablo nandeiquia rei jẽ! Ñ nda eriquiã cote, i que judíos tasẽ tasẽ nda. ²³ Mbia paama i ja Pablo je. Tasẽ tasẽ. Huiãrao mbaaba aba. Ibi tuba ara ara mombo mombo ibate. ²⁴ Soldados rerecua que ñee cote ra. — Pablo jendao matã. ¡Nandeiruã nua jẽ! Ñ nda ñee, i que ererecua ra. — ¿Mbaerã mbia ñee icuã icuã ndeje re? i Pablo je. ²⁵ Soldados que Pablo chucua ra. Iruã nua nda eña nde. Pablo que ñee capitán je cote ra. — ¿Mbaerã nda seiruã nua nde? Romano ño se resẽ. Mbae icuã asaã eãte resẽ, i que ra. ²⁶ Capitán ngue oso ererecua mbiirandu cote ra. Pablo cheẽ nguire. — ¡Ereiruã nuachĩ nda jẽ! Romano ño ae re, i que capitán nda. ²⁷ Ererecua que oso ñee Pablo je cote ra. ¿Romano nde re? i que ee ra. Ae, i que ee ra. ²⁸ Ererecua que ñee mbe ee ra. — Mbae isiquia que amondo tuchi mbia je ra. “Romano” i nonde seje, i que ererecua Pablo je ra. Pablo que ñee ee ra. — Romano mbei chõ se re. Sechiacuquia mosenda bei, i que ra. ²⁹ Pablo iruã nua eã ngue cote ra. Mbia que hui esi cote ra. Mbia siquiche ja tuchi que cote ra. — Pablo nandechucuachĩ. Romano ño eriqui re, i que mbia cote ra. Ererecua abe que siquiche tuchi cote ra. Pablo o cuare.

Ererecua ñu munua Pablo cheẽ andu

³⁰ — ¿Mbaerã judíos paama i Pablo je re? i que soldados rerecua ra. Isamami ngue ererecua ataque munua cote ra. Sacerdote rerecua ja. Amei ererecua ja. Pablo que ecuruchoi ererecua achõ je cote ra. Ñquĩ ererecua ñee sacua ee.

23

¹ Pablo que mae huĩ ererecua ja rese ra. Ñee ngue ee ra. — Seresenda, mbae turã ndese aico bei co. Namu abe. Nyebe sesiquicheã mbei riqui Dios si co, i que Pablo ra. ² Ananías, i sacerdote rerecua je. Aque que ñee Pablo ji jenda je ra. — Pablo churu rese jengua, i

que ra. ³ Pablo que ñee ee cote ra. —Dios ra ucua nderese jê. Ndeturã eresaã ñooñoçhĩ nguiã. “¡Moisés cheẽ nda jemumbachĩ jê!” ere rei que ure je. ¿Mbaerã ereico echeẽ mumba mumba nde re? “Jengua Pablo churu rese”, ere chõchĩ nguiã serĩ. Moisés cheẽ mumba, i que Pablo ee ra. ⁴ Pablo cheẽ andusa que ñee asite ee ra. —¿Mbaerã erecheẽ icuã sacerdote rerecua je re? Dios emingo rei a resẽ, i que Pablo je ra. ⁵ Pablo que ñee ee ra. —Sacerdote rerecua eã eriqui reĩ nguiã seje. Ñ nda acheẽ eãte eriĩ. Aicuayãte quia ñi se re. “Jenderecua riĩ jẽingochĩ nguiã ñee icuã”, i rei que Dios ñee nande je resẽ, i que Pablo ra.

⁶ Hue riĩ ja ererecua ndua eã. Fariseos, i que ererecua ataque je ra. Saduceos, i que eataque je no nda. Nyebe Pablo ñee nguiã ee. —Seresenda, se rei fariseo. Seru ja rei fariseos no. “Mbia mano je ra quera si”, ae quiatu nguiã co. Ñquĩ je chõ mbia riqui nguiã paama i seje. Ñquĩ je chõ ngue sereru nguiã jêje, i que Pablo ererecua je ra. ⁷ Pablo cheẽ nguire que ererecua ñee icuã icuã nyue ra. Saduceos que ñee icuã icuã fariseos je ra. Fariseos abe que ñee icuã icuã saduceos je no nda. ⁸ Saduceos que ñee nguiã ra. —Mbia raaque ra quera si eã. Angeles eã ibatenda. Mbia aĩ abe eã, i que saduceos quia ra. Fariseos que echeẽ sobeishĩ nda. —Eraaque ra quera si. Angeles siqui ã ndesẽ. Mbia aĩ abe siqui ã ndesẽ, i que fariseos ra. Nyebe ererecua ñee icuã icuã nguiã nyue. ⁹ Tasẽ tasẽ tuchi que nyue ra. Fariseos mo ngue juã ñee nda. Ñquĩ ndei embesasa. Ñee ngue Pablo riĩ nda. —Pablo que mbae icuã saã eãte quia. Emo aĩ ñee ee reae. Angel mo ñee ee re no ae. Nyebe nandeico turã ee no. Ñquĩ mose ra nandeico turã Dios je abe, i que fariseos ra. ¹⁰ Mbia que ñee icuã icuã mbei chõchĩ nguiã nyue. Soldados rerecua ireĩte que eriqui ra. Mbia que Pablo iquia serĩte quia ee ra. Nyebe ñee soldados je. —Jêso Pablo rea. Jendao rã jenyuchúaa, i que ererecua soldados je ra.

¹¹ Isa que Jesús ru ñee Pablo je ra. —Eresiquiche techĩ nda, Pablo. Serenei nenei ngue se a, eĩ ere si ra oso serenei nenei Roma, i que Jesús Pablo je ra.

Pablo nandeiquia, i rei mbia

¹² Isamami ngue judíos ñee ja nyue ra. —¡Pablo nandeiquia jê! i ja nyue. Mbae mo nda nandeu eã mbei, Pablo iquiayã mbei mose. Nandeyu eã mbei ra Pablo iquiayã mbei mose. Chã Dios nandembasi, Pablo iquiayã mose, i tuchi i que judíos ñee nyue ra. ¹³ Ae Pablo iquia serĩte quia, ñquĩ cuabête que ra. Cuarenta que ra. ¹⁴ Ñquĩ ngue nyoĩ ja ñee mbia rerecua je ra. Sacerdote rerecua je abe no. —Mbae mo nda ureu eã mbei, Pablo iquiayã mbei mose. Chã Dios urembasi, Pablo iquiayã mose. ¹⁵ “¡Pablo embu ure je!” jenyẽ soldados rerecua je. “Pablo rese uremae na”, jenyẽ soldados rerecua mbiĩri irĩ. Ñeenda cúa ra urechiquitirõ erese. Pablo ra ureiquia chã, i rei que judíos ra.

¹⁶ Pablo nongue riĩri ngue jirandu erese ra. Aque que oso Pablo mbiirandu ra. Soldados chuchúaa. —¡Mbia ra nyiquitirõ tirõ nderese jê! ¡Ndeiquiachĩ nda jê! i que Pablo je ra. ¹⁷ Nyebe Pablo ñee soldado mo je ra. —Senongue riĩri erao ndererecua je. Ñee nda ndererecua je chã, i que Pablo ra. ¹⁸ Nyebe ererao nguiã nguerecua je. —Pablo que acuanindu mbu ra. Mbae i chõ nda ndeje, i nguerecua je. ¹⁹ Ererecua que acuanindu querao eo rese ra. Pe jiri que eñi ñee ee ra. —¿Mbae ere u ñee seje re? i que ererecua ra. ²⁰ Acuanindu que ñee ererecua je cote ra. —Judíos ra ñee ndeje. “Pablo embu ererecua chumunua mose. Ererecua ra Pablo cheẽ ñandu”, i ra nemiĩri irĩ. ²¹ Ñee ñooño nda ndeje. ¡Echeẽ nda eremumbayãchĩ jê! Judíos cuabê nda nyiquitirõ tirõ erese. Cuarenta. “Mbae mo nda nandeu eã mbei Pablo iquiayã mbei mose. Nandeyu eã mbei ra Pablo iquiayã mbei mose”, i tuchi judíos, i que acuanindu ererecua mbiirandu ra. ²² Soldados rerecua que ñee acuanindu je ra. —¡Equiriri chõ oso! ¡Erecheẽchĩ nda emo je jê! i que ee ra.

Pablo mondo ererecua Félix je

²³ Ererecua que ñee ererecua ataque mo je cote ra. —Sã soldados icoquiātu. Sã echoi Cesarea itondáruu. Sã doscientos choi ibi riĩ. Sã setenta choi ticuasú ato. Sã doscientos

choi ira racuatirõ ji rerecua. Cesarea ra jêso itondaru, i que soldados rerecua ñee nda. ²⁴ —¡Ticuasú jêisi mua Pablo rendacuã jê! ¡Pablo jendao turã nguia jê! Jendao turã ererecua Félix je, i que soldados rerecua ra. ²⁵ Embesa ji que emondo Félix je ra. Ñe nguie carta mbesa ra: ²⁶ —Se rei Claudio Lisias. Co ambesa quia ndeje co, Félix. Mbia rerecua tuchi quiarei nde. ²⁷ Co amondo quia ndeje co. Pablo, i equia ee. Judíos eisichĩ neaẽ. “Nandeiquia”, i rei ereaẽ. Se chõ nguie asiquisã nguiã. Romano ndei ae. Nyebe mbia asiquisã nguiã esi. ²⁸ Judíos rerecua chumunua mose que Pablo arao ee ra. “¿Mbaerã mbia icuãt e riqui Pablo je re?” ae rei nguie ñee ererecua je re. ²⁹ “Pablo nandetarõ”, i rei que judíos quia ra. “Pablo nandeiquia”, i rei que judíos quia ra. Pablo siquifã ndaque mbae icuã ndese. Judíos cose ndare cheẽ nguire chõ nguie judíos paama i Pablo je ra. ³⁰ Airandu que erese ra. “Judíos ra Pablo iquia”, i que mbia mo ñee seje ra. Nyebe aico nguiã Pablo mondo ndeje aque. Ae eicuã icuãte riqui Pablo je, ùquĩ je que acheẽ nda. “Jêso quia ñee Félix je”, ae chõ nguie ee ra. Hasta luego. Ñe nguie carta mbesa ra.

³¹ Soldados que Pablo curuchoi isa ra. Nguerecua cheẽ nguire. Ngasẽ nguie Antípatris ra. ³² Soldados que nyoĩ ibi rĩ, ùquĩ nguie ngaẽ nyebi isamami nda. Ae nyoĩ ticuasú ato, ùquĩ nguie nyoĩ bei ngasẽ Pablo ruruchoi ra. ³³ Ngasẽ nguie Cesaréaa ra. Soldados rerecua chimbresa que emondo mbia rerecua je ra. Pablo abe que emondo mbia rerecua je ra. ³⁴ Mbia rerecua que mae huĩ carta echimbresa rese ra. —¿Ma jenda nde re? i que Pablo je cote ra. —Cilicia jenda rei se, i que Pablo ee ra. ³⁵ —Ae ñee icuã icuã nguia ndeje, ùquĩ ngasẽ mose ra ndecheẽ achandu ja, i que ererecua Pablo je ra. —Pablo jêteaquiato tuchi Herodes chuchúaa, i que soldados je cote ra.

24

Judíos ererecua mbicuãse Pablo rĩ

¹ Cinco días mose que sacerdote rerecua ngasẽ Cesaréaa cote ra. Ananías, i equia sacerdote rerecua je. Ererecua ataque mo nguie ngasẽ erese ra. Tértulo abe que ngasẽ erese ra. Abogado rei Tértulo. Ngasẽ nguie ecuaẽ ñee ñooño Félix je ra. Pablo rĩ. ² Soldados que Pablo curucuaẽ ererecua chumunua mose ra. Tértulo que ñee icuã tuchi Pablo rĩ cote ra. Ererecua nda embicuã nguiã Pablo rĩcharã ña. Ñee nguie ererecua je ra. —Ndeturãte eriqui ure je co, Urererecua. Ndeaquiatute eriqui ur e je co. Urembiate equia co. ³ Nyebe “iaanye” ure bei nguiã ndeje co, Félix. ⁴ Ureandu mbirĩ na. Urecheẽ oco eã nda ndeje nye. ⁵ Pablo quiarei siqui chooñoa judíos je. Judíos mbuchesea sea ja. Embicuã icuã uchue. Nazarenos, i que judíos ataque mo je ra. Ùquĩ nderecua rei Pablo. ⁶ Pablo que Dios chuchua mbicuã serĩte rei ra. Nyebe ureisi nguiã. Urerao rei que judíos rerecua chumunua mose ra. ⁷ Lisias tu chõchĩ soldados rurucuaẽ cote. Ureriquisã. Pablo rirõ icuã ureo si. ⁸ “Jeñee icuãse mose Pablo rĩ, jeñee ño oso Félix je”, i que Lisias ure je ra. Echeẽ Pablo je no. Ereirandu ra Pablo rese cote. Eicuã ndese, i rei que Tértulo Félix je ra. ⁹ —Ae beite, i ja judíos Tértulo cheẽ mose. Ñee icuã icuã ja Pablo rĩ.

Pablo ñee ererecua Félix je

¹⁰ Ererecua que ñoomee Pablo je cote ra. —Nde echeẽ seje cote, i chõ ñoomee nguiã ee. Pablo que ñee ee cote ra. —Urererecua ima nde. Ndeaquiatute. Nyebe sebite riqui nguiã secheẽ mose ndeje. Ñe nguie ñee ñooño nguia serĩ nda. Echeẽ tasibishorõ ndeje. ¹¹ Namó jiri que aso Jerusalén nda. Doce días. Acheẽ ñee nguie oso Dios je ra. Echeẽ ñee mbia je ae. Sã mbia nembirandu ae. “Ae beite” i ra mbia ndeje. ¹² Emo je que aico ñee icuã icuã eãte Dios chuchúaa ra. Mbia que ambucheẽ icuã eã nguia nyue ra. Judíos chumunuásaa que aico eã mbia mbicuã icuã nda. Mbia chuchua ite re abe que aico eã mbia mbicuã icuã no nda. ¹³ Ñe ñee ñooño ño nguiã serĩ. Ñe mae ãte seicuã mo ndese resẽ. ¹⁴ Aque mĩ ndese chõ aico resẽ. Dios cheẽ yasu rui bei chõ aico nguiã co. Dios cheẽ yasu quiarei eicuã eã. Dios rei ureru rerecua bei. Co aico Dios icua co. Co aico Moisés cheẽ icua co no. Co aico Dios cheẽ mbuchecuaa chimbresa icua co no. ¹⁵ Co aico Dios icua ùquĩ na si

co. Mbia raaque ra quera si no. Ñquĩ aicuate. Mbia icuã nda quera si. Mbia turã na si. Quera ja chõ ndae. ¹⁶ Nyebe aico Dios cheẽ ndui bei co. Nyebe sechiã cuaãcuã i eã Dios si. Mbia si abe. ¹⁷ Cosete que aso a si ra. Muchos años. A achube a cote. Mbae mee mee sacua mbaecha reã je. Seresenda je. Dios je abe mbae mee. ¹⁸ Achimbuturã ngue Dios chuchúaa ra. Mbia eãsa. Mbia ambiicuã eã. Judíos Asia jenda que mae serese ra. Dios chuchúaa. ¹⁹ Sã ñquĩ ngaẽ serenei ndeje. Seicuã mose, sã ñquĩ ngaẽ ñee ndeje. ²⁰ Sã ã abe ñee ndeje. Seruruchoi rei que judíos rerecua chumunua mose ra. Mbae i ãte que seje ra. “Mbae icuã ngue eresaã nda”, i eã ngue ererecua seje ra. ²¹ “Mbia mano je ra quera si, ae chõ ndei nguiã co. Ñquĩ je chõ ngue sereru nguiã jẽje”, ae que ererecua je ra. Ñquĩ i equia seje reae, i que Pablo Félix je ra. Félix rei ererecua.

²² —Emo mose ra acheẽ ndeje, i que Félix Pablo je ra. Félix jirandu tuchi rei Jesús chimbaaquiatu rese reaẽ. —Sã soldados rerecua ru rã. Huee quia nda acheẽ nguiã cote. Mañi ño nda aba ndeje cote, i que ererecua Pablo je ra. ²³ Félix que ñee capitán je cote ra. —Pablo jẽteaquiato bei jẽ. Jẽhui jẽhui jiri esi. Sã equiato ngaẽ ngaẽ erea. Mbae mondo mondo ee, i que Félix ra.

²⁴ Emo mos e jiri que Félix ngasembe Cesaréaa ra. Eresebe que eru ra. Drusila, i que eninisi je ra. Judía rei eninisi. —Pablo jendu rã. Pablo cheẽ tachandu rã. Jesucristo rĩ tachandu, i que Félix ra. ²⁵ Pablo que tu ñee ee ra. —Sã mbia siqui turã Jesús rã si. Sã mbia ñimbirãcuã mbae icuã si. Dios ra mbia icuã mbuchao, embasi sacua, i tuchi que Pablo Félix je ra. Félix chiã ngue cuaãcuã i Pablo cheẽ mose ra. Nyebe ñee Pablo je. —Eso cote. Serecochĩ mose ra acheembe ndeje, i que Félix Pablo je ra. ²⁶ —Pablo ra mbae isiquia mondo chee seje. Se embui sacua, i rei que Félix ra. Nyebe Félix “echu” i i bei nguiã Pablo je. ²⁷ Eĩ mbei que Félix quia ra. Dos años. Aquere que Félix ererecua eã cote ra. Porcio Festo que esiquicharõ nda. Félix que Pablo tarõ mbei miñ nda. —Ñ nda judíos paama iã seje, i que ra.

25

Pablo ñee ererecua Festo je

¹ Festo que ngasẽ Cesaréaa cote ra. Félix rendaque re, mbia rerecuarã. Tres días mose que esi Jerusalén cote ra. ² Huee que sacerdote rerecua ñee icuã ja Pablo rĩ nda. Judíos rerecua abe ñee icuã ja Pablo rĩ. Festo je ñee ñee Pablo rĩ. ³ —Urembia jiri rã. Pablo eru Jerusalén, i ja rei que sacerdote rerecua Festo je ra. Iquia nda eña nde. Ñeenda cúaa. ⁴ —Pablo tarõ ji ñi Cesarea pee. Aruã nda se. Namu jiri ra aso pee, i que Festo ra. ⁵ —Sã jenderecua abe nyoĩ serese Cesaréaa. ¿Mbae jenye quia Pablo je re? ¿Mbae icuã esaã nde? Nyao pee teñee seje, i que Festo ra.

⁶ Festo que siqui mbirĩ Jerusalén nda. Ocho o diez días. Hue si que eru nyebi Cesaréaa ra. Isamami ngue esi mbia chumunuásaa ra. Ae que mbia rerecua cote ra. Ngoi que huee ra. —Pablo jendu rã. Echeẽ tachandu cote, i que mbia je cote ra. ⁷ Pablo que ique cote ra. Judíos Jerusalén jenda que ñee icuã icuã Pablo rĩ nda. Maende rocoĩ mbae icuã naa mose. Ñee ñooño erĩ. ⁸ Pablo que ñee echeẽ mose ra. Judíos cheẽ ngue esibishorõ nda. —Mbae icuã mo asaã eãte resẽ. Judíos chimbesa amumbayãte resẽ. Romanos nderecua cheẽ amumbayãte no ndesẽ. Dios chuchua abe ambiicuã eãte no ndesẽ, i que Pablo ra. ⁹ —¿Ndeso sereãte Jerusalén nde? Mañi ae ra se quia ndeje hue reae, i rei que Festo Pablo je ra. —Ñ nda judíos paama iã seje. Judíos tambia jiri, i que equia ndua ra. ¹⁰ Pablo que ñee ee ra. —Romanos nderecua raque jẽ. Aico raque jẽsaa a. Jẽ nguiatu jeñee seje. ã jẽingo raque seicuate ã. Mbae icuã mo asaã eãte judíos je resẽ. ¹¹ Se mbae icuã naa tuchi mose, ¡seiquia se jẽ! Judíos ñee ñooño mose serĩ, ¿mbaerã nda semondobe judíos je re? Semondo aroneate ee. Ererecua tuchi je semondo rã. Sã ae quia ñee seje, i que Pablo Festo je ra. ¹² Festo que ñee nyecuayã cuayã nguesenda je ra. Aquere que ñee Pablo je cote ra. —“Semondo ererecua tuchi je”, ere que seje. Taremondo ee cote, i que Festo Pablo je ra.

Pablo cheẽ tachandu, i Agripa

¹³ Aquere que Agripa si Cesaréaa ra. Ererecua rei ae. Berenice rese que esi ra. Festo rea. ¹⁴ Huee que itõ mocoite ra. Festo que Agripa mbiirandu ja Pablo riĩ nda. —A emo tarõ ji ñi a. Félix que etarõ miĩ nda. ¹⁵ Seso mose Jerusalén, sacerdote rerecua ñee tuchi seje. “Pablo eiquia”, i rei ngue seje re. Judíos rerecua abe ñee icuã icuã tuchi Pablo riĩ. ¹⁶ Acheẽ ndei ngue ee re. “Tei. Mañi ae ra mbia mo iquiachõ nde. Mbia eicuã nenei eã mose seje. Ae ñee icuã nguia eriĩ, sã ũquĩ ngaẽ ñee ee. Sã ñee nguia nyue sésaa”, ae que ee ra. ¹⁷ Judíos que ngaẽ a cote ra. “Isamami jeñee tachandu Pablo je”, ae que ee ra. “Pablo jendu rã”, ae que isamami serimba je cote ra. ¹⁸ Pablo ucuayãsa que juã ja rei cote ra. Ñee icuã tuchite reĩ nda Pablo riĩ seje. Pablo chisaã icuã mo ngue embuchecuayã ñochĩ nguia seje. “Mbia ra Pablo mbiicuã tuchichĩ nde”, aechĩ ngue se re. ¹⁹ “Judíos rã eã ño Pablo. Judío ndua rã eã ño Pablo riqui nguia ndua”, i chõ ngue judíos ñee ñee seje ra. Jesús, i que emo je ra. Judíos que ñee icuã icuã tuchi Jesús riĩ nda. “‘Jesús que quera si manonde ra’, i que Pablo judíos je ra”, i que Festo Agripa je ra. ²⁰ —“¿Mañi ae ra se re?” aete que se ra. Nyebe que acheẽ ee ra. “¿Ndeso sereãte Jerusalén nde? Huee quia nandechẽ”, ae rei que ee ra. ²¹ “Sã ererecua tuchi quia ñee seje. Semondo ee Roma”, i que Pablo seje ra. “Eno. Aremondo je nda ee re”, ae que ee ra. Nyebe ngue atarõ mbeite miĩ nguia, i que Festo Agripa je ra. ²² Agripa que ñee ee ra. —Se abe nda aque cheẽ achandu rã ña, i que Festo je ra. —Eno. Isamami nda echeẽ erechandu cote, i que Festo ra.

²³ Isamami ngue Agripa huiirao turã mingue ra. Berenice rese. Ererecua irao. Ererecua ataque chumunua mose que echoi ique ra. Soldados rerecua que chi ja huee ra. Mbia rerecua mo abe que chi ra. —Pablo jendu cote, i que Festo mbia je cote ra. ²⁴ Festo que ñee cote ra. —Tacheẽ ndeje, Agripa. Jẽ abe je tacheẽ, mbia rerecua. A eriqui a cote. Pablo, i equia ee. Ae riĩ judíos riqui ñee mbeite seje. “Eiquia”, i bei seje. Jerusalén jenda abe ñee mbei eriĩ. Cesarea jenda rã. “Sã mano”, i bei seje. ²⁵ ¿Mbae riĩ nda aba eiquia re? Mbae icuã mo esaã eãte resẽ. Ae quiarei ñee. “Semondo rã ererecua tuchi je”, i que Pablo seje ra. Nyebe tamondo ee. ²⁶ ¿Mbae i ra aba embesa mondo ee re? Mbae icuã ngue esaã eãte. Nyebe Pablo aru nguia jẽje a. Ndeje chõ ngue aru nguia, Agripa. Echeẽ ee. Ñ nda eicuã erembuchecua. Ñ nda eicuã ambesa mondo ererecua tuchi je. ²⁷ ¿Ma nda aba etarõi mondochõ nde? Eicuã mbesa iriã mose, i que Festo Agripa je ra.

26

Pablo ñee ererecua Agripa je

¹ Agripa que ñee Pablo je ra. —¿Mbae i mbia quia ndeje re? Nde quia echeẽ cote, i Agripa. Pablo que o sui ñee ee ra. ² —Secheẽse rete ndeje, Sererecua. Judíos que ñee icuã tuchi quia seriĩ nda, Sererecua. ³ Nde quiarei ureicuasa tuchi. Judíos icuasa tuchi nde. Urecheẽ icuã icuã ereicuate nde. Nyebe nderosei nguia tu rã secheẽ andu.

⁴ Judíos maesate raque se, señetẽ mosenda bei. Sererecua quiti. Jerusalén abe. ⁵ Se rei fariseo. Setiarõ namo mosendachõ ndei fariseo se. Judíos seicuate raque. Fariseos achõ ño ureramei ñee mumbayã mbei. ⁶ “Mbia raaque ra ambuquera si”, i que Dios ureramei je cose ra. Dios ra ucheẽ nyabiã. Nyebe “ae bei” ae nguia ee. Ũquĩ ñi ño judíos riqui nguia seucuayã ã. Ũquĩ ñi ño mbia riqui nguia ñimbiicuã seje ã. ⁷ “Mbia raaque ra ambuquera si”, i que Dios ra. “Ae bei”, i ja Israel jenda quia ee ã. Nyebe Israel jenda riqui bei nguia echeẽ ndui si ã. “Mbia raaque ra Dios mbuquera si”, ae sequia se abe co. Ũquĩ je chõ judíos icuã icuã ndiqui nguia seje, Agripa. ⁸ ¿Jẽ abe je Dios mbia raaque mbuquera aroneate re?

Seicuã tuchi Jesús quiato je nyii, i Pablo

⁹ Se abe que seicuã icuãse rete riqui Jesús quiato je cose ra. Nazaret jenda chõ Jesús re. ¹⁰ Seicuã icuãte que ee Jerusalén nda. Sacerdote rerecua que ñee seje ra. Nyebe ngue aico nguia Jesús quiato tarõ tarõ mbeite cose. Sacerdote rerecua cheẽ nguire. Jesús quiato iquia iquia mose, “coche rei” ae que sequia ra. ¹¹ Jesús quiato que airuã nua tuchi quia

ra. “Ī nda hui Jesús si”, ae rei que sequia ra. Sucha tubiriã ngue ambuchesea sea quia ra. Jesús quiato je seicuã sacuã. Judíos chumunuasa mbuchesea sea. Paama ae tuchi que sequia Jesús quiato je nyii ra. Isho tuchi que aico oso oso Jesús quiato requia ra. Seicuã tuchi sacuã ee.

Aico uba Dios rese co cote, i Pablo

¹² Emo mose ngue aso rei nguiã Damáscoo. Sacerdote rerecua semondo mose. ¹³ Tacheẽ tuchi ndeje, Sererecua. Tenda nandeite re mose que tata mo tu seresae ra. Ibate si que seresae ra. Seresenda abe resae. Tata rendi que ureresae tuchichĩ nguiã tenda si. ¹⁴ Tata rendi rese ma e mose que urecoi íbii ra. Echeẽ mo ngue achandu ra. Hebreo cheẽ. “Saulo, Saulo, ¿mbaerã ndeicuãte riqui seje re? Nde sí chõ erechimbasi mbasi nguiã aque. Ticuasú rã tuchi quiarei nde aba cheẽ mumba mose. Sã ticuasú riqui nambacua mbuti no. Sã eriqui hui mbaba ira racua echi no. Ūquĩ na tuchi quiarei nde”, i que seje ra. ¹⁵ “¿Aba nde re?” ae que ee ra. “Jesús rei se. Ae je ndeicuãte riqui”, i que seje ra. ¹⁶ “Ehuã na. Aico nyecua ndeje a. Serenei nenei sacuã mbia je. ‘Jesús rese que amae nda’, ere bei quia mbia je. Mbae mo abe ra ambuchecua ndeje. Ūquĩ abe teresenei senei mbia je. ¹⁷ Judíos eã je taremondo. Secheẽ nenei nenei sacuã. Ūquĩ o taisi eicuã icuã mose ndeje. Judíos o abe taisi eicuã icuã mose ndeje no. ¹⁸ Taremondo judíos eã je. Terembaaquiatu quiatu. Ī nda eriquiã mbae icuã ndese. Ī nda eriqui mbae turã ndese. Ī nda eriquiã aba mbiirĩ irĩsa rui. Ī nda eriqui Dios rui. Ī nda Dios icua. Ī nda eicuã ambutiã esi. Ī nda Dios ūquĩ ngue recoe umbaerã”, i que Jesús seje ra.

Pablo Dios cheẽ senei tuchi Agripa je

¹⁹ Ibatenda cheẽ ngue amumbayã nda, Agripa. ²⁰ Dios cheẽ ngue asenei senei tuchi mbia je ra. Mbia Damasco jenda je. Jerusalén jenda je abe no. Judea rurubinda je abe no. Judíos eã je abe no. “Ījēicuã si jēhui chõ jē! Dios icha rui jēingo. Jēingo turã. ‘Dios icha rui eriqui’, i nda mbia jēje chã”, ae que ee ra. Embaaquiatu quiatu. ²¹ Nyebe judíos seisi nguiã Dios chuchúaa. Nyebe eriqui nguiã “nandeiquia” i seje. ²² Dios que serea quiatu bei quia ra. Namó abe. Nyebe aico echeẽ nenei nenei mbei mbia ja je. Mbaecha je. Mbaecha reã je abe. Moisés cheẽ ndui si aico ñee ñee mbia je co. Dios cheẽ mbuchecuasa rui si aico ñee ñee mbia je co. ²³ Ī ngue Dios cheẽ mbuchecuasa embesa cose ra: “Mbia ra Cristo mbasi mbasi. Aquere ra mbia eiquia. Ae rane nda quera si mbia raaque si. Ae ra mbia mbiirandu nguenco mose uquera riĩ. Judíos mbiirandu. Judíos eã ab e mbii randu”, i que Dios cheẽ mbuchecuasa mbia je cose ra, i que Pablo Agripa je ra.

²⁴ Festo que ñee Pablo je cote ra. —Erequiachã ño nguiã co, Pablo. Embesai rese mae tuchire erequiachãte equia co, Pablo, i que Festo tasẽ Pablo je ra. ²⁵ —Aquiachã eãte se resẽ, Festo. Acheẽ nyecuate raque jēje. Dios cheẽ tuchi chõ asenei nguiã jēje co. ²⁶ A Agripa riqui raque a. Nandererecua tuchi. Echeẽ ee. Ae riĩ aico ñee jēje, ūquĩ ngue Agripa icua tuchi ra. Nyebe sesiquiche eãte riqui nguiã ñee ee. Secheẽ icua jate equia co. Jesús que ñee nyecuayã eã mbia je ra. Jesús mbae saã nyecuayã eã, i que Pablo ra. ²⁷ —¿Dios cheẽ mbuchecuasa cheẽ ndebite re, Agripa? Ndebite que ra, i que Pablo ee ra. ²⁸ —“Jesús quiato ra nde cote”, ¿erechĩ equia seje re? i que Agripa Pablo je ra. ²⁹ Pablo que ñee ee ra. —Nde mii eã. Seandusa ja. A jengu ja a. Jesús quiatorã na jē, se rã si, aechĩ nguiã jēje. Jengasa ra chi eã nguiã, se rã si, i que Pablo ra.

³⁰ Pablo ñeende que ererecua juã cote ra. Agripa. Festo abe. Berenice abe. Ae chi ngoi erese, ūquĩ abe que juã nda. ³¹ Nyoĩ que pe jiri cote ra. Ñee ñee nyue. —Pablo mbae icuã saã eã tuchi chõ nguia re. Eiquia aroneate quia eriqui re. Etarõ abe aroneate quia eriqui re, i que ererecua nyue ra. ³² Agripa que ñee Festo je ra. —“Semondo rã ererecua tuchi je”, i chõchĩ Pablo. Ī nda aa chõ nandehui esi, ñee eã mose. “Semondo rã pe ererecua tuchi je”, iã mose, i que Agripa ra.

27

Pablo mondo Roma quiti

¹—Pablo tamondo Italia, i que ererecua ra. —Jëisi suruchoi, i que soldados rerecua mo je ra. Julio, i que soldados rerecua je ra. Augusto rimba, i que ùquĩ soldados je ra. Emo abe que ecuruchoi isi ra. Se abe que aso erese ra. Lucas rei se. ² Aristarco abe que oso urerese ra. Macedonia jenda rei ae. Tesalónica, i sucha tubiriã je. Ureique ja que canoa cuasu ye ra. Adramitio jenda rei canoa. Asia quiti que urecuata ra. Sucha mbuchesea sea sacua hue jenda. ³ Isamami ngue urecuasẽ Sidón cote ra. Julio turãte que Pablo je ra. Ecuatasa que eriqui ra. Nyebe Pablo si uquiato rea. Equiato que etequiatu ra. ⁴ Urecuata si que ama ndui ra. Quiririã ngue ureriquisã nda. Canoa mbucuatayã. Nyebe ejoõ acua mo uresiichã nguiã. Eibichi que ureso quia cot e ra. —I nda quiririã nandembutiba eã, ure que ra. Chipre, i que ejoõ je ra. ⁵ Cilicia que urechucua cote ra. Panfilia abe que urechucua nda. Urecuasẽ ngue Mira cote ra. Licia, i que ibi je ra. ⁶ Huee que soldados rerecua canoa cuasu nongue tea ra. Alejandría jenda rei canoa. —Oso ra Itáliaa, i que ure je ra. —Aque ye jëingue, i que ure je ra. Ae ureso nguiã eye cote. ⁷ Ureitõte que oso quia ra. Ureque atate que ama ndisha rasa ra. Urecuasẽ nyee que Gnídoo ra. Quiririã mbeite que ureruba quiti ra. Nyebe ejoõ acua mo uresiichã nguiã. Creta, i que ejoõ je ra. Salmón ngue urechucua nda. ⁸ Ejoõ acua que uremama jiri ra. Quiririã icua icua ngue ure je ra. Buenos Puertos que urecuasẽ cote ra. Lasea, i que hue rurubinda je ra. Sucha tubiriãte que ra.

⁹ Ureitõ mocoĩte que huee ra. Quiririã tuchite chee que ra. Aba ireĩte que quiririã cote ra. Ama mose. Nyebe que Pablo ñee mbia je ra. ¹⁰ —Nandecuata i i mose ra canoa ñiimi nande je. Mbae ra ñiimi ja canoa yenda. ¡Nande abe ra nandemanochĩ jê! i que Pablo ee ra. ¹¹ Soldados rerecua que Pablo cheẽ mumba ra. Canoanya cheẽ mumbayã. —Nyao rei, i que soldados rerecua ra. ¹² —Canoa ndua icuãte a. Quiririã aronea. Nyao rei a si. Ma nandecuasẽ ãte Fenice. Huee nda nandecu are jiri nguiã. Huee que quiririã eã jiri. Nyao huee, i que ureataque ra. Fenice rei sucha tubiriã. Ejoõ acua jenda.

Quiririã mbia iquia serĩ

¹³ Quiririã ngue uba cote ra. Ichu chooño jiri que cote ra. —Nandecuatasã jirichĩ cote, i que ureataque ra. Canoa que embucuata cote ra. Ejoõ acua ibi que ureso quia ra. ¹⁴ Urecuata ramo mose que quiririã icua tu ure je ra. Ejoõ acua quiti que eru ra. Noreste, i que aque quiririã je ra. ¹⁵ Quiririã ngue canoa mbucuatayã ureruba quiti ra. —Sã quiririã ae nanderuruchebi serao, ure chee que ra. ¹⁶ Ejoõ quitera quiti que ureso ra. Ejoõ ngue quiririã nyoote ure si ra. Claudia, i que ejoõ je ra. Canoa ñetẽ ngue urembuti serao quia ra. Canoa cuasu riita rese. Ejoõ quitera quiti que canoa ñetẽ urechuchã canoa cuasu ye cote ra. Eusite raque. ¹⁷ Canoa ñetẽ ngue urechuchã canoa cuasu ye ra. Canoa cuasu que echucua chucua ra. —Quiririã nda embuquiatachĩ nande je re, i que ra. Mbia siquiche tuchi que ra. —¡Eriiri iri quiti ra nyaochĩ jê! Nandejaã ndae, i que nyue ra. Nyebe que tiru canoa aronda mbuquichi cote ra. —Sã canoa ae si quia nandererao surucuata, i que nyue ra. ¹⁸ Isamami abe que quiririã icua icua mbeite ra. Nyebe mbia mbae mombo mombo nguiã ii. Canoa yenda. Emumbebi sacua. ¹⁹ Aquere que ureitõ si no nda. Isamami ngue mbae uremombo mombo ja cote ra. Canoa mumbebi tuchi cote. ²⁰ Ureitõ mocoĩ mocoĩ tuchi ama ndisha riite re. Itõ nguicoi bei que ure je ra. Quiririã mbei. Pã i bei. Tenda checuayã mbei que ra. Nyasi tata abe checuayã bei que ra. —Nandecuaseã mbeichĩ nda ibi je re. Ama ndisha riite re ra nandemanochĩ nde, ure chee que ra.

²¹ Mbae que ureu eã mocoĩ mocoĩ nda. Nyebe que Pablo juã ñee mbia je ra. Canoa yenda je. —Seresenda, secheẽ ngue jemumbachĩ nda. Secheẽ aba mumbayã mbichĩ. Crétaa nandecuchõ mbichĩ. ĩ nda canoa yenda nandemomboãte ii. Mbae mbuquiachã nondechĩ. ²² ¡Jeñimbirãcuã ño jê! Nande mo nda mano eã. Canoa nda quiachã. Nande quiatu ra nandequiachã. ²³ Dios rimba rei se. Dios que ángel mo mbu ñee seje isa ra.

²⁴ “¡Eresiquichechĩ nda jẽ, Pablo! Eremano eã ndae. Erecuasẽ nyee r a ererecua Roma jenda je. Nderĩĩ nda nderesenda mo manoã. Dios ra eteaquiato ja,” i que ibatenda seje ra. ²⁵ Seresenda, ¡jeñĩmbirãcuã ño jẽ! Dios aicua tuchite quia co. Dios ra ucheẽ nyabiã nande je. Angel cheẽ nguire ra nandemanoã. ²⁶ Quiririã nda nandemondo ejoõ acua mo ndese, i que Pablo ra.

²⁷ Ureitõ mocoĩ mocoĩte que ama ndisha riite re ra. Catorce días. Quiririã ngue urerurucuata chõte quia ra. Adria, i que ama ndisha je ra. —Ama nimia nanderubite rei reae, i que canoa yenda ra. Itondiite mose. ²⁸ Ama ndiite que embuchecha ra. ¿Ecu tuchi ere? i que nyue ra. Treinta y seis metros. Pe jiri que embuchecha si no nda. Veintisiete metros cote. ²⁹ —¡Canoa nda cua ichĩ sita je jẽ! ¡Quiatachĩ nda jẽ! i que mbia nyue ra. Nyebe mbae usi mondo mondo nguiã ii canoa ndiquisã sacua. Mbae usi cuatro. Anclas, i que ũquĩ je ra. Ae ecuasa chi nguiã canoa ndese embutiba. —Quiatuchu, nyaashĩ, i tuchi que equia ra. ³⁰ —Nandechã nyecuayã, i que canoanya rimba ra. Nyebe canoa ñetẽ mbuquichi mondo ii. —Mbae usi urechucua mondo ii. Urechucua canoa ai rese, i que urembiĩrĩ irĩ nda. —Nandechã nyecuayã, i chõ mbei que equia nyue ra. ³¹ Pablo que ñee soldados je ra. Ererecua abe je. —Ã chichõ eã mose canoa ye, jeñĩmi ja rae. Ama nda jẽiquia, i que Pablo ra. ³² Ae soldados canoa ñetẽ sã nyisia nguiã. Emondo ii. Hui esi cote.

³³ Nyaashĩ namo mose que Pablo ñee ja mbia je ra. —Mbae mo jẽu jiri cote. Jeniãcuã mocoĩ mocoĩte que. Mbae mo ngue jẽuãte catorce días. Jengueãte que catorce días no. ³⁴ Mbae mo jẽu rã cote ae. Ĩ na jẽquirãcuã jiri. Mbae mo nda jeĩ eã jẽje. Jemo nda mano eã, i que Pablo ee ra. ³⁵ Aquere que Pablo mbichae sirõ nda. Iaanye, i que Dios je ra. Mbia resa rae. Nyisia que ra. U que cote ra. ³⁶ Pablo cheẽ ngue mbae oseĩ uquia mbia je ra. Mbia ja que mbae u cote ra. ³⁷ Urecuabẽte que canoa yenda ra. Doscientos setenta y seis que ure ra. ³⁸ Mbia ja que mbae u tuchi ra. Quiata a raanguia que emombo mombo ii cote ra. Canoa mumbebi sacua.

Canoa jaã

³⁹ Ureachaashĩ ngue cote ra. Ibi rese que uremae cote ra. —A ureicuayãte, i que mbia ibi je ra. Eicoĩnda rese que uremae nda. Ama nimia turã. —Nyao nguichi huee. Eicoĩnda, i rei que ererecua ra. ⁴⁰ Anclas sã ngue echisia sia ra. Anclas recha bei ii. Canoa mbuchaa chaasa que embuquiata ra. Tiru icoĩ que embuchesecobe quiririã je ra. Canoa ngue ngata ama nimia turã nguiti cote ra. ⁴¹ Iaãcuã eicoĩnda que canoa jaã nda. Eriquiraa eãsaa. Canoa ai que jaã tuchi ra. I rebera tubiriã ngue ra. Canoa ndiita mbaaba aba. Eriita que nyiquiĩso ra. Quiata que ra. ⁴² Soldados que ñee cote ra. —Ã ecuasa riquiã ñae, jã nandẽiquia ja jẽ! Ĩ nda echoĩ eã ita. Oso chee eã, i rei ngue soldados re. ⁴³ Soldados rerecua que Pablo iquia sereã nda. Nyebe ñee nguiã soldados je. —¡Ecuasa mo nda jẽiquiachĩ jẽ! i que soldados je ra. Ererecua que ñee e mbia je cote ra. —Eita aquiato jẽso ii. Jẽso usẽ ama nimia ndese. ⁴⁴ Eita aquiatuã, jẽso mbebi ira rese, i que soldados rerecua ure je cote ra. Eĩ ure ja que usẽ ama nimia ndese cote ra.

28

Ngasẽ ejoõ ácuua Máltaa

¹ Uresẽ ja que ama nimia ndese ra. —Malta, i que a je ra. Ejoõ acua je, i que hue jenda ure je ra. ² Hue jenda turãte que ure je ra. Tata que emendi ure je ra. Urechee sacua. Tiquindiiseĩte que eriqui ure je ra. ³ Pablo que nyea queru mbuchuuta ra. Nyea mbucha mose que mbei usẽ asi Pablo echi ra. Mbei que Pablo o shiu ra. ⁴ Eo resebe tuchi que eñi nda. Nyebe hue jenda ñee ñee nyue. —Mbia iquia iquiasa Pablo reae. Oso chee que ama ndisha si no. A mbei riqui eshiu a no. Mano nda cote reae. Huiĩcuã mose, i rei que hue jenda nyue ra. ⁵ Pablo que mbei mbaba tátaa ra. Erasiã mbei que Pablo je ra. ⁶ Mbia que mae nguiatu Pablo rese ra. —Ma eruru. Embusiate rei rae. Mano ndae, i rei que ra.

Mbia que mae nguiatute rei u nguiã erese. Erasiã mbeite que ee ra. Nyebe mbia ucheẽ mbuchebi nguiã. —Dios mo ndei Pablo, i que mbia cote ra.

⁷ Hue robeichõ ngue ererecua mbae ibi ra. Ejoõ acua rerecua. Publio, i que ererecua je ra. Urererao que uchuchúaa ra. Urembuquiaru turãte que ra. —Jẽitõ mocoĩ jiri, i que ure je ra. Tres días que ureitõ erese ra. ⁸ Publio ru rasite que ra. Eracute que ra. Eruushi ruquite que ra. Pablo que oso erea ra. O que echono earõ nda. Ñee ngue Dios je ra. Nyerõ ngue cote ra. ⁹ Aquere que mbia rasi ngaẽ ngaẽ ja Pablo je cote ra. Ejoõ jenda ja. Dios que embucherõ ja ra. ¹⁰ Mbia que mbae mee mee tuchi ure je ra. Urecuata mose que mbae chuchã nyuchã tuchi canoa ye ra. Urechiurã.

Pablo ngasẽ Rómaa

¹¹ Ejoõ acua que urecu bei ra. Tres meses. Canoa cuasu mo abe que chi beite aque rĩ nda. Alejandría jenda rei aque canoa. Dios Nyeremo, i que aque canoa je ra. Aque canoa ye que ureso cote ra. ¹² Siracusa, i que sucha tubiriã mo je ra. Huee que urecuasẽ nda. Huee que ureitõ mocoĩ nda. Tres días. ¹³ Hue si que ureso siquiibi cot e ra. Urecuasẽ ngue Regio ra. Huee que ureitõ nda. Isamami ngue quiririã ureichu urequite quiti ra. Canoa maña turã. Co miĩ ngue ureque ama ndiite re ra. Urecuasẽ ngue Puteoli ra. Huee que urequichi bei canoa si cote ra. ¹⁴ Jesús quiato mo ngue uretea huee ra. —Jenguchõ na urerese, i que ure je ra. Ae urecuchõ nguiã una semana erese. Aquere que ureso Roma nguiti cote ra. Ibi rĩ. ¹⁵ Jesús quiato que jirandu urerese cote ra. Roma jenda. Nyebe ecuaẽ nguiã urerobeishĩ. Foro de Apio, huee que urerobeishĩ nda. Tres Tabernas, hue abe que urerobeishĩ ishĩ nda. —Iaanye, i que Pablo mae mose Jesús quiato rese ra. Pablo ia tuchi erobeishĩ mose. ¹⁶ Urecuasẽ ngue Roma cote ra. Sucha tubiriã tuchi que Roma nda. Soldados rerecua que ecuasa mondo ja mbia icuã ndaarõsa je cote ra. Pablo mbuchao que ra. —Ndechuchua chõ eico nde, i que ee ra. Soldado miĩ ngue Pablo reaquiato bei quia ra.

Pablo Dios cheẽ senei senei Rómaa

¹⁷ Urecuasẽ namo jiri mose que Pablo judíos rerecua munua j a ra. Roma jenda. Pablo que ñee ee ra. —Seresenda, mbae icuã ngue asaã eãte judíos je ra. Nanderamei ñee abe que amumba eãte ra. Judíos que semeeño Romanos je ra. Jerusalén seico mose. ¹⁸ Romanos ngue ñee tuchi seje ra. “Nandehui esi”, i rei ngue seriĩ cote re. “¿Mbaerã nda nandequia re? Mbae icuã mo ngue esaã eãte”, i que seriĩ nda. ¹⁹ “¿Jẽhuichĩ nda esi jẽ!” i bei que judíos quia ra. Romanos je. Judíos quia ñi hui sereãte nguiã sesi. “Semondo ererecua tuchi je”, ae chee que se ra. Ererecua saa ra acheẽ icuã eã ndei judíos rĩ. ²⁰ Nyebe “Jenyu. Tamae jendese. Tacheẽ jẽje”, ae que jẽje ra. Mbia mano je ra quera si, nande chõ ndaque equia co. Ûquĩ je chõ secuasa riqui nguiã co, i que Pablo judíos je ra. ²¹ Judíos rerecua que ñee Pablo je ra. —Jerusalén jenda que ucheẽ mbesa eãte imbu ure je ra. Ae ngaẽ ngaẽ nguia hue si, ùquĩ abe que ñee icuã eãte quia nderĩ nda. ²² Ndecheẽ urechandu rã. Mangue chooño eã mbia ñee icuã icuã jeni. Jesús quiato rĩ. Nyebe echeẽ ure je, i que Roma jenda Pablo je ra.

²³ —Aque mose ra urechu ndecheẽ andu, i que judíos Pablo je ra. Aque mose que ecuaẽ jate cote ra. Pablo chuchúaa. Isamamimbe. Pablo que embaaquiato quiato tuchi ra. Tenda mondo chee. Jesús rĩ ngue eriqui ñee ñee mbia je ra. Moisés chimbese que esenei senei ee ra. Dios cheẽ mbuchecuada chimbese abe que esenei senei ee ra. ĩ nda mbia Jesús icua. —Dios quiarei ererecua tuchi, i tuchi que Pablo judíos je ra. ²⁴ Emo emo ngue Jesús isi ra. Pablo cheẽ mose judíos je. Eataque que Pablo cheẽ isiteã teã nda. Ichõiño nei equia ee reaẽ. ²⁵ Pablo cheẽ ndui ja eã ngue ra. —Nyao rei erecha, i que eataque ra. Nyebe Pablo ñee ee. —Espíritu Turã ngue Isafas mbucheẽ turã nanderamei je cose ra. ĩĩ ngue ñee nda:

²⁶ Eso rã ñee judíos je: “Secheẽ nda jeñandu rei nguiã. Jeñandu eã naanguia rae.

Jemae ndei nda erese re.
Jemae eã naanguia ra erese.

²⁷ Jeñia átãte.

Aba cheẽ mumba mumba.
Jendesa jemungue munguete.

Secheẽ jêicua sereãte.

Jemba sereãte seicha rui.

Nyebe aico nguiã jembucheroãte”, i que Dios ra, ere ee,
i que Isaías chimbesa ra, i que Pablo ra. ²⁸ Pablo que ñee mbei ra. —Tacheẽ jêje, judíos.
Judíos eã je ra Dios cheẽ uresenei senei cote. Ñquĩ nguia ra eya tuchi erese. Ñ nda Dios
erirõ eicuã si, i que Pablo ra. ²⁹ Pablo cheẽ ñi ngue judíos choi guiã ñee icuã icuã nyue ra.
³⁰ Dos años ngue Pablo riqui huee ra. Roma. Mbae isiquia que emondo mondo tuchuacha
je ra. Huee eico mose. Pablo iate que eriqui ra. Mbia nyoï nyoï mose erea. ³¹ Mbia mo
ngue Pablo cheẽ siquisã eãte ra. Jesucristo rñ ngue eriqui ñee ñee mbia je ra. —Dios ra
mbia rerecua tuchi, i que equia mbia je ra. —¿Mbaerã ereico ñee Jesús rñ nde? i eã ngue
emo Pablo je ra.

LA CARTA DEL APOSTOL SAN PABLO A LOS ROMANOS

Pablo ucheẽ mbesa mondo Roma jenda je

¹ Co aico co mbesa jẽje co. Se rei Pablo. Jesucristo rimba rei se. Dios que seirabo ra. Ucheẽ nenei nenei sacua. Dios que semingo icúe ra. Ucheẽ turã nenei nenei sacua. ² — Secheẽ turã tamondo mbia je, i que Dios cose ra. Ucheẽ nenei neneisa je ñee. Echeẽ ngue ique cote ra. ³ Dios cheẽ turã nandembiiranduchĩ Jesucristo riĩ cote. Dios riirĩ ndei Jesucristo. David riirina ngue tu íbii cote ra. ⁴ Jesucristo manonde, Espíritu Turã ngue embuquera ra. Dios quirãcuã je que embuquera ra. Dios riirĩ ndei Jesucristo. Nyebe Espíritu Turã embuquera nguiã. Mbia mbiirandu randu sacua Dios riirĩ ndese. ⁵ Dios turãte que ure je ra. Jesucristo riĩ. Nyebe ureirabo mingo nguiã ucheẽ nenei nenei sacua. Ìnda mbia mangue chooñoa jenda abe Jesucristo icua. Ìnda mbia mangue chooñoa jenda abe Jesucristo cheẽ mumbayã no. ⁶ Sã jẽ Jesucristo cheẽ jemumbayãte no. Sã Dios jẽirabo no. Jesucristo rimbarã. ⁷ Co ambesa mondo quia Rómaa jẽje co. Dios chesecua tuchi chõ jẽ nde. Dios que jemingo icúe uquiatorã nda. Nanderu chõ Dios re. Nandererecua chõ Jesucristo re. Sã ùquĩ turã mbei riqui jẽje. Sã ùquĩ ndiqui jembia tuchi.

Pablo oso sete raque Rómaa

⁸ — Jesús quiato tuchi chõ ùquĩ ndiqui re, i jate mbia quia jeniã ã. Mangue chooñoa jenda abe. Nyebe aico nguiã gracias i tuchi Dios je co. ⁹ Dios cheẽ asenei senei mbeite quia mbia je co. Eriirĩ nii. Dios resa rae aico embesa mbesa jẽje a. Aico ñee mbeite Dios je jeniã co. ¹⁰ Aico ñee ñee mbeite Dios je co. Ìnda Dios semondo jendea. Semondose mose ra aso jendea. ¹¹ Seso sete raque jendea. Jembaaquiato quiato sacua Jesús riĩ. Jembirãcuã sacua Jesús riĩ. ¹² Seso sete jendea. Ñimbiasa sacua nyiese. Nandeico tuchi sacua Jesús rui. Nande Jesús nandeicuate resẽ. ¹³ Taso jendea, ae beite rei que se quia ra. Taembaaquiato quiato Jesús riĩ, ae rei se. Eĩnda Jesús jẽicua secheẽ nguire. Sã mbiamo Jesús icua tuchite secheẽ nguire no. Mbae seriquisã quisã mbeite. Nyebe asoã mbeite nguiã jendea. ¹⁴ Jesús cheẽ nenei nenei si ahui aroneãte. Tasenei senei tuchi mbia ja je. Griego ja je. Mbiamo abe je. Eaquiato je. Eaquiatoã abe je. ¹⁵ Nyebe aico nguiã icoquiato co, Jesús cheẽ nenei nenei sacua jẽje. Roma jenda je.

Jesús cheẽ quirãcuã tuchi

¹⁶ Aireĩ ireĩ eãte Jesús cheẽ nenei nenei mbia je. Jesús cheẽ quirãcuã tuchi quia ique nguiã aba chiangui rĩ. Aba rirõ sacua mbae icua si. Judíos je rane ngue Jesús cheẽ quirãcuã nda. Judío eã je abe no. ¹⁷ Jesús cheẽ nandembiirandu quia ã. Nande Jesús icua mose, Dios ra nandeisi turã uquiatorã. Mbae turã mo nandesaã eãte raque. Ae Jesús icua quia nae, Dios ra ùquĩ isi turã tuchi. Ùquĩ nda siqui bei cote, i ñi embesa ji re.

Mbia icua tuchi Dios je

¹⁸ Ae siqui Dios rã eãte nae, ùquĩ nda Dios mbasi ja. Ae siqui icuãte quia nae, ùquĩ nda Ibatenda mbasi ja no. Ùquĩ nandeicuate quia nande co. Ichõiñoa reã ñee andu sereãte quia ñene. ¹⁹ Jirandu tuchi rei que Dios rese ra. —Eĩ ae chõ nguiã co, i rei que Dios ee ra. Dios icua sereãte quia ñene. ²⁰ Dios rese mbia mae aroneãte raque. Dios quirãcuã ndese mbia mae aroneãte raque. Mbia ra Dios icua uchiangui re, echiao rese mae mae mose. Dios que mbae chao ja nyii ra. Aque mose bei mbia riqui mae mae Dios chiao rese co. Nyebe eriqui nguiã “Dios rese ureiranuãte”, i aroneãte. ²¹ Jirandu tuchi rei que Dios rese resẽ. Ñee turãyã tuchi chõchĩ Dios riĩ. Gracias iã ñochĩ Dios je. Nyebe eriqui nguiã ndua icua icua mbei. Nyebe eriqui nguiã itongui rĩ mbei. ²² “Ureaquiato” ichõiño ñochĩ

equia ũquĩ. Eaquiataũ ño siqui nguiã ũquĩ. ²³ Hui tuchi que Dios si ra. Ae manoã mbeite quia, aque si. Sererecua i chõchĩ mbae ao ao ji je cote. Ae ra mano, ũquĩ je chõ eriquichĩ nguiã “sererecua”, i. Mbia raanguia je. Quiaa riinda je chõ eriquichĩ nguiã “sererecua” i. Ae mbebe quia. Ae uchã nguia. Ae nguata quia nguie rese. ũquĩ je chõ eriquichĩ nguiã “sererecua” i.

²⁴ Nyebe Dios hui nguiã esi cote. Mbae icuã naa naa mbei sacua cote. ²⁵ Ñee ñooño tuchi Dios riĩ cote. “Nandererecua” i chõchĩ Dios chiaio je cote. “Nandererecua” i rocoĩ Dios miĩ je. “Nandererecua” i bei chõ mbichĩ aba quia Dios miĩ je. Amén.

²⁶ Nyebe Dios erecha ja nguiã cote. Oco chooño sacua mbae icuã ndese. Ubi icuã ndese. Cuña mo oco oco nyiese si. Cuña ngu raã naa cuña nongue je. Siqui rocoĩ ngu rese. ²⁷ Hombre mo abe hombre nongue mo osei osei. —Seninisirã nde, i ñee ñee uchue si. Oco oco nyiese. Siqui rocoĩ ngüinisi rese. Icha tuchi Dios si. Nyebe Dios riqui nguiã embasi tuchi co cote.

²⁸ Dios rese jirandu sereã. Nyebe Dios hui nguiã esi. Siqui bei bei sacua ubi icuã ndese. Nyebe eĩ eĩ nguiã nyue mbae icuã ndese. ²⁹ Eicuã tuchi eriqui ũquĩ. Ico chooño tuchi equia cuña ndese ũquĩ. Ndua ndua icuã mbei tuchi equia ũquĩ. —Aque rã nda se chã, i beite equia emo mbae je ũquĩ. Mbia mbasi chooñote equia ũquĩ. Mbaecha ucuayã ñooño tuchi equia ũquĩ. Mbia iquia iquia chooño tuchi equia ũquĩ. Paama i chooñote equia uchue ũquĩ. Mbia mbiĩrĩ irĩ ñote equia ũquĩ. Mbia ucuayã ñooño mbeite equia ũquĩ. ³⁰ Ñee ñooño mbeite equia mbia mo ñiĩ ũquĩ. Dios ucuayã tuchi equia ũquĩ. Ñee icuã icuã mbeite equia aba cheẽ ndibishorõ ũquĩ. Ucuasu raã naa ñooñote equia ũquĩ. “Se quiarei i tuchi”, i beite equia ũquĩ. Emo mbiĩcuã icuã mbeite equia ũquĩ. Ngu cheẽ mumba mumba chooñote equia ũquĩ. Usi cheẽ abe mumba mumba chooñote equia ũquĩ. ³¹ Eaquiataũ tuchite ũquĩ. Ucheẽ mumba mumbate ũquĩ. Emo je eturã eãte riqui ũquĩ. Emo icuã si eriqui tesareiate ũquĩ. Eya eã eãte riqui emo ndese ũquĩ. ³² —Ae ũquĩ saã saã nguia mbae icuã nae, ũquĩ nda amondo tata cuasu, i que Dios ra. Dios cheẽ icuare quiatu eriqui nguiã mbae icuã naa i ite. —Sã emo abe mbae icuã naa naa nandechabe, i chee chee.

2

Dios mbia cuata tea ja

¹ —Dios ra ũquĩ mbasi rã ña, erechĩ nda ũquĩ mbia icuã je. Nde i mose, nde abe ra ndeicuã nyecua mbia je. —Seturãte aico co, jerechĩ nda jẽ! —ũquĩ ndiqui mbae icuã naa naa ũquĩ, nde i mose, ũquĩ icuã sí chõ eresaã saã nguiã nde abe aque. ² —Ae ũquĩ icuã saã saã nguia, ũquĩ tambasi, i mose Dios, Dios ra embasi chooño eã. Maende erese quia ra embasi. ³ —Dios ra ũquĩ mbasi rã ña, erechĩ nguiã huee. Eraã sí tuchi chõ ereicochĩ nguiã ũquĩ sí raã naa aque. Nde abe ra Dios nembasi ũquĩ ndese resẽ. ⁴ Dios ia eãte raque aba icuã ndese. Dios aba mbasi jei eã ndaque aba icuã mosebe. Ñimbirãcuãte aba icuã je. Coche ñene, ereã ñochĩ Dios chimbirãcuã mose ndeje. —Eyayã jé nda huiicuã ndese chã, i Dios quia nderĩ co. Nyebe eriqui nguiã ñimbirãcuã ndeicuã je. ⁵ Ndechiã atã tuchi chõchĩ. Ndeico sereã tuchi chõchĩ Dios rui. Ndeicuã eremunua tuchi chõ nguia aque re. Dios nembasi nonde. Dios mbia icuã mbasi ja mose ra nde abe mbasi. ⁶ Aque mose ra Dios mbia mbuchao chao. Emo emo nda emondo tata cuásuu. Emo emo nda emingo bei no. ⁷ Ae eturã mbeite riqui, ũquĩ nda Dios mingõ bei. Nyoĩ sete quia Dios rea re. Siqui bei serete quia mbia mingõ beisa rese re. Nyebe ra Dios emingo bei cote. ⁸ Dios ra paama i tuchi mbia icuã je. Mbasi tuchi rae. Mbia mbiĩcuãsa tuchi quia ũquĩ nde. Dios cheẽ mumbate quiatu nguiã. Nyebe ra Dios embasi tuchi. ⁹ Ae siqui mbae icuã ndese, ũquĩ ja ra Dios mbasi. Judíos icuã nane nda embasi. Judíos eã abe ra embasi no. ¹⁰ Ae siqui mbae turã ndese, ũquĩ je ra Dios turã mbei. Judíos turã nane. Judíos eã abe cote. Mbia ra ũquĩ

turã icua tuchi. Dios ra ùquĩ mbia tuchi. ¹¹ Co quiatu, i eã nda Dios mbia mo mii je. Mbia mii ndese ra ebia eã. Mae turã ja chõ nda erese.

¹² Ae jirandu eãte Moisés chimbese rese nae, ùquĩ siqui icuã mose ra Dios embasi. Jirandu eãte raque Moisés chimbese rese. Ae Moisés chimbese icua nae, ùquĩ siqui icuã mose ra Dios embasi. Moisés chimbese cheẽ nguire ra Dios embasi. ¹³ Ae Dios cheẽ ñandu chooño nguia nae, “taẽisi turã” iã nda Dios ùquĩ je. Ae Dios cheẽ mumbayã nguia nae, ùquĩ nguiatu ra Dios isi turã. ¹⁴ Ae judíos eã nae, ùquĩ Moisés chimbese ñandu eã mbeite raque. Ùquĩ mo ae siqui turã turã mbei mbae turã ndese. —Mbae turã nandesã, ite eicua. Dios cheẽ andu eãte raque emo mose. ¹⁵ Ae ae chõ mbae turã icua nguia. Mbae icuã abe icua. Mbae icuã naa mose, “eicuã asaã ñochĩ”, i tuchi eicua uchiangui re. Mbae turã abe raã mose eicua tuchi uchiangui re no. ¹⁶ Aque mose ra Dios ñee Jesucristo je. Ae icuã mbia saã nyecuayã cuayã nguia nae, ùquĩ nda Jesucristo mbuchecua ja cote. Jesucristo ra mbia icuã mbasi mbae icuã nii cote.

Judíos Moisés cheẽ mumba mumba

¹⁷ —Judíos chõ ure re, jeyne equia ùquĩ. —Moisés chimbese ra nandemingo bei, jeyne chõchĩ equia ùquĩ. —Dios quiarei ebia tuchi ure mii ndese, jeyne chõchĩ equia ùquĩ. ¹⁸ Ae Dios bite nae, ùquĩ jẽicuate quia jẽ ùquĩ. —Moisés cheẽ ureicuate quia ã. Nyebe mbae turã ureicua jate quia ã, jeyne chõchĩ nguia ùquĩ. ¹⁹ —Ure mii ño ñeenda Dios icha ureicuachĩ, jeyne bei chõchĩ equia ùquĩ. —Itondaru jenda uretesaete, jeyne chõchĩ equia ùquĩ. ²⁰ —Mbia aquiatuã urembaaquiato quiatu, jeyne chõchĩ nguia ùquĩ. —Mbia aracuayã urembaaquiato quiatu, jeyne chõchĩ nguia ùquĩ. Jẽ Moisés chimbese jẽicua aba reãte quia ùquĩ. —Moisés chimbese ñee ñooño eãte, jeyne raque quia eicua ùquĩ. ²¹ Jẽaracuayã mbia jembaaquiato quiatuchĩ nguia. ¿Mbaerã jeñimbaaquiato iã jẽ nyii re? —Mbae ra jembuquiachãchĩ, jeyne chõchĩ equia ùquĩ. Jẽ sí chõ mbae jembuquiachã nguia ùquĩ. ²² —Emo ninisi rese ra jẽingochĩ, jeyne chõchĩ equia ùquĩ. Jẽ sí chõ jẽingo nguia emo ninisi rese ùquĩ. —Ae je mbia riqui “Dios” i chooño nae, ùquĩ ndese ra jẽingochĩ, jeyne chõchĩ equia ùquĩ. Dios abareã mbae jembuquiachã quiachã ñochĩ nguia ùquĩ. ²³ —Dios cheẽ ureicua tuchi quia ure ã, jeyne chõchĩ equia ùquĩ. Jẽ sí echeẽ jemumbate quia ùquĩ. Nyebe mbia riqui nguia ñee turã eãte Dios rii ã. ²⁴ Nyebe embesa ji cheẽ ndiqui nguia ique ã cote. Jẽ Dios cheẽ mumba mose, judíos eã ndiqui ñee icuã tuchi Dios rii ã.

²⁵ Coche circuncisión jẽsaã saã nguia Dios je, jẽingo bei mose Dios cheẽ ndese. Jẽingo eã mose Dios cheẽ ndese, circuncisión naa eã naanguia chõ jẽingo nguia ùquĩ. ²⁶ Ae circuncisión saã eã nguia nae, ùquĩ siqui mose Dios cheẽ ndese, circuncisión naande raanguia chõ eriqui nguia ùquĩ. ²⁷ Ae circuncisión saã eã nguia nae, ùquĩ siqui mose Dios cheẽ ndese, Dios ia tuchi chõ ùquĩ ndese re. Eyare rocoĩ jendese. Jẽ nguia Dios cheẽ jemumba mumbate nguia. Dios cheẽ jẽicuate raque. Circuncisión jẽsaã saãte raque. ²⁸ Ae judíos Dios cheẽ mumba mumba quia nae, judíos tuchi eã ño ùquĩ nde. Circuncisión naa naa ndaque. Ae circuncisión saã nguia nae, ùquĩ siquiã mose Espiritu Turã ndese, circuncisión turã eã ño ùquĩ nde. ²⁹ Ae Dios isi tuchi quia uchiangui re, ùquĩ nguiarei judíos tuchi. Ae siqui Espiritu Turã ndese, circuncisión tuchi chõ ùquĩ cote re. Ùquĩ je ra mbia achõ ñee turã eã. Dios abe quia ra ñee turã ee.

3

¹ ¿Mbaerã judiorã sete riqui mbia re? ¿Mbaerã circuncisión sete riqui mbia re? ² Eturãte quia mbia je re. Judíos je quiatu ngue Dios ucheẽ mondo nguia. Mbia mo je eã. ³⁻⁴ Judíos mo hui hui raque Dios cheẽ si. Dios quia ra ñee ñooñoã mbei. Echeẽ nguia ra io bei. Mbia hui hui raque esi. Mbia ñee ñooño ndaque. I ñi embesa ji re: Ndecheẽ nda io tuchi mbia resa rae. Mbia icuã mose ndeje, nde quia ra ere tuchi mbia si,

i que embesa ji ra. ⁵ Jemo ngue ñee no nda: —Dios turãte riqui nandeïcuã je co. Mbae icuã nandesã saã mbei chõ nguia. Mbia mae sacuã Dios turã ndese. Dios nandeïcuã mbasi mose, Dios icuãte, i chõchĩ jemo. ¿Mañi nande ra ùquĩ ñee mose re? ⁶ Ichõĩño tuchi chõ ùquĩ nde. Dios icuã aroneãte. Dios icuã mose, eĩ nda Dios mbia icuã mbasi aroneãte rei. ⁷ Jemo ngue ñee ño nda. —¡Nandechẽ ñooño ño nguia jẽ! Nandechẽ ñooño mose, mbia ra ñee turã Dios riĩ. “Ñee ñooñosa reã tuchi quia Dios riqui re,” i ra mbia Dios riĩ cote. Nyebe Dios riqui nguia nandembasi ãte nandechẽ ñooño mose, i chõchĩ jemo. ⁸ —Mbae icuã nandesã saã ño. Ì nda Dios turã nyecua mbia je, i chõchĩ jemo. Urecheẽ ãte ure ùquĩ ndesẽ. Ae ñee nguia ùquĩ, ùquĩ nda Dios mbasi.

Mbia mo eturã eãte

⁹ Judíos chõ nande re. ¿Nandeturã nda eriqui reĩ mbia mo si re? Tei. Nandeturã eã ño esi re. Nandeïcuã ja chõ ñene. Judíos eã icuã ja chõ ñene. Judíos icuã ja chõ eno nde. ¹⁰ Ì ñi embesa ji re:

Emo eturã eãte. Aque miĩ mo eã.

¹¹ “Dios icha taicua”, iãte emo.

“Dios rese taico”, iãte emo.

¹² Mbia que icha icha jate Dios si ra.

Eïcuã jate que eriqui ra.

Emo mbae turã mo saã eãte.

Aque miĩ mo eã.

¹³ Ûquĩ quiarei mbia raaque tã tãsa rã.

Aba mbia eã.

Sã eriqui ñee icuã mbei.

Mbia mbĩrĩ irĩ tuchi ñee ñooño uchuru je.

Mbei rasi rã ño echeẽ nde.

Aba mbasi.

¹⁴ Echeẽ icuã achõ tuchi chõ ñene.

Mbia mbĩcuãsa tuchi chõ echeẽ nde.

¹⁵ Mbia iquia chooño ño ñene.

¹⁶ Mangue chooñoa ño eriqui nguia mbae icuã naa naa.

Mbia mbiayã ñooño.

¹⁷ Ico chooñoa mbei mbia je.

¹⁸ Dios rese ndua eã tuchi,

i ñi embesa ji re. ¹⁹ Dios que Moisés chimbesa mee ja judíos je ra. Embesa ji mumbayã sacua. Mbia huiicuã icua ja sacua. —Dios cheẽ nandemumba tuchi chõ nguia re, i nda mbia ja chã. ²⁰ Emo ñee aroneãte. —Embesa ji amumbayã mbeite quia co. Nyebe ra Dios seisi turã, i aroneãte emo. Dios que Moisés chimbesa mee mbia je ra. Mbia huiicuã icua ja sacua.

Dios icuasa quia ra siqui bei

²¹⁻²² Dios que Jesús turã teacuquia nande je cote ra. Ae que mano nandeïcuã ndiquicharõ sacua nda. Nande Jesús icua mose, Dios ra nandeisi turã cote. Eĩ ja chõ Dios mbia je re. Dios bia eã ño mbia mo miĩ ndese. —Jẽ Moisés chimbesa mumbayã mose, taëisi turã, iãte Dios. —Jẽ Jesús icua mose, ùquĩ mose quiatu ra jaëisi turã, ite Dios. Embesa ji ñiinda abe que ñee ñee Jesús riĩ nyii no nda. ²³ Nandeïcuã ja chõ ñene. —Aque eturãte, iã nda Dios nandemo je. ²⁴ Nandeïcuãte raque. Dios quia eturãte nande je re. —Mbae mo jemondo jëicuã ndibishorõ, i ãte Dios. Jesucristo que mano nandeïcuã ndibishorõ ndesẽ. Nyebe Dios riqui nguia mae turã nanderese co. ²⁵ Dios que Jesucristo mondo mbia je ra. Mano sacua mbia icuã ndiquicharõ. —Jesús que mano seïcuã ndibishorõ nda, nande i mose, ùquĩ mose ra Dios nandemingo bei. Dios que mae ñooño mbia icuã ndese nyii ra. —Seriĩ nguia ra mano nguia eïcuã ndiquicharõ, i que ra. Echeẽ ngue ique cote ra. Dios uturã ndeacuquia mose que echeẽ ique cote ra. ²⁶ Dios riirĩ ngue mano mbia icuã

ndiquicharõ nda. Mbia mae sacua Dios turã ndese. Dios turã mbeite. Mbia icua isi turã nonde. Mbia Jesús icua mose ra Dios mbia isi turã.

²⁷ Nande ae ra nandeicua nandembutiã eã. Dios ae quia nandeicua mbutiã nguiã, Jesús icua mose. Nyebe nandeico nguiã nandecuasua raã naa aroneãte. Moisés chimbese que nandemumba mumbate quia resẽ. ²⁸ Mbia Jesús icua mose, aque mose quia ra Dios mbia isi turã. —Taëisi turã, jẽ Moisés chimbese mumbayã mose, iãte Dios nande je. —Jẽ Jesús icua mose, ùquĩ mose quiatu ra jaëisi turã, ite Dios nande je. ²⁹ Judíos achõ nderecua eã ño Dios re. Judíos eã abe rerecua chõ ñene. ³⁰ Emo abe eãte Dios. Dios mii ño ñene. Ae Jesús icua quia nae, ùquĩ nda Dios isi turã ja. Judíos abe isi, Jesús icua mose. Judíos eã abe isi, Jesús icua mose no. ³¹ Nande Jesús icua mose, Dios cheẽ mbesa ji riqui ua eã mbeite nande je co. Nande Jesús icua mose, Dios cheẽ nda nandemumbayã tuchi cote.

4

Abraham abe Dios icua

¹ Nandendua mbiri na Abraham ndese. Nandei ñiinda tuchi quia Abraham nde. ² Cose que Dios Abraham isi turã nda. Abraham mbae turã naa naa eã mose que Dios eisi turã nda. Dios icua mose quiatu que Dios eisi turã nda. Nyebe Abraham uturã naa naa aroneãte nguiã. ³ I ñi embesa ji re:

Abraham ngue Dios icua ra.

Nyebe Dios eisi turã nguiã,

i ñi embesa ji re. ⁴ Sã emo ndiqui quiei quiei emo je no. Mbae mo ndibishorõ. Ae echa mondo quia ee, mondochõ eã ño nguiã ee. Embae raã naa ndibishoronda chõ ùquĩ nde. Eĩ eã ño Dios re. ⁵ Dios chõ mbia icua isi turã nguiã. Emo Jesús icua mose, ùquĩ nda Dios isi turã. Emo mbae turã naa naa eã ndaque. Jesús icua mose, aque mose chõ Dios “ndeturãte seje,” i ee. Mbae turã naa naa eã ndaque. ⁶ David abe que ñee nda: “Ae je Dios ñee, ‘ndeturãte seje,’ i mose ee, aque ia tuchi chõ ñene. Mbae turã naa eã ndaque. Dios icuate quia ñene,” i que David ñee nda. ⁷ Co rei David chimbese co:

Ae icua Dios mbutiã nae, ùquĩ ia tuchi chõ ñene.

⁸ Ae icua ndese Dios riqui mae ãte nae, eicuate raque, Dios ra eisi turã.

Ùquĩ ia tuchi chõ ñene,

i ñi David chimbese re. ⁹ ¿Aba icua ño nda Dios mbutiã ña? Embia sacua ña. ¿Judíos icua achõ nda embutiã nde? ¿Ae circuncisión saã nae, ùquĩ achõ icua nda embutiã nde? Tei. Ùquĩ achõ eã ñene. Abraham Dios icua mose, aque mose tuchi chõ Dios eicua mbutiã nguiã esi. ¹⁰ Abraham circuncisión naa eã mose chõ Dios eicua mbutiã nguiã. Circuncisión naa nonde. ¹¹ Abraham Dios icua mose chõ ngue Dios eicua mbutiã nguiã. Aquere quiatu ngue Abraham circuncisión naa nguiã cote. Circuncisión ndei marca Dios mbae. Dios Abraham isire chõ circuncisión naa nguiã Abraham je. —Abraham ngue aisi turã nda, i ñe Dios re. Ae circuncisión saã eã nae, ùquĩ abe chõ “seru” i nguiã Abraham je, Jesús icua mose. ¹² Ae circuncisión saã nae, ùquĩ abe chõ “seru” i nguiã Abraham je, Jesús icua mose. Ùquĩ nyicua chõ Dios re. Sã Abraham nyicua Dios no. Circuncisión naa eã mose no.

Abraham Dios icua mose, Dios ucheẽ mbuchebiã mbei ee

¹³ Dios que ñee Abraham je cose ra. —Ibi tamondo ja ndeje nembraerã. Nderiiri mbaerã abe no, i que ee ra. Secheẽ mumbasa reã je chõ ibi tamondo, iã ño Dios re. —Ae seicua quia, aque je chõ tamondo, i que Dios Abraham ñi nda. ¹⁴ —Nandeico bei mose Moisés chimbese rui, aque mose ra Dios nandemingo bei, i chõchĩ judíos mo. Ùquĩ mose quiatu ra nandeico rei Jesús icua choõño. Ùquĩ mose quiatu ra Dios cheẽ ique ãte rei nande je. ¹⁵ —Ã jesaã saã, i mose Dios, emo echeẽ mumba mose, ùquĩ nda embasi. —Ã jesaã saã, iã mose, emo nda embasiã cote.

¹⁶ Dios turãte quia ñene. Nyebe eriqui nguiã mbae mondo choõño nande je eicua mose. Judíos achõ je eã ño eriqui nguiã mbae mondo mondo. Judíos eã je abe chõ eriqui nguiã

mbae mondo mondo, Dios icua mose. Sã Abraham Dios icua no. Sã Dios mbae mondo mondo ee no. Nyebe nandeico nguiã “nanderu” i Abraham je co. Ae rane nguiatu ngue Dios icua nguiã. ¹⁷ Nyebe embesa ji riqui nguiã i:

Dios que ñee Abraham je ra.

“Nde ra mbia i tuchi.

Ibi jenda ja i tuchi ra nde”, i que Dios Abraham je ra,

i que embesa ji ra. Dios ra mbia mangue chooñoa jenda ja isi turã, Jesús icua mose. Dios cheẽ sí tuchi chõ ã nde. Dios ae mbia raaque mbuquera nguiã. Ae emoãte namo nae, Dios ae ra ùquĩ nyao no. ¹⁸ —Nderiirina tamee ndeje. Eretiirĩ nda cote. Mbia ja i ra nde cote, i que Dios Abraham je ra. Abraham ngue “nyia, eno”, i Dios cheẽ mose ra. Amei tuchi raque. Tiiirĩ aroneãte raque aba je. ¹⁹ Amei tuchite raque. Cien añote raque. Eninisi abe arite raque. Eninisi rie chuumate raque. —Dios ra seriirina mee seje ucheẽ nguire, i que Abraham nda. —Ureimate nyeresẽ. ¿Mañi nda Dios ureriirĩ mee ure je re? i ãte que Abraham nda. ²⁰ Abraham ngue “nducuã” iã mbeite quia Dios cheẽ mose ra. “Nyia, eno”, i beite que equia Dios cheẽ mose ra. Ñee turã mbei que equia Dios riĩ nda. ²¹ —Dios quirãcuã tuchi quia ñene. Ae ra ucheẽ nyabiã mbei ñeende seje, i que Abraham nda. ²² Nyebe Dios Abraham isi turã nguiã. —Abraham ndiqui seicua tuchite co, i que Dios ra. ²³⁻²⁴ Abraham mii je eã ño Dios riqui nguiã ñee. —Abraham seicuate. Nyebe aico nguiã eisi turã co, i que Dios ra. Abraham mii je eã ño embesa ji riqui nguiã ñee. Nande abe je chõ eriqui nguiã ñee. Nande Dios icua mose, Dios ra nande abe isi turã. Dios sí que Jesús raaque mbuquera ra. ²⁵ Dios que Jesús mbu íbii nande je ra. Mano ngue nandeicuã ndiquicharõ nda. Aquere que Dios embuquera si cote ra. Nandembitirõ sacua ngue Dios embuquera ra.

5

Nande Jesús icua mose, Dios riqui nandeisi turã

¹ ã nandeico Jesucristo icuate ã. Nyebe Dios riqui nguiã nandeisi turãte cote. Nyebe Dios riqui nguiã nandembiate cote. ² ã nandeico Jesucristo icuate ã. Nyebe Dios riqui turãte nguiã nande je co. Dios turã tuchi. Dios ra nandemingo Jesucristo rã si tuchi cote. Ûquĩ ño nandesaarõ arõ nguiã ã. ³ Ûquĩ mii eã ño nandembia nguiã. Mbia icuã icuã ndaque ra nande je, ùquĩ mose abe chõ nda Dios nandembia no. Mbia icuã icuã mose nande je, Dios ra nandechiã mbucoi turã. Nandeico tochi sacua. ⁴ Nandeico tochi mose, Dios ia tuchi ra nanderese. Dios ia mose nanderese, Dios cheẽ nandesaarõ arõ na. Sã echeẽ ique rã nande je. ⁵ Nande Dios cheẽ ndaarõ arõ mose, ae ra ucheẽ nyabiã. Ae quiatu ngue Espíritu Turã mondo nguiã nande je. —Dios riqui nyesequate jendese co, i Espíritu Turã nguia nande je co.

⁶ Mbae turã ngue nandesaã aroneãte nandechue, aque mose que Cristo mano nande je ra. Nandeicuã mbitirõ sacua. ⁷ Mbia mo mano aroneate emo ndibishorõ. Nande turã mose, aque mose abe ra emo mano aroneãte nanderibishorõ. Etura tuchi mo ndibishorõ nguia emo mano sete raque reae. ⁸ Cristo quiatu que mano nanderibishorõ nandeicuã tuchi mose ra. Nyebe nandeico nguiã ñee: —Dios riqui nyesequa tuchite nanderese co, i. ⁹ Cristo mano mose que nandeicuã mbitirõ cote ra. Ae ra nandemingo icue Dios mbia icuã mbasi mose. ¹⁰ Dios riirĩ ngue mano nande je ra. Nande Dios ucuayã mose. Ae quia ngue eturã mbeite riqui nguiã nande je. Dios que “sequiatorã jẽ”, i nande je cote ra. Nyebe ra nandeico tuchi erese cote. Jesús quiatu ngue quera sichĩ nguiã nande je cote. ¹¹ Nyebe nandeya tuchi riqui nguiã Dios rese co. Jesucristo riĩ. Jesucristo quiatu ngue mano nguiã nande je.

Adán na eã tuchi chõ Jesucristo re

¹² Mbia mii nane ngue siqui nyii ra. Aque rane ngue mbae icuã saã nande je ra. Nyebe mbia icuã jate riqui nguiã cote. Nyebe Dios riqui nguiã ñee. —Mbia ra mano ja, i cote.

¹³ Mbia que mbae icuã saã saã ndei quia nyii ra. Moisés Dios cheẽ mbesa nonde. —Dios

cheẽ ngue jemumbachĩ nda, i aroneãte que aque mose ra. Dios cheẽ mbuchecua iriãte quiatu ngue aque mose re. ¹⁴ Adán nane ngue Dios cheẽ mumba cose ra. Aque mose bei chõ ngue mbia mbae icuã naa naa nguiã cote. Nyebe mbia riqui nguiã mano mano ja huiicuã mose cote. Moisés que Dios cheẽ mbesa chee ra. Moisés embesa nonde que mbia mano mano ja huiicuã mose ra. Jesucristo rã eã tuchi chõ Adán nde.

¹⁵ Adán nane tuchi que mbae icuã saã nda. Jesucristo quiatu que mbia rirõ nguia mbae icuã si ra. Adán mbae icuã naa mose, aque mose bei que mbia mano mano cote ra. Jesucristo mbae turã naa mose, ae que mbia icuã mbitirõ tirõ cote ra. Dios turã niĩ. Jesús chisaã nguia rei Adán chisaã na eã tuchi. ¹⁶ Adán ae rane ngue mbae icuã saã cose ra. —Mbia ra mano mano ja cote, i que Dios cote ra. Adán icuã ndese maende. Ae Adán saã icuã nande je nae, aque je que Jesucristo mano nda. Jesucristo turãte que mbia je cote ra. Nyebe Dios riqui nguiã nandeisi turã, nandeicuã ndese mae ndocoĩ. ¹⁷ Adán ae que mbae icuã saã nyii ra. —Mbia ra mano mano ja cote, Adán mbae icuã naande, i que Dios cote ra. Jesucristo ae que mbae turã saã mbia je cote ra. Mbia icuã mbutiã sacuã esi. Ae Jesús turã icua quia nae, ũquĩ nda Dios mingo turã mbei, ũquĩ icuã ndese mae ndocoĩ.

¹⁸ Adán ae que mbae icuã saã nyii ra. —Mbia ra mano mano ja cote, i que Dios cote ra. Adán icuã ndese maende. Aquere que Jesucristo mbae turã naa mbia je cote ra. Mano nguiatu ngue mbia riquicharõ nde. Nyebe Dios riqui nguiã nandemingo bei co cote. Jesús rĩĩ ae ñene. ¹⁹ Adán Dios cheẽ mumba mose, mbia mbiicuã ja que ũquĩ cote ra. Jesucristo Dios cheẽ mumbayã mose chõ mbia tubiriã mbuturã nguiã no. ²⁰ Dios que ñee Moisés je ra. —Secheẽ embesa mbia je, i que ee ra. Ì nda mbia jirandu tuchi huiicuã ndese. Mbia icuã i i tuchi mose, eĩ ño Dios turã i i tuchi mbia je no nde. ²¹ Adán mbae icuã naa mose, mbia mbiicuã ja chõ ũquĩ nde. —Mbia ra mano mano cote, i que Dios cote ra. Jesucristo que mano nandeicuã ndiquicharõ cote ra. Aque mose que Dios uturã ndeacuquia tuchi nande je cote ra. Nandembuturã sacuã cote. Nandemingo bei sacuã cote.

6

Nandeyasu chõ nandeico nguiã ã cote

¹ ¿Mañi nande ra cote re? ¿Mbae icuã nda nandesã i i re? ¿Dios turã i i sacuã nande je re? ² Tei. Dios biãte ũquĩ. Jesús rese que nandemano ndesẽ. Nandemano ngue mbae icuã naa eã sacuã ndesẽ. ¿Mañi nande ra mbae icuã naa naa si re? ³ ¿Jẽiranuãte bautizar i rese re? —Jesús resenda tuchi chõ ũquĩ ndiqui re, i nda mbia bautizar ire nande je chã. Nande bautizar ire, nandemanonde raanguia chõ ũquĩ nde. Mbae icuã naa eã sacuã cote. ⁴ ¿Mbaerã ño bautizar nande chã? —Amano ngue Jesús rese ra, i chõ bautizar i re. —Seati que Jesús rese ra, i chõ bautizar i re. —Dios que sembuquera si Jesús rese ra, i chõ bautizar i re. Sã Dios quirãcuã Jesús mbuquera eraaque mose no. Eĩ nande chõ siqui nandeyasu ae.

⁵ Nandeico Cristo rese ã. Nandemano mose Cristo rese, nandereco yasu chõ nandeico nguiã erese ã. ⁶ Cristo mbucha mose ira rese, nandeicuã abe que Dios mbucha ira rese ra. Nande mbae icuã osei chiã sacuã ño ũquĩ nde. Mbae icuã nimba nda nandeico eã cote chã. ⁷ Mbia raaque quia mbae icuã saã aroneãte nguiã. Eĩ nande chõ nguiã mano mose Cristo rese ã. Mbae icuã naa aroneã. ⁸ Nandemano mose Cristo rese ira rese, nandemingo bei ra uchiese cote. Ae rã si. ⁹ Cristo que mano nda. Quera si que cote ra. Aquere ra mano siã cote. ¹⁰ Aque miĩ ngue Cristo mano mbia icuã je ra. Quera si que cote ra. Mano si eã ndae. Siqui bei equia Dios rese co. ¹¹ Jendaaque chõ jẽsaã saã mbae icuã je. Jenderecuarã eã mbae icuã cote. Jesucristo rese nandeico tuchite ã cote. Mbae yasu rã ño nandeico nguiã Jesucristo rese ã cote.

¹² ¿Mbae icuã ndese ra jẽingochĩ jenderecuarã jẽ! Jẽ mba e icuã osei mose, jẽteachõ ño jẽ! ¹³ ¿Jendete ra jemee meecheĩ mbae icuã je jẽ! Dios je quia jendete jemee. Mbae turã naa sacuã. Cristo rese que jemano ndesẽ. Jẽyasu chõ ngue jẽquera si Cristo rese resẽ.

¹⁴ Nandererecuarã eã nda mbae icuã cote. Moisés chimbesa rui eã ño nandeico nguiã ã cote. Dios turã ndui ae chõ nandeico nguiã ã cote.

Mbae turã nimba chõ nandeico cote

¹⁵ Dios turã ae nandemingo nguiã. ¿Ûquĩ mose ra mbae icuã nandesaã saã nde? Tei. Dios biãte ùquĩ. ¹⁶ Nande nandechimondo mose mbae icuã je, mbae icuã nda nandererecuarã cote. Mbae icuã nda nandequia chee cote. Nande nandechimondo mose Dios je, ae ra nandererecuarã cote. Ae ra nandemingo bei mbae turã ndese cote. ¹⁷ Jẽingo bei que mbae icuã ndese jenderecuarã nyii ra. Mbia Jesús cheẽ nenei nenei mose jẽje, jẽisi turã ño ngue cote ra. ã jẽingo echeẽ mumbayã ã cote. Nyebe aico nguiã gracias ite Dios je co. ¹⁸ Dios que jendirõ mbae icuã si cote ra. Mbae icuã ndese ra jẽingoã cote. Mbae turã ndese bei ra jẽingo cote. ¹⁹ Secheẽ ambuchecua tuchi quia jẽje co. Jẽ eicua tuchi sacua. Jendete que jemondo tuchi mbae icuã je nyii ra. Jẽ ngue jẽingo i i tuchi mbae icuã ndese nyii ra. Jendete jemondo Dios je cote. Mbae turã naa i i sacua cote.

²⁰ Mbae icuã mbaerã ño jẽingo nguiã cose. Mbae turã ngue jẽsaã aroneãte quia aque mose ra. ²¹ Jẽireĩte mbae icuã naa naande cote. Jenyisaã saã mbae icuã ñiinda, ùquĩ ngue mbae turã mo mondo ãte jẽje resẽ. Ae mbae icuã saã i ite quia, ùquĩ nda mano. ²² Dios que jendirõ mbae icuã si cote ra. Dios rimba chõ jẽ cote re. Nyebe Dios jemingo nguiã icúe mbae icuã si. Nyebe ra Dios jemingo bei ibate manonde cote. ²³ Ae mbae icuã saã saã nguia nae, ùquĩ nda Dios mbasi bei manonde. Ae Jesucristo icua quia nae, ùquĩ nguiatu ra Dios turã mingo bei. Mbae turã naa eã ndaque. Dios turãte quia ee re.

7

Eraaque rã ño nandeico nguiã Moisés chimbesa je cote

¹ Sã jenderecua ibi jenda mo no. Echeẽ jemumba aroneate no. Jemano mose, jenderecuayã nda cote. ² Sã cuña mo ndiqui ngu rese no. Cuña mo ngu rerequia mose, sã eriqui bei erese. Eru mano mose, aque mose ramo nda siquĩã erese cote. Aque mose ramo nda ae ae riqui cote. ³ Ngu reco mose, siqui aroneãte emo ndese. Siqui mose emo ndese, Dios cheẽ mumba chõ ùquĩ nde. Eru mano mose, aque mose quiatu ra ngu mo ndea cote. Dios cheẽ mumba eã ño ùquĩ nde.

⁴ Eraaque rã ño jẽingo nguiã Moisés chimbesa je ùquĩ cote. Cristo quiatu que mano jeniã nda. Quera si que jeniã no nda. Cristo rese chõ jẽingo nguiã ùquĩ cote. Dios je mbae turã naa naa sacua ño jẽingo nguiã erese ùquĩ cote. ⁵ Nandeico mose mbae icuã ndese nyii, mbae icuã achõ ño ngue nandehosei chosei quia aque mose ra. Nandebi tuchi que Dio s cheẽ mumba mumba aque mose ra. Nyebe que nandeico mbae icuã naa i i tuchi aque mose ra. Eĩ nda nandecuã nandequia rei aque mose. Espiritu Turã nandembiasu eã mose. ⁶ Eraaque rã ño nandeico nguiã Moisés chimbesa je ã cote. Moisés chimbesa rui eã ño nandeico nguiã ã cote. Dios cheẽ mii ndui chõ nandeico nguiã ã cote. Espiritu Turã nguiatu ngue nandembiasu nguiã. Espiritu Turã ño nandembaaquiatu nguiã ã cote. Moisés chimbesa achõ eã ño cote re.

⁷ —Moisés chimbesa icuãte, ae ãte raque quia co. Moisés chimbesa quiatu que sembiirandu seicuã ndese resẽ. —Eicuãte quia emo mbae osei osei riqui re, i que Moisés chimbesa ra. Eĩ nda seiranuãte rei ùquĩ ndese. Moisés chimbesa eande ndae. Moisés chimbesa ae ngue sembiirandu nguiã ùquĩ ndese. —Eicuãte ùquĩ, i seje. ⁸ Moisés chimbesa sembiirandure mbae icuã ndese, mbae icuã achosei i i tuchichĩ cote. —Mbae icuã nda jẽsaã saãchĩ, i mose chõ mbae icuã achosei i i tuchichĩ cote. Emo Moisés chimbesa icuayã mose, mbae icuã abe ra eicuayã no. ⁹ Moisés chimbesa que aicuayãte quia nyii ra. Seturã aico reĩ aque mose. Moisés chimbesa que aicua cote ra. Eicua mose que echeẽ amumba i i tuchi cote ra. Ûquĩ mose que seicuã aicua cote ra. ¹⁰ Mbia mingo bei sacua ndaque Moisés chimbesa. Ae que semingo bei eã nda. Moisés chimbesa amumba mumba bei chõchĩ. Nyebe aico nguiã isho tuchi Dios si aque mose. ¹¹ Seicuã ño ngue

sembiirĩ irĩ mbei quia nyii ra. Se Moisés chimbese icua mose, seya eã tuchi que aque mose cote ra. Seicuã nda seiquia chee, ae que se ra. ¹² Moisés chimbese turãte raque. Dios cheẽ ndaque.

¹³ Moisés chimbese turãte. Ũquĩ je eã ngue Dios paama i seje ra. Seicuã ae quiatu que Dios mbupaama i seje ra. Moisés chimbese que sembiirandu tuchi seicuã ndese ra. Se Moisés chimbese turã icua mose, ũquĩ mose que seicuã Dios mbupaama i seje ra. Nyebe Dios Moisés chimbese mee nguiã nande je. Nandeicuã mbuchecua tuchi sacua nande je.

Nandechianqui renda icua ño nandeisi isi nguiã

¹⁴ Moisés chimbese turãte raque. Se ae seicuã nde. Mbia chõ se re. Moisés chimbese amumba mumba chõchĩ nguiã co. ¹⁵ Mbae turã asaã mbite raque. Mbae icua asaã eã mbite raque. Mbae icua nguiã seisi isite nguiã. Mbae turã uquia reã. ¿Mbaerã aico mbae turã naa eãte re? ¹⁶ Ae asaã sereãte quia nae, ũquĩ asaã mbeichĩ. Moisés chimbese turãt e raque. Aico echeẽ mumba mumba beichĩ. ¹⁷ Se ae chõ eã ño aico nguiã mbae icua naa naa co. Sechiangui renda icua nguiã “mbae icua esaã saã”, ite nguiã seje co. Nyebe aico nguiã mbae turã mo naa eã mbeite co. ¹⁸ Seicuã tuchi chõchĩ se. Seturã mo eã tuchichĩ se. —Mbae turã tasaã, aete raque quia co. Aico mbae icua naa naa mbei chõchĩ co. ¹⁹ Sebite raque mba e turã. ¿Mbaerã aico mbae turã naa eãte re? Sebiãte raque mbae icua. ¿Mbaerã aico mbae icua naa naa mbeite re? ²⁰ Se ae eã mbae icua asaã saã nguiã. Sechiangui renda icua nguiã “mbae icua esaã saã” ite nguiã seje. Sechiangui renda icua ño seisi isi nguiã mbae turã si co.

²¹ “Mbae turã tasaã”, i mose se, mbae icua ño seriquisã quisãchĩ nguiã co. ²² Sebite raque Dios cheẽ sechiangui re. ²³ —Dios cheẽ ndese taico, ae rei nguiã sechiangui re co. Sechiangui renda icua nguiã seriquisã quisãte nguiã. Nyebe aico nguiã mbae icua naa i ite. ²⁴⁻²⁵ Dios cheẽ ndese aico sete raque. Sechiangui renda icua nguiã semingo beite nguiã mbae icua ndese. Seraaquete aico co. Nyebe seya eãte aico co. ¿Aba quia ra seicuã mbitirõ nde? Jesucristo quia ra seicuã mbitirõ cote. Nyebe aico gracias i tuchi Dios je co.

8

Espíritu Turã ndiqui nandembui mbae icua si

¹ Ae Jesucristo icua quia nae, ũquĩ nda Dios mbasiã mbei. ² Nande Jesucristo icua mose, Espiritu Turã nda nandechiã mbiasu. Espiritu Turã nda siqui nanderese, mbae icua naa eã sacua. Eĩ nda nandemano mbeite rei, mbae icua naa naa mbei mose. ³ Moisés chimbese que nanderirõ aroneãte mbae icua si ra. Echeẽ nguiatu ngue nandemumbayã aroneãte nguiã. Mbiate quiatu ngue nande re. Nandequirãcuã nea. Dios que ndua nanderese ra. Nyebe nguiirĩ mondo nguiã nande je. Mbia rã ngue Jesús ru íbii ra. Mbia icua jate raque. Ae mii ngue eicuã eã nda. Ae que mano nandeicuã ndiquicharõ nda. Nyebe nandererecua eã ño mbae icua cote re. ⁴ Jesús que mano nande je ra. Nyebe mbae icua ñimbirãcuã eãte nande je cote. Nyebe Dios cheẽ nandemumbayã arondete namo cote. Espiritu Turã ndui chõ nandeico nguiã cote. Mbia icua ndui eã ño nandeico nguiã ã cote. ⁵ Ae siqui quia Espiritu Turã ndese nae, ũquĩ ño siqui nguiã Dios cheẽ ndui si. Ae siquiã nguiã Espiritu Turã ndese nae, ũquĩ ño siqui nguiã uchiangui renda icua ndui si. ⁶ Ae siqui quia Espiritu Turã ndese, ũquĩ ia bei ra eriqui. Siqui bei rae. Ae siquiã nguiã Espiritu Turã ndese, ũquĩ nda siquiã. Mano ndae. ⁷ Nandechiangui renda icua nguiã siqui icua icua mbeite nguiã Dios je. Nandechiangui renda icua nguiãre Dios cheẽ mumbayã aroneã. ⁸ Ae siqui bei quia uchiangui renda icua ndui, ũquĩ siqui aroneãte Dios cheẽ ndui.

⁹ Eĩ jenze eãte raque jẽ. Espiritu Turã ndui chõ jẽingo nguiã jẽ. Espiritu Turã nguiã siqui nguiã jeñiangui re. Espiritu Turã siquiã mose emo ñiangui re, Cristo rimba eã ño ũquĩ nde. ¹⁰ Jesucristo riqui jeñiangui re ũquĩ. Jendete ra mano ndaque mbae icua je. Espiritu Turã nda jeãngue mingo bei ibate. Dios quiatu ngue jẽisi turã nguiã. ¹¹ Dios que

Jesucristo raaque mbuquera ra. Eĩ si ra Dios nanderete raaque mbuquera Espiritu Turã quirãcuã je no. Eĩ si ra nanderete mbiasu, Espiritu Turã siqui mose nandechiangui re.

¹² Nandechiangui renda icuã ndui nandeico aroneãte cote. ¹³ Nandechiangui renda icuã ndui nandeico mose, nandemano mbei ra equia. Espiritu Turã nandebi icuã mbutiã mose, nandemingo bei rae. ¹⁴ Ae je Espiritu Turã ndiqui ñee nae, “eĩ jenyee” i nae, Dios rimba chõ ùquĩ nde. ¹⁵ Nande Espiritu Turã isi mose, aque mose bei chõ Dios riirĩ nande cote re. Dios rimbachõ eã ño nande cote re. Dios riirĩ tuchi chõ nande cote re. Nandesiquiche tuchi que equia Dios si nyii ra. Nandesiquicheãte esi namo cote. —Paba, nande chõ nguiã e e co cote. ¹⁶ —Dios riirĩ tuchite jẽ, i chõ Espiritu Turã nguiã nandembiirandu tuchi. —Dios riirĩ tuchi rei nande re, nande chõ nguiã nande abe nandechiangui re co. ¹⁷ Dios riirĩ tuchite quia nande re. Nyebe ra Dios mbae mondo tuchi nande je Jesucristo rese. Sã ñi mbia Jesucristo mbasi cose no, eĩ si ra mbia nandembasi nande abe. Aquere ra nandeico turã mbei erese ibate cote.

Mbae turã mbei jee ra nande je nandeico mose ibate

¹⁸ Mbia ra nandembasi raque a nyii. Dios ra nandererao bei ibate cote. Aque mose ra mbae turã mbei nande je cote. Nyebe ra nandetesarei nanderasi jua si cote. Nandeico bei mose ibate. ¹⁹ Dios ra huiicuaasa mbuchecua ja aque mose. —Co rei seicuaasa co. Co abe no. Co abe no, i ra Dios aque mose. Ûquĩ ño nandesarõ arõ nguiã ã. Ae Dios chao mbae ja, ùquĩ abe riqui ùquĩ ndaarõ arõ ã. ²⁰ Adán mbae icuã naa namo mose, mbae icuã ja que aquere cote ra. Dios chiao icuã ja cote. Dios que mbae mbiicua ja Adán mbae icuã naa namo mose ra. ²¹ Eĩ mbei eã nda mbae. Mbae ra nimbitirõ ja cote. Ñimbiasu ra cote, Jesús tu mose íbii cote. Mbae ra manoã cote. Mbae ra shi eã cote. Jesús quiato rese ra mbae nyiicuaabo ja aque mose cote. ²² Dios chiao ra nyiicuaabo ja aque mose. Dios chiao ia eãte quia namo nde. Ñquẽ ndasi rá ño eriqui nguiã namo. Nyebe ra Dios uchiao mbiasu ja cote. ²³ Dios que Espiritu Turã mondo nande je ra. Nyebe nandeico nguiã ñee, “Dios ra nandembiasu nguiirina tuchi cote”, i. Aque mose ra Dios nandembuchiicuaabo tuchi uchiao ja rese cote. Namó ño nanderasi rasi re. Nandeya eãte abe no. Nandembuchiicuaabo mose, nanderete abe ra embiasu. ²⁴ —Jendete tambiasu, i que Dios nanderirõ mose mbae icuã si ra. Ûquĩ ño nandesarõ arõ nguiã ã. Nanderete yasu eãte namo. Nyebe nandeico nguiã eraarõ arõ ã. ²⁵ —Jendete tambiasu, i que Dios nande je ra. Nyebe nandeico nguiã eraarõ arõ mingue ã.

²⁶ Nandequirãcuã neate nande. Nyebe Espiritu Turã ndiqui tuchi nguiã nanderese. Sã nandeico ñee: “¿Mañi nande ra ñee Dios je re?” i nandechiangui re. Nandechee ñdequia requia mose chõ nandeico nguiã iabu abu. Nandeiabu mose chõ Espiritu Turã ndiqui nguiã ñee turã Dios je nanderiĩ. Nandeuru ñee Dios je nandechiangui re. ²⁷ Dios mbia chiã icua jate quia co. Espiritu Turã ñee mose Dios je nandeuru, Dios echeẽ icua chõ nguiã aque. Dios cheẽ ndui si chõ Espiritu Turã ndiqui nguiã ñee Dios je Dios icuasa riĩ. ²⁸ Ae nyesecua quia Dios rese, ùquĩ je chõ Dios riqui nguiã mbae turã naa ja. Dios quiatu ngue eirabo nguiã. Ndua quiatu ngue erese nyii re.

²⁹ Ae res e Dios riqui nduate nyii nae, ùquĩ ngue Dios mingo icúe nyii ra. Jesucristo rá si embiasu sacua. Nyebe nandeico nguiã Dios riirĩ tuchi Jesucristo rese cote. Jesucristo rei nanderiqui cote. Nande tubiriãte ra Dios quiato cote. ³⁰ Dios que ndua nanderese nyii ra. Aquere que nandemingo icúe umbaerã cote ra. Nandesi turã ngue cote ra. —Mbia tamumae turã ja jendese jẽingo mose ibate, i que Dios nande je cote ra.

Mbae mo nda nandembui eã mbei Dios si

³¹ Dios riqui tuchi nanderese co resẽ. Nyebe ra emo ñimbirãcuã eã nande je cote. ³² Dios que nguiirĩ miĩ mondo nande je ra. Mano sacua nandecua je. Eĩ nda mbae mondo ja nande je no. Sã nguiirĩ mondo nande ja je no. ³³ Dios chesecua tuchi chõ nande re. Emo ñee icuã aroneãte nande je. Dios quiatu ngue nandesi turã nguiã. ³⁴ Cristo que mano nandecua je ra. Quera si que ra. Dios quiatocuti eñi ngoi hue cote. Ñee turã turã

nanderĩ Dios je hue cote. Nyebe emo ndiqui nguiã ñee icuã aroneãte nande je cote. ³⁵ Mbae mo Dios mbesarei aroneãte nandesĩ. Nyesequa beite quiatu nguiã nanderese co. Nanderasi arondete raque. Mbae nandembia eã arondete raque. Mbi a icuã arondete raque nande je. Nanderiãcuã arondete raque. Nandeirao eã arondete raque. Mbia nanderiquia arondete raque. Ũquĩ ja ra Dios mbesarei eã tuchi nandesĩ. ³⁶ Mbia icuãte riqui nande je ã. Sã embesa ji riqui i no:

Nderĩ ño mbia riqui nguiã ureiquia serĩ mbeite ã.

Oveja iquia iquia rã ño eriqui nguiã ure je ã,

i ñi embesa ji re. ³⁷ Mbia icuã icuãte raque nande je. Nĩmbirãcuã eã mbei ra nande je. Jesucristo quia siqui nguiã nanderese co. Nyesequa beite quiatu nguiã nanderese co. ³⁸⁻³⁹ Dios nyesequa tuchite quiatu nguiã nanderese co. Dios hui aroneãte nandesĩ. Mbia nanderiquia iquia mose, aque mose abe Dios hui aroneãte nandesĩ. Mbae mo nda embui eã nandesĩ. Angeles. Aba checuayã icuã. Mbia rerecua. Ae icuã icuã ndiqui nande je namo. Ae icuã icuã nda nande je emo mose. Ibatenda mo. Ae siqui ibiqui rĩ no. Dios chia mo. Ũquĩ ja ra Dios mbui eã nandesĩ. Dios quia nyesequa tuchite nguiã nanderese Jesucristo rĩ co.

9

Dios que judíos mii icúe umbaerã tuchi ra

¹ Jesús icuasa chõ se resẽ. Aico ñee ñooño eãte co resẽ. Espĩritu Turã abe riqui sembiirandu sechiangui re co resẽ. ² Seya eãte aico co. Seya eãte aico judĩos rese co.

³ Se sí raque judío. Judĩos ja chõ ure re. Judĩos siqui sereãte chõchĩ Jesús rese. Seso sete raque tata cuasu, judĩos mingõ bei sacuã Jesús rese. Eĩ ndei ra sesose rete tata cuasu judĩos rendaque re. Seresenda tuchite quia ñene. ⁴ Israel ndei judĩos i tuchi. Seriirĩ, i rei que Dios judĩos je ra. Dios que uquirãcuã teacuquia rei judĩos je ra. Dios que contrato saã ndei judĩos je ra. Moisés chimbesa que judĩos quereco rei ra. —Eĩ jenyẽ chõ ñee seje, i rei que Dios judĩos mbaaquiato quiato ra. —Mbae turã nda asaã saã mbei quia jẽje, i bei que Dios quia judĩos je ra. ⁵ Nanderamei ñiinda tuchi quiarei judĩos i. Cristo tu mose ibi, judío que ae abe cote ra. Cristo rei Dios tuchi. Mbia rerecua bei tuchi rei Cristo. Amén.

⁶ Dios turã tuchi raque judĩos je. Judĩos que siquiãte Dios rese cote ra. Dios quiato que ucheẽ mbuchebiã ndei ee ra. Ũquĩ mo nguiatu que judĩos tuchi eã nda. Siquiã tuchi que Dios rese ra. ⁷ Abraham ndiirĩ nyeremo ndei que ra. Ismael. Isaac. Ũquĩ nyeremo ngue eriirĩ ja rei ra. Dios que Isaac mii isi ra. —Abraham ndiirĩ, i eã ngue Dios Ismael riirĩ je ra. —Abraham riirĩ, i chõ ngue Dios Isaac ndiirĩ je ra. Isaac ndiirĩ jaje que Dios “judĩos” i cote ra. ⁸ Abraham ndiirĩ nducucha que Dios isi turã ja eã ndese. Ae Dios cheẽ isi turã nguia, ũquĩ je chõ Dios riqui nguiã “seriirĩ” i. ⁹ Dios que ñee Abraham je ra. —Tenda nongue ra achu. Aque mose ra ãquẽ nacui mo nyaacuquia neninisi Sara je, i que Dios Abraham je ra. ¹⁰ ãquẽ ngue tiarõ cote ra. Isaac, i que ee ra. Isaac que ngũinisi tea chee ra. Rebeca, i que eninisi je ra. Eata riru rerequia mose que Dios ñee ee ra. ¹¹⁻¹² —Ae rane nda nyaacuquia ãquẽ, ngõngue rimba tuchi chõ nda aque, i que Dios Rebeca je ñee nda. Echaacuquia nonde. Eriirĩ mbae icuã naa nonde. Mbae turã abe naa nonde. —Co chõ taisi, i que Dios ra. —Co chõ taisi, i beite Dios quia co no. Mbia mbae turã naa nonde chõ Dios eirabo nguiã. Dios turãte quia ñene. Nyebe mbia mo irabochõ nguiã. Ebite quia ñene. ¹³ Dios que ñee Rebeca riirĩ nii nda. Ũquĩ nyeremo nii:

Jacob ndese chõ aio nguiã nyesequa.

Esaú rese achesequa eãte, i que Dios ra,

i que embesa ji ra.

¹⁴ ¿Mbaerã Dios riqui aque mii irabo re? ¿Mbaerã eriqui enongue abe isiã nde? ¿Dios icuãte ere? Tei. Eicuã eãte raque. ¹⁵ Sã Dios ñee Moisés je nyii no:

Seya eãse mose emo ndese, seya eãte erese.

Setutãse mose emo je, seturãte ee,

i que Dios Moisés je ra. ¹⁶—Dios turã naa nda seje chã, i mose emo, ùquĩ je eã ño Dios turã ndiqui nguiã. Ae mbae turã saã saã ndei quia, ùquĩ je eã ño Dios turã ndiqui nguiã. Ae rese Dios ia eã ndiqui, ùquĩ je quiatu Dios turã ndiqui nguiã. ¹⁷ Sã faraón no. Egipto jenda rerecua. Dios que ñee ee ra. —Aremii ngue mbia rerecuarã nda. Sequirãcuã ndeacuquia sacua mbia je. Mbia jirandu ja sacua serese, i que Dios faraón je ra. ¹⁸ Dios ia eãse mose emo ndese, eya eã nda erese. Dios emo ñia matãse mose, matã ndae.

Dios ra judíos isi turã sí

¹⁹ Jemo nda ñee seje reae. —Dios ae emo ñia mātã mose, ¿mbaerã nda jeñee asi echiã ãtã je re? i ra jemo ñee seje reae. ²⁰ Dios cheẽ nandesobeishĩ aroneãte. Sã nandembaecua ñio ñee aroneãte uaosa je no. —¿Mbaerã seraã eĩ nde? i aroneãte ñio ñee uaosa je no. ²¹ Ñio aosa ra ñio saã ñooño ño ubi mose no. Ñio turã tuchi raã arondete no. Ñio icuã abe raã arondete tuchu sique je no. Embae quia tuchu re. Tuchu rã ño nande re. Ñio aosa rã ño Dios re. ²² Ae eicuã icuã mbeite riqui Dios je nae, ùquĩ je Dios siqui mingue i ite co. Ùquĩ nda nyoi je tata cuasu. Ùquĩ Dios mbasi serĩte cote. ²³ Dios mbae turã saã sete ubi je. Nyebe uquirãcuã ndeacuquia nguiã ubi je. Diobi chõ nande re. Dios que nandea uchesecuarã nda. Nandeico sacua erese. ²⁴ Diobi chõ nande re. Dios que nandeirabo ra. Nandemo ndei judíos. Judíos eã abe abe. Dios chiirabo ja chõ nande re. ²⁵ Sã Oseas Dios cheẽ mbesa no:

Ae serimba eã nyii nae, ùquĩ nda serimbarã cote.

Ae rese mbia nyesequayã nyii, ùquĩ ndese ra achesecua tuchi se cote.

²⁶ “Seresenda eã ño jẽ nde”, i que Dios ñee ee nyii ra.

Hue jenda sí je ra Dios ñee cote.

“Seresenda chõ jẽ cote re”, i ra Dios si ñee ee cote,

i que Oseas Dios cheẽ mbesa ra.

²⁷ Eĩ ngue Isaías Dios cheẽ mbesa cose ra:

Judíos tubiriã tuchite raque rae.

Siqui ja eã nda Dios rese.

Co miĩ miĩ ño nda siqui erese.

²⁸ Dios quia ra uquiatoã mbasi ja ibi jenda cote.

Mbasi jei ra cote, i que Isaías embesa ra. ²⁹ Isaías que ã mbesa cose no nda:

Mbia rese Dios ndua eande rae, eĩ nda judíos ua ja rei.

Dios judíos mo ndecha eande rae, eĩ nda judíos ua ja rei.

Sã Sodoma jenda ua ja no.

Gomorra jenda abe no,

i que Isaías embesa ra.

Judíos siqui sereã Jesús rese

³⁰ Tacheẽ nyecua jẽje. Ae judíos eã nae, ùquĩ ngue “taico Dios rese”, iã ndei ra. Aque mose que Jesús icua cote ra. Jesús icua mose que Dios echiã mbitirõ cote ra. ³¹ Judíos quiatu que ñee ndei ra. —Dios cheẽ ndui si tuchi nandeico. Nandeico mose erui, Dios ra nandemingo bei, i rei que judíos ra. Dios que emingo bei eã nda. Siqui bei eã nguiatu ngue Dios cheẽ ndese re. ³² —Jesucristo nandeicua, i eã ñochĩ judíos. —Nande ae nandeico Dios cheẽ ndui, i chõchĩ. —Nandeico mose erui, Dios ra nandemingo bei, i chõchĩ. Judíos biãte que Jesús riqui ra. Nyebe judíos riqui turã eãte nguiã. ³³ Eĩ ngue embesa ji Dios cheẽ nda: Serucucha que amiĩ judíos rae ra.

Judíos ra eisiteã.

Judíos ra cuá i nyoi ee.

Ngoi ra echoi cuá i mose ee.

Sita rã ño serucucha ee re.

Ae serucucha icua quia nae, ùquĩ nguia ra ngoi eã nyoi.

“Dios rucucha aisi jirichĩ nguia no”, i eã nda Cristo icuasa mo ñee,

i que Dios cheẽ mbesa ji ra.

10

¹ —Sã Dios judíos rirõ mbae icuã si, ae rei quia co. —Paba, judíos emingo Jesucristo rese, ae tuchi rei quia co. ² Judíos siqui sete raque Dios cheẽ ndui. Ñeenda quia eicuayãte nguiã Dios icha. ³ —Dios ra nandechiã mbitirõ Jesucristo riĩ, i eã ñochĩ. Ae ae uchiã mbitirõse chõchĩ. Jesucristo icua sereã nea mbei chõchĩ. Nyebe Dios riqui nguiã echiã mbitirõ eã mbei. ⁴ Jesucristo tu nonde que judíos siquise tuchi Moisés chimbesa rese ra. Jesús que tu fbii cote ra. —Moisés chimbesa rui jẽingo mose, taembitirõ turã, i ãte que Jesús ra. —Seicua mose quiatu ra jaembitirõ, i que ra.

Sã mbia siqui ja serese, i Dios

⁵ —Emo mbae icuã mo saã eã mbei emo mose, ùquĩ nda Dios mingõ bei, i rei que Moisés ra. ⁶⁻⁷ ã nandeco Jesús icuate ã. Nyebe ae riqui nguiã nandemingo bei i ite ã. Nyebe nandeco nguiã ñee ãte. —Aba quia ra oso Jesús reru ibate si nande je, i ãte. —Aba quia ra oso mbia raaque rea, Jesús mbuquera sacua, i ãte nande mo. ⁸ ã ureico Jesucristo renei nenei mbia je ã. —Jẽ Jesucristo icua mose, jẽingo bei rae, ure equia mbia je ã. Jesucristo icuasa ra ñee: —A Jesucristo cheẽ ndiqui aba jiite a. Echeẽ aba chiicua bite aba chiangui re, i ra Jesucristo icuasa ñee. ⁹ —Jesucristo rei sererecua, ere chõ ñee. —Dios que Jesucristo raaque mbuquera ra, ere chõ nguia ndechiangui re. Nde i mose, Dios ra nemingo bei. ¹⁰ Emo Jesucristo icua mose uchiangui re, Dios ra echiã mbitirõ. —Jesucristo aicua quia co, i mose, Dios ra esirõ mbae icuã si. ¹¹ —Jesucristo aisi jirichĩ nguia no, i eã nda Jesús icuasa mo ñee, i que embesa ji Dios cheẽ nda. ¹² Dios quia mbia ja rerecua tuchi re. Judíos achõ ndeecua eã. Judíos eã achõ nderecua eã no. Eĩ ja chõ mbia Dios je re. —Mbae mo embu seje, i mose emo Dios je, mondo turã tuchi ra ee. ¹³ Sã embesa ji riqui i no:

“Paba, seicua embitorõ”, i mose emo, Dios ra ùquĩ mingõ bei tuchi, i que embesa ji ra. ¹⁴ Mbia mo Jesús icuayã mose, ñee aroneãte ee. Mbia jiranuã mose Jesús rese, Jesús icua aroneãte. Emo Jesús cheẽ nenei nenei eã mose mbia je, mbia jirandu aroneãte Jesús rese. ¹⁵ Dios mbia mo mondo eã mose echeẽ nenei nenei sacua, echeẽ nenei nenei aroneãte. Sã embesa ji riqui ñee no. Eĩ si chõ ñene:

Aba bite emo tu mose Dios cheẽ nenei nenei ure je.

Ureya tuchite erese,

i que embesa ji cose ra. ¹⁶ Mbia miĩ miĩ ño siquichĩ Dios cheẽ turã ndese ùquĩ. Sã Isaías ñee no:

Dios, mbia que urecheẽ ñandu sereãte ra,

i que Isaías embesa ra. ¹⁷ Mbia ra Jesucristo icuayã mbeite, jiranuã mose erese. Mbia ra jiranuãte Jesucristo rese, emo echeẽ nenei neneiã mose ee.

¹⁸ ¿Judíos Dios cheẽ turã ñanuãte re? Ñandu ja rei que ra. Dios cheẽ ngue judíos chandu ja rei resẽ. Mangue chooño eã ngue echoi Dios cheẽ nenei nenei ndesẽ. ¹⁹ ¿Judíos jiranuãte Jesús cheẽ turã ndese re? Jirandu tuchite rei que ra. Sã Moisés Dios cheẽ mbesa no:

Dios rei se. Judíos eã ndese taico turã.

Mbia aquiatuã taisi serimbarã. Judíos nda queteã tuchi serese chã,

i que Moisés Dios cheẽ mbesa ra. ²⁰ Isaías abe que Dios cheẽ mbesa ra. ã ngue embesa ra:

Ae serequia eãte quia, ùquĩ ño ngue serea ra.

Ae ndua eãte quia serese, ùquĩ je chõ achecua nguiã, i que Dios ra,

i que Isaías siquicheãte Dios cheẽ mbesa ra. ²¹ Isaías que ñee judíos je no nda:

Dios riqui ñee jẽje co. “Jẽingo serese”, ae beite raque se quia judíos je co.

Secheẽ mumba bei chõchĩ.

“Jẽingo serese”, ae beite raque quia secheẽ mumbasa je co,

i que Dios ra, i que Isaías Dios cheẽ mbesa ra.

11

Dios ia eãte judíos rese

¹ Dios que hui eã judíos si ra. Judío chõ se no nde. Abraham ndei sei. Benjamín abe rei sei no. ¿Mañi nda Dios hui judíos si re? ² —Serimbarã mbei ra judíos, i que Dios cose ra. Nyebe eriqui nguiã emombo eã mbei. ¿Jêtesarei chõ Elías cheẽ si Dios je re? Elías que ñee icuãte judíos ataque riñ aque mose ra. ³ —Dios, judíos que ndecheẽ nenei neneisa iquia ja ra. Altar abe que embucoi coi nembae ra. Se ae tuchi aico nderimba co cote. Se abe ra judíos seiquia chee, i rei que Elías Dios je ra. ⁴ Dios que ñee Elías je cote ra. —Nde miã eã ño serimba re. Serimba tubiriãte nyeresẽ. Siete mi l serimba que ngoi eãte nguiã ndese ñee ñee Baal naanguia je ra, i que Dios ñee Elías je cose ra. ⁵ Eĩ ño namo abe re. Judíos emo emo ño siqui nguiã Dios rese ã. Ûquĩ miã ño Dios chiirabo ùquĩ nde. Uturã je chõ Dios ùquĩ irabo nguiã. ⁶ Mbae turã naa mose eã ño Dios eirabo nguiã. Uturã je ae chõ Dios eirabo nguiã. Mbae turã naa naa ndibishorõ eã ño Dios riqui nguiã aba irabo umbaerã. Mbae turã naa naa ndibishorõ mose, eĩ nda Dios aba irabo eãte rei uturã je. ⁷ Dios quiatorã nande, i rei que judíos ra. Dios quiatoã tuchi que eriqui ra. Jesucristo icua sereãte que equia ra. Co miã miã ño ngue Dios irabo uquiatorã nda. Eataque que Jesucristo icua sereãte quia ra. ⁸ Sã embesa ji riqui ñee no:

Dios que embaaracua eã nda.

Nyebe mbae icua eãte nguiã, mae mose Dios chiao rese.

Nyebe Dios cheẽ icua eãte nguiã eandu mose no,

i que embesa ji cose ra. Eĩ mbei chõ namo abe re. ⁹ David abe que ucheẽ mbesa ra. Eĩ ngue embesa ra:

Sã eya chooño umbae tubiriã ndese.

“Nandeico turãte ã”, sã i, siqui icuã mose.

Sã Dios embua tuchi embasi mose.

¹⁰ Sã eresa nyiati ati bei.

Mae eã sacua.

Sã mbae usi riqui eituquia bei,

i que David ñee nda.

¹¹ Judíos que Dios cheẽ secha rei ra. Uba je quia ra ecuaẽ Dios rese. Dios si judíos hui mose quiatu que judíos eã siqui arõte Dios rese cote ra. Dios judíos eã mingo bei tuchi sacua cote. Judíos ra queteã tuchi chee Dios rese cote. Uba si sacua erese cote. ¹² Judíos que Dios cheẽ isiteã nda. Nyebe mbia judíos eã ja Dios cheẽ andu ja nguiã cote. Judíos Dios cheẽ mumba mose, Dios que uturã teacuquia ja mbia mangue chooñoa jenda ja je cote ra. Judíos uba si mose Dios rese, mbia mangue chooñoa jenda ra siqui tuchi Dios rese cote.

Judíos eã ño Dios cheẽ isi

¹³ Jêje judíos eã je aico Dios cheẽ nenei nenei a. —Judíos eã je eico secheẽ nenei nenei, i que Dios semondo ra. Nyebe aico nguiã Dios cheẽ nenei nenei sete. ¹⁴ Judío chõ se no nde. Sã jẽ jẽingo Dios rese no jẽ. Sã judíos abe riqui Dios rese jẽ na si. Dios erirõ sacua mbae icua si. ¹⁵ Judíos Dios isiteã mose que Dios hui chõ judíos si ra. Judíos eã nguiatu que Dios isi uquiatorã cote ra. —Mbia mo ja sequiãtorã cote, i que Dios judíos eisiteã mose ra. Judíos ra uba si chee Dios rese emo mose cote. Mbia raaque quera si rã tuchi ra aque mose cote. ¹⁶ Sã mbia mo mbichae raã no. Mbichae ñiinda uchi turã mose, eruinda abe ra uchi turã no. Mbichae ñiinda rã ño Abraham nde. Judío i tuchi chõ Abraham nde. Sã Abraham siqui turã tuchi Dios je no. Nyebe ra eriirã abe uba chee Dios rese no. Ei turã mose, erãquiã abe ra eturã no.

¹⁷ Olivo rãquiã na ño judíos re. Judíos siquiã mose Dios rese, olivo rãquiã na ño ngue Dios echisia mombo ra. Ûquĩ naquiã nendaque re chõ ngue Dios jemiã nda. Jẽ judíos eã. Injertar i raanguia chõ Dios jembucha nguiã ei rese. Jemingo tuchi sacua Dios rese. Olivo rãquiã na eã ndaque jẽ. ¹⁸ ¡Jenguasu ra jësaã saãchĩ judíos je jẽ! ¡Dios jëisi turã mose

jê! Erãquiã injertar i ji rã achõ ño jê nde. Erãquiã nda hui mingo eã. Ei quia nda erãquiã mingo nguiã. Erãquiã na ño jêingo nguiã jê. ¹⁹—Olivo rãquiã ngue Dios chisia urembucha sacua ei rese, jjenyechĩ nda jenguasu raã naa jê! ²⁰ Dios que echisia sia Jesucristo icua sereã mose ra. Jê Jesucristo icua mose chõ ngue Dios jembucha olivo i rese ra. Jemingo bei sacua. Nyebe jêingo jenguasu raã naa eã. Jêireĩ ireĩ jiri quia Dios si. ²¹ Dios que olivo rãquiã nyisia mombo Jesús icuayã mos e ra. Eĩ nda Dios jemombo jê abe Jesús icuayã mose. ²² ¡Sã Dios turãte mbia siqui mose erui no jê! ¡Sã mbia mbasi echeẽ mumba mose no jê! ¡Sã eturãte jêje no jê! ¡Jêingo bei chõ Dios turã ndese jê! Jêingo eã mose Dios rui, Dios ra jemombo. Ira rãquiã sia ji mombo rã si. ²³ Judíos uba si mose Dios rese, Dios ra embucha si esiasa rese. Injertar i si ra ee. Dios mii ño eaquiato uquĩ naa nde. ²⁴ Judíos eã ño jê nde. Olivos turã naquiã eã ño jê nde. Olivo mbuae rãquiã na ño jê nde. Dios ae que jembucha nguiã olivo i rese. Injertar i jêje. Ae Dios nyisia nyii nae, uquĩ nda Dios mbucha si uchisia rese.

Judíos abe ra siqui chee Jesús rese

²⁵ Tacheẽ nyecuayã na jêisaa. Mbua chiicuayã tasenei na jêje. Jenguasu raã naa sacua eã judíos je. Judíos yete tuchi que hui rei Dios si ra. Judíos eã ngua siqui tuchi Dios icua ã cote. Judíos eã Dios chiirabo Jesús icua ja mose, judíos abe ra uba ja erese cote. ²⁶ Aque mose ra Dios judíos rirõ ja huiicuã si cote. Sã embesa ji riqui i no:

Mbia mbuturãsa ra tu Sion si.

Ae ra Jacob rirõ ja huiicuã si. Judíos rirõ ja huiicuã si.

²⁷ Aque mose ra judíos icua ambutiã ja esi.

Secheẽ nda ique aque mose cote, i que Dios ra,

i que embesa ji ra. ²⁸ Judíos yete tuchi chõ Jesús cheẽ turã ucuayã nguiã uquĩ. Nyebe Dios uturã ndeacuquia nguiã jêje. Judíos eã je. Dios quia nyesea beite nguiã judíos rese. Irabo que nyii ra. Eramei ja rĩ ño Dios judíos irabo nguiã. ²⁹—Mbae mo tamee jêje, i mose Dios, mondo rae. Dios ra uchimondo sirombe eã. Dios ra hui eã mbei uchiirabo si. ³⁰ Jesucristo que jêicuayãte quia nyii ra. Judíos hui mose Dios si, Dios que uturã teacuquia jêje cote resẽ. ³¹ Judíos quia Jesucristo icuayãte nguiã cote. Sã Dios ia eãte riqui jendese no, eĩ si ra eya eãte judíos rese cote. Uturã nda eteacuquiabe chee judíos je. ³² Eĩ ja chõ mbia Dios je re. Emo ngue echeẽ mumbayã eãte quia ra. Nyebe eya eãte riqui nguiã nande ja rese.

³³ Dios turã tuchite. Dios aracua tuchite. —¿Mbaerã Dios uquĩ naa nde? nande aroneate. Dios chisaã nandeicua aroneãte quia ã. ³⁴ ¿Emo ndua ndua quia Dios rã nde? ¿Emo mose mbia riqui Dios mbaaquiato re? ³⁵ ¿Emo nane mbae mo mondo quia Dios je re? ¿Dios mbae mondo nonde re? ³⁶ Dios ae que mbae chao ja ra. Umbaerã ño echao ja nguiã mbae. Ae quia ecuasú jiri mbae ja si re. Nandechẽ turã mbei ra equia eriĩ. Amén.

12

Je sí chõ jeñimondo Dios je

¹ Dios ia eã mbeite riqui nanderese co. Nyebe jê sí chõ jeñimee Dios je. Jendeco chõ jemee Dios je. Jeñia turã jemee Dios je. Ebite uquĩ. Dios que mbae mondo tuchi nande je ra. Eĩ nande chõ ñimondo ee ae. ² ¡Jesús quiatoã na nda jêingochĩ jê! —Nde rã si semundua ndua ramo, Paba, jenyẽ chõ nguiã Dios je. Eĩ jenyẽ mose ra Dios ñeenda huiicha teacuquia jêje. —Eĩ jenyẽ, eĩ jenyẽ chõ, i bei ra Dios quia jêje cote.

³ Dios turã ngue seirabo ucheẽ nenei nenei sacua jêje ra. Nyebe aico nguiã jembirandu randu co. —Se jiri quia mbia si re, jjenyẽ tuchite chĩ na jê! ¡Endua ndua turã ño ndechue jê! Dios nembaaquiato tuchi mose, ebite quia nde re. ⁴⁻⁵ Mbae tubiriãte nanderete rese. Nanderesa. Nandeo. Nandeisa. Uquĩ jate nanderete rese. Mbae mii nda siquiã nanderete rese. Nandeo oco mbae rese. Nandeisa mbae andu. Nanderesa mae mbae rese. Nandechuru ñee. Nanderete quiarei “ã nandesaa”, i tuchi nyue. Eĩ si chõ Jesús

icuada nande re. Jesús rete ja chõ nande re. “Ã nandesaã”, nandete equia nandechueã. Mbae rese jaajate que Dios uquiato mingo ra. ⁶ Dios turã tuchi que nande je ra. —Co rese eico nde. ã ndese eico nde, i Dios quia nandembuchao chao co. Ûquĩ naa sacua Dios riqui uquirãcuã mee mee nande je co. —Secheẽ esenei senei, i mose Dios emo je, sã aque echeẽ nenei nenei turã echeẽ ndui si. ⁷ —Mbae turã esaã saã mbia je, i mose Dios emo je, sã aque mbae turã naa naa mbei mbia je. —Mbia embaaquiato quiato, i mose Dios emo je, sã embaaquiato turã tuchi. ⁸ —Seosei uquia mbia je, i mose Dios emo je, sã aque Dios osei uquia turã tuchi mbia je. —Mbae emee mee mbia je, i mose Dios emo je, sã aque abei tuchi. Sã ngueteã eã tuchi mbae rese ee. Dios emo miĩ mose ererecuarã, sã ererecuã turã tuchi aque. —Mbaecha reã je mbae esaã saã, Dios i mose emo je, sã aque ia tuchi mbae turã naa naa mbaecha reã je.

⁹ ¡Jenyesequa chooñocheĩ nda jenyiese jẽ! ¡Mbae icua si jenyicuasẽ cuasẽ tuchi quiato jẽ! ¡Mbae turã ndese chõ jẽingo tuchi jẽ! ¹⁰ ¡Jembi turã ño jenyiese jẽ! ¡Jenongue rã nguiatu jẽingo turã tuchi jenyue jẽ! ¡Jeñee turã turã ño nguia emo niĩ jẽ! ¡Nderiĩ nda erecheẽ turã turãchĩ jẽ! ¹¹ ¡Jeñimbutomo tomochĩ nda jẽ! ¡Jeñimbitã tuchi quiato Dios je jẽ! ¹² Jesucristo cheẽ nda io chee nande je emo mose cote. Ûquĩ ño nandesaarõ arõ nguiã ã. Nyebe jẽya tuchi quiato siqui eraarõ arõ. Mbia jembasi mbasi mose, jenyecuachõ ño nguia ee. Jeñee ñee mbei quiato quia Dios je. ¹³ Mbae eã mose Jesús quiato je, mbae mo jemondo ee. Mbia mo oso mose jenyuchúaa, ¡jẽisi turã ño jẽ!

¹⁴ Mbia mo icua icua mose jẽje, ¡jẽturã ño ee jẽ! —Paba, mbae turã emondo rã ee. Ae icuaate riqui seje, ùquĩ je, jenyue chõ Dios je. ¹⁵ Ae eyate riqui, ùquĩ ndese chõ jẽya jẽ abe. Ae nyeseo quia, ùquĩ je ndese abe jenyeseo no. ¹⁶ Hue rĩ ja chõ jẽingo ndua turã. ¡Jenguasu ra jẽsaã saãchĩ emo je jẽ! ¡Jẽseteã ño jẽingo jẽ! ¡Jẽaquiato ra jẽsaã saãchĩ jẽ! ¹⁷ Mbia mo icua icua mose jẽje, jenyecuachõ ño nguia ee. Mbae turã ño jẽsaã nguia mbia resa rae. ¹⁸ ¡Jẽingo turã ño mbia je jẽ! Í nda jẽingo ubi turã jenyiese. ¹⁹ Mbia icua mose jẽje, ¡jeñee icuaãchĩ nda erobeishĩ jẽ! Dios quia ra embasi nguiã eicua mose. Sã embesa ji riqui i no:

Se quia mbia tambasi eicua mose, i que Dios ra, i que embesa ji ra. ²⁰ Ae eicuaã e riqui jẽje, ùquĩ jembuquiaru chõ eriãcuã mose. Ûquĩ jembiu chõ eisei mose. Eĩ jenyue mose ee, eireĩ te ra huiãcuã mose cote. ²¹ Mbia icua mose jẽje, jeñeechĩ nda echeẽ ndibishorõ. Jẽingo turã ño ee. Mbae turã nguia equirãcuã jiri mbae icua si re. Mbae icua mombo jiri.

13

Sã mbia riqui turã ererecuã ja je

¹ Mbia ja ererecuã cheẽ mumbayã nguiatu. Dios ae chõ ererecuã miĩ nguiã. Dios chimii ja chõ mbia rerecuã re. ² Ae mbia rerecuã cheẽ mumba quia, Dios cheẽ abe mumba chõ nguiã aque. Dios quia emii tare nguiã. Ae ererecuã cheẽ mumba mumba quia, ùquĩ nda mbae rasi saã cote. ³ Mbia turã mbusiquiche sacua eã ño ererecuã re. Mbia icua mbusiquiche sacua nguia ñene. Nde ndeico turã mose, ererecuã ra nembusiquiche eã. Ndeico turã mose, ererecuã ra ñee turã mbei ndeje. ⁴ Dios ae chõ ererecuã miĩ nguiã. Nanderaquiato turã sacua. Nde mbae icua naa mose, ndesiquiche jiri nda esi chã. Ndeicua mose ra ndeiruã nua arõte. Dios quiato emii nguiã ererecuarã mbia icua mbasi mbasi sacua. ⁵ Ererecuã cheẽ nandemumbayã ño nguia. Nandembaasi asiã sacua achõ eã ño ñene. Nandendua turã sacua abe chõ ñene. ⁶ —Impuestos jẽisi isi mbia si, i que Dios ererecuã miĩ nda. Nyebe nandeico nguiã impuestos mondo mondo turã ererecuã je. Dios cheẽ nguire chõ ererecuã riqui nguiã eisi isi. ⁷ Jẽ deber i mose emo je, mbae jembuchebi jei chõ ee. Jẽ deber i mose impuestos, jemondo chõ ee. Ererecuã je jẽingo turã ño. Jeñee turã ño eriĩ.

Jenyesequa ja quia jenyiese

⁸ Emo mbae mondo mose jêje, jêingo are arete chí nguiã mbae mondo rocoĩ ee. Deber jenyechĩ nda emo je. ;Jenyesequa ja quiatu quia jenyiese jê! Jenyesequa mose mbia rese, Moisés chimbessa ja jemumbayã ño nguiã ũquí. ⁹ ã ndei Moisés chimbessa ã:

Emo ninisi rese ra ereicochĩ.

Mbia mo nda ereiquiachĩ.

Mbae mo nda erembuquiachãchĩ.

Emo je ra erecheẽ ñooñochoĩ.

Emo mbae ra erechousei choseichĩ,

i que Moisés chimbessa ra. Nandechesequa mose mbia rese, nandeico embessa ji cheẽ mumbayã ã. ã ndei Jesucristo cheẽ ã: Sã ereico nyesequa nderete rese no, eĩ ere si chõ nyesequa emo ndese. Nde ã naa mose, Moisés chimbessa ja eremumbayã nguiã ã. ¹⁰ Ae nyesequa quia mbia rese, ũquí nda mbae icuã saã eã mbei emo je. Emo nyesequa mose mbia rese, Dios cheẽ ndui si chõ eriqui nguiã mbae turã naa naa ũquí.

¹¹ Dios rese jêingo tuchi ũquí. Nandemae jei ra Jesucristo rese cote. Nandechẽe ngue equia nyii. —Nandemae je ra Jesucristo rese, nande que equia nyii. Namõ nda nandemae erese cote. Aichite eñi tu a cote. ¹² Itondaru rã ño mbae icuã ja namõ nde. Jesucristo ra tu mbae mbuturã cote. Nyaashĩ na nda cote. Nyebe nandeico bei rã mbae turã ndese cote. Dios rese nandeico tuchi rã cote. Mbae icuã ndiquisã sacuã nandesĩ. ¹³ Nandeico turã ño Dios resa rae. ;Mbia quiacua ra nandesĩchãchĩ jê! ;Nandequiacuachĩ nda jê! ;Emo ninisi rese ra nandeico icochĩ jê! ;Mbae icuã nda nandechousei choseichĩ je! ;Nandeicuã icuãchĩ nda emo mbiacuã icuã jê! ;Emo mbae ra nandechousei choseichĩ jê! ¹⁴ Jeñimee tuchi quia Jesucristo je. Ae nda uquirãcuã mee tuchi jêje chã. Mbae icuã ndiquisã sacuã jesi. Ae icuã mbia chosei chosei quia nae, ũquí nda jessaã saãchĩ jê Jesús resenda chõ jê ndesẽ.

14

Jeñee asiã mbei jenongue je

¹ Jesús quiato mo Jesús icua tuchiã mose, jêisi turã ño. Jeñee asi asichĩ nda ee. ² Emo emo mbae u ja. Emo emo soo u eã tuchi no. Ae soo u eãte quia nae, embaaquiato tuchi iriã ño ũquí nde. ³ Ae soo u guia nae, sã ũquí ñee asiã mbei soocua reã je. Ae soo u eãte guia nae, sã ũquí ñee asiã mbei soocua je no. Dios quiato ja chõ ñene. ⁴ Erecheẽ icuã aroneãte ererecua rimba mo je. Ae ae mbae saã nguiã nguerecua je. Dios ae nda ñee nguiã nguimba je. Mbae raã turã mose. Mbae raã icuã mose abe no. Dios quirãcuã ae nda nguimba mingõ nguiã mbae turã ndese.

⁵ —Nyaashĩ mo ngue Dios irabo mbiicúe cose ra. ũquí nyaashĩ mose nandechimbaacua rã, i Jesús quiato mo nguiã co. Jesús quiato mo nguiã ñee nguiã: —Eĩ ja chõ nyaashĩ ndesẽ, i emo no. Sã Dios quiato ja ae riqui ndua ndua uchiangui re ae. ⁶ Dios quiato mo ñimbaacua mose aque nyaashĩ mose, Dios je chõ eriqui nguiã ñimbaacua. Dios quiato mo mbae raã naa mose aque nyaashĩ mose, Jesús je chõ eriqui nguiã mbae raã naa aque nyaashĩ mose. Ae soo u quia, Dios je chõ eriqui nguiã soo u. Gracias, i que Dios je nyii ra. Ae soo u eã nguiã, Dios je chõ eriqui nguiã soo u eã no. Ae abe gracias i chõ nguiã Dios je ague. ⁷ —Sebi rese chõ taico bei, nande aroneãte. —Semanose mose quia tamano, nande aroneãte. ⁸ Dios ae chõ nandereco mingõ nguiã. “Emano”, i mose Dios nande je, nandeico nguiã mano. Nandereco siqui mose, Dios rimbarã ño ñene. Nandemano mose, Dios rimbarã ño nda nandeico nguiã no. ⁹ Cristo que mano nda. Quera si que ra. Mbia rerecuarã ngue quera si ra. Mbia reco rerecuarã. Mbia mano je rerecuarã abe no.

¹⁰ Nandechẽe icuã icuã aroneãte nanderesenda mo je. Emo mose quia ra Dios mae tuchi nanderese cote. Nandechiangui renda ra etea tuchi cote. Ae quia nda nandeicuã tea nguiã. Nandeturã abe rea. ¹¹ ã ndei embessa j i ã:

Dios ndei se. Se rei sereco bei.

Sésaa ra mbia chí ja ngoi nguiã ndese.

Ñee jaaja ra seje cote.

“Dios tuchi chõ nde re”, i jaaja ra seje cote, i que Dios ra, i que embesa ji ra. ¹² Nande ae ae ra mbae nandesenei senei Dios je aque mose. —Ã ngue asaã saã nguia seico mose íbii ra, nande ja ra ee cote.

Jenongue jembii icuã eã

¹³ Nyebe nandechẽ icuã eã nguia nanderesenda mo nii. ¡Nandembia eãte chĩ nda jẽ! ¡Mbae icuã nda nandesã uquiachĩ ee jẽ! ¹⁴ Jesucristo que sembaaquiato ra. —Mbae turã ja chõ mbia chiurã nde, i que ra. —¡Co ra jẽuchĩ jẽ! iãte Dios mbae mo nii. —Eicuãte co, i mose emo, sã ae mii eu eã. Ae eu mose, eicuãte ee. ¹⁵ —¡Co nandeu eã jẽ! Eicuãte, i mose nderesenda mo ndeje, eu eã. Nde eu mose, erchesequa eã ño nguia nderesenda rese aque. Nderesenda je abe chõ ngue Jesucristo mano ndesẽ. ¿Mbaerã nda nderesenda erembii cuã ndechuubi je re? ¹⁶ Ndechuubi turã ndaque ndeje. “Eicuãte” i mose nderesenda mo, eu eã ae. Nde eu mose, mbia ra erembucheẽ icuã ndechue. ¹⁷ Dios chõ nandererequa cote re. Nyebe nandendua tuchi eã nguia nandechiurã ndese. Ae nandembei quia, ũquĩ abe rese. Dios rese quia nandendua. Ae chõ nandemingo nguia mbae turã ndese co. Ae chõ nandechiã mbucoi nguia co. Espiritu turã ae nandembia mingo nguia co. ¹⁸ Eĩ nande mose Cristo je, Dios ia tuchi ra nanderese. Mbia abe ia ra nanderese. ¹⁹ Nandeico turã nda nandechue chã. Eĩ nande nda Jesús osei osei uquia nandechue chã. ²⁰ —¡Aque soo ra nandechĩ jẽ! i mose Jesús quiato mo, ¡ereuchĩ nda jẽ! Jesús quiato ra erembii cuã arõte nde eu mose. Mbae turã ja raque mbia chiu. “Eicuãte”, i mose Jesús quiato mo, eu eã ae. ²¹ Soo Jesús quiato mbiicuã mose, soo ra nandeu eã. Vino Jesús quiato mbiicuã mose, vino nda nandembei eã. Mbae mo Jesús quiato mo mbiicuã mose, nandeco eã erese nande abe. Mbae mo Jesús quiato mo mbiicha serĩ mose Dios icha si, ũquĩ ndese nandeicoã nande. Eĩ nda ichayã esi. ²² —So o icuã eã ño ñene, i mose Dios ndeje, echecuachõ ño nguia eu. Endua tuchi mbae mo naa nonde. Eicuã arõ mose ndeje, esaã eã. Eaturã mose ndeje, echecuachõ ño eraã. Nde ũquĩ naa naa mose, ndeya tuchi rae. ²³ Nde ndeiranaã mose mbae mo ndese, esaã eã. —Eaturãte ereae. Eicuãte ere no ae, nde i mose eriisu isu, esaã eã ño. Ndeiranaã eraã ñooño mose, eicuãte ũquĩ. Ndechiisu isu u mose soo, eicuãte ũquĩ. —Eicuãte ereae, nde i mose, ereicochĩ nguia eu.

15

Nandebi rese ra nandeco chĩ jẽ; nandenongue bi rese quia nandeico

¹ Nande mo Jesús icuat e quia co. Ae Jesús icua tuchiãte quia nae, ũquĩ je nandeico turã jiri ae. Nandembaaquiato quiato ae. Nandebi achõ ndese ra nandendua eã. ² Ae nandebite nande ae, ũquĩ ndese nandeicoã. Ae Jesús quiato nongue bite nae, ũquĩ ndese quia nandeico. ũquĩ mose nandeico nanderesenda mbaaquiato tuchi Jesús rĩ co. ³ Cristo chee que siquiã ubi rese ra. Sã embesa ji riqui ñee Cristo rĩ no:

Paba, ae ndeucuyãte quia nae, ũquĩ ngue ñee icuã mbeite quia seje ra, i que Cristo ñee ngu je ra,

i que embesa ji ra. ⁴ Dios cheẽ mbesa ji cose ndare chõ nandembaaquiatusa re. Nandemingo mingue sacuã. Nandembirãcuã sacuã Jesucristo rĩ. Nyebe nandeico nguia Jesucristo raarõ arõ mingue ã. ⁵ Dios chõ nandemingo mingue nguia. Dios chõ nandembirãcuã nguia. Dios nda jemingo turã mbei nyiese Jesucristo cheẽ ndui si chã. ⁶ ũquĩ mose ra jẽingo ñee turã mbei Dios je. Hue rĩ ja ra jẽingo ndua turã Dios rese. Dios quia Jesucristo ru re.

Dios iate judíos eã ndese

⁷ Sã Cristo nandehi turã no, eĩ jenyẽ si chõ nguia nyiisu turã. Eĩ nda mbia ñee turã Dios rĩ. ⁸ —Eĩ tae tae, i que Dios judíos i ñiinda ja je cose ra. Nyebe Cristo ru nguia mbae turã naa naa judíos je cote. —Dios cheẽ iochĩ cote, i nda judíos chã. ⁹ Judíos eã abe mundua

sacuã Dios rese que Cristo ru ra. Dios turã ndese emundua sacua ño ngue eru nguiã. Co rei David chimbese co:

Paba, ndeturã tasenei senei judíos eã je.

Tairasei rasei abe ndeje,

i que David embesa ra. ¹⁰ Co rei embesa ji cheẽ mo co:

Judíos eã, jẽya chõ Dios rese.

Sã Dios rimba iate erese no, eĩ jenyẽ chõ jẽ abe jẽya erese,

i que embesa ji ñee nda. ¹¹ Co rei embesa ji cheẽ mo co no:

Sã mbia ibi jenda ja ñee turã ja Dios riĩ,

i que embesa ji ra. ¹² Isafas que co mbesa ra:

Isaí riirĩ nguia ra mbia judíos eã nderecuarã tuchi cote.

Mbia judíos eã nda “ichõĩñosa reã”, i tuchi ee,

i que Isaías embesa Jesús riĩ nda. ¹³ Ũquĩ jẽingo Dios icuate ũquĩ. Dios nda jembia tuchi mingo chã. Dios nda jeñia mbucoi chã. Dios ae chõ “Cristo jësaarõ arõ”, i chõ nguiã nandemingo mingue ã. Espíritu Turã ndiqu i nandembirãcuã tuchi ã. Nandembia mingo Cristo raarõ arõ ã.

¹⁴ Seyate aico jendese co, Seresenda. Jẽingo turãte quia jenyiese ũquĩ. Mbae jẽicua tuchite cote. Jẽ ae jẽingo ñĩmbaaquiato quiato turã jenyue ũquĩ. ¹⁵ Aireĩ ireĩ ãte ã mbesa jẽje, Seresenda. Jẽtesareĩã sacua ã si. Dios turã ae ngue seirabo nguiã. Mbia mbesarei eã sacua Jesús cheẽ si. ¹⁶ Dios que seirabo Jesucristo rimbarã nda. Ucheẽ nenei nenei sacua mbia judíos eã je. Mbia judíos eã secheẽ isi turã mose, Espíritu Turã nda emingo icúe Dios mbaerã cote. Ũquĩ mose ra Dios judíos eã isi turã cote. ¹⁷ Se Dios cheẽ nenei nenei mose mbia je, mbia que siqui tuchi erese secheẽ nguire ra. Nyebe ũquĩ ndiqui nguiã sembia tuchi. ¹⁸ Jesucristo que sembirãcuã nda. Ucheẽ nenei nenei sacua judíos eã je. Nyebe judíos eã ndiqui nguiã siqui tuchi Dios rese cote. Secheẽ nguire cote. Sechisaã ndese abe maende cote. Mbae mo ñĩ abe ra acheẽ iã cote. Jesucristo que sembirãcuã, ũquĩ miĩ ño aico nguiã ñee jẽje a. ¹⁹ Espíritu Turã ngue uquirãcuã mee seje ra. Nyebe aico nguiã mbia mae sayã naa naa tuchi mbia je. Ũquĩ mos e que mbia riqui tuchi Dios rese cote ra. Jesucristo cheẽ ngue asenei senei Jerusalén nda. Mbia mangue chooñoa jenda je abe. Ilírico jenda je abe. ²⁰ —Ae mbia riqui Jesucristo cheẽ nenei nenei eãte nae, huee Jesucristo cheẽ tasenei senei se, ae que se ra. Emo Jesucristo cheẽ nenei neneisa, huee taico bei eã, ae que se ra. ²¹ Sã embesa ji riqui ñee no:

Ae jiranuãte quia Cristo rese, ũquĩ nda jirandu erese cote.

Ũquĩ nda eicua cote,

i que embesa ji ra.

Aso ra Rómaa, i Pablo

²² Ae mbia riqui Dios cheẽ nenei nenei eãte, huee quiato ngue aico nguiã Dios cheẽ nenei nenei. Nyebe aico nguiã osoãte jendea. ²³ Cose ndarechõ mbei chõ aico rei nguiã “taso jendea”, i. A jenda mbia que Dios cheẽ ñandu tuchi cote ra. Nyebe taso jendea cote. ²⁴ Seso mose España nda aso jendea. Sembia jiri sacua jendese. Taico mbirĩ na jendese huee. Jẽ nda sembucuata turã mondo hue si cote chã. ²⁵ Jerusalén nane nda aso. Ofrenda mo arao quia Jesús quiato je co. ²⁶ Jesús quiato Macedonia jenda que ofrenda munua nua nda. Jesús quiato Acaya jenda rese. —Jesús quiato mbaecha reã je mbae nandemondo rã Jerusalén jenda je, i que ñee nyue nyii ra. Ũquĩ ño arao nguiã co. ²⁷ Coche ũquĩ ndiqui nguiã mbae mondo judíos Jesús quiato je. Judíos rane nguia Dios cheẽ senei senei tare nguiã judíos eã je. Nyebe ra judíos eã mbae mo mondo judíos Jerusalén jenda je cote. ²⁸ Nyebe ra ofrenda munua ji arao ee. Jesús quiato mbaecha reã je. Aquere ra aso España qiti cote. Aicha ra ñeenda cúa si mae jendese. ²⁹ Jesucristo ra semondo turã jendea. Ae ra nandembia ja uturã je. ³⁰ Seresenda, Jesucristo quiato quia jẽ nde. Espíritu Turã ño jembuchesequa nguiã jenyiese ũquĩ. Nyebe jeñee tuchi quia Dios je serĩ. Nandechẽ ja tuchi quiato ee serĩ. ³¹ —Paba, mbia icua Judea jenda esiquisã Pablo si. Paba, ndequiatio

Jerusalén jenda nda ofrenda isi turã Pablo si chã, jenyẽ chõ Dios je. ³² Ûquĩ mose ra seya tuchi mae jendese cote, Dios “eno” i mose seje. Jendese seico mose ra sequenea aucua tuchi cote. ³³ Sã Dios riqui bei jendese. Sã eriqui jembia.

16

Pablo saluda i ja mbia je

¹ Febe jëisi turã ño. Jesús quiato chõ aque cuña nde. Mbae turã esaã saã mbeite quia Jesús quiato Cencrea jenda je aque. ² Jëisi turã ño nguia Jesús ríi. Sã Jesús quiato riqui nyiisi turã no, eĩ jenyẽ chõ Febe isi turã no. Ae que mbae turã saã saã mbeite Jesús quiato je ra. Seje abe no. Nyebe jëturã ño jë abe ee. ³ Aquila je saluda jenyẽ rã seje. Eninisi Priscila je abe no. Serese que ùquĩ ndiqui Jesucristo cheẽ nenei nenei tuchi ra. ⁴ Mbia que eiquia serĩ serĩte rei quia serĩi nda. Siquicheã mbeite que equia ra. Nyebe aico nguia gracias i tuchi ee. Se ae eã. Jesús quiato judíos eã abe riqui gracias i jate ee ã. ⁵ Ae Jesús quiato ñumunua nua nguia Aquila chuchua, ùquĩ je abe saluda jenyẽ. Epeneto je abe saluda jenyẽ. Sequiato tuchite que aque ra. Ae rane ngue Cristo isi Acaya jenda ra. ⁶ María je abe saluda jenyẽ. Ae que mbae saã saã tuchi Dios je jësaa ra. ⁷ Andrónico je abe saluda jenyẽ. Junias je abe. Se sí chõ ùquĩ nde. Serese que etarõ ji riqui cárcel nda. Dios cheẽ nenei neneisa tuchi chõ ùquĩ nde. Ûquĩ nane ngue Cristo icua sesi cose ra. ⁸ Amplias je abe saluda jenyẽ. Sequiato tuchi chõ Dios resenda aque re. ⁹ Urbano je abe saluda jenyẽ. Ae que Dios cheẽ senei senei nguia urerese ra. Sequiato Estaquis je abe saluda jenyẽ. ¹⁰ Apeles je abe saluda jenyẽ. —Seicuaa tuchi Apeles riqui co, i que Dios Apeles ríi nda. Aristóbulo chuchua jenda je saluda jenyẽ seje. ¹¹ Herodión je abe saluda jenyẽ. Se sí chõ ae re. Narciso chuchua jenda, ae Jesús quiato nae, ùquĩ je saluda jenyẽ. ¹² Trifena je abe saluda jenyẽ seje. Trifosa je abe. Ûquĩ ndiqui mbae raã naa tuchi Dios je ùquĩ. Nandequiato Pércida je abe saluda jenyẽ. Ae que mbae saã saã tuchi quia Dios je ra. ¹³ Rufo je abe saluda jenyẽ. Dios chiirabo tuchi chõ ae re. Esi je abe saluda jenyẽ. Taĩ na tuchi que eriqui seje ra. Mbae que esaã ja tuchi quia seje ra. ¹⁴ Asíncrito je saluda jenyẽ seje. Flegonte je abe. Hermas je abe. Patrobas je abe. Hermes je abe. Ae Jesús quiato riqui ùquĩ ndese, ùquĩ je abe saluda jenyẽ. ¹⁵ Filólogo je abe saluda jenyẽ. Julia je abe. Nereo je abe. Enongue je abe. Olimpas je abe. Ae Jesús quiato riqui ùquĩ ndese, ùquĩ je abe saluda jenyẽ. ¹⁶ Jenyiquiaama ama saluda i nyue. Tuchuamo jenda ja Cristo quiato riqui saluda i jëje ã.

¹⁷ Huee emo ndiqui Jesús quiato mbiicua sete hue. Hue emo ndiqui “Jesús quiato tambiiha Jesús sí”, ite hue. Jenyicuasẽ ño nguia ùquĩ sí. Jesús cheẽ ndui sí eã ño eriqui nguia mbia mbaaquiato quiato ùquĩ. ¹⁸ —Ae Jesucristo bite, ùquĩ nandesã saã, iã ño nguia ùquĩ. Ubi achõ ño esaã saã nguia ùquĩ. Echeẽ turã aba reã ño eriqui nguia mbia je ùquĩ. Ae Jesucristo icua tuchi eãte quia nae, ùquĩ mbiirĩ irĩ ño nguia ùquĩ. Jenyicuasẽ tuchi chõ nguia ùquĩ sí. Aba mbiirĩ irĩsa tuchi chõ ùquĩ nde. ¹⁹ Jë ngue Dios cheẽ jemumbayãte ra. Mbia que jirandu jate jendese ra. Nyebe seyate riqui nguia jendese co. Jëingo bei nda equia mbae turã ndese chã. Mbia nda jembiiirĩ irĩ eã jiri quia mbae icua je chã. ²⁰ Dios quiarei aba mbiasa. Namo jiri ra ae Satanás ndiquisã mbei jësi cote. Sã Jesucristo riqui turã mbei jëje.

²¹ Timoteo ucheẽ mondo quia saluda i jëje aque. Siqui beite equia serese Dios cheẽ nenei nenei co. Lucio abe ucheẽ mondo quia saluda i jëje aque. Jasón abe no. Sosipáter abe no. Se sí chõ ùquĩ nde.

²² Se abe secheẽ amondo quia saluda i jëje aque. Tercio rei se. Se chõ aico nguia Pablo cheẽ mbesa mbesa jëje co. Jesús icuasa ja chõ nande re. ²³ Gayo abe ucheẽ mondo quia saluda i jëje aque. A aico rã echuchua uque a. Jesús quiato chumunua nuasa bei chõ a re. Gayo chuchua. Erast o abe ucheẽ mondo quia jëje aque. Ae chõ tesorero sucha

tubiriã jenda je. Cuarto nandequiato abe ucheẽ mondo quia jẽje aque. ²⁴ Sã Jesucristo riqui jendeaquiatu turã mbei. Amén.

Pablo ñee hui bei sacua cote

²⁵ Nandechẽ turã mbei chõ nguia Dios riĩ. Ae ra jembirãcuã tuchi mingo ucheẽ turã je. Echeẽ turã ngue asenei senei nguia Jesucristo riĩ nda. Aque cheẽ turã ngue mbia icuayãte quia cose nyii ra. Dios que embuchecua eã mbei mbae ao ramo mosenda bei ra.

²⁶ Namõ ño Dios ucheẽ turã mbuchecua nguiã mbia je cote. Jesucristo riĩ. Dios cheẽ nenei neneisa que echeẽ mbuchecua nande je cote ra. Mbesa que nande je ra. Dios que ñee seje ra. —Secheẽ turã esenei senei mbei quia mbia jaje cote. Siqui sacua secheẽ ndese. Secheẽ mumbayã sacua, i que Dios seje cote ra. ²⁷ Dios miĩ nguiarei siqui bei. Dios miĩ ño mae ja nguiã mbae ja rese. Sã Jesucristo riqui mbia mbucheẽ turã mbeite Dios riĩ. Amén.

PRIMERA CARTA DEL APOSTOL SAN PABLO A LOS CORINTIOS

Pablo embesa Jesús quiato Corinto jenda je

¹ Pablo, i que seje ra. Dios que seirabo Jesucristo renei nenei sacua nda. Aico ã mbesa jêje a. Nanderesenda Sóstenes ndese aico embesa jêje a. ² Aico ã mbesa jêje a. Jesús icuasa je. Corinto jenda je. Jê ndei Dios quiato jêingo Jesucristo rîĩ ùquĩ. Dios riqui jemingo icúe umbaerã ùquĩ. Sã Dios riqui mangue jenda chooñoa mingó icúe umbaerã no, eĩ sí. Ñee mose Jesucristo je. Jesucristo rei ùquĩ abe rerecua no. Sã nandererecua nande no. ³ Sã Dios nanderu uturã mingó tuchi jendese. Sã Dios jembia bei mingó. Sã Jesucristo abe siqui jembia bei mingó.

Dios turãte riqui jêje co, i Pablo

⁴ Dios turã tuchi que eriqui jêje Jesucristo rîĩ nda. Nyebe aico nguiã gracias i tuchi Dios je jeni co. ⁵ Jesucristo quiato chõ jê cote re. Nyebe Dios riqui turã tuchi nguia jêje co cote. Jembaaquiato tuchi ucheẽ nenei nenei sacua mbia je. Jembaaracua tuchi que ucheẽ ni nda. ⁶ Ure Jesucristo renei nenei mose jêje que jêisi turãte ra. Jê Jesucristo jêicuate quia ùquĩ cote. ⁷ Nyebe Dios turã ndiqui nguiã hui ãte jêsi co. Jembirãcuã mbeite equia querabe co. Ùquĩ jêingo Jesucristo raarõ arõ ùquĩ. ⁸ Dios ra jembirãcuã mbei mingó mbae ua ja chee. Mbia mo nda ñee icua eã jêje Jesucristo tu mose. ⁹ Dios ra jendeaquiato bei. Ucheẽ nda embuchebiã mbei ñeende jêje. Ae quiatu ngue ñee nguiã jêje. —Taemingó bei seriirĩ ndese Jesucristo rese, i.

Jesús quiato nyao nyao chõchĩ nyesi

¹⁰ Seresenda, nandererecua ja chõ Jesucristo resẽ. Jenyao chao mose nyesi, eicuãte ùquĩ. Hue rĩ ja chõ jêingo ndua ndua. Mbae mi ndese chõ jêingo. ¹¹ Mbia quiatu ngue ñee nguiã seje. —Eicua icuãte que nyue ra, i que Cloé chuchua jenda ñee sembiirandu jeni nda. ¹² —Pablo mbae chõ se re, i chõchĩ jemo nguiã serĩ ùquĩ. —Apolos mbae chõ se re, i chõchĩ jemo nguiã ùquĩ no. —Pedro mbae chõ se re, i chõchĩ jemo nguiã no. —Cristo mbae chõ se re, i jemo no. ¹³ ¿Cristo mbuchao chao ji ere no? ¿Pablo mano jendiquicharõ nde no? ¿Pablo rîĩ bautizar i jêje re no? ¹⁴ Se que bautizar ae eã jêje resẽ. Crispo mi je que bautizar ae ra. Gayo je abe. ¹⁵ —Pablo rîĩ ño ngue bautizar i nguiã seje, i aroneate jemo ñee serĩ. ¹⁶ Estéfanos chuchua jenda abe que bautizar ae ra. Aquere que bautizar ae ãte jemo je ra. ¹⁷ Bautizar i sacua eã ngue Cristo semondo ra. Ucheẽ turã nenei nenei sacua ño ngue semondo nguiã. Seaquiato asaã saã eã ño nguiã Dios cheẽ nenei nenei co. Cristo cheẽ ambiasa mingue turã ño nguiã co. Se seaquiato raã naa mose, ñ nda mbia ndua ndua eãte rei Cristo mano ndese.

Dios cheẽ quirãcuã tuchi Jesús rîĩ

¹⁸ Ae ra nyoi tata cuásuu, ùquĩ ndei “ichõiñosa” isa Dios cheẽ nenei neneisa rîĩ. —Cristo que mano mbia riquicharõ nda, i mose ee, “ichõiño ñene” i chõ nguiã. Nande quiatu que Dios nanderirõ nandeicua si ra. Nyebe Dios cheẽ turã ndiqui nguiã uquirãcuã ndeacuquia nande je co. ¹⁹ ã ndei Dios cheẽ mbesa ji ã:

Ae “seaquiato tuchi” i quia, ùquĩ aquiato ra ambuquiachã esi.

Ae “searacua tuchi” i quia, ùquĩ aracua abe ra ambuquiachã esi no,

i que Dios cheẽ mbesa ji ra. ²⁰ Ae uaquiato saã saã nguia, ibi jenda ja chõ ùquĩ nde. Ae ucheẽ aquiato saã saã nguia, ibi jenda ja chõ ùquĩ no nde. Eaquiataẽte ùquĩ, i chõ Dios nguiã ùquĩ je. ²¹ Mbia ae ra Dios icuayã mbei uaquiato ae je. Dios cheẽ ae je quia nda mbia Dios icua nguiã emo Dios cheẽ nenei nenei mose ee. Ae Dios cheẽ isi nae, ùquĩ nda Dios sirõ eicua sí. Ichõiño nguiã, i raque mbia ataque Dios cheẽ ni. ²² —Mbia mae sayã

ndese nda uremae na ña, i bei que judíos quia ra. —Urechimbaaquiatu tuchi rã, i bei que judíos eã nguia ñee nyue no nda. ²³ Nande quiatu Cristo nandesenei senei nguia ã. Ae mbia mbucha quia ira rese, aque chõ nandesenei senei nguia nande ã. Ûquĩ si judíos ireĩte riqui ã. Cristo renei nenei mose, judíos eã ndua eã tuchi chõ nguia ere se ã. ²⁴ Nande quiatu nandebite riqui nguia Cristo renei nenei mose ã. Dios judíos mo irabo chõ nguia. Judíos eã mo abe irabo chõ nguia no. Ûquĩ je chõ ngue Cristo Dios quirãcuã mee nguia. Ûquĩ je chõ Cristo Dios aquiatu mee nguia. ²⁵ Dios aquiatuãte, i raque mbia mo ñee Jesús mano je rĩ. Dios quia equiatu tuchi jiri riqui nguia mbia si co. Dios quirãcuã neate, i raque emo ñee no. Dios quia equirãcuã tuchi jiri riqui nguia mbia si co.

²⁶ Dios que jẽirabo ja ra. Jẽaquiatu tuchi eã ndaque ee. Ererecua eã ndaque jẽ. Mbaecha eã ndaque jẽ. Dios ae chõ ngue jẽirabo nguia. Ûquĩ ndese jendua jiri. ²⁷ Ae je mbia riqui “equiatuãte” i nae, ùquĩ ño ngue Dios irabo nguia. Ae ucuasu saã saã nguia nae, ùquĩ ireĩ ireĩ sacua esi. ²⁸ Ae mbia ataque ucuayãte quia nae, ùquĩ ño ngue Dios irabo nguia. Ae ucuasu saã saã nguia nae, ùquĩ mbutiã sacua. ²⁹ Nyebe nandeico nguia nandeaquiatu raã naa aroneate Dios je ã. Nande mĩ mo jiri jiriã. ³⁰ Dios quiatu que nandembucha Jesucristo rese ra. Ae quiatu que nandembiirandu Dios rese ra. Ae chõ ngue nandechiã mbuturã no nda. Ae chõ ngue nandemingo icúe Dios mbaerã no nda. Ae que mano nanderiquicharõ no nda. ³¹ Sã embesa ji riqui ñee ã no:

Ae Dios saã nande je nae, ùquĩ nĩ nandechẽ turã.

A e nandesã nande ae nae, ùquĩ nĩ nandechẽ turã eã,

i que embesa ji ra.

2

Jesucristo mĩ Pablo senei senei mbia je

¹ Seresenda, seso mose jendea que Dios cheẽ asenei senei turã jẽje huee resẽ. Seaquiatu asaã saã eã ño nguia jẽje Dios cheẽ nenei nenei. ² —Jesucristo mĩ ño tasenei senei jẽje. Jesucristo mano nguia mbia icua ndiquicharõ nae, ùquĩ mĩ ño tasenei senei jẽje, ae chõ ngue oso nguia ñee jẽje. ³ Seireĩte que seso mose ñee jẽje nyii ra. Semburirite que aque mose ra. ⁴ Seaquiatu que asaã saã eãte quia ra. Dios cheẽ ngue ambuchecua tuchi quia ñee ñee jẽje ra. Espiritu Turã nguiatu que secheẽ mbirãcuã tuchi quia ñee ñee jẽje ra. Nyebe mbia ñee nguia. —Dios cheẽ ño eriqui re, i nguia secheẽ mose. ⁵ Dios quirãcuã ae jemingo nguia Jesucristo rese ùquĩ. Mbia mo aquiatu eã ño jemingo nguia Jesucristo rese ùquĩ.

Espiritu Turã ndiqui mbae icua jate nande je co

⁶ Ae seaquiatute, ùquĩ ja chõ asenei senei mbei nguia Jesús quiato je co. Ae seaquiatute nae, ibi jenda rã eã ño seaquiatu riqui nguia co. Ae seaquiatu nae, ibi jenda rerecua rã eã ño seaquiatu riqui nguia co. Ûquĩ aquiatu quia ra tiã jei. ⁷ Ae ureico ñee ñee nae, ùquĩ nguia mbia mbaaquiatu jiri nguia. Dios cheẽte quia ñene. —Secheẽ nda ambuchecua je nguia mbia je. Mbia mingo bei sacua, i que Dios nyii mbae ao nonde ra. Dios que esenei eã nyii ra. Namõ ño embuchecua nguia nande je cote. ⁸ Mbia rerecua que Dios aquiatu icua eãte ra. Ì nda eririĩ mbucha eãte rei ira rese. ⁹ Sã embesa ji riqui ñee ã no:

Dios ra mbae turã saã tuchi nande je. Uchesequa je.

Ae ra Dios saã nande je, ùquĩ ndese emo iranuate namo.

Emo mae ãte erese namo,

i que embesa ji ra. ¹⁰ Nande quia nandeico nguia irandu erese ã. Espiritu Turã quiatu nandembiirandu nguia. Espiritu Turã nguia mbae icua jate nguia co. Dios chiao abe icua jate equia co. ¹¹ Ae rese emo ndiqui ndua, mbia mo ùquĩ ndua ndua icuayãte. Ae rese nandeico ndua, nande ae nandeicua nguia. Ae rese Dios riqui ndua, Espiritu Turã mĩ ño eicua nguia. Dios sí chõ Espiritu Turã nde. ¹² Dios que espíritu mbae mo monoã nande je ra. Espiritu Turã ño ngue emondo nguia nande je. Ae Dios saã turã nguia nande je nae,

ũquĩ ndese nandembiirandu sacua ño ngue Espiritu Turã mondo nguiã nande je. ¹³ Ae Dios saã turã nguia ure je nae, ũquĩ uresenei senei nguia ã. Ñ ndese chõ ngue Espiritu Turã urembaaquiātu nguiã. Mbia cheeño eã ño ñene. Nyebe aico nguiã Dios chisaã nenei nenei Dios quiato je co.

¹⁴ Ae Jesucristo icua eãte, ũquĩ sí Espiritu Turã ñee icuayãte quia ã. Echeẽ mbaranguiatuãte riqui ee ã. Nyebe eriqui nguiã echeẽ isiãte. ¹⁵ Ae Jesucristo icuate nae, ũquĩ nguia mbae icua jate nguiã ã. Ae eturãte nae, ae eicuãte nae, ũquĩ icua ja equia ã. ¿Mañi Jesús quiato quia re? i chõ mbia nguiã Jesús quiato cheẽ icuayã ã. ¹⁶ Tarembaaquiātu, i aroneate mbia mo Dios je. Dios quiato eã mo ndua eãte quia Dios rã si ã. Nande quia nandendua ndua nguiã Cristo ndua rã si ã. Dios resendate quia nandeico nguiã ã.

3

Mbae mi na ño ureico nguiã Dios cheẽ nenei nenei

¹ Jesús resenda jẽingo raque ũquĩ. Jẽingo tuchiãte quiatu nguiã erese ũquĩ. Ae jembite riqui nae, ũquĩ mi ndese chõ jẽingochĩ nguiã ũquĩ. Ae Cristo bite nae, ũquĩ ndese jẽingoã ñochĩ nguiã ũquĩ. Nyebe jaembaaquiātu tuchi aroneate equia co. ² Mbia riri na ño jẽingochĩ nguiã secheẽ andu mbirĩ mbirĩ cose. Querabe chõ jẽingo nguiã secheẽ andu sereã ũquĩ. Nyebe jaembaaquiātu quiatu tuchiã nguiã Jesús cheẽ ndese. Ae jembite riqui nae, ũquĩ ndese jẽingo mose ra Dios cheẽ jẽicuayã mbei. ³ Jẽicuã icuãte quia jẽingo nguiã jenyue ũquĩ. Jendua turã ja eãte equia ũquĩ. Jeñee turã turã eãte quiatu nguiã jenyue ũquĩ. Nyebe acheẽ nguiã jẽje. —Ae Cristo bite nae, ũquĩ ndese jẽingoã ñochĩ nguiã ũquĩ, ae chõ ndei nguiã jẽje co. ⁴ —Se rei Pablo mbae, i chõchĩ jemo nguiã ñee ũquĩ. —Se rei Apolos mbae, i chõchĩ jemo no. Nyebe jẽingo eã nguiã Cristo bi rese ũquĩ.

⁵ ¿Aba chõ se chã? ¿Aba chõ Apolos no ña? Mbia rerecua eã ño ureico nguiã ã. Dios cheẽ nenei neneisa chõ ureico nguiã ã. Ure Dios cheẽ nenei nenei mose jẽje que Jesús jẽicua resẽ. ⁶ Mbae tiquia ji rã ño jẽ nde. Sã emo mbae eĩ tiquia no. Sã emo i icherẽ cherẽ erese no. Dios ae chõ embusuri nguiã. Anyae chõ ngue Dios cheẽ mingue nguiã jendese. Apolos chõ ngue jembaaquiātu quiatu nguiã cote. Dios quiarei ucheẽ mbusuri raanguia jeñiangui re. ⁷ Ae echitiquia nae, aque embusuri aroneate. Ae i icherẽ cherẽ erese nae, aque abe embusuri aroneate no. Dios ae embusuri nguiã. ⁸ Ae echitiquia quia, ae i icherẽ cherẽ nguia erese, eĩ si chõ ũquĩ nde. Dios ra mbae turã mee ee, ae esaã ũquĩ ndibishorõ. ⁹ Ure rei Dios cheẽ naa naasa. Sã chacocho no, eĩ si chõ Dios mbae jẽ nde. Sã tuchuacha no, eĩ si chõ Dios mbae jẽ nde.

¹⁰ Dios turã tuchi que seje ra. Seje quiatu ngue ucheẽ mee nguiã. Mbia mbaaquiātu quiatu sacua. Tuchua ao aquiātu rã ño se re. Tuchua i raanguia chõ asaã nguiã base cote. Aque arõ ño emo ndiqui nguiã tuchua ao hue no. Ae tuchua chao sechisaã arõ nae, sã eraã mingue turã. ¹¹ Tuchua i raanguia chõ Jesucristo riqui nguiã. Ae mi tuchi chõ tuchua i raanguia re. ¹²⁻¹³ Ae arõ tuchua mo nandesã arondete. Sita je eraã mose, siqui turã mbei rae. Oro je eraã mose, siqui turã mbei ra eno. Plata je eraã mose, siqui turã mbei ra eno. Ũquĩ je eraã mose, oquei eã nda Dios tata mbu mose. Ira je eraã mose, oquei chõ ndae. Quiata je eraã mose, oquei chõ nda eno. Nandechisaã nda Dios tea ja. ¹⁴ Nandechisaã siqui i i mose, Dios ra mbae turã mee nande je. ¹⁵ Nandechisaã oquei mose, nandembae ra quiachã nandesì. Nande quia ra nandequiachãya ndaque. Nandecuasẽ ndaque ra ibate Dios je. Nandechi quiatu ra nandeico cote.

¹⁶ ¿Jẽtesarei chõ ere? Dios chuchua chõ nanderete riqui co resẽ. Dios riqui beite nandeye co. Espiritu Turã ndiqui beite nandeye co. ¹⁷ Emo Dios chuchua mbiicuã mose, aque ra Dios mbutiã. Nande quia Dios chuchua re. Dios que uchuchua mi icúe umbaerã nda. Nanderete je sichõ nandeico nguiã ñee co. Dios chõ nandemingo nguiã icúe umbaerã co.

¹⁸ —Nandeaquiatute, jenyechĩ nguiã jeñiangui re ùquĩ. Ae eaquiatute ibi jenda achõ ndese, sã ùquĩ uaquiatu raã naa eã. Siqui mingue mose ra Dios embaaquiatu turã cote. ¹⁹ Ae eaquiatute ibi jenda achõ ndese, “eaquiatuã”, i chõ Dios nguiã ùquĩ je co. Sã embesa ji riqui ñee no:

Dios ra ùquĩ aquiatu mbutiã ño cote.

“Seaquiatu tuchite aico co”, i quiatuchĩ ngue nyii re,

i que embesa ji ra. ²⁰ Sã embesa ji riqui ñee no:

Ae rese eaquiatu riqui ndua nae, ùquĩ Dios icua tuchite quia co.

Ndua ndua iru chõ nguiã,

i que embesa ji ra. ²¹ ;Mbia aquiatu mo ndese ra jeñimbucha chooñochĩ jẽ! Dios quiatu que mbae mondo ja jẽje ra. ²² Jembae chõ se re. Apolos abe rei jembae no. Pedro abe rei jembae no. Mbae ibi jenda ja rei jembae. Dios mbia mingue mose, jẽje chõ emingo. Dios mbia mingue eã mose, jẽje chõ emingo eã. Ae siqui quia namo, jembae ja chõ ùquĩ nde. Ae ra siqui aquere, jembae ja chõ ùquĩ no nde. Jembae ja chõ ñene. ²³ Cristo mbae chõ jẽ nde. Dios mbae chõ Cristo no nde.

4

Ureaquiatu tuchi Jesús chĩmbaaquiatu si, jenyechĩ nda jẽ

¹ —Cristo rimba ja chõ ùquĩ nde, jenye chõ seriĩ. Apolos riĩ abe no. —Ae ambuchecua eã mbia je nyii, ùquĩ jembuchecua checua mbia je seriĩ cote, i que Dios ure je ra. ² Dios rimba mose nande, Dios cheẽ nandemumbayã mbei chõ nguia. ³ —Serimba turã ño nde re, i ra Dios seje reae. Nducuaã. Aicuayãte se. —¿I se jẽje re? ae ãte se quia jẽje co. Ae ãte se quia emo je co no. Dios miĩ ño seicua nguiã. ⁴ Dios rimba turãte aico reae. Dios ae chõ seicua nguiã. ⁵ —Dios rimba turã ño aque re, jjenye jeichĩ nda emo niĩ jẽ! Jesucristo tu mose, ae quia ra mbae mbuchecua ja. Ae ra nandendua ndua mbuchecua ja. Aque mose quia ra Dios ñee. —Co rei serimba turã tuchi co, i ra Dios mbia mbiirandu aque mose cote.

⁶ Jembaaquiatu sacua ño aico nguiã ñee jẽje co. Sechue si chõ aico nguiã ñee. Apolos riĩ abe chõ aico nguiã ñee. Dios rimba achõ ño ure re. Ure miĩ mo ndui jẽingo bei aroneate. Dios rimba ja rui chõ jẽingo. Eĩ jenye mose ra embesa ji jemumbayã. ⁷ ¿Mbaerã nda jẽcuasu jẽsaã saã nde? Ae jendeco jembaerã nae, Dios chimondo ja chõ ùquĩ nde. Jẽaquiatu mose, Dios ae jembaaquiatu nguiã. —Se ae que sembae asaã saã nda, jjenyechĩ nda jẽcuasu raã naa jẽ!

⁸ —Ureaquiatu tuchite cote, jenyechĩ ngue ñee nda. —Ureico Dios cheẽ icua jate co, jenyechĩ ngue ñee no nda. Ererecua tuchi jẽsaã saãchĩ ureririrõ cote. Ererecua jẽsaã ñooño na jẽ no. Se abe ra ererecua asaã saã ndei jẽ na ndeae. ⁹ Dios ucheẽ nenei neneisa quirirõ jiri ure reae. Mbia tarõ ji rã ño ureico uremano ndaarõ arõ ndeae. — ¿Mañi ã nguia re? i tuchi mbia quia mae nguiatu urerese co. Angeles abe ñee nyee mae nguiatu urerese. ¹⁰ Ureico tuchi mose Cristo rese, “eaquiatuã”, jenye chõchĩ equia ure je ùquĩ. “Ureaquiatute ure”, jenye chõchĩ equia jẽ jẽingo mose Cristo rese ùquĩ. Urequirãcuã neãte ure, jẽ jẽquirãcuã mose. Mbia ureosei chiãte ure; jẽ nguia mbia jẽoseite nguiã. ¹¹ Mbae eã mbeite urembae namo abe. Ureirãcuã ãcuãte que eriqui emo mose ra. Ureiseite abe que eriqui ra. Ureirao eãte abe no. Mbia icua icua mbeite ure je. Urechuchua eãte abe no. ¹² Mbae uresaã saã tuchite quia ureo je co. Mbia icua icua mbeite riqui ure je co. Urecheẽ turã turã mbeite equia ure ee ã, ùquĩ ñee icua icua mose ure je. Urechecua chõte equia ñĩmbirãcuã ee ã. ¹³ Urecheẽ mingue beite equia ùquĩ ñee icua mose ure je ã. Mbae quia rã tuchi chõ ureico nguiã mbia je ure ã. Mbia ureririrõ mbeite quia namo nyee ure ã.

¹⁴ Jẽireĩ ireĩ sacua eã ño aico nguiã ã mbesa jẽje ã. Jemundua ndua sacua ño ñene. Seriirite quia jẽ nde. ¹⁵ Jembaaquiatu quiatusa tubiriãte raque Cristo riĩ. Se miĩ tuchi

chõ jendu re. Se rane nguiatu ngue echeẽ turã asenei senei nguiã jêje nyii. Se quiatu ngue Cristo aicua uquia nguiã jêje. Nyebe aico nguiã “seriirĩ” i beite jêje co. ¹⁶ Nyebe jêingo se rã si. ¹⁷ Timoteo amondo quia jêje aque. Ae rei sechimbaaquiату tuchi. Nyebe “seriirĩ” ae tuchi nguiã ee. Ae quiarei siqui turã tuchi Dios rese. Ae ra jemundua bei secheẽ ndese. Sechisaã ndese abe no. —Eĩ ngue Pablo quia Jesús quiato mbaaquiату quiatu sucha mbuchesea sea mose ra, i ra Timoteo jêje seriĩ. ¹⁸ Jemo ndiqui uaquiату raã naa tuchichĩ ùquĩ. —Pablo ra tu eã mbei urerea, i chõchĩ jemo nguia seriĩ ùquĩ. ¹⁹ Aso jei ra jendea, Dios eno i mose seje. Ae uaquiату saã saã tuchi quia jemo nae, ùquĩ tatea cote. Mañi nda equia mbae raã ndeae. Echeẽ achõ achandu sereã. ²⁰ Dios rimba cheẽ achõ aroneate. Siqui eã mose Dios quirãcuã ndese. ²¹ Manyae ra jêje seso mose jendea reae. Acheẽ asi asi ra jêje reae. Aico mingue chõ nda jêje renoae. Jêhui mose jêicuã si, acheẽ asi asi eã nda seso mose jendea.

5

Ae siqui ngu ninisi rese, aque jemombo

¹ Mbae icuã tuchi rese que ureirandu jendese ra. Jemo nda siqui siqui ngu ninisi rese ra. ¿Mbaerã jêataque jêtea chooño mbae icuã naa mose re? Ae Jesús quiato ãte nae, ùquĩ ño siqui ãte ngu ninisi rese. ¿Mbaerã Jesús quiato quiatu siqui ngu ninisi rese re? ² Jêturã jêsaã saã mbei chõchĩ nguiã jê ùquĩ. Jêya eã eã ño jêingochĩ ùquĩ ndese ùquĩ. Jêireĩ ngũã tuchi chõchĩ. Ae siqui ngu ninisi rese, ae jemombo eã ñochĩ jeñumunua nuasa si.

³ Ishote aico raque jêsi co. Andua beite sequia jendese co. —Ae siqui ngu ninisi rese, aque jemondo Satanás je, ae chõ nguiã sechiangui re co. Se siqui raanguia jendese. ⁴ Jeñumunua na Jesús quiato hue jenda. Se abe ra andua ndua jendese. Jesucristo quirãcuã abe ra siqui tuchi jendese jeñumunua mose. ⁵ Ae siqui ngu ninisi rese nae, aque jemombo chõ jêsi. Jesús quiato si. Jemee ño Satanás je. ĩ nda Satanás erete mbasi. ĩ nda eã siqui bei Jesucristo tu mose cote.

⁶ ¿Mbaerã jeingo jêturã naa naa mbae icuã ndea chooño nde? Levadura rã ño mbae icuã nde. “Levadura ñetẽ nda oso raque mbichae raã namo mose. Mbuchimatã ja rae”. ¿Ùquĩ jeñanuãte quia re? ⁷ Ae eicuãte nae, aque jemombo jêsi. ĩ nda jê abe mbae icuã jêsaã eã. Dios que Jesucristo iquia nandeicuã ndibishorõ nda. Sã mbia riqui oveja iquia iquia huicuã ndibishorõ no. ⁸ Nyebe nandeico turã na Dios rese, mbae icuã naa naa ndocoĩ. Cochee nandeico. Nandeicuã nandesecha ja.

⁹ —Ae siqui emo ninisi rese, ùquĩ je ra jeñee ñeechĩ, ae que secheẽ mbesa mondo jêje nyii. ¹⁰ Ae Jesús quiato ãte, ùquĩ nii eã ño ngue acheẽ nguiã jêje. Nandeechẽ eã aroneate Jesús quiatoã je nandeico mose ĩbii. Ae siqui quia emo ninisi rese nae, ae abei chiãte riqui nae, ae mbae mbuquiachã nguia nae, ae siqui Dios abareã ndese nae, ùquĩ je nandeechẽ eã aroneate. ¹¹ Jesús quiato mo ùquĩ icuã naa mose, jemombo chõ jêsi. Jeñee ñeechĩ nda ee. Emo ninisi rese siqui mose. Abei chiã mose. Dios abareã ndese siqui mose. Uchuru rerequia chooñoã mose. Quiacua mose. Mbae mbuquiachã mose. Jesús quiato ùquĩ naa naa mose, jêhui chõ esi. Jêquiaru jiri jiriã tuchi ùquĩ ndese. ¹² Jesús quiatoã nandeteaquiату aroneate. Ae Jesús quiato, ùquĩ nguiatu nandeteaquiату. ¹³ Dios quia ra Jesús icuasa reã mbasi. Ae siqui ngu ninisi rese nae, “Jesús quiato se”, i rei quia nae, aque jemombo chõ jêsi.

6

Jemo icuã icuã mose nyue, jê ae chõ jêingo

¹ Jemo icuã icuã mose nyue, jêsochĩ nguiã ñee Jesús quiatoã nderecua je. Jê ae chõ jemae erese ae. Jêicuã ae. Sã Dios quiato achõ ño ñee ùquĩ je. —ĭEĩ jenye jê! i ùquĩ je. ² Dios quiato quia ra “ĭeĩ jenye jê!” i ja Dios quiatoã je emo mose. Jê nguia ra “ĭeĩ jenye jê!” jenye mbia ataque je emo mose. ¿Mbaerã jêingo “ĭeĩ je nye jê!” ise reã mbae ñetẽ

naa mose re? ³ Angeles je abe chee ra “jeĩ jenyee jẽ!” nande. ¿Ūquĩ ndese jẽiranuãte re? Æ ibi jenda je “jeĩ jenyee jẽ!” nande turã ja rã ae. ⁴ Jesús quiato chõ jẽ nde. Ibi jenda mo nii jemo icuã icuã mose nyue, jẽ ae chõ jemaee ūquĩ ndese. Jẽsochĩ nguiã ñee Jesús quiatoã nderecua je. Dios quiato eãte quia ūquĩ nde. ⁵ Jesús quiato mo ñee icuã icuã mose nyue, ¿jemo jẽaquiatuãte ñee ee re? “jeĩ jenyee jẽ!” i ee re. Jẽ jẽireĩ ireĩ sacua ño aico nguiã ñee jẽje ūquĩ. ⁶ —¿Mañi ure ra re? i aroneate Jesús quiato ñee Jesús quiatoã nderecua je.

⁷ Jemo Jesús quiato mo icuã icuã mose nyue, echia turã tuchi ãte quia ñene. Jeñimbirãcuã ño mbae icuã naa mose jẽje. Jeñimbirãcuã ño jembae mbuquiachã mose no. ⁸ Jẽ abe mbae icuã jẽsaã saã ñochĩ, ñimbirãcuã ndocoĩ. Jẽ abe jendesenda mbae jembuquiachã ñochĩ Jesús quiato mbae, ñimbirãcuã ndocoĩ.

⁹⁻¹⁰ Mbia rerecuarã tuchi ra Dios cote. Aque mose ra mbia icuã siquã tuchi Dios rese. Ae siqui emo ninisi rese nae. Ae siqui ngũinisiã ndese nae. Ae ndua chooño nguia Dios abareã ndese nae. Ae siqui quia nyiese ngũinisi raã naa nguesenda je nae. Ae mbae mbuquiachã quiachã nguia nae. Ae abei chiãte riqui nae. Ae quiacua quiacua quia nae. Ae ucheẽ mondo chooño mbeite quia mbia je nae. Ūquĩ nda siquã tuchi Dios rese. — Eicuã abe ra siqui bei Dios rese, jjenyechĩ nda ñimbiĩrĩ irĩ jẽ! ¹¹ Eĩ ngue jemo icuã cose ra. Dios ae jembirõ nguiã cote. Dios chõ jemii nguiã icúe umbaerã cote. Espiritu Turã ngue jẽisi turã Jesucristo rĩ cote ra.

Espiritu Turã nyuchua chõ jendete re

¹² —Co rese ra ereicochĩ, i ãte raque Dios quia seje mbae mo nii. Dios biãte nande mbae raã ja chooño mose. Mbae mo sembiicuã serĩ mose, asaã eã mbei ra se. ¹³ Nandechiurã ndei nanderie ye sacua. Nanderie rei nandechiu rirurã. Ūquĩ ja ra Dios mbutiã emo mose cote. Dios mbaerã ño nanderete re. Siqui chooño sacua eã ño emo ninisi rese chõ nanderete re. Nanderete rerecua chõ Dios re. ¹⁴ Dios quirãcuã ño ngue Jesucristo raaque mbuquera nguiã. Eĩ ño nda Dios quirãcuã nanderaaque mbuquera nguiã nande abe no. ¹⁵ ¿Jẽiranuãte quia jendete rese re? Cristo nanderete mbucha quia uchiese co. Cristo rete chõ nandeico nguiã co cote. Cristo rete nandembucha aroneate cuña icuã ndete mo ndese. ¹⁶ Emo siqui mose cuña icuã mo ndese, erete ucha chõ nguiã nyiese aque. Erete nyeremo eã ño cote re. Ūquĩ ndete ja ra co mii cote, i que Dios cose ra. ¹⁷ Emo siqui mose Cristo rese, nguete mbucha chõ nguiã erese ūquĩ cote. Erete mii na ño ūquĩ cote re. ¹⁸ Jeninisiã ndese ra jẽingochĩ jẽ! Mbae icuã mo naa mose, ūquĩ nda nanderete mbiicuãya jiri. Siqui mose ngũinisiã ndese, ūquĩ nguia ra nanderete mbiicuã tuchi cote. ¹⁹ Espiritu Turã siqui chee jeñiangui re ūquĩ. Espiritu Turã nyuchua chõ jendete re. Dios mbae chõ jẽ nde. Jembae ae eã ño jendete re. ²⁰ Eicuã nimba rei ngue jẽ nyii re. Dios quiatu ngue jẽisi nguiã cote. Nguiĩrĩ ngue emondo jendibishorõ nda. Nyebe jẽingo jendete mee Dios je. Jẽaĩ abe jemee ee noae.

7

Pablo mbia mbaaquiatu emo ngũinisi rerequia rĩ

¹ Jeñee ngue jembesa mondo seje nyii nae, ūquĩ tasibishorõ jẽje cote. Coche emo siquã nguiã cuña mo ndese. ² Coche mbia ngũinisi ae rerequia nguiã. Coche cuña ngu mii nderequia nguiã no. Emo ndese siqui chooño eã sacua ño ūquĩ nde. ³ Sã eru riqui turã ngũinisi rese. Sã eninisi abe riqui turã ngu rese. Nyao aroneate nyesi. ⁴ Eninisi rete chõ eru mbae cote re. Eru rete chõ eninisi mbae cote no nde. ⁵ Nya i aroneate eru ngũinisi je nguete rese ngueteã. Nya i aroneate eninisi nguete rese ngueteã ngu je no. —Nandechẽ mbei Dios je namo, siqui rocoĩ nyiese, i mose nyue, eturãte ūquĩ. Sã eriquibe nyiese aquere cote. Ñee ñeende Dios je cote. Siquibe eã mose nyiese, ñimbirãcuã eã arõ ndete. Satanás embiicuã arõte cote. ⁶ —Jeninisirã jendeco, ae ãte quia jẽje co. —Jeninisibi mose, jendeco ae, ae chõ nguiã jẽje co. ⁷ —Sã Jesús quiato ja ninisiã ndiqui se rã si, ae rei que se

ra. Dios cheẽ eã ño ùquĩ nde. Nandechisaã ae aerã ño Dios mondo nguiã nande je. Emo ninisiã siqui turã arondete. Emo ae ngũinisi quereco sete nguiã no.

⁸ Ae eninisiãte nae, ùquĩ je tacheẽ. Eru cheecha je abe tacheẽ no. Coche jẽingo nguiã jendu eã. Coche jeninisiã ndiqui nguiã no. Se rã si. ⁹ Jeñimbirãcuãyã mose jendete je, jeninisirã mo jẽtea ae. Jendurã mo jendeco noae. Mbia mo osei osei rocoĩ.

¹⁰ Ae ngu quereco nae, sã ùquĩ ngu rechayã mbei. Jesús cheẽ tuchi chõ ùquĩ nde. Secheẽ ae eã ño ùquĩ nde. ¹¹ Cuña mo ngu recha mose, sã eriquiã mbei emo ndese. Sã ae ae chõ ndiqui bei, ñimbucha si eã mose ngu rese. Sã eru abe ngũinisi rechayã mbei.

¹² Se ae tacheẽ cote. Jesús cheẽ eã ño ã cote re. Jesús quiato mose emo, sã eriqui bei ngũinisi rese. Jesús quiatoã ndaque eninisi. Eninisi siquise mose ngu rese, sã eru siquichõ erese. ¹³ Jesús quiato mose cuña mo, sã eriqui bei ngu rese no. Jesús quiatoã ndaque eru. Eru siquise mose ngũinisi rese, sã eninisi siquichõ erese no. ¹⁴ Jesús quiato mose eru, eru ngũinisi mbucha arõte quia Jesús rese co. Jesús quiato mose eninisi, eninisi ngu mbucha arõte quia Jesús rese co no. Eĩ nda eriirĩ abe Jesús icuayãte rei, ùquĩ ande. ¹⁵ Jesús quiato mo ninisi siquifã mose Jesús rese, “seru tasecha” i bei mose, sã eru eriquisã quisã eã. Cuña mo Jesús quiato mo ndu siquifã mose Jesús rese, “seninisi tasecha” i bei mose, sã eninisi ngu riquisã quisã eã no. Ùquĩ naa mose, Jesús quiato mbae icuã saã eãte. —Sã seriirĩ ndiqui turã nyue, i quiatu que Dios nande je ra. ¹⁶ Ae Jesús quiato nae, ùquĩ ngũinisi mingo arõte Jesús rese. Ae Jesús quiato cuña nae, ùquĩ ngu mingo arõte Jesús rese no.

¹⁷ —Eĩ jenye chõ nguia jẽ ae ae, i que Dios nandechiaorã mee mee nande je ra. Ùquĩ ndese nandeico bei quiatu nande ae ae. Dios que ñee nande je nyii, aque mosenda rã si bei chõ nandeico. Ùquĩ ño asenei senei nguiã Jesús quiato ishonda jaje abe. ¹⁸ —Echu serui, i mose Dios judío mo je, sã judío bei chõ ae riqui. —Echu serui, i mose Dios judío eã mo je, sã ae riqui judío raã naa eã. ¹⁹ Sebite judíos achõ, iã nda Dios. Sebite judíos eã achõ, iã nda Dios no. Ae Dios cheẽ mumbayãte quia nae, ùquĩ nguia Dios bite re. ²⁰ Eĩ nande que equia Dios ñee namo mose nande je nyii, aque mosenda rã mbei chõ nandeico. ²¹ Mbia rimba mose nde, Dios “eico serui” i mose ndeje, eico chõ erui. Mbia mo nimba raque nde. Erechãchĩ nda ndererecua si. Ndererecua huise mose ndesi, nde ae eico cote ae. ²² —Eico serui, i mose Dios mbia rimba mo je, Dios embui chõ nguiã eicuã si cote. —Eico serui, i mose Dios emo ae siqui mose, Cristo rimba chõ aque cote re. ²³ Jesucristo que mano jẽje ra. Nyebe Jesucristo rimba ae chõ jẽingo nguiã ùquĩ cote. Mbia rimba ae eã ño jẽingo nguiã ùquĩ cote. ²⁴ Dios que ñee nande je nyii, aque mosenda raanguia bei chõ nandeico Dios rese.

²⁵ Nyucuaaque riĩ tacheẽ ndaque jẽje cote. Dios que ñee ãte seje ùquĩ ñi nda. Se ae chõ tacheẽ jẽje. Airandu que Dios ia eã mose serese ra. Nyebe aico nguiã ñee ñooño eã tuchi jẽje co. ²⁶ Sã mbia ngũinisirã mo ndea eã namo. Sã nyucuaaque ae riquichõ ngurã mo ndea rocoĩ. Mbia icuãte quiatu eriqui nguiã Jesús quiato je ã cote. ²⁷ Neninisi mose, eico bei chõ erese erechayã mbei. Neninisiã mose, nde ae eico bei. ²⁸ Neninisirã ndea mose, eicuã eã ño ùquĩ no nde. Nyucuaaque ngurã mo ndea mose, eicuã eã ño ùquĩ no nde. Mbae icuã nda eĩ eĩ ee ngurã ndea mose cote reae. Nyebe aico nguiã ñee jẽje. —Jẽ ae jẽingo jeninisiã, i jẽje. ²⁹ Tacheẽ tuchi rã jẽje, Seresenda. Mbae ra ua jei ja nande je cote. Ae ngũinisi quereco quia, sã ùquĩ ndiqui ngũinisi rerequia eã naanguia. ³⁰ Ae eya eãte riqui, sã ùquĩ ia tuchi raanguia riqui no. Ae eyate riqui, sã ùquĩ ia eãte raanguia riqui no. Ae mbae isi quia, sã ùquĩ ndiqui mbae isiã naanguia no. ³¹ ã nandeico rei nguiã íbi ã. ¡Ibi jenda rese ra nandendua tuchichĩ jẽ! ¡ã ibi jenda ja ra ua ja chõ jẽ!

³² —Jeninisiã ño jẽingo, ae que se ra. Jendua ndua eã jiri nda ibi jenda rese chã. Ae eninisiã, ùquĩ ndua ndua bei arõte Dios mi ndese. Ae Dios bite, ùquĩ esaã saã mbei arõte. ³³ Ae eninisi nae, ùquĩ ndua ndua bei arondete ibi jenda achõ ndese. Ae eninisi bite nae, ùquĩ esaã saã mbei arondete. ³⁴ Eĩ si chõ cuña no nde. Eru eã mose, ndua ndua arondete Dios achõ ndese. Ae Dios bite, ùquĩ nda esaã saã mbei ee. Siqui tuchi ra Dios rese. Ae ngu

quereco nae, ũquĩ ndua ndua bei arondete ibi jenda achõ ndese. Ae eru bite nae, ũquĩ esaã saã mbei arõte. Siqui rocoĩ Dios rese. ³⁵ Jaendiquisã quisã eãte raque se jeninisirã mo ndea mose. Jemundua sacua Dios rese chõ aico nguiã ñee jêje co. Jendua eã sacua mbae mo ndese chõ ñene. Jeninisi mose jendua bei aroneate Dios rese.

³⁶ —Seriirĩ ndu bite chĩ cote. Etiarõte chĩ cote, i mose amei mo, sã eriirĩ ngurã mo nderequia. Eicua eã ño nguiirĩ ndurã mee ee re. ³⁷ —Sã seriirĩ ndu eã ae riqui. Erurã nda amee eã ee, i tuchi mose amei mo, eturãte ũquĩ abe. ³⁸ Ae nguiirĩ ndurã mo mee ee, eturã ño ũquĩ nde. Ae nguiirĩ ndurã mo mee eã ee, eturã tuchi chõ ũquĩ cote re.

³⁹ Eru mbae bei chõ eninisi re. Nyao aroneate nyesi. Eru mano mose, ngurã mo nderequia arõte Dios quiato mo cote. ⁴⁰ Eru mano mose, siqui turã arondete ngurã mo ndea eã mose cote. Eya tuchi ra siqui ngu eã mose reae. Se chõ acheẽ nguia ũquĩ ndeae. Espíritu Turã abe sembuheẽ nguia reae.

8

Ae soo mbia mondo rei dios abareã je nae

¹ —Mbia soo mondo mondo quia dios abareã je nae, ¿ũquĩ soo ra nandeu re? jenye que seje. Ũquĩ tasenei jêje cote. —Seaquiatute se, nande ja jate raque quia ã. Emo eaquiatu tuchi mose, ucuasu raã naa arondete. Emo nyesequa mose mbia rese, Dios abe rese ra nyesequa bei. ² Seaquiatute se, i mose emo, eaquiatuã ño ũquĩ nde. ³ Emo nyesequa mose Dios rese, Dios ũquĩ icua chõ nguiã ũquĩ.

⁴ Mbia soo mondo mondo quia dios abareã je, ¿ũquĩ nda nandeu re? ¿Nandeu eã tuchi chõ nda re? Dios eã tuchi chõ dios abareã nde. Co miĩ tuchi chõ Dios re. ⁵ Dios abareã nguia etubiriãte re. Ibi jenda. Ibei riĩnda abe no. Dios raanguia tubiriãte raque no. ⁶ Dios quia co miĩ tuchi nande je re. Ae quiarei nanderu tuchi. Ae miĩ ngue mbae chao ja tuchi ra. Ae miĩ ngue nandea umbaerã nda. Nandererecua miĩ tuchi chõ siqui nguiã co no. Jesucristo, i equia ee. Ae que mbae chao ja tuchi Dios rese ra. Ae miĩ ño nandemingo nguiã ã.

⁷ Dios quiato mo iranuate quia ũquĩ ndese ã. Siquiche beite quiatu nguiã dios abareã si ũquĩ. Ae soo mbia mondo dios abareã je, ũquĩ mbaeiaie riqui reĩ nguiã ee. —¿Ũquĩ soo jêu eã jê! i reĩ Dios nguiã ee. ⁸ Ae nandeu quia nae, ũquĩ nda nandembuturã eã Dios je. Nandechiu mo nda nandembuturã eã mingo. Nandechiurã nandehi teã teã mose, ũquĩ nda nandembicuã eã no. ⁹ —¿Ũquĩ soo ra jêuchĩ jê! iãte raque Dios nande je. Mbaeiaie eãte raque ũquĩ soo. Mbaeiaie nda eriqui reĩ Jesús quiato namonda je raẽ. Jê eu mose, ũquĩ abe ra eu chee. —Mbaeiaie au chõchĩ, i ra ñimbicuã tuchi cote. ¹⁰ Jêquiaru mose dios abareã chuchua, Jesús quiato namonda ra mae jendese. Ũquĩ abe ra soo u chee, ae mbia mondo Dios abareã je. Maende jendese. Eicua ndaque eriqui reĩ nguiã ee. ¹¹ Jê ndaque jêirandu ũquĩ soo rese. Eicua eã ndaque eu mose. Jêu eã ndei. Jê eu mose, Jesús quiato namonda abe ra eu chee. Siquichete raque esi. Eĩ jenye chõchĩ ũquĩ mbiicha arõte Dios si. Ũquĩ niĩ abe chõ ngue Jesucristo mano nguiã. ¹² Soo mbaeiaie riqui reĩ mose ee, jêu eã uquia ee ae. Jê euquia mose Cristo quiato namonda je, eicuãte ũquĩ Cristo je. ¹³ Jesús quiato mo ambicuã sereã tuchi chõ nguiã se. Se soo u mose, ũquĩ Jesús quiato mo mbiicuã mose, soo ra auã mbei cote.

9

Mbae mo jembu seje Dios cheẽ nenei nenei ndibishorõ, i ãte Pablo

¹ Jesús cheẽ nenei neneisa tuchi chõ se re. Sererecua mo eãte ibi jenda mo. Amae tuchi que Jesucristo rese se ra. Secheẽ nguire chõ jêingo nguiã Jesucristo icua ũquĩ cote. ² Jesucristo cheẽ nenei neneisa eã ño co re, i arõte raque emo seje. Jê quiatu jeñee aroneate nguiã ũquĩ seje. Ũquĩ jêingo seicua tuchite ũquĩ. Secheẽ nguire quiatu que Jesús jêicua cote resẽ.

³ Eĩ ae chõ nguiã ñee mbia ñee icuã mose seje. ⁴ Se abe Jesús quiato sembuquiaru quiaru arondete raque. ⁵ Seninisirã Jesús quiato mo arao rao arondete raque mananguiti. Secuata cuata mose mbia mbiirandu randu Jesús rĩĩ. Sã Pedro riqui ngüinisi rerao rao no. Jesús nongue abe no. Sã Jesús cheẽ nenei neneisa ja ngüinisi rerao rao no. ⁶ ¿Se mii ño nda Jesús quiato sembuquiaru aroneate reĩ jêje re? Bernabé abe rese. Ure Jesús cheẽ nenei nenei mose. ⁷ Sã soldado siqui chooño eã comandante mbae mee eã mose ee. Sã emo ndiqui mbae tiquia chooñoa no. —Sechitiquia nda au chã, i chõ nguiã. Sã emo ndiqui ticuasú rarõ ñooñoa no. —Equiandi nda ambei chã, i chõ nguiã.

⁸ Secheẽ ae eã ño ũquĩ nde. Embesa ji chõ asenei nguiã jêje. ⁹ Co rei Moisés chimbesa co:

Jẽ ticuasú mbuquiei quiei mose, echuru jemumbi eã.

Sã ae ae si quia mbae cua,

i que embesa ji ra. Ticuasú achõ je eã ngue Dios ñee nguiã. ¹⁰ Nande abe je chõ ngue ñee nguiã. —Sã Jesús quiato abe riqui mbae mee mee echeẽ nenei neneisa je, i chõ ñene. Ae mbae chitiquia quia nae, “sechitiquia tau”, i chõ nguiã etiquia. Ae mbae a chiqui chiqui quia nae, “sechiiqui tau”, i chõ nguiã eiqui iqui. ¹¹ Dios cheẽ ngue uremingue mingue tuchi quia jendese resẽ. ¿Jẽ urembuquiaru quiaru aroneate quia cote re? ¿Ureiraorã jemee aroneate quia ure je cote re? ¹² Mbae mo jemee mee nguiã Jesús cheẽ nenei neneisa mo je ũquĩ. ¿Mbaerã jẽingo emee eã ure abe je quiatu re? —¡Mbae mo nandesi teã eo si jê! ure que equia oso mose jendea ra. Dios si jembiiicha eã sacua ño ngue mbae mo ureisi teã nguiã jësi. ¹³ Sã Dios ñee sacerdotes je cose no. —Ae siqui quia sechuchua sacrificio raã naa nae, sã ũquĩ ndiqui ofrenda u u bei ae, i que Dios ñee cose ra. ¹⁴ Eĩ si chõ ngue Jesús ñee nguiã ucheẽ nenei neneisa je. —Ae secheẽ turã senei senei nguiã nae, sã sequiatio ataque riqui mbae mee mee mbei ũquĩ je, i que Jesús ra.

¹⁵ Dios cheẽ nenei neneisa tuchi raque se. Mbae mo ngue aisi chõ ãte jësi ra. Se ae chõ mbae achao chao nguiã sembaerã co. —Mbae mo jemee seje, ae ãte chõ nguiã co mbesa mbesa jêje co. Tamano ae, “mbae embu seje”, i rocoĩ jêje. ¹⁶ Dios cheẽ nenei neneisa tuchi chõ se re. ũquĩ ñi seturã asaã saã aroneate. —Secheẽ esenei senei mbia je, i quiatu Dios nguiã seje. Se erenei nenei eã mose mbia je, Dios ra paama i seje. ¹⁷ Se ae que andua eã nda. —Dios cheẽ tasenei senei, aeã ngue se ae ra. Dios chõ ngue ñee nguiã seje. —Secheẽ esenei senei mbia je, i nguiã seje. Se ae andua mose, eĩ nda Dios mbae mo mee ndei seje ucheẽ nenei nenei ndibishorõ. Dios rimbate quia se re. ¹⁸ ¿Mbae chõ sebite riqui chã? Mbae mo isiã Dios cheẽ nenei nenei ndibishorõ, ũquĩ ño sebi re. —Mbae mo embu seje Dios cheẽ nenei nenei ndibishorõ, ae ãte quia co. ũquĩ nguiã sebi re.

¹⁹ Mbia mo nimba eã ndaque se. Mbia rimba asaã saã ño nguiã Dios cheẽ nenei nenei mbia je co. Mbia Jesucristo icua sacua. ²⁰ Seico mose judíos ite re, judío asaã saã ño nguiã. Judíos Jesucristo icua sacua. Ae siqui tuchi quia Moisés chimbesa rui nae, ũquĩ ite re seico mose, Moisés chimbesa asaã saã ño nguiã se abe. ũquĩ Jesucristo icua sacua. —Moisés chimbesa rui eico, i ãte raque Dios seje. ²¹ Ae siquiã nguiã Moisés chimbesa cheẽ ndui nae, ũquĩ ite re seico mose, se abe Moisés chimbesa asaã saã eã ño nguiã cote. ũquĩ Jesucristo icua sacua. Cristo mii ñee ño amumba mumbayã nguiã co. ²² Jesús quiato quirãcuã nea ite re seico mose, ũquĩ asaã saã ño nguiã se abe, sequirãcuã nea naa naa. ũquĩ Jesucristo icua sacua. Ae ite re aico oso oso beite nae, ũquĩ na ño aico nguiã se abe. ũquĩ Jesucristo icua sacua. ²³ ũquĩ ja chõ asaã saã nguiã Dios cheẽ turã ñi co. Nandeico turã ja sacua Jesús rese.

²⁴ Sã mbia carrera raã naa no. Mbia ja chõ uchã ndaque. Co mii ño nda premio isi. Aque rã tuchi chõ jẽingo Jesús rese. Premio isi sacua naanguia. ²⁵ Ae ra carrera saã saã nae, ũquĩ mbae icuã secha ja chõ nguiã ũquĩ. Premio isi sacua ño eriqui nguiã mbae icuã naa eã. Premio nda ua jei raque. Ae Jesús mee arõte quia nande je premio nae, ũquĩ nguiã ra ua eã mbei nandesi. ²⁶ Se aico chooñoa nguiã Jesús rese co. Jesús rese aico turã tuchi

chõ nguiã se co. ²⁷ Mbae asaã saã ño nguiã serete mbirãcuã co. Serete secheẽ mumbayã sacuaã. Se premio ganar i sacuaã ño aico nguiã eraã naa co. Premio isiã sebiãte, se Dios cheẽ nenei nenei tuchire. Nyebe aico nguiã siqui tuchi Jesús rese co.

10

Dios raanguia rese ra jëingochĩ jë

¹ ¡Jëtesareichĩ nda nandei ñiinda si jë! ¡Moisés mosenda si jë! ¡Ûquĩ ngue siqui ja rei ibeishĩ ndui ra jë! ¡Ûquĩ ngue nyoi ja rei Ama freĩ ndasa Dios ñee mose ee ra jë! ² —Moisés rese nandeico bei, i ja rei que mbia siqui ja mose ibeishĩ ndui ra. —Moisés rese nandeico bei, i ja rei que mbia Ama freĩ ndasa mose ra. ³ Ae Dios mee ndei ee echiurã nae, ùquĩ ngue mbia ja u u rei ra. ⁴ Ae Dios mee ndei ee embei sacuaã nae, ùquĩ ngue mbia ja mbei mbei rei ra. I que tuutu quia sita si nae, ùquĩ ngue mbia ja mbei mbei rei ra. Aque sita rei Cristo rã. Cristo que siqui tuchi quia ùquĩ mbia rese ra. ⁵ Ûquĩ ataque rese que Dios ia eã tuchi riqui ra. Siqui turã eã tuchi que equia Dios rui ra. Nyebe Dios eataque iquia iquia nguiã turúquiaa.

⁶ Nandemundua sacuaã ño ùquĩ nde. Mbae icuaã osei osei eã sacuaã nande chõ ùquĩ nde. Sã ùquĩ mbae icuaã osei osei no. ⁷ Jëingochĩ nda dios abareã ndese. Sã ùquĩ ndiqui dios abareã ndese no. Sã embesa ji riqui ñee no: “Mbia que quiaru quiaru ra. Mbae abe que embei mbei ra. Aquere que nyuruqui ruqui ticuas raanguia je ra”, i que embesa ji ra. Jë nguia jëingo eã dios abareã ndese. ⁸ Ûquĩ nandei que siqui siqui ngüinisiã ndese no nda. Nyebe Dios eiquia iquia tuchi nguiã. Veintitrés mil que mano aque nyaashĩ mose ra. ¡Mbae icuaã nda nandesaã saãchĩ ùquĩ na jë! ⁹ —Ma Cristo roseĩte, nandechĩ nda mbae icuaã naa jë. Sã nandei riqui “ma Dios roseĩte” i nyii no. Sã ñi ngue eriqui mbae icuaã naa mbei cose no. Sã mbei tásie riqui eiquia iquia no. ¡Ûquĩ nandesaã saã eã tuchi chõ nguia nande jë! ¹⁰ ¡Jeñee icuaã icuãchĩ nda Dios riĩ jë! Sã ùquĩ nandei ñee icuaã icuaã nguia Dios riĩ no. Nyebe ángel nandei ñiinda iquia iquia tuchi nguiã. ¹¹ Eĩ si tuchi que nandei ñiinda quia nyii ra. Dios que embesa miĩ nandetesarei eã sacuaã nda. Mbae ua ja serĩ mose chõ Dios riqui nguiã nandembesarei eã co. ¹² —Sequirãcuã tuchi chõ se re, i mose emo, ¡sã aque riqui nyiicua tuchi quiatu jë! Mbae icuaã jeĩ nonde ee. ¹³ —¡Mbae icuaã esaã jë! i mose diablo jëje, eĩ si chõ nguiã ñee mbia ataque je. Jë miĩ je eã. Dios quia ra ucheẽ mbuchebiã mbei. Jendeaquiato bei ra diablo ñee mose jëje. Jembirãcuã ndae. Jë “nya” i sacuaã mbae icuaã je.

¹⁴ Seresenda, ¡dios raanguia rese ra jëingochĩ jë! ¹⁵ Jëaracuate rei jë ndesë. Secheẽ ndese jemaë quiatu. ¿Acheẽ ñooño se re? Acheẽ ñooño eã se reae. Jëtea quiatu. ¹⁶ Nande Santa Cena naa naa mose, Cristo ruqui mbei raanguia chõ nandeico nguiã uva rique mbei mbei. —Cristo ruqui nandembitirõ ja bei quia ã, i chõ nguiã uva rique mbei mbei. Mbichae nandesiquio quio quia eu nonde nae, Cristo roo rã ño ùquĩ nde. —Cristo roo nandembitirõ ja bei quia ã, i chõ nguiã mbichae u u. ¹⁷ Nandetubiriãte raque Jesús quiato. Nande ja chõ aque mbichae miĩ nandeu ja nguiã. Mbae miĩ na nguiatu nandeico nguiã nande ja ã. ¹⁸ Judíos rese chõ jendua. Ûquĩ sacrificio raã naa mose, sacrificio eu chõ nguiã ã. —Dios resete quia nandeico nguiã ã, i equia ã. ¹⁹ —Dios abareã mbae mo saã arondete, ae ãte raque quia co. Ae soo mbia mondo mondo quia dios abareã je, soo chõ ndaque ùquĩ. ²⁰ Mbia soo mondo mondo mose dios abareã je, Dios tuchi je eã ño eriqui nguiã emee mee. Aba checuayã icuaã je chõ eriqui nguiã emee mee. ¡Aba checuayã icuaã ndese ra jëingo jiri jirichĩ jë! ²¹ Jë mbae mbei mose aba checuayã ndese, Jesús ruqui mbei raanguia jësaã aronea ño nguiã cote. Jëquiaru quiaru mose aba checuayã nyuchua, Santa Cena jesaã aronea ño nguiã cote. ²² ¿Mbaerã jëingo Jesucristo mbupaama ite re? ¿Jëquirãcuã tuchi chõ eriqui esi jë nde?

Jesús quiato ataque rese quia jëingo ndua

²³ —Ae soo mbia mee mee nguia dios abareã je nae, ùquĩ ndese ra jëocochĩ, i ãte raque Dios nande je. Dios biãte nande mbae raã ja chooño mose. Ûquĩ ñi Dios ñee ãte raque nande je. Nande ae chõ nandeicua. Mbae mo Jesús quiato mo mundua icuã mose, ùquĩ si nandehui chõ. ²⁴ —Nande ae nandeico Dios rese, jenyechĩ nda jë. —Mbia ja quiatu nandemingo erese, jenye quiatu. ²⁵ Soo jëisichõ ño nguia mbae vender ísaa. —¿Dios abareã je co soo jemondo nyii re? jjenye chĩ nda ñee ee jël! Jëiranua mose, mbaeiaie eã ño soo jëje cote re. Jëisichõ ño nguia jëiranua. ²⁶ Jesucristo mbae chõ ibi re. Mbae ibi jenda ja abe rei embae no. Ae Jesucristo chao ja nae, ùquĩ ndei nandechiurã ja. ²⁷ —Nyao rã quiaru serese, i mose emo jëje, jëso chõ quiaru erese jësose mose. Ae ra echara mondo jëje, jëuchõ ño. —¿Co mbia mondo dios abareã je nyii re? jenyechĩ nda ee. Jëiranua mose, mbaeiaie eã ño jëje cote re. Jëiranua ño jëquiuru. ²⁸ —Co soo que mbia mondo dios abareã je ra, i mose emo jëje, jëu eã ño cote. Ae ñee jëje nae, aque mbiicua eã sacua ño jëu eã. Aque soo jëu eã cote, jëirandu mose erese. Jë eu mose, Jesús quiato ra ndua icuã icuã cote. ²⁹ Jendua icuã eã ndaque jë. Emo nguia ndua icuã arõte nguiã cote, jirandu mose jë eu rese. —¿Mbaerã nda aque soo au eã sebi mose re? i arõte jemo seje. —¿Mbaerã nda emo ñee amumbayã nde? i arõte jemo seje. ³⁰ —Se “gracias” i mose Dios je aque soo u nonde, eicuã eã ño cote reae. ¿Mbaerã nda emo ñee icuã seje re? i arõte jemo seje. —¿Mbaerã nda au eã eicuã eã mose re? i arõte jemo seje.

³¹ ã ndese chõ jendua. Ae nandesaã saã nguia nae, Dios je chõ nandesaã. Ae nandeu ndeu quia mbae nae, Dios je chõ nandeu. Ae nandembei mbei quia mbae nae, Dios je chõ nandembei no. Mbia ra ñee turã Dios je, nandeico turã mose. ³² ¿Mbia ra jemundua ata atate chĩ jël! —ã icuã ereae, i mose emo jëje, jũquĩ nda jësaãchĩ jël! Jë eraã mose, ùquĩ nda ndua icuã Jesús rese cote. Judíos. Judíos eã abe. Jesús quiato abe. Ûquĩ ndua icuã arõ Dios rese, jë eraã mose. ³³ —Se ae taico Dios rese, ae ãte quia co. —Mbia ja quiatu tamingo erese, ae quia co. Dios mbia rirõ sacua eicuã si. Mbia siqui bei sacua Dios rese.

11

¹ Se rã si chõ jëingo. Sã aico Cristo rã si se no.

Eĩ jenye chõ nguia u ñumunua nua mose, i Pablo cuña je

² Acheẽ turãte quia jeni co. Jendua beite quiatu quia serese. Acheẽ ngue jëje nyii, ùquĩ jemumbayã mbeite quia secheẽ ùquĩ. ³ Ae ra ambesa jëje namo, jũquĩ jëicua tuchi quiatu jël! Cristo rei hombre ja rerecua. Hombre rei ngüinisi rerecua no. Sã Dios Cristo rerecua no. ⁴ Mbia ñumunua mose, sã hombre mo ñee eã Dios je huiite sucha resebe. Sã eãquĩ nyecua chõ siqui Dios cheẽ nenei nenei. Uãquĩ ati mose, aba ireĩte ùquĩ. ⁵ Mbia ñumunua mose, sã cuña mo ñee eã Dios je huiite suchayã. Sã cuña ãquĩ ati ji chõ siqui Dios cheẽ nenei nenei. Cuña uãquĩ ati eã mose, aba ireĩte ùquĩ. Uãquĩ huĩ na ño eriqui nguiã uãquĩ ati eã no. ⁶ Cuña mo uãquĩ ati sereã mose, sã uãquĩ huĩ tuchi quiatu no. Eireĩ mose uãquĩ huĩ, sã uãquĩ ati quiatu ua sia rocoĩ no. ⁷ Hombre mo nguia uãquĩ chati aroneate nguiã Dios cheẽ nenei nenei. Dios quiatu ngue hombre chao nguiã umbaerã. Aquere que cuña mo ao hombre mbaerã cote ra. ⁸ Cuña ndoquieĩ je eã ño ngue Dios hombre ao nguiã. Hombre roquieĩ je quiatu ngue Dios cuña mo ao nguiã. ⁹ Cuña chirecorã eã ño ngue Dios hombre ao nguiã. Hombre chirecorã nguiatu ngue Dios cuña ao nguiã. ¹⁰ Nyebe ra cuña uãquĩ ati quiatu. —Seru chõ sererecua re, i chõ nguiã uãquĩ ati. Angeles quia maete nguiã erese. ¹¹ Jesucristo quiato ja chõ nande re. Hombre achõ nda siqui turã eã cuña eã mose. Cuña achõ nda siqui turã eã hombre eã mose no. ¹² Hombre roquieĩ je chõ ngue Dios cuña ao rei nguiã nyii. Cuña abe riqui tiirĩ irĩ hombre co cote. Dios chiao ja chõ ñene. Cuña. Hombre abe. ¹³ Jë ae chõ jendua mae erese. Eicuãte cuña ãquĩ ati iriã ñee Dios je. ¹⁴ Hombre a boco mo siqui mose, aba ireĩte ùquĩ. —Eicuãte ùquĩ, i ja tuchi mbiamo ñooñoa nguia ùquĩ je ã. ¹⁵ Cuña mo nguiatu ea boco siqui mose, ùquĩ nguia earõte re. Ea boco que Dios mee ee ra. Eãquĩ ati sacua. ¹⁶ —Cuña a boco sebiã, i mose jemo, sã ndua

chō Jesús quiato ataque rese. —Sã cuña a boco riquichō, i ja chō Jesús quiato nguiã serese ũquĩ.

Jenyao chaochĩ nda Santa Cena u mose jẽ

¹⁷ —Santa Cena naa icuã icuã ño ngue equia ñumunua nua nda, i que mbia mo sembiirandu jeni nda. Nyebe seya eãte riqui nguiã jendese. ¹⁸ —Hue rĩ ja eã eriqui ndua ndua ñumunua nua mose ũquĩ, i que emo sembiirandu jeni nda. —Ichõĩño eã ereae, ae sequia ndua ndua co. ¹⁹ Jeñimbuchao chao chõchĩ equia ũquĩ. Mbia Jesús quiato tuchi icua sacuã ño jeñimbuchao chao nguiã. ²⁰ Santa Cena naa naa mose, abei chiã tuchi chõ jẽingo nguiã jenyue ũquĩ. Eĩ eã tuchi que Jesucristo nandembaaquiato ra. ²¹ —Se rane sembae tau ja, jenyee jaaja chõchĩ nguiã Santa Cena naa naa ũquĩ. Mbae mee ndocoĩ emo je. Nyebe mbaecha riqui nguiã quiaru tuchi. Mbae mbei tuchi no. Mbaecha reã niacuã mose. ²² Jẽquiaru tuchi mose Santa Cena, jẽingo icuã ño nguiã Jesús quiato ataque je ũquĩ. Mbaecha reã ireĩ ireĩ ño nguiã jẽsi ũquĩ. ¿Mañi ae ra ñee jẽje re? Eicuãte ũquĩ ndesẽ. Jenyuchua ae ae rei jẽquiaru sacuã ndesẽ.

Jesús quiaru mose uchimbãaquiato rese

²³ Jesucristo ae sí que sembaaquiato ra. Ñ ngue asenei ndei jẽje nyii resẽ: Judas Jesucristo reacuquia nonde mbia icuã je, aque isa sí que Jesucristo mbichae sirõ nda. ²⁴ Gracias, i que ñee Dios je cote ra. Mbichae que esiquio uchimbãaquiato je cote ra. —¡Co jẽ! Jẽu. Serete rã ño mbichae riquio ji co re. Jeni ño nda serete riquio ji cote. Co jẽu mose, jendua ndua bei quia serese, i que Jesús mbichae mondo ee ra. ²⁵ Quiaru jare que Jesús eyuquia rirõ cote ra. Ñee ngue uchimbãaquiato je cote ra. —Seruqui rã ño uva rique co re. Mbia icuã mbutiã sacuã tuchi chõ seruqui re. Dios cheẽ yasu rui si chõ seruqui riqui nguiã mbia icuã mbutiã co. Co mbei mbei mose, jendua ndua bei quia serese, i que Jesús ee ra. ²⁶ Jẽ co mbichae u mose, jẽ uva rique mbei mose, Santa Cena, i chõ nguiã ũquĩ je. Jẽ Santa Cena naa naa mose, Jesucristo mano nenei nenei ño nguiã mbia je ũquĩ. Santa Cena jẽsaã saã mbei quia Jesucristo tu mose chee.

Jendua tuchi Jesús rete rese Santa Cena u mose

²⁷ Emo Santa Cena naa icuã icuã mose, ũquĩ siqui icuã icuã ño nguiã Jesucristo rete je ũquĩ. ũquĩ siqui icuã icuã ño nguiã Jesucristo ruqui je ũquĩ no. ²⁸ Nyebe nandendua ndua tuchi quiato quia Santa Cena naa nonde. ²⁹ Emo Santa Cena naa icuã icuã mose, emo ndua eã mose Jesucristo rete rese, ũquĩ nda Dios mbasi. ³⁰ ũquĩ je chõ jendasi rasi bei riqui nguiã. ũquĩ je chõ jẽingo nguiã mano mano tuchi. ³¹ Nande ae nandereco nandeicua jiri ae. Eĩ nda Dios nandembasiã cote. ³² Jesucristo nandembasi mose, nandemundua sacuã ño ũquĩ nde. Nandembitirõ sacuã ño cote re. Dios nandemombo eã sacuã tata cuasu chõ ũquĩ nde. Jesús quiatoã mombo mose tata cuasu.

³³ Nyebe aico nguiã ñee nyecua jẽje co. Jẽ Santa Cena naa naa mose, jeñumunua nua turã ño. Jẽingo turã ño jenyue. Jenyisaarõ turã ja chõ Santa Cena u nonde. ³⁴ Jemo niacuã siqui mose, sã quiaru uchuchua, Santa Cena naa nonde. Eĩ jenyee mose, Dios ra siqui turã jẽje cote, jeñumunua nua mose. Seso mose jendea ra secheẽ ataque asenei jẽje cote.

12

Espíritu Turã ño nandechisaã saã sacuã mondo nguiã nande ae ae je

¹ Espiritu Turã ngue mbae mee jaaja nande ae ae je ra. —Co esaã nde, co rese eico nde, i jaaja que nande je ra. ũquĩ ndese taembiirandu cote. ² Dios abareã ndese que jẽingo tuchi nyii ra. Mbia que jemingo tuchi dios abareã tubiriã ndese nyii ra. Dios abareã aba cheẽ andu aroneãte. ũquĩ jẽingo Jesucristo rese ũquĩ cote. ³ Ñ ndese jendua tuchi: — Jesús icuãte riqui Dios je co, i mose emo, echeẽ ae chõ ũquĩ nde. Espiritu Turã embucheẽ

eã ño nguiã ùquĩ. —Jesús rei Dios tuchi, i mose emo, echeẽ ae eã ño ùquĩ nde. Espíritu Turã ño embucheẽ nguiã ùquĩ.

⁴⁻⁶ —Co esaã nde, co rese eico nde, i jaaja que Dios nande ae ae je ra. Espíritu Turã mii ño siqui bei nguiã nande ja rese co. Jesucristo mii ño siqui nguiã nanderese co. Jesucristo mo eãte emo. Dios mii ño siqui nguiã nandembuquirãcuã co no. Dios mo eãte emo. ⁷ Espíritu Turã uquirãcuã teacuquia chõ nguiã nande ae ae je co. Nandeico turã ja tuchi sacua Dios rese. ⁸ Espíritu Turã mii ño siqui nguiã co. Hue rĩ ja eã ño eriqui nguiã uquirãcuã mee nande je. —Nde ra erecheẽ aracua bei quia, i chõ nguiã nandemo je. —Nde ra mbia erembaaquiatu turã mbei quia, i chõ nguiã nandemo je no. ⁹ —Jesucristo ra ereicua tuchi quia nde, i chõ nguiã nandemo je co no. —Mbia rasi ra erembucherõ cherõ mbei quia nde, i chõ nguiã nandemo je co no. ¹⁰ —Mbia mae sayã nda eresaã saã mbei quia nde, i chõ nguiã nandemo je co no. —Dios cheẽ nda eresenei senei tuchi quia mbia je nde, i chõ nguiã nandemo je co no. —Espíritu eicua icua bei quia nde. Etura icua. Eicua abe icua no, i chõ nguiã nandemo je co no. —Mbiamo ñee esaã saã tuchi quia nde. Mbia cheẽ chumumbara, i chõ nguiã nandemo je co no. —Mbia cheẽ mo eicua icua quia mbia je, i chõ nguiã nandemo je co no. ¹¹ Eĩ ño Espíritu Turã mii nguiã ucheẽ mbuchao chao nande je co. Nandechisaã saã sacua mee mee nande ae ae je co. Eĩ ño Espíritu Turã mii nguiã uquirãcuã mbuchao chao nande je co no. —Co esaã nde, co esaã nde no, i chõ nguiã nande ae ae je co.

Mbae mii na ño nandeico nguiã nande ja

¹² Jesús rete rã ño nandeico nguiã nande ã. Nande tubiriãte raque Jesús quiato. Sã aba rete resenda tubiriãte no. Eresa. Erie. Eo. Erete mii ndaque. Eĩ ño nande no nde. Jesús rete mii na. ¹³ Jesús rete rã ja chõ nande re. Erete mii na ño nande ja re. Judíos mo ño nandeico nguiã nande ã. Judíos eã abe mo ño nandeico nguiã ã no. Mbia rimba mo abe abe nandeico ã no. Mbia rimba eã mo abe abe nandeico ã no. Mbae mii na ño nandeico nguiã Jesús quiato ja ã. Erete mii na. Eĩ ño Espíritu Turã mii nguiã nandemingo ã.

¹⁴ Nanderete mii ae siqui ãte. Nanderete resenda tubiriãte riqui ã. ¹⁵ Nandei achõ ñee aroneate. —Eo eã ñochĩ se. Nyebe erete resenda eã se re, i aroneate nandei ñee. Nanderete resenda bei chõ nandei re. ¹⁶ Nandeisa achõ ñee aroneate. —Eresa eã ñochĩ se. Nyebe erete resenda eã se re, i aroneate nandeisa ñee. Nanderete resenda bei chõ nandeisa re. ¹⁷ Nanderesa achõ mose nanderete resenda, ñ nda nandeico rei mbae anuate co. Nandeisa achõ mose nanderete resenda, ñ nda nandeico rei mbae retõ ãte co. ¹⁸ Dios ae que nanderete resenda mii ja ja cose ra. —Co tamiã a, co abe tamiã a no, i jaaja que nanderete resenda mii mii nda. ¹⁹ Nanderete resenda mii mose, eĩ ndei ra nanderete eãte. ²⁰ Nanderete resenda ja que Dios mee nande je ra. Nanderete resenda tubiriãte raque. Nanderete mii tuchi chõ ñene. ²¹ —Arerecoã nda se, i aroneate nanderesa ñee nandeo je. —Arerecoã nda se, i aroneate nandeaquĩ nandei je no. ²² Ae nanderete resenda ñetẽ tuchi nae, ae nanderete resenda quirãcuã nea tuchi nae, ùquĩ nguiarei nandechireco tuchi. ²³ Ae nanderete resenda aba ireĩte nae, ùquĩ nandetea quiatu chõ nguiã. Nandechati turã ño nguiã. ²⁴ Ae nanderete resenda checuate riqui nae, ùquĩ nguiatu nandechatiã nguiã. Dios que nanderete resenda saã turã ja ra. Ae nanderete resenda aba ireĩte nae, ùquĩ quiatu aba queteamba re. ²⁵ Nyebe nanderete resenda riqui nguiã ñee aroneate nanderete resenda nongue je. —Arerecoã nda se, i aroneate ee. Nyebe nanderete resenda riqui nguiã siqui turã ja nyiese. ²⁶ Nanderete resenda mo ndasi mose, nanderete mbasi ja chõ nguiã. Nande ñee turã mose nanderete resenda mo je, nanderete ia ja tuchi ra erese.

²⁷ ã ño secheẽ tuchi ã nde: Cristo rete rã ño nandeico ja nguiã nande ã. Cristo rete resenda rã ja chõ nandeico nguiã nande ae ae ã. ²⁸ —Co esaã nde, co rese eico nde, i jaaja chõ Dios nguiã iglesia jenda uquiato je ã. —Cristo chimbaaquiatu tuchi chõ nde re, i chõ nguiã emo je. —Secheẽ nenei neneisa chõ nde re, i chõ nguiã emo je no. —Mbia mbaaquiatusa chõ nde re, i chõ nguiã emo je no. —Mbia mae sayã esaã saã nguiã nde, i

chõ nguiã emo je no. —Mbia rasi embucherõ cherõ nguia nde, i chõ nguiã emo je no. —Ayudante eico nde, i chõ nguiã emo je no. —Iglesia rerecuarã nde, i chõ nguiã emo je no. —Mbia cheemo esaã saã nguia nde, i chõ nguiã emo je no. ²⁹ Cristo chimbaaquiatu ja eã ño nande re. Dios cheẽ nenei neneisa ja eã ño nande no nde. Mbia mbaaquiatu ja eã ño nande no nde. Mbia mae sayã naa naasa ja eã ño nande no nde. ³⁰ Mbia rasi mbucherõ cherõsa ja eã ño nande no nde. Mbia cheemo naa naasa ja eã ño nande no nde. Mbia cheemo mbiassa asasa ja eã ño nande no nde. ³¹ Nandechẽ ño Dios je. —Ndequirãcuã emee na seje. Ae je erecheẽ ñee ure je, eĩ nda ùquĩ mo asaã saã se abe, nande quia ñee Dios je. Mbae turã tuchi mo tasenei na jẽje.

13

Nandechesecua eã mose, Dios chirirõ ño nande re

¹ Se nyeseccua eã mose mbia rese, secheẽ ñru ñru beite ra eriqui. Mbia cheẽ nda aicua ja raque. Angeles cheẽ abe ra aicua raque no. ² Se nyeseccua eã mose mbia rese, mbae turã mo naasa eã ño se re. Dios cheẽ nda ambuchecua checua tuchi raque. Se ra mbae aicua ja raque. Se ra Dios aicua tuchi raque. Ibi ibate mo nda arusuri raque Dios quirãcuã je. ³ Se nyeseccua eã mose mbia rese, aico chooño mbei chõ nda se. Sembae ra amee ja raque mbia mbaecha reã je. Mbia ra serei raque, se Dios cheẽ nenei nenei mose.

⁴ Ae nyeseccuate quia mbia rese nae, ùquĩ nguia siqui minguete nguiã mbia je ã. Ùquĩ nguia eturãte riqui nguiã mbia je co. Ùquĩ nguia mae icuã icuã eãte nguiã emo mbae rese ã. Ùquĩ nguia “seaquiatu tuchite se”, iãte nguiã co. ⁵ Ae nyeseccua quia mbia rese nae, ùquĩ nguia “se quiatu”, iãte nguiã mbae mo je. Ae aba ireĩte nae, ùquĩ mo esaã saã eãte quia co. Ae nyeseccua quia mbia rese nae, ùquĩ nguia paama i jei jei eãte nguiã ã. Ùquĩ nguia ndua icuã icuã eãte nguiã emo icuã mose ee ã. ⁶ Ae nyeseccua quia mbia rese nae, ùquĩ nguia eya eãte riqui nguiã, emo mbae icuã naa mose ã. Emo mbae turã naa mose quia eyate riqui nguiã ã. ⁷ Ae nyeseccua quia mbia rese nae, ùquĩ ñimbirãcuã ño nguiã mbae ja je ã. —Hchõñõ nguiã, iã ño nguiã mbia cheẽ je. Siqui tochi chõ nguiã.

⁸ Dios quiato ra nyeseccua bei mbia rese, mbae ua ja chee. Dios cheẽ nda nandesenei senei eã emo mose cote. Mbia cheẽ ata mo nda nandesã eã emo mose cote. Mbia mbaaquiatu mo eã nda emo mose cote. Ùquĩ nda ua ja chee. Dios quiato quiatu ra nyeseccua bei quia. ⁹⁻¹⁰ Mbae mii mii ño nandeicua icua nguiã namo ã. Jesús tu mose quia ra mbae mii nandeicua eã cote. Dios cheẽ miite nandesenei senei nguia namo ã. Jesús tu mose quia ra mbae nandeicua ja cote. ¹¹ Señetẽ mose que aico ñee ñee mbia riirĩ na nda. Mbia riirĩ na ño ngue aico ndua ndua señetẽ mose ra. Mbae que aicua icua chõ nguia mbia riirĩ na no nda. Secuasu mose que señetẽ mosenda asecha ja cote ra. ¹² Mbae cuu rese mae naanguia chõ nandeico nguiã mae namo. Jesús tu mose quiatu ra mbae checua ja nande je cote. Mbae mii mii ño aicua icua nguiã namo co. Jesús tu mose quia ra mbae aicua ja cote. ¹³ ã nandeico Dios icuate ã. ã nandeico Jesucristo ru raarõ arõ ã. ã nandeico nyeseccua jate mbia rese ã. Nandechesecua mose quiarei, ùquĩ eturã tuchi mbae ja si.

14

Mbiamo cheẽ naa naa mose

¹ Jnyeseccuase tuchi quiatu quia mbia rese jẽ! Jeñee ño nguia Dios je. —Paba, ndequirãcuã emee na seje. Mbae raã naa sacua ndeje, jenyẽ bei chõ nguia Dios je. —Ndecheẽ asenei senei sete ndequirãcuã je, jenyẽ chõ nguia ee. ² Jesús quiato mo mbiamo cheẽ naa naa mose, mbia ra eicuayã jate. Dios mii ño nda eicua nguiã. Dios mii je chõ eriqui nguiã ñee. Uchue si chõ eriqui nguiã ñee. Mbia quia echeẽ icuayãte nguiã. ³ Ae Dios cheẽ senei senei nguia, ùquĩ nguia ñee nyecuate nguiã mbia je. Ùquĩ nguia mbia mbaaracua turãte nguiã Jesucristo riĩ. Ùquĩ nguia mbia mingo uquia tuchi nguiã Jesucristo rese no. Ùquĩ nguia mbia mbia tuchi nguiã Jesucristo rese no. ⁴ Ae mbiamo

cheẽ saã saã nguia nae, mbia mingo uquia reã ño nguia Jesucristo rese. Ae ae umingo uquia nguiaã erese. Ae Dios cheẽ senei senei nguia nae, ùquĩ nguia Jesús quiato mingo uquiate nguiaã Jesús rese. ⁵ Mbiamo cheẽ nda jësaã aquiatu ja raquete seje chã. Dios cheẽ nenei nenei aquiatu mose, ùquĩ nguia eturã tuchi re. Ùquĩ nguia eturã tuchi mbiamo cheẽ naa naa si re. Ae mbiamo cheẽ saã saã nguia nae, aque ucheẽ mbiasa mose Jesús quiato je, eturã ño ùquĩ no nde. Jesús quiato mingo uquia chõ nguiaã Jesús rese ùquĩ.

⁶ Se mbiamo cheẽ naa naa mose jêje, ùquĩ nda jemingo uquia reãte Dios rese. Se ñee nyecua mose jêje, ùquĩ nguia eturãte re. Ae rese Dios sembiirandu nae, ùquĩ nenei nenei mose jêje, ùquĩ nguia eturãte re. Se Dios cheẽ mbuchecua tuchi mose jêje, ùquĩ nguia eturãte no nde. Se Dios cheẽ icua icua tuchi mose jêje, ùquĩ nguia eturãte no nde. Mbiamo cheẽ naa naa si. ⁷ Sã música no. Emo flauta mbucheẽ icuã icuã mose, mbia ra tonada icuayãte. Emo guitarra mbucheẽ icuã icuã mose, mbia ra tonada icuayã no. ⁸ Sã soldados no. Emo corneta mbucheẽ icuã icuã mose, soldados ra icoquiataũ. ⁹ Eĩ si chõ jê no nde. Jê mbiamo cheẽ naa naa mose, mbia ra jeñee icuayãte. Jê mbiamo cheẽ naa naa mose, mbia eãsa ñee ñee na ño ùquĩ nde. ¹⁰ Mbia cheẽ ñumumbarate eriqui rei. Ucheẽ ae raã naa mose, echecuate ee. ¹¹ Emo ucheẽ naa naa mose seje, se eicuayã mose, mbiamo ño aico nguiaã ee. Mbiamo ño ae riqui nguiaã seje no. ¹² Espiritu Turã quirãcuã jenyosei tuchi quia reae. Coche tuchi chõ ùquĩ nde. Jesús quiato mingo tuchi sacuã Jesús rese chõ eqirãcuã jenyosei jê.

¹³ Nde mbiamo cheẽ naa naa mose Jesús quiato je, echeẽ na Dios je. —Paba, ndequirãcuã emee na seje. Secheẽ mbiasa sacuã mbia je, ere chõ Dios je. ¹⁴ Se mbiamo cheẽ naa mose Dios je, acheẽ ñee ndaque Dios je. Mañi ae quiatu ñi se quia ñee ee. ¹⁵ Mbiamo cheẽ abe ra asaã saã ndaque Dios je. Secheẽ abe ra asaã saã ee no. Mbia secheẽ icua ja sacuã. Mbiamo cheẽ abe ra asaã saã se irasei rasei mose. Secheẽ abe ra asaã saã se irasei rasei mose no. ¹⁶ Nde mbiamo cheẽ naa naa mose Dios je, mbia ra ndecheẽ icuayãte. Ae eaquiataũte, ùquĩ nda ndecheẽ icuayãte. Nyebe eriqui nguiaã ñee aroneate Dios je nderese. Nyebe nandechẽ sÍ chõ nandesaã Dios je. ¹⁷ Coche jëingo nguiaã ñee Dios je. Jeñee sÍ quia nda aba saã Dios je re. Jê mbiamo cheẽ naa naa mose ee, jendesenda quia nda jeñee icuayãte nguiaã. Ùquĩ mose ra jendesenda jemingo uquia reãte Jesús rese. ¹⁸ Mbiamo cheẽ aicua tuchite raque quia jësi co. Gracias, aete raque quia Dios je ùquĩ ñi co. ¹⁹ Dios quiato ñumunua mose, acheẽ nyecuase rete ee. Secheẽ jua chõ ndaque. Cinco palabras. Mbiamo cheẽ nda asaã eã ee. Mbiamo cheẽ icuayãte quia ñene. Emo nda ñee oco raque ee, icuayãte rae.

²⁰ Mbia riiri naate ra jëingochĩ, Seresenda. Jendua quiatu secheẽ ndese mbia cuasu rã. Coche jëingo nguiaã mbia riiri na mbae icuã naa ndocoĩ. ²¹ ã ndei Dios cheẽ mbesa ji ã: Mbiamo tamondo rei secheẽ nenei nenei sacuã ã serimba je. Secheẽ nda esenei senei ndei serimba je mbiamo cheẽ je. Aquere ra serimba secheẽ mumba i i tuchi querabe, i que Dios ra, i que embesa ji ra. ²² Jemo mbiamo cheẽ naa naa mose, Jesús quiatoã mundua sacuã Dios rese chõ ùquĩ nde. Jê Dios cheẽ nenei nenei mose, Jesús quiato mundua sacuã ño Dios rese chõ ùquĩ no nde. ²³ Jesús quiato ñumunua nua mose u, sã mbiamo cheẽ naa naa ja eã u. Jê mbiamo cheẽ naa naa ja mose ra Jesús quiatoã ñee jêje. “Earacuayã” i ra ique mose mae jendese. ²⁴ Coche jëingo nguiaã Dios cheẽ nenei nenei ja jeñumunua mose. Jesús quiatoã mo ique mose jendea, ndua ndua tuchi ra huicuã ndese. —Seicuã tuchi chõ aico se re, i ra jeñee andu mose. ²⁵ Ae rese ndua ndua uchiangui renda icuã nae, Espiritu Turã ae ra ùquĩ mbuchecua checua nguiaã ee. Nyebe ra ngoi nguiaã ndese ñee turã Dios je. —Dios riqui tuchi jendese a, i ra ñee jêje.

Mbae jësaã turã turã ja chõ nguia jeñumunua nua mose

²⁶ —Eĩ jenyẽ quiatu quia ñumunua Jesús riĩ, ae ra jêje cote. Emo irasei rasei. Emo mbia mbaaquiato quiatu Jesús riĩ. Emo Dios cheẽ icua icua mbia je no. Emo mbiamo

cheẽ naa naa no. Emo mbiamo cheẽ mbiassa asa ee no. Jenyuuru uru chõ nguia. Mbia mingo ja sacua Dios rese chõ ùquĩ nde. ²⁷ Mbiamo cheẽ jẽsaã saã mose ñumunua mose, jẽ nyeremoño ño jeñee ñee. Jenyuuru uru chõ nguia. Sã emo ndiqui echeẽ mbiassa asa. ²⁸ Jemo echeemo mbiassa aquiataã mose, mbiamo cheẽ nda jẽsaã saãchĩ, jeñumunua mose. Jeñumunua eã mose quiatu mbiamo cheẽ jẽsaã saã jẽ ae Dios je. ²⁹ Ae ra Dios cheẽ senei senei mbia chumunua mose nae, sã nyeremoño ño ñee. Sã eataque ndua ndua ùquĩ ñee ndese. Eĩ ngue ra, i sacua. Eĩ eã ngue ra, i sacua abe echeẽ icua mose no. ³⁰ Emo chĩ mose Jesús quiato ataque mbaa quiatu quiatu, emo nda ñeechĩ echeẽ cúaa. —Nde abe ã embuchecua mbia je, i mose Dios emo je, sã ñiinda ñee ja rã nyii. ³¹ —Nde abe ã embuchecua mbia je, i mose Dios jemo je, jenyuuru uru chõ nguia ñee. Mbia Dios cheẽ icua ja sacua. Mbia siqui tuchi sacua Dios rese. ³² —Nde abe ã embuchecua mbia je, i mose Dios emo je, sã emo ndaarõ mbirĩ na huĩ, emo chĩ mose Dios cheẽ nenei nenei. ³³ Jemo ñee mose jenongue cheẽ cúaa, Dios biãte ùquĩ. Jeñee turã mose nyuuru uru, ùquĩ nguia Dios bite re. Eĩ ja chõ Dios quiato nguiã iglesia jenda ja. ³⁴ Jeñumunua nua mose Dios rĩĩ, cuña mo nda ñeechĩ. Eĩ si que Moisés chimbasa no nda. Sã cuña ndiqui mbia cheẽ mumbayã mbei. ³⁵ —Ùquĩ embuchecua seje, i aroneate cuña ñee mbia chumunua mose. Uchuchua quia cuña ñee ngu je, ñimbaaquiatusa mose. Cuña mo ñee aroneate Jesús quiato chumunua nua ite re. ³⁶ —Ichõĩño nguiã ¿jenye quia secheẽ mose re? Jẽ nane je eã ngue Dios ñee ndesẽ. Jẽ mii je eã ngue Dios ñee ndesẽ.

³⁷ Secheẽ ae eã ambesa nguiã jẽje co. Dios cheẽ ño ambesa nguiã jẽje. —Dios que uquirãcuã mee seje ra. Ucheẽ nenei nenei sacua, i mose jemo ñee, sã ùquĩ nane ñee serĩ. —Dios cheẽ tuchi chõ Pablo senei senei nguiã, sã i serĩ. ³⁸ Ùquĩ secheẽ isi sereã mose, jẽhui chõ esi. Sã eaquiataã ae riqui. ³⁹ ¡Dios cheẽ jẽsenei seneise tuchi quiatu jẽ! Jemo mbiamo cheẽ naa naa mose ¡echeẽ nda jẽsiquisã quisãchĩ jẽ! ⁴⁰ ¡Mbae jẽsaã turã turã ja chõ nguia jeñumunua nua mose jẽ! Jenyuuru uru turã ño nguia.

15

Cristo quera si mose

¹ Dios cheẽ turã ngue asenei senei nguia jẽje Jesucristo rĩĩ nae, ùquĩ sí rese chõ aico nguiã jemundua ndua co. Ùquĩ ngue jẽisi turãte. Jẽingo beite ùquĩ ndese ùquĩ. ² Ùquĩ ndiqui jemingo beite ùquĩ, jẽtesareĩã mose secheẽ si. Ùquĩ jẽingo Jesucristo icua iruã ùquĩ. ³ Ae Dios senei senei seje nae, ùquĩ nane ngue asenei senei jẽje ra: Jesucristo que mano nandeicua ndiquicharõ. Embesa ji cheẽ nguire. ⁴ Mbia que echati rei. Tres días mose que quera si. Embesa ji cheẽ nguire. ⁵ Quera si mose que nyecua Pedro je. Aquere que nyecua uchimbaaquiato doce je cote. ⁶ Quinientos uquiato je que nyecua cote. Hue equiato chi ja mose ñumunua. Ùquĩ tubiriãte riqui ã. Emo emo ngue mano nda. ⁷ Nyecua que Jacobo abe je cote no. Aquere que nyecua uchimbaaquiato jaje cote. ⁸ Nyecua nyecua jare mbia je que nyecua chee se abe je cote ra. Sã cuña ndiqui erã mo mbua no, ùquĩ na si chõ aico rei nguiã se co. ⁹ Se quia señetẽ jiri riqui nguiã Jesús chimbaaquiato ataque si co. —Jesús chimbaaquiato chõ se re, ae eã jiri quia co. Seicua tuchi quiatu ngue Dios quiato je nyii re. ¹⁰ Dios turã ae semingo turã nguiã co cote. Dios turã ñooño eã ño eriqui nguiã seje co. Se abe que serecoteã jiri riqui nguiã Jesús rese echimbaaquiato ataque si ra. Mbae raã naa Jesús je. Se ae eã ño ngue aico nguiã mbae rese. Dios turã ae ngue semingo nguiã mbae rese. ¹¹ —Aba Dios cheẽ senei senei tuchite quia reae, ure ãte equia co. Ùquĩ ñene. Uresenei senei ja chõ equia ã ndesẽ. Jẽ ngue urechisenei senei jẽisi turãte quia resẽ.

Mbia raaque quera si mose

¹² —Cristo que quera si manonde ra, ure que equia erenei nenei jẽje. Urecheẽ ngue jẽisi turã ndei nyii. ¿Mbaerã jemo ndiqui ñee cote re? —Mbia raaque ra querayã mbei, i cote re. ¹³ ¿Cristo raaque bei namo nde? —Mbia raaque ra querayã mbei, jenyee mose, ¿mañi

Cristo raaque quera re no? ¹⁴ Cristo raaque quera si eã mose, eĩ nda ureico rei echeẽ nenei nenei iru chõ. Eĩ nda Jesucristo jëicua iru chõ ndei. ¹⁵ Cristo raaque quera si eã mose, eĩ nda ureico rei ñee ñooño Dios riĩ mbia je. —Dios que Cristo mbuquera si ra, ure bei equia ã ndesẽ. Mbia raaque quera si eã mose, iĩ nda Dios Jesucristo raaque mbuquera si eã ndei no. ¹⁶ Mbia raaque querayã mose, eĩ nda Cristo raaque quera eãte rei no. ¹⁷ Cristo raaque quera eã mose, eĩ nda jëingo rei Cristo icua iru no. Eĩ nda jëingo rei jëicuã nderequia beite no. ¹⁸ Eĩ nda Cristo quiato quiachã mbei rei manonde no. ¹⁹ A miĩ eã ño Cristo riqui nguiã nanderese. Nandemanonde abe ra eriqui bei nanderese no. A miĩ mose, eĩ nda nandeya eã tuchite riqui rei mbia mo si no. ²⁰ Cristo que quera si ra. Ae bei tuchi. Ae rane ngue quera nyii ra. Nyebe ra mbia abe quera si eraã si cote no. ²¹ Adán miĩ nane ngue mano huiicua je cose ra. Nyebe nandeico nguiã mano mano mbei cote. Eĩ si chõ Cristo miĩ quera si nguiã cote. Nyebe ra uquiato mbuquera si ja cote. ²² Sã nandeico mano mano ja Adán ndui ã no, eĩ si ra Cristo nandembuquera quera no. ²³ Dios que Cristo rane mbuquera nandesì ra. Cristo tube mose, uquiato raaque ra embuquera ja cote. ²⁴ Cristo tube mose ra mbae ibi jenda ua ja cote. Mbia mo nda siquã ererecua cote. Cristo ra mbae mee ja Dios je cote. Cristo ra mbia rerecua mbutiã ja cote. ²⁵ Ererecuarã tuchi ra Cristo cote. Uquiatoã nda embuquiachã ja tuchi chee cote, ae siqui mose ererecuarã. ²⁶ Mbia mano mano mose, Cristo biãte ùquĩ. Ùquĩ abe ra Cristo mbuquiachã tuchi mbia si cote. Mbae icuã ataque ra embuquiachã ja rã nyii. ²⁷ Dios que mbae mee ja Cristo je ra. Cristo mbae rerecua ja tuchi sacua. —Cristo ra mbae rerecua ja tuchi, i ñi embesa ji re. Dios rerecua eã ndaque. Mbae ja rerecua chõ nda Cristo. ²⁸ Dios mbae mee ja mose Cristo je, Cristo ra ñimee Dios je cote no. Eriirite quia ñene. Eĩ nda Dios mbia rerecua ja tuchi cote.

²⁹ Emo emo ño bautizar i nguiã eraaque riĩ ùquĩ. Eraaque quera si eã mose ¿mbaerã ùquĩ ndiqui bautizar i eraaque riĩ nde? ³⁰ Mbia raaque quera eã mose, eĩ nda ureico rei Dios cheẽ nenei nenei ãte mbia je co. Eĩ nda mbia riqui rei ureiquia serĩ serĩ ãte. ³¹ Mbia “taiquia” i bei beite quia seje ã. Acheẽ ñooño eãte jëje. Sã seyate riqui jendese co no. ³² Nyacua rã tuchi que Efeso jenda riqui seje ra. Ùquĩ ngue asiquisã tuchi rei quia ñee nda. Eĩ nda asiquisã quisã iru rei no, mbia raaque quera eã mose. Mbia raaque quera eã mose, eĩ nda nandeico rei ñee. —Mbae nandembei choño. Mbae nandeu choño. Mano mbei cote, i. ³³ —Eĩ jenye quiatu ¡ichĩ nda mbia jembiiĩ irĩ jẽ! Jeingo mose mbia icuã ndese, jembiiicua icuã nda jẽ abe cote. ³⁴ Jendua quiatu. Mbae turã nguiatu jësaã saã nguia. Mbae icuã jësaã eã nguiatu quia. Jemo emo ndiqui Dios icuayãte ùquĩ. Aba ireĩ tuchi quiarei ùquĩ.

Jesús quiato rete yasu ja ra cote

³⁵ Jemo nda ñee ndei. —¿Mañi nda eraaque quera si re? ¿Mañi nda erete cote re? i ra jemo ñee ndeae. ³⁶ Ndua eã ño nguiã ùquĩ. Sã nandeico mbae eĩ tiquia no. Mbae eĩ nda soõ suri sacua cote. Eĩ si chõ nda nanderete soõ nandemano mose. Nanderete yasu sacua cote. ³⁷ Sã nandeico mbae eĩ tiquia no. Ei ra nandechitiquiyã. Ieĩ achõ ño nandechitiquia nguiã. Quiata a eĩ. Mbaemo eĩ abe no. Ei quia nda suri nguiã cote. ³⁸ —Iĩ ño nda ndei, i chõ Dios nguiã mbae eĩ jaje. ³⁹ Nanderete rã ño mbae eĩ nde. Eĩ ja eã ño mbae rete re. Emo ño mbia rete no nde. Emo ño quiaa riinda rete no nde. Ae mbebe quia, erete ae chõ ùquĩ no nde. Sira ae erete mo no nde. ⁴⁰ Ibatenda ae rei erete mo no. Ibi jenda ae erete mo no. Ibatenda ae rei erete turã mo no. Ibi jenda ae rei erete turã mo no. Eĩ ja eã ño mbae rete re. ⁴¹ Nyasi rendi rã eã ño tenda rendi re. Nyasi tata rendi rã eã abe no. Nyasi tata rendi chiabi abi chõ eno nde. Erendi turã ja raque.

⁴² Eĩ si chõ mbia raaque quera je re. Ae mbia raaque nandechitiquia quia nae, ùquĩ ndei soõ je ùquĩ. Ae ra quera si nae, ùquĩ nda soõ eã mbei cote. Manoa mbei ra eno. ⁴³ Ae nandechitiquia quia nae, eraaque tuchi chõ ùquĩ nde. Ae ra quera si nae, enininya tuchi chõ ùquĩ cote re. Etiquia mose, equirãcuã nea tuchi chõ aque mose re. Equera si mose,

equirãcuã tuchi chõ aque mose cote re. ⁴⁴ ã nanderete nandereco ã nae, erete achõ ño ùquĩ nde. Quera si mose ra nyiicabo tuchi cote. Mbae ibi jenda ra mano ja. Ae ibi jenda eã nae, ùquĩ nda manoa no. ⁴⁵ ã ndei embesa ji cheẽ ã: “Ae Dios chao Adán nyii nae, aque reco que siqui rei nyii ra”, i que embesa ji ra. Ae tu Adán ndui Jesucristo, mbia mingo beisa rei aque. ⁴⁶ ã nanderete nandereco ã nae, mano mano mbei arõte. Ùquĩ nane nandereco nanderete ã. Aquere quiatu ra nanderetemo nandereco cote. Manoa mbei sacua cote. ⁴⁷ Ae Dios chao Adán nyii nae, ibi je chõ eao nguiã nyii. Nyebe ibi jenda bei ae re. Ae tu Adán ndui nae, Jesucristo i equia ee nae, ibatenda chõ aque re. ⁴⁸ ã nanderete nandereco ã nae, Adán ndete rã si chõ nanderete nandereco nguiã ã. Ibi jenda chõ ã nanderete re. Ae nanderete ra quera si nae, ibatenda rete rã ño nda ùquĩ cote. ⁴⁹ Ae Dios chao ibi je nyii nae, Adán i equia ee nae, aque rã si chõ nandeico nguiã nande abe namo ã. Aquere ra nandeico ibatenda rete rã cote. ⁵⁰ Nanderoo achõ ño nanderete re. Nanderuqui abe no. Ùquĩ oso aroneate ibate Dios récuua. Ae mano nguiã soõ nae, ùquĩ nyo i aroneate Dios récuua. Ae mbia riqui manoa mbeite nae, huee nanderoo oso aroneate.

⁵¹ Ae rese mbia riqui jiranuate nae, ùquĩ tasenei na jêje. Nandemano ja eã ndae. Nandechiicabo ja chõ ndae. ⁵² Corneta pu i mose ra Dios nanderete mbuchiicabo asi cote. Nanderesa pirirã i rã nda Dios nanderete mbuchiicabo asi. Corneta pu i mose ra eraaque abe quera si manoa mbei nonde cote. Aque mose ra nandechiicabo bei nande abe cote. ⁵³ Ae nanderete nandereco namo ã nae, ã nda nyiicabo tuchi cote. Manoa mbei sacua cote. Soõ eã mbei nonde cote. ⁵⁴ Nanderete nyiicabo mose, ùquĩ mose ra embesa ji cheẽ io cote: “Nandemano ngue ua tuchi cote ra”, i ñi embesa ji re. ⁵⁵ Nanderasi ra nandequiayã cote. Ibicua ra nanderaarõã cote. ⁵⁶ Nandeicuã ño nandemano mbu uquia nguiã nande je co. Moisés chimbese chõ nandeicuã mbuchecua nguiã nande je co. ⁵⁷ Dios ra nandemano siquisã mbei nandesi cote Jesucristo riĩ. Nyebe nandeico nguiã gracias i tuchi Dios je ã cote. ⁵⁸ Seresenda jjeñimbirãcuã tuchi quiatu quia jê! ¡Jesucristo rese jêingo bei quiatu quia jê! ¡Echeẽ jêsenei senei mbei tuchi quiatu quia jê! Ae jêsaã saã nguiã Jesucristo rese nae, jêsaã iru iruã ño nguiã ùquĩ.

16

Ofrenda jembae jendecoquiato, i Pablo

¹ Ae ofrenda ra jemondo Jesús icuasa je nae, ùquĩ tasenei jêje. Acheẽ ngue Jesús quiato je ra. Galacia jenda je ra. Eraã si chõ jêingo ae. ² Domingo mose bei jêingo mbae rerecúe cúe ae. Ofrendar ã. Ae mbae isi atate quia, sã aque mbae rerecúe ata jiri ae. Ae mbae isi miite quia, sã aque co miĩ jiri rerecúe ofrendarã ae. Ùquĩ jemunua ino seso nonde jendea ae. Eĩ mose ra ofrendarã jêsaã eã seico mose jendese cote. ³ Secuasẽ mose huee, jjeñimondo sacua mo jêirabo ino, ofrenda rerao sacua. Cartas nandemondo ùquĩ oo. Ofrenda rese. Ùquĩ nda amondo Jerusalén ña. Ofrenda rerao sacua hue jenda Jesús quiato je. ⁴ Ofrenda tubiriã mose ra aso se abe erese.

Aso ra jendea, i Pablo

⁵ Macedonia ñi nane nda acua. Aquere ra aso ngasẽ jêje cote. ⁶ Aico arete jiri ra jendese huee reae. Ama mose bei ra aico jendese huee reae. Eĩ jenye nda sembucuata turã mondo cote, seso mose mbaranguiti. ⁷ Amaeño sereãte jendese secua mose. Aico arese rete jendese huee, Dios eno i mose seje. ⁸ Efeso taico are rã nyii. Fiesta de Pentecostés mose. ⁹ Dios cheẽ asenei senei arõ tuchite mbia je a. Mbia seanduse rete. Emo emo icua icuaete riqui Dios cheẽ nenei nenei mose seje ã no.

¹⁰ Timoteo ngasẽ mose jêje jjeisi turã ño jê! ¡Sã eireĩ nguiã tuchi jêsi jê! Se rã si chõ eriqui bei nguiã Dios cheẽ nenei nenei mbia je aque. ¹¹ ¡Nyebe jemo Timoteo isiteã eã jê! ¡Jembucuata turã ño imbu seje jê! Aico eraarõ arõ tuchi se a. Nanderesenda ataque rese.

¹² Acheẽ ndei que nanderesenda Apolos je ra. —Nde abe eso erea, ae rei que ee jeni nda. Oso sereã ngue namo nda. Osobi mose quia nda esi nguiã jendea cote.

Pablo ñee hui bei

¹³ ¡Jendua tuchi quiatu quia jê! ¡Jesucristo jêicua tuchi quiatu quia jê! ¡Jêsiquicheã tuchi quiatu quia jê! ¡Jêquirãcuã tuchi quiatu quia jê! ¹⁴ ¡Mbia rese jenyesequa tuchi quiatu quia mbae raã naa mose jê! ¹⁵ Seresenda, jêingo Estêfanos chuchua jenda icua jate ãquĩ. Ûquĩ nane tuchi ngue Jesús icua Acaya jenda nyii nae. Ûquĩ ndiqui mbae mondo mondo bei Jesús quiato je ãquĩ. Ûquĩ ndiqui mbae raã naa mbei Jesús quiato je ãquĩ. ¹⁶ Ûquĩ na si chõ jêingo. Ûquĩ ñee nda jemumbachĩ. Ae Dios cheẽ senei senei nguia nae ¡ãquĩ ñee nda jemumbachĩ jê! ¹⁷ Seya tuchi Estêfanos ngaẽ mose serea. Fortunato abe. Acaico abe. Ûquĩ ngue sembia tuchi ngaẽ jêingoã mose a ra. Ae jêsaã aroneate quia seje nae, ãquĩ ño ngue esaã ngaẽ seje a ra. ¹⁸ Ûquĩ ngue sechiã mbucoite Dios rese ra. Jeñia abe mbucoite ereae. Gracias jenye bei ãquĩ je.

¹⁹ Jesús quiato Asia jenda ja chõ saludos mondo quia jêje aque. Aquila abe saludos mondo quia jêje aque. Priscila abe. Ae Jesús quiato ñmunua nua nguia ãquĩ nyuchua nae, ãquĩ ja abe saludos mondo quia jêje Jesucristo rĩ aque. ²⁰ Jesús quiato a jenda ja saludos mondo quia jêje aque. Jenyiquiaama ama ja quiatu quia Jesús rĩ.

²¹ Seo je tuchi co saludo ambesa mondo quia jêje aque. Pablo tuchi chõ se re. ²² Emo nyesequayã mose Jesucristo rese, sã Dios embasi. Echu, Jesucristo. ²³ Jesucristo turã nda siqui jendese chã. ²⁴ Achesequa ja chõ nguiã jendese Jesucristo rĩ co. Amén.

SEGUNDA CARTA DEL APOSTOL SAN PABLO A LOS CORINTIOS

Pablo ucheẽ mbesa mondo Corinto jenda je

¹ Pablo chõ se re. Dios chiirabo chõ se re. Jesucristo chimondo chõ se re. Timoteo rese co ambesa mondo quia jêje aque. Jesús quiato Corinto jenda ja je. Acaya jenda ja je abe no. ² Sã Dios uturã mingo tuchi jendese. Sã Dios jembia bei mingo. Sã Jesucristo abe jembia bei mingo.

Pablo mbae rasi saã tuchi

³ Gracias nande bei tuchi quiatu quia Dios je. Jesucristo rute quia ae re. Ae quia eya eãte riqui nguiã nanderese co. Ae chõ nandeya eã mbuquiachã quiachã nguiã co. ⁴ Mbae icuã tu mose ure je chõ Dios riqui nguiã ureya eã mbuquiachã quiachã ure si co. Ure mbia mo mbia sacuã abe chõ ñene. Mbae icuã tu mose ee. ⁵ Cristo rane ngue mbae rasi saã tuchi nyii ra. Mbia urembasi mbasi tuchi quia ure abe Cristo rĩã. Cristo riqui urembia tuchi ure abe ùquĩ mose co. ⁶ Ure mbae rasi raã mose, jêje chõ ñene. Ure mbae rasi raã mose nyii, jẽingo sacuã Dios rese chõ ñene. Ì nda jêya bei riqui mbae rasi raã mose. Dios ureya eã mbuquiachã mose, jêya eã mbuquiachã sacuã abe chõ ñene. Eĩ nda jeñimbirãcuã tuchi mbae rasi raã mose. Sã ureico mbae rasi raã ure no. ⁷ —Mbae icuã tu mose ee, ñimbirãcuã turã nda Dios rĩã, ure beite equia jeniã ã. Mbae icuã tu mose jêje, Dios ra jêya eã mbuquiachã jêsi. Sã seya eã mbuquiachã sesi no.

⁸ Mbae rasi que uresaã tuchite ureico mose Asia ra. Ûquĩ ndese taembiirandu. Mbia que ureucuayãte quia ra. Aete ureico ñimbirãcuã eã. —Mbae icuã nda hui eã mbeichĩ nandesĩ re, ure rei que equia ra. ⁹ —Mbae icuã nda nandemingoã nyee, ure rei que equia ra. Mbae icuã tuutu bei mose ure je. Ure Dios icua sacuã ño ngue ùquĩ nde. —Nande ae eã ñene, ure i sacuã ño ñene. Sã Dios ae riqui mbia raaque mbuquera uquirãcuã je no. ¹⁰ Mbae icuã ureiquia serĩ nguia nae, ùquĩ si que Dios ae urerirõ nda. Ûquĩ si eriqui urerirõ ndirõ mbei ã. Ûquĩ si ra eriqui urerirõ mbei no. Ûquĩ ureicuate quia ã. ¹¹ Jê abe jeñee Dios je urerĩ no. Mbia tubiriã ñee mose Dios je urerĩ, Dios ra ùquĩ ñee ñandu. Dios ra uturã mondo tuchi ure je. Ûquĩ nda gracias i tuchi Dios je urerĩ cote.

Pablo oso jei eã Corinto

¹² Ure que mbia mo urembiirĩ irĩ ãte quia ra. Jê abe mbiirĩ iriã no. Dios resendate que ureico jêje ra. Ureyate mbae turã naa naa mose jêje. Nyebe urechiã iate riqui nguiã. Dios ae chõ ngue uremingo mbae turã ndese huee ra. Ureaquiato ae eã ngue ra. ¹³ Ae urembesa mondo quia jêje nyii, ùquĩ jêicuate raque quia ùquĩ. Urechimbese checuate raque. Urechimbese nda jêicua ja tuchi rã seje chã. ¹⁴ Jê seicua jiri raque quia ùquĩ. Jêya tuchi rã nda urerese Jesucristo tu mose chã. Sã ureyate riqui jendese ã no.

¹⁵ Sã jêyate riqui serese co no. Ûquĩ aicuate quia se abe co. Nyebe acheẽ ndei nguiã sechianguĩ re nyii. —Tasobe rã erea. Ì nda eyabe jiri sesobe mose erea, ae rei que se nyii ra. ¹⁶ —Seso mose Macedonia, taicha bei oso jendea, ae rei que se ra. —Obei abe nda aichabe erea chã. Ì nda mbae mo mee seje sembu bei sacuã Judea, ae rei que se no nda. ¹⁷ Se ndua mose ùquĩ ndese, ¿eicuãte ùquĩ nde? ¿Acheẽ ñooño ño se quia ùquĩ nde? Se eno i mose, eno ae bei chõ nda se. Secheẽ nda ambuchebiã mbei. Jesús quiatoã ae ùquĩ saã nguiã. ¹⁸ Sã Dios ñee ñooñoa no. Eĩ ure quia ure abe urecheẽ mbuchebiã jêje ã. ¹⁹ Sã Dios rucucha ucheẽ mbuchebiã mbei no. Jesucristo i equia ee. Ae abe eno i bei quia co. Jesucristo sí cheẽ ño ngue asenei senei nguia jêje resẽ. Timoteo rese. Silvano abe rese no. ²⁰ —Mbae turã nda asaã jêje, i tuchi rei que Dios quia nande je nyii ra. Jesús rĩã ño eriqui nguiã ùquĩ naa naa nande je ã cote. Jesús rĩã ño nandeico nguiã Amén i Dios je ã cote. ²¹ Dios ae chõ nandembiirãcuã mingo nguiã Cristo rese co. Nandemingo icúe umbaerã.

²² Dios que nandéisirō umbaerã nda. Umbae marca que emii naanguia nanderese ra. Espíritu Turã ngue emondo nandechiangui re ra. Nanderereco quiatu sacua umbaerã.

²³ Aso eã equia jendea nae, jẽireĩ nguíã sacua ño asoã nguíã jendea aque mose. Seso sereã ae eã ngue eno nde. Acheẽ ñooño eã ño nguíã jẽje co. Dios riqui sechiã icuate co. ²⁴—Jenderecuarã nda se, ae ate quia co. —Co rese chõ jẽingo ndua, ae aroneate quia jẽje co. Taambia chõ Jesús rese. Ũquĩ mii ño asaã nguíã jẽje. Jẽ ae chõ jeñimbirãcuã nguia Jesús icua ũquĩ.

2

¹ —Aso si eã nda ñee asi asi jẽje jembia eã, ae que se ra. ² Seso mose jembia eã, aba quia ra sembia se cote. Jẽ ño sembia quia resẽ. ³ Nyebe ambesa mondo jẽje nyii resẽ. Jẽ mbae mbitirō sacua seso nonde jendea. Seso sereãte que oso mae jẽicuã ndese ra. Sembia eã sacua. Jẽ nguia nda sembia nguíã ña. —Seya mose ra jẽya jẽ abe, ae que se ra. ⁴ Ae ambesa mondo jẽje nyii nae, ũquĩ mose que seya eã tuchi riqui jendese ra. Acheseo chee que jendese ra. Jembia eã sacua eã ño ngue aque ambesa mondo nguíã jẽje. —Pablo ndua tuchichĩ nanderese, i sacua ño ngue ambesa mondo nguíã jẽje.

Ae mbae icua saã nguia nyii nae, aque jẽisi turã ño cote, i Pablo

⁵ Ae siqui ngu ninisi rese nyii nae, sembia eã tuchi chõ aque re. Se mii eã ngue sembia eã nda. Jemo abe abe mbia eã ngue ra. ⁶ Mbae rasi que esaã tuchi huiicua nii cote ra. Jẽ emombo mose nyii. Jẽisi turã ño cote. ⁷ Aque icua si jẽtesarei chõ cote. Jẽturã ño ee cote. Jembia jiri. Ĩ nda eya eã embiicha eã Dios si. ⁸ Jenyesequa tuchi chõ nguia erese jẽ. Jẽturã sí chõ ee jẽ. ⁹ —Ma secheẽ mumba eã, ae que embesa mondo jẽje nyii ra. ¹⁰ Jẽtesarei mose aque icua si, se abe atesarei chõ nguíã esi co. Jenii ño aico nguíã tesarei esi co. Cristo resa rae chõ aico nguíã tesarei esi. ¹¹ Nandetesarei mose emo icua si, Satanás siquiã sacua nanderese chõ ñene. Sã Satanás ndiqui aba mbiĩrĩ irĩ mbeite no.

Sechiã ngue ngoi eã mbei Troas ra, i ñi Pablo re

¹² Secuasẽ mose Troas Cristo cheẽ nenei nenei sacua, Cristo que mbia mbuchiisaquia tuchi rei secheẽ andu ra. ¹³ Tito oreãte que seje huee ra. Nyebe sechiã ngoi eã mbeite nguíã. Nyebe “co acua quia co” ae nguíã hue jenda je. Macedóniaa ngue aso cote ra.

Dios uremingo turã mbeite quia Cristo riĩ co

¹⁴ Aico gracias i beite Dios je co. Ae chõ uremingo turã mbeite nguíã Cristo riĩ co. Ae chõ urembirãcuã nguíã mbae icua si co. Ae chõ ucheẽ senei senei uquia nguíã ure je mangue jenda chooñoa je co. Aba mbushimbusa rã tuchi chõ echeẽ nde. Sã aba mbushimbusa riqui mbae mbushimbu turã jate no. ¹⁵ Cristo riqui urechiangui re co. Nyebe ureico nguíã aba mbushimbusa rãte Dios je ã. Ure Dios cheẽ nenei nenei mose, emo emo ño echeẽ isi nguíã. Siqui bei sacua. Emo emo ño echeẽ isiã nguíã no. Nyoĩ sacua tata cuasu. ¹⁶ Ae ra nyoĩ tata cuasu nae, mbae shimbu icua naanguia chõ Dios cheẽ ndiqui nguíã ee. Ae ra siqui bei quia nae, aba mbushimbusa turã naanguia chõ Dios cheẽ ndiqui nguíã ee. ¿Aba chõ equiatu Dios cheẽ nenei nenei ña? ¹⁷ Ae Dios cheẽ senei senei ñooño nguia nae, ũquĩ na eã ño ureico nguíã Dios cheẽ nenei nenei ure ã. —Mbae mo jembu rã ure je, ureã tuchi chõ nguíã Dios cheẽ nenei nenei mose jẽje ã. Sã eataque riqui Dios cheẽ abi abi erenei nenei mose no. Eĩ eã ño ure re. Dios cheẽ uresenei turã ja chõ nguíã ure. Ureico mingue chõ nguíã erenei nenei ure ã. Dios chõ ngue ureirabo nguíã ure. Cristo quiato chõ ure re. Dios résaa chõ ureico nguíã echeẽ nenei nenei ã.

3

Jesús cheẽ yasu nandereco quia ã cote

¹ ¿Urecuasú uresaã saã si reĩ nguia jẽje ã nde? Tei. Jenyicua ja chõ ure resẽ. ¿Emo nda ureturã senei mbesa mondo jẽje re? ¿Emo nda jẽturã senei mbesa imbu ure je re no? Tei. Nandechiicua ja chõ equia ã ndesẽ. ² Aico jenderequia beite sechiangui re co.

Embesa ji rese mae na ño mbia riqui nguiã mae jendese ã. ³ Urechimbaaquiatu chõ jẽ ndesẽ. Cristo chimbesa rã ño jẽingo nguiã. Tinta je eã ngue jembesa ra. Espíritu Turã je chõ ngue jembesa nguiã. Sita eã ngue Cristo mbesa nguiã. Jeñia ño ngue embesa nguiã.

⁴ Cristo chõ ã icua nguiã seje. Dios résa chõ aico nguiã ñee jẽje ã. ⁵ Sequirãcuã ae je ra mbae aicuayã. Dios chõ uquirãcuã mee nguiã seje mbae icua sacuã. ⁶ Dios chõ uquirãcuã mee nguiã seje, ucheẽ yasu renei nenei sacuã. —Embesa ji cheẽ jemumbayã mose ra jaemingo bei, i ãte Dios quia nande je ã. Espíritu Turã ae chõ aba mingo bei nguiã. — Embesa ji cheẽ tamumbayã mbei chõ nguia seico bei sacuã, i mose emo, aque ra siqui bei eã. Espíritu Turã ae nandemingo beisa re.

⁷ Sita mbesa ji Moisés quereco quia nae, mbae nininya tuchi que eriqui aque mose ra. Mbía mae sayã tuchi que Moisés ruba riqui ra. Moisés ruba nininyate quiatu ngue eriqui nguiã ee. Enininya que uque uquete oso quia cote ra. Moisés chimbesa mbía mingo bei aroneate. —Mbía siqui icuã mose, mbía ra mano, i que Moisés chimbesa mbía mbiirandu ra. ⁸ Mbae nininyate raque aque mose. Ae Jesús cheẽ yasu nandereco namo ã nae, ñquã nguiarei enininya tuchi Moisés chimbesa si. ⁹ Moisés chimbesa quiatu que mbía mbiirandu tuchi huicua ndese ra. Jesús cheẽ yasu quiarei nandembiirandu nandeicua mbitirõ ndese. Jesús cheẽ yasu quiarei enininya tuchi Moisés chimbesa si. ¹⁰ Moisés chimbesa quiarei enininya eã jiri Jesús cheẽ yasu si. Jesús cheẽ yasu quiarei i tuchi Moisés chimbesa si. ¹¹ Moisés chimbesa que siqui bei sacuã eã nda. Jesús cheẽ yasu quia siqui bei sacuã nde. Nyebe Jesús cheẽ yasu enininya tuchi Moisés chimbesa si re.

¹² Jesús cheẽ yasu ra siqui bei. Ñquã nandeicuate quia ã. Nyebe ureico nguiã ñee tuchi jẽje ã. Mbae mbuchecua tuchi jẽje. ¹³ Moisés rã eã ño ureico nguiã ure ã. Moisés que nguba chatite quia aque mose ra. —Ñ nda judíos mae eã seruba nininya que rese, i. ¹⁴ Judíos que Moisés chimbesa icuayãte quia ra. Namó abe eicuayãte. Emo leer i mose Moisés chimbesa je judíos je, icuayã mbeite. Ae siqui Cristo rese nae, ñquã mii ño Moisés chimbesa icua nguiã. ¹⁵ Namó abe judíos Moisés chimbesa icuayãte quia ã. Emo leer i mose ee, echecuayã mbeite riqui ee ã. ¹⁶ Emo uba mose Jesús rese, Moisés chimbesa abe ra echecuate ee cote. ¹⁷ Jesús sí rei Espíritu Turã. Nandeico mose Espíritu Turã ndese, ae chõ nandembui mingo nguiã Moisés chimbesa sí ã. ¹⁸ Nande Jesús icua mose, espejo rã ño nanderuba riqui nguiã. Jesús ruba nininya rã i i chõ nande re. Espíritu Turã abe siqui i i chõ nguiã nanderese. Nyebe nandeico i i nguiã Cristo rã ã.

4

¹ Dios turãte eriqui ure je co. —Jesús cheẽ yasu jësenei senei mbei mbía je, i Dios quia ure je co. Nyebe ureico nguiã ñimondocho ãte echeẽ nenei nenei mbía je ã. ² Mbae icuã asaã saã nyecuayã eãte quia co. Ae aba ireite riqui nae, ñquã asaã saã eãte quia co no. Mbía ambiiĩ irĩ eãte quia Dios cheẽ nenei nenei co no. Secheẽ ambeta mbeta eãte quia Dios cheẽ je co. Dios cheẽ ndui sí tuchi chõ aico nguiã erenei nenei co. Dios résa chõ aico nguiã erenei nenei co. Secheẽ ñooñoa mbía icuate raque quia uchiangui re ñquã. ³ Ae asenei senei mbeite quia Jesús rĩ nae, echecuayã eã ño ñquã nde. Ae ra nyoĩ tata cuasu nae, ñquã mii je chõ echecuayã nde. ⁴ Jesús icua eãte quiatu nguiã. Nyebe aba checuayã nderecua riqui nguiã embaaracuayã Cristo cheẽ turã ñi co. Nyebe eriqui nguiã Cristo nininya icuayãte co. Dios rã tuchi rei Cristo. ⁵ Se mbía mbaaquiatu quiatu mose, serĩ eã ño aico nguiã ñee ee. Jesucristo rĩ ño ñene. Ae rei mbía rerecuarã tuchi. Jenimba rã ño aico nguiã Jesús rĩ se co. ⁶ Dios que nyaashĩ saã nyii ra. Itondaru beire nyii. Ae sí que nandembaaquiatu quiatu Jesucristo rĩ nda. Ae sí que Jesucristo nininya mingue nandechiangui re ra. Dios nininya rei Cristo nininya rã sí.

Dios ae rese aico co, i ñi Pablo re

⁷ Ure ae urenininya eãte raque. Tuchu achõ na ño ureico nguiã Jesucristo nininya siquĩã mose urerese. Dios ae chõ uquirãcuã mee nguiã ure je co. ⁸ Mbae icuã tã i bei beite raque ure je. Urechimondocho eã mbei rae. Mbae aba mbecoteã chĩchĩte raque. Urehui

eã mbei ra Jesús si. ⁹ Mbia siqui icuã icuãte raque ure je. Dios quia hui ãte nguiã uresi co. Mbia ureririrõte raque. Urembui eã mbei quia nda Dios si re. ¹⁰ Sã mbia icuã icuã ndiqui Jesús je cose no. Sã eiquia no. Eĩ si chõ mbia nguiã ureiquia serĩ serĩte ã no. Mbia mae sacuã Jesús quirãcuã ndese chõ ùquĩ nde. Ae quera si nae, aque quirãcuã ndese mae sacuã ño ùquĩ nde. ¹¹ Ureico raque ure ã. Mbia ureiquia serĩ serĩ mbeite quia Jesús riĩ ã. Jesús quirãcuã siqui sacuã urerete quirãcuã nea ndese chõ ùquĩ nde. Mbia mae sacuã Jesús quirãcuã ndese chõ ùquĩ nde. ¹² Uremano serĩ serĩte equia ã. Jẽingo turã sacuã Jesús rese chõ ùquĩ nde. ¹³ Sã embesa ji ñee no: “Dios icuare chõ aico nguiã ñee”, sã i no. Eĩ si chõ ure no nde. Dios icuare chõ ureico nguiã ñee. ¹⁴ Sã Dios quirãcuã Jesús raaque mbuquera no. Eĩ si ra Dios nandembuquera Jesús riĩ nande abe. Ae ra nandemingo turã ja ujii cote. ¹⁵ Seje mbae icuã icuã mose, jemingo turã sacuã ño ùquĩ nde. Ì nda Dios uturã mee mbia tubiriã je. Ì nda mbia tubiriã gracias i tuchi Dios je. Dios iate mbia ùquĩ naa mose.

¹⁶ Nyebe ureico nguiã ñimondocho eã mbei. Urerete si raque quia ngoite qui cote. Urechimbiasu i i chõ nguiã urechiangu i re ã. ¹⁷ Ae rasi uresaã nguia ã nae, ùquĩ ndasi ra ua jei chõ. Ùquĩ ndasi raande nyii ra Dios mbae turã mee mbei ure je cote. Dios chimee turã nda ua eã mbei uresi cote. ¹⁸ Ae rese nandeico mae mbae nae, ùquĩ nda ua jei. Ae rese nandeico mae eãte nae, ùquĩ nguia ra ua eã mbei. Nyebe ureico nguiã ndua mbae nandemae sayã ndese.

5

¹ Sã tuchia riqui shii jeite no jẽ. Eĩ si chõ nanderete no nde. Mano jei. Mbia serete iquia mose, tuchia ao ji mo ñi ibate seraarõ arõ pe. Dios chisaã ño hue re. Hue tuchia ra shii eã mbei. Mbia chisaã eã ño ñene. ² Tuchia mo na ndei nanderete. Shii jei. Co serete rerequia mose, aico jiabute co. Co aico oso sete sechuchia ibatenda rea co. ³ Ì nda serete yasu areco bei pee ibate. ⁴ Tuchia mo na ndei nanderete. Co serete rerequia mose, aico jiabute co. Seya eãte aico co. Semano sereãte raque. Serete yasu quia areco sete nguiã. Mbae yasu ja ra aque mose seje cote. Amanoa mbei ra aque mose cote. ⁵ Ùquĩ je chõ ngue Dios sererecoquiatu nguiã. Semingo turã mbei ra cote. Nyebe Espiritu Turã mondo nguiã seje. Sembiirandu sacuã ùquĩ ndese. Dios Espiritu Turã mondo mose seje, umbae marca miĩ naanguia serese chõ ùquĩ nde.

⁶ Nyebe aico nguiã ñimondocho eãte co. Ì nanderete rerequia bei mose, eĩ nda nandeso aroneate rei ibate siqui Jesús rese. ⁷ Aico beite Dios icua co. Amae ãte raque erese. Ae rese nandeico mae nae, ùquĩ ndese aico ãte co. ⁸ Nyebe aico nguiã ñimondocho eãte co. Co serete ajea bite raque oso sacuã ibate siqui bei nonde Jesús rese. ⁹ Ae Dios bite nae, ùquĩ asaã sete quia ee co. Dios seisi turã nonde chõ ùquĩ nde. Aa seico mose. Pee ibate seico mose abe no. ¹⁰ Cristo résaa ra nandecu ja emo mose. Ae nanderea sacuã. Nandeicua sacuã. Ae mbae turã saã saã nguia siqui mose íbii nae, Cristo ra mbae turã mondo ùquĩ je pee cote. Ae mbae icuã saã saã nguia siqui mose íbii nae, ùquĩ je ra Cristo mbae icuã mondo

*Dios ae nandemingo turã nguiã uchi*ese Jesucristo riĩ co

¹¹ Aba siquichesa tuchi cho Dios re, mbia siqui eã mose erese. Nyebe ureico nguiã mbia mbuti mbuti tuchi co. Dios riqui ureicuate co. Jẽ abe jẽingo ureicuate ùquĩ ndenoae. ¹² Ì ureico urecuasu raã naa si ãte raque ã. Jembia sacuã ño ureico nguiã ñee urerĩ si ã. Ì nda jeñee aquiatu mbia icuã ñee ndibishorõ. Ae uturã saã ñooño nguia nae, ùquĩ ñee ndibishorõ sacuã ño ñene. ¹³ Urearacuayã mose, Dios cheẽ ndese siqui sacuã ño ñene. Urearacua mose, jembaaquiatu sacuã ño ùquĩ no nde. ¹⁴ Sã Cristo nyesecua tuchite nanderese no. Ae chõ sembuti mbuti nguiã co no. Cristo que mano nande ja je ra. Nyebe nande abe nandemano ja nguiã erese. ¹⁵ Cristo que mano nande ja je ra. Ae nandebite riqui nae, ùquĩ ndese nandeico eã sacuã ño Cristo mano nguiã. Ae Cristo bite riqui nae,

ũquĩ ndese nandeico sacuã nguiatu ngue Cristo mano nguiã. Nande je que Cristo mano nda. Nande je que Cristo quera si no nda.

¹⁶ Jesús quiatoã na eã ño ureico nguiã mae mbia rese ã. Urechesequa chõ nguiã mbia rese ã cote. Urechesequa eãte raque Cristo rese nyii. ¹⁷ Emo ñimbucha mose Cristo rese, mbia yasu rã ño ũquĩ cote re. Ae esaã saã nguia mbae icuã nyii nae, ũquĩ si que hui ja cote ra. Mbae yasu ja chõ ee cote re. ¹⁸ Dios ae ũquĩ saã ja nguiã nande je co. Dios ae nandemingo turã nguiã uchiese Jesucristo rĩĩ co. —Mbia emingo mingo bei serese sequia torã jẽ, i que Dios seje ra. ¹⁹ —Sã mbia sequiatorã ja, i que Dios Cristo rĩĩ nda. Ũquĩ je chõ ngue Cristo mano nguiã. Mbia icuã mbutiã sacuã esi chõ ngue Cristo mano nguiã. —Mbia emingo mingo bei serese sequiatorã jẽ, i que Dios seje ra. ²⁰ Cristo chõ sembucheẽ nguiã co. Secheẽ ae eã ñene. Dios ñee na jẽje chõ aico nguiã ñee jẽje co: Dios quiatorã ño jẽingo jẽ. ²¹ Mbae icuã mo ngue Cristo saã eãte rei ra. Dios que mbae icuã naasa saã tuchi ee ra. Dios nandemingo turã mbei sacuã ño ũquĩ nde. Sã Dios nandemingo turã mbei nandeico mose Cristo rese no.

6

¹ Dios resenda chõ ureico nguiã Dios cheẽ nenei nenei ã. Dios turã jẽisi chooñoa ño nguiã jẽ. Jẽisi tuchi quiatu jẽ. ² Eĩ ngue embesa ji huĩ Dios cheẽ nda:

“Jeñee mose seje, jeñee ngue achandu ra.

Aendirõ ngue mbae icuã si ra”, i que Dios mbi a je cose ra,

i ñi embesa ji re. Namõ ño Dios riqui nguiã aba cheẽ anduse co. Namõ ño Dios riqui nguiã mbia rirõse eicuã si co no. ³ ã ureico mbia mo mbiĩrĩ irĩ eãt e ã. ĩ nda mbia urecheẽ andu turã Jesús rĩĩ. ⁴ Mbae uresaã turã sete quia ure ã. —Dios rimba turã ño ũquĩ nde, i nonde mbia ure rĩĩ. Nyebe ureico nguiã ñimbirãcuã tuchi mbia icuã mose ure je ã. Mbae tiã mose abe ure je. ⁵ Ureiruã nua ngue equia ra. Uretarõ tarõ mbei que equia ra. Urerecteã mbei que eriqui ra. Ureque reã tuchi que equia ra. Urieriãcuã tuchi que eriqui no nda. ⁶ Ũquĩ icuã eĩ eĩ mose ure je, ureico turãte que equia ra. Ure que Dios ureicuate quia ra. Urechimbirãcuãte que equia ra. Ureico turãte que equia mbia je no nda. Espiritu Turã ngue siqui tuchi urerese no nda. Urechesequa chooñoa ngue equia mbia rese no nda. ⁷ Dios cheẽ ichoiñosa reã ngue uresenei senei tuchi quia mbia je ra. Dios quirãcuã ngue siqui tuchi quia urerese ra. Ae uturã Jesucristo mee nguia ure je nae, ũquĩ miĩ ño urereaquiato bei nguiã co. ⁸ Emo emo mose mbia riqui ñee turã urerĩĩ ã. Emo emo mose mbia ñee icuã urerĩĩ no. —Aba mbiĩrĩ irĩsa, i tuchi que mbia quia ure je emo emo mose no nda. —¡Ae bei jẽ! i tuchi que equia urecheẽ je emo emo mose no nda. ⁹ Mbia riqui ureririrõ ndirõ emo mose ã. Emo emo mose eriqui ureisi turã turãte ã no. Mbia ureiquia arõ arõte raque quia ã. Urereco ureico beite ã. Mbia urembaasi asite raque quia ã. Ureiquia eãte no. ¹⁰ Ureya eãte raque. Dios rese quia ureyate re. Mbaecha reã ndaque ure no. Mbaecha que uresaã uquia tuchi mbia je ra. Mbae eã tuchi raque urembae. Dios rese quia urembae tubiriã tuchi re.

¹¹ Urecheẽ nyecuate que jẽje ra. Urecheẽ ngue jembĩrĩ iriã tuchi quia ra, Corinto jenda. Ureico nyesequa tuchi jendese a. ¹² Ure que urechao eã jẽsi ra. Jẽ nguiatu ngue jenyao nguiã ure si. ¹³ Sã mbia mo ndiqui ñee nguiĩrĩ je no. Eĩ ae chõ nguiã ñee jẽje. Jendu rã ño aico nguiã jẽje. Jenyesequa tuchi chõ nguia serese. Sã aico nyesequa jendese no.

Dios chuchua tuchi chõ jendete re

¹⁴ Dios quiatoã ndese ra jeñimbuchachĩ jẽ. Dios quiatoã na eã ño jẽ nde. Sã mbae turã ndiqui mbae icuã mbiroã no. Sã nyaashĩ ndiqui itondaru mbiroã no. ¹⁵ Sã Cristo riquiã Satanás ndese no. Eĩ si chõ Cristo quiato siqui aroneate nguiã Cristo quiatoã ndese no. ¹⁶ Sã Dios abareã siqui aroneate Dios chuchua no. Jendete rei Dios chuchua tuchi. Dios riqui tuchi jendete ye ũquĩ. Sã Dios ñee ã no: Erete ye ra aico. Ererecuarã nda se.

Mbia ra siqui serui,
 sã i Dios no. ¹⁷ Dios cheẽ ño ã no nde:
 Jẽhui chõ mbae icuã si. Icuẽ jẽingo.
 Mbae icuã ndese ra jẽocochĩ.
 Jaẽisi turã nda se chã.
¹⁸ Jendurã nda se chã.
 Seriirina nda jẽ ña.
 Sequirãcuãte se,
 i que Dios cheẽ mbesa ji ra.

7

¹ Dios cheẽ ño ã nde. —Aico bei ra jendese, i que ra. Nyebe nandehui mbae icuã si ñimbitirõ mbei. Cochee chõ nandeico Dios je. Nandereco nandemee tuchi ee.

Seyate aico jendese co cote, i ñi Pablo re

² Ureisi turã ño jẽ. Mbae icuã mo ngue uresaã ãte jemo je ra jẽ. Ureico que equia jembirĩ irĩ ãte ra jẽ. ³ Jẽicuã i sacuã eã ño aico nguiã ñee jẽje. Achesecua tuchite quia jendese co. Semano mose chee. Sã ñi acheẽ jẽje nyii no. ⁴ Seyate aico jendese co. Secheẽ nda emumbayã, aete se quia jeni co. Mbia icuã icuã mose seje, seyate aico jendese co.

⁵ Urechu que aa Macedóniaa, aque mose bei que urerecteãte ra. Mbae icuã ngue uremingo asi asite rei quia ra. Mbia icuã icuãte que eriqui rei ure je ra. Sechiã ngue ngoi ãte rei quia ra. ⁶ Dios que sechiã mbocoi Tito ngasẽ mose cote ra. Sã Dios riqui uquiato mbia beite eya eã mose no. ⁷ Tito mii ndese eã ño seya re. Seya tuchi que sembiirandu mose jendese no nda. Jẽ nane ngue jeñee Tito mbirãcuã nda. Aquere que Tito ru sembirãcuã cote ra. —Hue echi ndua tuchite nderese huee, i que u ñee seje ra. Nyebe seya tuchite riqui nguiã jendese. Jẽtesarei eãte quia equia sesi reaẽ. ⁸ Ae ambesa mondo jẽje nyii nae, ùquĩ ngue jembia eãte rei ra. Erea ramo mose. —Amondo jirichĩ nguia, ae rei que se quia nyii ra. —Amondo jirichĩ nguia, ae ãte se quia co cote. ⁹ Seyate aico jendese co cote. Jẽya eã nii eã ño ñene. Jeñimbitirõ nguiatu ngue re. Maende sechimbesa rese. Sechimbesa jembia eã mose jẽicuã ndese, Dios rese que jendua cote ra. Sechimbesa chõ jemingo turã nguiã cote. ¹⁰ Emo ia eã ñooño mose huicua ndese, ùquĩ nda nyoĩ tata cuasu. Emo ia eã tuchi mose huicua ndese, hui ra huicua si cote. Dios ra emingo bei cote. —Ahui jirichĩ nguia seicuã si, iã tuchi rae. ¹¹ Sechimbesa oso mose jẽje, jẽya eã tuchi que jẽicuã ndese ra. Nyebe Dios ia tuchi riqui nguiã jendese. Jendua tuchi que ra. —Mbae icuã ngue uresaã eãte resẽ, jenyẽ eãte que ra. Mbae icuã ndese que jemaẽ sereã tuchi cote ra. Jẽireĩ ireĩte que equia mbae icuã si ra. Jemaẽ sete que equia serese ra. Ae siqui ngu ninisi rese nae, aque que jemombo cote ra. Mbae que jẽsaã turã jate ra. Eicuãte i aroneate que emo nguia jẽje ra. ¹² Ae siqui ngu ninisi rese nae, aque je eã ngue ambesa mondo nguiã. Eru je eã ño ngue eno nde. Jẽ ja je chõ ngue ambesa mondo nguiã. —Pablo riqui nyesecua tuchichĩ nandereese, i ja nonde chõ ngue ambesa mondo nguiã. ¹³ Nyebe ureya tuchi riqui nguiã jendese co cote. Jẽ ngue Tito abe jembia cote ra. Jẽ hui mose mbae icuã si. Seirandu mose ùquĩ ndese que seya tuchi se abe cote ra. ¹⁴ Sã ñi aico jẽturã nenei nenei Tito je nyii no. Eĩ jenyẽ si tuchi equia siqui turãte ùquĩ. Nyebe seireĩ ngũĩate riqui nguiã ñee jeni ùquĩ. Acheẽ ñooñoa ngue jẽturã nii Tito je ra. Sã aico ñee ñooñoa emo mose jẽje no. ¹⁵ Tito riqui nyesecua i ite jendese co. Ndua beite equia jendese co. Echeẽ nguiatu que jemumbayã tuchi quia ra. Cocheete quiatu que jẽingo ee ra. Jẽisi turãte quiatu que equia ra. ¹⁶ —Ùquĩ nda siqui tuchi Dios rese, ae tuchi se quia jeni co. Co seyate aico jendese co.

8

Jembae jemee jiri quia Dios je

¹ Jesús quiato Macedonia jenda tasenei jêje cote, Seresenda. Hue jenda ja iglesias. Dios turã tuchi que eriqui ùquĩ ja je ra. ² Mbia icuãte que eriqui rei ee ra. Eya beite chõ ngue eriqui ra. Mbaecha reã ndaque. Mbae que emondo tuchi guia Jesús quiato je ra. Mbaecha rã tuchi mbae mondo mbia je. ³ Umbae que emee tuchi ra. Embae tubiriã eã ndaque. Abei tuchi quiatu ngue re. Amae ngue erese ra. ⁴ —Ure abe ra urembae uremee tuchi Jesús quiato je, i tuchi que seje ra. ⁵ Mbaechõ eã ngue emee Dios je ra. Nguete rane ngue emee ee ra. Ure je abe que nguete mee nda. Mbae turã naa naa mbei sacua ure je Dios riĩ. Aquere que umbae mee tuchi Jesús quiato je cote ra. ⁶ Macedonia jenda umbae mee tuchi mose Dios je, urendua que jendese cote ra. Nyebe Tito amondobe quia aque. Tito jembae ofrenda munua nua ja sacua. Sã Tito ñee nyii no. —Tamunua nua ja, sã i no. ⁷ Sã jẽingo Dios icua tuchi no. Sã jẽingo Dios cheẽ icua jate no. Sã jẽaquiatute mbia mbaaquiatu no. Sã jẽingo sete riqui Dios cheẽ ndese no. Sã jẽingo nyesequate serese no. Nyebe jembae jemee tuchi quiatu ofrendarã cote.

⁸ —Secheẽ nguire quiatu jembae jemondo Dios je, ae ãte se quia co. Jẽ ae chõ jendua mbae mee nonde. Jesús rese jenyesequa tuchi mose, jembae ra jemee mee Jesús quiato je. Sã Macedonia jenda umbae mee mee Jesús quiato je no. ⁹ Nandererecua tuchi chõ Jesucristo re. Jesucristo turã jẽicuate quia ùquĩ. Mbaecha tuchi rei que ae ereco mose ibate ra. Mbaecha reã ngue esaã tuchi u íbii nande je ra. Eriĩ ño Dios riqui nguiã mbae mondo tuchi nande je. Ae mbaecha reã naa mose u íbii. ¹⁰ Tacheẽ tuchi rã jêje. Tenda nongue mose que jenduate Jesús quiato mbaecha reã ndese ra. Mbae que jemondo sete quia ee ra. Jẽ nane ngue “ofrenda nandemondo” jenyẽ Macedonia jenda si ra. Cosete que jeñee ñee. Jemondo turã cote. ¹¹ Ae ra jemondo nae, ùquĩ ja jemondo jei eae. Mbae jemondose jiri quia ee. Sã mbae jemondose ee nyii no. Jembae tubiriã mose, jemondo tuchi ee. Jembae miĩ mose, co miĩ jemondo ee. ¹² Nande mbae mo meese mose, Diobi tuchi chõ ùquĩ nde. —Mbae tubiriã embu seje, iã nda Dios mbaecha reã je. ¹³ —Jembae jemondo ja tuchi mbaecha reã je, ae ãte quia jêje co. ¹⁴ Sã jembae nyiabiã jiri mbaecha reã mbae rese. Sã jembae tubiriã namo no. Emeẽ sacua ùquĩ je. Emo mose ra ùquĩ mbae tubiriãte no. Emondo sacua jêje jembae eã mose no. Ùquĩ mose ra jembae nyiabiã jiri ja cote. ¹⁵ Sã embesa ji riqui ñee no:

Ae mbae tubiriãte nae, embae rire eãte que ra.

Ae embae miĩte nae, embae que ua eãte ra,
i que embesa ji ra.

Tito ra nyoĩ jendea, i Pablo

¹⁶ Sã aico ndua tuchi jendese co no. Eĩ si tuchi Dios quia Tito mundua jendese co. Nyebe aico nguiã gracias ite Dios je co. ¹⁷ Tito si quia jendea aque. Secheẽ nguire achõ eã esi nguiã jendea aque. Ae abe que ndua jendese ra. ¹⁸ Tito rese Jesús quiato mo amondo quia jendea aque. Jesús quiato ñee turã jate quia aque riĩ aque. Jesús cheẽ nguiatu esenei senei mbeite nguiã aque. ¹⁹ Jesús quiato que aque irabo ra. Oso sacua serese. Ofrenda munua nua sacua serese. Sã ureico ofrenda munua nua Dios mbia sacua no. Mbia “abei” i sacua jêje. ²⁰ Ae que siqui beite urerese ofrenda isi isi mose ra. Mbia ñee icua eã sacua ure riĩ. “Ofrenda que embuquiachã nda”, i eã sacua mbia ureriĩ. ²¹ Mbae uresaã turãse rete quia ã. Dios ia tuchi sacua ure rese. Mbia abe ñee icua eã sacua ure riĩ. ²² Ureresenda mo abe uremondo quia ùquĩ ndese aque. Ae quiarei mbae raã naase bei Dios je. Oso sete equia jendea co. ²³ Tito rei seresenda tuchi. Siqui bei que equia serese Dios cheẽ nenei nenei mose ra. Ae nyoĩ quia jendea Tito rese nae, iglesias chõ emondo nguiã jendea ùquĩ. Cristo quiato tuchi chõ ùquĩ nde. ²⁴ Ùquĩ jẽisi turã ja chõ jẽ. Sã urecheẽ ee jeniĩ nyii no. —Jẽisi turã ndae. Nyesequa tuchi ra jendese, ure que ee nyii ra. Nyebe jẽisi turã ño. Eĩ nda iglesias jenda ja abe “eturã” i jeniĩ.

9

Jembae ofrenda jemunua ja rã emondo sacuã mbaecha reã je

¹ Aete aico embesa eã jêje ofrenda riĩ. —Ae ae chõ nda mbae mo mondo nguiã Jesús quiato je, se ñee mose rocoĩ ee, ae que se ra. ² Jê ae chõ mbae jemondose nguiã Jesús quiato mbaecha reã je ũquĩ. Jenii ño aico nguiã ñee Macedonia jenda je co. —Tenda nongue mosenda bei chõ Acaya jenda riqui nguiã mbae mondose Jesús quiato je ũquĩ, ae se quia Macedonia jenda je jenii co. Nyebe ũquĩ abe riqui nguiã mbae mee sete ee cote. Jirandure jendese. ³ Aque mbia amondo quia jendea aque. Jê icoquiato sacuã. Mbae jemondo sacuã Jesús quiato mbaecha reã je. Ureireĩte ra jê ofrenda mondo eã mose se ñeende jenii nyii. ⁴ Seso mose jendea, Macedonia jenda mo abe ra nyoi serese reae. Jê ofrenda munua eã mbei mose, ureireĩte ra urecuasẽ mose hue. ⁵ Nyebe ã nane amondo nguiã jendea aque. Jembae ofrenda munua ja sacuã. Ae riĩ jeñee ndei tenda nongue mose. —Ofrenda jemunua na, ae bei sereãte se. Jê ae chõ ofrenda jemunua nua, jenyesequa mose mbia rese.

⁶ Jendua rã ã ndese: Ae mbae miĩ jiri chitiquia quia, aque ra mbae a ucua miĩ jiri. Ae mbae chitiquia tuchi quia, aque quia ra mbae a ucua tuchi. ⁷ Mbae ata nandemondose mose nandechiangui re, mbae ata nandemondo chõ. Mbae miĩ nandemondose mose nandechiangui re, mbae miĩ nandemondo chõ. —Mbae amondo jirichĩ, nande mose nandechiangui re, eicuãte ũquĩ. Ae eyate riqui umbae mee mose emo je nae, Dios bite ũquĩ. ⁸ Dios quirãcuã tuchite riqui co. Mbae emondo ja arõte quia nande je co. Mbae ua eã mbei sacuã nandesĩ. Mbae nandemondo mondo bei sacuã Dios quiato mbaecha reã je.

⁹ Sã embesa ji riqui ñee no:

Mbae que Dios quiato mondo mondo bei quia mbaecha reã je ra.

Echisaã turã si ra mbia tesarei eã mbei,

i que embesa ji ra. ¹⁰ Dios chõ mbae eĩ mondo nguiã nande je etiquia sacuã. Dios chõ mbae mondo nguiã nandechiurã no. Dios chõ “jabei chõ jê jê!” i nguiã nande je. Dios chõ mbae mee nguiã nande je emondo sacuã mbia mo je. ¹¹ Dios ra mbae mondo tuchi jêje. Eĩ nda jê mbae jemondo tuchi ofrendarã. Se jeñimee ofrenda mondo mose mbaecha reã je, gracias i tuchi ra Dios je cote. ¹² Nande mbae mo mondo mose Jesús quiato mbaecha reã je, quiaru turã jiri ra equia cote. Ũquiño eã nda esaã nguia. Gracias i abe ra Dios je. ¹³ Jê mbae mo mee mose Jesús quiato mbaecha reã je, mbaecha reã nda ñee turã Dios je jenii cote. —Cristo cheẽ emumbayã tuchi quia ã, i ra jenii cote. —Eriqui mbae mee tuchichĩ mbia ja je, i ra ñee turã jenii cote. ¹⁴ Mbaecha reã nda ñee tuchi jenii Dios je cote. Dios jendeaquiato sacuã. Mbaecha reã nda ndua tuchite jendese cote. Jê mbae mondore ee nyii. ¹⁵ Dios quiatu que mbae turã tuchi mondo nande je ra. Nyebe nandeico nguiã gracias i ee.

10

Mbia mbaaquiato sacuã ño Dios semii nguiã

¹ Se rei Pablo. Tacheẽ nyecua jêje. Nandeico mingue chõ nguia Cristo rã si jê. Cochee chõ nandeico Cristo rã si jê. —Cochee chõ Pablo riqui nguiã siqui mose nanderese. Siqui eã mose nanderese, ucuasu esaã saã ño nguiã aque, jenye chõchĩ equia serĩ ũquĩ. ² Mbae jesaã turã turã ja chõ nguia. ĩ nda acheẽ asi asiã jêje seso mose jendea. Emo emo ñee icuã ño nguiã serĩ. —Dios je eã ño Pablo riqui nguiã mbae raã naa, i serĩ. Ũquĩ je quiatu acheẽ asi asi arõte nguiã. ³ Mbia chõ ndaque se. Mbia quirãcuã je eã ño aico nguiã mbae raã naa co. Dios quirãcuã je chõ aico nguiã mbae raã co. ⁴ Sequirãcuã je eã ño aico nguiã mbae raã. Dios quirãcuã je chõ ñene. Nyebe aico nguiã mbia icuã ndiquisã quisã co. Mbia icuã quirã cuãteraque. ⁵ Ae mbia mundua icuã icuã nguia Dios riĩ nae, ũquĩ asiquisã quisã ño nguiã co. Mbia amundua turã ja quia Cristo riĩ co. Cristo cheẽ mumbayã sacuã cote. ⁶ Jê nane Dios cheẽ jemumbayã na jê. Aquere ra Dios cheẽ mumbasa amombo ja cote.

⁷ Mbia chiangui renda rese jemaē āte. Earonda rese chō jēingo nguiā mae. — Cristo mbae chō se re, i mose emo, ae miī eā ño Cristo mbae re. Se abe chō ñene. ⁸ Se ecuasū raā naa mose, seireĩ ngūiāte. Dios quiatu ngue semiī nguiā ererecuarā. Jembaaquiātu turā sacūā ño ngue Dios semiī nguiā ererecuarā. Jembīcuā sacūā eā ño ñene. ⁹ Jaembusiquiche sereāte sechimbese je. ¹⁰ Mbia ñee icuāte raque seje. —Pablo reco mose isho, ñee asi asite equia ucheē mbesa mbesa mondo nande je co, i jemo nguiā seriī ũquĩ. —Siqui mose nanderese, ererecuā raā naa aquiātuāte cote, i jemo nguiā seriī ũquĩ. ¹¹ Ae ñee nguiā ũquĩ nae, ũquĩ je tacheē. Co secheē asi asi ambesa mondo quia jēje aque nae, anyae sí ra ñee asi asite seso mose jendea huee. Secheē mbesa ji ra achabiā seso mose jendea huee. ¹² Ae ñee mbeite quia uturā niī, ũquĩ na eā ño se re. —Aque rā si chō aico nguiā se co, i beite equia ũquĩ. —Seturāte aico aque si co, i beite equia ũquĩ no. Ũquĩ ñee mose ũquĩ, earacuayāte riqui ũquĩ.

¹³ Seturā nda asaā saā eā. Dios ae chō “hue eso, pe eso”, i nguiā seje co. Ae chō ngue semondo nguiā jendea. ¹⁴ Se rane ngue Dios semondo jēje Cristo cheē nenei nenei sacūā nda. Nyebe hue jenda ja sembaerā, se embaaquiātu sacūā Dios cheē ndese. Ae Dios riqui “hue eso” i āte seje nae, huee ra asoā. ¹⁵ —Sechimbaaquiātu chō ũquĩ nde, ae aronea tuchite quia emo ñimbaaquiātu je co. Jē Cristo icua i i tuchi mose, jendobeinda quia ra ambaaquiātu i i tuchi oso cote reae. ¹⁶ Seso sete jendobei Cristo cheē nenei nenei hue jenda je. Sechimbaaquiātu ae aroneate emo ñimbaaquiātu je. ¹⁷ Emo ñee turāse mose mbae mo niī, sã Dios riī nguiātu ñee turā. ¹⁸ Ae uturā saā saā nguiā nae, Dios biāte ũquĩ. Ae riī nguiātu Dios riqui ñee turāte nae, ũquĩ nguiātu Diobi tuchi re.

11

Mbia mbaaquiātu icuā icuāsa rese ra jēingochĩ

¹ Jeñimbirācuā jiri se ñee mose jēje jē. Seturā tasaā saā jiri ñee jēje. ² Aqueteāte jendese jē. Dios mbaerā jē, ae que se ra jē. Sã acuanī mo ndiqui siqui eā mbei ngu mo ndese no. Sã mbia emee acuanīndu mo je cote no. Eĩ tae si chō jemee Cristo je. Cristo miī mbaerā nda jē cote chã. ³ Sã mbei Eva mbīrĩ irĩ cose no. Eĩ jenye si arōte jē ndeae. Eĩ si arō mbia jembīcha Cristo icha si. Jemundua icuāte chō nda reae. Cristo miī ndese chō jēingo jē. Sã acuanī ndiqui ngu miī ndese no. ⁴ ¿Mbaerā jenyiisaquia turā mbia jembaaquiātu icuā icuā mose re? Mbia Jesús abareā nenei nenei mose jēje re. Mbia Espīritu Turā abareā abe renei nenei mose jēje re. Mbia Jesús cheē turā abareā nenei nenei mose jēje re no. Se que ũquĩ asenei senei āte quia jēje resē. ⁵ Ũquĩ ñee ndese que jenyiisaquia, ¿mbaerā nda jenyiisaquia eā secheē abe rese re? Se quia Jesús cheē aicua tuchi quia ũquĩ si co resē. ⁶ Secheē turā eāt e raque. Seaquiatute quia aico nguiā Dios cheē ndese co. Jēingo seicuate ũquĩ ndesē.

⁷ —Mbae jemondo seje, ae āte que se quia Dios cheē nenei nenei mose jēje ra. ¿Eicuāte ũquĩ nde? Aico minguate que se quia jēje ra. Jēingo turā sacūā Cristo rese. ¿Eicuāte ũquĩ nde no? ⁸ Seico mose jendese jembaaquiātu quiātu mose, mbae mo ngue jemee āte quia seje ra. Jesús quiato ishonda quiātu que mbae mo mee mee nguiā seje ra, se siqui mose jendese. ⁹ Seico mose jendese que mbae jemondo eāte seje resē. Sembae eā mose que “mbae embu seje” ae āte jēje resē. Jesús quiato que ngaē Macedonia si nae, ũquĩ nguiātu que mbae mee tuchi sembae eā mose resē. “Mbae embu seje” ae eā mbei ra jēje. ¹⁰ Cristo riqui sechiangui re co. Ũquĩ aicuate. Sebite “mbae embu seje” iā mose se jēje. “Acaya jenda que mbae mee tuchi ndeje ra”, i aroneate emo seje jeniī. ¹¹ ¿Mbaerā ño mbae aisiā jēsī chã? Achesequa eāte quia jendese reae. Tei. Ũquĩ eā ñene. Achesequate rei jendese resē.

¹² Mbia ñee eā sacūā nda mbae aisiā mbei jēsī resē. Ae Jesús abareā senei senei nguiā nae, ũquĩ ñee eā sacūā. “Pablo rā sí chō ure re” ũquĩ i eā sacūā. ¹³ Cristo cheē nenei neneisa turā eā ño ũquĩ nde. Mbia mbīrĩ irīsa chō ũquĩ nde. Cristo cheē nenei neneisa

raã ñooño ño nguiã ũquĩ. ¹⁴ Satanás na sí chõ ũquĩ ndiqui nguiã ũquĩ. Satanás uturã saã saã ño nguiã. Angel turã naa naa ño nguiã no. ¹⁵ Ae siqui Satanás ndui nae, ũquĩ nda uturã saã ñooño Satanás na sí. Nyebe ra Dios ũquĩ mbutiã tuchi emo mose.

Pablo mbae rasi saã tuchi

¹⁶ “Earacuayã” jenyechĩ nda seje jẽ. “Earacuayã” jenze raque seje, seandu rã se. Secuasú tasaã saã mbirĩ na jẽje. ¹⁷ Ae aico ñee jẽje namo nae, Dios cheẽ eã ño ũquĩ nde. Earacuayã na ño aico nguiã ñee jẽje. Secuasú asaã saã ño nguiã ñee jẽje co. ¹⁸ Sã mbia riqui ucuasu raã naa jate no. Eĩ tae rã se abe secuasú raã naa jẽje. ¹⁹ Jẽaquiatute reĩ jẽ ndeae. Jẽingo ñimbirãcuãte eaquiataũ je ũquĩ. Seaquiataũ je abe jeñimbirãcuã ño. ²⁰ Ae icuã icuã mbeite riqui jẽje nae, ũquĩ je jẽingo ñimbirãcuã mbeite ũquĩ. Jembuquieĩ quieĩ chooño mose. Jembae mbutiã chooño mose abe no. Ucuasu raã naa mose abe no. Ucuasu mose jẽsiba rese abe no. ũquĩ je jẽingo ñimbirãcuãte ũquĩ. ²¹ Se quiatu que ũquĩ asaã saã eãte quia jẽje ra. Aico mingue chõchĩ jẽje. Acheẽ asi asi eã ñochĩ jẽje. Emo ucuasu raã naa mose, se quia secuasú asaã saã mbite nguiã esi. Earacuayã na ño aico nguiã ñee se co. ²² ¿Hebreos ũquĩ nde? Se abe chõ ñene. ¿Israelitas ũquĩ nde? Se abe chõ ñene. ¿Abraham nducucha riirĩ ũquĩ nde? Se abe chõ eno nde. ²³ ¿Cristo rimba chõ ũquĩ nde? Se quia Cristo rimba tuchi esi re. Earacuayã na ño aico nguiã ñee co. Se quia serecoteã tuchite Dios cheẽ nenei nenei mose esi re. Se quia mbia seiruã nua tuchi nguiã esi. Se quiatu ngue mbia sematã matã tuchi nguiã esi. Se quiatu ngue mbia seiquia serĩ serĩ tuchi nguiã. ²⁴ Judíos que seiruã nua mbei quia ra. Treinta y nueve azotes bei que eriqui seiruã nua nda. Emo mose treinta y nueve no. Emo mose eĩ sí no. Cinco veces chee. ²⁵ Ira que euru uru serese tres veces ra. Emo mose que sei sei sita je ra. Tres veces que barco ñimmi ama ndiite re seje ra. Emo mose que aitõ ama ndiite re barco eã nda. Abebi chõ ngue sequia ra. Nyaashĩ mii abe que amumba quia mbebi ra. Barco ñimmi mose seje. ²⁶ Acuata tuchi que sequia ra. Mbae icuã ngue seiquia arõ arõ tuchi quia ra. Secuata mose ama ndui. Seico mose abe sucha cuasu no. Seico mose turuquia rĩ no. Mbã mbae mbuquiachãsa que seiquia arõ arõ tuchi quia no nda. Seresenda abe que seiquia arõ tuchi no nda. Judíos eã abe que seiquia arõte no nda. Jesús quiato chooño abe que seiquia arõte no nda. ²⁷ Serisirõ ngue nyichuarõ arõ tuchi quia ra. Aqueã mocoĩ mocoĩ tuchi que se quia no nda. Seriãcuã mocoĩ mocoĩ tuchi que eriqui ra. Seisei abe tuchi que eriqui ra. Nyiiseĩ ngue airara mocoĩ mocoĩ tuchi quia ra. Seirao eã tuchi que eriqui no nda. ²⁸ ũquĩ mii eã ngue ra. Jesús quiato rese abe que aico ndua ndua ra. Sã iglesia jenda ja ja siqui tuchi Jesús rese, ae beite sequia ndua co. ²⁹ Jesús quiato mo mbae rasi raã mose, se abe seya eã ndasite riqui erese co. Emo icuã icuã mose Jesús quiato mo je, se abe paama i rasite aico co.

³⁰ Sequirãcuã ndese eã nda seya riqui nguiã. Sequirãcuã nea ndese chõ nda seya riqui nguiã. ³¹ Acheẽ ñooño eãte quia co. Dios quia secheẽ icuate nguiã. Jesucristo ru chõ Dios re. Sã mbia riqui ñee turã mbei erĩ. ³² Aretas resenda que serequia rei Damáscóo ra. Seiquia sacuã. Ae que alcalde ra. Ae que mbia mondo rei eiquesa raarõ nda. Setarõ nda eña nde. ³³ Hue rĩ ngue asoã mbei ra. Mbã que sembuquichi imbu irairu ye ra. Ventana ni. Eĩ ae que oso chee mbã icuã si ra.

12

Pablo ibatenda tea cuu

¹ Secuasú asaã saã ñochĩ nguiã co. Ae rese Dios semumae mae mbeite cuu nae, ũquĩ nguiatu tasenei jẽje. ²⁻³ Cosete que Dios sererao ibate cuu ra. Hace catorce años. Serete resebe Dios sererao reae. Seaĩ achõ ere no ae. Aicuayãte se. Dios ae eicua nguiã. ⁴ Dios que sererao ibate ra. Huee que ibatenda cheẽ turã achandu ra. —Ae erechandu nae, ũquĩ nda ereseneichĩ mbã je, i que Dios seje ra. ⁵ Ibatenda cheẽ andure secuasú asaã saã arondete raque se. Sequirãcuã je ra secuasú asaã saã eã. Sequirãcuã nea ndese chõ

seya riqui nguiã. Sequirãcuã nea mose quia Dios uquirãcuã mee tuchi nguiã seje cote. ⁶ Secuasu ra asaã saã ndaque, asaã ñooño eã ño se re. Dios quia que uquirãcuã mee seje ra. Mbae ja raã sacuaã. Secuasu ra asaã saã eãte jêje. Jê ae chõ nda jemaẽ nguiã serese seicua nonde. Jê ae chõ nda secheẽ jeñandu nguiã seicua no. ⁷ Ae rese Dios semumae cuu nae, ùquĩ eturã tuchite seje. Ûquĩ ndese maende que aico secuasu raã naa arõte raque ra. Nyebe Dios nyu raanguia mondo nguiã sequi rĩ. Satanás sembecoteã sacuaã. Dios semingo tochi sacuaã. ⁸ —Nyu raanguia esiqui sesi, ae tuchi rei que Cristo je tres veces ra. ⁹ Cristo que ñee seje ra. —Coche rei ñene. Sã ñiño ndei. Seturã nguiatu amondo mbeite nguiã ndeje co. Ndequirãcuã nea mose quiatu sequirãcuã amee tuchi nguiã ndeje, i que Cristo seje ra. Nyebe seyate riqui nguiã sequirãcuã nea ndese co cote. Ûquĩ mose quia Cristo riqui nguiã uquirãcuã mee tuchi seje co. ¹⁰ Nyebe seyate riqui nguiã sequirãcuã nea mose. Mbia ñee icuã mose abe. Mbia icuã icuã mose seje abe. Mbae eã mose seje abe no. Se mbae icuã irara mose Cristo rĩ abe no. Ûquĩ ja mose seyate riqui co. Cristo quiatu uquirãcuã mee tuchite nguiã seje, sequirãcuã nea mose.

Jeñia jembitorõ se oso nonde jendea, i Pablo

¹¹ Sebiãte raque se sí ñee turã mose seriĩ. Jê nguiatu jeñee turã mbite raque seriĩ, mbia ñee icuã mose seje. Ae rui jẽingo nae, ùquĩ eaquiutu ãte riqui sesi ùquĩ. Seaquiutu eã ndaque se abe. Ae rui jẽingo nae, Jesús cheẽ mbuchecuasa chooño ño ùquĩ nde. ¹² Dios cheẽ mbuchecuasa tuchi chõ se re. Seico mose jendese. Aico minguete que sequia seico mose jendese ra. Mbia mae sayã ngue asaã saã tuchi quia ra. Dios quirãcuã ngue siqui tuchi quia serese ra. ¹³ Aico turãte que sequia jêje ra. Sã aico turãte iglesias ataque jenda je no. Eĩ si. Jê miĩ je chõ ngue “mbae jembu seje” ae eã nguiã. ¿Ùquĩ eicuãte jêje re? “Mbae jembu seje”, iã mose jêje.

¹⁴ Aico icoquiutu oso nonde jendea a. Co rei tres veces co cote. Co aico oso jendea co. “Mbae jembu seje” aeã tuchi ra jêje. Mbae achosei chiãte jembae. Jesús rese jẽingo mose, ùquĩ miĩ ño achosei nguiã. Jendu rã ño aico nguiã jêje. Sã mbia riirĩ ndiqui mbae mo mondo mondo eã ngu je no. Sã eru chõ ndiqui mbae mondo mondo nguiirĩ je no. ¹⁵ Sembae amondo ja bite raque jẽingo sacuaã Cristo rui. Sereco abe amondo bite raque jẽingo sacuaã Cristo rui. Sechesequa tuchi mose jendese, ¿mbaerã jẽingo nyesequa eãte serese jê nde? ¹⁶ “Mbae jembu seje”, ae ãte que sequia jêje. Ûquĩ jẽicuate raque. ¿Mbaerã nguiã jẽingo ñee ñooño nde? “Pablo que nandembĩrĩ irĩ nda”, ¿mbaerã jenyere? ¹⁷ ¿Mbaerã jeñee ùquĩ nde? Ae amondo jêje jembaaquiutu sacuaã nae, ùquĩ abe que jembĩrĩ irĩ eãte resẽ. Ûquĩ ngue jembae isiãte sembaerã ndesẽ. ¹⁸ Tito que amondo jendea nanderesenda rese resẽ. Ae abe que jembae isiãte resẽ. Se rã si chõ ngue eriqui jêje resẽ.

¹⁹ Achiquisã eãte sequia jësi co resẽ. Dios résaã chõ aico nguiã ñee jêje. Cristo rĩ ño aico nguiã ñee jêje. Se mbae mo naa mose jêje, jẽingo tuchi sacuaã Cristo rese chõ ñene. ²⁰ Seso mose jendea, sembia eã arõte. Ae sebite se, ùquĩ jësaã eã arõte seje. Ae jembite nae, ùquĩ asaã eã arõte se abe jêje. Jeñee icuã icuã nda jenyue serésaa reae. Jẽingo icuã icuã ja ra jenyue reae. Jenongue mbae ra jenyosei chosei jê sí chõ ndeae. Jenguasu ra jësaã ñooño sésaã reae. ²¹ Seso mose jendea ra Dios sembia eã tuchi se mae mose jëicuã ndese reae. Seireĩte ra jëicuã ndese mae mose. Jëicuã cose ndare si jêhui eã mbei chõchĩ namo nyee. Ae jeninisiã nae, ùquĩ ndese jẽingo bei chõchĩ ùquĩ. Ae jendu eã nae, ùquĩ ndese abe jẽingo bei chõchĩ ùquĩ no. Mbae aba ireingua rese jẽingo bei chõchĩ ùquĩ.

13

Hui bei Pablo saludar i mbia je

¹ Aso quia jendea aque cote. Co rei tres veces co cote. Emo miĩ sembiirandu mose mbae icuã ndese, achanduchõ nda se. Emo nyeremo ñee mose, aque mose quiutu ra

echeẽ achandu cote. ² Ae eicuã saã saã nguia nyii nae, sã aico ñee asi asite ee nyii no. Ûquĩ sí je chõ aico nguia ã mbesa ã. Huiicuã ndecha eã mose ra achimbirãcuã eã ee cote. Jẽ ja je chõ aico nguia ñee ùquĩ. Seico mose raanguia jendese. ³ —¿Ma Cristo quirãcuã ndiqui Pablo rese ma nde? jenyẽ equia nyii nae. Cristo quirãcuã ndese ra jemaẽ secheẽ asi mose quiatu jẽje cote. Cristo que mbae saã ja tuchi jẽje uquirãcuã je ra. ⁴ Cristo mbia mbucha quia ira rese iquia nyii nae, aque mose que equirãcuã neate rei ra. Dios quirãcuã nguia emingo bei nguia co cote. Sã Cristo quirãcuã nea ndei nyii no. Eĩ ño urequirãcuã nea ure namo nde. Ureico rei nguia erese co. Ae chõ uremingo nguia Dios quirãcuã je co. Ae quirãcuã je ra ureico jembaaquiato quiatu.

⁵ Jẽ ae chõ jendua. —¿Cristo aicua quia sechiangui re re? jenyẽ ja ja chõ jeñiangui re. Jemaẽ nguia jenyiese sí. Jẽ Cristo icua chooñoa mose, Cristo riqui jeñiangui re ùquĩ. ¿Ûquĩ ndese jẽingo iranuate re? ⁶ Ure quia Cristo ureicua chooñoa nguia ã. Ûquĩ ndese nda jẽirandu rã seje chã. ⁷ Urecheẽ tuchi quia Dios je jeniã ã. Jẽ mbae icuã naa eã sacua. Mbia ndua turã sacua eã ure riĩ ño ureico nguia ñee Dios je jeniã ã. Jẽ mbae icuã naa eã sacua ño ñene. Mbia ra ñee icuã ndaque ure je. ⁸ Mbae icuã mo nandesã aroneate Dios cheẽ ndobeishĩ. Mbae turã nguiatu nandesã Dios cheẽ mose. Dios cheẽ nguia ichõiño eã nde. ⁹ Coche mbia riqui nguia ñee icuã icuã ure je. Jẽ nguia jẽingo bei Cristo quirãcuã ndese. Jẽ nda Cristo jẽicua tuchi rã seje chã. ¹⁰ Secheẽ asi asi ambesa quia seso nonde jendea a. Se ñee asi eã sacua seico mose jendese. Dios quiatu ngue uquirãcuã mee nguia seje. Jembiicuã sacua eã ño ngue Dios uquirãcuã mee nguia seje. Jemingo tuchi sacua Cristo rese chõ ñene.

¹¹ Aico hui secheẽ mbesa mbesa si a cote, Seresenda. Jesucristo jẽicua tuchi quia. Jẽya bei tuchi jẽingo erese. Jẽingo turã mbei chõ nguia jenyiese. Ûquĩ mose ra Dios siqui tuchi jendese. Ae ra jemingo turã mbei jenyiese. ¹² Saludar jenyẽ turã mbei quiato quia jenyue. ¹³ Jesús quiato a jenda saludos mondo quia jẽje aque. ¹⁴ Sã Jesucristo turã ndiqui bei jendese. Sã Dios riqui nyesecua tuchi jendese. Sã Espiritu Turã ndiqui bei jendese no. Amén.

LA CARTA DEL APOSTOL SAN PABLO A LOS GÁLATAS

Ilo ucheë mbesa mondo Galacia jenda je

¹ Pablo chõ se re. Jesucristo chiirabo chõ se re. Mbia mo ngue seirabo eã nguiã. Dios ae chõ ngue seirabo ra. Ucheë nenei nenei sacua. Ae sí que Jesucristo raaque mbuquera ra. ² Seresenda ja rese chõ aico nguiã ã mbesa jêje a. Jesús quiato Galacia jenda ja je.

³ Sã Dios turã ndiqui bei jendese. Sã ae riqui jembia bei. Nanderu chõ ae re. Sã Jesucristo turã abe riqui jendese. ⁴ Ae quiatu ngue mano nguiã nandeicuã ndibishorõ. Nandembui sacua mbae icua si. Ae icua ndese nandeico mae mae nae, uquĩ si. Nanderu cheë nguire chõ ngue Jesucristo mano nguiã nande je. ⁵ Sã mbia riqui ñee turã mbei Dios je. Amén.

Cristo mi mbia rirõsa huiicuã si

⁶ ¿Mbaerã jëingo hui hui jei Dios si uquĩ nde? Ae sí chõ ngue “jëingo Cristo turã ndese” i jêje resë. ¿Mbaerã jëingo Cristo cheë abi abi re? Siqui emo ñee ndese re. ⁷ Nyeremo eã ño Cristo icha ñeenda re. Uturã mi je chõ Cristo riqui nguiã nandemingo bei. Nandechisaã turã je eã ño Cristo riqui nguiã nandemingo bei co. —Nandechisaã turã je ra Cristo nandemingo bei, i chõchĩ mbia nguiã jêje uquĩ. ⁸ Acheë se quia jêje nyii nae. —Uturã je achõ ño Dios riqui nguiã nandemingo bei co, ae se quia jêje nyii nae. Eĩ mbei chõ ñene. —Hue rĩ eã ño Dios icha re, i mose emo jêje, sã Dios uquĩ mbasi tuchi. —Hue rĩ eã ño Dios icha re, se abe i mose, sã Dios sembasi tuchi se abe. Angel ibatenda abe mbasi rae, uquĩ ñee mose. ⁹ Acheë namo ngue jêje, uquĩ taseneimbe jêje: —Nandechisaã turã je chõ Dios riqui nguiã nandemingo bei co, i mose emo, sã Dios uquĩ mbasi tuchi. Ae acheë jêje nyii nae, uquĩ abi tuchi chõ eriqui nguiã ñee uquĩ. ¹⁰ “Sã mbia riqui turã seje”, ae ãte quia co. “Dios ae chõ nda seisi turã nguiã”, ae chõ nguiã co. “Sã mbia riqui turã seje”, se i bei mose, eĩ nda Cristo rimba eãte rei se.

*Cristo chimbaaqui*atu chee que Pablo ra

¹¹ Tacheë nyecua jêje, Seresenda. Dios icha asenei nguia jêje nae, secheë ae eã ño uquĩ nde. Mbia cheë ae eã ño eno nde. Dios cheë ae chõ ñene. ¹² Mbia mo ngue esenei eãte seje ra. Jesucristo mi ño ngue esenei nguiã seje. ¹³ Jëirandu que equia serese cose resë. Jesús icuayã mose se nyii. Seico mose judíos ramei ñee ndui. Siqui rocoĩ Jesús cheë ndui. Seicuã tuchite que eriqui Dios quiato je nyii ra. “Jesús quiato tambutiã ja tuchi”, ae que se quia aque mose ra. ¹⁴ Moisés cheë ndui que aico tuchi rei sembuchejaa ja si ra. Seramei ñee ndui que aico tuchi rei quia mbia ja si ra. ¹⁵ Aquere que Dios seisi Jesús quiatorã cote ra. Dios que seirabo cose seã mose nyii ra. Uturã je que seirabo ra. ¹⁶ Dios que nguiĩ teacuquia seje cote ra. Se Dios riirĩ nenei nenei sacua judíos eã je. “¿Mañi ae ra se re?” ae eã ngue oso ñee mbia mo je ra. Dios nguiĩ ndeacuquia mose seje. ¹⁷ Jerusalén abe que asoã no nda. “¿Mañi ae ra se re?” ae eã ngue oso hue jenda Jesús chimbaaquiату ñiinda je no nda. Arabia que aso jei se ae ra. Aquere que aso nyebi Damasco ra.

¹⁸ Tres años mose ramo ngue aso Jerusalén cote ra. Pedro rea que aso aque mose ra. Hue que aico erese quince días ra. ¹⁹ Jacobo abe rese que amae huee ra. Jesús nongue que ae ra. Uquĩ mi ndese que amae Jesús chimbaaquiату ra. ²⁰ Acheë ñoñoa tuchi chõ nguiã ã mbesa jêje a. Dios secheë ñandute quia co. ²¹ Jerusalén ngue asecha oso Siria cote ra. Cilicia abe no. ²² Jesús quiato Judea jenda que seicuayã mbeite quia aque mose ra. ²³ Jirandu randuchõ ño ngue equia serese ra. “Ae icua icua ndiqui Jesús quiato je nyii nae, aque riqui Jesús renei nenei co cote. Mbia Jesús icua sacua”, i que equia jirandu randu serese ra. ²⁴ Nyebe eyate riqui nguiã serese cote. Ñee turã turã Dios je.

2

Cristo chimbaaquiatu ataque Pablo isi turã

¹ Catorce años mose ramo ngue asobe Jerusalén cote ra. Bernabé rese. Tito abe que arao serese ra. ² Dios ae que “eso Jerusalén” i seje ra. Huee que acheẽ nyecuayã Jesús quiato rerecua ja je ra. Ae asenei senei mbeite quia Dios cheẽ judíos eã je co nae, ùquĩ nii ngue acheẽ ja Jesús quiato rerecua je ra. Ûquĩ secheẽ icua sacuã. Ûquĩ sembaaquiatu sacuã se Dios cheẽ abi mose. ³ “Circuncisión nandesã na Tito je”, i ãte que Jesús quiato rerecua quia ra. Judío eã ndaque Tito. ⁴ Jesús quiato chooño abe que chi hue Jesús quiato tuchi mumbara mbara ra. Ndua ndua rei que equia ra. Ure mbae icuã naa naa sacuã ndaque. “Sã circuncisión naa naa Moisés cheẽ ndui”, i rei que equia urerĩ nda. Ebiã tuchi que eriqui ureico mose Cristo miĩ ndese ra. “Sã eriqui judíos ramei ñee ndui bei”, i chõ ngue equia ra. ⁵ Ûquĩ ñee ngue uresiquisã tuchi quia ra. Jẽingo bei sacuã Dios cheẽ turã miĩ ndese. “Jesucristo turã ae nandemingo bei nguiã co”, jenyẽ sacuã. Jẽingo rocoĩ judíos rerecua cheẽ ndui. ⁶ Dios quiato rerecua que sembaaquiatu quiatu eãte mbae mo nii nda. “Ã abe esenei senei nguia judíos eã je”, i ãte que ererecua seje ra. Dios quiato rerecua tuchi ùquĩ ndeae. Aicuayãte se. “Ererecua achõ ño taisi turã”, i ãte Dios. Nandechiã ndese quia eriqui nguiã mae ja. ⁷ Jesús quiato rerecua iate que serese ra. Se Dios cheẽ nenei nenei mose judíos eã je. Ererecua que ñee nyue ra. —Sã Dios Pedro mondo judíos je no jẽ. Dios cheẽ nenei nenei sacuã no. Eĩ si chõ Dios Pablo mondo quia judíos eã je re. Dios cheẽ nenei nenei sacuã ee re, i que ererecua ñee nyue ra. ⁸ Sã Dios Pedro mondo judíos je no. Dios sí chõ ngue semondo nguiã judíos eã je no. Se echeẽ nenei nenei sacuã ee. Dios ùquĩ mingõ bei nonde. ⁹ —Dios chõ Pablo mondo quia judíos eã je re, i ja que Jesús quiato rerecua ja cote ra. Jacobo. Pedro rese. Juan ndese. Nyebe eriqui nguiã seo isi isi. Bernabé o abe isi no. —Coche jẽingo nguiã Dios cheẽ nenei nenei judíos eã je. Ure Dios cheẽ nenei nenei mose judíos je, i que ñee turã ja ure je ra. ¹⁰ —Mbaecha reã je chõ jẽingo mbae mondo mondo, i miĩ ño ngue ure je ra. Ûquĩ ño asaã saã mbei rei nguiã co.

Pablo ñee asi Pedro je Antioquíaa

¹¹ Pedro tu mose Antioquíaa, acheẽ asite que ee ra. Mbae icuã nguiatu que esaã huee ra. ¹² Quiaru turãte que equia judíos eã ndese nyii ra. Aquere que judíos mo ngaẽ ngasẽ cote ra. Jacobo resenda. Pedro que quiaru sereã judíos eã ndese cote ra. Eireĩte que judíos si ra. Nyebe nyiicuasẽ nguiã judíos eã si cote. Ucuasu raã naa esi cote. Judíos abe raque Jesús quiato. ¹³ Nyebe Jesús quiato judíos abe nyiicuasẽ nguiã judíos eã si cote. Pedro rui sí. Ucuasu raã naa judíos eã si cote. Bernabé abe chee que nyiicuasẽ judíos eã si cote ra. Pedro rui si no. ¹⁴ Dios cheẽ ndui si eã ño ngue Pedro riqui nguiã. Judíos nguesenda rese. Nyiicuasẽ mose judíos eã si. Nyebe acheẽ asi nguiã Pedro je mbiásaa. —Nde Jesucristo icua mose, erehui que judíos ramei ñee si cote ra. Judío raque nde. ¿Mbaerã ereico ñee judíos eã je re? “Judíos ramei ñee ndui jẽingo”, i ee re.

Judíos abe ra siqui bei Jesucristo icua mose

¹⁵ Judíos chõ ndaque nande. Judíos eã na eã ndaque nande. Mbia icuã na eã ndaque nande. ¹⁶ Emo miĩ siqui turãyã mbeite quia Moisés cheẽ ndui si co. Dios emingo bei sacuã. Moisés cheẽ mumbasa ja tuchi chõ nande re. Jesucristo icua mose quiatu ra Dios nandemingo bei. Nyebe nandeico nguiã Jesucristo icua ã. Dios nandemingo bei sacuã. Moisés cheẽ ndui si nandeico eã ndaque, ae que ee ra. ¹⁷ “Cristo que mano nandeicuã nii nda”, nande bei equia ã. ¿Ûquĩ ño nandembĩcuã nguia re? Tei. Cristo riqui nandembĩcuã eã mbei co. Cristo quiatu nandembĩrandu quia nandeicuã ndese co resẽ. ¹⁸ Se Jesucristo icua mose, judíos ramei ñee si que ahui cote ra. Se siqui si mose erui, eicuãte ùquĩ cote. ¹⁹ Moisés cheẽ ngue aicuate rei ra. Ûquĩ ngue seicuã mbutiã eã mbei ra. Moisés cheẽ sí chõ ngue sembiirandu Jesucristo rese cote ra. Jesucristo que seicuã mbutiã cote ra. Seico bei nonde cote. ²⁰ Cristo mano mose, se abe que amano erese ra.

Se ae aicoã nguiã co cote. Cristo riqui sechiangui re co cote. Equirãcuã je chõ aico nguiã mbae rãã naa co. Dios riirĩ aicuate quia co. Ae chõ ngue nyesequa tuchi nguiã serese. Ae chõ ngue mano nguiã seicuã nii. ²¹ Dios turã aisiteã teã eãte quia co. Moisés cheẽ mumbayã mose eã ño Dios riqui nguiã aba icuã mbutiã. Ûquinde rae, Jesús manoño.

3

Moisés chimbesa aba mingo bei aronea

¹ ¿Mbaerã jëaquiatuã tuchi riqui re, Galacia jenda? ¿Aba jembaaquiatu icuã tuchi quia Cristo riĩ nde? Cristo mano ngue asenei tuchi rei jëje resẽ. Jëisi turãte rei que equia nyii. ¿Mbaerã jëingo hui serĩ serĩte esi cote re? ² Moisés cheẽ mumbayã mose eã ño Espiritu Turã ique nguiã jëiangui re. Jë Jesucristo icua mose chõ ngue re. Se Jesucristo renei mose jëje chõ ngue re. ³ ¿Mbaerã jëaquiatuãte riqui re? Moisés chimbesa que jëicuã mbutiã eã ndesẽ. ¿Mbaerã jëingo siqui beite erese re? Siqui rocoĩ Jesucristo miĩ ndese. ⁴ Mbae rasi que jësaã tuchi quia Jesucristo riĩ nyii resẽ. Jëhui eã ño esi jë. Ì nda ae rasi jësaã nguia nyii nae, ùquĩ iru eã. ⁵ ¿Mbaerã Dios Espiritu Turã mondo jëje chã? ¿Mbaerã ño Dios mbia mae sayã naa naa jëje chã? ¿Moisés cheẽ jemumbayãte quiatu quia ee re? Tei. Ûquĩ eã ñene. Jë nguia Jesucristo jëicuate nguiã ùquĩ.

⁶ Sã Abraham no. Abraham ngue Dios icuate quia ra. Nyebe Dios Abraham isi turã nguiã. ⁷ Nyebe Dios riqui nguiã “Abraham nducucha” i huiicuaa je co. ⁸ “Judíos eã abe ra Dios riirĩ icua. Ûquĩ abe ra Dios mingo bei”, i que embesa ji cose ra. “ ‘Nderĩĩ nda aico turã mbia ja je’, i que Dios Abraham je ra”, i que embesa ji ra. ⁹ Sã Abraham Dios icua tuchi no. Sã Dios turãte riqui ee no. Ae Dios icua quia namo nae, ùquĩ je abe chõ Dios turã ndiqui nguiã Abraham ndese.

¹⁰ Sã emo ndiqui ñee no. “Moisés cheẽ ndui taico bei Dios semingo bei nonde”, sã emo ndiqui i no. Ûquĩ nda nyoĩ chõ tata cuasu. Sã embesa ji riqui ñee no. “Emo embesa ji cheẽ mumba mbirĩ mose, echeẽ mumba tuchi raanguia chõ ùquĩ nde”, i que embesa ji ra. ¹¹ Dios ra ñee jiri jiriã emo nii. “Co que embesa ji cheẽ mumbayã mbei quia ra. Nyebe taisi turã”, i eã nda Dios emo je. Ae je Dios riqui “co taisi turã”, i nae, Dios icuate quiatu nguiã ee ùquĩ. Nyebe ra ùquĩ ndeco siqui bei. ¹² “Dios cheẽ mumba eã mbei mose quia ra Dios nandemingo bei”, i mose emo, Dios icuayã ño nguiã ùquĩ. ¹³ Cristo que nandembui Moisés cheẽ si cote ra. Nande Moisés cheẽ mumba mose, ùquĩ nda nandemombo eã tata cuasu cote. Cristo quiatu ngue mbae rasi aba ireingua saã tuchi nguiã nande je. Sã embesa ji riqui ñee no. “Aba ireingua tuchi mae mose embucheseco ji ira resenda rese”, i que embesa ji cose ra. Jesús mbucha nonde ira rese. ¹⁴ Dios turã sacuã judíos eã je chõ ngue Jesús mbae rasi aba ireingua saã tuchi nguiã. Dios judíos eã mingo bei sacuã ño ngue re. Sã Dios turãte riqui Abraham je nyii no nae. Eĩ si sacuã Dios turã judíos eã je chõ ngue eno nde.

Dios contrato saã Abraham je

¹⁵ Sã mbia mo ndiqui contrato raã emo je no. Sã firmar i embesa miĩ no. “Eĩ nguiatu”, i aroneate emo ee cote. Embesa jite quia cote re. ¹⁶ Eĩ si que Dios contrato raã Abraham je no nda. Abraham ndiirĩ je abe no. “Abraham ndiirĩ ja je”, i eã ngue embesa ji ra. “Abraham ndiirĩ je”, i chõ ngue ñee nguiã aque miĩ je. Cristo riĩ ño ngue ñee nguiã. ¹⁷ Tacheẽ nyecua tuchi rã jëje. Dios que contrato saã Abraham je cose ra. —Mbae tasaã ndeje. Nderiirĩ je abe no, i que Dios Abraham je cose ra. Mbesa que aque mose ra. Aquere que Moisés ucheẽ mbesa cote ra. Aquere tuchi 430 años ua mose cote. Moisés cheẽ ngue contrato mbutiã aroneãte ra. Dios cheẽte quiatu ngue contrato re. ¹⁸ Dios que ñee Abraham je cose ra. —Mbae tasaãno ndeje. Nde mbae mo naa ndocoĩ seje, i que Dios ñee Abraham je cose ra. —Nde Moisés cheẽ mumbayã mose quiatu mbae tasaã ndeje, iã ngue Dios ee ra. —Nde mbae mo naa ndocoĩ, i chõ ngue ee ra. ¹⁹ ¿Mbaerã ño nda Moisés

chimbese cheẽ nandechandu chã? Mbia huiicua icua sacua ño Moisés chimbesa re. Cristo tu mose chõ ngue Moisés chimbesa cheẽ ua nguiã. Sã Dios contrato naa Abraham ndiirĩ je nyii no. Cristo je chõ eriqui nguiã “Abraham ndiirĩ” i. Dios rane ngue ucheẽ mondo ángeles je ra. Angeles que emondo Moisés je cote ra. Aquere que Moisés embesa mbia je cote ra. Mbia echeẽ mumbayã nonde. ²⁰ Sã Dios contrato naa Abraham je no. Ae sí chõ ngue ñee nguiã Abraham je. “Secheẽ esenei Abraham je”, iã ngue Dios emo mondo ñee Abraham je ra.

Nandeico Cristo icua ã cote; Moisés cheẽ ndui siqui rocoĩ

²¹ Ae contrato Dios saã Abraham je nae, Moisés chimbesa ùquĩ mbutiã aroneate quia co. Moisés chimbesa aba mingo bei arõ mose, eĩ nda Jesucristo manoate rei. Moisés chimbesa aba mingo bei aroneate. Nandechiã abe mbitirõ aroneate no. ²² “Mbia icua ja chõ ñene”, i que embesa ji ra. Nyebe nandemo mbae mo turã naa aroneate siqui bei sacua. Jesucristo icuasa quia ra Dios mingo bei ucheẽ nguire. Jesucristo icuate quia ñene. Mbae mo naa ndocoĩ Dios je nyii.

²³ Cristo tu nonde que nandeico rei ñee nda. “Moisés cheẽ nandemumbayã” i rei ra. Moisés cheẽ ngue nandemumbayã aroneate quia ra. “Cristo ra tu” i que equia nande je, ùquĩ ño ngue nandesaarõ arõ nguia ra. ²⁴ Mbia mbaaquiatusa rã ño Moisés chimbesa re. Mbia mbiirandu que Cristo rese ra. Mbia siqui nonde Cristo miĩ ndese tu mose cote. Cristo icua nonde. Dios Cristo icuasa isi turã mbei nonde cote. ²⁵ Nandeico Cristo icua ã cote. Nyebe ra nandeicoã Moisés cheẽ ndui cote. ²⁶ Nandeico Jesucristo icua jate ã. Nyebe Dios riirĩ ja chõ nande re. ²⁷ Nandembucha ji nandeico mose Cristo riĩ, Cristo rã sí chõ nandeico nguiã ã cote. ²⁸ Nande Jesucristo icua ja mose, nyiabiã ja chõ nandeico nguiã ã cote. Judíos ra siqui turã judíos eã je cote. Ererecua ra siqui turã ngũimba je cote no. Mbia ra siqui turã ja nyiese no. Aque miĩ na tuchi chõ nda nandeico ja nguiã Cristo rese cote. ²⁹ Cristo icuasa chõ jẽingo nguiã ùquĩ. Nyebe Abraham ndiirĩ abe chõ jẽingo nguiã ùquĩ no. Ae turã nda Dios saã Abraham ndiirĩ je nae, jẽje chõ nda eraã nguiã.

4

¹ Sã mbaecha riri mo no. Sã mbae raã aroneate ae ae uñetẽ mose no. Erimba rã si chõ nda eriqui mbia cheẽ mumba eã. Mbaecha riirĩ ndaque. ² Ae rese eriqui ndua nae, ùquĩ ndese eriqui aroneate. Uraarõsa nduasa achõ ndese chõ nda eriqui. Ucuasu mose ramo ño nda eriqui ndua ae ae cote. “Co tasaã”, i cote. ³ Eĩ si chõ nande nyii re. Mbia riirĩ na si. Jesús tu nonde. Mbia cheẽ achõ ndui chõ ngue nandeico nyii ra. Jesús tu nonde. ⁴ Dios que “coche ñene” i cote ra. Ùquĩ mose que nguiirĩ mondo mbia je íbii cote ra. Dios riirĩ ngue tu mbiarã nda. Moisés cheẽ ngue emumbayã mbei quia eico mose íbii ra. ⁵ Ae que tu nandembui bei Moisés cheẽ si cote ra. Dios nandererequia sacua nguiirĩ na cote. ⁶ Dios riirĩ ño nande cote re. Nyebe Dios Espiritu Turã mondo nguiã nandechiangui re cote. Nyebe nandeico nguiã Paba i tuchi Dios je namo cote. ⁷ Dios riiri tuchi chõ nande cote re. Erimbachõ eã. Nyebe ra Dios mbae mondo tuchi nande je cote ucheẽ nguire.

Pablo ndua tuchi Jesús quiato rese

⁸ Jẽ ngue Dios jẽicuayãte quia nyii ra. Dios abareã ndese chõ ngue jẽingo aque mose ra. ⁹ Ùquĩ jẽingo Dios icuate ùquĩ cote. Dios abe riqui jẽicuate co cote. ¿Mbaerã nguia jẽingo hui serĩte esi cote re? ¿Mbaerã nda jẽingo sí dios abareã nimbarã nde? Dios abareã quirãcuã eãte nyeresẽ. Mbae mo naa aroneãte nande je resẽ. ¹⁰ “Co tenda mbae mo nandesã Dios je Dios nandesi turã sacua”, jenyẽ chõchĩ nguiã ùquĩ. “Co nyasi mbae mo nandesã Dios je Dios nandesi turã sacua”, jenyẽ chõchĩ nguiã ùquĩ no. Eicua tuchi chõ ùquĩ nde. ¹¹ Jaembaaquiātu quiātu iru chõ se reae.

¹² Se rã ño jẽingo ae. Sã aico eãte Moisés chimbesa cheẽ ndui sí co no. Sã jẽ abe jẽingo eãte erui nyii no. Sã jẽicua eãte emo mose seje no. ¹³ Se Jesucristo renei namo mose jẽje, serasite quiātu ngue se aque mose re. Ùquĩ jẽicuate quia ùquĩ. ¹⁴ Mbae rasi que asaã

tuchite rei aque mose ra. Serasi que jêucuyã eãte quia aque mose ra. Serasi que jêisiteã eãte quia aque mose no nda. Angeles que jêsaã ño seisi turã aque mose ra. Jesucristo que jêsaã ño seisi turã aque mose ra. ¹⁵ Seisi turã tuchi que se aque mose ra. Jendesa que jemondo bite quia seje aque mose ra. ¿Mbaerã jêingo secheẽ isi sereãte cote re? ¹⁶ Dios cheẽ ngue asenei turã tuchi quia jêje. ¿Ûquĩ je chõ jêingo seucuãyãte cote re? ¹⁷ Ae riqui jembaaquiatu icuã icuãte ùquĩ nae, ùquĩ siqui sete raque jendese ùquĩ. Mbae turã ñii eã ño ñene. Jembiiicha sacua ure si chõ ñene. Jêingo sacua ùquĩ achõ ndese chõ ñene. ¹⁸ Coche rei ùquĩ siqui jendese Dios cheẽ nenei nenei turã mose jêje. Sã eriqui jembaaquiatu turã turã mbei. Seicoã mose abe jendese. ¹⁹ ¿Mbaerã jêingo sembia eã tuchi ùquĩ nde? Jêhui serĩ serĩ mose Dios turã si. Sã ãquẽ ndasi riqui cuña je no. Eĩ ño seya eã ndasi nguiã jendese co. Jêingo sacua Cristo rã si. ²⁰ ¿Mañi ae ra se quia jêje re? Aico rã nda jendese chã. Se ñee tuchi nonde jêje. Secheẽ mbesa rocoĩ mondo jêje.

Sã Abraham ndiirĩ nyeremo no

²¹ ¿Mbaerã jêingo ñee nde? “Moisés cheẽ nandemumbayã, Dios nandemingo bei sacua”, ¿mbaerã jêingo i re? Moisés cheẽ jêicuayãte quia reae. ²² Moisés chimbesa chõ nandembiirandu nguiã Abraham rese co. Abraham ndiirĩ nyeremo ndei que ra. Co miĩ ngue eninisite riirĩ nda. Sara, i que eninisite je ra. Agar, i que erimba je ra. Aque abe que Abraham nbiirĩ ndei ra. Nyebe Abraham ndiirĩ nyeremo ndei nguiã. ²³ Mbia rã si chõ ngue erimba tiirĩ ee ra. Dios ñeende ee nyii quiatu que eninisite tiirĩ ee ra. —Neninisi ra tiirĩ ndeje, sã Dios i ee nyii no. Ûquĩ io sacua ño eninisite tiirĩ cote ra. ²⁴ Nandemundua sacua ño ùquĩ nde. Contrato rã si chõ Sara re. Contrato mó na ño Agar no nde. Ae contrato Dios saã Moisés je Sinaí no nae, Agar rã si chõ ùquĩ nde. Ae siqui bei quia ùquĩ contrato rui nae, mbia rimbachõ na ño ùquĩ nde. ²⁵ Sinaí rã si chõ Agar re. Arabia jenda chõ Sinaí re. Jerusalén na si chõ Sinaí re. Ae siqui quia Jerusalén nae, erimba rã si chõ ùquĩ nde. Erimba rã si chõ judíos ja no nde. Jesucristo icua rocoĩ. ²⁶ Jerusalén mo ño chĩ nguiã ibate pe no. Ae mbia hue jenda nae, mbia rimba mo eã ño ùquĩ nde. Hue jenda chõ nande abe no nde. ²⁷ Sã embesa ji riqui ñee no:

Ndeya chõ eico, tiiriã je.

Ndeya chõ eico, ãquẽ ndasi raãsa eã.

Nderiirĩ nda eretea tuchi cote.

Eru chirirõ nguia ra tiirĩ tuchi eru rerecua si cote,

i que embesa ji ra. ²⁸ Dios riirĩ tuchi chõ nande re. “Seriirĩ tuchi ra ùquĩ”, ã i Dios nanderiĩ nyii no. Sã ñee Isaac ñii nyii no. ²⁹ Sã Dios ñee Abraham je nyii no. “Nderiirina tamondo ndeje Isaac”, sã i ee no. Sã Isaac nyaacuquia Espiritu Turã ñii no. Sã Agar riirĩ icuã icuã Isaac je cote no. Eĩ si chõ namo no nde. Ae siqui tuchi judíos cheẽ ndui nae, ùquĩ icuã icuã ndiqui namo nande je ã no. ³⁰ ¿Mañi ño embesa ji cheẽ ña? “Erimba emombo chõ. Eriirĩ ndese. Eninisite riirĩ na eã ño erimba riirĩ nde. Erimba riirĩ siqui aroneate eninisite riirĩ ndese”, i que embesa ji ra. Eĩ si chõ ae siqui tuchi quia judíos cheẽ ndui nae. Siqui aroneate Jesús quiatorã. ³¹ Erimba riirĩ na eã tuchi chõ nande re. Eninisite riirĩ na tuchi chõ nande re. Nande Jesús icua mose.

5

Cristo nandembui Moisés chimbesa si cote

¹ Cristo que nandembui Moisés chimbesa si cote ra. “Moisés chimbesa cheẽ nda semingo bei”, jenyechĩ nda jê. Ae ra i ùquĩ, mbia rimba rã ño ùquĩ nde. ² Tacheẽ nyecua tuchi rã jêje. Circuncisión nda jêsaãchĩ. Moisés chimbesa cheẽ ndui ra jêingochĩ cote jê. Cristo miĩ ndese chõ jêingo cote. Jê circuncisión naa mose, jêingo turã eã ño nguiã Cristo rui ùquĩ cote. ³ “Moisés chimbesa cheẽ tamumbayã mbei”, i raanguia chõ circuncisión nde. ⁴ “Dios ra seisi turã seico bei mose Moisés cheẽ ndui” i mose jemo, Dios chẽẽ abi tuchi chõ ùquĩ nde. Dios turã si nyiicuasẽ tuchi chõ ùquĩ nde. ⁵ Espiritu Turã ndiqui nanderese

co. Nande Jesucristo nandeicuate quia ã. Nyebe ra Dios nandeisi turã Jesucristo mii nii. ⁶ Nandeico mose Jesucristo rese, eĩ ja chõ nande ee re. Ae circuncisión saã nae, ae circuncisión saã eã no nae, eĩ ja chõ nande ee re. Jesucristo icua mose, ùquĩ nguia eturã tuchi re. Nandechesecua mose mbia rese, ùquĩ nguia eturã tuchi no nde. ⁷ Jẽingo turãte rei que equia nyii. ¿Aba jembui Cristo cheẽ si cote re? ⁸ Dios eã ño ngue jembui nguia esi. Dios chõ ngue “jenyu” i nguia jẽje. ⁹ Sã levadura riqui no. Eñetẽ mondo mose mbichae ye, mbuquiche ja rae. ¹⁰ Dios ra jendeaquiatu bei. Mbua mo jembuicha eã sacua esi. Ae jembuicha serite quia esi nae, ùquĩ nda Dios mbasi. Ererecua raque ra emo. ¹¹ “Circuncisión jẽsaã na”, ae ãte quia mbua mo je co. “Circuncisión jẽsaã na”, se i mose, eĩ nda judíos icua icua eãte rei seje. Eĩ nda judíos paama i ãte rei seje Cristo mano nenei mose mbua je. ¹² Ae “circuncisión jẽsaã na”, i quia jẽje nae, ùquĩ nda nguete chisia tuchi rã jendecha chã.

¹³ Jesucristo que jembui Moisés cheẽ si ra, Seresenda. Ae icua jenyosei chosei quia nae, ùquĩ ndese ra jẽingochĩ cote jẽ. Jẽingo turã nguia quia jenyue. Jenyesequa tuchi quiatu quia jenyese. ¹⁴ Dios cheẽ ja tuchi chõ ã nde: “Sã ereico nyesequa ndechiese no. Eĩ ere si chõ nyesequa emo ndese”, i que Dios cheẽ nda. Nandechesecua mose mbia rese, Dios cheẽ nandemumbayã tuchi chõ nguia ùquĩ. ¹⁵ Paama jenyechĩ nda jenyue jẽ. Jenyishu shiuchĩ nda eno jẽ. Ùquĩ naa naa mose ra jẽhui ja ja chee Cristo si.

Ae icua nandehosei chosei quia nae, ùquĩ si nandehui

¹⁶ Tacheẽ nyecua tuchi jẽje. Espiritu Turã ñee ndui bei jẽingo. Ae icua jenyosei chosei quia nae, ùquĩ ndese nda jẽingoã cote chã. ¹⁷ Ae mbae icua nandehosei chosei quia nae, Espiritu Turã quiatoã tuchi chõ ùquĩ nde. Ùquĩ quiatoã tuchi chõ Espiritu Turã no nde. Ae nandehosei chosei quia, nyebe ra ùquĩ nandesã eã. ¹⁸ Jẽingo mose Espiritu Turã ndui, “Moisés cheẽ nda nandemingo bei” jenyue eã nda cote. ¹⁹ Ae siqui quia ubi icua ndese nae, mbae icua esaã ata atate quia ã. Siqui siqui chõ nguia ngünisiã ndese. Cuña abe siqui siqui chõ nguia ngu eã ndese no. Siqui chooño mbua rese. ²⁰ Dios abareã ndese siqui chooño. Brujería abe rese siqui chooño. Mbua ucuãyã cuãyã. Siqui icua icua nyue. Mae icua icua emo ndese. Paama i jei jei emo je. Abei chiã. Mbua mbuqueta queta. ²¹ “Í ãchĩ sembae”, i mbua mbae osei osei. Mbua iquia. Quiacua. Siqui chooño mbae ja rese. Ae ã icua ñumumbara saã saã mbeite quia nae, ùquĩ nderecuarã eã mbei ra Dios.

Espiritu Turã ño aba mingo nguia mbae turã ndese

²² Ae siqui quia Espiritu Turã ndese nae, Espiritu Turã ño emingo nguia mbae turã ndese ã. Nyesequa chõ nguia mbua rese. Eya chõ eriqui nguia. Quicoi coi eã ño nguia. Siqui tochi chõ nguia. Siqui turã ño nguia. Ucheẽ mbuchebi chebiã ño nguia. ²³ Eseteã ño eriqui nguia. Ae ae chõ nyiteaquiatu nguia mbae icua si. Nande ùquĩ naa naa mose, emo ñee aroneãte nande je cote. ²⁴ Sã Cristo mano nyii no. Eĩ si chõ Cristo quiato undua icua mbutiã nguia no. Cristo mano nyabe.

²⁵ Sã Espiritu Turã ndiqui nandereco mingo turã co no. Eĩ nande sí siqui turã erui jẽ. Ae nandererequia turã bei nonde mbae turã ndese. ²⁶ Nandecuasua ra nandesã saãchĩ jẽ. Nandeicua techĩ nda nandechue jẽ. “Aque rã eãchĩ se”, nandechĩ nda mae icua icua nandenongue rese jẽ.

6

Jendua chõ nguia nyiese mbae mo naa jenongue je

¹ Emo mbae icua naase i i mose, “Dios rui eico” jenyue chõ ee. Ae jemo siqui tuchi quia Dios rese, ùquĩ mo ñee ee. Embucuata turã sí nonde Dios rese. Jeñee mingue mingue chõ nguia ee. “Mbae icua tã i arõte se abe je”, jenyue chõ nguia ndua jẽ abe. ² Jendesenda ia eã ndasi mose, jendua chõ nguia erese mbae mo naa naa ee. Cristo cheẽ mumbayã ja chõ ùquĩ nde. ³ “Seaquiatute rei ñene”, i mose equiatuã mo, ae sí chõ ñimbirĩ irĩ nguia

aque. ⁴ Ae ra eresaã mbae mo nae, esaã turã mbei chõ nguia. Ûquĩ mose ra ndeya quiátu tuchi ndechisaã ndese. Mae ndocoĩ emo nyisaã ndese. ⁵ Nande ae ae nandechimbirãcuã nguiaútu nandeya eã ndasi ae ae je.

⁶ Emo siqui mose jembaaquiato quiatu Cristo riĩ, mbae ja quia jemondo mondo quia ee. ⁷ Erechimbiriĩ irĩchĩ nda ndechue si jẽ. Dios abe erembiriĩ irĩ aroneate. Ae ra erechitiquia mbae mo nae, ùquĩ sí chõ nda ereucua. ⁸ Ae siqui quia ubi achõ ndese nae, ùquĩ nda ua chee. Ae siqui Espíritu Turã ndui nae, ùquĩ nda Espíritu Turã mingo bei. ⁹ Nandechimondocho eã ño nguia mbae turã naa naa mbei jẽ. Nandehui eã mbei chõ nguia esi jẽ. Ûquĩ mose ra Dios mbae mee tuchi jee nande je cote. ¹⁰ Mbae turã nandesaã saã mbei chõ nguia mbia je. Jesús quiato je quia mbae turã nandesaã saã tuchi jiri.

Pablo hui bei saludar i mbia je

¹¹ Seo ae je chõ co ambesa mondo nguiaã jẽje aque. Sã letras cuasute. ¹² Ae “circuncisión jẽsaã”, i quia jẽje nae, siqui turã sacua mbia rese chõ ùquĩ nde. Siqui turã ndocoĩ Cristo rese. “Cristo ae ra aba mingo bei” i sereã. Siquichete quiatu mbia si re. ¹³ Ae circuncisión saã nguia nae, ùquĩ abe riqui eã Moisés cheẽ ndui ùquĩ. “Í nda mbia riqui urerui”, i chõ nguiaã “circuncisión jẽsaã” i jẽje ùquĩ. Ucuasu ra esaã saã jẽ circuncisión naa mose. Eyate ra jendese cote, jẽingo mose erese. ¹⁴ Jesucristo miĩ ndese chõ nda seya se. Ae mano ira rese. Ae miĩ niĩ nda acheẽ ñee mbia je. Mbaemo ndese abe eã nda seya se. Jesucristo mano mose ira rese, se abe que amano mbae icua si ra. Mbae icua abe que mano sesi no nda. ¹⁵ Nandeico mose Cristo rese, eĩ ja chõ nande ee re. Ae circuncisión saã nae, ae circuncisión saã eã no nae, eĩ ja chõ nande ee re. Dios nandechiã mbiasu mose, ùquĩ nguiaútu eturã tuchi re. ¹⁶ Ae siqui quia Jesucristo miĩ ndese nae, sã Dios turã ndiqui bei ùquĩ ndese. Sã Dios riqui embia bei. Sã Dios turã ndiqui bei ngũimba ja je. ¹⁷ Secheẽ nda jẽsibishorõchĩ namo jẽ. Emo mose abe jẽ. “Pablo equiatuãte”, sã emo i eã cote. Sã mbae rasi airara rara beite quia Cristo riĩ co no. Sã seiruã nuasa cherõ areco serete rese co no jẽ. Jesucristo riĩ ño ùquĩ nde. ¹⁸ Sã Jesucristo turã ndiqui bei jendese, Seresenda. Amén.

LA CARTA DEL APOSTOL SAN PABLO A LOS EFESIOS

Pablo embesa Jesús quiato Efeso jenda je

¹ Se rei Pablo. Dios que seirabo ra. Jesucristo chimbaaquiatu sacuã. Co ambesa mondo quia jêje aque. Jesús icuasa je. Efeso jenda je. ² Sã Dios riqui uturã ndeacuquia bei jêje. Jesucristo abe no. Sã ũquĩ ndiqui jembia bei.

Cristo mbae turã saã ja nande je

³ Nandechê turã mbei chõ nguia Dios riĩ. Jesucristo ru riĩ. Jesucristo rese chõ nandeico nguĩã ã cote. Ibatenda chõ nandeico nguĩã ã cote. Nyebe Dios riqui nguĩã mbae turã naa jate nande je co. ⁴ Dios que nandeirabo nyii ra. Cristo riĩ. Mbae ao ja nonde. Nyesecua tuchi que nanderese ra. Nyebe nandeicuã mbutiã ja nguĩã nandesĩ. Nandeico turã sacuã enonde. ⁵ Dios que nandeirabo tuchi coose ra. Mbae ao nonde. —Jesucristo riĩ nda seriirina jê, i que nande je nandeicuã mose ra. ⁶ Nandechê mbei sacuã Dios turã niĩ. Uturã je chõ nandeisi nguĩã Jesucristo riĩ. ⁷ Jesucristo miĩ ngue mano nanderirõ sacuã mbae icuã si ra. Ae riĩ ño Dios nandeicuã mbutiã nguĩã nande si cote. Dios turãte quia nande je re. ⁸ Dios que uturã teacuquia ja nande je ra. Nyebe eriqui nguĩã mbae icua jate nande je. ⁹ —Seriirĩ nda amondo mbia je íbii. Ae ra mbia mangue choõnoa jenda mingo ja serese cote, i que Dios cose ra. ũquĩ ngue eteacuquia nande je cote ra. Nande eicua sacuã. ¹⁰ Dios icoquiatu mose ra mbae mbuchicuabo ja cote. Nandemunua ja ra ino Cristo nonde. Cristo ra mbae rerecua ja tuchi aque mose cote. Ibi jenda rerecua ja. Ibatenda abe rerecua ja.

¹¹ Ae Cristo saã nande je nae, ũquĩ niĩ ño ngue Dios nandeirabo nguĩã cose. Mbae tiã mose que Dios nandeirabo nyii ra. Ae sí mbae turã naa naa sacuã nande je. Dios cheẽ nguire mbae riqui nyecua bei ã. ¹² Urecheẽ turã mbei sacuã Dios riĩ ño ngue ureirabo nguĩã. Ure rane ngue Cristo ureicua nyii ra. ¹³ Jê abe que Cristo jêicua chee cote ra. Jê echeẽ turã andu mose. —Cristo ra jendirõ jêicuã si, i mose jêje. Jê Cristo icua mose que Espíritu Turã Cristo mbae marca miĩ jendese ra. —Espíritu Turã tamondo Cristo icuasa je, i Dios quia nyii nae, aque sí que Cristo mbae marca miĩ jendese cote ra. ¹⁴ Espíritu Turã ndiqui nandechiangui re co. Nyebe nandeico nguĩã ñee. —Dios ra mbae mee ja nande je ucheẽ nguire, i. Dios que nandeisi Jesús ruqui ribishorõ nda. Nandemingo bei ra erese cote. ũquĩ niĩ ño Espíritu Turã Cristo mbae marca miĩ nguĩã nanderese. Nandechê turã mbei sacuã Dios riĩ ño ngue ũquĩ nde.

Sã Dios jembiiirandu uquirãcuã ndese, i Pablo

¹⁵ Airandu que jendese ra. Jesús jêicua tuchite quia ũquĩ. Jenyesecua tuchite equia Dios quiato ja rese ũquĩ. ¹⁶ Nyebe aico nguĩã ñee hui ãte Dios je. Gracias, i bei ee jeniĩ. ¹⁷ —Paba, ndequiatio embaaquiatu tuchi Cristo riĩ. Cristo eicua uquia tuchi ee, ae beite se quia Dios turã je jeniĩ co. ¹⁸ Acheẽ mbeite quia Dios je jeniĩ co. —Paba, ae turã nda eresaã je ndequiatio je nae, ũquĩ ndese embiiirandu jiri namo. Ae turã nda eremee je ee nae, ũquĩ ndese abe embiiirandu. ¹⁹ Ndequirãcuã ndese abe embiiirandu, ae beite quia Dios je jeniĩ co. Dios quirãcuã nda ua eã mbei. Equirãcuã ndiqui Jesús quiato chianguĩ re ja ã. ²⁰ Dios quirãcuã ae que Jesús raaque mbuquera si ra. Dios quirãcuã ae que Jesús mbocoi miĩ ujii ra. ²¹ Dios que Jesús miĩ mbae rerecuarã ja ra. Ae quia rei i tuchi ererecua mo si. Gobierno mo ab e si. Ae quia rei ecuasu tuchi ibi jenda ja si. Ibatenda abe mo si. ²² —Mbae ja rerecua tuchi rei Jesús, i que Dios ra. —Sequiatio rerecua ja chõ ae re, i que Dios ra. ²³ Dios quiato rei Jesús rete rã. Jesús riqui uquiatio chianguĩ re co. Manguiti eriqui eã aroneate. Mbae aosa ja chõ ae re.

2

Uturã ñii Dios aba rirõ aba icuã si

¹ Dios que nguenco mondo jêje cote ra. Jêicuã ñii ño ngue jêingo nguiã eraaque rã nyii. ² Mbia ataque rã tuchi que jêingo aque mose ra. Mbae icuã naa naa ndesechi. Satanás ñee ndui beite que jêingo nyii ra. Equirãcuâte que eriqui jêje ra. Ae siqui âte quia Dios rese nae, ùquĩ ño Satanás ñee mumbayã nguiã ã. ³ Eĩ nande que equia cose nyii ra. Ae nandebite riqui mbae icuã nyii nae, ùquĩ ndesechõ ño ngue nandeico ra. Ae rese nandeico ndua beite mbae icuã nyii nae, ùquĩ ndesechõ ño ngue nandeico nyii ra. Mbia ataque rã sí chõ ngue nandeico mbae icuã naa naa nda. Dios nda nandembasi nguiã nandeicuã ñii ña. ⁴ Eyayãte quiatu ngue eriqui rei nguiã nanderese. Nyesecua tuchite quiatu que equia nanderese ra. ⁵ Eraaque raãte raque nande nandeicuã ñii nyii. Nyebe nguenco turã mondo nguiã nande je Cristo raaque mbuquera si mose. Dios turã ae chõ jendirõ nguiã jêicuã si. ⁶ Dios Cristo raaque mbuquera mose que nande abe mbuquera echabe ra. Dios que nandemingo erese ibate cote ra. ⁷ Dios turã tuchi riqui nande je Jesucristo rĩ co. Ñ nda mbia jirandu randu Dios chisaã turã ndese emo mose. Ibátee nandeico mose abe no. ⁸ Jê ngue Jesús jêicua ra. Nyebe que Dios jendirõ jêicuã si ra. Uturã ñii ño ngue jendirõ nguiã jêicuã si. Jê ae jeñimbucha aroneate Jesús rese. Dios ae ngue jembucha nguiã erese. ⁹ Nandechisaã turã ñii eã ño Dios nandembucha nguiã Jesús rese. Nyebe nandemo ndiqui uturã naa naa aroneate. ¹⁰ Dios ae que nandea ra. —Se emingo mose Jesucristo rese, aque mose quia ra mbae turã naa naa cote, i que Dios nanderĩ cose ra.

Cristo mii ño mbia mingo turã turã nguiã nyiese

¹¹ Dios rese que jêingo âte nyii ra. Ùquĩ si jêtesareia ño. Judíos eã ño ngue jê ndesẽ. Nyebe judíos jendirõ nguiã. Circuncisión ngue jêsaã eãte judíos rã ndesẽ. ¹² Jêingo eãte que Cristo rese nyii resẽ. Jêingo turã eãte que equia Dios rimba je resẽ. Dios cheẽ si que jêingo ishote resẽ. —Dios ra mbae turã saã nande je, jenyẽ âte que equia ndua aque mose resẽ. ¹³ Jesucristo mbae chõ jê cote re. Ishote jêingo raque Dios si cose. Dios que jembucha tuchi uchiese Jesucristo mano ñii nda. ¹⁴ Cristo mii ño nandemingo turã nguiã nyiese ã. Ae mii ño judíos mingo turã nguiã judíos eã ndese co. Ae mii ño judíos eã mingo turã nguiã judíos rese co no. Ùquĩ ngue siqui icuãte quia nyue Cristo icuayã mose nyii ra. Mbia mii na ño eriqui nguiã siqui turã nyue ã cote. ¹⁵ Umano mose que Jesús judíos mbui mondo Moisés cheẽ si cote ra. Ae Moisés ñee, judíos echeẽ mumba eã sacua nae, ùquĩ si que Jesús embui cote ra. Nyebe judíos siqui turã arõte judíos eã ndese ã cote. Judíos eã abe siqui turã arõte judíos rese cote. Ùquĩ siqui mose Jesús rese, co mii na ño eriqui nguiã ã cote. Mbia mii mbiasu ji rã ño eriqui nguiã ã cote. ¹⁶ Ùquĩ icuã icuã mose nyue que Cristo mano ùquĩ icuã ndiquicharõ nda. Ùquĩ mingo turã ja nonde Dios rese. Siqui turã mose Dios rese, siqui turã nda nyue cote. ¹⁷ Cristo que mano mbia mingo turã sacua Dios rese ra. Tu que mbia mbiirandu ja nonde nyiese ra. Judíos. Judíos eã abe mbiirandu nonde nyiese. ¹⁸ Cristo que mano nande ja je ra. Judíos je. Judíos eã je abe no. Nyebe Espíritu Turã mii nandemingo ja nguiã nyiese ã. Dios nandesichã ja arõte qui a ã cote. ¹⁹ Mbiamo eã ño jê Dios je cote re. Á jêingo isho eãte Dios si ã cote. Dios riirĩ tuchi chõ jê cote re. Cristo resenda ataque rã sí chõ jêingo nguiã ã cote. ²⁰ Tuchua raã ji mo na ndei jê. Jesús chimbaaquiato rei tuchia i rã. Dios cheẽ mbuchecuaa cose ndare abe rei tuchia i rã no. Jesucristo rei ùquĩ i tuchi. ²¹ Nande Jesús icua mose, Dios chuchua turã naanguia chõ nandeico nguiã Jesús je ã. Nande Jesús quiato tubiriã i ite riqui ã. ²² Espíritu Turã ño jemingo nguiã Dios rese jê abe ùquĩ. Nyebe jê abe jêingo Dios chuchuarã ùquĩ. Dios riqui jeñiangui re ùquĩ.

3

Judíos eã abe ra siqui Dios rese, i Pablo

¹ Se rei Pablo. Jesucristo rimba. A setarõ ji ñi jeniã a. Jẽ judíos eã ñi. —Judíos eã abe riqui Dios rimba ã, ae beite que se quia jeniã nda. Nyebe setarõ ji ñi nguiã a. ² —Judíos eã je chõ seturã esenei senei nde, i que Dios seje ra. Ûquĩ ndese beite aico co. Jẽirandu equia serese reae. ³ —Judíos eã abe ra siqui serese. Secheẽ turã esenei senei ee, i tuchi que Dios sembaaquiato ra. Ûquĩ ngue asenei jua chõ jẽje ra, se embesa mose jẽje nyii. ⁴ Sechimbesa rese jemae mose ra jeñee cote. —Pablo Dios cheẽ icua tuchi chõ nguia judíos eã ñi nde, jenyẽ ra cote. ⁵ —Judíos eã abe ra siqui serese judíos rã si tuchi, i eã ngue Dios mbia mo je cose ra. Namõ ño mbia jirandu nguiã ùquĩ ndese. Namõ ño Espíritu Turã Jesús chimbbaaquiato mbiirandu nguiã ùquĩ ndese. Dios cheẽ mbuchecua abe mbiirandu ùquĩ ndese. ⁶ ã ndei Dios cheẽ mbuchecua ramo ji ã: Judíos eã abe ra siqui Dios rese judíos rã si tuchi cote. Mbã rete miã na nda eriqui ja cote. —Mbae turã tasaã jẽje Jesucristo rĩ, i mose Dios, judíos achõ je eã ño eriqui nguiã ñee. Judíos eã abe je chõ ñene.

⁷ —Ûquĩ secheẽ esenei senei mbei quia mbia je, i que Dios seje ra. Mbae turã mo asaã eã ndaque Dios je nyii. Uquirãcuã abe que emee seje ùquĩ naa sacua nda. ⁸ Dios turã tuchite que seje ra. Se mbae raande rocoĩ ee nyii. Nyebe ñee nguiã seje. —Secheẽ esenei senei mbei quia judíos eã je. Ae rese mbia riqui jiranuate Cristo turã nae, ùquĩ esenei senei judíos eã je, i que seje ra. ⁹ —Ae turã nda asaã judíos eã je nae, ùquĩ ndese mbia embiirandu ja cote, i que Dios seje ra. Dios quiarei ndua ndua ùquĩ nyii. Mbae ao ja nonde nyii. ¹⁰ Mbaerã ño Dios mbia mbiirandu ùquĩ ndese cote chã. Mbã jirandu sacua Dios aquiato rese chõ ñene. Dios judíos eã mingo turã mose judíos rese, mbã ra nyuruira tuchi mae Dios quirãcuã ndese. Ibatenda abe ra nyuruira tuchi mae erese no. ¹¹ Dios ndua ndua ùquĩ nyii. —Mbã chumumbarate riqui raque ã. Emo emo nda ambucha nyiese Cristo mano mose, i que Dios cose ra. Ûquĩ ngue esaã Jesucristo rĩ cote ra. ¹² Nandeico Jesucristo icuate ã cote. Nyebe nandeico nguiã siquicheãte ñee Dios je ã cote. ¹³ Ae mbae rasi asaã nguia cárcel co nae, jeniã ño ñene. Seyate se mbae rasi raã mose jeniã. Jẽ abe jeñimbia chõ nguia serese.

Cristo nyesecua tuchi uquiato rese

¹⁴ Judíos eã abe chõ Dios mingo nguiã uchiese. Nyebe aico nguiã gracias i bei Dios je co. ¹⁵ ã nandechumumbarate riqui íbii ã nae, ùquĩ ndu ja chõ Dios re. Ibatenda abe ru chõ ae no nde. ¹⁶ Dios mbae saã ja arõte nande je. Ebite mbae raã mose nande je. Nyebe aico nguiã ñee ee jeniã a. —Paba, Espíritu Turã emondo tuchi echiangui re. Embuquirãcuã sacua, ae chõ nguiã ee a. ¹⁷ —Paba, sã Cristo riqui tuchi echiangui re. Sã Cristo icua tuchi. Sã eriqui nyesecua tuchi Cristo rese, ae beite se quia Dios je jeniã co. ¹⁸⁻¹⁹ Mbaerã ño Dios riqui nyesecua tuchite nanderese co. Co eriqui nyesecua tuchite nande rese co. Jendua tuchi quiato quia ùquĩ ndese. Sã Cristo quiato riqui ndua ja ùquĩ ndese. Sã Dios riqui tuchi jeñiangui re. ²⁰ Dios quirãcuã ndiqui beite nandechiangui re co. Nandembirãcuã mbeite equia co. Nyebe eriqui mbae raã ja arõte nande je co. Ae rese nandeico ndua eãte nae, ùquĩ abe chee esaã arõte quia nande je co. ²¹ Sã Jesucristo quiato riqui ñee turã mbei Dios je Jesucristo rĩ. Mbae ua ja mose chee. Eĩ si ra equiato quia ñee turã mbei erĩ. Amén.

4

Hue rĩ ja chõ Espíritu Turã ndiqui nguiã Jesús quiato mundua

¹ Setarõ ji ã Jesús rĩ a. Secheẽ amondo quia jẽje aque. Jẽingo turã ño nguia Cristo rã si. Dios chiirabote quia jẽ nde. ² Jẽseteã ño jẽingo. Jẽingo tochi chõ nguia. Jendoseĩ nguiato chõ nguia jenyue. Jenyesequa chõ nguia jenyiese. ³ —Hue rĩ ja chõ nandeico ndua jẽ, jenyẽ chõ nguia jenyue. Sã Espíritu Turã ndiqui jemundua hue rĩ ja. ⁴ Jesús rete miã na ño nande re. Espíritu Turã miã ño siqui nguiã nandechiangui re co no. Jesús miã na nda nande ja nandeico. ⁵ Ae miã ño nandererequa ja re. Ae miã ndese chõ nandeico ja

nguiã ã. Aque mii nii ño ngue bautizar i nguiã nande je no. ⁶ Dios mii ño nanderu ja re. Ae mii ño nandemingo nguiã mbae rese. Ae mii ño siqui nguiã nandeite re co no. ⁷ Dios que nandechisaã ae aerã mee nande je ra. Cristo que uturã mee mee nande je ra. Ae ra nandesaã saã, ùquĩ naa naa turã sacua. ⁸ Sã embesa ji riqui ñee no:

Cristo que nyui oso ibate ra.

Mbia tarõ ji que equerao ra.

Mbia chisaã ae aerã ngue emee mee mbia je ra,

i que embesa ji ra. ⁹ Jesús que siqui íbátee nyii ra. Aquere que eru nguichi íbii cote ra. ¹⁰ Ae sí que oso nyui ibei robei cote ra. Mbae rerecuarã ja sacua ngue ae cote ra. ¹¹ Ae que mbia chisaã ae aerã mee ee ra. —Apóstoles ra jẽ, i que emo emo je ra. —Secheẽ embuchecua checua quia mbia je, i que emo emo je ra. —Mbia sequiatoã je secheẽ turã esenei senei mbei seriĩ, i que emo emo je ra. —Mbia serimba eteaquiato bei, i que emo emo je ra. —Mbia embaaquiato quiato bei quia, i que emo emo je no nda. ¹² Eĩ ngue Dios uquiato mbaaracua racua ja uchisaã ae aerã ndese ra. Ûquĩ mose ra Jesús quiato Jesús osei i i tuchi cote. ¹³ Ûquĩ mose ra nandendua ja Jesucristo rese hue rĩ ja. Ûquĩ mose ra Jesucristo nandeicua i i tuchi. Jesucristo rã nda nandeico chee ùquĩ mose. ¹⁴ Ûquĩ mose ra nandeico ñimbirãcuã tuchi Cristo rese. “Tambiĩrĩ irĩ Cristo rĩĩ” i mose emo nande je, nandeicoã nda ùquĩ ndese. Nandendua ata ata eã nda Cristo rĩĩ. Ae mii ndese chõ nda nandeico bei. Mbia riirĩ na nda nandeico ndua ata ata eã. ¹⁵ Ûquĩ mose ra nandechẽ ñooño eã. Mbia ra nandembiĩrĩ iriã. Nandechesecua ja ra equia mbia rese. Cristo rã si chõ nda nandeico turã. Dios quiato rerecuatuchi quia ae re. Sã nandeaquĩ nanderete rerecuatuchi no. ¹⁶ Sã nanderete riqui ñimbirãcuã ja no. Eĩ si chõ Cristo rimba nguiã ñimbirãcuã ja siqui turã nyiese. Sã nanderete no. Nanderete resenda siqui turã ja mose, nanderete rasiã ja rae.

Ae icuã jësaã saã nguia nyii nae, ùquĩ jësaã saã eãte quia namo ã

¹⁷ Jesús cheẽ tuchi chõ ã nde: Dios icuasa reã na nda jëingochĩ cote jẽ. Ndua chooño ño nguiã mbae rese ùquĩ. ¹⁸ Eãquĩ ãtã ño ùquĩ nde. Dios cheẽ andu sereã nea je chõ ùquĩ nde. Nyebe Dios riqui nguiã ngueco mee eã tuchi ùquĩ je. ¹⁹ Mbae icuã achõ ndese chõ eriqui nguiã ndua ndua. Eireĩ nguiãte mbae icuã naa naa mose cote. Oo oo tuchi mbae icuã ja rese. ²⁰ Ûquĩ ngue Cristo jembaaquiato quiato eã jẽ nda. ²¹ Jëirandu que Jesús rese resẽ. Ae sí chõ ngue jembaaquiato resẽ. Jembaaquiato que ucheẽ turã nii nda. ²² Jeñiangui renda icuã si jëhui chõ. Aba mbiĩcuãsa tuchi chõ ùquĩ nde. Aba mbiĩrĩ irĩ ño ùquĩ nde. ²³ Jendua ndua jembiasu chõ ae. Ae rese jëingo ndua icuã icuã nyii nae, ùquĩ si jëtesarei chõ cote ae. ²⁴ Jeñimbiasu chõ nguia ae. Ûquĩ mose ra jëingo Dios rã si. Jëingo turã tuchi ra equia ee.

²⁵ Jeñee ñooño eã ná nguia jendesenda mo je cote ae. Nyiesenda ja chõ nande cote re. ²⁶ Jẽ paama i mose, paama jenyete turã ño nguia. Paama jenyete ocoã ño nguia. Tenda oso nonde ti jenyete. ²⁷ Jẽ paama i oco mose, diablo ra jembiiacuãte cote. ²⁸ Ae mbae mbuquiachã quiachã nguia nae, sã mbae mbuquiachã eã cote. Sã ae ae mbae ao ao o je icua cote. Sã eriqui mbae mondo mondo mbaecha reã je cote. ²⁹ Jenyuru jendecochõ ño nguia ñee ndocoĩ mbae icuã nii jẽ. Mbae turã nii ño jëingo ñee mbia je jẽ. Emundua ndua sacua Dios rese. ³⁰ Espiritu Turã nda jembia eã eãchĩ jẽ jẽ. Ae chõ ngue Cristo mbae marca mii nguiã jendese. Nyebe jëingo nguiã ñee. —Cristo ra nandembiasu erã si, i. ³¹ Paama jenyechĩ nda emo nii. —Í achĩ se, jenyechĩ nda emo nii jẽ. Jëtasẽ tasẽchĩ nda emo je. Jeñee icuã icuãchĩ nda emo nii. ³² Jëturã ño jëingo jenyete. Jëseteã ño jëingo jenyete. Jendesenda icuã icuã mose jëje, jëtesarei chõ eicuã si. Sã Dios jëicuã mbutiã jẽ Cristo rĩĩ nyii no.

5

Dios quiato siqui bei mbae turã ndese

¹ Dios riirĩ tuchi chõ jëingo nguiã ã. Nyesequa tuchi equia jendese co. Erã si chõ jëingo. ² Jenyesequa tuchi quia mba rese. Sã Cristo riqui nyesequa tuchite nanderese no. Sã mano nandeicua ndiquicharõ oveja rã no. Emano mose que Dios ia tuchi erese ra.

³ Cristo mbae chõ jë cote re. Nyebe jëingo eã emo ninisi rese. Eruã mo ndese abe no. Emo mbae ra jenyosei choseichĩ. Eicuãte ùquĩ. ⁴ Jenyuru jendecochõ ño nguia ñee ndocoĩ mbae icuã nii. Mbae icuã aba ireingua riĩ jeñee eã. Eicuãte ñee mose ùquĩ. Gracias jenyequiatu quia Dios je. ⁵ Emo siqui mose ngüinisiã ndese, aque ra siqui eã Cristo rese, Cristo siqui mose ererequa. Ae mbae icuã saã saã mbeite quia nae. Ae emo mbae chosei chosei quia nae, ùquĩ abe ra siqui eã Cristo rese. Emo mbae osei osei mose, Dios abareã ndese siqui raanguia chõ ùquĩ no nde. ⁶ Ae ùquĩ saã saã nguia mbae icuã nae, ùquĩ je ra Dios mbae rasi raanguia tuchi. “Ichõiño ñene” ichĩ nda emo jembiri irĩ jë. ⁷ Ae ùquĩ saã saã nguia mbae icuã nae, ùquĩ ndese ra jëingochĩ jë. ⁸ Itondaruqui re rã ngue jëingo cose ra. Nyaáshii ño jëingo nguiã Jesús rese ã cote. Nyebe jëingo turã. ⁹ Ae siqui nyaáshii nae, ùquĩ siqui turã ño nguiã ã. Ñee ñoño eã ño nguiã emo je ã. Siqui ãte equia mbae icuã mo ndese ã. ¹⁰ Ae Dios bite riqui nae, ùquĩ ndese chõ jëingo ñimbaaquiatu quiatu. ¹¹ Ae itondaruqui riinda saã saã nguia mbae icuã nae, ùquĩ nda jësaã saãchĩ erese jë. Echiao icuã nii ño jeñee ee emundua jë. ¹² Ae ùquĩ saã nyecuayã cuayã nguia mbae icuã nae, aba ireite ñee ùquĩ nii. ¹³ Jë ùquĩ nyiao icuã mbuchecua mose ee, ndua ndua ra erese cote. Emo emo siqui arõte Cristo rese cote. Itondaruqui riinda recha mbae icuã. ¹⁴ Sã embesa ji riqui ñee no:

Ae uque saã saã nguia nae, sã ùquĩ ñumumba.

Ae siqui quia eraaque rã nae, sã ùquĩ quera si.

Ùquĩ mose ra Cristo uturã ndeacquia ee,
i que embesa ji ra.

¹⁵ Cochee tuchi chõ jëingo Dios rese. Mba aquiatuã na nda jëingochĩ. Mba aquiatu rã nguiatu jëingo. ¹⁶ Ae Dios bite riqui nae, ùquĩ ndese chõ jëingo ñimbecoteã. Mbae icuã icuãte eriqui ã cote. ¹⁷ Jëaquiatuã eã ño jëingo Dios rese. Ae Dios bite riqui nae, ùquĩ ndese chõ jëingo ñimbaaquiatu quiatu. ¹⁸ Jëquiacua quiacuachĩ nda equia jë. Jëquiacua mose mbae icuã jësaã saã ja arondete. Espíritu Turã nguiatu jëingo tuchi jeñiangui re. ¹⁹ Cristo riĩ jeñee turã tuchi quiatu quia jenyue. Jërasei rasei tuchi quiatu quia Dios je. Himnos. Salmos. Jëya chõ jëingo irasei rasei Dios je. ²⁰ Dios rei nanderu. Ae chõ mbae ja mee mee nguiã nande je co. Nyebe “gracias” jenyequiatu quia ee Jesucristo riĩ.

Jëingo turã ja chõ nguia jenyuchua jenda ja je

²¹ Jenongue cheẽ jemumbayã ño nguia. Cristobi tuchi chõ ùquĩ nde. ²² Sã cuña ngu cheẽ mumbayã. Sã eriqui Dios cheẽ mumbayãte no. ²³ Eru quia rei ngüinisi rerequa. Sã Cristo uquiato rerequa no. Cristo quiato rei Cristo rete rã. Cristo quiatu ngue esirõ nguiã eicuã si. ²⁴ Sã Cristo quiato riqui echeẽ mumbayãte no. Eĩ si chõ cuña nguia ngu cheẽ mumbayã mbei. ²⁵ Sã eru riqui nyesequa tuchi ngüinisi rese. Sã Cristo nyesequa tuchi uquiato rese no. Sã mano nyee eriquicharõ no. ²⁶ Uquiato no sacua icúe chõ ùquĩ nde. Irei que i je ra. Ucheẽ je abe que eirei no nda. ²⁷ Cristo uquiato mbaturã turã ja quia co. Mbae icuã ndese emingo uquia reãte. Nyebe eyate riqui nguiã erese co. ²⁸ Sã Cristo riqui nyesequa tuchi uquiato rese no. Eĩ si chõ mba quia nyesequa ngüinisi rese. Sã emo ndiqui ngueteã nguete rese no. Emo ngueteã mose ngüinisi rese, nguete rese ngueteã naanguia chõ ùquĩ nde. ²⁹ Emo nda nguete ucuayã eã. Nguete ra equereco turã. Teaquiato turã nda equia. Eĩ si Cristo quia uquiato rerequa turã co no. ³⁰ Cristo rete rã si chõ equiato re. Nande abe chõ Cristo rete rã no nde. ³¹ Dios que ñee nyii ra. Emo ngüinisirã ndea mose, sã nyao usi si. Ngu si abe no. Sã ngüinisi miã ndese chõ eriqui. Co

mii siqui rã ño eriqui nguiã nyiese cote. ³² Mbaranguiatuãte raque ùquĩ icua. Nyeremo siqui mose co mii na. Cristo rĩ ño eriqui nguiã ñee. Equiato rĩ abe no. ³³ Jêje abe chõ eriqui nguiã ñee. Jê nyesecua tuchi sacua jeninisi rese. Sã jêingo nyesecuate jendete rese no. Sã cuña abe riqui ngu cheẽ mumbayã mbei.

6

¹ Mbia riiri, jendu cheẽ jemumbayã ño nguia. Jêsi cheẽ abe. ²⁻³ ã ngue Dios ñee cose ra: “Jêingo turã ño nguia jêsi je jê. Jendu je abe. Jêingo turã mbei ra equia ùquĩ mose. Jendeco ra jêingo arete íbii,” i que Dios mbia je cose ra. ⁴ Eru je tacheẽ cote. Esi abe je. Jeñee icua icua tuchite chí nda jendiiri je jê. Paama i chee ra jêje. Jembaaquiato turã turã quiatu quia. Jemingo turã quiatu quia Dios rese.

⁵ Mbia rimba je tacheẽ cote. Jenderecua cheẽ jemumbayã ño nguia. Cochee chõ jêingo ee. Jêingo turã ño nguia jenderecua je. Cristo bite ùquĩ. ⁶ Jenderecua mae eã mose jendese, ùquĩ mose abe chõ jêingo embae raã naa turã ee. Mbae jesaã turã ja quiatu quia Dios cheẽ ndui si. Cristo rimbate quia jê nde. ⁷ Jêya chõ jêingo mbae raã naa mose jenderecua je. Dios je chõ jêingo nguiã eraã ùquĩ. Jenderecua ibi jenda mii je eã ño ñene. ⁸ Dios ra mbae turã mee jêje emo mose jenyiao turã ndibishorõ. Jêingo mose mbia rimba. Mbia rimba eã jêingo mose ra re no ae. ⁹ Mbia rerecua je tacheẽ cote. Jêingo turã ño nguia jê abe jenimba je. —Tareirua nua, jenyechĩ nda embiiri irĩ jê. Jê abe chõ jenderecua no nde. Jesucristo rei jenderecua. Jenimba abe rerecua. Eĩ ja chõ mbia Dios je re. Mbia mii ndese ra eriqui turã eã.

Soldados rã si chõ jêingo nyiquisã mbae icua si

¹⁰ Hui bei nonde ã tacheẽ jêje. Dios quia rei equirãcuã tuchi. Dios quirãcuã je chõ jêingo nguiã ñimbiãcuã. ¹¹ Sã soldado riqui armadura mingue no. Ùquĩ ndei nyiquisã sacua ùquĩ. Eĩ jenye si chõ nguia siqui tuchi Dios rese nyiquisã Satanás si. ¹² Ae icua icua ndiqui nande je Jesús rĩ nae, mbia eã ño ùquĩ nde. Satanás ño ùquĩ nde. Satanás nimba abe no. Aba checuayã icua abe no. Mbae icua nderecua ja chõ ùquĩ nde. Equirãcuã tuchi riqui ùquĩ. ¹³ Jêingo tuchi Dios rese ùquĩ icua si nyiquisã sacua. Jêquirãcuã jêingo tuchi sacua. Jêquirãcuã mbei quia jêingo, Satanás jembicuã eã sacua. ¹⁴⁻¹⁷ Jêquirãcuã tuchi chõ jêingo. Sã soldado riqui icoquiato armadura mingue no. Eĩ jenye si chõ nguia icoquiato diablo jembicuã eã sacua. Sã soldado riqui ngũmbi cuasa mingue no. Huiisã rĩnda abe mingue nyiquisã sacua no. Sã soldado riqui huiyao mingue icoquiato no. Sã escudo abe rerequia oo no. Nyiquisã sacua emo uu mombo mose ee. Sã huiite sucha ãtã abe mingue uãquĩ ndiquisã sacua no. Sã tiquise abe rerequia no. Soldado rã si chõ jêingo icoquiato nyiquisã sacua diablo si. Jeñee ñooño eã ño nguia. Jêingo turã mbei chõ nguia. Jêingoquiato bei quia Dios cheẽ turã nenei nenei mbia je. Dios jêicua tuchi quiatu quia. Dios icua tuchi mose ra diablo tã i eã jêje. Dios quirãcuã ndese quia jêingo tuchi mbae icua naa eã sacua. Dios cheẽ jêicua tuchi quiatu quia. Ùquĩ mose ra Espiritu Turã siqui tuchi jendese. ¹⁸ Jeñee mbei quiatu quia Dios je. Sã Espiritu Turã jembucheẽ turã mbei quia ee. —Mbae embu seje. Á embu seje, jenye bei quiatu quia Dios je. Dios quiato ja rĩ ño jêingo ñee Dios je. Dios siqui turã sacua erese. ¹⁹ Serĩ abe quia jêingo ñee mbei Dios je. Sembucheẽ turã sacua, se echeẽ nenei nenei mose mbia je. Ae rese mbia riqui jiranuate Cristo rĩ nae, ùquĩ asenei senei nguia mbia je co. ²⁰ Dios que semondo ucheẽ turã nenei nenei sacua nda. Ùquĩ nii ño setarõ ji aĩ nguiã a. Jeñee mbei quiatu quia Dios je serĩ. Se ireĩ ireĩ eã sacua. Se echeẽ turã nenei nenei mbei sacua mbia je.

Pablo ñee hui bei

²¹ Tiquico si quia jendea aque. Ae ra mbae senei ja jêje jembiiirandu serĩ. Ae que mbae saã turã mbeite quia serese ra. Dios rimba turã tuchi chõ ae re. ²² Nyebe amondo nguiã jendea aque. Jembiiirandu ja sacua urerese. Jembia tuchi sacua Cristo rese abe. ²³ Jesús quiato chõ jê abe, se rã si re. Sã Paba ibatenda riqui jembia bei tuchi. Sã eriqui

jembuchesequa tuchi mbia rese. Sã Jesucristo icua uquia tuchi jêje. ²⁴ Ae nyesequa tuchi quia Jesucristo rese nae, sã Dios turã siqui tuchi ãquã ndese. Amén.

LA CARTA DEL APOSTOL SAN PABLO A LOS FILIPENSES

Pablo tarō ji ucheē mbesa mondo Jesús quiato je

¹ Pablo chō se re. Timoteo rese. Jesucristo rimba chō ure re. A ureico ã mbesa jêje a. Felipos jenda Jesucristo quiato ja je a. Jesús quiato rerecua je abe ureico ã mbesa a. Diáconos je abe no. ² Sã Paba Ibatenda turã ndiqui jendese. Sã jembia mingo. Sã Jesucristo abe jembia mingo no.

Pablo ñee Dios je Jesús quiato rĩĩ

³ Sendua ndua mose jendese, seya beite aico jendese co. Gracias ae beite sequia Dios je jeniĩ co. ⁴ Se ñee ñee mose Dios je jeniĩ, seyate riqui co. ⁵ Se Jesucristo cheē nenei namo mosenda bei chō jêingo nguiã ndua bei serese co. Nyebe jêingo nguiã mbae mondo mondo bei seje co. Nyebe seya tuchi riqui nguiã jendese co. ⁶ Dios que ucheē mingue jeñiangui re, ae si ra siqui bei jendese jembitirō tirō. Jesucristo tu chee. Ae bei. Siqui bei ra jendese. Aicuate se quia co. ⁷ Coche aico nguiã ndua ndua eĩ jendese cco. Achesecua tuchite quiatu nguiã jendese. Jê ngue jêingo beite quia serese ra. Jendua ndua beite que equia serese ra. Mbae mondo mondo bei seje. Mbia icuã icuã mose seje. Se mbia cheē ndiquisã quisã mose Jesús cheē si. Mbia setarō tarō mose. Ūquĩ mose abe que jêingo beite serese ra. Dios turã ndese que nandeico mae mae mbeite ra. ⁸ Dios resa aico ñee co. Jesucristo rã si aico nyesequa tuchite jendese co. ⁹ Aico ñee mbeite Paba je jeniĩ co. —Paba, ũquĩ embuchesecua i i tuchi mbia ja rese. Ndeaquiatu emondo i i tuchi ee, ae beite quia Paba je jeniĩ co. ¹⁰ Eĩ nda mbae turã jêicua. Eĩ nda jêingo bei mbae turã ndese. Eĩ nda Jesucristo ñee asiã jêje tu mose. ¹¹ Eĩ nda Jesucristo jemingo bei mbae turã ndese. Eĩ nda mbae turã jêsaã saã ja Dios je.

Cristo miĩ niĩ ño aico nguiã se co, i Pablo

¹² ã tasenei jêje. Mbae icuã ngue jeĩ jeĩ mbeite quia seje, ũquĩ ngue Jesús cheē mbutiba eã mbei ra. Ūquĩ jeĩ jeĩ mose seje, mbia que jirandu tuchite quia Jesucristo rese cote ra. ¹³ A setarō ji ñi cárcel a. —Cristo rĩĩ ño etarō ji ñi nguiã hue, i jate mbia quia serĩĩ ũquĩ. Mbia rerecua chuchua jenda ja. Tuchuamo jenda ja abe. ¹⁴ Jesús quiato jirandu mose setarō ji rese, esiquicheãte riqui Dios cheē nenei nenei ũquĩ cote. Jesús quiato ja riqui Dios cheē nenei nenei tuchi ũquĩ cote. —Dios riqui tuchi urerese co, i equia ũquĩ cote. Maende setarō ji rese.

¹⁵ Emo emo ndiqui Cristo renei ñooño ũquĩ. Ndua icuã icuã ño nguiã ũquĩ. Mae icuã icuã ño nguiã serese ũquĩ. Emo emo ndiqui Cristo renei turã tuchi ũquĩ no. ¹⁶ Ae Cristo senei ñooño nguia nae, ũquĩ icuãte riqui seje ã. —Sã Pablo tarō ji ñiño, i equia serĩĩ ã. Cristo renei ñooño ã. Emo ndese ndua eã. Nyiese chō eriqui nguiã ndua. ¹⁷ Ae Cristo senei turã nguia nae, ũquĩ ndua chō nguiã emo ndese. —Jesucristo cheē niĩ ño Pablo tarō ji ñi nguiã hue, i equia ndua serese ũquĩ. ¹⁸ Seyate emo Cristo renei turã mose. Seyate emo Cristo renei ñooño mose no. Cristo rĩĩ nguiatu eriqui nguia ñee. Tachimbua tuchi chō nguia ũquĩ Cristo renei nenei mose.

¹⁹ Jêndese abe seyate aico co. Ūquĩ jêingo ñee Dios je serĩĩ ũquĩ. Espíritu Turã ndiqui serese a no. Ae Jesucristo mbu seje. Nyebe Dios riqui nguiã setarō ji reaquiato tuchi a. Nyebe seya tuchi riqui nguiã a. ²⁰ Sesiquicheã tuchi ra se reae. Seireĩ ngũã mbei nda eriqui Cristo cheē nenei nenei ña. Cristo bi achō ndese taico bei setarō ji. Mbia nda seiquia rei nguiã, se taico bei Cristo rese. Mbia nda sembusē ndei nguiã no, ũquĩ mose abe taico bei erese no. Eĩ ja chō seje re. Eiturã ja chō seje no nde. ²¹ Cristo miĩ niĩ ño aico nguiã se co. Semano mose, eturã tuchi quiarei ũquĩ seje cote. ²² Dios semingobe mose, ae

si je chõ aico nguiã mbae turã naa naa co. Ma ño eturã jiri riqui seje. Mano mose ereae. Siquibe jiri mose ere no ae. Aicua eãte se. ²³ Ma ño sebi jiri. Semano sete raque oso sacuaã Cristo rese. Ũquĩ nda eturã jiri seje. ²⁴ Se seicobe mose íbii, ũquĩ nda eturã jiri jêje reae. ²⁵ Ũquĩ aicuate se. Seicobe mose, ũquĩ nda eturã jiri jêje reae. Nyebe ra Dios semingobe jiri jendese. Se Cristo icua uquia sacuaã jêje. Se jembiabe jiri sacuaã Cristo rese. ²⁶ Anyae ra oso jendea. Aque mose nda jêya tuchi Jesucristo rese chã.

²⁷ Ae uresenei senei nguia Cristo riĩ nae, ũquĩ andure chõ jêingo turã. Airandu turã nda se quia jendese chã. Eĩ nda mbia ñee seje chã. —Hue riĩ ja chõ eriqui ndua turã nye. Huee echi mbia cheẽ ndiquisã quisã Jesucristo cheẽ si hue, i nda mbia seje chã. I nda mbia seico mose isho chã. Seico mose abe jendese. ²⁸ ¡Tiri jenyechĩ nda Jesús ucuãyãsa si jê! Jêsiquicheã mose, Dios ra ũquĩ mundua tata cuasu rese cote. “Huee ra asochĩ nde”, i chee rae. “Jesús icuasa ra Dios mingo bei”, i ra ũquĩ jeni cote, jêsiquicheã mose esi. ²⁹ Jê Cristo jêicuate quia ũquĩ cote. Ũquĩ miĩño eã. —Jeñimbirãcuã abe quiatu quia serĩ, mbia icuã icuã mose jêje, i Cristo quia jêje co. ³⁰ Sã mbia icuã icuãte riqui seje no. Eĩ si chõ mbia icuã icuã ndiqui nguiã jêje ũquĩ. Nande jaje bei chõ ñene. Jemae ndei que equia serese cose resẽ. Se mbia icuã ndiquisã quisã mose. Ũquĩ sí rese chõ jêingo nguiã jirandu randu serese namo no.

2

Cristo seteã tuchi que tu ra

¹ Jesucristo jembiu turãte quia co. Cristo nyesequa mose jendese, jêyate riqui ũquĩ. Espíritu Turã abe riqui jendese ũquĩ. Jendua turãte equia emo ndese ũquĩ. ² Nyebe aico nguiã ñee jêje. Seyate aico raque jendese co. ¡Secheẽ jemumbayã tuchi quiatu quia jê! ¡Sembia tuchi quiatu se jê! ¡Jendua ata atachĩ nda jê! ¡Hue riĩ ja chõ jêingo ndua jê! ¡Hue riĩ ja chõ jêingo nyesequa nyiese no jê! ³ ¡Abei chiãte ra jêingochĩ jê! ¡Jenguasu ra jêsaã saãchĩ! ¡Jêseteã ño jêingo! —Nde chõchĩ ndeturã sesi, ¡jenye chõ jenyue! ⁴ “Se chõ jê” ¡jenyechĩ nda jê! Emo mbaerã abe rese quia nandeico ndua. ⁵ Sã Jesucristo riqui ndua eãte uchiese no. Erã si chõ nandeico ndua nande abe jê. ⁶ Dios rã si rei que Jesucristo ra. Ñimbuseteã tuchi que u íbii ra. Ererequa rã eã ngue eru íbii ra. —Dios rã si chõ taico bei se, iã ngue u íbii ra. ⁷ Mbia rerequa tuchi rei que Jesucristo ra. Huiico mose ibate. Mbia mo na ngue eru íbii cote ra. Mbia mbaecha reã na ño ngue eriqui íbii cote ra. Mbia rimba rã. ⁸ Mbia mo na ño ngue ae ra. Ibii eico mose cote. Mbia rerequa que esaã saã eãte quia ra. Siqui mingue chõ ngue equia ra. Dios cheẽ ngue emumbayã mbei mano nyee ra. Embucha ji que mano ira rese ra. Aba ireĩte mano ira rese. ⁹ Nyebe Dios riqui nguiã Jesucristo mbuchecua beite co cote. Mbia rerecuarã tuchi Dios Jesucristo mingo co cote. ¹⁰ Mbia ra ngoi ja chee ngũfã ndese Jesucristo je ñee. Ae siqui ja íbii. Ae siqui ja íbátee no. Ae siqui ja íbiqui riĩ. Ũquĩ ja ra ñee turã Jesucristo je. ¹¹ —Jesucristo rei mbia rerequa ja, i chee ra ũquĩ ja ñee. Ũquĩ mose ra Dios ia tuchi cote.

Secheẽ jêisi chooño eã ño nguiã, i Pablo

¹² Secheẽ ngue jemumbayãte quia seico mose jendese. Ishoté aico jêsi co. Secheẽ jemumbayã tuchi quiatu quia isho seico mose abe. Cochee jiri quiatu jêingo Dios je. Jêingo bei tuchi quia erese. Jenderao chee ra ibate mbae icuã si. ¹³ Dios quirãcuã ndiqui jeñiangui re ũquĩ. Dios quia mbae turã nyosei uquia nguiã jêje. Dios miĩ ño jemingo nguiã ubi rese.

¹⁴ Mbae turã jêsaã turã ja chõ. Ñee icuã icuã ndocoĩ. Teã teã ndocoĩ. ¹⁵ Eĩ nda mbia mo ñee icuã icuã eã jêje. Eĩ nda jêicuã eã emo je. Dios riiri ño jê nde. Sã nyasitata riqui mbae resae jate itondáruu no. Eĩ ño jê nde. Nyasitata rã si chõ jê nde. Mbia icuã ndesae ja. ¹⁶ Jêingo mbia mingo beisa renei nenei tuchi mbia je ũquĩ. Nyebe ra seya tuchi jendese Cristo tu mose. Secheẽ jêisi chooño eã ño nguiã. Jaembaaquiato chooño eã ngue Cristo

rĩĩ nda. ¹⁷ Secheẽ nguire jẽingo Dios icuate ũquĩ cote. Secheẽ nguire jendete jemee tuchi mose Dios je, seya tuchite ra jendese cote. Mbia nda seiquia rei nguiã Jesucristo rĩĩ, seya bei ra aico jendese, jendete jemee tuchi mose Dios je. ¹⁸ Jeñimbia chõ nguia serese. Sã seyate aico co no.

Timoteo tamondo jẽje Epafrodito rese, i Pablo

¹⁹ Jesús eno i mose, Timoteo tamondo rã jendea. Eĩ nda seya jirandu mose jendese. ²⁰ Timoteo rã si áte emo ndua tuchi jendese. ²¹ Umbaerã achõ ndese chõ eataque riqui nguiã ndua ndua. —Ã tasaã saã mbei Jesucristo je, i áte equia ũquĩ. ²² Sã eriirĩ ndiqui mbae raã naa ngu rese no. Eĩ si que Timoteo quia serese ra. Jesucristo cheẽ nenei nenei mose serese. Siqui turã mbeite que equia serese ra. Ũquĩ jẽicuate quia ũquĩ. ²³ Nyebe ra Timoteo amondo jendea. ã tatea rã nyii. Mbia ra setarõ ji mii mbei a reae. Sembusẽ nda re no ae. Ũquĩ tatea rã nyii. Ũquĩ ndeare ra Timoteo amondo jendea. ²⁴ Aĩ mbeite ndua Dios rese a. Ae ra sembusẽ jei reae. Semondo ra jendea cote reae.

²⁵ Epafrodito abe tamondobe jẽje. Ae jemondo seje nyii seraarõ sacua nae. Seresenda turãte riqui seje co. Dios cheẽ nenei nenei serese. Senongue rã tuchi eriqui seje co. ²⁶ Mae sete equia jendese co cote. —Mbia jiranduchĩ serasi rese re, i equia jeniĩ co. Nyebe eya eã ndiqui nguiã nduate jendese cote. ²⁷ Ae bei. Erasi tuchi que eriqui rei ra. Mano serĩ tuchi rei que equia ra. Dios ia eã tuchi que eriqui erese ra. Nyebe embucherõ nguiã. Serĩĩ abe que Dios embucherõ nda. Sembia jiri sacua. Sã mbae riqui eĩ eĩ ja tuchi sembia eã se no. ²⁸ Nyebe Epafrodito amondo nguiã jẽje aque. Jembia sacua erasiã ndese cote. Seya eã nda sasẽ jiri jemaẽ mose erese cote. ²⁹ Nanderesenda tuchi chõ ae Jesucristo rese re. Ngasẽ mose pee, jẽya chõ erese. Jẽisi turã ño. Eraanguia rese jẽingo turã mbei Jesús quiato. ³⁰ Jesucristo rĩĩ ngue mano serĩ serĩte ra. Jesucristo cheẽ nenei nenei mose. Siquiche áte que equia ra. —Amanochĩ nda se re, i áte que equia ra. Sereaquiato turã tuchi que equia ra. Ishote quiato ngue jẽingo nguiã jẽ. Sereaquiato aronea.

3

Cristo mii ndese aico cote, i Pablo

¹ ¡Jẽya bei chõ jẽingo Jesucristo rese jẽ! Ae asenei senei nguia jẽje nyii nae, ũquĩ sí tasenei senei jẽje. Sebite secheẽ nenei nenei sí jẽje. Jendua bei sacua erese.

² Ae siqui nyacua raãte nae, ũquĩ si jenyiicuasẽ ño nguia. Eĩcuãte riqui ũquĩ. Aba rete sia chooño ño ũquĩ nde. Mbia mbaaquiato turã ndocoĩ. ³ Circuncisión ño nande re. Nandechiangui re chõ nandeico nguiã Dios rerequia nande ã. Nande chõ nandeya riqui nguiã Jesucristo rese ã. —Mbia circuncisión naa mose, aque mose quia ra Dios emingo bei cote, i chõchĩ emo hue jenda nguiã ũquĩ. Nandequiato jiriã tuchi chõ ũquĩ nde. ⁴ —Dios ra semingo bei, mbae turã naa naa mose, ae rei que se quia nyii ra. —Seturã nii nda Dios semingo bei, i chõchĩ emo. Seturã tuchi raque eriqui ũquĩ si. ⁵ Sechacuquia mose, ocho días mose que circuncisión naa seje ra. Israelita chõ se re. Benjamín ndiirĩ nducucha chõ se re. Hebreo chõ se re. Paba abe que hebreo ra. Fariseo que se nyii ra. Moisés chimbesa que amumbayã nguia ra. ⁶ Aico asite que se quia Dios rese nyii ra. Jesús quiato que asiquisã tuchi quia nyii ra. —Pablo riqui Moisés chimbesa mumbate co, i aroneate que equia serĩĩ nda. ⁷ Ũquĩ nii ngue aico secuasua raã naa tuchi cose ra. Jesús icuayã mose se. Mbae eã tuchi chõ ũquĩ seje cote re. Cristo rese quiato aico nguiã co cote. ⁸ Mbae mo ndese aico queteã eãte co cote. Aico ndua eãte mbae mo ndese co cote. Jesucristo mii aicuate quia co cote. Ũquĩ eturãte mbae ja si seje cote. Jesucristo rĩĩ aico hui jate mbae si co cote. Iti rã ño mbae ja riqui nguiã seje cote. Seico bei sacua Cristo rese. ⁹ Cristo rese tuchi chõ aico nguiã co cote. Aico bei rei que Moisés chimbesa rui nyii ra. Ũquĩ nii eã ño Dios seisi turã nguiã. Se Jesucristo icua mose, ũquĩ mose quiato ngue Dios seisi turã nguiã. Ae Jesucristo icua quia nae, ũquĩ Dios isi turã ño nguiã. ¹⁰ Cristo aicuase tuchichĩ

nguia co. Ae quirãcuã Cristo mbuquera si nae, aque quirãcuã nda siqui rã serese chã. Sã Cristo ñimbirãcuã mbia icuã si no. Eĩ ae rã nda ñimbirãcuã mbia icuã si chã. Sã Cristo mano nandeicuã ndiquicharõ no. Eĩ ae rã nda mano mbae icuã si chã. ¹¹ Eĩ mose ra Dios seraaque mbuquera si mingo bei cote.

Cristo mii ndese aico ndua co cote, i Pablo

¹² Mbae quia asaã ja eãte rei nguiã. Jesús turã na nguia ra aico jee cote. Co Dios riqui sembitirõ tirõ mbeite co. Co aico erui beite co. Jesucristo que seisi seico sacua ae rã si ra. Jesucristo turã na tuchi aicoã ndaque namo co. Nyebe aico nguiã siqui tuchi erui co. Seico sacua tuchi chee ae rã si cote. ¹³ Ae ra Dios mee seje, ùquĩ asiiti ja eãte. Ae eĩ eĩ seje cose, ùquĩ si aico tesareite co. Ae ra Dios mee seje, ùquĩ nda asiiti. Ùquĩ mii ndese chõ aico nguiã ndua co cote. ¹⁴ Ae siqui tuchi quia Jesucristo rese, ùquĩ je quia ra Dios premio mee. Nyebe aico tuchi nguiã erese co. Premio isi sacua. ¹⁵ ¡Eĩ nande ja tuchi quiatu quia siqui Jesucristo rese jẽ! Nande eicua tuchi mose. Jendua ja eã mose hue rĩ, Dios ra ñee jẽje. —Á ndese chõ jẽingo, i ra jẽje. ¹⁶ Ae nandesiiti nae, ùquĩ ndese bei chõ nandeico. Ae rĩ Dios nandembaaquiato quiatu nyii nae, ùquĩ ndese bei chõ nandeico. ¹⁷ Serui bei jẽingo, Seresenda. Ureico bei Jesucristo rui ã. Sã mbia siqui bei urerui. ¹⁸ Mbia tubiriã ndiqui Cristo ucuãyãte ã. Ùquĩ ae rei que se quia jẽje nyii resẽ. Aba mbucheseo serĩ. “Cristo que mano mbia riquicharõ nda”, ùquĩ andu sereãte. ¹⁹ Ùquĩ nda nyoi ja tata cuásuu. Ubi rese achõ ño ùquĩ ndiqui nguiã. Eireĩ nguiãte. Eya chõ eriquichĩ nguiã huĩcuã ndese. Ibi jenda achõ ndese chõ eriquichĩ nguiã ndua. ²⁰ Jesucristo riqui nanderirõ mbae icuã si co. Ibei jenda chõ nande cote re. Jesucristo ra tu ibei si nanderea cote. Á nandeico eraarõ arõ ã namo. ²¹ Jesucristo tu mose nande je íbii, nanderete ra embuchicuabo. Nanderete icuã ño siqui nguiã namo ã. Jesucristo rete nininya chõ siqui nguiã co. Jesucristo ra nanderete mbuchicuabo nguete rã si. Uquirãcuã je ra nanderete mbuchicuabo. Sã mbae mbitirõ ja arõte uquirãcuã je no. Eĩ nda nanderete je.

4

Jëya bei chõ jẽingo Cristo rese

¹ Sechesequa, andua tuchite quia jendese a. Amaese tuchi se quia jendese a. Seya tuchite aico jendese a no. ¡jẽingo turã tuchi chõ Jesucristo rese jẽ! ² Evodia je tacheẽ. Síntique abe je tacheẽ. ¿Mbaerã jẽingo siqui icuãte nyue re? Jẽingo turã ño jenyue ae. Jesús quiato chõ jẽ ndesẽ. ³ Nde abe je tacheẽ, Seresenda. Ùquĩ cuña emingo turã nyiese. Eteaquiato bei quia. Ùquĩ ngue siqui bei serese Jesús cheẽ nenei nenei mose ra. Clemente rese abe no. Eataque rese abe no. Dios que ùquĩ mbae nombre mii mii libro umbae rese ra. —Ùquĩ nda siqui bei serese, i que ra. ⁴ Jeñimbia bei Jesucristo rese. ¡Jeñimbia tuchi jẽ! ⁵ Sã mbia mae ja jẽturã ndese. Jẽ abei rese. Achite Jesucristo ñi tu a. ⁶ Pari pari jenyechĩ nda mbae mo je. Jeñee ja quiatu Dios je. —Mbae mo embu ure je, jenyẽ chõ nguia ee. Gracias jenyẽ chõ nguia ee. ⁷ Ùquĩ mose ra Dios jembia tuchi. —Mañi Dios quia ã mbia tuchi re, i nda mbia mae mose jendese chã. Jesucristo ra jeñia mbucoi tuchi. Jesucristo ra jembia bei mingo no.

Mbae turã ndese chõ jẽingo ndua

⁸ Hui bei nonde ã abe tambesa jẽje. ¡Mbae icuã ndese ra jenduachĩ jẽ! Mbae turã ndese chõ jẽingo ndua. Ae rĩ nandeico ñee turãte, ùquĩ ndese chõ jẽingo ndua. Ichõiñosa reã ndese chõ jẽingo ndua. Ae Dios bite nae, ùquĩ ndese chõ jẽingo ndua. Mbae quishĩ ndese chõ jẽingo ndua. Ae rese mbia turã ndiqui mae sete, ùquĩ ndese chõ jẽingo ndua. ⁹ Ae asenei senei nguia jẽje nyii, ùquĩ ndese chõ jẽingo jẽ. Ae eraã ndese jẽingo mae mae seje nae, ùquĩ ño jësaã saã mbei quia. Ùquĩ naa naa mose, Dios ra siquijendese. Jembia bei ra equia.

Jesús quiato ofrendas mondo Pablo je

¹⁰ Jendua ramombe equia serese ũquĩ. Dios sembia tuchite quia ũquĩ ndese co. Jêtesarei eãte rei que equia sesi nyii ra. Mbae que jemondo aroneate quia seje nyii ra. ¹¹ —Mbae ãte seje. Mbae mo embu seje, ae ãte se quia jêje co. Sembae eã mose, seyate ũquĩ mose. Sembae ñetê mose, seyate ũquĩ mose no. Ũquĩ je que achimbaaquiatu se ra. ¹² Sembae eã mose, seyate ũquĩ mose se. Sembae tubiriã mose, seyate ũquĩ mose no. Seya beite aico co. Seriãcuã mose. Serio mose abe no. Sembae tubiriã mose. Sembae eã mose abe no. ¹³ Cristo que uquirãcuã mee seje ra. Equirãcuã je mbae asaã ja arondete. ¹⁴ Coche ngue mbae jemondo nguiã seje. Sembae eã mose. Seyate raque sembae eã mose. ¹⁵ Jê ae chõ ngue mbae jemondo mondo bei nguiã seje. Se Jesús cheẽ nenei namo mose bei chõ ngue mbae jemondo mondo nguiã seje. Iglesia mo abe que mbae mee ãte seje ra. Jê ae chõ ngue re. Filipos jenda ja. Se Jesús cheẽ nenei nenei namo mose jêje, aque mose bei chõ ngue mbae jemondo mondo seje. Seso ramo mose Macedonia si. ¹⁶ Sã ñi mbae mo jemondo mondo seje Tesalónica seico mose no. Mbae eã mose seje. ¹⁷ —Mbae mo jemondochõ seje, ae ãte quia jêje a. Dios je chõ jẽingo nguiã emondo ũquĩ. Dios ra mbae mondo tuchi jêje eribishorõ. Ũquĩ ndese quiatu seya riqui nguiã. ¹⁸ Ae jemondo seje namo Epafrodito rese nae, ũquĩ ngue aisi ja ra. Dios bite jeñimondo. Ofrenda turã tuchi que ũquĩ Dios je ra. Mbaete rei sembae cote re. ¹⁹ Jesucristo resenda chõ jê nde. Ae emoate jêje nae, ũquĩ nda Dios mee ja jêje. Dios quia mbae quereco ja nguiã. Equirãcuãte quia ñene. ²⁰ Sã mbia ñee turã mbei Dios riĩ. Nanderu riĩ. Amén.

Hui bei chõ ã cote re

²¹ Jesucristo quiato je saldar jenyê ja seje. Ae Jesús quiato riqui serese nae, ũquĩ ucheẽ mondo quia saldar i jêje aque. ²² Jesús quiato a jenda ja ucheẽ mondo quia saldar i jêje aque. César chuchua jenda abe ucheẽ mondo quia jêje aque. Ae siqui quia Jesús rese, ũquĩ. ²³ Sã Jesucristo turã tuchi riqui jê ja je. Amén.

LA CARTA DEL APOSTOL SAN PABLO A LOS COLOSENSES

Pablo embesa mbesa Colosas jenda je

¹ Pablo chõ se re. Dios chiirabo chõ se re. Jesucristo que seirabo mingo ucheẽ nenei nenei sacuaõ nda. Timoteo rese aico ã mbesa mbesa jêje a. Nanderesenda Timoteo. ² Dios rimba Colosas jenda je chõ aico nguiã co mbesa mbesa a. Cristo icuasa hue jenda ja je. Ae Cristo icua tuchi quia nae, ùquĩ ja je. Sã Dios turã ndiqui bei jendese. Sã eriqui jembia bei. Sã Jesucristo abe riqui bei jendese.

Pablo ñee Dios je Jesús quiato riĩ

³ Nandererecua tuchi rei Jesucristo. Dios rei eru. Ureico beite ñee Dios je jeniã ã. Gracias ure beite equia jeniã ã. ⁴ Ureirandu turãte quiatu ngue jendese re. Jesucristo jêicuate quiatu nguiã ure je ùquĩ. Jenyesequa tuchi quiatu nguiã Dios quiato rese ùquĩ. ⁵ —Cristo rese ra nandeico je ibate, jenyete quiarei equia eicua ùquĩ. Ùquĩ ndese que jêirandu tuchite nyii ra. Jesucristo cheẽ nenei nenei namo mose jêje nyii. ⁶ Jesucristo quiato echeẽ senei senei mbeite quia mangue choõnoa jenda ja je ã. Nyebe Jesús quiato riqui nguiã ñimbeta i i tuchi ã. Sã nandeico mbae a ucua ucua no, eĩ si chõ ñene. Sã eriqui Jesucristo cheẽ nenei nenei jêje nyii no. Sã Jesucristo cheẽ jeñia mbitirõ eandu ramo mose no. ⁷ Epafras abe que jembaaquiato quiatu Cristo riĩ nda. Cristo resenda tuchi chõ ae re. Ae chõ Cristo cheẽ senei senei turã nguiã co. Nanderesenda tuchi chõ ae re. ⁸ Ae que sembiirandu turãte jendese ra. Espiritu Turã ndiqui tuchi jendese ùquĩ. Nyebe jêingo nguiã nyesequa turãte mbia rese ùquĩ.

⁹ Ureirandu mose jendese ùquĩ ndese, aque mose bei chõ ureico nguiã ñee Dios je jeniã ã. Dios jemingo bei sacuaõ ubi rese. Ucheẽ abe rese. Dios uaquiato mee sacuaõ jêje. ¹⁰ Jêingo turã sacuaõ Dios mbia. Jêingo turã sacuaõ mbae turã ja rese. Jê Dios icua i i tuchi sacuaõ. ¹¹ Dios jembirãcuã tuchi sacuaõ uaquiato je. Jeñimbirãcuã tuchi sacuaõ mbae rasi je. Ñ nda jêingo tochi tuchi mbae ja je. Ùquĩ mose ra jêyate no. ¹² Ureico gracias i tuchi Dios je ã. Ae quiatu ngue nandembuchiicabo nguiã. Ae ra Dios mee uquiato ja je mbae turã nae, nande abe je ra emee. Dios quia nandererequia turãte nguiã nyaashĩ na co cote. ¹³ Mbae icuaõ nguiatu que nanderereco quia itondáruu nyii ra. Dios que nandembui ùquĩ si cote ra. Nguiirĩ ndese que nandemingo cote ra. ¹⁴ Dios riirĩ ngue nandeisirõ umbaerã mbei ra. Mano ngue nanderiquicharõ nda. Nandeicuaõ ngue embutiã mbei nyesi ra.

Cristo que mano nandemingo turã sacuaõ Dios rese ra

¹⁵ Mbia mae aroneate raque Dios rese. Dios rã sí tuchi chõ Cristo re. Ae rane ngue siqui Dios chiao mbae ja si ra. Ae que nyecua u mbia je cote ra. ¹⁶ Dios ae que mbae chao eã nda. Nguiirĩ ndese quiatu ngue mbae ja ao nguiã. Mbae ibatenda ao ja. Mbae ibi riĩnda abe ao ja no. Ae rese nandeico mae ã nae, ùquĩ ja que Dios chao nguiirĩ ndese ra. Ae rese nandeico mae aroneate nae, ùquĩ abe que echao nguiirĩ ndese no nda. Mbia rerecua ja abe no. Aba checuayã ja abe no. Ùquĩ ja que Cristo chao ngu rese ra. Cristo mbaerã ño ùquĩ ja re. ¹⁷ Mbae ao ja nonde Cristo riqui rei nyii. Erĩ ño mbae riqui ja nguiã ã cote. ¹⁸ Dios quiato rerecua j a chõ Cristo riqui nguiã co. Sã nandeãquĩ nanderete rerecua no. Cristo rei mbae i tuchi. Mbae i ja. Ae rane ngue quera si manonde ra. Ae rei mbae rerecua j a tuchi. ¹⁹ —Se rã sí tuchi Cristo jê, i que Dios ra. ²⁰ Cristo mano mose, nandemingo turã sacuaõ Dios rese chõ ñene. Nande miĩ mingo turã sacuaõ eã ño ñene. Mbae ja mingo turã sacuaõ Dios rese chõ Cristo mano nguiã. Mbae ja ibi riĩnda. Mbae ibei riĩnda ja abe no.

²¹ Ishote que jêingo Dios si nyii ra. Mbae icuaõ naa naa mose. Ùquĩ mose que jêingo Dios ucuaõate ra. Jendua ndua icuaõte que equia erĩ nda. Namu nguia eriqui nguiã jemingo

turâte uchiése ùquĩ. ²² Cristo quiatu ngue mano nguiã jeniĩ. Mbia rete raanguia rerequia mose. Mbae rasi que esaã tuchi umano mose ra. Jeniĩ ño ngue mbae rasi raã nguiã. Jêicuã mbutiã sacua. Jemingo turã sacua icúe Dios mbaerã. ²³ Nyebe jeñimbirãtã jiri quia Jesús icha rui. Jeñimondocho eã mbei quiatu quia jê. Jêhui eã ño Jesús cheẽ turã si jê. Jesús cheẽ turã ngue jeñandu tuchi quia. Mangue chooñoa jenda ja que echandu ra. Se abe asenei senei tuchi quia Dios cheẽ nguire co. Pablo chõ se re.

Dios que seirabo ra, i Pablo

²⁴ Se mbae rasi raã mose jêje, seyate aico se co. Cristo quiatu ngue mbae rasi saã tuchi nguiã nande je nyii. Se mbae rasi raã mose, Cristo abe chõ mbae rasi saã nguiã serese. Cristo rete rã ño Cristo quiato riqui nguiã. Nyebe seyate riqui nguiã serete mbae rasi raã mose Cristo quiato je. ²⁵ Dios que seirabo uquiato mbaaquiato quiatu ja sacua nda. Iglesia jenda ja. Dios cheẽ mbuchecua ja tuchi sacua jêje. ²⁶⁻²⁷ Dios que seirabo judíos eã mbaaquiato quiatu sacua nda. Ae Dios mbuchecua eã mbei judíos je nyii nae, aico ùquĩ mbuchecua Jesús quiato ja je ã cote. ã ndei ã: Cristo riqui jeñiangui re ã cote. Ae miĩ ño aba mingo arõ nguiã Dios rese co. Ûquĩ ño Dios mbuchecua ramo nguiã uquiato je co. ²⁸ Cristo miĩ niĩ ño aico nguiã ñee mbia je co. Mbia ambuti mbuti chõ nguiã Cristo icha rui co. Seaquiato je chõ aico nguiã mbia mbaaquiato quiatu Cristo riĩ co. Í nda Jesús quiato ja riqui siqui i i tuchi erese. ²⁹ Nyebe serecoteã tuchite riqui nguiã ùquĩ ndese co. Dios quia sembirãcuã mbeite nguiã co. Mbia mbuti mbuti sacua Cristo icha rui.

2

¹ Co secheẽ jeñandu rã. Andua ndua tuchite se quia nimbecoteã jendese co. Acheẽ tuchite se quia Dios je jeniĩ co. Laodicea jenda niĩ abe no. Ae mae ãte quia serese Jesús quiato nae, ùquĩ niĩ abe no. Mbia mbaaquiato icua icuãsa riqui jembui seríte Cristo si ùquĩ. ² Jê ja riĩ aico ñee Dios je co. Jêingo i i sacua Dios rese jeñiangui re. Jenyesequa ja sacua jenyiese. Jendua ja sacua hue rĩ si. Jêaquiato tuchi sacua Cristo riĩ. Í nda Cristo jêicua tuchi cote. ³ Cristo miĩ tuchi chõ aba mbaaracua nguiã co. Ae miĩ tuchi chõ aba mbaaquiato nguiã Dios rese co. ⁴ Mbia jembiiĩ irĩ eã sacua ño aico nguiã ñee jêje co. Mbia cheẽ turã abareãte raque. Jesús cheẽ ndui eãte quia ñene. ⁵ Aico ndua ndua tuchi jendese co. Siqui rocoĩ jendese. Ae rese airandu jendese nae, sembia tuchi chõ ùquĩ nde. Jêingo turã mose jenyiese. Jê Cristo icua i i tuchi mose. Nyebe seya bei tuchi riqui nguiã jendese co. ⁶ Sã Jesucristo jêisi nyii no, eĩ jenyese si chõ nguia siqui bei erese. ⁷ Sã ira riqui ngao mondo tuchi ibiqui rĩ no. Ñimbirãcuã tuchi sacua. Eĩ jenyese si chõ nguia jê abe jê. Jeñimbirãcuã ño nguia Cristo rui. Cristo jêicua tuchi quiatu quia. Secheẽ ñiĩnda rui sí. Gracias jenyese bei chõ nguia Dios je.

Dios que jembiasu Cristo riĩ cote ra

⁸ Mbia ra jembiiĩ irĩchĩ jembiiicha nonde Cristo si jê. Ûquĩ ñee turã arõte raque. Ñee iru iru chõ nguiã ùquĩ. Ñimbucha eãte equia Cristo rese ùquĩ. Mbia cheẽ achõ ño echeẽ nde. ⁹ Dios rã si tuchi rei Cristo. Mbia rete raãte raaque Cristo rete. ¹⁰ Ûquĩ jêingo ñimbucha Cristo rese ùquĩ. Cristo rã sí tuchi rei nande cote. Cristo quiarei ererequa tuchi mbia rerequa ja si. ¹¹ Cristo que jembui jenyioseĩ oseĩ icua si cote ra. Jemingo que icúe Dios mbaerã cote ra. ¹² Ûquĩ jêingo Dios quirãcuã icuate ùquĩ. Sã mbia Jesús raaque ati rei no. Eĩ si chõ jê Jesús icua mose re. Jendaaque ati rã si chõ jê Jesús icua mose re. Sã Dios Jesús mbuquera si uquirãcuã je no. Eĩ si chõ jê Jesús icua mose re. Jembuquera si rã ño jê Jesús icua mose re. Dios chõ Jesús icua uquia nguiã jêje. ¹³ Isho que jêingo rei Dios si cose ra. Jenyioseĩ oseĩ icua ndese siqui bei mose. Jê jêicuã nderequia bei mose. Dios que ngueco mee jêje cote ra. Jê Cristo icua mose. Dios que jêicuã mbutiã cote ra. ¹⁴ Ae icua nandesaã saã nguia Dios je nae, Dios que ùquĩ mbutiã nandesi ra. Ae cheẽ nandemumba mumba quia mbia nae, ùquĩ ñee ngue Dios mbutiã nandesi cote ra. Dios

nandeicuã mbucha raanguia Cristo rese chõ ñene. Cristo chĩ mose cruz rese. ¹⁵ Cristo mano mose que aba checuayã nderecua quirãcuã mbutiã nda. Cristo que aba checuayã mbuquirãcuã nea ja ra. Mbia resa rae que embuquirãcuã nea ja ra.

Mbia chisaã saã ndese ra jëingochĩ jë

¹⁶ Sã emo jendiquisã quisã eã mbei mbaeiae mo si. Jë mbaeiae u sereã mose, jëu eã ño. Jë euse mose, jëu chõ. Jë jëingose mose mbae mo ndese sábadó mose, jëingo chõ erese. Jë jëingose mose mbae mo ndese nyasi yasu mose, jëingo chõ erese. Jëingo sereã mose erese, jëingoã erese. ¹⁷ Cristo siqui nonde íbii chõ ngue ùquĩ ja nyii re. Mbia Cristo ru raarõ sacuã ño ngue ùquĩ nyii re. Cristo tu mose que ùquĩ quiachã ja cote ra. ¹⁸ Mbia jembiiĩ irĩchĩ jembiiicha nonde Cristo si jë. Ae useteã saã ñooño nguia nae. Ae “Dios chõ ñene” i quia ángeles je nae. “Se quiatu” i chooño ño nguia equiatu rocoĩ. Ndua turã eã ño nguia Dios rese ùquĩ. Unduasa rese achõ ño eriqui nguia ucuasu raã naa ùquĩ. Ùquĩ nda jembiiichachĩ Cristo si jë. ¹⁹ Nimbucha eã ño nguia Cristo rese ùquĩ. Ererecua raque Cristo. Sã nandeãquĩ ndiqui nanderete mingo turã ja no. Eĩ si chõ Cristo uquiato mingo turã ja nguia nyiese ã. Nyebe Cristo quiato riqui nguia Cristo icua i ite ã. Dios chõ Cristo icua uquia i i nguia ee.

²⁰ Cristo mano mose que jë abe jemano erese resẽ. Mbia chisaã saã ima si que jëhui turã ndesẽ. ¿Mbaerã nda ùquĩ ñee ndui si jëingo si cote re? ²¹ Sã ùquĩ ndiqui ñee no: “Jëocochĩ nda ã ndese. ã nda jëuchĩ no. Ùquĩ nda jëisichĩ jëo je no”, sã eriqui i no. ¿Mbaerã jëingo ùquĩ ñee mumbayãte re? ²² Mbia cheẽ achõ ño ùquĩ ndesẽ. Dios cheẽ eã ño ùquĩ ndesẽ. Nandechiurã ño mbae ja resẽ. ²³ Ùquĩ ñee turã arõte raque. Etureã arõte raque mbia mbaeiae uã mose. Mbia mbaeiae uã mose, equiatu arõte raque. Siqui mingue arõte raque. Ùquĩ nda aba chioseĩ oseĩ icuã mbutiã eã. Ùquĩ nda aba mingo eã Dios mii ndese.

3

Jendua chã mbae ibatenda rese

¹ Dios que jendaaque mbuquera si Cristo rese resẽ. Nyebe jëingo mbae ibatenda oseĩ. Mbae ibi jenda oseĩ rocoĩ. Cristo quia chĩ nguia ngoi ibate ngu jii hue. ² Jendua quiatu quia mbae ibatenda rese. Mbae ibi jenda rese ndua rocoĩ. ³ Jemano ngue Cristo rese resẽ. Dios que jembucha Cristo rese resẽ. Nyebe Dios riqui nguia jendeco rerecoquiato jëje co. ⁴ Dios chõ nandereco mingo nguia Cristo rese co. Cristo tube mose ra jendete mbiasu tuchi cote. Jenininya tuchi ra erese cote.

Cose ndare rã eã ño jëingo nguia ã cote

⁵ Ae icuã jendeco quia jeñiangui re nae, ùquĩ icuã jëquiti chõ jenyiesi. Jenyioseĩ oseĩ icuã jëquiti chõ jenyiesi. Jëingochĩ nda jeninisiã mo ndese. Jendu eã ndese ra jëingochĩ no. “Aque rese nda aico rã ñã”, jenyechĩ nda emo nii jë. Mbae icuã mo ndese ra jendua ndua jirichĩ jë. Emo mbae ra jenyoseĩ choseichĩ jë. Dios abareã ndese siqui raanguia chõ ùquĩ nde. ⁶ ã icuã ja rĩĩ nda Dios mbia mbasi. Ae echeẽ mumba mumbate quia. ⁷ Jë abe que ã icuã jësaã saã tuchi quia nyii ra. Cristo icuayã mose. ⁸ ã icuã jëjea ja chõ jenyiesi cote. Jë paama i. Jëicuã icuã nyue. Jeñee nyecua nyecua emo nii. Jenyuru icuã. ã jëjea ja chõ jenyiesi. ⁹ Jeñee ñooño chĩ nda jendesenda je jë. Jë mbae oseĩ oseĩ icuã ñiinda que jembuquiachã jenyiesi resẽ. Jenyisaã saã ima jësaã eãte quia ùquĩ cote resẽ. ¹⁰ Jeñimbiasu ji chõ jëingo nguia ùquĩ. Nyebe Cristo riqui nguia jembaaquiato tuchi Dios rĩĩ ùquĩ. Jëingo turã sacuã Dios rã si. ¹¹ Cristo quia rei mbia mbuchiabi abiã tuchi. Judíos raque. Judíos eã ndaque. Ishonda mo ndaque. Ae equiatuãte raque. Mbia rimba raque. Mbia rimba eã ndaque. Ùquĩ ja Cristo mbuchiabi abiã tuchi. Ùquĩ ja chianguĩ re Cristo riquise rete. Cristo siqui mose nandechiangui re, ùquĩ nguia rei eturã tuchi mbae ja si.

¹² Co Dios riqui nyesequa tuchi jendese co. Dios que jëirabo mingo icúe umbaerã nda. Nyebe jëingo nguia siqui turãte. Jëya eã ño jëingo mbia rese. Jëseteã ño jëingo mbia

rese. Jẽingo tochi chõ nguia. Jendoseĩ nguiatu chõ jẽingo. ¹³ Jeñimbirãcuã ño nguia jendesenda rese. Jẽtesarei chõ nguia jendesenda icuã icuã mose jẽje. Sã Cristo tesarei jẽicuã si no. ¹⁴ Jenyesequa tuchi quiatu quia mbia rese jẽ. Dios cheẽ tuchi chõ ã nde. Jenyesequa tuchi mose mbia rese, mbae turã ja rese chõ nda jẽingo tuchi cote. ¹⁵ Jeñimbia bei chõ nguia Dios rese. ĩ nda jemingo turã mbei jenyue. Ũquĩ ñiñ ño Dios jemingo nguiã icúe umbaerã. Jesús rete miñ na ño Dios jemingo nguiã ũquĩ. “Coche ñene” jenyue bei chõ nguia Dios je. ¹⁶ Sã Cristo cheẽ ndiqui tuchi jeñiangui re. Jẽaquiatu tuchi nda jẽingo chã. Jenongue jembaaquiutu quiatu chõ nguia. Jenongue jembuti mbuti quiatu quia Cristo cuti. Jẽirasei rasei tuchi quiatu quia Dios je. Himnos. Salmos. Jẽya chõ jẽingo irasei rasei Dios je. ¹⁷ Jẽ mbae raã mose, Jesús riñ ño jẽsaã. Ae jẽingo ñee nae, Jesús riñ ño jeñee. Gracias jenyue bei chõ nguia Dios je Jesús riñ.

Ae jẽsaã nguia nae, jẽsaã ño Cristo je

¹⁸ Tacheẽ mbia ninisi je. Jendu cheẽ jemumbayã ño nguia. Diosbi tuchi chõ ũquĩ nde. ¹⁹ Eru, jenyesequa tuchi quiatu quia jeninisi rese. Jẽingo tochi chõ nguia ee. ²⁰ Mbia riirĩ, jendu cheẽ jemumbayã mbei chõ nguia. Jẽsi cheẽ abe no. Diosbi tuchi chõ ũquĩ nde. ²¹ Jendiirĩ nda jembupaama ichĩ jenyue jẽ. ĩ nda ñimondocho eã. ²² Tacheẽ erimba je cote. Jenderecua cheẽ jemumbayã mbei quiatu quia. Emae eã mose abe quiatu echeẽ jemumba eã. Jẽseteã jẽsaã ñooñoa nguiatu quia ee. Dios je quiatu jẽingo mbae raã turã ja. Ae quia mae mbeite nguiã jendese co. ²³ Jẽ mbae raã mose, jẽsaã turã ño nguia. Mbia je eã ño jẽingo nguiã mbae raã. Dios je chõ jẽingo nguiã eraã. ²⁴ Dios ra mbae turã mee jẽje jenyisaã turã ndibishorõ. Cristo je chõ jẽingo nguiã mbae ao ao ũquĩ. Jenderecua tuchi chõ ae re. ²⁵ Ae mbae icuã saã nguia nae, Dios abe ra mbae icuã mee ee echisaã icuã ndibishorõ. Dios ra emo mbasi chooño eã. Emo nda eisi turã ñooñoa no.

4

¹ Mbia rerecua je tacheẽ cote. Jenimba jembuquiei quiei chooño eã ño nguia. Mbae jẽsaã turã jiri quiatu quia jenimba je. Jẽ abe jenderecua riqui Dios co no.

² Jeñee ñee mbei quiatu quia Dios je. Jẽtesa tesa bei quiatu quia Dios rese. Gracias jenyue bei quiatu quia ee. ³ Jeñee ñee mbei quiatu quia Dios je ure riñ. ĩ nda Dios riqui sembucheẽ ñee mbei tuchi mbia je Cristo riñ. Ae rese mbia riqui jiranuate Cristo rese nae, ũquĩ asenei senei sete mbia je. Nyebe setarõ ji aĩ nguiã a. ⁴ —Paba, sã Pablo Jesucristo mbuchecua checua tuchi quia mbia je, jenyue bei quiatu quia Dios je.

⁵ Jeñimbaaracua chõ nguia siqui turã Jesús quiatoã je. Ae Dios bite nae, ũquĩ ndese chõ jẽingo ñimbecoteã. ⁶ Sã embiquesa riqui mbae mbiñe no. Eĩ jenyue si chõ nguia ñee turã mbia je. ĩ nda jẽaquiatute ñee Jesús quiatoã ñee ndibishorõ.

Pablo ñee hui bei

⁷ Tíquico si quia jendea aque. Ae ra mbae senei ja jẽje jembiiirandu seriñ. Ae que mbae saã turã mbeite quia serese ra. Dios rimba turã tuchi chõ ae re. ⁸ Nyebe amondo nguiã jendea aque. Jembiiirandu ja sacua serese. Jembia tuchi sacua Cristo rese abe. ⁹ Onésimo abe si quia erese aque. Hue jenda sí chõ ae re. Jesús quiato tuchi chõ ae abe re. ũquĩ nyeremo nda jembiiirandu tuchi a jenda ja rese.

¹⁰ Aristarco tarõ ji ñi serese a. Ae abe saludos mondo quia jẽje aque. Marcos abe saludos mondo quia jẽje aque. Bernabé nongue riirĩ ño ae re. Ae oso mose jendea, jẽisi turã ño secheẽ nguire. Acheẽ ngue jẽje eriñ nyii. ¹¹ Jesús Justo abe saludos mondo quia jẽje aque no. ũquĩ miñ judíos que siqui tuchi quia serese Dios cheẽ nenei nenei nda. ũquĩ ngue sembiate quia mbae raã turã mose serese ra. ¹² Epafra abe saludos mondo quia jẽje aque no. Cristo rimba rei ae no. Jendesenda sí chõ ae no nde. Ae ñee mbeite quia Dios je jeniñ co. Jẽingo irãtã sacua Dios rui. Ae Dios bite riqui nae, ũquĩ ndese jẽingo tuchi sacua. ¹³ Epafra riqui nyesequa tuchite jendese co. Aicuate se quia co. Laodicea jenda rese abe eriqui nyesequa tuchite co. Hierápolis jenda rese abe no. ¹⁴ Lucas abe saludos mondo

quia jêje aque no. Aba rasi rea reasa rei ae. Médico rei ae. Jesús chesecua tuchi chõ ae re. Demas abe saludos mondo quia jêje aque no. ¹⁵ Jesús quiato Laodicea jenda je saludar jenye rã ure je. Ninfas je abe saludar jenye. Ae ñumunua nua nguia Ninfas chuchua Jesús quiato nae, ãquĩ abe je saludar jenye rã ure je. ¹⁶ Ae ambesa mbesa quia a nae, emondo nonde jêje a nae, ã je leer jenye ja rã. Aquere jemondo rã Jesús quiato Laodicea jenda je. Ñquĩ abe leer i sacua ee. Ae carta ambesa Laodicea jenda je nae, jẽ abe leer jenye ee no. ¹⁷ Jeñee na Arquipo je. —Ae je Jesús ñee nae, “co esaã seje” i ndeje nae, ãquĩ esaã turã ja chõ, jenye Arquipo je.

¹⁸ Hui bei sacua co ambesa mbesa quia seo ae je co. Pablo chõ se re. Jendua serese setarõ ji rese. Sã Dios riqui turã tuchi jêje. Amén.

PRIMERA CARTA DEL APOSTOL SAN PABLO A LOS TESALONICENSES

Pablo ã mbesa

¹ Pablo rei se. Silas riqui serese a. Timoteo abe no. A urembesa mondo quia jêje aque, Tesalónica jenda. Ae ñumunua nua mbeite quia Jesús riñ. Jesucristo icuasa chõ jẽ nde. Dios icuasa abe chõ jẽ no nde. Dios rei nanderu. Jesucristo rei nandererecua. Sã ùquĩ turã ndiqui bei jêje. Sã ùquĩ ndiqui jembia bei.

Jesús jêicuate quia ùquĩ

² Gracias, ure bei quia Dios je jeniã ã. Jẽ ja riñ. Ure ñee mose Dios je, jeniã ño ureico nguiã ñee ñee ee ã. ³ Jesús jêicuate quia ùquĩ. Nyebe jêingo beite nguiã mbae turã ndese ùquĩ. Jenyesequate quia Jesús rese ùquĩ. Nyebe jêingo nguiã Dios cheẽ nenei nenei mbei mbia je ùquĩ. Jesús nyebi sí mose, ùquĩ ño jêsaarõ arõ u nguiã hue. Jeñimbirãcuã tuchi equia eraarõ arõ ùquĩ. ⁴ Seresenda, Dios riqui nyesequa tuchi jendese co. Dios que jêirabo umbaerã nda. ⁵ Dios cheẽ turã ngue uresenei senei nguia jêje ra. Urecheẽ achõ je eã. Espíritu Turã abe que jembaaquiatu quiatu ra. —Ichõño eã tuchi chõ Dios cheẽ nde, ure que equia erenei nenei jêje ra. Ureico mose jendese que ureico turãte jêje ra. ùquĩ ndese que jêingo mae nda. ⁶ Ure rã si que jêingo Dios rui ra. Nandererecua rã si que jêingo ra. Dios cheẽ ngue jêisi tuchi ra. Nyebe que mbia icuã tuchi riqui jêje ra. Mbia icuã icuã mose jêje que Espíritu Turã ndiqui tuchi jendese ra. Jembia tuchi sacuã. ⁷ Nyebe Jesús icuasa riqui nguiã siqui turã jendui. Jesús icuasa Macedonia jenda. Acaya jenda abe no. ⁸ Nandererecua cheẽ ngue jêsenei senei tuchi quia Macedonia jenda je ra. Acaya jenda je abe no. Ishonda ja je. Mbia que jirandu ja quia jendese ra. —Dios icuasa rei ùquĩ, i equia jeniã ùquĩ. ¿Mbaerã nda Dios cheẽ asenei ee re? Jembiirandu turã ngue eno. ⁹ ùquĩ nguia ñee turãte nguiã jeniã ùquĩ. —Tesalónica jenda que Pablo isi turã nda. Pablo resenda abe isi turã. Hui tuchi que Dios raanguia si ra. Siqui bei nonde Dios reco rese cote, i equia jeniã ùquĩ. ¹⁰ —Tesalónica jenda chi Jesús raarõ arõ huee. “Tu ra nyebi ibate si”, i u huee, i equia jeniã ùquĩ. Jesús rei Dios reco riirí. Dios que Jesús raaque mbuquera si ra. Jesús ra nanderiquisã mbae rasi si. Dios mbia icuã mbasi mose.

2

Dios cheẽ uresenei tuchi jêje

¹ Ureso choño eã ngue equia jendea ra, Seresenda. Dios cheẽ ngue uresenei tuchi quia jêje ra. Jêisi turã turãte que equia ra. Ureso mose jendea. ² Ureso que Filipos nyii ra. Hue jenda que mbia icuãte riqui ure je ra. Ureiruã nua ngue ra. ùquĩ jêicuate quia ùquĩ. Aquere que Dios cheẽ turã uresenei senei tuchi jêje cote ra. Ureso mose jendea. Dios que urembusiquiche eã tuchi ra. Mbia icuã tuchi raque ure je. ³ Dios cheẽ ngue urechabi chabiã tuchi quia erenei nenei nda. Urendua icuã icuã eã ngue equia ñee mose jêje ra. Jembiirí irí eã. ⁴ —Mañi nda equia reae, i que Dios quia ure je nyii ra. Maende ure rese que ureirabo cote ra. Echeẽ turã nenei nenei sacuã. Mbia mbia sacuã eã ño ureico nguiã Dios cheẽ nenei nenei jêje. Dios mbia sacuã ño ñene. Dios riqui mae mbeite urechiangui renda rese co. ⁵ Urecuasú que uresaã saã eãte quia jêje ra. Urecheẽ ñoño eãte que equia jêje ra. Jembiirí irí eãt e que ureico quia ra. —Sã mbia mbae mo mee mee ure je, ure eãte que equia jembiirí irí nda. Dios riqui maete urerese co. ⁶ —¡Jenderecuarã nda ure cote jê! ure eãte que equia jêje ra. Ure eãte que equia mbia mo abe je ra. Cristo chimondo raque ure, echeẽ nenei nenei sacuã jêje. ⁷ Ureico turã ngue equia jêje ra. Sã esi mo ndiqui nguiirí nderequia turã, eĩ ure chõ ngue equia jêje ra. ⁸ Urechesequa tuchi

que equia jendese ra. Nyebe Dios cheẽ achõ eã uremee nguiã jêje. Mbae ja uremeese rete raque jêje.

⁹ Urechisaã saã ndese que jêingo mae tuchite ra, Seresenda. Ureico mose jendese. Mbae que uresaã saã mbeite quia ra. Ure ae chõ urechiurã ureisi isi nguiã. Nyaashĩ mose achõ eã ngue ureico mbae raa naa nda. Itondaru mose ab e que ra. Ĩ nda je mbae jemondoã ure je. Ure Dios cheẽ nenei nenei mose jêje. ¹⁰ Jesús icuasa chõ jê cote re. Urecuata turãte que equia jêje ra. Jemae ngue equia urerese ra. Dios abe que mae nguia urerese ra. Ureico mose jendese. Ureico turãte que equia ra. Nyebe emo ñee icuã aroneate urerĩ. ¹¹ Jendu rã ngue ureico jêje resẽ. Sã emo ndiqui nguiĩ mundua turã no. Sã emo ndiqui nguiĩ mbucuata turã no. Eĩ si chõ ure re. Jemundua ndua. Jembucuata turã nonde. ¹² Urecheẽ tuchi que equia jêje. —Dios quiato chõ jê cote re. Nyebe jêingo nguiã Dios mbia beite cote. Dios que jêirabo ra. Dios ra jenderecua tuchi cote. Dios ra uturã mee jêje, ure beite que equia jêje ra.

¹³ Gracias, ure bei equia Dios je jeniĩ a. Dios cheẽ nguiatu ngue jêisi turãte nguiã. Ure Dios cheẽ nenei nenei mose jêje, jêisi turã ngue ra. Mbia cheẽ na eã ngue Dios cheẽ jêje ra. Dios cheẽ ngue jembuturã nda. Jê eisi mose. Gracias ure que Dios je, jê echeẽ isi mose ra. ¹⁴ Sã judíos icuã icuã Jesús quiato Judea jenda je no. Eĩ si chõchĩ mbia icuã icuã jêje no, Seresenda. Jê ji jenda chõ eicuã icuã ndiqui nguiã jêje Jesús riĩ ũquĩ. ¹⁵ Judíos sí que Jesús iquia nandererecua ra. Sã Dios cheẽ mbuchecuasa iquia nyii no, eĩ sí que Jesús iquia no nda. Ure abe mombo no. Judíos icuã tuchi que ũquĩ nda. Ā eicuãte riqui Dios je ã. Mbia abe je eicuãte riqui ã no. Mbia ja je. ¹⁶ —¿Mbaerã nda jêso Dios cheẽ nenei nenei Judíos eã je re? i que equia ure je ra. Ureriquisã quisã ndei que equia ra. Dios cheẽ ngue uresenei mbei bei chõ judíos eã je ra. Dios erirõ sacua eicuã si. Judíos que urecheẽ siquisã quisã ño nguia ra. Judíos que huiicuã saã i i tuchi quia ra. Nyebe que Dios paama i tuchi ee cote ra. Dios ra embasi tuchi cote.

Sesose rete jendea

¹⁷ Seresenda, ishote urecu jêsi a. Nyebe ureya eãte riqui nguiã jendese ã. Uremaese rete quia jendese ã. Urendua beite quia jendese ã. ¹⁸ Uresose rete rei que equia jendea ra. —Taso erea, ae beite rei que se quia ra. Pablo rei se. Satanás que ureriquisã quisã ño nguia ra. ¹⁹⁻²⁰ Jesucristo ra tu si nyebi nanderea. Seya tuchi aico eraarõ arõ a. Jê nguia uremombia mbia beite nguiã ũquĩ. Jêchĩ Jesús quiato. Nyebe ra ureya jendese Jesús tube mose. Ure Jesús cheẽ nenei nenei mose que jêisi turã nda. Nyebe ra Jesús ia tuchi urerese eru mose.

3

¹ —Tairandu tuchi rã erese, ure tuchi que equia jeniĩ nda. Urendua ndua tuchi que equia jendese ra. Nyebe ure ae ureico nguiã Atenas. ² Nyebe que Timoteo amondo rei nguiã jendea. Jirandu sacua jendese. Dios rimba tuchi que ae ra. Nanderesenda tuchi que ra. Cristo cheẽ turã nenei neneisa que ae ra. Ae que uremondo jendea jemundua ndua sacua Jesús rese ra. ³ Timoteo que amondo jendea ra. Ĩ nda jêhui eã Dios cheẽ si mbia icuã mose jêje. Mbia icuã tuchi que eriqui jêje ra. Nande je ja que eicuãte riqui ra. Jesús icuasate quia nande re. Nyebe mbia icuãte riqui nguiã nande je. ⁴ Ureico que equia jendese nyii, aque mose que ureico rei ñee jêje resẽ. —Mbia icuã tuchi ra eriqui nande je, ure rei que equia jêje nyii resẽ. ¡Sã ngasẽ cote jê! ¡Sã mbia icuã icuã nande je cote jê! ⁵ Nyebe seiranduse beite riqui nguiã jendese. Nyebe Timoteo amondo rei nguiã jendea. Ureirandu sacua. —¡Quiatu Jesús quiato rea jê! Siqui bei rei equia Jesús rui reae. Aba mbiĩrĩ irĩsa embiicuã eã ndei reae. Dios cheẽ nandesenei ñooño eã ndei ee reae, ae que Timoteo mondo jendea ra.

⁶ Ae que Timoteo tu jêsi cote ra. Ñee turãte que u jeniĩ nda. —Hue que echĩ Dios icua tuchi ra. Hue que echĩ nyesequa tuchi Dios rese ra. Nande abe rese que echĩ nduate huee ra. Eyayãte eriqui rei nanderese, i que Timoteo u urembiirandu jeniĩ nda. Ure abe

ureyayãte riqui jendese ã. ⁷—Hue que echi Dios icua tuchi ra, i mose que ureya tuchi ra. Mbia icuãte raque ure je. Seresenda, jẽ urembiate quia ũquĩ. ⁸ Ureya tuchite jendese, jẽingo bei mose nandererecua rese. ⁹ Dios urembia tuchite quia jendese co. Nyebe ureico nguiã gracias i ee co. ¹⁰ Dios je que ureico ñee mbei ra. Nyaashĩ mosechõ eã. Itondaru abe. —Paba, urererao rã mbia rea, ure bei que equia Dios je jeniĩ nda. Ì nda jembaaquiato ji jẽingo tuchi Dios rese.

¹¹ Dios rei nanderu. Jesucristo rei nandererecua. Ũquĩ je ureico ñee tuchi ã. Urererao sacua jendea. ¹² Sã nandererecua jembuchesequa tuchi jenyiese. Mbia ja rese. Sã ureico nyesequa tuchi jendese no. Eĩ jenye si chõ nguia nyesequa mbia rese jẽ abe no. ¹³ Ì nda Cristo uquirãcuã mee jẽje. Ì nda Cristo jemingo icúe umbaerã tuchi. Ì nda jemingo turã mbei Dios rese. Jesucristo tu mose chee ibate si. Mbia ra ñee icuã aroneate jeniĩ cote. Ñee icuã aroneate ra Dios je jeniĩ. Jesucristo tu mose ra Dios mae jẽturã ndese. Jesucristo ra tube uquiato ja rese.

4

Jẽingo turã, i Dios mbia je

¹ Seresenda, tacheẽ tuchi jẽje. Jesús cheẽ ngue uresenei senei tuchi quia jẽje ra. Ũquĩ ndui chõ jẽingo turã ndei nguiã ũquĩ. Jẽingo i i tuchi quiato erui jẽ. Ì nda Dios ia tuchi jendese. Secheẽ ae eã ño ã nde. Jesucristo cheẽ ño ñene. ² Nandererecua tuchi chõ Jesús re. Ae chõ urembucheẽ nguiã jẽje. Ae cheẽ si jẽingo tesarei ãte ũquĩ. ³ Dios jemingo sete quia icúe umbaerã co. ¡Emo ninisi rese ra jẽingochĩ jẽ! ¡Eru eã mo ndese abe ra jẽingochĩ jẽ! ⁴ ¡Jeninisi ae rese chõ jẽingo! Jeninisi jendeco turã ño nguia. ⁵ Dios icuasa reã ño mbia ninisi osei osei nguiã ũquĩ. ¡Eĩ jenyechĩ nda jẽ jẽ! ⁶ ¡Jenongue ra jembiiĩ irĩchĩ eninisi rese jẽ! Ũquĩ naa naa mose ra Dios jembasi tuchi. Nyebe urecheẽ nguiã jẽje nyii. ⁷ —Jẽingo turã icúe sembaerã, i que Dios nande je ra jẽ. —Jẽingo icuã icuã, iã equia nande je co. ⁸ ¡Urecheẽ jẽisi turã ño nguia jẽ! Jẽ urecheẽ isiã mose, eĩ jenye chõ nguiã Dios ucuayã. Urecheẽ achõ eã ño uresenei senei nguiã jẽje. Dios cheẽ ño ñene. Dios sí que Espíritu Turã mondo nande je ra.

⁹ —Jenyesequa jenyiese, aeã nda jẽje cote. ¿Mbaerã nda acheẽ jẽje re? Dios que ñee jẽje no. Nyebe jẽingo nguiã nyesequa jenongue rese ũquĩ cote. ¹⁰ Macedonia jenda rese jẽingo nyesequa ũquĩ. Jesús quiato rese. Jenyesequa i i tuchi jiri erese jẽ. ¹¹ ¡Jẽingo turã ño nguia jẽ! ¡Jeñimbecoteã ño nguia jembae rese jẽ! ¡Jẽquieĩ quieĩ bei equia jẽ! Ũquĩ ngue urecheẽ jẽje nyii resẽ. ¹² Ũquĩ naa mose ra Jesús icuasa reã ñee turã turã jẽje. Ũquĩ naa mose ra mbae tiã eã jẽje no.

Jesús ra tu nyebi íbii

¹³ Mbia raaque rese taembiirandu rã. Ì nda jẽyayã eã mbia raaque rese. Jesús icuasa reã ngue eyayã tuchite riqui mbia raaque rese ra. —Quera si na nye. Nandemae si na erese re, i eã ño Jesús icuasa reã nguiã mbia raaque je ũquĩ. ¹⁴ Jesús que mano ndei nguiã nyii. Quera si que ra. Nyebe ra Jesús icuasa raaque abe quera si. Sañi Jesús quera si no. Eĩ si ra Jesús icuasa raaque quera si no. Dios ra embuquera si. Jesús rese ra ecuaẽ. Ũquĩ nandeicuate quia ã. ¹⁵ Nandererecua Jesús cheẽ uresenei senei nguiã jẽje ã. Jesús ra tube íbii. Aque mose ra mano je rane nyoĩ era. Ae nandereco nandeico ã nae, ũquĩ abe ra nyoĩ erui cote. ¹⁶ Cristo ra tu nguichi ibei si. Ererecua rã nda eru ñee mbia je. Angel nderecua ibatenda ra ñeemombo. Corneta abe ra pu i Dios mbae. Cristo nguichi mose íbii. Aque mose tuchi ra Cristo icuasa mano je quera si. Ũquĩ nane nda quera si. ¹⁷ Aquere ra nandereco rerao ũquĩ ndese cote. Ibeishĩ ni nda nandererao ja. Huee ra nandemae tuchi Cristo rese cote. Nandeico bei ra erese cote. ¹⁸ ã ndei Dios cheẽ ã. Jeñimundua ndua bei quia erese. Ì nda jẽya tuchi erese.

5

Jēquiche je na Jesús ru chã

¹—Aque mose ra Jesús ru, ae eã nda jēje, Seresenda. ²Isa chõ mbae mbuquiachãsa riqui nguiã tu. Mbia ndua eã mose ra eru. Eĩ si ra Jesús u, mbia ndua eã mose erese. ³—Ureico turãt e quia ã ndesẽ, i ra mbia. Ajee tuchi ra Jesús ru aque mose. Mbia mbutiã nonde cote. Sã nanimbae rasi riqui tu ajee no nae, eĩ si tuchi ra Jesús u ajee. Emo nda oso chee eã. ⁴Jē nguia jēingo ãte nguiã itondaru ũquĩ, Seresenda. Jēaquiataũ eã ño jē nde. Jē nguia ra Jesús jembua eã u. Mbae mbuquiachãsa rã eã nda eru jēje. ⁵Nyaashĩ na ño jēingo nguiã jē ja ũquĩ. Itondaru rã eã ño nandeico nguiã nande ã. ⁶Nyebe nandechumumba rã mbei chõ nandeico nguiã tesa. Mbia ataque quiarei uque bei. ⁷Ae uque quia, ũquĩ ño uque nguiã itondaru. Ae quiacua quiacua quia, ũquĩ ño quiacua nguiã itondaru. ⁸Nyaashĩ jenda chõ nande re. Nyebe nandechimbaaracua bei quiatu quia nande. Dios nandeicua tuchi quia nande. Nandechesecua tuchi quia erese nande. Dios ra nanderirõ tuchi mbae icuã ja si. Ũquĩ nandeicuate quia ã. Nyebe ra mbae icuã ocoã nanderese. ⁹Nandembasi sacua eã ngue Dios nandeirabo ra. Nanderirõ sacua eicuã si chõ ngue nandeirabo nguia. Jesucristo riĩ nda nanderirõ eicuã si. Jesucristo rei nandererecua. ¹⁰Ae que mano nande je ra. Nandeico sacua erese. Tu ra nandererao siqui sacua erese. Nandereco siqui mose ra nandererao. Nanderaaque chi mose ra nandererao no. Eĩ ja chõ ñene. ¹¹Ã ndei Dios cheẽ ã. Jē ño jeñimundua ndua nguiã erese ũquĩ. ¡Ũquĩ jēsaã saã mbei quia jē!

Pablo embaaquiatu

¹²Jesús icuasa rerecua cheẽ nda jemumbachĩ, Seresenda. Jenderecuarã ño Dios emingo nguiã. Jembaaquiatu quiatuchĩ equia ũquĩ. ¹³Nyebe jēingo turã ño nguia ee. Jenyesequa tuchi quia erese. Jembaaquiatu quiatu sacua ño ũquĩ nde. ¡Jēingo turã ño nguia jenyue! ¹⁴Emo tomei mo siqui mose jendese, jemingo mbae mo ndese. Ae hui serĩ serĩte quia Dios cheẽ si nae, ũquĩ jemingobe erese. Ae equirãcuã neate, ũquĩ jembirãcuã. Jēingo mingue chõ nguia mbia ja je. ¹⁵Mbia icuã mose jēje jēicuã eã ño ee jē! ¡Jēingo turã ño jenyue jē! ¡Jēingo turã ño mbia ja je no jē! ¹⁶Jēya bei jēingo. ¹⁷¡Jeñee ñee mbei quia Dios je jē! ¹⁸Gracias, jenyee quia Dios je mbae ja riĩ. Ebi tuchi quiarei ũquĩ. Jesucristo icuasa chõ jē nde. ¹⁹Espíritu Turã nda jēsiquisãchĩ jē. ²⁰Dios cheẽ mbuchecuasa cheẽ jeñandu turã ño nguia jē. ²¹—Ma ñee ñooñoa, jenyee tuchi quiatu eicua jē. Ñee ñooño eã mose, erui jēingo. ²²¡Mbae icuã ja rese ra jēingochĩ jē!

²³Aba mombiasa chõ Dios riqui nguiã co. Sã ae si jemingo icúe umbaerã tuchi. Sã ae jemingo turã mbei. Jesucristo tu chee mose ibate si. Mbia ra ñee icuã aroneate jeni cote. ²⁴Ũquĩ nda Dios saã ja jēje. Ae quiarei ichõiñosa reã tuchi.

Pablo ñee hui bei

²⁵Jeñee mbei quia Dios je urerĩ, Seresenda. ²⁶Mbia nanderesenda jēquiaam a ama ja ure je hue jenda. ²⁷Ã sechimbese jēsenei ja rã nandenongue hue jenda je. —Jēsenei na, i Cristo quia jēje co. ²⁸Jesucristo rei nandererecua. Sã ae riqui siqui turã mbei jendese. Amén.

SEGUNDA CARTA DEL APOSTOL SAN PABLO A LOS TESALONICENSES

Pablo chimbesa

¹ Pablo rei se. Silas riqui serese a. Timoteo abe no. Ureico ã mbesa jêje a, Tesalónica jenda. Jê nguia jeñumunua mbeite nguia Jesús je ũquĩ. Jesucristo icuasa chõ jêingo nguia ũquĩ. Dios rei nanderu. Jesucristo rei nandererecua. ² Sã ũquĩ turã ndiqui jêje. Sã ũquĩ ndiqui jemombia bei.

Dios ra mbia icuã mbasi

³ Gracias, ure beite quia Dios je jeniã ã. Coche ureico nguia ñee Dios je jeniã. Jê nguia jêingo nguia Dios icua tuchite ũquĩ. Jê nguia jêingo nguia nyesecua tuchite jenyiese ũquĩ. ⁴ Nyebe ureico nguia ñee turãt e jeniã ã. Ae ñumunua nua nguia Dios je, ũquĩ ja urembiirandu turã nguia jendese ã. Jêingo minguete quia mbia icuã je ũquĩ. Jêingo Dios icua tuchite ũquĩ. Mbias icuãte riqui raque jêje. Mbias icuã mose jêje, jê jêturãte riqui ee ũquĩ.

⁵ Sã Dios turã tuchi riqui no jê. Sã mbia mbuchechea turã no. Ae ra ñimbirãcuãte quia mbias icuã icuã mose Jesús riñ ee nae, ũquĩ je ra mbae turã mondo. Mbae ra emondo mbias chisaã turã ndibishorõ. Mbias chisaã icuã abe ribishorõ no. ⁶ Ae jembasi mbasi quia nae, Dios ra ũquĩ mbasi tuchi cote. ⁷ Jesucristo ra tu ibate si. I ra eu quia nyecua. Angel cuabẽ ndese ra eru. Jesús ra ángel quirãcuã tuchi queru. Tata rendi rã nda Jesús ru. Eru mose ra mbias icuã icuã eã nande je cote. ⁸ Jesús tu mose ra Dios icuasa reã mbasi mbasi cote. Echeẽ turã mumba mumbasa ra embasi Dios cheẽ turã Jesucristo riñ. ⁹ Jesús ra ucheẽ mumba mumbasa mbasi tuchi. Jesús ra emombo isho. Echeẽ mumba mumbasa ra siquã mbei Dios rese cote. Dios quirãcuã ndese abe ra eriquã no. ¹⁰ ũquĩ nda Jesús saã ucheẽ mumba mumbasa je tu mose. Echiirabo quia ra ñee turã turã mbei eriñ eru mose. Eicuasa ra ñee turã turã mbei eriñ eru mose. Jê abe ra jêingo erese. Ure Dios cheẽ nenei mose, jêisi que ra. Nyebe ra jê abe jêingo erese eru mose. ¹¹ Nyebe ureico nguia ñee ñee mbei Dios je jeniã ã. Ae Dios bite nae, ñ nda ũquĩ jêsaã saã mbei quia. ũquĩ je que Dios “jenyu” i jêje ra. Mbae turã jêsaã saãse rete quia ũquĩ. Sã Dios uquirãcuã mee jêje. Mbae turã naa naa nonde cote. Jesús icuasa chõ jengu nguia huee. ¹² Jê mbae turã naa naa mose, mbias ra ñee turã turã Jesucristo riñ. Jê abe riñ nda Jesucristo mbias mbucheẽ turã turã. Dios quia eturãte riqui nguia nande je. Jesucristo abe eturãte nande je. Ae rei nandererecua.

2

Dios ucuãyãsa

¹ Jesucristo rei nandererecua. Ae ra tu nandemunua mbucha uchiese. ũquĩ ño asenei senei nguia jêje. ² —“Co Jesús ru quia co”, i que Pablo ra, ichõiño nda mbias seriñ jêje. Jeñanduchõ ño ũquĩ mose. —Co Jesús ru quia co, ae eã se quia embesa jêje a. Mbias mo nda ñee ñooño jêje. —Jesús ra tu cote. Dios que sembiirandu ra, ichõiño nda jêje. ũquĩ jeñanduchõ ño. ³ Mbias ra ñee ñooño chĩ jembiiĩ irĩ jê! Jesús rane nda tuã nguia. Mbias rane nda hui hui Dios si. Dios ucuãyãsa rane nda tu Jesús si. —Emo mose aque tambutiã, i que Dios aque riñ nda. ⁴ Aque ra Dios resenda ucuãyã tuchi. Dios abe ucuãyã tuchi rae. Dios chuchúaa ra eñi ngoi mbias mbiiĩ irĩ. —Se rei Dios, ichõiño nda huĩ mbias mbiiĩ irĩ. ⁵ Seico mose jendese que asenei ja jêje ra. ¿Jêtesareia ndei equia secheẽ si re? ⁶ Dios ucuãyãsa ra tu emo mose. Eriquisã ji ae riqui nguia aque. Eriquisã iria mose ra eru. Eriquisãsa jêicua quia ũquĩ. ⁷ Mbias Dios cheẽ mumba tuchi quia ã cote. Dios ucuãyãsa ra tuchõ eã. Eriquisãsa iria mose quia ra eru cote. ⁸ Nyecua tuchi ra u mbias je cote. Jesús ra tu eriicharã cote. Jesús nininya tuchi ra tu. Aque mose ra Dios ucuãyãsa iquia. ⁹ Satanás

nda uquirãcuã mondo Dios ucuãyãsa je. Dios ucuãyãsa mbuquirãcuã sacuaã. Mbae icuaã chumumbara tuchi ra equeru. Ñee ñooño nda u mbia je. Mbia mae sayã nda esaã saã u mbia mbiirĩ irĩ sacuaã. ¹⁰ Dios ucuãyãsa icuaã tuchi ra Jesús quiatoã je. Jesús quiatoã mbiirĩ irĩ tuchi ra u. Jesús quiatoã nyesecea eã nguia Dios rese resẽ. Nyebe ra Dios ũquĩ ndiroã eicuã si. Dios ra uquiatoã mbutiã tuchi. ¹¹ Dios rese eriqui nyesecea eãte ã. Nyebe Dios aba mbiirĩ irĩsa mondo nguia ee. Nyebe eriqui nguiaã “ae beite”, i aba mbiirĩ irĩsa je. ¹² Nyebe ra Dios ñee tuchi Jesús icuasa reã je. Ae mbae icuaã saã sete quia, ũquĩ je. —Jëso tata cuásuu, i ra Dios ee.

Dios chiirabo rei jẽ

¹³ Seresenda, Jesubite jẽingo ũquĩ. Gracias, ure bei quia Dios je jeniã a. Dios que jẽirabo cose nyii ra. Jendirõ sacuaã jẽicuã si. Espíritu Turã jemingo sacuaã icúe. Jẽ ichõñosa reã jẽicua sacuaã. Ũquĩ je chõ ngue Dios jẽirabo nguiaã. ¹⁴ Jesús cheẽ ngue uresenei senei nguia jẽje huee ra. Aque mose que Dios “jenyu” i jẽje ra. Jembuquirãcuã sacuaã Jesucristo quirãcuã je. ¹⁵ Seresenda, ¡jẽhui jẽhuichĩ nda esi jẽ! ¡Urecheẽ ndui jẽingo bei jẽ! ¡Urechimbesa abe rui jẽingo jẽ! ¹⁶ Dios rei nanderu. Ae quia rei eturã tuchi nande je. Ae quia rei nyesecea tuchi nanderese. Ae quia rei nandemombia mbiãsa. Nandeya tuchi nandeico Jesús raarõ arõ ã. Tube ra nyebi uquiato rea. ¹⁷ Sa Jesucristo riqui jemombia mbia bei. Dios abe no. Sã ũquĩ ndiqui tuchi jendese. Jẽhui eã sacuaã echeẽ si. Ñ nda jeñee turã mbei quia querabe. Ñ nda jẽingo bei mbae turã ndese querabe.

3

Jeñee Dios je

¹ Seresenda, jeñee mbei quia Dios je ure riĩ. Ñ nda isho ishonda Dios cheẽ andu ja. Ñ nda eandu chooño eã. Ñ nda eisi turã jẽ na si. ² Ñ nda Dios mbia icuaã ndiquisã ure si. Mbia miĩ ño Dios icua nguiaã ã. Mbia ja eã. ³ Nandererecia ñee ñooño eã nguiaã co. Uquirãcuã nda emee jẽje ucheẽ nguire. Mbae icuaã nda esiquisã jẽsi. ⁴ Urecheẽ ndui si chõ jẽingo nguiaã ũquĩ. Ae uresenei senei nguia jẽje, ũquĩ ndese ra Dios jemingo tuchi. Ũquĩ ño aicua nguiaã ã. ⁵ ¡Sã nandererecia siqui tuchi jendese jẽ! Jẽirandu sacuaã Dios nyesecea rese nanderese. Jẽ abe jẽingo mingue sacuaã Jesucristo rã si.

¡Jẽtomeite ra jẽingochĩ jẽ!

⁶ Jesucristo cheẽ tuchi chõ ã nde, Seresenda. Jesús quiato mo tomei mose, jẽhui chõ esi. Jesús quiato siqui sereã mose mbae mo ndese, jẽhui chõ esi no. Jesús cheẽ tuchi chõ ã nde. ⁷ Ure rã si chõ jẽingo. Uretomei ngue uresaã saã eãte quia jẽje ra. ⁸ Jẽ mo ngue urembuquiaru chooño eãte quia resẽ. Mbae mo ño ngue uremondo mondo quia urechiurã ndibishorõ ndesẽ. Urequei quiei beite que equia resẽ. Itondaru mose abe. Jẽ mbae mondochõ eã sacuaã ure je. ⁹ —Mbae mo embu se, ureã mbei que equia jẽje resẽ. Eturãte raque ũquĩ. Urequei quiei chõ ngue equia urembaerã ndesẽ. Jembaaquiatu sacuaã. Ure rã si jẽingo sacuaã quiei quiei. ¹⁰ Ureico mose jendese que jaembiirandu rei resẽ. Ae quiei quiei sereãte quia, ũquĩ nda quiaruã. ¹¹ Ureirandu que jendese ra. Jẽataque nda quiei quiei eã tuchi quia ra. Siqui chooñose tuchi nda equia ra. Uchuru mondo chooño ñee emo je. ¹² Sã ũquĩ ae riqui quiei quiei uchiurã ao sacuaã. Jesucristo cheẽ tuchi chõ ã nde. Nandererecia tuchi chõ a e re. ¹³ Seresenda, ¡mbae turã ndese chõ jẽingo bei jẽ! ¡jẽhuichĩ nda esi jẽ!

¹⁴ A urecu urecheẽ mbesa mbesa emondo sacuaã jẽje a. Jẽ mo urecheẽ mumba mumba mose, ũquĩ ndese jemaẽ tuchi. Jẽhui chõ ũquĩ si. Ñ nda ireĩ ireĩ jiri urecheẽ mumbare. ¹⁵ ¡Ũquĩ nda jẽucuãyã cuãyãchĩ jẽ! ¡Jeñee turã ño equia ee jẽ! ¡Jembaaquiatu quiatu turã ño jẽ! Jendesenda chõ ñene. Urecheẽ mumba mumbate raque.

Hui bei

¹⁶ Cristo rei aba mombiasa. ¡Sã ae riqui jemombia bei jê! Jêingo mose jenyuchúaa. Jengatásaa abe no. ¡Sã eriqui bei jendese jê! ¹⁷ Pablo rei se. Se ae chõ ã ambesa nguiã hui bei a. Sechimbesa ae chõ ã nde. Sechimbesa jêicuate quia ùquĩ ndesê. Sembae letras. Se bei que ambesa quia hui bei ra. ¹⁸ Sã Jesucristo turã ndiqui bei jê ja je.

PRIMERA CARTA DEL APOSTOL SAN PABLO A TIMOTEO

Pablo embesa Timoteo je

¹ Pablo rei se. Jesucristo chimbaaquiatu, Jesucristo chimondo. Dios abe chimondo. Dios ae nanderirō nguiā nandeicua si. Jesucristo chō nandesaarō arō nguiā ã. ² Aico ã mbesa ndeje a, Timoteo. Secheē nguire chō ereico nguiā Jesús icua aque. Nyebe aico nguiā seriirī i ndeje co. Dios rei nanderu. Jesucristo rei nandererecua. Sã ũquĩ turã mbei riqui ndeje. Sã ũquĩ ia eã mbei riqui nderese. Sã ũquĩ nembia tuchi.

Emo ndiqui mbia mbaaquiatu icuã icuã ã, i Pablo

³ Sã acheē ndeje seso mose Macedonia no. “Efeso eico” ae que ndeje, huee bei chō eico. Ae ñee ñooño nguia mbia mbaaquiatu icuã icuã hue nae, ũquĩ ñee embutiba. ⁴ ũquĩ siqui bei quia mbia cheē ima nenei nenei mbia je ũquĩ. ũquĩ siqui bei quia amei cose ndare nenei nenei mbia je ũquĩ no. ũquĩ ñee embutiba. ũquĩ ñee icuã icuãte quia ũquĩ. ũquĩ ñee ño mbia mbiicua icuã nguiã nyue. ũquĩ ñee nda aba mbaaquiatuã Dios riñ. ũquĩ mose Dios icua aroneate. ⁵ Sã hue jenda turã mbei riqui Dios je jẽ. Sã hue jenda riqui ndua turã mbei jẽ. Sã hue jenda riqui Dios icua tuchi jẽ. Nyesecua tuchi nda nyiese cote chã. ⁶ Mbia hue jend a mo ndiqui tesarei Dios cheē si ũquĩ. Dios cheē abi abi. Ñee ñooño mbei equia nyue ũquĩ. ⁷ Moisés cheē ndese mbia tambaaquiatu, i raque equia ũquĩ. Moisés cheē icua rocoĩ. Equiatu rocoĩ. Echeeño ño ñene.

⁸ Dios que Moisés mbucheē turã mbia je ra. Mbia icuã je que embucheē nda. Mbia mundua sacua huiicua ndese. ⁹ Mbia turã je eã ngue Dios Moisés mbucheē nguiã. Mbia turã je eã ngue Dios ley miñ nguiã. Dios cheē mumbasa je chō ngue emiñ nguiã. Mbia icuã je. Dios quiatoã je. Mbia teã teã je. Usi ucuãyãsa je. Ngu abe ucuãyãsa je. Mbia iquiasa je. ¹⁰ Ucheē mumbasa je chō ngue Dios ley miñ nguiã. Ae siqui quia emo ninisi rese, ũquĩ je. Ae eninisirã saã saã nguia nguesenda mo je, ũquĩ je. Mbia rirõsa je abe no. Ñeeñoñoosa je abe no. Ae eicuã icuãte riqui Dios cheē turã je, ũquĩ je abe no. ũquĩ ja je chō ngue Dios ley miñ nguiã. ¹¹ Dios que ñee ucheē turã miñ seje ra. —Secheē esenei senei mbia je, i que Dios seje ra.

Dios que uturã teacuquia seje ra, i Pablo

¹² “Coche ñene” ae se quia Jesucristo je co. Ae que seirabo ra. Ae que sembuquirãcuã nda. Ae que semondo ucheē nenei nenei sacua mbia je ra. ¹³ Seicuã tuchi raque ee nyii. Acheē icuã icuã ndei que se quia ee nyii ra. Equiato je abe que seicuã icuã ndiqui nyii ra. Se Jesús icuayã mose. Seaquiatuã mose. Nyebe Dios ia eãte riqui nguiã serese. Nyebe Dios seicuã mbutiã nguiã sesi cote. ¹⁴ Uturã ngue eteacuquia seje ra. Nguiirī ngue embuchecua seje ra. Nyebe aico nguiã Jesucristo icua co cote. Nyebe aico nguiã nyesecua Jesucristo rese co cote. ¹⁵ Jesucristo que tu fbii ra. Mbia icuã mbitirō sacua. Emingo bei nonde. Ichõiñoa tuchi chō ã nde. Sã mbia “ae beite” i ja ã je. Seicuãte raque se quiatu mbia ja si. ¹⁶ Dios ia eãte que eriqui serese ra. Eroseĩ nguiatu tuchi que eriqui seje ra. Nyebe mbia riqui nguiã jirandu ja Dios roseĩ nguiatu rese. Sã Dios semingo bei se abe, i chee ra emo abe ñee ñee. Dios roseĩ nguiatu rese jirandu mose. ¹⁷ Sã mbia riqui ñee turã mbei Dios je. Ae miñ ño mbia rerecua tuchi re. Ae miñ ño siqui bei tuchi nguiã co. Ae miñ ño ererecua nandemae sayã nde. Ae miñ ño mbae icua tuchi nguiã. Amén. ¹⁸ Timoteo, seriirī na tuchi chō nde re. Dios cheē mbuchecua que sembiirandu nderese nyii ra. Nyebe aico nguiã ñee tuchi ndeje ũquĩ ñee na si. Mbae icuã esiquisã quisã mbei chō nguia Jesús quiato si jẽ. ¹⁹ Dios eicua tuchi quia jẽ. Erendua ata atate chí nda jẽ. Mbae turã ndese chō eico. Emo emo ngue ndua chooño mbei quia ra. Mbae turã naa naa ndocoĩ. Nyebe eriqui nguiã siqui icuã icuã mbeite. Nyebe tesarei nguiã Dios cheē si cote.

²⁰ Eĩ ngue Himeneo nda. Alejandro abe no. Nyebe ngue amondo nguiã Satanás je. Ndua ndua sacuaã. Ñee icuaã icuaã eã sacuaã Dios riĩ.

2

Sã mbia ñee turã ja Dios je, i Pablo

¹ Æ tacheẽ Jesús quiato ja je: Mbia ja riĩ jẽingo bei ñee Dios je. Ì nda Dios uturã mee mbia je. Gracias jenyee bei quia Dios je mbia ja riĩ. ² Ae ererecua nae, ùquĩ ja riĩ abe jẽingo ñee mbei Dios je. Dios uturã mee sacuaã ee. Ûquĩ mose ra nandeico turã ja cote. Ûquĩ mose ra nandeya bei nandeico cote. Ûquĩ mose ra nandeico tuchi Dios rese cote. ³ Ûquĩ mose ra Dios abe ia tuchi nanderese. Eicuã si mbia rirõsa chõ ae re. ⁴ Dios mbia rirõ ja sete quia eicuã si co. Dios mbia mbaaquiato quiato sete quia co no. ⁵ Dios miĩ ño siqui nguiã co. Mbia que icha icha jate esi ra. Jesucristo miĩ ño siqui nguiã mbite re co. Mbia mbucha sacuaã Dios rese. Mbia sí chõ ae re. ⁶ Jesucristo que mano mbia icuaã ndiquicharõ sacuaã nda. Ûquĩ ndese que Dios mbia mbiirandu cote ra. ⁷ Ûquĩ niĩ ngue Dios seirabo ra. Semondo que judíos eã je embaaquiato quiato sacuaã nda. Ûquĩ Dios icua sacuaã ngue Dios cheẽ asenei senei ee ra. Ae bei. Acheẽ ñooñoa ño nguiã co.

⁸ Sã mbia ja riqui ñee mbei Dios je. Sã o mumbate ñee Dios je. Sã eriqui turã ja. Sã paama iã mbei nyue. ⁹ Sã cuña abe riqui siqui mingue. Sã eriqui ndua tuchi eã jiri huiirao rese. Uachu riinda hui rese abe. Ua rese abe no. Lujo rese abe no. ¹⁰ Sã eriqui quiato ndua Dios rese. Sã eriqui mbae turã naa naa mbia je. ¹¹ Sã cuña quiriri chõ nguia mbia ñumunua mose. Sã eriqui nyiisaquia turã. Sã eriqui mingue. ¹² Mbia ñumunua nua mose, cuña mbia mbaaquiato quiato aroneate. Sã cuña mo ererecua raã naa eã ngu je. Sã eriqui chõ nguia quiriri. ¹³ Adán nane nguiatu ngue Dios chao nguiã. Aquere quiato ngue Eva ao nguiã cote. ¹⁴ Adán nane eã ngue Satanás mbiirĩ irĩ nda. Eva rane nguiatu ngue re. Eva rane ngue mbae icuaã saã nyii ra. ¹⁵ Dios ra paama i bei eã cuña je. Nguiirĩ nderequia turã mose. Dios icua mose. Siqui tuchi mose Dios rese. Nyesecua mose mbia rese.

3

Sã Jesús quiato rerecua siqui turã

¹ Acheẽ ñooño eã ño se re. Jesús quiato reaquiato sacuaã ño taico se, i mose emo, eturãte ùquĩ. ² Sã Jesús quiato rerecua riqui siqui turã mbei. Mbia ñee eã sacuaã ee. Sã ngüinisi miĩ ño nderequia. Sã eriqui ndua turã turã mbei. Sã earacua tuchi riqui. Sã eriqui mbia isi turã turã mbia mo oso mose echuchúaa. Sã eriqui mbia mbaaquiato quiato aracua. ³ Sã eriqui quiacuayã. Sã eicuã icuaã eã mbei riqui emo je. Sã eriqui oo tuchiã mbae isiquia rese. Sã eriqui ico mingue. ⁴ Sã eriqui mbia uchuchua jenda rerequia turã. Sã eriqui nguiirĩ mbaaquiato quiato turã. Aba cheẽ mumbayã sacuaã. Ì nda eririĩ eĩ ñooño eã mbia je. ⁵ Nguiirĩ ndea choño mose, Dios quiato reaquiato turã aroneate. ⁶ Ae Jesús icua ramote nae, Jesús quiato rerecua aroneate ùquĩ. Ûquĩ mose ucuasu raã naa arõte. Eicuã arõte cote. Sã Satanás abe ucuasu raã naa ñimbiicuã nonde no. ⁷ Sã Jesús quiato rerecua riqui siqui turã mbei Jesús quiatoã abe je. Ì nda diablo embiirĩ irĩ eã embiicuã. Ì nda Jesús quiatoã ñee turã mbei erĩ.

Sã diáconos siqui turã

⁸ Diáconos je abe tacheẽ. Sã diáconos abe siqui turã. Sã eriqui ucheẽ mbuchebiã mbae raã nonde. Sã eriqui quiacuayã. Sã eriqui oo tuchiã mbae isiquia rese. ⁹ Sã diáconos siqui eã tuchi mbae icuaã mo ndese. Sã Dios miĩ ndese quiato eriqui bei. Sã Dios icua tuchi. ¹⁰ Ae ra diácono nae, sã mbia mae na nguiatu erese nyii. Eturã mose mbia je, sã diácono ae cote. ¹¹ Sã diácono ninisi abe riqui siqui turã mbia je. Sã mbia mbucheẽ ñee eã emo niĩ. Sã eriqui quiacuayã. Sã eriqui ucheẽ mbuchebiã mbae raã nonde. ¹² Sã diácono ngüinisi miĩ ño nderequia. Sã eriqui nguiirĩ nderequia turã. Uchuchua jenda ja abe no. ¹³ Diáconos mbae raã turã turã mbei mose, mbia ra eicua tuchi cote. Dios abe ra embuquirãcuã tuchi Jesucristo renei nenei sacuaã mbia je.

Ae Dios saã nande je, ùquĩ aba icua ja aroneate raque

¹⁴ Seso jeise rete raque nderea. Seso eã moi ño aico nguiã co mbesa ndeje a. ¹⁵ Nde Jesús quiato rerecuarã irabo aquiatu sacua ño aico nguiã ã mbesa ndeje a. Iglesia jenda rerecu irabo sacua. Dios reco mbae rei iglesia. Iglesia quia rei Dios cheẽ nderequia tuchi mbia ja je. ¹⁶ Ae Dios saã nguia nande je nae, ùquĩ aba icua ja aroneate raque:

Dios que tu mbiarã íbii ra. Jesús, i equia ee.

“Eturã tuchi” i que Espíritu Turã erĩ nda.

Angeles abe que mae erese ra.

Ae Jesús quiato nae, ùquĩ ngue esenei senei mbia ataque je ra.

Mbia mangue chooñoa jenda ja que eicua ra.

Aquere que Dios equeraobe ibate cote ra.

4

Mbia ra hui hui Dios cheẽ si

¹ Espíritu Turã ndiqui ñee co: Mbae ua ja nonde ra mbia hui hui tuchi Dios si. Aba mbiĩrĩ irĩsa rese ra mbia riqui tuchi. Ùquĩ nda mbia mbaaquiato icua icua aba checuayã icua na. ² Ae uturã saã saã nguia nae, ùquĩ ndui rui ra mbia riqui. Ae ñee ñooño nguia nae, ùquĩ ndui rui ra mbia riqui no. Ùquĩ siqui beite mbae icua ndese ùquĩ. Nyebe eriqui nguiã mbae turã icuayãte chee cote. ³ Ùquĩ nda mbia mbaaquiato icua icua. Jeninisirã nda jendecoã. Jendurã abe ra jendecoã no, i ra equia ñee mbia je. —Mbae ra jëu chooñocheĩ jë, i ra equia mbia mbaaquiato icua icua. Dios mbae chao ja raque mbia chiurã. —Sã sequiatio mbae ja u, gracias ire seje, i que Dios ra. ⁴ Dios chiao mbae turã ja. Mbae nandeisi teã teã eã ño nguia echiao. Mbae nandeu turã ja chõ nguia. Gracias nande bei chõ nguia Dios je. ⁵ Dios cheẽ nguire mbae turã ja riqui nandechiurã ã. Nande “gracias” i mose Dios je, mbae turã ja chõ eriqui nguiã nande je.

Jesús quiato rerecu turã

⁶ ã secheẽ esenei senei mbei quia Dios quiato je, Timoteo. Nde mbia mbaaquiato turã turã mose. Dios rimba turã tuchi ra nde cote. Jesús cheẽ ndui ra ereico tuchi cote. Dios ra ereicua tuchi cote. Sã ereico beite erese co no. ⁷ Mbia cheẽ ñooño je cheẽ ndese ra erechisaquiachĩ jë. Echĩmbirãcuã tuchi quiato quia siqui Dios rese jë. ⁸ Nanderete quirãcuã mose, eturãte raque. Nandeico mose Jesús rese, ùquĩ nguiatu eturã tuchi nanderete quirãcuã si re. Achõ eã nandeico Jesús rese. Ibate abe quiato nandeico erese. ⁹ Acheẽ ñooño eã ño se re. Sã mbia “ae beite” i ja secheẽ je. Dios cheẽ ño ñene. ¹⁰ Dios cheẽ ñii ño ureico nguiã quicoi coi ã. Dios cheẽ ñii ño ureico nguiã ñĩmbirãcuã mbae ja rese ã. Dios reco quiato ureicuate nguiã ã. Ae que mano mbia ja je ra. Ae eicuate quia nae, ùquĩ nda emingo bei.

¹¹ ã esenei senei mbei quia mbia je. Mbia Dios cheẽ mumbayã sacua. ¹² Sã mbia ndecheẽ andu turã. Amei eã ndaque nde. Mbae turã esaã saã nguia Jesús quiato resaa. Ùquĩ siqui turã sacua nde rã si. Echeẽ turã mbei quia mbia je. Eico turã mbei quia mbae turã ndese. Echesequa tuchi quia mbia rese. Dios eicua tuchi quia. Mbae icua ndese ra eremae mae jirichĩ. ¹³ Mbia embaaquiato quiato bei quia seso mose chee nderea. Dios cheẽ esenei senei mbei quia leer i ee. ¹⁴ Jesús quiato rerecu o chono mose ndearõ, aque mose que Dios nembraacua tuchi ra. —Ã esaã, i que ndeje ra. Ùquĩ si ra eretesareichĩ. ¹⁵ Ùquĩ ndese eico bei. Endua ndua bei quia erese. Ùquĩ mose ra Dios ereicua i i tuchi. Mbia ra jirandu ja nderese. ¹⁶ Emae ño nguia nde ae ndechiese. Echicuasẽ cuasẽ ño nguia mbae icua si. Ae eresenei senei nguia mbia je Dios cheẽ nae, ùquĩ emumbayã ño nguia nde abe. Ùquĩ mose ra Dios nemingo turã tuchi. Ndecheẽ andusa abe ra emingo turã tuchi.

5

Jesús quiato siqui turã sacua

¹ Erecheẽ icua icuãchĩ nda amei je nde embaaquiato quiato mose jẽ. Amei embaaquiato turã turã ño nguia jẽ. Nderu esaã ño nguia siqui turã ee. Ndenongue rã ño eico mbia yasu je no.

² Ndesi esaã ño nguia ari je jẽ. Ndenongue esaã ño nguia ubichõ nyucuaaque rese jẽ. Endua icua icua eã ño nguia eriĩ jẽ. ³ Eru cheecha mo mbae eã mose, sã Jesús quiato riqui mbae mo mee mee ee. ⁴ Eriirĩ tiarõ mose, sã aque chõ mbae mee mee mbei quia usi je. Eriirĩ nducucha mose, sã aque chõ mbae mee mee ee no. Ngu abe je. Umumbeposa je. Ûquĩ Dios bite. ⁵ Sã eru cheecha mo ae riqui no. Sã embae eãte riqui no. Ae ndua ndua bei mose Dios rese, ñee mbei mose Dios je, sã Dios quiato riqui mbae mee mee mbei ee. ⁶ Ae ebite nae, ùquĩ ndese achõ eru cheecha mo siqui mose, eicuãte ùquĩ. Eraaque rã ño aque riqui nguia. Eresco siqui raque. ⁷ Ñ esenei senei nguia mbia Jesús quiato hue jenda je. Ñ nda mbia ñee icua eã eriĩ. ⁸ Emo ndua eã mose usi rese, ngu abe rese, eicuãte ùquĩ. Mbae mee mee eã mose ee, eicuãte ùquĩ. Ûquĩ siqui ãte quia Dios rese ùquĩ. Eicuã tuchi chõ ùquĩ Dios quiatoã si re.

⁹ Ari eru cheecha je inscribir jenye rã mámbii. Ae sesenta años eãte nae, ùquĩ je inscribir jenye eã. Ae eru ata nyii nae, ùquĩ je inscribir jenye eã no. Ae eru miĩ nyii nae, ùquĩ miĩ je chõ inscribir jenye. ¹⁰ Ae ari turã aba chiicuate nae, ùquĩ achõ je chõ inscribir jenye. Ae ari nguiirĩ mbutiarõ turã mbeite quia nae. Ae ari mbia isi turãte quia uchuchúaa nae. Ae ari mbae turã saã saã mbeite quia Jesús quiato je nae. Ae ari erasi teaquiato turã mbeite quia nae. Ae ari siqui beite quia mbae turã ndese nae. Ûquĩ ari je chõ inscribir jenye. ¹¹ Eru cheecha ari eã mose, ùquĩ je inscribir jenye eã. Ûquĩ nyao arondete Cristo si. Ae ebite, ùquĩ achõ ndese ndua mose. —Serurã mo tateabe, i ra cote. ¹² Ûquĩ mose ra Dios paama i ee. Ucheẽ mbuchebe chõ nguia ngu rea mose cote. ¹³ Eru cheecha ari eã mose, siqui eã arõte mbae mo ndese. Tuchua embuchesea sea chooño arõte. Mbia mbucheẽ ñee ñooño arõte emo niĩ. Uchuru rerequia chooño eã arõte. ¹⁴ Nyebe aico nguia ñee eru cheecha, ae ari eãte, ùquĩ je. Sã ngurã mo ndea. Sã tiirĩ. Sã eriqui mbae turã naa naa mbei uchuchúaa. Ûquĩ mose ra Jesús quiatoã ñee eã ee cote. ¹⁵ Emo emo ngue nyao Dios si cote ra. Satanás ndese eriqui ã cote. ¹⁶ Sã Jesús quiato riqui mbae mee mee uchari eru cheecha je. Usi abe je eru cheecha mose. Iglesia mbae mee mee eã sacua ee. Ae eru cheecha eriiriãte nae, ùquĩ je quiato iglesia mbae mee mee.

¹⁷ Jesús quiato rerecua mbae saã turã turã mbei mose, sã mbia ia tuchi riqui erese. Dios cheẽ nenei nenei turã mose, sã Jesús quiato riqui mbae mee mee mbei ee. ¹⁸ Sã embesa ji riqui ñee no: “Emo nimba ticuasú mbae usi raã mose, echuru ra jenyatichĩ mbae mo je jẽ. Sã ae ae si quia quiaru quiaru”, i que embesa ji ra. “Ae quieĩ quieĩ quia emo je nae, sã echa mbae isiquia mo mee ee”, i que embesa ji ra. ¹⁹ —Jesús quiato rerecua que mbae icua saã nda, i mose emo, echeẽ nda jeñanduchĩ, ae miĩ ñee mose. Nyeremo ñee mose, ùquĩ ñee ñooñoa arõte cote. ²⁰ Jesús quiato rerecua mo siqui siqui bei mose mbae icua ndese, echeẽ asi asi ee Jesús quiato ataque résa. Ñ nda ùquĩ abe siquiche mbae icua naa naa eã. ²¹ Eĩ ere chõ Jesús quiato rerecua je, siqui mose mbae icua ndese. Ndequiatote raque. Echeẽ asi ee. Aico ñee ndeje Diosa a. Jesucristo sa abe no. Angeles Dios rimba sa abe no. ²² Jesús quiato rerecuarã nda eremiĩ jeichĩ jẽ. Emae nguiatu turã na erese nyii. Emiĩ jei mose, eicuã arõte emo mose. —Eremiĩ jeichĩ ngue nyii ra, i ra mbia ñee ndeje cote. Mbae turã ndese chõ eico nde abe.

²³ I achõ nda erembeichĩ jẽ. Uva rique rasi ñetẽ abe embei mbei quia nderie rasi mose jẽ.

²⁴ Emo emo nyisaã mbae icua nyecuate riqui nande je ã. Emo nyisaã icua ndese quia nandeico nguia mae ãte namo. Dios eicuã mbasi mose, aque mose ramo nda nandemae

ũquĩ nyisaã icuã ndese cote. ²⁵ Eĩ si chõ mbia chisaã turã no nde. Emo emo nyisaã mbae turã nyecuate riqui nande je ã. Emo nyisaã turã ndese quia nandeico nguiã mae ãte raque ã no. Echisaã turã nda nyecua ja chee nande je cote.

6

¹ Ae Jesús quiato ererecua rimba mo nae, sã ũquĩ ndiqui nguerecua cheẽ mumbayã tuchi. Sã eriqui turã nguerecua je. Eĩ mose ra mbia ñee icuã eã Dios cheẽ nii cote. ² Timoteo, mbia rimba embaaquiato quiatu quia. ã echeẽ ee. —Jenderecua Jesús quiato mose, echeẽ jemumbayã ño nguia mbae raã turã turã ee. “Jesús rimba ja chõ nande re” jenyechĩ nda jenderecua ucuãyã cuãyã jẽ. Jenderecua Jesús quiato mose, mbae jẽsaã turã tuchi quiatu quia ee. Jẽingo turã tuchi chõ nguia ee, ere ererecua rimba je ñee.

Nandendua tuchiã jiri quiatu quia mbae isiquia rese

³ ã ndei Jesucristo cheẽ tuchi ã. Emo siqui mose ã ndui, siqui turã nda Dios rã si. Emo mbia mbaaquiato quiatu mose ã abi, Dios cheẽ ndui eã ño ũquĩ ndiqui nguiã. ⁴ Ucuasu raã naa ño nguiã ũquĩ. Ñee tuchi beite equia ũquĩ. Eaquiato rocoĩ. Mbia mbicuã icuãte equia ũquĩ. Mbia mbucheẽ icuã icuãte equia nyue ũquĩ. Mbia mumae icuã icuãte equia nyiese ũquĩ. ⁵ Ndua icuã icuã mbeite equia ñee turã ndocoĩ ũquĩ. Eicuã icuã mbeite riqui emo je ũquĩ. —Mbia ra mbae isiquia mee seje, se Dios cheẽ nenei nenei mose ee, i beite equia ũquĩ. ũquĩ ndese eicoã tuchi, Timoteo. ⁶ Nandeico mose Dios rui, ae ae ra nandembia nandembae mii ndese. ⁷ Mbae mo ngue nanderuãte nandechaacuquia mose ra. Eĩ nande si ra nandemano mose mbae mo nderao eã no. ⁸ Nandechiurã nandereco mose, nandeirao abe nandereco mose, nandeya chõ nandeico ũquĩ ndese. ⁹ Ae “mbaecha tuchi ra se” i bei quia ndua ndua, ũquĩ nda nimbirãcuã eã mbae icuã si. Mbae icuã tã i mose ee, mbae icuã nda esaã jei. Mbae Isiquia quiatu ebi tuchite riqui nguiã. Echiosei osei icuã nda equerao chee tata cuásuu. ¹⁰ Ae ndua beite quia mbae isiquia rese, ũquĩ mbae icuã saã ja arondete. Emo emo ndiqui ndua tuchi mbae isiquia rese ã. Nyebe eriqui nguiã hui Dios si ã. Nyebe eya eã ndasi tuchi riqui nguiã ã.

Dios eicua tuchi, i Pablo ñee Timoteo je

¹¹ Eĩ erechĩ nda nde, Timoteo. Dios rimba tuchi chõ nde re. Mbae turã ndese bei eico. Dios rã mbei chõ eico. Dios eicua bei chõ nguia. Echesequa bei chõ nguia mbia rese. Eico mingue chõ nguia. Ndecuasu ra eresaã saãchĩ nguia jẽ. ¹² Echimbirãcuã tuchi quiatu quia Dios cheẽ ndese jẽ. Aba mingue beisa rese quia eico tuchi jẽ. Ae quia ngue ndeirabo nguiã nyii. Sã erecheẽ turãte mbia résaa nyii no. —Dios riqui semingo beite co, ere que equia nyii. ũquĩ ndese bei chõ eico. ¹³ Dios ae chõ mbae mingue ja nguiã co. Erésaa tacheẽ ndeje. Jesucristo résaa abe tacheẽ ndeje. Sã Jesucristo siquicheã ñee Poncio Pilato je no. ¹⁴ Ae riĩ Dios ñee ndeje nae, ũquĩ emumbayã ja chõ nguia eraã turã. Jesucristo tu mose chee eico echeẽ mumbayã mbei. ĩ nda emo ñee eã ndeje. ¹⁵ Dios quia rei equirãcuã tuchi mbia mo si. Ae quia ererecua tuchi mbia mo si re. Emo mose ra Dios “Jesucristo tamondo íbii mbia rea” i. Aque mose ra Jesucristo nyecua tuchi mbia je. ¹⁶ Dios mii nda manoa. Ae mii ño siqui bei nguiã nyaashĩ na co. Mbia mo nda esiichã eã. Mbia mo mae eãte erese emo mose. Emo nda mae eã mbei erese. Sã mbia ñee turã mbei quia eriĩ. Sã eriqui ñee turã mbei equirãcuã nii. Amén.

¹⁷ Ae mbaechate nae, ũquĩ je echeẽ. Sã ucuasu raã naa eã. Sã eya siquíã umbae mii ndese. Embae ra ua emo mose. Sã Dios rese quiatu eya riqui. Ae mii ño mbae mee nguiã nande je. ¹⁸ Echeẽ mbaecha je. —Mbae turã jẽsaã saã mbei quia jembae je jẽ. Jẽingo turã jiri quia mbaecha reã je. Abei chiãte ra jẽingochĩ jẽ, ere mbaecha mbaaquiato quiatu. ¹⁹ ũquĩ naa naa mose ra Dios mbae mee tuchi ee ibate. ũquĩ naa naa mose ra siqui turã tuchi no.

Pablo ñee hui bei Timoteo je

²⁰ Timoteo, ae riĩ Dios ñee ndeje, ãquĩ emumbayã mbei quia. Mbia ñee ñooño mose nyue, nde abe ra erecheẽchĩ. ãquĩ ñee aba mundua turã eã ño nguiã. Uaquiatu raã naasa chõ ãquĩ nde. ²¹ Dios cheẽ abi chõ eriqui nguiã ãquĩ naa naa ãuuuuu uuuquĩ. Dios icuasa reã ño ãquĩ nde. Sã Dios turã ndiqui bei ndeje. mén.

SEGUNDA CARTA DEL APOSTOL SAN PABLO A TIMOTEO

Pablo embesa Timoteo je

¹ Pablo rei se. Jesucristo chimbaaquiatu rei se. Dios que semondo mbia mbaaquiatu quiatu sacua nda. —Jesucristo icuasa ra siqui bei, i sacua ngue Dios semondo mbia je ra. ² Aico ã mbesa ndeje a, Timoteo. Secheẽ nguire chõ ereico nguiã Jesús icua aque. Nyebe aico nguiã seriirĩ i ndeje co. Dios rei nanderu. Jesucristo rei nandererecua. Sã ùquĩ turã mbei riqui ndeje. Sã ùquĩ ia eã mbei riqui nderese. Sã ùquĩ nembia tuchi.

Pablo Dios osei uquia Timoteo je

³ Gracias, ae bei se quia nderĩĩ Dios je co. Aico turãte quia Dios je co. Seramei ja rã si. Senduasa tuchi Dios riqui co. Nderĩĩ aico ñee mbeite Dios je co. Nyaashĩ mose. Isa abe. ⁴ Anduate quia nderese co. Achimbiate rã nda mae nderese chã. Erecheseote que nandechao ramo mose nandechesi ra. ⁵ Ereico Dios icua tuchite aque. Ndesi rã si Eunice. Ndechari abe rã si Loida. Ûquĩ ngue Dios icua tuchite quia ra. Eĩ ere si quia Dios icua tuchite nde abe aque. ⁶ Nyebe aico nguiã ñee ndeje a. Seo achono nguia ndearõ nae, aque mose que Dios nembraaracua tuchi ra. Ndearacua eico bei Dios cheẽ ndese. Dios cheẽ nenei nenei mbia je. ⁷ Dios siquĩã nguiã nandembu siquiche mbia si ã. Dios nandembirãcuãte quia ã. Dios nandembuchesequate quia mbia rese ã no. Dios nandembraaracuate quia ã no.

⁸ Dios quirãcuã ndese eico bei. Ûquĩ mose ra ereireĩ ireĩ eã Jesús renei nenei mbia je. Ûquĩ mose ra ereireĩ ireĩ eã setarõ ji si. A setarõ ji ñi Jesús riĩ a. Mbiam icuã icuã mose ndeje Jesús riĩ, echimbirãcuã ño. Dios ra nembirãcuã. Sã sembirãcuã no. ⁹ Dios quiatu ngue nanderirõ nguiã nandeicuã si. Dios que nandembuturã mingo icúe umbaerã nda. Nandeturã je eã ngue nandemingo nguiã icúe umbaerã. Nduate quiatu nguiã nanderese. Mbae ao ja nonde que nduate nanderese ra. Jesucristo riĩ ño ngue Dios riqui nguiã nyesequa nanderese. ¹⁰ Nyebe Jesucristo mondo nguiã nanderirõ sacua nandeicuã si. Nyebe nandeico nguiã ñee: —Dios nyesequate nanderese, i cote. Jesucristo que nandembusiquicheã u nandemano si ra. Ae riqui nandemingo bei co. Ae riqui ucheẽ isiquia mingo bei co. Jesucristo tu mose que nandembiirandu ja ùquĩ ndese ra. ¹¹ Ucheẽ turã nenei nenei sacua ngue Dios seirabo ra. Semondo que mbiam mbaaquiatu quiatu ra. Mbiam mangue chooñoa jenda ja mbaaquiatu quiatu. ¹² Ûquĩ je chõ mbiam riqui nguiã mbae rasi raanguquia tuchi seje co. Aireĩ ireĩ eãte quia Dios si co. Dios aicuate quia co. Sereco que amee tuchi ee ra. Ae ra sereco teaquiato bei seje. Jesucristo tube chee mose. ¹³ Arembaaquiato turãte que se, ùquĩ ndui eico bei. Dios eicua bei quia Jesucristo riĩ. Mbiam rese echesequa bei quia Jesucristo riĩ. ¹⁴ Ae riĩ Dios ñee ndeje nae, nembraaracua equia nae, ùquĩ ndese eico tuchi. Espiritu Turã nda nembesari eã. Eriqui tuchite nandechiangui re co.

¹⁵ Ereirandu que Asia jenda serecha rese ra. Figelo. Hermógenes. Ûquĩ ngue hui ja sesi ra. ¹⁶ Onesíforo quiatu que tuutu quia serea sembia ra. Ireĩ ireĩ eãte que equia setarõ ji si ra. Sã Dios turã mbeite riqui ee. Echuchua jenda ja abe je. ¹⁷ Tu mose aa Rómaa que serequia tuchi ra. Ngasẽ nyee que seje ra. ¹⁸ Efeso seico mose abe que eriqui tuchite serese ra. Serese que eriqui Dios cheẽ nenei nenei nda. ã ereicuate quia aque. Sã Dios mbae turã tuchi mondo ee Jesús tu mose.

2

Mbae esaã saã tuchi quia Jesús je, i Pablo Timoteo je

¹ Seririĩ naate nde, Timoteo. Jesucristo quirãcuã ndese eico ñimbucha tuchi.
² Arembaaquiato quiatu que se mbia résaa, ũquí esenei senei tuchi quia mbia je. Mbia ndua je secheẽ esenei senei. Ũquí nda esenei senei emo je no ña. ³ Mbae rasi tu mose ndeje, echimbirãcuã ño. Soldado rã ño eico ñimbirãcuã. Jesús rimba turã ño eico. ⁴ Jesús rimba chõ nde re. Echeẽ emumbayã mbei chõ nguia. Mbae mo ndese ra erendua nduachĩ. Ndererecua mii ndese endua bei. ⁵ Sã deporte no. Emo nda ganar i eã, nguerecua cheẽ mumba mose. ⁶ Sã emo ndiqui quieĩ quieĩ tuchi úcoo no. Aque mbae tubiriã tuchi rae. Eĩ ere si quiatu mbae raã naa tuchi Jesús je. ⁷ Ae ambesa mbesa quia ndeje ã, ã ndese endua tuchi. Dios ra embuchecua tuchi ndeje.

⁸ Endua tuchi quia Jesucristo rese. Quera si que manonde ra. Mbiate raque. David rucucha raque. Quera si que manonde ra. Ũquí asenei senei nguia mbia je co. ⁹ Ũquí je chõ mbia riqui nguia mbae rasi raanguquia tuchi seje ã. Ũquí nii ño setarõ mii nguia a. Se mbia iquiare rocoĩ nyii setarõ tarõ. Se chõ setarõ ndaque. Dios cheẽ nguia etarõ aroneate re. ¹⁰ Coche mbia icuã ndiqui nguia seje. ĩ nda Dios chiirabo Dios cheẽ isi bei cote. ĩ nda Dios emingo bei cote. ĩ nda ũquí siqui bei ibate Jesucristo rese cote. ¹¹ Ñee ñooñoa tuchi chõ mbia cheẽ ã nde: Nandemano ngue Jesucristo rese ra. Nyebe ra nandeico bei erese cote.

¹² Cristo rĩĩ mbae rasi nandesã saã mose, Cristo ra nandemii ererecuarã, ererecua tuchi mose ae.

“Cristo aicuayãte” nande i mose, Cristo abe ra ñee nande je.

“Se abe jaẽicuayãte” i ra nande je.

¹³ Nandechẽ iru raque ra nande, Dios quia ra ñee iru eã mbei.

Dios quia ra ucheẽ mbuchebi aroneate nande je, i que embesa ji ra.

Ndeico tuchi mose Dios rese, ereireĩ ireĩ eã ndae

¹⁴ ã ndese mbia hue jenda embaaquiato quiatu tuchi. Diósaa embaaquiato quiatu tuchi. Ñee icuã icuã eã nda nyue chã. Ñee icuã icuã mose, emingo turã eã nyiese chõ ũquí nde. Mbae turã si embui chõ ũquí no nde. ¹⁵ Equieĩ quieĩ tuchi chõ nguia Dios je jẽ. ĩ nda Dios “coche ñene” i ndeje. Sã emo ndiqui quieĩ quieĩ turãte nguerecua je no. Eireĩ nguiaĩte ra nguerecua si cote. Eĩ ere si chõ nguia Dios cheẽ nenei nenei mbia je. Dios cheẽ abi abiã. ¹⁶ Ae uchuru mondo chooñote quia nae, ũquí ndese eicoã. Ũquí ndiqui isho i ite Dios si ũquí. ¹⁷ Ũquí ñee mbuchei i ite echoi quia qui. Sã mbae rasi riqui oso i ite no. Eĩ si chõ Himeneo nguia ũquí. Fileto rese. ¹⁸ Ũquí ndiqui ñee Dios cheẽ abi abi tuchi ũquí. —Mbia rete raaque ra quera si eã, i chõĩño mbei equia ũquí. Nyebe eriqui nguia mbia mbui mbuite Dios si ũquí. ¹⁹ Sita cuasu mo na ndei Dios cheẽ. Embuquiata aronea. Aque ñi mbei chõ nda echi. Eĩ si chõ Dios cheẽ nande je no nde. Dios cheẽ ño ã nde: “Dios riqui ngũimba icua jate ã,” i que ra. Co abe rei Dios cheẽ co: “Ae ‘Dios rimba rei se’ i quia nae, sã ũquí ndiqui nyao ja mbae icuã si”, i que ra.

²⁰ Sã mbae riru chumumbarate riqui mbaecha mo nyuchúaa no. Sã oro ao ji riqui emo no. Sã plata ao ji emo no. Sã ira ao ji emo no. Sã tuchu ao ji emo no. Emo emo ndei iti mombo sacua no. Emo emo mbae turã ndirurã no. ²¹ Sã Jesús quiato riqui mbae turã ndirurã na. Sã eriqui icúe bei Dios mbaerã. Sã nyao tuchi mbae icuã si. Ũquí mose ra Jesús ia tuchi erese. ²² Ae icuã acuanĩndu chosei chosei quia nae, ũquí si ehui chõ jẽ. Eico turã ño Dios icha rui jẽ. Dios eicua tuchi chõ nguia jẽ. Echesequa tuchi chõ nguia mbia rese jẽ. Echimbua chõ nguia mbia rese jẽ. Eĩ ño Jesús quiato nguia siqui turã nyiese ã, echiã quishĩ ja mose. ²³ Mbia uchuru mondo chooño mose ñee nyue, nde abechĩ nda jẽ. Mbia mbiicua sacua ño ũquí nde. ²⁴ Dios rimba quia mbia mbiicua aroneate re. Etura tuchite quia mbia ja je re. Mbia embaaquiato quiatu turãte quia ñene. Siqui minguetu quia mbia je re. ²⁵ Ae Dios cheẽ isi teã teã, ũquí nda embaaquiato quiatu mingue quia.

Ūquĩ niĩ nda ñee ñee Dios je. Dios emundua si sacua. Dios cheẽ isi turã sacua. ²⁶ ĩ nda echoi oso chee uchã diablo si, ndua si mose Dios cheẽ ndese. Diablo quia eisite nguiã co. —Ã esaã jẽ, i beite diablo quia ee co.

3

Mbia ireĩ nguiãte ra mbae icuã naa i i

¹ Jesús quiato ra mbae rasi saã tuchi Jesús tu serĩ mose. Ūquĩ eicua quiatu tuchi, Timoteo. ² Umbae ae ae rese ra mbia ndua cote. Mbae isiquia miĩ ndese chõ nda mbia riqui ndua ndua cote. Mbia ra ucuasu saã saã tuchi. Ñee icuã icuã mbei ra equia emo niĩ. Mbia ra ngu cheẽ mumba mumba tuchi. Usi cheẽ abe no. Mbia ra gracias iã tuchi nyue aque mose. Siqui sereã tuchi ra Dios rese. ³ Mbia ia eã eã nda emo ndese. Ñimbuturã sereã tuchi ra emo je. Emo nda embuqueta queta bei quia. Hui aroneãte ra mbae icuã si. Nyaba nyaba reã tuchi rae. Mbae turã nda eucuyã tuchi. ⁴ Mbia ra embucheẽ ñee ngõngue riĩ. Mbia ra mbae ĩ ñooño. Mbia ra uaquiato saã ñooño. Ubi achõ ndese ra eriqui. Siqui rocoĩ Dios bi rese. ⁵ Dios quiato ra mbia saã ñooño. Dios quirãcuã icua rocoĩ. Ūquĩ mbia icuã si echao tuchi, Timoteo. ⁶ Ūquĩ mo ndiqui ique ique emo nyuchua ã. Cuña aquiatuã mbiĩrĩ irĩ. Ae ndua ndua beite quia huiicuã ndese cuña nae, ũquĩ mbiĩrĩ irĩ. Ūquĩ cuña ndiqui uchioseĩ raã naa mbei mbae icuã ũquĩ. ⁷ Ūquĩ cuña ndiqui “tachimbaquiato” i beite raque ũquĩ. Ñimbaaquiato aroneate Dios cheẽ ndese. ⁸ Sã brujos Moisés cheẽ mumba no. Janes, i equia ee. Jambres abe no. Eĩ si chõ cuña mbiĩrĩ irĩsa nguiã Dios cheẽ mumba mumba ũquĩ. Ndua aquiatuã je chõ ũquĩ nde. Ūquĩ ndiqui emo mingo aroneate Dios cheẽ ndese ũquĩ. ⁹ Mbia ra siqui eã ũquĩ ñee ndui cote. Mbia ra “eaquiatuã” i chee eriĩ. Sã “eaquiatuã” i chee Moisés cheẽ mumbasa riĩ brujos no.

Jesús quiato ra mbae rasi saã, i Pablo

¹⁰ Ereico turãte que se rã si ra, Timoteo. Dios cheẽ ngue eresenei senei nguia se rã si ra. Ae asaã saã nguia Dios je nae, ũquĩ ngue eresaã saã nguia nde abe ra. Ae “tasaã Jesús je” ae quia co nae, nde abe eresaã saã turã nguia aque. Dios ereicua tuchite se rã si. Ereico minguete equia aque. Erechesequate equia mbia rese aque. ¹¹ Ereico turãte que equia mbia icuã icuã mose ndeje ra. Sã mbia icuãte riqui seje Antioquiaa no. Icónioo abe. Lístraa abe. Sã ñi aico mbae rasi raã tuchi huee no. Dios que sereaquiato ũquĩ si ra. ¹² Ae siquise rete quia Jesucristo rese nae, ũquĩ nda mbae rasi saã tuchi. Mbia icuã icuã tuchi ra ee. ¹³ Ae icuã icuãte riqui Dios je nae, ũquĩ nguia ra eicuã i i tuchi cote. Ae mbia mbiĩrĩ irĩ nguia nae, ũquĩ ngui a ra mbia mbiĩrĩ i i tuchi cote. Ñimbiĩrĩ i i tuchi ra equia no. ¹⁴ Nde chõ eico tuchi Dios cheẽ ndese. Ae rese erechimbaaquiato nae, ũquĩ ndese eico tuchi. —Ichoiñoa tuchi que ã nda, erete equia eicua aque. Nembraaquiatusa abe ereicuate quia aque. ¹⁵ Ndeñetẽ mosenda bei chõ ereico nguiã Dios cheẽ icua aque. Dios cheẽ nembraacuate quia aque. Nyebe ereico Jesucristo icuate aque. Nyebe Dios nderirõ nguiã ndeicuã si. ¹⁶ Dios cheẽ turã ja chõ ñene. Dios chimondo ja chõ ñene. Dios cheẽ nguia rei mbia mbaaquiato. Dios cheẽ ngui a rei mbia icuã mbuchecua ee. Dios cheẽ nguia rei “eĩ jenye” i tuchi nande je. Dios cheẽ nguia rei aba mingo Dios bi rese. ¹⁷ ĩ nda Dios quiato siqui turã tuchi. ĩ nda eaquiato mbae turã naa naa ja.

4

¹ Aico ñee ndeje Dios nonde a, Timoteo. Jesucristo nonde abe no. Ae r a tube mae ja mbia rese. Mbia reco rese. Mbia mano je rese abe. Ae nonde aico ñee ndeje a. ² Dios cheẽ esenei senei tuchi quia mbia je, Timoteo. Mbia eanduse mose. Mbia eandu sereã mose abe no. Embaaquiato quiato mingue bei chõ nguia. Embuti mbuti bei quiato quia Dios cuti. “Eĩ jenye” ere bei quiato quia mbia je. ³ Namo jiri quiato ra mbia Dios cheẽ turã andu sereã cote. Ubi achõ ndese chõ nda huiisa rerequia tuchi cote. Nyebe ra Dios cheẽ andu sereã. Ae mbia mbaaquiato icuã icuãte quia Dios cheẽ ndui eã nae, ũquĩ ndui

chõ nda mbia riqui tuchi cote. ⁴ Nyiisaquia tuchi chõ nda equia mbia ñee ñooño je rese cote. Ñee ñooño eã je rese nyiisaquia rocoĩ. ⁵ Cochee chõ eico nde, Timoteo. Nderoseĩ nguiátu chõ eico mbia icuã icuã mose ndeje. Equiei quiei tuchi chõ nguia Dios je. Dios cheẽ esenei senei tuchi chõ nguia mbia je.

⁶ Achuruchate ucua quia co cote. Aico mano utate co cote. ⁷ Mbae que asaã saã tuchi quia Dios je ra. Ae je Dios riqui ñee seje nae, ùquĩ ngue asaã jate quia ee ra. Ahui eã mbeite que se quia esi ra. ⁸ Dios que sechiã mbuturã nda. Ñquinde que aico ngata turã nda. Nyebe eriqui nguiã premio nderecoquiato seje pe. Jesucristo tu mose ra Dios mae ja mbia rese cote. Aque mose quia ra premio mee seje cote. Se miĩ je eã ndae. Ae Jesucristo ru choseite quia nae, ùquĩ ja je abe ra premio mee.

Echu serea, i Pablo Timoteo je

⁹ Echu jei chõ serea, Timoteo. ¹⁰ Demas quiato ngue serecha nguiã. Ibi jenda achõ ndese chõ eriqui nguiã ndua. Ubi miĩ ndese chõ eriqui nguiã ndua. Nyebe esi nguiã serecha Tesalónicaa. Crescente quiato que oso Galáciaa ra. Tito quiato que oso Dalmáciaa no nda. ¹¹ Lucas miĩ ño siqui nguiã serese co cote. Marcos abe eru bei seje. Ae nda quiei quiei jiri nguiã serese aa. ¹² Tíquico quiato que amondo Efésoo ra. ¹³ Ae asecha saco sembae nae, eru bei seje ndechu mose. Asecha que Troas ra. Carpo chuchua. Libros abe eru bei seje. Sechimbesa papeles si ra eretesareichĩ. Eru bei seje. ¹⁴ Alejandro el herrero que mbae icuã saã saã tuchi quia seje ra. Dios ra mbae icuã mee ee eicuã ndibishorõ. ¹⁵ Echiteaquiato quia esi jẽ. Nande Dios cheẽ nenei nenei mose, ebiãte eriqui co. ¹⁶ Mbia sererao mose ererecua je, emo ngue nyaroã tuchi serese ra. Serecha ja chõ ngue ra. Dios nda paama i eã ee ùquĩ niĩ ña. ¹⁷ Jesús miĩ ngue serecha eã nda. Ae miĩ ngue sembirãcuã nda. Se echeẽ turã nenei nenei tuchi sacuã. Ae judíos eã nae, ùquĩ Jesús cheẽ turã andu tuchi sacuã. Nyebe Jesús sembui mondo nguiã mbia icuã si. ¹⁸ Ae ra sereaquiato bei quia mbae icuã si. Sererao chee mose ibate nyiese. Sã mbia riqui ñee turã mbei eriĩ. Amén.

Pablo hui mbae mbesa mbesare

¹⁹ Saludar ere rã Prisca je. Aquila abe je. Onesíforo chuchua jenda ja je abe. ²⁰ Erasto que siquichõ Coríntoo ra. Trófimo ndasi que asecha Milétoo ra. ²¹ Nyiiseĩ tuutu nonde chõ echu. Eubulo saludos mondo quia ndeje aque. Pudente abe no. Lino abe no. Claudia abe no. Jesús quiato ja a jenda abe no. ²² Sã Jesucristo riqui bei nderese. Sã Dios turã ndiqui bei jendese. Amén.

CARTA DEL APOSTOL SAN PABLO A TITO

Pablo embesa mondo Tito je

¹ Pablo rei se. Dios rimba. Jesucristo chimbaaquiatu. Dios que semondo ñee ñee sacua ũchiirabo je ra. Ũquĩ Dios icua tuchi sacua ngue semondo ra. Siqui turã sacua Dios rã si. ² —Sechiirabo ra amingo bei, i que Dios cose ra. Ñee ñooño eã ndae. Ũquĩ ndese embiirandu sacua ño ngue semondo nguiã. ³ Dios rei nanderirõsa mbae icua si. Ae que seirabo ucheẽ nenei nenei sacua mbia je ra. Eĩ ngue Dios ucheẽ mbuchecua mbia je cote ra. ⁴ Aico ã mbesa ndeje a, Tito. Ereico Jesús icuate se rã si aque. Nyebe aico nguiã “seriirĩ” i ndeje co. Nanderu chõ Dios re. Sã nanderu turã ndiqui bei ndeje. Sã Jesucristo abe turã ndiqui ndeje. Sã ũquĩ ia eã tuchi riqui nderese. Sã ũquĩ ndiqui nembia turã tuchi.

Sã Jesús quiato rerecua riqui turã

⁵ Ae nandesaã ja eã huee nae, ũquĩ esaã ja rã nguia nde huee. Amei mo eirabo rabo Jesús quiato rerecuarã. Mbia recua ja ja jenda. Secheende ndeje eirabo rabo ño huee. Nyebe arerecha nguiã huee Crétaa. ⁶ Amei turã ño eirabo rabo Jesús quiato rerecuarã. Eninisi miĩ nderecua chõ eirabo. Ae riirĩ Jesús icua quia nae, ũquĩ miĩ ño eirabo rabo. Ae eriirĩ seteãte riqui nae, ũquĩ ño eirabo rabo. Ae eriirĩ teã eãte nae, ũquĩ ño eirabo rabo. Jesús quiato rerecuarã. ⁷ Jesús quiato rerecua quia Jesús quiato teaquiato quiato quia. Ũquĩ siqui icua aroneate. Ucuasu abe raã naa aroneate. Eroseĩ nguiã aroneate. Quiacua aroneate. O rerequia chooñoa aroneate. Mbia mo mbae oseĩ oseĩ aroneate no. ⁸ Mbia nyoĩ mose echuchúaa, isi turã ndae. Siqui turã ndae. Ndua ndua ra mbae ao nonde. Siqui eã nda mbae icua ndese. Dios rã si chõ nda eriqui. Echiichati eã ndae. Jesús quiato rerecua ra eĩ mbei quia. ⁹ Sã eriqui bei Dios cheẽ ndese nandechẽ nguire. Ũquĩ mose ra ũquĩ abe mbia mbaaquiatu quiatu turã. Jesús oseĩ uquia ee. Mbia icua ñee nda embutiba Dios si. Ũquĩ ño eirabo rabo Jesús quiato rerecuarã, Tito. ¹⁰ Mbia teã teã je tubiriãte riqui ã. Judíos teã teã je abe tubiriãte no. Ñee ñooño tuchite equia ã. ¹¹ Ũquĩ nyuru esiquisã tuchi. Mbia mbaaquia tu icua icuate quiatu nguiã ũquĩ. Eru mbiirĩ irĩ. Eninisi abe mbiirĩ irĩ. Eriirĩ ja abe no. —Mbia ra umbae mee mee nande je, i chõ nguiã ã. ¹² Hue jenda mo ngue ñee nda. —Ñee ñooño je chõ ure re, Creta jenda re. Ureicua mbei chõ ure re. Nyacua icua na ño ure re. Uretomei ño ure re. Mbae mburireãsa chõ ure no nde, i que Creta jenda mo nda. ¹³ Ichõñoa tuchi chõ ñene. Nyebe echeẽ asi tuchi ũquĩ je, Tito. ĩ nda eriqui tuchi Jesús rese. ¹⁴ ĩ nda eriqui eã judíos icua ñee ndese. Mbia tubiriã Dios cheẽ isi teã teãte quia ũquĩ. —Ũquĩ ñee nda jemumbayãchĩ jẽ, ere chõ mbia hue jenda je. ¹⁵ Echiã mbuturã ji je chõ mbae turã ja riqui nguiã ã. Echiã mbuturã jiriã je quiatu mbae mo turã eãte re. Dios icuasa reã je mbae mo turã eãte. Ndua turã eã mbei. —Eicua eã, i chõchĩ nguiã mbae icua ndese siqui siqui. ¹⁶ —Dios ureicuate quia ã, ichõño equia ũquĩ. Echisaã nguia eicuate re. Nyebe nandeico nguiã eicuate, Dios rese siquiã mose. Aba biã tuchi chõ ũquĩ nde. Aba cheẽ mumbasa. Siqui aroneate mbae turã mo ndese.

2

Mbia embaaquiatu turã, i Pablo ñee Tito je

¹ Nde quia mbia embaaquiatu quiatu turã jẽ. Dios cheẽ ndui si embaaquiatu quiatu. ² Amei embaaquiatu quiatu. Enyere chõ ñee ee: —Jẽquiacua quiacuachĩ nda jẽ. Jengata turã mbei chõ nguia jẽ. Jëaracua bei chõ nguia jẽ. Dios jëicua tuchi chõ nguia jẽ. Jenyesequa tuchi quia mbia rese jẽ. Jëingo tochi chõ nguia no jẽ, ere chõ amei mbaaquiatu quiatu, Tito. ³ Ari abe embaaquiatu quiatu. Enyere chõ ñee ee: —Jengata turã mbei quia

Dios resa rae. Jeñee icuã icuã techĩ nda mbia mo nii jẽ. Jẽquiacua quiacuachĩ nda jẽ. Mbae jẽsaã turã ño nguia mbia resa ráee jẽ, ere chõ ari mbaaquiato quiatu, Tito. ⁴ Sã ari acuaní mbaaquiato quiatu. Ì nda acuaní nyesecea jaaja ngu rese. Ì nda nyesecea jaaja nguiirĩ abe rese. ⁵ Ì nda acuaní aracua ja ja. Ì nda ndua ndua ja mbae turã ndese. Ì nda uchuchua jenda abe mbuturã turã ño no. Ì nda eturã mbia je. Ì nda ngu cheẽ abe mumbayã no. Sã ari eĩ acuaní mbaaquiato quiatu. Ûquĩ mose mbia ñee icuã icuã aroneate Dios cheẽ nii. ⁶ Acuanĩndu abe embaaquiato quiatu quia no. Ì nda earacua racua ja. ⁷ Nde abe ecuata turã mbei, Tito. Mbae turã esaã uquia mbia je. Ndeico mose mbia mbaaquiato quiatu, cochee chõ eico. Echĩmbirãtã tuchi chõ nguia. ⁸ Ndeico mose mbia mbaaquiato quiatu, echeẽ turã turã ño nguia ee. Ì nda mbia ñee icuã eã ndecheẽ mose. Ì nda Dios cheẽ ndesenda reã ireĩ ireĩ ndecheẽ si. Ì nda ñee icuã eã jẽje. ⁹ Mbia rimba abe embaaquiato quiatu. Enyere chõ ñee ee: —Jenderecea cheẽ nda jemumba mumba techĩ nguia jẽ. Echeẽ nguire jẽingo bei chõ mbae turã ndese jẽ. Jeñeechĩ nda echeẽ ndibishorõ jẽ. ¹⁰ Mbae mo nda jembuquia chãchĩ jẽ. Jẽseteã ño jẽingo mbae turã ndese jẽ. Eĩ jenye mose ra mbia ñee turã Dios cheẽ nii, jenye chõ nguia mbia rimba je.

¹¹ Dios que uturã teacuquia mbia je cote ra. Mbia rirõ ja nonde mbae icuã si. ¹² Mbae ja rĩ Dios riqui nandembaaquiato quiato co. Ae echosei chiãte quia nae, ùquĩ nandesecha ja sacua. Ae icuã nandebite riqui nae, ùquĩ ndecha ja sacua no. Nandearacua sacua abe no. Nandeico sacua mbae turã ndese no. Nandendua bei sacua Dios rese abe no. Eĩ nande bei quiato quia nande namo. ¹³ Jesucristo ra tu íbii ucheẽ nguire. Enininya tuchi ra tu. Nandeico eraarõ arõ ã. Ae ra nandembiate u. Ae rei Dios tuchi. Nanderirõsa mbae icuã si. ¹⁴ Ae que tu mano nande je ra. Nandeicuã ndibishorõ ngue mano nda. Nandechiã mbuquishĩ ngue u umbaerã nda. Nandeico tuchi sacua mbae turã ndese. ¹⁵ Enyere chõ mbia mbaaquiato quiato, Tito. Ererecea rã ño eico embaaquiato quiato. Echeẽ asi asi jiri quia ee. Sã emo ndiqui ndecheẽ andu sereã nea eã.

3

Dios uturã teacuquia nande je

¹ Echeẽ mbia je, Tito. —Ererecea cheẽ nda jemumba mumba techĩ nguia jẽ. Ererecea cheẽ jeñandu quiato quiato quia jẽ. Jeñĩmbirãtã tuchi quiato mbae turã naa naa nonde jẽ. ² Jeñee icuã icuãchĩ nda emo nii jẽ. Jeñee icuã icuãchĩ nda jenyue jẽ. Jeseteã ño jẽingo jẽ. Jenguasu ra jẽsaã saãchĩ emo je jẽ, ere chõ mbia je, Tito. ³ Nandearacuayã techĩ nande abe nyii. Nandeteã teã techĩ equia nyii. Nandembĩrĩ irĩ ji raanguiate nandeicochĩ nyii. Ae nandechosei chosei quia mbae icuã nyii nae, ùquĩ achõ ndesete nandeicochĩ nyii. Mbae icuã ndese nandeico techĩ nguia nyii. Mbia mbae nandechosei chosei techĩ nguia nyii. Mbia mae icuã icuã techĩ nguia nanderese nyii. Nande abe nandemae icuã icuã techĩ nguia nandechiese nyii no. ⁴ Dios ia eãte que mbia rese aque mose ra. Uya eã ngue eteacuquia nande je ra. Uturã abe que eteacuquia nande je no nda. ⁵ Aque mose que nanderirõ mbae icuã si ra. Eya eãte quiato ngue eriqui nguia nanderese. Nyebe nanderirõ nguia mbae icuã si. Nandeturã nii eã ngue re. Nandechiã ngue eirei mbiasu ra. Espĩritu Turã je que nandechiã mbiasu ra. ⁶ Dios que Espĩritu Turã mondo tuchi nande je ra. Jesucristo rĩ ngue emondo nande je ra. Jesucristo rei nanderirõsa tuchi nandeicuã si. ⁷ Dios que Espĩritu Turã mondo nande je ra. Uturã je nandembĩtirõ sacua. Nandemingo bei tuchi sacua no. —Nandemingo bei tuchi rae, sã nandeico i ã no. ⁸ I chõĩñoa tuchi chõ ã nde. Æ esenei senei tuchi quia mbia je. Ì nda mbia emumbayã. Ì nda Dios icuasa siqui ja mbae turã ndese. Ae rĩ aico ñee jẽje nae, sã mbia ùquĩ ñee mumbayã ja quiato. Aba bite ùquĩ. ⁹ Mbia ñee asi asi je si ehui chõ. Mbia ñee mbei mose ngãmei ndaque rĩ, ùquĩ abe si ehui chõ. Mbia ñee icuã icuã mose nyue, ùquĩ abe si ehui chõ. Ae Dios senei senei nquia judíos je cose nae, ùquĩ nii mbia ñee icuã mose nyue, ùquĩ abe si ehui chõ no. Aba biãte ùquĩ ñee. Aba mbaaquiato ãte ùquĩ. ¹⁰ Emo Jesús quiato mbuqueta queta

mose embiicuã nonde uchue, ùquĩ abe si ehui chõ. Eicuãte ùquĩ, ere ee. Ndecheẽ andu eã mose, echeembe ee. Aquere ehui chõ esi. ¹¹ Aba chiicuate ùquĩ icuã. Ùquĩ siqui turã aroneate quia ùquĩ. Huiicuã eicuate quia ùquĩ.

Pablo embesa hui bei

¹² Artemas nda amondo nderea reae. Ae oso eã mose, Tíquico ra amondo ndeje. Ùquĩ mo ngasẽ mose huee, echu serea Nicápolis cote. Huee taico bei ama mose, ae que se ra.

¹³ Apolos embucuata turã mondo. Zenas ndese. Zenas ndei embesasa. Jesús quiatote ùquĩ. Mbae mo emondo ee. Ì nda echoi turã. Ì nda mbae tiã eã ee. ¹⁴ Sã nanderesenda riqi mbae turã naa naa mbei ñimbaaquiatu. Emo mbae ua mose, sã mbae mo mee mee ee. Ùquĩ naa naa mose, siqui turã ño nguiã ùquĩ cote. ¹⁵ Ae chi ja serese a nae, ùquĩ saludos mondo quia ndeje aque. Ae Jesús quiato nyesequate quia urerese hue jenda nae, ùquĩ je saludar ere ure je. Sã Dios turã ndiqui tuchi jẽ ja rese. Amén.

LA CARTA DEL APOSTOL SAN PABLO A FILEMÓN

Pablo embesa Filemón je

¹ Se rei Pablo. Setarō ji añ a. Mbia que setarō Jesucristo rññ nda. Timoteo rese aico ã mbesa mbesa ndeje a, Filemón. Uresenda tuchi chō nde re. Jesucristo rimba. ² Ae Jesús quiato ñumunua nua mbei quia ndechuchúaa nae, ũquĩ je abe ureico ã mbesa mbesa a. Apia je abe ureico embesa mbesa a. Arquipo abe je no. Ae que siqui bei urerese ra. Mbia icuã icuã mose ure je Jesús cheẽ ññ. ³ Sã Dios riqui turã mbei jēje. Sã jēya bei riqui erese. Jesucristo rese abe no.

Filemón Jesús quiato tuchi

⁴ Secheẽ mose Dios je, “gracias” ae bei se quia Dios je nderñ co. ⁵ Mbia que sembiirandu randu nderese ra. —Filemón ndiqui Jesús icua tuchi co. Co eriqui nyesequa tuchite Jesús rese co. Dios quiato ja rese abe no, i que equia sembiirandu randu nderese ra. ⁶ Aico ñee mbeite Dios je nderñ co. Ae je ereico Jesús nenei nenei nae, ñ nda ũquĩ abe Jesús icua tuchi nde rã si. ⁷ Aque ereico nyesequa tuchi Jesús quiato ja rese aque. Nyebe seya beite riqui nguiã nderese co. Nde que Jesús erechosei uquia quia Jesús quiato je ra.

Onésimo eisi turã, i Pablo ñee

⁸ Cristo chimbaaquiatu aico raque co. Sã ererequa riqui ñee ngũimba je no. Ũquĩ asaã arõte raque ndeje. Asaã eã nda se. ⁹ Tacheẽ mingue chō ndeje. —Mbae esaã seje, tae turã ño ndeje. Ameite se cote. Setarō ji añ Jesús rññ a no. Se rei Pablo. ¹⁰ Mbae mo esaã Onésimo je. Seico mose aa cárcel que aico Onésimo mbaaquiatu quiatu Jesús rññ nda. Jesús quiato riqui co cote. Seririñ tuchi rã ño eriqui nguiã co cote. Jesús icua mose co cote. ¹¹ Nderimbachō ño ngue eriqui nguiã nyii. Erequeteã eã jiri que equia erese nyii ra. Aqueteãte quia erese co cote. Nde abe ra erequeteãte erese cote. Siqui turãte ra nande je cote. ¹² Aque amondo quia ndeje aque. Eisi turã mámbii. Sã ereico seisi turãte no. Ũquĩ esaã si ee. ¹³ Amondo sereãte raque. Siquichō ndei nda serese aa chã. Mbae mee mee sacua setarō ji je ndecutiã. A setarō ji ññ Jesús cheẽ turã ññ a. ¹⁴ Aisi eã nda mingo serese a, nde “eno” iã mose seje. “Eĩ ere chō”, ae eã nda ndeje. Nde ae chō eisi turã. Nde ae chō echeẽ turã ee. Se ae ra arembucheẽ turã eã ee.

¹⁵ Uchã ndei que ndesi nyii ra. Siqui bei ra nderese cote reae. ¹⁶ Nderimbachō eã nda cote. Ndequiato chō nda cote. Nderesenda chō nda cote. Co aico nyesequate erese co. Nde quiatu ra erechesequa tuchi erese cote. Cristo resenda chō siqui nguiã co cote. Nderese. ¹⁷ Ndequiato tuchi chō se re. Sã ññ ereico seisi turã turãte no. Eĩ ere si chō Onésimo isi turã se rã si. ¹⁸ Onésimo deber i mose ndeje, cobrar erechñ nda ee. Seje quiatu cobrar ere. ¹⁹ Pablo chō se re. Seo je chō aico nguiã co mbesa ndeje a. Onésimo deber i mose ndeje, asibishorō nda mbae mee ndeje. Mbae que asaã tuchite rei quia ndeje ra. Dios cheẽ ngue asenei tuchite quia ndeje ra. Dios nemingo bei sacua. Nyebe deber ere tuchite raque seje. ²⁰ Nyebe Onésimo eisi turã na seje. ñ nda seya tuchi jiri nderese. Dios abe ra eyate nderese.

²¹ —Filemón nda secheẽ mumba eã. Secheẽ ndui si tuchi ra Onésimo isi turã, ae tuchi se quia nderñ co. ²² Seruacuã jendecoquiato ino mámbii. Dios ra sembusẽ mondo, jeñee mbei mose ee reae. Ũquĩ mose ra aso jendea.

Pablo ñee hui bei

²³ Epafras saludos mondo quia ndeje aque. Ae tarō ji ññ serese a. Jesucristo cheẽ ññ. ²⁴ Marcos abe saludos mondo quia ndeje aque. Aristarco abe. Demas abe no. Lucas abe no. ã ndiqui Dios cheẽ nenei nenei serese ã. ²⁵ Sã Jesucristo riqui uturã ndeacuquia bei jēje. Amén.

LA CARTA A LOS HEBREOS

Jesucristo mii ño Dios cheẽ mbuchecua nguiã

¹ Dios que ucheẽ mbiassa asa tuchi quia mbia nandei ñiinda je cose ra. Hue rĩ ji eã ngue riqui ucheẽ mbiassa asa ee ra. Dios cheẽ mbuchecua checuasa atate que aque mose ra. ² Eĩ eã ño namo nde. Jesucristo mii ño Dios cheẽ mbuchecua checua nguiã nande je co cote. Dios nguiirĩte mbucheẽ nande je cote. Ae mii ndese chõ ngue Dios ibi ao nyii ra. Dios que emii mbae ja rerecuarã nda. ³ Dios nininya rã si tuchi chõ Jesucristo nininya re. Dios rã si tuchi chõ ae re. Ae chõ mbae mingo ja nguiã ucheẽ quirãcuã je co. Ae que mano nandeicuã mbutiã sacua nda. Aquere eñi ngoi bei ngu rese ibate pe cote.

Jesús quia rei i tuchi ángeles si

⁴ Jesucristo quia rei i tuchi ángeles si. “Seriirĩ tuchi” i chõ Dios nguiã ee. ⁵ Ñ ngue Dios ñee áte ángeles mo je ra:
Seriirĩ ño nde re.
Ndereco que amee ndeje ra,
i áte que Dios ángeles mo je ra.
Nderu chõ se re.
Seriirĩ ño nde re,
i áte que Dios ángeles mo je ra. ⁶ Dios nguiirĩ mbu mose íbii que ñee nda:
Sã ángeles riqui adorar i ja seriirĩ je,
i que ra. ⁷ Ñ ngue Dios ñee ángeles rĩ nda:
Quiririã tu asi rã tuchi chõ ángeles re.
Serimba chõ ángeles re.
Tata rendi rã tuchi,
i que Dios ñee ángeles rĩ nda. ⁸ Nguiirĩ je quiatu que ñee ã nda:
Nde rei Dios. Ererecuarã mbei ra nde.
Ererecuã turã tuchi ereico nde co.
⁹ Mbae turã eresaã sete quia co.
Mbae icuã nguia erechousei chiãte nguiã.
Nyebe Dios riqui nguiã nembia tuchi nderesenda mo si.
¹⁰ Nde que mbae erechao ja tuchi ibi jenda nyii ra.
Ndeo je que ibei erechao no nda.
¹¹ Ñquĩ nda ua ja chee.
Nde quia ra ereico bei.
Tiru ima na ja chee ra ñquĩ.
¹² Sã mbia riqui tiru ima mombo no.
Eyasu rerequia erendaque re.
Eĩ si ra ibi cote. Ibei abe no.
Nde quia ra eĩ mbei ereico.
Eremanoa mbei ra nde quiatu,
i que Dios ñee Jesucristo je ra. ¹³ Ñ ngue Dios ñee áte ángeles mo je ra:
Ecoi sejii. Nde abe ra ererecuã serese.
Ae ndeucuãyãte quia nae, ñquĩ je ra ndequirãcuã ateacuquia tuchi.
Ndequirãcuã tuchi chee ra ñquĩ si,
i áte que Dios ángeles mo je ra. Jesús mii je que ñee ñquĩ nda. ¹⁴ Dios ririĩ eã ño ángeles re. Dios rimba chõ ñene. Ae ra Dios mingo bei, ñquĩ ndaarõ sacua ño ngue Dios ángeles mii nguiã.

2

Nandeichayã sacua Dios icha si

¹ Ae nandechandu quia Dios cheẽ nae, ũquĩ ndese nandeico ndua tuchi. ĩ nda nandeichayã mbei Dios icha si. ² Ae riĩ ángeles riqui ñee mbia je cose nae, ñee ñooñoa tuchi chõ ñene. Ae ũquĩ ñee mumba nae, mbae rasi que esaã cote ra. ³ Jesucristo sí que ñee nda. —Mbia tamingo bei, i que ra. Mbia que echeẽ senei senei mbiase nande je cote ra. Nande echeẽ mumba mose ra mbae rasi nandesaã tuchi nande quiatu cote. ⁴ —Jesucristo ñee ñooñoa ño nguia re, i sacua mbia que Dios mbia mae sayã naa naa nda. Milagros tubiriã. —Jesucristo ñee ñooñoa ño nguia re, i sacua mbia que Dios Espíritu Turã mondo mbia je no nda. Ae je Dios Espíritu Turã mondo mondo sete nae, ũquĩ je chõ ngue Espíritu Turã mondo ra.

Mbia rã ngue Jesucristo ru nyii ra

⁵ Ae ra nandeso emo mose nae, hue jenda rerecua eã nda ángeles. ⁶ Sã embesa ji ñi ñee ã no:

¿Mbaerã ereico nduate mbia rese re, Dios?

¿Mbaerã ereico eraarõ tuchi re?

⁷ Angeles que eremingo turã tuchi rei mbia si aque mose ra.

Ūquĩnde ereico bei mbia mingo turã tuchi ángeles si co cote.

Mbia que eremiã mbae abe ja rerecuarã cote no nda.

Ndechiao rerecuarã tuchi cote.

⁸ Mbae que eremiã ja mbia mbaerã nda,

i embesa ji huĩ ñee a. —Mbae rerecuarã ja ra mbia, i mose Dios, mbae ja riĩ ño ñee nguia.

Mbae mbia cheẽ mumbate raque quia ã. ⁹ Jesús miã ndese chõ nandeico nguia mae ã. Ae je Dios mbae rasi saanguquia tuchi nae. Ae que ererecua eã tuchi ángeles si aque mose ra.

Dios que mbia mingo bei sete ra. Nyebe “emano mbia riĩ” i nguia Jesús je. Emanonde que Dios emiã mbia rerecuarã tuchi cote ra. ¹⁰ Dios que mbae chao ja tuchi umbaerã nda.

Nyebe mbae rasi raanguquia tuchi nguia Jesús je cote. Mbia tubiriã mingo bei sacua ño ũquĩ nde. Jesús mbae rasi raã mose, ererecua turã tuchi sacua ño ũquĩ nde. ¹¹ Jesús que nandembitirõ uturã na sí ra. Nyebe eru riqui nguia nanderu ja co cote. Nyebe Jesús riqui nguia “senongue” i ireĩ ngũã nande je. ¹² Sã Jesús cheẽ ñi embesa ji rese a no:

Paba ibatenda tasenei senongue je. Senongue rese tairasei rasei ee, i que Jesús cheẽ mbesa ji huĩ nda.

¹³ Dios taicua tuchi,

i abe que Jesús cheẽ huĩ nda.

A aico seriirĩ Dios chimondo rese a,

i abe que Jesús cheẽ huĩ nda. ¹⁴ Mbiate quiatu ngue nande re. Nyebe Jesús abe mbiarã no nde. Mano sacua nande je. Mano mose nande je que diablo quirãcuã mbutiã cote ra. Diablo quiarei equirãcuã tuchi aba iquia sacua. ¹⁵ Ae siquiche beite quia umano si nae, mbae icua nimba raanguia chõ ũquĩ nde. Ūquĩ siquiche eã sacua ño ngue Jesús mano nguia. ¹⁶ Angel sacua eã ngue Jesús ru ra. Mbiarã ño ngue eru nguia. Judiorã ño ngue eru nguia. Mbia mbitirõ sacua. ¹⁷ Nyebe Jesús ru nguia mbiarã nande rã. Ñee turã sacua Dios je nande riĩ. Dios nandembasi eã sacua nandeicuã niã. Jesús siqui mose mbiarã ngue mano mbia icua niã nda. Mbia icua mbutiã sacua esi. ¹⁸ Mbae icua ngue tã i tuchi rei Jesús je ra. Nyebe ra eriqui tuchi nanderese uquirãcuã mee nande je, mbae icua tã i mose nande je.

3

Jesús quia rei i tuchi Moisés si

¹ Seresenda, Dios que jemii icúe umbaerã tuchi ra. Nyebe aico nguiã ñee tuchi Jesucristo rĩĩ jėje co. Secheẽ ndese jenyiisaquia tuchi quiatu quia. Jesucristo rei nandererecua tuchi cote. Sacerdote rerecua rã tuchi nande je cote. ² Jesucristo que Dios cheẽ mumbayã tuchi quia mbae raã ja echeẽ nguire ra. Sã Moisés abe mbae raã ja Dios cheẽ nguire no. ³ Jesús quia rei i tuchi Moisés si. Ae que Moisés chao ra. Sã emo ndiqui tuchia ao no. Tuchia aosa quia rei i tuchi tuchia uchiao si. ⁴ Mbia mo tuchia chao arondete raque. Dios miĩ nguia rei mbae ao ja tuchi. ⁵ Moisés que Dios cheẽ mumba eãte rei quia ra. Erimbachõ ño ngue ae ra. —Ã nda Dios saã je mbia je, i chõ ngue Moisés quia ra. ⁶ Cristo quia rei i tuchi Moisés si. Ae quia rei Dios ririĩ tuchi. Dios chuchua rerecua tuchi chõ ae re. Nande rei Dios chuchua. Ae quia siqui nguiã nandechiangui re co. Nandeico bei mose ndua erese. Nandeya bei nandeico mose abe erese.

Dios quiato ra uquenea ucua nyoĩ Dios récuua

⁷ Jesús quia i tuchi re. Nyebe Espiritu Turã ndiqui nguiã ñee nande je ã: Dios cheẽ jeñandu rã namo.

⁸ Jeñia ãtãte ra jẽingochĩ jẽ.

Sã cose ndare chiã ãtã mbeite riqui Dios cheẽ andu sereã turúquiaa eico mose no.

Ūquĩ icuãte que eriqui Dios je ra.

Dios que ñimbirãcuã ñote quia ee ra.

⁹ Dios que siqui minguete quia ũquĩ mbia je ra.

Cuarenta años chee que ra.

Mbia mae sayã ngue esaã saã mbei quia ee ra.

“Ma Dios siqui minguete nande je”, i rei que mbia jenamei nguia cose ra.

¹⁰ Nyebe Dios paama i nguiã ñee ee.

“Siqui icuã mbeite equia uchiangui re ã. Siqui sereãte equia seicha rui ã.

¹¹ Aico paama ite ee co.

Uquenea nda eucua eã mbei nyoĩ serécuua”, i tuchi que Dios eriĩ nda,

i que Espiritu Turã ñee embesa ji huĩ nda. ¹² Cochee chõ jẽingo, Seresenda. Jẽicha eã sacua Dios reco si jeñiangui re. Dios jẽicua bei sacua jeñiangui re no. ¹³ —Nandeico i i tuchi quiatu quia Dios rese, jenyee jenyee bei quiatu quia jenyue. Jendeco mose íbii. Ĩ nda mbae icuã jembiĩrĩ irĩ eã. Ĩ nda jẽteã teã eã Dios cheẽ je no. ¹⁴ Sã nande Cristo nandeicua raque nyii no, eĩ nande bei chõ nguia eicua i i. Ūquĩ mose ra Cristo resenda tuchi nande cote. ¹⁵ Sã embesa ji riqui ñee ã no:

Dios cheẽ jeñandu rã namo.

Jeñia ãtãte ra jẽingochĩ jẽ.

Sã cose ndare chiã ãtã mbeite riqui Dios cheẽ andu sereã turúquiaa eico mose no,

i que embesa ji ra. ¹⁶ ¿Aba chõ Dios cheẽ ñandu sereã eandure cose chã? Ae Moisés querao Egipto si nae, ũquĩ ño ngue resẽ. ¹⁷ ¿Aba je chõ Dios paama i cuarenta años cose chã? Ae mbae icuã saã saã nae, ũquĩ ño ngue resẽ. Nyebe mano mano nguiã turúquiaa.

¹⁸ ¿Aba je chõ Dios ñee tuchi chã? —Jenguenea nda jẽucuyã mbei oso serécuua, i chã. Ae echeẽ mumba quia nae, ũquĩ je chõ ngue re. ¹⁹ Nyebe ngasẽ eã nguiã Dios récuua. Dios icua eãte quiatu ngue re.

4

¹ —Ae seicua quia nae, ũquĩ nda nyoĩ serécuua, i chõte Dios quia nande je co. Nyebe nandeico cochee. Cochee jẽingo eã mose, jemo jengasẽ eã arõte Dios récuua. ² Nande abe je chõ Dios riqui nguiã ñee co. —Ae seicua quia nae, ũquĩ nda nyoĩ serécuua, i. Moisés reco mosenda achõ je eã ño ngue ñee nguiã. Ūquĩ ngue Dios chandu iru chooño nda. Dios icua rocoĩ. ³ Ae Dios icua quia nae, ũquĩ achõ ño nda nyoĩ ngasẽ Dios récuua. Uquenea ucua sacua huee. Dios que ñee tuchi ucheẽ andu sereãsa je cose ra:

Aico paama ite ee co.

Uqueneã nda eucua eã mbei nyoĩ serécuua,

i que ra. —Ma siqui serese, i bei rei que equia eraarõ arõ nda. Ibi ao mosenda bei. ⁴ ã mbesa ji que chĩ nda:

Dios mbae ao jare que uqueneã ucua séptimo día ra,
i que embesa ji ra. ⁵ ã abe que chĩ embesa ji rese ra:

Uquenea nda eucua eã mbei nyoĩ serécuaa, i que embesa ji huĩ no nda. ⁶ Emo emo abe ra Dios icua. Siqui sacua erécuaa. Ae Dios cheẽ ñandu nyii nae, ùquĩ ngue Dios icua eãte ra. Nyebe ngasẽ eãte nguiã Dios récuua. Dios cheẽ nguiatu ngue emumbate nguiã. ⁷ Nyebe Dios riqui nguiã ñee nande je quiatu co. Nandeico sacua erese namo. Ñquĩ echeẽ mumbare nyii. Sã David Dios cheẽ mbesa no:

Dios cheẽ jeñandu rã namo.

Jeñia atãte ra jẽingochĩ, i que Dios ra,

i que David embesa ra. ⁸ Josué que mbia isrealitas miĩ aroneate Dios récuua ra. Uqueneã ucua sacua. Ñ nda Dios ñee ãte rei. —Taemingo serécuaa jenguenea ucua sacua, i ãte rei. ⁹ Nyebe ra Dios quiato nyoĩ ngasẽ Dios récuua. Huee ra uqueneã ucua tuchi huee cote. ¹⁰ Ae ra ngasẽ Dios récuua nae, ùquĩ nda uqueneã ucua tuchi. Sã Dios uqueneã ucua tuchi mbae ao jare no.

¹¹ Nandechimbirãcuã tuchi oso nonde Dios récuua. Nandequenea ucua sacua. Ae Dios icuayãte quia cose nae, ùquĩ na nda nandeicochĩ nande mo namo jẽ. ¹² Dios cheẽ nguia rei ereco tuchi. Equirãcuã tuchi. Ique tuchi aba chianguĩ re. Sã tiquise rimbe riqui ique chõte oso no. Eĩ si chõ Dios cheẽ nde. Ique tuchi aba ndua nduasa rĩ. Aba ndua nduasa mbuchecua tuchi aba je. Aba chioseĩ oseĩ abe mbuchecua tuchi aba je no. ¹³ Mbae mo ndese Dios riqui jirandu eã eãte co. Mbae mo nandesã nyecuayã cuayã aroneate quia esi ã.

Jesús ñee turã mbei Dios je nande rĩ

¹⁴ Jesús rei Dios riirĩ tuchi. Sacerdote rerecua tuchi chõ eriqui nguiã nande je co. Oso que ibate Dios rea ñee ñee sacua nanderĩ nda. Eriqui ñee ñee mbei Dios je nanderĩ co. Nyebe nandeico tuchi quiatu quia erese. ¹⁵ Diablo tã i mose nande je, Jesús riqui ico tochi tuchi nande je co. Ae rane je quiatu ngue diablo tã i tuchi nguiã nyii. “Ma Jesús mbae icua naa” i nguiã. Mbae icua ngue Jesús saã eã mbei chõ nda. ¹⁶ Nyebe nandesiquicheã nguiatu quia Dios riichã. Nyesequate quiatu nguiã nanderese co. Nandesiquicheã nguiatu quia ñee ñee ee. Eya eã sacua nanderese. Uquirãcuã mee sacua nande je, diablo tã i mose nande je.

5

¹ Sacerdote rerecua judío mbae rei mbia chõ. Ae chõ ñee turã mbei nguiã mbia riĩ Dios je. Ae chõ mbae quishĩ ji mondo mondo nguiã Dios je. Dios mbia chisaã saã icua mbutiã sacua esi. ² Sã sacerdote rerecua abe riqui mbia nande rã si no. Nyebe eriqui nguiã siqui tochte mbia quirãcuã nea je. Mbia aquiatuã je abe. Mbia icha icha je abe no. ³ Sã sacerdote abe riqui Dios cheẽ mumba no. Sã eriqui mbae quishĩ ji mondo mondo Dios je no. Dios eicua mbutiã sacua esi. Mbia chisaã icua abe mbutiã sacua esi no. ⁴ “Sacerdote rerecua se” i aroneate emo, Dios eirabo eã mose. Dios ae que sacerdote miĩ miĩ nda. Sã Aarón miĩ cose no. ⁵ Eĩ si que Cristo ra. “Sacerdote rerecua se” iã ngue ae ae ra. Dios quiatu ngue emiĩ nguiã. Sã Dios cheẽ mbesa ji riqui ñee no:
Seriirĩ ño nde re.

Ndere co que amee ndeje ra,

sã Dios i ñee ee no. ⁶ Sã embesa j i mo ndiqui ñee no:

Sacerdote bei rei nde.

Melquisedec na tuchi ereico nde co,

sã embesa ji riqui i no. ⁷ Jesús siqui mose a íbii, eya eã tuchi que emo mose ra. Ñee tuchi que Dios je aque mose ra. Nyeseo tuchi que equia Dios je ra. Dios emano ndiquisã sacua esi. Dios que echeẽ ñandu ra. Jesús quiatu que Dios cheẽ mumba sereã mbeite quia ra.

⁸ Dios ririite raque Cristo. Mbae rasi que esaã tuchi ra. Ñimbaaquiato chõ ngue equia ùquĩ ndese Dios cheẽ mumbayã nda. ⁹ Jesús que Dios cheẽ mumbayã tuchi mbae rasi raã tuchi ra. Aquere Jesús riqui mbia mingo bei co. Ae echeẽ mumbayã nguia nae, ùquĩ emingo bei quia co. ¹⁰ Dios quiatu ngue emii nguia sacerdote rerecuarã. Melquisedec na si no.

Jeñimbaaquiatoã mbei chõchĩ equia Cristo rese ã

¹¹ —Mbae tasenei tuchi Jesucristo riĩ jėje, ae rei que se ra. Jẽ nguia secheẽ jeñandu sereãte nguia. Nyebe aico nguia embiasa asa aroneate jėje co. ¹² Cosete que jẽingo rei Jesús icua resẽ. ¿Mbaerã jẽingo ñimbaaquiatoã mbeite re? Ñ nguia nda jẽingo nguia emo mbaaquiato quiato chã. Jẽaquiatoã mbei chõchĩ. Dios cheẽ aba chiicua jẽicuayã mbei chõchĩ. Áquẽ na ño jẽingochĩ ã. Sã áquẽ ndiqui usi quiandi achõ mbei no. Soo quiatu eu aroneate nguia. ¹³ Áquẽ na jẽingo bei mose, jẽaquiatoãte siqui mbae turã ndese. ¹⁴ Ae ñimbaaquiato quiatu tuchi quia Cristo riĩ nae, ùquĩ nguia rei mbae turã icua tuchi, mbae icua icua rocoĩ. Mbia cuasu rã ño ùquĩ nde.

6

¹⁻² Ae rese jeñimbaaquiato nyii nae, aba chiicuate ùquĩ. Ùquĩ miite rese jẽingochĩ nguia. Mbae aba chiicua mo abe jẽicua jiri Jesús riĩ ae. Ñ aba chiicua que asenei ja jėje nyii ra: —Jenyisaã mbae icua si jẽhui, ae que jėje nyii ra. —Dios jẽicua, ae que jėje nyii no nda. Bautismo abe que asenei jėje nyii ra. —Jẽo jeñono Jesús quiato arõ, ae que jėje nyii no nda. —Mbia raque ra quera si, ae que jėje nyii ra. —Mbia Dios quiatoã nda mbae rasi saã tuchi tata cuásuu, ae que jėje nyii no nda. ³ Ùquĩ aba chiicuate riqui ã ndesẽ. Aba chiicua tasenei jėje cote, Dios “eno” i mose. ⁴ Emo emo ngue siqui rei Dios quiatorã nyii ra. Dios chimee icua raque nyii. Espíritu Turã abe icua raque nyii no. ⁵ Dios cheẽ turã abe icua raque nyii. Dios quirãcuã abe icua raque nyii no. ⁶ Ùquĩ hui mose Dios si, uba si aroneate erese cote. Jesús mbucha si chõ nguia ira rese ùquĩ. Iquia iquia chõ nguia Jesús je mbia résaã ùquĩ. ⁷ Sã Dios riqui ama mbuchaaqui ibi ja rese no. Eĩ si chõ ndaque equia ucheẽ mbuchecua raque mbia ja je co no. Sã mbia riqui mbae tiquia ibi ia mose no. Suri turã mose, echa iate ra cote. ⁸ Ñui achõ suri mose huee, eicuãte ùquĩ. Eĩ si chõ mbia Dios cheẽ andu chooñosa no nde. Eicuãte ùquĩ. Ùquĩ nda Dios mombo chõ tata cuásuu.

Dios ra ucheẽ mbuchebiã mbeĩ

⁹ Jenii aico nguia ñee eã, Seresenda. Dios cheẽ jeñandu chooño eã nguia jẽ ndeae. Jesús jẽicuate quia ùquĩ. Nyebe jẽingo tuchi quia erese ùquĩ ndeae. ¹⁰ Dios turãte eriqui co. Tesareiaã nda jenyisaã turã si. Jendua ndua mose Dios quiato ataque rese. Mbae jemondo mondo mose ee. Mbae jemondo mondo bei quia ee ùquĩ. ¹¹ Eĩ jenye bei quiato equia nyesecua bei emo ndese. Ñ nda Dios mbae mee tuchi je jėje. ¹² Jeñimbirãtã mbei chõ nguia mbae raã jẽ. Sã Dios quiato cose ndare no. Sã eriqui Dios icua tuchi no. Sã siqui mingue tuchi ee no. Nyebe Dios ucheẽ mbuchebi jiri jiriã tuchi nguia ee. Eriqui beite mbae mee mee ee co.

¹³⁻¹⁴ Sã Dios ñee Abraham je cose no: —Taico turã mbei ndeje. Nderiirĩ nducucha tubiriã ndae, sã i Dios Abraham je no. Ùquĩ mose que Dios jurar i umbae nombre riĩ nda. ¹⁵ —Dios ra seriirina mee seje ucheẽ nguire, i que Abraham nguia eraarõ arõ mingue ra. Dios que eririĩ mondo chee ee ucheẽ nguire cote ra. ¹⁶ Mbia jurar i mose, Dios riĩ ño eriqui nguia jurar i. —Ùquĩ nda asaã eã, i aroneate cote, jurar ire nyii. ¹⁷ —Nderiirĩ nducucha tubiriã nda ambu, i mose Dios Abraham je, jurar i que ee aque mose ra. ¿Mbaerã ño jurar i chã? —Dios ra ucheẽ mbuchebiã, i sacua mbia chõ ñene. —Dios ra ucheẽ nyabi i eã, nande i sacua ño ñene. ¹⁸ Dios “mbae tasaã jėje” i mose, ñee ñooñoa ño ñene. Dios jurar i mose, jurar i chooñoa ño eno nde. Nyebe eriqui nguia nanderaarõ turãte nandeso mose eriichã. —Taamingo bei, i mose Dios nande je, ucheẽ nda embuchebiã. ¹⁹ —Dios ra

semingo bei ibate ucheẽ nguire, nande equia ã. Nande ùquĩ icua mose, nandequirãcuãte ra cote. Dios ra nandemingo tuchi uchiese cote. Sã sacerdote si quia Lugar Santísimo Dios riichã sacua no. Eĩ nande chõ nguia nande abe Dios riichã, nande eicua mose. ²⁰ Jesús rane ngue oso ibate ñeenda mombe nande je ra. Pe eriqui ñee turã mbei Dios je nanderiĩ pe. Sã sacerdote riqui ñee turã mbei Dios je mbia riĩ no. Sacerdote rerecua tuchi chõ Jesús nande je re. Melquisedec na si tuchi Jesús riqui co.

7

Jesús i tuchi sacerdotes ataque si

¹ Melquisedec ndei Salem jenda rerecua. Dios mbae sacerdote abe que ae ra. Abraham tu mose mbia rerecua iquia iquiare, Melquisedec que esobeishĩ oso ra. Melquisedec que bendecir i ee ra. ² Abraham ngue el décimo mee Melquisedec je ra. “Ererecua Turã” i chõ nguiã “Melquisedec” i mose. “Mbia mingo turãsa nyiese” i abe chõ nguiã “Melquisedec” i mose no. “Mbia siqui turã nyiese” i chõ nguiã “Salem” i mose no. ³ Melquisedec si eãte que ra. Eru eã abe no. Eramei mo eã abe no. Mano eã mbei que ra. Nyebe eriqui nguiã Jesucristo rã mbei co. Sã Jesucristo riqui beite sacerdoterã co no.

⁴ Melquisedec quia rei i tuchi Abraham si. Abraham quiatu ngue el décimo mee nguiã ee. Ae emee ee décimo sacua nda. ⁵ Abraham ndesenda eã ndaque Melquisedec. Aquere que Dios ñee judíos je ra. —El décimo jemee mee ño nguia sacerdote jendesenda je, i que Dios judíos je ra. Judíos que emee mee sacerdotes je ra. Leví riirĩ ndaque sacerdotes. Judíos sí raque sacerdotes. Abraham ndiirĩ ja raque judíos no. ⁶ Melquisedec que el décimo isi Abraham si ra. Leví riirĩ eã ndaque Melquisedec. —Judíos i tuchi ra nde, i raque Dios Abraham je. Nyebe que Melquisedec bendecir i Abraham je ra. ⁷ Ae bendecir i nae, aque quia rei i tuchi bendecir i ji si. ⁸ Ae mbia décimo isi isi quia uataque si ã nae, mbiachõ ño ùquĩ nde. Ûquĩ mano arondete. Melquisedec quiatu que mano eã mbei ra. ⁹ Abraham décimo mee mose Melquisedec je, erucucha riirĩ décimo mee naanguia chõ ngue ee re. Leví décimo mee naanguia chõ ngue ee re. Sacerdotes Leví riirĩ décimo mee naanguia chõ ngue ee re. Ûquĩ décimo isi isi raque nguesenda si. ¹⁰ Abraham ngue ùquĩ i ja ra. Eriiriã ndaque nyii, décimo mee mose Melquisedec je.

¹¹ Sacerdotes riqui mose que Dios ucheẽ mondo rei judíos je ra. Sacerdotes mbia mingo turã aroneate Dios rese. Ñ nda Jesús tu ãte rei. Ae quia ñi tu nguiã sacerdote bei nonde cote. Melquisedec na sí. Aarón na eã. ¹² —Sacerdotes ra nyuuru uru eã ngõngue rendaque re cote, i que Dios aque mose cote ra. —Jesús miĩ nda siqui sacerdoterã mbei cote, i que Dios cote ra. ¹³⁻¹⁴ Leví riirĩ nducucha eã ndaque Jesús. Judá riirĩ nducucha raque quia ñene. Judá riirĩ nducucha mo siquã ndaque sacerdoterã cose. —Ûquĩ mo sacerdoterã aroneate, i rei que Moisés nyii ra.

¹⁵ Sacerdotes cose ndare rã eã ño Dios Jesús miĩ nguiã sacerdoterã cote. Jesús quia ra siqui bei sacerdoterã. Melquisedec na si ra eriqui bei. ¹⁶ Moisés chimbessa rui si eã ño Jesús riqui nguiã sacerdoterã co. Leví riirĩ nducucha eã ño ae re. Ae quiatu siqui beite nguiã co. Nyebe eriqui nguiã sacerdote beite co. ¹⁷ Sã Dios ñee ee embesa ji rese no: Nde quiatu ereico bei nguiã sacerdoterã mbei co.

Melquisedec na si, sã Dios i ñee ee no. ¹⁸ —Sacerdotes ra nyuuru uru eã ngõngue rendaque re cote, i que Dios aque mose cote ra. Ûquĩ nguiatu ngue mbia mingo aroneate nguiã Dios rese. ¹⁹ Moisés chimbessa quia mbia mingo aroneate nguiã Dios rese. Ae rese nandeico quia namo co cote, aque quia aba mingo arondete nguiã Dios rese co cote. ²⁰⁻²¹ —Sacerdoterã nde, i mose emo je nyii, emo ngue jurar i ãte quia ra. Dios Jesús miĩ mose sacerdoterã, jurar i que aque mose cote ra. Sã embesa ji riqui no:

Dios que jurar i ra. Ucheẽ nda embuchebiã mbei.

“Nde quiatu ereico bei nguiã sacerdoterã mbei co.

Melquisedec na si”,

i que Dios cheẽ huĩ embesa ji rese ra. ²² Ae contrato Dios saã mbia je nyii nae, ũquĩ contrato que mbia mingo eã Dios rese ra. Ae contrato Dios saã Jesús rĩĩ namo nae, ũquĩ nguia rei eturã tuchi nande je namo cote.

²³ Sacerdote ñiinda atate que eriqui nyii ra. Nyuuru uru que equia ngõngue mano mose ra. ²⁴ Jesús quia siqui nguia sacerdoterã mbei co cote. Emo nda chĩ eã mbei euru erendaque re emo mose cote. ²⁵ Ae ra Dios siichã Jesús rĩĩ nae, ũquĩ nda Jesús mingo bei tuchi. Jesús quia siqui beite nguia co, ñee turã sacua Dios je ũquĩ ñi.

²⁶ Ae chõ sacerdote turã tuchi riqui nguia nande je co cote. Dios rã tuchite quia ae re. Eicuã jiri jiriãte quia ñene. Mbae turã achõ ndese chõ eriqui nguia. Mbae icuã ngue embiicuã aronea tuchi quia ra. Ae quia ibatenda rerecua tuchi riqui nguia namo co. ²⁷ Jesús quia rei sacerdote rerecua ataque rã eã tuchi. Ũquĩ nguiatu ticuas quishĩ quishĩ mbeite nguia sacrificio raã naa. Dios eicuã mbutiã sacua esi. Mbia abe icuã mbutiã sacua esi. Jesús quiatu ngue ticuas mo quishĩ eãte nguia sacrificio raã emo mose. Ae sí chõ ngue mano nguia sacrificio raã sacua. Mbia icuã mbutiã ja sacua ño ngue mano nguia aque mose. ²⁸ Mbiachõ ño ngue sacerdote rerecua ja ñiinda ra. Ũquĩ ngue mbae turã saã mbei aroneate quia ra. Dios quiatu que Jesús miĩ sacerdoterã mbei cote ra. Ae quia mbae icuã saã jiri jiriã tuchi nguia.

8

Dios contrato yasu saã Jesús rĩĩ

¹ Ababi tuchi quia rei Jesús siqui mose sacerdoterã. Sacerdote turã tuchi quia rei ae nande je. Hue eñi ngoi Dios Ibatenda ribisho quti nande je huee. ² Hue eriqui mbae raã naa Dio s chuchua ibatenda huee. Dios ae chisaã tuchi chõ hue tuchia re. Mbia mo nyisaã eã ño ñene. Nyebe Dios chuchua tuchi chõ hue re. ³ Sacerdote rerecua ja chõ sacrificio raã naa sacua nde. Nyebe Cristo abe sacrificio saã nguia umano mose. ⁴ Ae sacrificio Cristo saã nae, ũquĩ nguia eturã tuchi sacerdote chisaã si re. Cristo siqui mose íbii, eĩ nda sacerdote eãte rei ae. Moisés chimbesa cheẽ ndui achõ ño sacerdotes ibi jenda riqui nguia sacrificio raã naa ã. ⁵ Ae sacerdotes ibi jenda saã saã nguia mbae nae, ibei jenda rese aba mundua sacua ño ñene. Sã Dios ñee Moisés je Dios chuchua ao nonde no. —Ndeico mose ibi íbátee que sechuchua ibei jenda atecuquia ndeje, ũquĩ na si chõ sechucharã ibi jenda esaã, i que Dios ñee Moisés je ra. ⁶ Ae contrato Dios saã mbia je nyii nae, mbaranquiãte que ũquĩ nda. Ae contrato Dios saã nande je namo Jesús rĩĩ nae, eturã tuchi chõ ũquĩ cote re. —Ã tasaã jẽje. Ã abe tasaã jẽje no, i tuchi Dios quia contrato namonda rĩĩ nande je co. ⁷ Contrato ñiinda mbia mingo bei mose Dios rese, ñ nda contrato yasu raã eãte rei nande je. ⁸ Dios ia eãte que eriqui mbia aque mosenda rese ra. Sã embesa ji riqui no:

Ã ño ngue Dios ñee nguia: Contrato yasu ra asaã je Israel jenda je. Judá jenda je abe no.

⁹ Contrato asaã nguia ũquĩ namei je nyii nae, ũquĩ contrato rã eã nda eyasu asaã cote. Mbia arao quia Egipto si nae, ũquĩ mosenda rã eã nda contrato asaã je mbia namondo je. Mbia cose ndare chõ ngue contrato saã iru seje resẽ. Contrato raande que secheẽ mumba mumba chõ nda.

Nyebe ũquĩ asecha chõ nguia, i que Dios ra.

¹⁰ Ae contrato ra asaã je Israel jenda je, ã ndei e ã:

Secheẽ nda amiĩ tuchi eãquĩ ndese.

Secheẽ nda amondo tuchi echiangui re.

Se ra ererecua turã tuchi ee.

Serimba tuchi ra ũquĩ.

¹¹ Seicua ja tuchi rae. Mbia cuasu ja.

Eñetẽ abe ja chee.

Seicua ja mose, ũquĩ mose emo uataque mbaaquiãte quiãte aroneate seriĩ cote.

Seicua ja tuchi quiatu ra aque mose.

¹² Ũquĩ icuã nda ambutiã ja esi.

Atesarei bei ra eicuã si,

i que Dios cheẽ huĩ embesa ji rese ra. ¹³—Contrato yasu tasaã, i que Dios cote ra. Contrato ñiinda imate quiatu ngue ee re. Mbae ima nda ua ja cote.

9

Cristo rei sacerdote tuchi cote; sacerdotes ñiinda rã eã

¹—Eĩ jenye jenye bei chõ nguia mbae raã naa mose sechuchuaa, i que Dios sacerdote je ra. Contrato ñiinda raã mose. Uchuchua ibi jenda riĩ ño eriqui nguiaã ñee, “sechuchua” i mose. ² Dios chuchua que cuartos nyeremo ñi nda. Eiquesa jii que cuarto nongue ñi nda. Lugar Santo, i que hue cuarto je ra. Candelero oro ao ji que chĩ huee ra. Mesa abe que chĩ huee ra. Mbichae Dios chuchua jenda abe que chi huee no nda. ³ Cortina mbucheseco ji que siqui tuchia ite rĩ nda. Aque quitera quti que cuarto nongue ñi nda. Lugar Santísimo, i que hue cuarto je ra. ⁴ Huee que altar mo ñi oro ao ji ra. Mbae shimbu turã ndei sacuaã. Ira ao ji mbae riru mo abe que chĩ huee ra. Oro quti ji resebe que ra. Contrato Dios cheẽ mbesa ji que chĩ aque mbae riru imi ye ra. Oro ao ji ñio abe que chĩ mbae riru imi ye ra. Mbichae resebe que eñi nda. Maná i equia ee. Aarón chitochoquia ruri abe que chĩ mbae riru imi ye no nda. ⁵ Angeles raanguia ao ji que chi ibate mbae riru arõ nda. Querubines, i que ũquĩ je ra. Ujeo que embiitee u mbae riru arõ nda. Sacrificio renda rei mbae riru. Ũquĩ cuartos nyeremo jenda asenei ja aroneate jėje namo.

⁶ Aque mose que sacerdotes riqui ique ique bei cuarto eiquesa ji ra. Mbae raã naa sacuaã Dios je. ⁷ Cuarto cortina quitera quitinda quiarei mbia mo ique aronea tuchi. Sacerdote rerecua mii ño ngue i que quia huee ra. Ique chiibe ibeã ngue equia huee ra. Una vez al año ño ngue eriqui ique huee ra. Mbae ruqui que esii sii quia huĩque mose huee ra. Dios eicuã mbutiã sacuaã. Mbia icuã abe mbutiã sacuaã. ⁸ Aque mose bei que mbia mo ndiqui ique aroneate Lugar Santísimo nda. Dios riichã tuchi sacuaã. Ũquĩ ndese Espíritu Turã ndiqui urembiirandute ã. ⁹ Sacerdotes que ticuasú iquia iquia tuchi rei quia aque mose ra. Ũquĩ ngue mbia chiã mbitirõ eã mbei chõ nda. Mbia mundua ndua sacuaã Cristo ruqui rese chõ ngue ũquĩ nda. Ũquĩ nandeicuate quia ã cote. ¹⁰ Contrato ñiinda que mbia mingo turã aroneate quia ra. Mbae riĩ achõ ño ngue eriqui nguiaã ñee. Mbaeiae riĩ. Mbia chiu riĩ. Mbia chimbei riĩ. Mbia choita riĩ. Ũquĩ nii ja. Ũquĩ ñee ndui sí chõ ngue mbia riqui rei nguiaã nyii. Cristo tu nonde.

¹¹ Cristo tu mose que contrato ñiinda mbutiã ja cote ra. Contrato yasu que esaã nande je cote ra. Ae mii ño sacerdote namo cote re. Dios chuchua ibi jenda jie eriqui eã ndaque aa. Ibatenda ye chõ eriqui nguiaã mbae raã naa nande je pe. ¹² Cristo quiatu ngue ticuasú ruqui sii sii eã u nguiaã nande je. Chivo ruqui abe. Nguqui ae je chõ ngue nandeicuaã mbutiã nguiaã. Mano mii ngue mbia ja je ra. Mbia mingo bei sacuaã cote. ¹³ Ticuasú ruqui que mbia mbitirõ tirõ ndei quia sacerdote je ra. Chivo ruqui abe. Ticuasú riirĩ ndaque rei ji cusubu abe no. ¹⁴ Cristo ruqui quia rei equirãcuã tuchi ũquĩ mbae ruqui si. Cristo ruqui mii nguia rei nandendua nduasa mbitirõ tuchi. Ae ruqui mii nguia rei nandemingo turã Dios reco rese. —Se ae tamano mbia icuã mbitirõ sacuaã. Mbia mbae turã naa naa sacuaã Dios je cote, i que Cristo mano nda. Mbae icuã mo ngue esaã jiri jiriã tuchi ra. Espíritu Turã ngue siqui tuchi erese emano mose ra.

¹⁵ Cristo que contrato yasu saã nande je cote ra. Dios chiirabo eriichã tuchi sacuaã cote. Dios chiirabo siqui tuchi sacuaã erese Dios cheẽ nguire. Sã Dios ñee ee nyii no. —Jẽingo bei ra serese, i ee no. Ae je Dios contrato saã ndei quia nyii nae, ũquĩ icuã nii ngue Cristo mano nda. ¹⁶ Ae contrato Cristo saã nande je nae, testamento chõ ũquĩ nde. Sã emo testamento mbesa no. Testamento raãsa mano mose, aque ramo mose chõ testamento valer i nguiaã cote. ¹⁷ Testamento raãsa manoa mose, testamento chõño ño aque mose

re. ¹⁸ Dios contrato ñiinda raã namo mose que ticuasú iquia uquia mbia je ra. ¹⁹ Moisés contrato ñiinda raã mose, Dios cheẽ ngue embuchecua ja mbia je ra. Aquere que ticuasú ruqui isi chivo ruqui rese ra. I je que emombara ra. Eruqui je que Dios cheẽ mbesa ji rii rii cote ra. Mbia ja abe rii rii que ra. Mbae ribichu mbia ji je chõ ngue erii rii nguiã. Ovejara ireĩ je. Ira rãquiã ñetẽ je abe no. ²⁰ Aquere que Moisés ñee mbia je ra. —Ã mbae ruqui ã ndesẽ. Ticuasú que mano nda. Mbae ruqui rei Dios mbae testamento valer i sacuaã jẽje, i que Moisés ñee mbia je erii rii cote ra. ²¹ Aquere que Dios chuchua abe rii rii cote ra. Dios chuchua teiqui renda abe que esii sii no nda. ²² Contrato ñiinda mose, mbae ruqui achõ je chõ ngue Dios riqui nguiã mbia icuaã mbutiã esi. Dios que mbia icuaã mbutiã choõño eã nda. Mbae quishĩ mose bei quiatu ngue eriqui nguiã mbia icuaã mbutiã mbei esi.

Cristo mii aba icuaã mbutiã

²³ Dios chuchua ibi jenda quia rei echuchua ibatenda raanguia. Ibatenda quia rei eturã tuchi ibi jenda si. Ibi jenda que Moisés sii sii mbae ruqui je embitorõ sacuaã nda. Ibatenda quiatu que embitorõ eã mbae ruqui je ra. Cristo ruqui mii je quiatu que ra. ²⁴ Dios chuchua ibi jenda que Cristo iqueã oso quera si mose ra. Dios chuchua ibatenda quiatu ngue esi nguiã ique cote. Hue eriqui ñee turã mbei Dios je nanderiĩ huee. ²⁵ Sacerdote ique ique beite quia Lugar Santísimo co. Una vez al año ño eriqui nguiã ique ique bei huee. Mbae rii rii sacuaã mbae ruqui je. Nguqui j e eã ño ñene. Cristo quiatu que mano mii nda. Nguqui que eichusẽ tuchi nande je ra. ²⁶ Cristo que tu mii ibi ra. Mano mii sacuaã nande je. Nandeicuaã mbutiã sacuaã. Mbae ua serĩ mose que eru mano aa ra. Mano nyiibeĩ ibei eã equia co. ²⁷ Sã mbia riqui mano mii no. Sã Dios riqui ecuata mee aquere no. ²⁸ Eĩ si que Cristo mano aque mii no nda. Mbia icuaã ja mbutiã sacuaã esi. Cristo ra tu si ibii emo mose. Aque mose ra manoa mbia icuaã ndiquicharõ cote. Uquiato mingo bei sacuaã nguiatu ra eru. Ae esarõ arõ nguiã nae, ùqui mingo bei sacuaã.

10

¹ Moisés chimbese que mbia mingo turã eã ndaque ra. Mbia mundua ndua sacuaã Dios ririĩ mano ndese chõ ngue re. Ticuasú mbia quishĩ nyiibeĩ ibei rei quia nae, ùqui nduqui que mbia mingo turã eã no nda. ² Ùqui mbia chiã mbitirõ mbei mose, eĩ nda sacerdotes equishĩ nyiibeĩ ibei ãte rei. Eĩ nda ticuasú mii quishĩ ndei mbia mbitirõ ja sacuaã. Eĩ nda mbia tesarei rei huiicuaã si. ³ Mbia ticuasú quishĩ nyiibeĩ ibei mose, ùqui ngue embutesareiãte huiicuaã si ra. Munduate quiatu que huiicuaã ndese ra. ⁴ Ticuasú ruqui ra mbia icuaã mbutiã eã mbei. Chivo ruqui abe no.

⁵ Cristo ruqui mii nguiatu mbia icuaã mbutiã nguiã esi co. Sã Cristo ñee Dios je siqui mose ibii no:

Ticuasú ruqui mbia mbitirõ eã mbeite quia ndeje co.

Nyebe que serete ereme seje ra.

Se mano sacuaã mbia icuaã ñi.

⁶ Mbae raaque rei ji abe ndebiãte.

Ticuasú mbia quishĩ quishĩ nguia huiicuaã ñi nae, ùqui abe ndebiãte no.

⁷ Nyebe ngue acheẽ nguiã ndeje: “Ae ndebite nae, ùqui ndese seico sacuaã ño ngue achu nguiã.

Sã embesa ji riqui ñee serĩ no, ùqui ñee nguire que achu ra”, ae que ndeje ra, i que Cristo ngu je ra. ⁸ Nyebe Dios biãte riqui nguiã sacrificios. Mbia ticuasú quishĩ quishĩ mose huiicuaã ñi. Mbae raaque rei ji abe ebiãte no. —Ùqui jesaã saã, i raque Moisés chimbese huĩ. ⁹ —Ae ndebite nae, ùqui ndese seico sacuaã ño ngue achu nguiã, sã Cristo i Dios je no. Mbia mbui sacuaã sacrificios raã naa si chõ ngue eru nguiã. Sacrificio mii tuchi que esaã u mano mbia icuaã ñi nda. Cristo ruqui mii ño mbia icuaã mbitirõ mbei nguiã co cote. Sacrificio raã i i rocoĩ. ¹⁰ Ae Dios bite nae, ùqui ngue Jesucristo saã tuchi u ra. Mano mose mbia ja icuaã ñi. Mano mii tuchi que u ra. Nanderirõ mbei que nandeicuaã si cote ra. ¹¹ Sacerdotes riqui beite raque Dios chuchua ã. Ticuasú equishĩ nyiibeĩ ibeite raque

quia mbia icuã mbutiã sacuaã ã. Ûquĩ nda mbia icuã mbutiã eã mbei. ¹² Jesucristo quiatu que mano mii aque mose bei ra. Mbia icuã ndiquicharõ sacuaã ño ngue re. Aquere eñi ngoi bei Dios ribisho quiti nande je hue. ¹³ Pe eñi ngoi beite Dios jii pee. Ererecua tuchi ra Dios rese cote. Uquirãcuã nda eteacuquia tuchi chee uquiatoã je cote. ¹⁴ Sacrificio mii ngue esaã nda. Aque mii sacrificio je que uquiato chiã mbitirõ ja bei ra. ¹⁵ Sã Espiritu Turã abe riqui ñee ùquĩ no:

¹⁶ Ae contrato ra asaã je judíos je nae, ã ndei e ã:

Secheẽ nda amii tuchi echiangui re.

Secheẽ nda amii tuchi eãquĩ ndese no.

¹⁷ Atesarei bei ra eicuã si,

i que Espiritu Turã nda. ¹⁸ Dios nandeicuã mbutiã mose, mbae mo nandequishĩ aroneate quia nandeicuã ndiquicharõ ã cote.

Dios nandesichã na

¹⁹ Nande abe quiatu Dios nandesichã tuchi quia cote, Seresenda. Sã sacerdote ique Lugar Santísimo no. Eĩ nande si quiatu quia siquicheã ique Diósaa. Jesucristo ruqui riĩ nandequie Diósaa. ²⁰ Cristo rete rei cortina mbucheseco ji rã. Cristo rete mano mose, cortina abe que embui ra. Nyebe nandeico ique arõte Dios rea Lugar Santísimo ã cote. Cose ndare rã eã tuchi chõ cote re. ²¹ Jesucristo mii ndei sacerdote tuchi nande je cote. Dios quiato ja je cote. ²² Diósaa ra nandesiquicheã ique oso cote. Nandechiã turã ño nandeico oso Dios riichã. —Dios ra nandesi turã, nande chõ nguia nandechiangui re. Cristo quiatu ngue nanderii rii nguia nguqui je nyii. Nandeicuã mbutiã sacuaã nande si. I turã je que nanderei ra. ²³ —Taemingo bei, i que Dios nande je ra. Ñeende ùquĩ nda ucheẽ mbuchebiã. Nyebe nandeico quiatu quia ñee: —Dios ra nandemingo bei ucheẽ nguire, i. ²⁴ Sã Cristo mbae raã ja tuchi nande je no. Eĩ nande sí chõ nguia siqui turã nyue. Nandenongue nandembuchesecua turã nguia quia nyiese. Mbae turã nandesaã uquia bei quiatu quia nandenongue je. ²⁵ Cristo quiato ñumunua nua mose, nandetesareia mbei quiatu quia ñumunua nua. Sã emo emo ndiqui ñumunua nua eãte no. Cristo nandechosei uquia uquia bei quia nanderesenda je. Achite quiatu Cristo ñi nguia tu a.

²⁶ —Mbae icuã tasaã, nande i i mose Jesucristo icuare, emo nda manoa nandeicuã ndiquicharõ cote. ²⁷ Ûquĩ mose, mbae icuã nda nandesaã tuchi. Ûquĩ mose, nandeso chee ra tata cuásuu no. Huee ra Dios ucuãyãsa nyoĩ ja. ²⁸ Sã mbia Moisés cheẽ mumbasa iquia iquia cose no. —Uremae ngue echeẽ mumbasa rese ra, i mose mbia nyeremo, echeẽ mumbasa que mbia iquia cote ra. Mbia que etiisu isu eã tuchi eiquia ra. ²⁹ Dios riirĩ ucuãyãsa quia ra mbae rasi saã tuchi ùquĩ si. Cristo ruqui ucuãyãsa abe no. Ae Espiritu Turã isiteã teãte quia nae, ùquĩ abe no. Cristo ruqui je quiatu ngue Dios ùquĩ mii ndei nguia icúe. ³⁰ Sã Dios ñee no: —Se ra mbia icuã asibishorõ mbae rasi je, sã i no. —Dios sí ra mbae rasi saanguquia ngũimba je, erimba icuã mose ee, i abe que embesa ji huĩ nda. ³¹ Ae ra Dios mbasi eicuã nii nae, mbasi tochi eã ndae. Aba mbusiquiche tuchi chõ ùquĩ nde.

³² Jẽ Jesucristo icua ramo mose que mbia mbae rasi saanguquia tuchi rei jẽje ra. Jẽingo turã mbei chõ ngue equia Dios rese ra. Jeñimbirãcuã mingue que equia aque mose ra. Ûquĩ ndese jendua jiri ae. ³³ Mbia que ñee icuã icuã tuchite quia jemo je ra. Mbia que mbae rasi saanguquia tuchi quia jemo je no nda. Mbia tubiriã ndésaa. Jẽataque abe ia eã ndasi tuchi que eriqui erese ra. Jẽingo tochi tuchi que equia aque mose ra. ³⁴ Jẽya eãte que eriqui mbia tarõ ji rese ra. Mbia jembae rirõ ndirõ mose abe chee que jẽyate riqui Dios rese ra. Jẽirandute quiatu que equia jembae turã ibatenda rese ra. Jembae ibatenda quiatu ra ua eã mbei. ³⁵ Dios jẽicua bei quiatu quia aque mosenda rã mbei. Ûquĩ mose ra Dios mbae turã tuchi mee jẽje. ³⁶ Ae Dios bite nae, ùquĩ ndese bei chõ jẽingo. Ae mbae turã nda Dios mee jẽje nae, ùquĩ jẽsaarõ arõ mingue chõ nguia cote. ³⁷ Achite Jesucristo ñi tu a. ³⁸ Ae chiã Dios mbitirõ nae, Dios icuate quiatu que equia ra. Nyebe ra siqui bei Dios rese. Ae ra hui Dios si nae, Dios ia eã tuchi ra erese. ³⁹ Nande quia ra nandehui eã

mbei esi. Ae ra hui esi nae, ũquĩ nda Dios mbutiã. Nande quiatu Dios nandeicua tuchiŋe nguiã ã. Nyebe ra nandemingo bei.

11

Ae Dios icua

¹ Emo Dios icua mose, ¿mbae chõ ũquĩ ña? Ae Dios icua nae, ũquĩ nda ñee. —Ucheẽ nguire ra Dios mbae mondo seje, i rae. —Ae asarõ arõ nguia nae, ũquĩ nda emondo seje ucheẽ nguire no, i ra eno. Mae eã ndaque erese. ² Dios quiato cose ndare que Dios icua tuchi quia ra. Nyebe mbia riqui nguiã jirandu jate erese. ³ Dios que mbae chao ja cose mbae eã mose ra. Mbae mo je eã ngue mbae ao ra. Ucheẽ achõ je chõ ngue mbae ao ra. Nande Dios icua mose, ã abe nandeicuate quia ã. Nandemae ãte raque erese.

⁴ Abel que Dios icua ra. Nyebe que Dios eisi turã nda. Ofrenda turã ngue emondo Dios je ra. Embae ofrenda que eturã tuchi Caín mbae si ra. Nyebe Dios embae ofrenda isi turã nguiã. —Co eturãte riqui seje co, nyebe Dios i nguiã Abel ñii. Nyebe mbia riqui nguiã jirandu jate Abel rese. ⁵ Enoc que Dios icua ra. Nyebe Dios ererao nguiã ibate emano mose rocoĩ. Mbia mbuate que eoreã cote ra. Dios equerao quiatu quia ibate reaẽ. —Co eturãte riqui seje co, i quia Dios quia Enoc ñii nyii reaẽ. ⁶ Emo Dios icua eã mose, ũquĩ nda Dios isi turã eã mbei. —Co Dios reco riqui co, sã i quiatu nyii. —Emo Dios riichã mose, Dios turãte ra ee, sã i quiatu no. Aquere quiatu ra Dios eisi turã cote. ⁷ Noé que Dios icua ra. —Ama nda uchi, mbae ati ja chee, i mose Dios, “eno” i que Noé Dios cheẽ mose ra. Mae eã ndaque erese aque mose. Arca que esaã Dios cheẽ nguire ra. Nguiirĩ mingue sacua eye. Mbia ataque que Dios icua eãte quia ra. Noé mii ño ngue eicua quia ra. Nyebe Dios Noé isi turã nguiã.

⁸ Abraham ngue Dios icua ra. Nyebe Dios cheẽ mumbayã nguiã. Dios que ñee ee ra. —Eso rã a si. Ibi mo tamee ndeje mámbii, i que Dios ee ra. Abraham ngue Dios cheẽ mumbayã oso ra. Ae quiti esi nae, jiranuate raque erese nyii. ⁹ —Ibi mo tamondo ndeje, i Dios quia Abraham je nae, huee que eriqui huee cote ra. Ibimo tuchi que ee hue ra. Tei ñetẽ quire chõ ngue eriqui riqui bei huee ra. Nguiirĩ ndese. Isaac. Jacob abe no. ũquĩ je abe que Dios ñee nda. —A ibi tamondo jẽ abe je, i. ¹⁰ Abraham quiatu que Dios icua tuchi quia ra. Nyebe ñee nguiã. —Aico chee ra sucha tubiriã túraã. Hue ra ua eã mbei, i que Abraham ndua ndua Dios recua rese ra. ¹¹ Abraham ninisi abe que Dios icua ra. Sara, i equia ee. Nyebe que nguiirĩ ndea Dios cheẽ nguire ra. Ari tuchiŋe rei que ae ra. —Dios ra seriirina mee seje ucheẽ nguire, i quiatu que equia Dios icua ra. ¹² Amei tuchi raque Abraham, Dios eriirina mee mose ee. Mbia tubiriã i tuchi chõ ae cote re. Contar i ja aronea tuchi chõ erucucha je cote re. Sã nyasitata tubiriãte riqui no. Sã ibi quiishĩ tubiriãte riqui no.

¹³ ũquĩ ngue mano ja Dios mbae mondo ja eã mose ee ra. Ae je “co tamondo jẽje” i Dios ee nae, ũquĩ ndurubi quia ño ngue mano nda. —Dios ra emondo ure je uremanonde, i que eyate quia ndua ndua ũquĩ ndese ra. ũquĩ nguiatu que Dios icuate quia ra. —Nandeico mbirĩ ndaque equia íbii ã. Ibatenda chõ nande re, ite que equia eicua ra. ¹⁴ Emo ñee mose ũquĩ, siqui sete quiatu nguiã Dios récuua. ¹⁵ ũquĩ ndua ndua mose nguecua rese nda nyoĩ si nyebi re chã ae. ¹⁶ —Nanderecua turã nguiatu nandetea, ite que equia ra. Dios recua je chõ ngue eriqui nguiã ñee. Nyebe Dios ireĩ ireĩ eã nguiã esi. Dios bite “Paba” i mose ee. Dios ũquĩ ndecua turana quereco co.

¹⁷ —Ma Abraham secheẽ mumbayã, i que Dios Abraham ñii nda. —Nderiirĩ eiquia rã sacrificiorã, i que Dios ee ra. Abraham ngue Dios icua tuchi ra. Nyebe ngue “Isaac taiquia” i rei nguiã nguiirĩ mii ñii. ¹⁸ —Isaac nda tiirĩ tuchi ndeje, i rei que Dios ee nyii ra. ¹⁹ Abraham ngue Dios icua tuchiŋe quia ra. —Dios seriirĩ mbuquera arondete se eiquia mose nyii, i que ndua ndua uchiangui re ra. Abraham nguiirĩ iquia serĩ mose que Dios eo isi ra. Abraham Dios cheẽ mumbayã mose, nguiirĩ iquia raanguia chõ ngue re. Dios embuquera si raanguia chõ ngue eno nde. ²⁰ Isaac que Dios icua ra. Nyebe ñee nguiã

nguiirĩ je. —Dios ra mbae turã saã jêje, i que Jacob je ra. Esaú abe je. ²¹ Jacob que Dios icua ra. Nyebe ñee nguiã José riirĩ ja je umano serĩ mose. —Dios ra mbae turã saã jêje, i que ee ra. Uchitochoquia rese que nyeco rei nyibi ñee turã Dios je ra. ²² José que Dios icua ra. Nyebe ñee nguiã israelitas je umano serĩ mose. —Dios ra jenderao a Egipto si. Sequianguie abe jendao a si, i que israelitas je ra.

²³ Moisés ru que Dios icua ra. Esi abe. Moisés ñetẽ mose que esi embuchemi tres meses ra. Ererecua eiquia eã sacua. Moisés itãquieĩ turãte quia ee re. Nyebe eru riqui nguiã siquicheãte ererecua si. Esi abe. ²⁴ Moisés s abe que Dios icua quia aquere cote ra. Nyebe “Egipto jenda rerecua riirĩ nducucha eã se” i nguiã. ²⁵ “Dios quiato rese taico se. Mbia icuã icuã ndaque ra seje. Dios quiatoã ndese ra aicoã”, i que Moisés ucuasu mose cote ra. Mbae icuã ndese aba oote raque. Aba mbia mbirĩ ño ñene. ²⁶ —Taico chõ Dios rimba rese. Mbia ra sembasi mbasi raque Cristo riĩ, i que Moisés ra. Nyebe eriquiã nguiã Egipto jenda rerecua rese. Mbaecha tuchi raque ae. —Dios ra mbae turã mee seje, ite quiatu que Moisés ra. ²⁷ Moisés que Dios icua ra. Nyebe esi nguiã Egipto si. Siquiche ãte ererecua paama i si. Ñimbirãcuã turã mbeite que equia ra. Dios rese mae naanguia. Emo mae aroneate raque Dios rese. ²⁸ Moisés que Dios icua quia ra. Nyebe pascua raã nguiã. Aque ramo ngue pascua ra. —Oveja ruqui je jêiquesa ja jêsii sii. Ñnda ángel jendiirĩ i iquia eã, i que Moisés ñee mbia je ra. Angel que israelita riirĩ mo iquia eã tuchi cote ra.

²⁹ Israelitas que Dios icuate quia ra. Nyebe echoi nguiã Ama Ndisha Ireĩ ndasa. Ama iru raanguia que etasa nyoĩ sobei ra. —Nande abe nandesos iasa emombita, i rei que Egipto jenda abe ra. I que tuchõ eati eiquia ja ra. ³⁰ Israelitas que Dios icua quia Josué reco mose ra. Nyebe echoi nguiã sucha cuasu Jericó mama mama siete días. Nyebe Dios etaronda mbucoi nguiã ee. Muros i equia ee. ³¹ Rahab abe que Dios icua ra. Ae ngu saã saã jate quia mbia je nyii nae, aque. Dios icua tuchi que cote ra. Nyebe manoa nguiã mbia uataque rese. Ae Dios cheẽ mumba mumba quia nae, ãquĩ ndese. Rahab que Dios quiato isi turã nda. Mbuchemi ngue ererecua icuã si ra.

³² ¿Aba riĩ abe ra aba ñee jêje re? Dios quiato tubiriãte quiatu ñene. Ûquĩ asenei ja aroneate jêje. Gedeón. Barac. Sansón. Jefté. David. Samuel. Dios cheẽ mbuchecuasa ja riĩ. ³³ Ûquĩ ngue Dios icuate quia ra. Nyebe eriqui nguiã Dios cheẽ nguire mbia mbuti tuchi guerra mose. Siqui turã ngue equia Dios cheẽ nguire ra. Dios que siqui eres e ucheẽ nguire ra. Dios que etequiatu quiatu bei quia nyacua mbaba mose abe ee ra. ³⁴ Ûquĩ ngue Dios icuate quia ra. Nyebe tata rendi erei eã nguiã. Tata sendi cao caote raque. Mbia tiquise rerequia requia mose erese, Dios que etequiatu quia ãquĩ mose no nda. Dios que uquirãcuã mee equirãcuã nea je ra. Dios que embuquirãcuã mbei guerra mose abe ra. Ganar i sacua. ³⁵ Cuña abe que Dios icuate quia ra. Nyebe Dios eriirĩ ndaaque mbuquera sí nguiã ee. Emo emo abe que mbae rasi saãte quia Jesús riĩ nda. Hui sereãte quiatu que equia esi ra. —Sã seiquia rei. Dios ra sembuquera si nguiã. Serete mbuchiicua bo turã ndae, i que equia ra. ³⁶ Emo emo ngue ñimbirãcuã nguiã mbia iquia iquia choõno mose ee ra. Mbia eiruã nua mose abe no. O cuaacua mose abe no. Utarõ tarõ mose abe no. Hui eã mbei chõ ngue Dios si ra. ³⁷ Emo emo ngue mbia iquia iquia rei sita je no nda. Tiquise je abe que eriqui rei eiquia iquia ra. Emo emo ngue echisiamo tuchi ra. Mbae rasi je que eriqui ñimbiracuã tuchi ra. Eirao eã ndei que ra. Mbae ire achõ ño ngue eirao riqui ra. Hue jechõ ngue eriqui aronea tuchi ra. Mbaecha reã ndei que ra. Mbia que mbae rasi saanguquia tuchi rei quia ee ra. Hui eã mbei que equia Dios si ra. ³⁸ Ûquĩ ngue eturã tuchi mbia ataque si ra. Hue jechõ ngue eriqui aronea tuchi ra. Mbaecua re que eriqui uque uque ra. Emo emo mose que eriqui sita ibate no nda. Emo emo mose que eriqui turuquia rĩ no nda.

³⁹ Ûquĩ ngue Dios icua tuchite rei quia ra. —Mbae turã tamondo jêje, i rei Dios quia ee nyii nae, mee jei eã ngue ee ra. Mee je quia ra ee cote. ⁴⁰ Ûquĩ miĩ je eã nda Dios mbae

turã mee. Nanderese abe chõ eriqui nguiã ndua ndua. Mbae turã nda emondo nande ja je cote, ùquĩ ndese.

12

Jesús mi ndese nandendua ndua

¹ Sã Dios icuasa tubiriãte cose no. Ûquĩ na ño nandeico nande abe Dios icua tuchi. Ae nandembuti mbuti quia Dios si nae, ùquĩ si nandehui. Ae mbae icuã aba mbuchiishĩ arõte quia nae, ùquĩ si nandechiicuasẽ ño. Jesús mi ndui chõ nandeico ngata. Nandechimbirãcuã ño nguia siqui erese. ² Jesús mi ndese nandendua ndua. Ae riqui Dios icua uquia nande je co. Ae ra mbae saã ja nande je ucheẽ nguire. Mbae rasi que esaã tuchi ira rese ra. Emo mbucha mose i quia ira rese, aba ireĩte raque uquĩ. —Mbae rasi raande ra seyate cote, i que Jesús quia ra. Mbae rasi raande eñi ngoi bei Dios jii pe cote.

³ Jeñimondochote chĩ nda siqui mose Dios rese jẽ. Sã Jesús no. Mbia icuã icuã mose ee, ñimbirãcuã mbei que equia ra. Ñimondocho eã ngue ra. ⁴ Jesús mi ngue mano mbae icuã ndiquisã quisã sacuã mbia si ra. Jẽingo mose mbae icuã ndiquisã quisã, aba mo ngue jẽiquia eãte jẽ nguiatu ra. ⁵ ¿Embesa ji si jêtesarei chõ nde? —Seriirite quia jẽ nde, ite Dios quia jẽje co. Sã embesa ji riqui ñee ã no:

Seriirĩ, Dios mbae rasi saanguquia mose ndeicuã ni, ereisiteã teãchĩ nda jẽ.

Dios ñee mose ndeje ndeicuã ni, echeẽ eisi turã ño.

⁶ Ae rese Dios nyesequa nae, mbae rasi ra esaanguquia ee eicuã mose.

Ae Dios isi nguiirina nae, ùquĩ je ra ñee eicuã ni,

i que embesa ji huĩ ñee nda. ⁷ Dios “seriirĩ” i tuchi quia jẽje co. Nyebe eriqui nguiã mbae rasi raanguquia jẽje jẽicuã mose co. Sã mbia ja riqui nguiirĩ iruã eicuã mose no. ⁸ Dios mbae rasi raanguquia eã mose jẽje, eriiriã nguiatu rei jẽ. ⁹ Sã nanderu ibi jenda riqui nanderuã nua nandẽnetẽ mose no. Nandembaaquiату sacuã. Sã nandeico echeẽ mumbayã cote no. Eĩ nande sí chõ Paba ibatenda je. Ae cheẽ nguiatu nandemumbayã tuchi. Ûquĩ mose ra nandereco siqui turã tuchi. ¹⁰ Sã nanderu ibi jenda riqui nandembaaquiату jua raque no. Nandeico turã sacuã aa íbii. Dios quiatu nandembaaquiату turã tuchi nguiã nanderu ibi jenda si co. Nandechiã mbitirõ sacuã ae rã si. ¹¹ Dios mbae rasi saanguquia mose nande je, nandechosei chiãte raque. Erasite quia ñene. Aquere quiatu ra nandechimbitirõ cote. Aque mose quiatu ra nandeya cote.

Dios cheẽ nda jẽisiteã teãchĩ jẽ

¹² Jẽo tomei jembirãtã jiri ae. Jẽtima abe jembirãtã jiri siqui sacuã Dios rese no ae. Jeñimondochoã jiri quia siqui Dios rese ae. ¹³ Jẽingo tuchi quiatu quia erese. Ae ndua ata atate quia nae, ñ nda ùquĩ abe siqui tuchi chee erese chã. ¹⁴ Jẽingo turã mbia ja rese. Dios rã si chõ jẽingo. Dios rã si nandeicoã mose, nandemae eã mbei ra erese. ¹⁵ Jenyiteaquiату turã ño nguia. Ñ nda jemo Dios turã isiteã eã. Emo mbae icuã naa mose jẽje, jêtesarei chõ esi. Jendua icuã icuãchĩ nda jenongue rĩ jẽ. Ûquĩ mose ra jeñimbiicua jate. ¹⁶ Jeninisi ae rese chõ jẽingo. Jemo nda siquichĩ emo ninisi rese jẽ. Dios mbae ra jẽisiteã teãchĩ jẽ. Sã Esaú no. Aque que umbae herencia mondo ja chõ soo ñetẽ ndibishorõ nda. ¹⁷ Aquere que “sembae herencia taisibe” i rei nyeseo tuchi ra. “Bendecir ere rã seje”, i rei que ngu je ra. Eru que teã teã ño ee echeẽ mose ra. Nyebe Esaú nyeseo tuchi nguiã cote.

¹⁸ Dios turã tuchi riqui jẽje namo co. Mbia Moisés mosenda je si. Aque mose que mbia riqui titi titi i tuchi siquiche Dios si ra. Aque mose abe que sita ibate sendi sendi ee ra. Itondarute que eriqui ee ra. Ama ngue pirirã pirirã i tuchi quia ee aque mose ra. ¹⁹ Trompeta que nyuihiii ee no nda. Dios que ñee ee cote ra. Mbia que Dios cheẽ ñandu sereãte ra. ²⁰ Dios quiatu ngue ñee nguiã nyii: —Emo oco mose sita ibate rese, ùquĩ jẽiquia. Mbae quiaa riinda abe oco mose erese, ùquĩ abe jẽiquia no. Sita je jẽiquia. Jeñio no ae, i quiatu que Dios ee nyii ra. ²¹ Aba mbusiquiche tuchi que mae mose ùquĩ ndese ra. —Aico titi titi i tuchi esi co, i chee que Moisés abe ra. ²² Eĩ jenyee eã ño jẽ nde.

Dios jembusiquiche âte quia jê co. Dios recua jêsiichã tuchi quia jê ã. Dios reco chuchua. Jerusalén naanguia ibatenda jêsiichã tuchi quia jê ã. Angeles tubiriã abe jêsiichã tuchi quia ã no. ²³ Dios icuasa ñiinda abe jêsiichã nguia ã no. Ũquĩ mbae nombres mbesa ji chi ibate pe. Dios abe jêsiichã nguia ã no. Ae ra Jesús quiatoã icuã tea tea ja emo mose. Mbasí ja rae. Jesús quiato mano je abe chõ jêsiichã ichã nguia ã no. Ũquĩ ngue Dios mbuturã tuchi cote ra. Eicuã jiri jiriã tuchi chõ cote re. ²⁴ Jesús abe chee jêsiichãte quia ã no. Ae ruqui riĩ ngue Dios contrato yasu raã nande je ra. Ae ruqui rii rii ji jêsiichã nguia ã. Ae ruqui quia rei eturã tuchi Abel ruqui si.

²⁵ Dios riqui ñee jêje co. Echeẽ nda jêsiteã teãchĩ jê. Dios que mbae rasi saanguquia mbia je cose ra. Echeẽ nenei neneisa andu sereã mose a íbii. Ibatenda riqui ñee nande je co. Ae cheẽ nandechandu sereã mose, mbae rasi ra esaanguquia tuchi nande je cote.

²⁶ Dios cheẽ mose que ibi nyere nyere aque mose coose ra. —Namo nda ibi ambuchere si no. Ibi miĩ ño eã nda ambuchere. Ibei abe ra ambuchere no. Aque miĩ nda ambuchere cote, i Dios quia co. ²⁷ —Aque miĩ nda mbae ambuchere ja, i Dios quia co. Aque mose ra mbae ua ja Dios chiao. Ae ra siqui bei, ũquĩ achõ nda ua eã. Mbae ataque ra ua ja aque mose. ²⁸ Dios rimba rei nande. Nyebe ra nande nandetiã aroneate. Gracias nande tuchi quiatu quia Dios je. Nandeico mingue chõ nguia ee. Ũquĩ mose ra eya tuchi nanderese.

²⁹ Mbia Dios cheẽ mumb a mose, Dios ra paama i tuchi ee. Tata rã tuchi chõ Dios re.

13

Jenyesequa jenyiese

¹ Jenyesequa quia jenyiese jê. Nyiesenda chõ jê nde. ² Mbia ngaẽ mose jenyuchúaa, jêisi turã ño nguia. Emo ngue ángeles mo isi turã uchuchúaa ra. Iranua ndaque erese. Mbia mo eriqui rei nguia ee. ³ Etarõ ji rese jêingo ndua. Mbae turã jêsaã saã ño nguia ee. Jêtarõ ji raanguia chõ jê abe erese re. Ae je mbia icuã icuã ndiqui nae, ũquĩ je jêingo turã ño. Sã jê abe jendete riqui no. Sã jê abe jêiruã nua arõte no. ⁴ Emo siqui mose ngüinisi rese, ũquĩ Dios bite. Sã emo ngüinisi resechõ ño siqui. Sã eriquã emo ndese. Emo siqui mose emo ninisi rese, Dios ra paama i tuchi ũquĩ je. Ae ninisi âte riqui nae, siqui mose emo ndese, Dios ra paama i tuchi ee no. ⁵ Mbae isiquia rese ra jendua nduachĩ jê. Jembae miĩ ndese chõ jêya. —Jaendechayã mbei ra se, i quiatu Dios nguia co. ⁶ Ae bei jê. Dios ra nanderechayã mbei. Nyebe nandeico nguia ñee:

Dios riqui beite serese co.

Mbia mo si ra asiquicheã,
nyebe nandeico nguia i ã.

⁷ Jenderequa rese jêingo ndua. Ũquĩ ño ngue Dios cheẽ senei senei jêje ra. Ũquĩ ndiqui Dios icuate ũquĩ. Eĩ jenye Dios icua jê abe ũquĩ na si. Ũquĩ nguia siqui turãte nguia Dios rese ũquĩ. ⁸ Eĩ mbei chõ Jesucristo re. Cose mosenda bei. Namo abe chee. Eĩ mbei ra ae quia. ⁹ Mbia jembaaquiato ata ata mose, echeẽ si jêhui chõ. Mbia jembaaquiato chooño mose, echeẽ si jêhui chõ no. Ae je mbia riqui mbaeiaie i nande je nae, ũquĩ si nandehui mose, ũquĩ abe ra nandechiã mbuquirãcuã eã no. Nandechiu abe ra nandechiã mbuquirãcuã eã no. Dios turã ae chõ nandechiã mbuquirãcuã nguia. ¹⁰ Jesús miĩ ngue mano nande je ra. Sacrificio rei ae miĩ nande je. Cose ndare rã eã namo cote re. Ticuasú ra mano eã nandecuã mbutiã sacua cote. Jesús ruqui miĩ ño nandecuã mbutiã nguia co cote. ¹¹ Sacerdote rerequa riqui ticuasú ruqui rerao rao Lugar Santísimo aque. Dios mbia icuã mbutiã sacua esi. Isho jiri sucha cuasu si echoi quia ticuasú roo rei rei aque. ¹² Jesús abe que mbae rasi saã isho jiri sucha cuasu si ra. Mano tuchi que mbia mbitirõ sacua nguqui je ra. ¹³ Jesús que aba ireingua saã tuchi ra. Nande abe nandesiquicheã nguia quia aba ireingua raã erese. ¹⁴ Nanderequa ibi jenda ra ua chõ. Dios ra nanderecuã mee nande je ibate. Ũquĩ nguia ra ua eã mbei. ¹⁵ Jesús que mano nande je ra. Nyebe

nandechē turā mbei quia Dios je. Sã nandechuru riqui ñee turā mbei erĩ. ¹⁶Jẽingo turā ño nguia mbia je. Jembae jemeē mee nguia emo je. Ũquĩ Dios bite.

¹⁷Jẽingo turā jenderecua je. Echeē jemumbayã. Jenderecua riqui jendeaquiato quiato Dios je ũquĩ. —¿Jeteaquiato turãte equia re? i chee ra Dios ee. Jenderecua cheē jemumbayã mose, eyate ra ũquĩ mose. Echeē jemumba mose, eya eãte ra jendese. Jẽ abe ra jẽya eãte no.

¹⁸Jeñee mbei quia Dios je urerĩ. Ureico turā sete equia mbia ja je ã. Ureico ndua icuã icuã eãte emo niĩ ã no. ¹⁹Jeñee tuchi quiato quia serĩ Dios je. ĩ nda Dios semondo jei jendea.

Echeē hui bei

²⁰Dios ae aba mombia nguia. Dios ae que Jesús raaque mbuquera si ra. Jesús ruqui rĩ ngue Dios ucheē yasu mee nande je ra. Jesús ruqui rĩ ngue Dios embuquera no nda. Jesús rei oveja raarõsa rã. Nanderaarõ arõ mbei equia co. ²¹Sã Dios riqui jembuquirãcuã tuchi. ĩ nda jẽingo bei ae Dios bite ũquĩ ndese. Sã ae riqui tuchi nandechiangui re. Nandemingo tuchi sacua ae ebite ũquĩ ndese. Jesucristo quiatote quiato nande re. Sã mbia ñee turā mbei quiato quia erĩ. Amén.

²²Seresenda, aico co mbesa juate jembiiirandu sacua a. Secheē jemii tuchi rã jẽaquĩ ndese. ²³Aico jembiiirandu Timoteo rese a. Etarõ iriã ndiqui namo co cote. Tu jei mose serea, ae abe ra arao seso mose jendea. ²⁴Saludos amondo quia jenderequiasa je aque. Jesús quiato ja je saludos amondo quia aque. A Italia jenda saludos mondo quia jẽje aque. ²⁵Sã Dios siqui turã jẽ ja je. Amén.

LA CARTA DE SANTIAGO

Mbia icúe cúe jenda je Santiago ucheẽ mbesa mondo

¹ Santiago chõ se re. Dios rimba chõ se re. Jesucristo rimba abe chõ se re. Judíos Jesús quiato je chõ aico nguiã ã mbesa mbesa. Judíos isúe cúe jenda je. Saludar ae chõ nguiã ã mbesa jêje.

Dios mii ño aba mbaaquiato nguiã

² Mbae icuã tã i mose jêje, jêya bei chõ nguia, Seresenda. ³ —Ma Dios icua tuchite, i mose mbae mo tã i jêje, jêingo tuchi chõ nguia Dios rese ùquĩ mose. Jeñimbirãcuã aquiato sacuã. ⁴ Jeñimbirãcuã mbei chõ nguia Dios icua. Ì nda Dios riqui jembitorõ tirõ mbei jembuchicuabo mingo. Ùquĩ mose ra jêturã tuchi cote.

⁵ Jêingo turã aquiatuã mose, jeñee ño Dios je. Jeñimbirãcuã aquiatuã mose, jeñee ño Dios je no. Ae ra jembaaquiato. Ae ñee nguia Dios je nae, ùquĩ ja je ra mbae mondo tuchi. Ñee asi asi eã nda ee no. ⁶ Jê ache i mose Dios je, “Dios quia ñene”, jenyete tuchi quiato quia. —Dios ra emee ãte rei seje, i mose jemo, eicuãte ùquĩ. Ama ndebera rã ño ùquĩ nde. Sã quiririã ndiqui ama ndebera rerao turã eã no. Sã eriqui embuchebi chebite no. ⁷ Ama ndebera rã emo siqui mose, Dios ra mbae mee eã ùquĩ je. ⁸ Emo ndua ata mose, mbae mii mo ndese eriqui aroneate.

⁹ Jesús quiato mo embae eã mose, sã eya tuchi chõ siqui. Sequiatote ite quia Dios nguiã ee aque. ¹⁰ Sã Jesús quiato mbaecha ia bei chõ siqui, mbae icuã tã i mose ee. Sã eya riquiã umbae tubiriã ndese. Sã Dios rese quiato eya riqui. Embae ua mose, sã eya riqui ùquĩ mose abe no. Mbaecha mbae ra siqui bei eã. Sã quiata uti riqui soõ jeite no. ¹¹ Tenda rasi mose ee, quiata ra ñimama. Euti abe ra uqui. Eturã eã mbei ra cote. Eĩ si ra mbaecha. Umbae tubiriã nyabe chõ nda mano.

Mbae icuã tã i mose nande je

¹² —Ã esaã icuã, i mose emo jêje, jêesaãchĩ nda jê! Jêingo mingue chõ nguia ñimbirãcuã. Jeñimbirãcuã mose ra Dios mbae turã mee jêje. Jemingo bei rae. —Ae nyesecha quia serese nae, ùquĩ nda amingo bei, i que Dios cose ra. ¹³ —Ã esaã icuã, i mose emo jêje, Dios eã ño ñee nguiã jêje ùquĩ. —Dios que “ã esaã icuã” i seje ra, jenyechĩ nda jê. —Ã esaã icuã, i eã nda Dios emo je. Dios abe ra mbae icuã saã eã emo ñee mose ee. ¹⁴ Aba chiangui renda icuã nguiarei mbae icuã oseu uquia aba je. Dios eã ñene. ¹⁵ Emo mbae icuã oseu mose, mbae icuã naa arondete cote. Mbae icuã naa naa mbei mose ra Dios embasi cote.

¹⁶ —Mbae icuã esaã, i mose emo jêje, Dios ñee eã nguiã jêje. —Dios chõ ñee nguiã, jenyechĩ nda jê. ¹⁷ Ae mbae turã tuutu beite quia nande je nae, Dios chimondo chõ ùquĩ nde. Dios quiarei eturã mbei tuchi. Eicuã jiri jiriã emo mose. Sã Dios tenda ao no. Nyasi abe no. Ùquĩ nguia nyabi abi jiri nguiã. Dios quiarei nyabiã mbei emo mose. Eturã mbei tuchi eriqui co. ¹⁸ Sã Dios riqui seriirĩ i nande je no. Nande echeẽ icua mose nandechiangui re. —Jê nane je aico seriirĩ i co, i que Dios nane je ra. Dios riirĩ tubiriã tuchi ra ngaẽ nanderui cote.

Dios cheẽ jemumbayã ño nguia eandu mose

¹⁹ Dios quiarei eturã tuchi. Nyebe echeẽ jeñanduse tuchi quiato quia jê. Jendua quiato quia ñee nonde. Paama jenyete jê jê techĩ nguiã emo je. ²⁰ Ae Dios bite riqui mbae nae, ùquĩ nandesaã aroneate nande paama i mose. ²¹ Ae Dios ucheẽ mondo quia jeñiangui re nae, ùquĩ jêisi tuchi quiato quia. Jêingo mingue chõ nguia Dios cheẽ je jê. Aba mingo beisa chõ Dios cheẽ nde. Ae mbae icuã ndese mbae riqui nae, ùquĩ icuã tubiriãte eriqui raque. Ùquĩ si jêhui tuchi. Mbae icuã ja si jêhui tuchi.

²² Dios cheẽ nda jeñandu chooñocheĩ jẽ. Echeẽ jemumbayã tuchi quiatu jẽ. Emo Dios cheẽ andu chooño mose, ae sí chõ ñimbiĩrĩ irĩ nguiã aque. ²³⁻²⁴ Sã emo ndiqui mae ñooño nguba rese espejo je no. Sã eriqui tesarei jei chõ nguba si no. Eĩ si chõ Dios cheẽ andu chooñosa re. Tesarei jei chõ nguiã Dios cheẽ si. Echeẽ mumbayã ndocoĩ. ²⁵ Dios cheẽ nguiarei aba mbui tuchi mbae icuã si. Ae siqui tuchite quia Dios cheẽ ndese nae, ũquĩ ndese ra Dios riqui tuchi echeẽ mumbayã mose. Ũquĩ Dios cheẽ ñandu chooñoate quiatu nguiã. Echeẽ emumbayãte quiatu nguiã.

²⁶ —Dios quiato chõ se re, i raque emo. Uchuru rerequia chooñoa mose, Dios quiato raã ñooño ño ũquĩ nde. Ae sí chõ ñimbiĩrĩ irĩ nguiã ũquĩ. ²⁷ Ae Dios quiato chooñoa tuchi nae, ũquĩ ndiqui mbae turã naa naa ũquĩ. Ũquĩ ndiqui esi cheecha reaquiature ũquĩ. Ũquĩ ndiqui eru cheecha reaquiature ũquĩ no. Mbae eã mose eru cheecha mbae. Ũquĩ ndiqui ñimbiĩcuã icuã eãte mbae icuã mo je ũquĩ.

2

Mbia nandehi turã ja chõ nguia nyiabiã

¹ Jesucristo quiato chõ jẽ nde. Jenderecua tuchi chõ ae re. Nyebe mbia jẽisi turã ja chõ nguia nyiabiã. ² Sã mbaecha mo ndiqui ngasẽ jeñimunua mose jẽje no. Huiĩrao turã ndesebe. Eo cuasa turã ndesebe oro. Sã mbaecha reã mo abe riqui ngasẽ jeñimunua mose no. ³ Sã jẽingo mbaecha isi turã no. Sã jẽingo embucoi erenda turã tose no. Sã jẽingo mbaecha reã mbucoi turã eã no. ⁴ Eĩ jenyẽ mose, jẽisi turã ja eã ño nguiã ũquĩ. Jembuchiabi chõ nguiã ũquĩ. Hue rĩ ja eã ño jẽingo nguiã mbia cuata mee ũquĩ. Jendua turã eã ñochĩ nguiã ũquĩ. ⁵ Secheẽ jeñandu rã, Seresenda. Mbia mbaecha reã ngue Dios irabo ra. Dios icua tuchi sacua. Ũquĩ ndese quiarei Dios o tuchi mbaecha mo si. —Ũquĩ nda siqui tuchi serese se ererecua tuchi mose, i que Dios ñee nyii ra. ⁶ Jẽ ngue mbia mbaecha reã jenguirirõ tuchi ra. Eicuã eãte ũquĩ ndiqui raque jẽje. Mbaecha quiatu eicuãte riqui nguiã jẽje. Jembiĩrĩ irĩ ño nguiã. Jenderao rao chõ nguiã ererecua je, jẽ mbae mo mee mee sacua ee. ⁷ Mbaecha chõ ñee icuã icuã nguiã Cristo rĩ. Nandererecua chõ Cristo resẽ.

⁸ —Sã ereico nyesequa ndechiese no. Eĩ ere si chõ nyesequa emo ndese, i que Dios mbia je cose ra. Dios cheẽ i tuchi chõ ũquĩ nde. Nande ũquĩ ñee mumbayã mose, nandehico turã ndae. ⁹ Nande mbia mo isi turã mose, emo isi icuã mose, eicuãte ũquĩ. Nande mbia isi chiabi abi mose, Dios cheẽ nandemumba chõ nguiã ũquĩ. ¹⁰ Dios cheẽ tubiriãte raque nande je echeẽ mumbayã sacua. Nande echeẽ mii mo mumba mose, echeẽ ja mumba raanguia chõ ũquĩ nde. Echeẽ ataque mumbayã ndaque. ¹¹ Dios cheẽ tubiriãte. —Jẽingochĩ nda emo ninisi rese, i que ra. —Mbia mo nda jẽiquiachĩ, i que ae si ñee nda. Nande emo iquia mose, echeẽ nandemumba chõ nguiã ũquĩ. Nandehicoã ndaque emo ninisi rese. ¹² Dios cheẽ ngue nandembui mbae icuã si cote ra. Nandehesequa sacua mbia rese. Nyebe nandehico turã mbei chõ nguia mbia je. Dios quiatu ra nandecuata mee tuchi emo mose cote. ¹³ Ae eya eã eãte riqui emo ndese nae, ũquĩ ndese ra Dios ia eã eã nandecuata mee mose. Nandeya eã mose emo ndese, ũquĩ mose ra Dios nandembasiã.

Nande Dios icua mose, mbae turã abe nandesaã ño nguia

¹⁴ Sã emo ndiqui ñee no. —Dios aicuate quia co, i. Ũquĩ mbae turã naa eã mose, ũquĩ nda Dios sirõ eã mbae icuã si. Dios icua chooño ño ñene. ¹⁵ Sã Jesús quiato mbaecha reã mo ndiqui ngasẽ jẽje no. Sã eĩrao eã ndiqui no. Sã echiurã mo eã ndiqui no. ¹⁶ Sã jemo ndiqui ñeeño ee no. —Nde ae chõ ndechiurã etea. Nde ae chõ ndeiraorã etea. Eso turã ño, i jemo ee. Mbae mo mee ndocoĩ ee. Jeñee iru chooño ño nguiã ee ũquĩ. ¹⁷ Jẽingo turã eã mose emo je, Dios jẽicua chooño ño nguiã ũquĩ. Jẽ Dios jẽicua mose, mbae turã jẽsaã jiri ae.

¹⁸ Sã emo ndiqui ñee no. —Dios aicuate quia co, i. Sã emo ndiqui ñee no. —Mbae turã asaã saã nguia co. Dios aicua chooño eã nguia co, sã emo ndiqui i no. Jẽ Dios icua mose ¿mañi ae ra jẽicua mbae turã naa naa eã mose re? Se quiatu mbae turã asaã saã nguia co. Nyebe ra mbia “eriqui Jesús icuate co”, i seriĩ. ¹⁹ —Dios miĩ ño siqui nguia co, jenyẽ chõ nguia ùquĩ. Eturãte raque ùquĩ. Aba checuayã abe riqui ñee ndaque Dios miĩ niĩ co no. Siquichete esi ñee ndaque eriĩ. ²⁰ ¿Mbaerã jêaracuayã tuchi riqui re? Emo mbae turã naa naa eã mose, Dios icua chooño ño nguia ùquĩ. ²¹ Sã nandei Abraham no. —Nderiirĩ emee seje, i mose Dios, Abraham ngue echeẽ mumba eã nda. Nyebe Dios Abraham isi turã mbei nguia. ²² Abraham ngue Dios icua chooño eã nda. Mbae turã ngue esaã saã mbei quia Dios icua mose ra. Dios cheẽ ngue emumba eã nda. Nyebe nandeco nguia ñee. “Abraham Dios icuate”, i. ²³ Sã embesa ji riqui ñee no:

Abraham ngue Dios icua ra.

Nyebe que Dios eisi turã mbei ra,

i que embesa ji ra. Ûquĩ ngue ique tuchi cote ra. Nyebe “Dios Quiato” i nguia Abraham je. ²⁴ Emo Dios icua chooño mose, Dios ra eisi turã eã. Emo Dios icua tuchi mose, sã mbae turã abe raã naa. —Dios icuasa, i nda mbia ee cote chã. ²⁵ Sã Rahab cose no. Cuña icuã. Siqui ata ata bei mbia rese. Aque que Josué chimondo isi turã nda. Mbuchimi turã ngue mondo mbia icuã si ra. Nyebe Dios Rahab isi turã nguia. ²⁶ Sã nanderete no. Umi umi eã mose, “eraaque” i chõ mbia nguia ùquĩ je. Ûquĩ na ño mbia mo ndiqui nguia ã. Mbae turã naa eã. Nyebe nandeco nguia “Dios icuayãte” i ee ã.

3

Cochee chõ nandechuru nandereco

¹ —Mbia mbaaquiato quiatu sacua se, jjenye jaaja techĩ nda equia jẽ! Emo emo miĩ ño. Mbia ra mae tuchi urerese. Urecuata ra emee tuchi. Mbia mbaaquiato quiatusate quia ure re. ² Dios cheẽ nandechabi chabi chõ nguia nande ja ã. Emo uchuru rerequia turã mose, nguete ja abe rerequia turã ño nguia ùquĩ. ³ Sã nandeco freno miĩ ticuasuchuru rese no. Nandechẽ mumbayã sacua ño ùquĩ nde. Sã freno ñetẽ je chõ nandeco ticuasuchuru rete rurucuata nandenduasa quiti no. Ticuasuchuru rete cuasute raque. ⁴ Sã lancha cuasute raque no. Sã quiririã quiracuãte riqui raque ee no. Ira ñetẽ je chõ echa riqui nguia embucuata turã unduasa quiti. ⁵ Eĩ ño nandechuru nguia. Nandechuru mbae saã ata ata chõ nguia. Eñetẽte raque. Sã tata ñetẽte raque no. Mbae ra esei ja tuchi oso quia.

⁶ Tata rã ño nandechuru re. Nandechuru quiarei mbae icuã ñumumbara raã uquia tuchi nande je. Nandechuru icuã na eãte nanderete resenda mo. Nandechuru chõ nanderete mbiicuã ja nguia. Nandechuru chõ nandereco rerequia icuã mbei nguia. Aba checuayã ño nandechuru rerequia icuã nguia no. ⁷ Sã nandeco quiaa riinda mo mbusetã arõte raque no. Ae mbebe quia nae, ùquĩ abe nande mbusetã arõte raque. Mbei abe nandembusetã arõte raque. Ae siqui ama ñi nae, ùquĩ abe nandembusetã arõte raque no. Ûquĩ ja que mbia mbusetã emo mose ra. ⁸ Nandechuru quiatu nandembusetã aroneate nguia. Nandechuru icuã nguia nandembuquiriri aroneate nguia. Mbei tasi je rã tuchi chõ nandechuru riqui nguia nande je ã. ⁹ Nandechuru je nandeco ñee turã ndaque nanderu Dios je. Nandechuru sí je chõ nandeco nguia ñee icuã mbia Dios chiao je cote. Ae rã sí raque Dios mbia ao. ¹⁰ Nandechuru sí je nandeco ñee turã ndaque. Ñee icuã abe no. Ûquĩ Dios biãte, Seresenda. ¹¹ Sã icua riqui no. I turã mose, eturã ja bei chõ ñene. I reẽ mose, ereẽ ja bei chõ eno nde. I chumumbara chĩ aroneate icua miĩ ye. ¹² Sã isio riqui ia eã ira a mo no. Isio a bei chõ nda ia nguia. Ira mo nda ia eã enongue a no. Ea sí chõ nda ia nguia no. Sã nandeco i turã ndea eã i reẽ mbirõ no. Hue icua miĩ ye ra eñi ja eã. Eĩ si chõ nandechuru no nde. Nandechẽ ñumumbara mose, eicuãte ùquĩ.

Ae je Dios uaquiato mee nae

¹³ Jemo aquiatu mose, sã eriqui mbae turã naa naa mbei. Sã eriqui tochi bei no. ¹⁴ — Paama jenyee checuayã mose jenyue, jëaquiatu jësaã ñooño ño nguiã ùquĩ no. Jeñee ñooño ño nguiã ùquĩ. Dios cheẽ ndui eã tuchi chõ ùquĩ nde. ¹⁵ Eĩ jenyee eã nda cote, Dios uaqiutu mee mose jëje. Paama jenyee checuayã mose jenyue, Dios rã eã ño jë nde. Dios quiatoã nyisaã na ño ùquĩ nde. Aba checuayã nyisaã na ño ùquĩ no nde. ¹⁶ Mbia ndua eã mose emo ndese, eicuãte ùquĩ. Mbia paama i checuayã mose nyue, eicuãte ùquĩ no. Ùquĩ mose ra mbia siqui turãya nyue. Mbae icuã icuã mbei ra ee. ¹⁷ Dios uaqiutu mee mose nande je, nandechiã turãte ra cote. Nandechiã nda ngoite cote. Cocheete ra nandeico cote. Emo ñee nda nandemumba eãte cote. Nandeya eã nda mbia rese cote. Mbae ra nandesã turã mbei quia cote. Nandendua ata ata eã nda cote. Nandechẽ nyecuate ra eriqui mbia je cote. ¹⁸ Nande mbia nandemingo turã mose nyiese, nandechiã turã nda nandeico cote.

4

Ae mbae icuã quiatote nae, Dios quiatoã ño ùquĩ nde

¹ ¿Mbaerã ño jëingo nyao nyao nyiese chã? ¿Mbaerã ño jëingo ico icuã icuãte nyue chã? Jeñiangui renda icuã nii ño ñene. “Se chõ jë”, jenyee jaaja quiatu nguiã mbae icuã osei osei. ² Jembae eã jenyosei choseichĩ nguiã ã. Jë ererequiayã mbei mose, mbia jëiquia arõ ñochĩ nguiã ã. Mbae jenyosei chosei chõchĩ nguiã ã. Nyebe jëicuã icuã mbeite riqui nguiã jenyue ã. “Embu seje”, jenyee ãte quiatu nguiã Dios je. Nyebe jëingo nguiã eisiã. ³ “Embu seje”, jenyee mose Dios je, “embu seje” jenyee icuã icuã ño nguiã ee ã. Mbae mumba chooño sacua ño jëingo nguiã “embu seje” i Dios je ã. Nyebe Dios riqui nguiã emee eã jëje. ⁴ Sã cuña mo ndiqui hui ngu si no. Eĩ jenyee si chõchĩ nguiã hui hui Dios si ã. Ae Dios biãte nae, jë ùquĩ osei osei mose, Dios quiato aronea ño jë cote re. ¿Mañi jenyee quia ùquĩ icuayãte re? ⁵ Sã embesa ji riqui ñee ñooño ãte no: Espíritu Turã Dios mee nguiã nandechiangui re nae, aque riqui ngueteãte nanderese co. Nandeico sacua Dios miã ndese, i que embesa ji ra. ⁶ Dios turã i ãte riqui nande je co. Sã embesa ji riqui ñee no: Ae ucuasu saã saã nguiã nae, Dios riqui ùquĩ ndiquisãte co. Ae siqui tochte quia nae, ùquĩ je quiatu Dios turã i ãte riqui nguiã co, i que embesa ji ra. ⁷ Jëingo tochi chõ nguiã Dios je. Aba checuayã jëisiquisã ño nguiã jenyese. Ùquĩ mose ra uchã jësi cote. ⁸ Dios jësiichã tuchi quiatu quia. Ùquĩ mose ra Dios abe jendiichã tuchi. Jëingo mose mbae icuã ndese, jëhui chõ esi. Jendua ata ata mose, jeña jembitorõ ño. ⁹ ¿Mbaerã jëingo iquia iquia mbae icuã naa mose re? ¿Mbaerã jëyate riqui mbae icuã naa mose re no? Jenyeseo quiatu quia jëicuã nii. Jëya eã nguiatu quia jëicuã ndese no ae. ¹⁰ Jëingo tochi chõ nguiã Cristo je. Aquere quia ra ae jëturã mbuchecua mbia je cote.

Nandechẽ icuã eã emo nii

¹¹ Jeñee icuãchĩ nda emo nii, Seresenda. Dios cheẽ mumba chõ ùquĩ nde. —Jenyesequa chõ nguiã jenyiese, i que Dios ra. Jë Dios cheẽ mumba mose, “Dios cheẽ icuã” i raanguia chõ ùquĩ nde. “Dios cheẽ icuã” jenyechĩ nda echeẽ mumbayã ndocoĩ jë. ¹² Dios ae chõ mbia cuata mee nguiã co. Dios miã ño ucheẽ mondo nguiã nande je. Nande echeẽ mumbayã sacua. Dios ae chõ aba rirõ nguiã aba icuã si. Dios ae chõ nda aba mondo tata cuásuu no. Nande quiarei emo cuata nandemee aroneate.

Mbae mo tasaã isamami, nande aroneate

¹³ Sã nandemo ndiqui ñee no. —Taso mbae mo naa naa pee. Taico are tuchi pee. Mbae mo isi sacua icua. Tenda nongue mose ra achube, i no. Ndua rane eã Dios rese. ¹⁴ Ùquĩ Dios biãte. Nandeiranuate mbae mo ndese. Mbae mo tu arondete tã i nande je. Isamami nandemano arondete. Shimbo rã ño nande re. Sã shimbo riqui quiachã jeite no. ¹⁵ — Mbae mo tasaã, nandechĩ nda nande ae ndua mose rocoĩ Dios rese jë. —Dios eno i mose seje, ùquĩ mose quiatu mbae tasaã, nande quiatu quia. ¹⁶ ¿Mbaerã jëingo tesarei Dios si

re? ¿Mbaerã jëingo “se ae mbae tasaã” i re? Jenguasu jësaã saã ño nguiã ũquĩ. Eicuãte ũquĩ. ¹⁷ Ae mbae turã icuate quia nae, sã ũquĩ ndiqui mbae turã naa mbei. Mbae turã naa eã mose, eicuãte ũquĩ cote. Dios biãte ũquĩ cote.

5

Santiago ñee asi mbaecha je

¹ Tacheẽ mbaecha je cote. Jëya eã ndasi ra jësaã tuchi cote, mbaecha. Jenyeseo tuchi quiatu quia. ² Jembae ra ua ja tuchi cote. Chicuaquiarĩ nda jëirao ua tuchi. ³ Jembae mbae isiquia ra quiachã ja cote. Jembae mbae isiquia rã nda jë abe jëquiachã tuchi cote. Mbae isiquia rese chõ jëingo nguiã ndua. Dios rese ndua rocoĩ. Mbae isiquia jemunua nua tuchi chõ nguiã Dios jembasi sacua ã cote. ⁴ Mbia que quiei quiei rei quia jëje resẽ. Mbae que jemondo turã turãya nguia jembae ishao shaosa je resẽ. ũquĩ Dios mbiirandu raanguia chõ nguiã jeni. Nyebe ra Dios jembasi uquirãcuã je. ⁵ Sã ticuasú riqui quiaru bei ñimbuquirã no. Eiquia nonde. Eĩ ño jë nde, mbaecha. Jembi rese chõ ngue jëingo bei quia ra. Jëquiaru choño mbei que equia ra. Siqui rocoĩ Dios rese. Nyebe ra Dios jembasi cote. ⁶ Jë ngue mbia turã jembasi mbasi quia ra. Jë ngue mbia turã jëiquia iquia quia no nda. Mbae icuã mo esaã eãte raque jëje. Nyebe ra Dios paama i tuchi jëje, mbaecha.

Jesucristo jësaarõ arõ mingue chõ nguia

⁷ Jesucristo ra tube íbii, Seresenda. Jësaarõ arõ mingue chõ nguia. Sã mbia riqui ama nyaaqui raarõ arõ mingue no. Mbae tiquia nonde no. Aquere ra eriqui minguebe umbae raarõ arõ no. Eucua ucua nonde. ⁸ Eĩ jenyẽ chõ nguia Jesucristo raarõ arõ mingue jë abe. Jeñimbirãcuã ño nguia Jesucristo raarõ arõ. Achite eñi tu a cote. ⁹ Jeñee icuã icuãchĩ nda jenyue, Seresenda. ũquĩ mose ra Dios jembasi. Namó jiri ra Dios mbia icuã mbasi. ¹⁰ Jeñimbirãcuã mingue chõ nguia. Sã Dios cheẽ mbuchecua mbia cose ndare no. Sã ñimbirãcuã mingue mbia icuã mose ee no. ¹¹ Ae ñimbirãcuã mingue quia nae, ũquĩ je chõ Dios turã ndiqui nguiã. Sã Job cose no. Ñimbirãcuã mingue tuchi que equia ra. Aquere que Dios turã tuchi riqui ee cote ra. ũquĩ jëicuate quia ã. Eĩ si chõ Dios turã tuchi nguiã mbia je co.

¹² Á abe jeñandu tuchi. Jeñee ñooñochoĩ nda jë. Jurar jenyechĩ nda emo mose jë. Ibatenda rĩ. Ibi jenda mo ñi abe no. Mbae ja mo ñi nda jurar jenyẽ jirichĩ jë. Emo jenyẽ mose, ũquĩ mñi mbei chõ jeñee. Tei jenyẽ mose, ũquĩ mñi mbei chõ jeñee no. Eĩ jenyẽ mose ra Dios ñee asiã jëje.

¹³ Jemo ia eã mose, sã ñee Dios je. Jemo ia mose, sã irasei rasei Dios je no. ¹⁴ Jemo ndasi mose, sã “jenyu” i Jesús quiato rerecua je. Sã ũquĩ ñee Dios je erasi rĩ cote. Sã mbae quira mo quiti erasi ãquĩ ndese Jesús rĩ. ¹⁵ —Jesús ra embucherõ, i mose uchiangui re ñee mose Jesús je, mbucherõ ndae. Erasi mbae icuã naa mose nyii, ũquĩ nda embutiã esi no. ¹⁶ —Mbae icuã ngue asaã eã nda, jenyechĩ nda jë. —Mbae icuã ngue asaã nda, jenyẽ quiatu quia jenyue. Jeñee quiatu quia Dios je jenongue rĩ. ũquĩ mose ra Dios jembucherõ. Emo turã mo ñee tuchi mose Dios je, Dios ra mbae turã saã tuchi ee. ¹⁷ Sã Elías no. Nande rã si chõ ndaque Elías. Sã ñee tuchi Dios je ama mbuchaaqui eã nonde no. Nyaaqui eã mbei que cote ra. Tres años y medio chee que ra. ¹⁸ Aquere que Elías ñee Dios je cote ra. Ama mbuchaaqui sacua cote. Aque mose que nyaaqui cote ra. Mbae que suri ja cote ra. Mbae ia ja chee no.

¹⁹ Emo icha mose Dios si, sã enongue embuchebibe mingó Dios rui sí. ²⁰ Nde mbia mo mbui mose huicua si, eresiquisã quisã ño nguiã eso eã sacua tata cuásuu ũquĩ. Dios ra eicuã mbutiã esi cote.

PRIMERA CARTA DEL APOSTOL SAN PEDRO

Pedro ucheẽ mbesa mondo Jesús quiato ishonda jaaja je

¹ Pedro chõ se re. Jesucristo chimbaaquiatu chõ se re. Aico ã mbesa jêje a. Isho isho jendeco mose jendecua si. Ponto jenda je. Galacia jenda je. Capadocia jenda je. Asia jenda je. Bitinia jenda je. Jẽ ja je aico ã mbesa a. ² Dios que jẽirabo umbaerã nyii jẽã mose ra. Espíritu Turã ngue jemii icúe Dios mbaerã cote ra. Jẽ echeẽ mumbayã sacuaã. Jesucristo ruqui jembতিরõ sacuaã abe jẽicuã si no. Sã Dios riqui turã i i tuchi jendese. Sã riqui jembia i i tuchi no.

Dios ra mbae turã mee ja nande je

³ Nandechẽ turã mbei quia Dios riĩ. Jesu cristo rute quia ae re. Ae que eya eãte riqui nanderese ra. Nyebe nandeisi nguiã mbiasu nguiirina cote. Dios Jesucristo raaque mbuquera mose, aque mose que nandembiasu nande abe ra. Nyebe nandeico nguiã ñee ã. “Dios cheẽ nda io turã ja nande je”, i ã. ⁴ Dios ra nandemingo bei. Eriirĩte quia nande re. Nyebe ra mbae mee ja nande je nandeico mose ibate. Mbae icuã ndese ra nandemae eã tuchi aque mose cote. ⁵ Jẽingo Dios icuate ũquĩ. Nyebe ae riqui nguiã jendeaquiatu tuchi uquirãcuã je co. Dios que mbae mbuquiche ja nande je ra. Nandererao sacuaã ibate. Mbae ua ja mose ra nandererao ja ibate cote. Co eriqui raã nguiã nandereaquiatu co. ⁶ Nyebe jẽyate riqui nguiã ũquĩ. Mbae rasi tu mbirĩ arõte raque jêje. ⁷ Sã mbia riqui oro mbuchi no. Equia rirõ sacuaã esi. Eĩ ño Dios nguiã jêje co no. Jẽ Dios icua tuchi sacuaã ño mbae rasi riqui re. Nyebe Dios jẽicua. Mbae rasi raã naa ndaque. Etura tuchi chõ ũquĩ oro si re. Oro quia ra ua emo mose. Jẽ nguiã ra jẽhua eã mbei Dios icua mose. Jesucristo tu mose nda Dios ñee turã tuchi jenii ña. ⁸ Jẽingo nyesequate Jesucristo rese ũquĩ. Jemae eãte raque quia erese ũquĩ. Jẽingo eicuate jeñiangui re ũquĩ. Jẽya tuchite riqui erese ũquĩ. ⁹ Jẽingo Jesucristo icuate ũquĩ. Nyebe ra Dios jẽã mingo turã mbei cote.

¹⁰ Sã Dios cheẽ mbuchecuada ñee cose no. —Mbia ra mae jee Dios turã ndese, i que ñee nda. Nanderĩ ño ngue eriqui nguiã ñee. —Mañi nda Dios quia reae. Utura je ra mbia mingo bei reae, i que Dios cheẽ mbuchecuada ndua ndua cose ra. ¹¹ Espíritu Turã ngue siqui quia Dios cheẽ mbuchecuada chiangui re ra. Mbiirandu randu que equia Cristo riĩ nda. —Cristo ra mbae rasi saã tuchi. Aquere ra equirãcuã tuchi mbia rerecua mose ae cote, i que Espíritu Turã Dios cheẽ mbuchecuada mbiirandu nyii ra. —Manosete ra ũquĩ ndeae. Aba riĩ eriqui “Cristo” i remi, i tuchi que Dios cheẽ mbuchecuada quia ndua ndua ra.

Dios que jemii icúe umbaerã nda

¹² Dios que embiirandu ra. —Jẽ jẽtiamba quiatu ra Cristo mbae rasi saã mbia mingo bei sacuaã. Jẽtiamba quiatu ra Cristo mbae rasi saã mbia namonda je. Mbia emo mosenda je, i que Dios ra. Nanderĩ ño ngue eriqui nguiã “namonda” i. Nyebe mbia riqui nguiã ũquĩ ja renei nenei jêje Cristo riĩ cote. Espíritu Turã abe riqui erenei nenei jêje co cote. Angeles abe ũquĩ icua sete raque quia Cristo riĩ ũquĩ. ¹³ Jendua tuchi rã nguia mbae raã nonde. Jẽtesa bei quiatu quia. Jesucristo tu mose, eturã tuchi ra ae jêje aque mose. ũquĩ ndese quia jẽingo bei tesa eraarõ. ¹⁴ Ae jenyosei chosei quia nyii nae, Dios icuayã mose nyii nae, ũquĩ ndese jẽingo ndua eã cote. Dios cheẽ jemumba eã ño nguia cote. ¹⁵ Dios quiarei jemingo icúe umbaerã tuchi. Nyebe jẽingo turã tuchi ae rã si. ¹⁶ Sã Dios cheẽ mbesa ji riqui no: —Jẽtura ño jẽingo se rã si, i ñi embesa ji re. ¹⁷ ũquĩ jẽingo “Paba” i Dios je ũquĩ. Nyebe jẽingo ireĩ ireĩ jiri esi jẽingo mose íbii. Dios ra mae nandechiao ja ja rese. Emo chiao rese ra mae eã eã. ¹⁸ Nandei ñiinda que siqui chooño nguia cose ra. Dios rese siqui rocoĩ. Eĩ nande que equia nande abe nyii no nda. Dios que nanderirõ ũquĩ si cote

ra. Dios que mbae isiquia mondo eã nanderirõ sacua nandeicua si ra. Oro que emondo eã no nda. Plata abe no. ¹⁹ Cristo ruqui quiatu ngue nanderirõ nguiã nandeicua si. Aba queteamba tuchi chõ Cristo ruqui re. Cristo mano mose nande je que eruqui uchẽ tuchi ra. Sã sacerdote oveja turã ño iquia no. ²⁰ —Cristo ra mano mbia icua ndiquicharõ, i que Dios nyii mbae ao nonde ra. Namõ ño ùquĩ io nguiã jẽje cote. Namõ ño Cristo mano nguiã jẽje cote. ²¹ Cristo chõ Dios icua uquia nguiã jẽje ùquĩ. Dios chõ ngue Cristo raaque mbuquera nguiã. Dios chõ uquirãcuã mee nguiã Cristo je. Nyebe jẽingo nguiã Dios icua ùquĩ cote. Nyebe jẽingo nguiã ñee. “Dios ra nandemingo bei ibate” i ùquĩ.

²² Dios cheẽ jẽisi turã mingo ùquĩ cote. Nyebe jeñia mbitirõ nguiã mbushĩ cote. Nyebe jẽingo nguiã nyesecua arõte mbia rese cote. Jenyesecua tuchi quiatu quia jenyese jẽ. Nandechiangui re chõ nandeico nyesecua tuchi mbia rese jẽ. ²³ Nyaacuquia si je raanguia chõ jẽ cote re. Nandechaacuquia que equia nyii nae, mbia chõ ngue nanderu nyii ra. Nandechaacuquia sire, Dios que nanderu tuchi cote ra. Dios cheẽ ño nandembuchaacuquia si nguiã. Echeẽ nda ua eã bei. Siqui bei rae. ²⁴ Sã embesa ji riqui ñee no:

Quiata rã tuchi chõ mbia ja riqui nguiã ã.

Sã quiata riqui mano jeite no.

Quiata uti rã ño mbia riqui nguiã ã no.

Eturã mbirĩ ño chí ndaque nyii.

Aquere chõ ñimama cote. Mano cote.

²⁵ Dios cheẽ nguia ra ua eã mbei,

i que embesa ji ra. Dios cheẽ sí chõ ngue jeñandu nguiã Jesucristo rĩ. Jemingo bei sacua.

2

Jẽo tuchi chõ nguia Dios cheẽ ndese

¹ Nyebe jẽhui mbae icua ja si. Jẽ nda mbia jembiirĩ irichĩ nguia jẽ. Jenguasu ra jẽsaã saachĩ. Emo mbae ra jenyosei choseichĩ nguia jẽ. Jeñee icua icuachĩ nda equia emo ñii jẽ.

² Sã ãquẽ itãqueĩ ndiqui uchiu achã asite no. Eĩ jenyese bei chõ nguia oo Dios cheẽ ndese. Eĩ nda jẽquirãcuã tuchi riqui Dios rese. Sã ãquẽ quirãcuã ndiqui quiambure no. ³ Dios turã ngue jẽsaã ndei resẽ.

Sita turã na ño Cristo re

⁴ Jesucristo ra siqui bei. Jesucristo rei sita turã na. Sã mbia riqui sita mo ndirirõ no. Eĩ si chõ mbia nguiã Jesucristo ririrõ ndei ã. Dios queteamba tuchi quiatu Jesucristo re. Dios chiirabo tuchi chõ ae re. Jesucristo jẽsichã i i tuchi quiatu quia jẽ. ⁵ Sita turã na ño jẽingo nguiã jẽ abe ùquĩ. Sã Dios chuchua ao ji sita turã je no. Dios chuchua ao ji rã ño jẽ no nde. Jeñee turã mbei quiatu quia Dios je. Jẽ sí chõ jendete jemondo quia ee. Jẽingo bei quiatu quia icúe embaerã. ùquĩ mose ra Dios jẽisi turã mbei Jesucristo rĩ cote. ⁶ Nyebe Dios cheẽ mbesa ji riqui nguiã ñee:

Jesucristo ra amii Zión.

Tuchua i turã na tuchi chõ Jesucristo re.

Sechiirabo tuchi chõ ae re.

Aba queteamba tuchi chõ ae re.

Ae Jesucristo icuate quia nae, ùquĩ mo nda ñee eã.

“Jesucristo rui aico jirichĩ co”, iã nda emo,

i que embesa ji ra. ⁷ Sã mbia mo tuchua ao sita turã je no. ùquĩ sita turã na ño Jesucristo riqui nguiã co. ùquĩ jẽingo Jesucristo icuate ùquĩ. Nyebe jengueteamba tuchi ae riqui nguiã co. Ae Jesucristo icua eãte quia nae, ùquĩ je ra embesa ji cheẽ io tuchi cote. ã ndei embesa ji cheẽ ã:

Ae tuchua aosa quirirõ sita nae, aque quia ra tuchua i turã tuchi cote,

i que embesa ji ra. ⁸ Sã embesa ji riqui ñee no:

Sã sita riqui pãtã i emo cúi je no jẽ.

Embucoi no jẽ,
i que embesa ji ra. Eĩ si chõ nda mbia pãtã i raanguia Jesucristo cheẽ je. Jesucristo cheẽ mumbayã sereãte quia ñene. “Echeẽ mumbasa ra pãtã i raanguia”, i que Dios ñiinda mosenda bei ra.

Dios mbaerã tuchi chõ jẽ nde

⁹ Dios que jẽirabo umbaerã tuchi ra. Sacerdotes rã ño jẽingo nguiã Dios je ùquĩ. Dios que jemingo icúe umbaerã nda. Jẽ mbia mbiirandu randu bei sacua Dios chia turã nii. Ae quiatu que jendirõ itondaru si ra. Jẽingo sacua nyaashĩ Dios rese cote. ¹⁰ Mbia chimbutereãte que jẽ nyii ra. Dios quiato tuchi chõ namo jẽ cote re. Emo ngue ndua eãte quia jendese nyii ra. Dios quia ndua tuchi nguiã jendese co cote.

Dios rimba chõ jẽ nde; nyebe jẽingo turã

¹¹ Achesecua tuchite quia jendese co. Isho ishote jẽingo jendecua si ùquĩ. Ae mbia chosei chosei quia mbae icua nae, ùquĩ ndese ra jemaie maechĩ. Eicuãte riqui nandeaĩ je ùquĩ. ¹² Ae Dios icua eãte quia nae, ùquĩ ndesaa jẽingo turã ño nguia. Ùquĩ ndiqui ñee icua icuãte raque jeni ùquĩ. Jẽicua mose rocoĩ. Ùquĩ nda mae jee jẽturã ndese. Ñee turã jee ra Dios rĩ, Jesús tu mose.

¹³ Mbia rerecua ja cheẽ jemumbayã ño nguia Dios je. Ae ererecua tuchi ererecua ja si nae, aque cheẽ abe jemumbayã ño nguia no. ¹⁴ Sã ererecua tuchi riqui mbia rerecuarã mii jaaja no. Mbia icua mbasi mbasi sacua. Mbia turã ndeaquiato sacua abe no. Ùquĩ ñee abe jemumbayã ño nguia no. ¹⁵ Jẽingo turã ño nguia jẽ. Jẽingo turã mose ra mbia aquiata ñee icua aroneate jẽje. Dios bite ùquĩ. ¹⁶ Jesucristo que jembui mbae ja si cote ra. Jenderecua eãte raque mbae mo cote. —Mbae icua tasaã. Sererecua eãte rei ñene, jenyechĩ ndae. Dios rimba chõ jẽingo. ¹⁷ Jẽingo turã ño nguia mbia ja je. Jenyesequa chõ nguia jendesenda Jesús quiato rese. Jẽireĩ ireĩ jiri Dios si. Mbia rerecua cheẽ nda jemumba mumbachĩ jẽ.

Cristo rã si chõ jẽingo ñimbirãcuã turã mbae rasi je

¹⁸ Mbia rimba je tacheẽ cote. Jenderecua cheẽ jemumbayã ño nguia jẽ. Jẽireĩ ireĩ jiri quia esi jẽ. Jenderecua icua mose abe chõ echeẽ jemumbayã nguia. “Jenderecua turã mose achõ ño echeẽ jemumbayã”, ae eã nguiã jẽje co. ¹⁹ Mbia icua icua ñooño mose nande je, nanderoseĩ nguiãtu chõ nandeico. Dios bite ùquĩ. Dios rĩ nanderoseĩ nguiãtu mose, ebite ùquĩ. ²⁰ Mbae turã jẽsaã saã mbei chõ nguia. Mbia jẽirua nua mose jẽturã nii, jendoseĩ nguiãtu chõ jẽingo. Ùquĩ mose ra Dios ia tuchi jendese. Mbae icua mo nda jẽsaachĩ. Jẽ mbae icua naa mose, Dios biãte ùquĩ. Mbia jẽirua nua mose jẽicua nii, jendoseĩ nguiãtu raque rae, Dios biãte ùquĩ. Jẽicua nii ño ñene. ²¹ Nyebe Dios “jẽingo serui”, i nguiã nande je. Sã Cristo roseĩ nguiãtu tuchi mbae rasi raã mose nande je no. Nande abe nanderoseĩ nguiãtu sacua eraã si. ²² Cristo que mbae icua mo saã eã tuchi ra. Mbia mo ngue embiirĩ iriã tuchi quia ra. ²³ Mbia ñee icua mose Cristo je, ae que ñee icua eã mbei mbia cheẽ ndibishorõ nda. Mbia Cristo mbaasi asi mose, “tasaã se”, iã tuchi que equia ra. “Dios quiareĩ”, i chõ ngue equia ra. ²⁴ Jesús mano mose ira mbuchicuidasa ji rese, nandeicua ndiquicharõ ño ngue mano nguiã. Eraaque rã nandeico sacua mbae icua je chõ ngue re. Nandeico sacua mbae turã ndese chõ ngue re. Cristo mbae rasi raã mose, jembitorõ sacua ño ùquĩ nde. ²⁵ Ovejas quiachã je rã ño ngue jẽingo nguiã nyii. Jenyebi que oso ngasẽ Cristo rea cote ra. Ovejas raarõsa rã ño ae riqui nguiã jẽje co cote. Ae chõ jendeaquiato nguiã co.

3

Jendu cheẽ jemumbayã ño nguia, i cuña je

¹ Mbia ninisi je tacheẽ cote. Jendu cheẽ nda jemumbachĩ jẽ. Jesús quiatoã ndaque jendu. Echeẽ jemumbayã ño. Jendu nda Jesús icua chee cote chã. Jẽingo turã mose ee.

Jê Jesús cheẽ nenei neneinde rocoĩ ee. Jesús nda eicua cote chã. ² Jêingo turã ndese ra jendu mae nyee. Echeẽ jemumbayã mose. ³ —Mbae je nda serete ambarõ na ña, jenyechĩ nda ndua ndua jê. Jêo resenda rese. Jêhui rese abe no. Tiru turã ndese abe no. Jêa uma ji turã ndese abe no. Ûquĩ miĩ ndese chõ nda jêingochĩ ndua beite jê. ⁴ Jeñiangui re quiatu jêingo turã. Jêingo tochi chõ nguia. Ì nda jêturã ua eã mbei jêsi. Ûquĩ nguiatu Dios bite re. ⁵ Sã cuña mo no. Dios quiato cose no. Ûquĩ nguiatu que eturãte riqui uchiangui re quiatu ra. Ngu cheẽ abe mumbayã no. Ndua rocoĩ nguete resenda umbarõsa rese. ⁶ Sã Sara Abraham ñee mumbayã no. Sererecua i ee. Jêingo turã mose, Sara rã nda jê cote. Mbae mo si ra jêsiquichechĩ cote jê.

Jêingo turã ño nguia jeninisi je

⁷ Tacheẽ eninisi rerecua je cote. Jêaquiato chõ jêingo turã jeninisi je. Jeninisi jemingo turã. Jêingo tochi chõ nguia ee. Jê nguia jeãtã jiri esi re. Dios quia eturãte jê ja je re. Jeninisi rese. Dios que jendeco minga nyiese ra. Jeninisi rese. Nyebe jêingo nguiã siqui turã jeninisi je. Ûquĩ mose ra Dios jeñee andu bei, jeñee mose ee.

Mbia icuã icuã mose jêje jêturã mose, jêya chõ jêingo

⁸ Jêingo turã ja chõ nguia jenyue no. Jêya eã jiri jêingo jenyiese no. Hue rĩ ja chõ jêingo ndua ja. Jenyesequa ja chõ nguia nyiese. Jêseteã ño jêingo nyue. ⁹ Mbia icuã mose jêje, jêicuãchĩ nda jê abe ee. Mbia ñee icuã mose jêje, jeñee icuãchĩ nda jê abe ee. Jeñee turã nguiatu quia ee jê. Jêingo serui, i chõ ngue Dios jêje re. Dios ñee turã mbei sacua jeniĩ ño ngue re. ¹⁰ Sã embesa ji riqui ñee no:

Jêingo turãse mose, jeñee icuã eã emo niĩ.

Jêingo chooño sereã mose, jeñee ñooño eã emo je no.

¹¹ Jenyicuasẽ ño nguia mbae icuã si.

Mbae turã ño jêsaã nguia.

Jêturã ño nguia mbia ja je jê.

¹² Ae siqui turã nguia nae, ùquĩ Dios teaquiato bei quia co.

Ûquĩ ñee Dios chandu turã mbei quia co.

Ae siqui quia mbae icuã ndese nae, Dios biã tuchi chõ ùquĩ nde, i que embesa ji ra.

¹³ Jêingo turã mose ¿mañi nda emo mbae icuã naa jêje re? ¹⁴ Mbia icuã icuã mose jêje mbae turã naa mose, jêya tuchi chõ ùquĩ mose re. —Mbae icuã nda asaã ndeje jê, i mose jêje, jêsiquicheã ño esi. ¹⁵ Jesucristo jemingo tuchi chõ nguia jeñiangui re jenderecuarã. Emo ñee mose jêje, jeñee aquiato chõ ee. —¿Mbaerã ereico Jesucristo rese re? i mose emo jêje, jeñee aquiato chõ ee. Jêingo mingue chõ ee. ¹⁶ Jêingo turã mbei. Diosbi rese jêingo bei. Ì nda jêya bei riqui. Ì nda “mbae turã asaã eã ñochĩ”, jenyee eã. Ae ñee icuã icuã nguia jeniĩ nae, ùquĩ nda ireĩ ireĩte quia ucheẽ icuã si cote. Ireĩ ireĩ nda jêingo turã mose Cristo rese. ¹⁷ Mbae rasi jêsaã mose jêturã niĩ, ùquĩ nguiarei Diosbi tuchi. Mbae rasi jêsaã mose jêicuã niĩ, ùquĩ nguiarei Dios biã tuchi. Mbae icuã niĩte quia ñene. ¹⁸ Cristo abe que mbae rasi saã nande je ra. Mbae icuã naande rocoĩ. Ae raque eturã. Mbae rasi que esaã nandeicuã ndiquicharõ nda. Nandemingo sacua Dios rese. Cristo rete que mano nda. Espiritu Turã ngue embuquera si ra. ¹⁹ Aque mose que Cristo si Dios cheẽ nenei nenei mbia aĩ tarõ ji je ra. ²⁰ Ûquĩ ngue Dios cheẽ mumba mumba quia nyii ra. Noé Dios cheẽ nenei nenei mose ee. Dios roseĩ nguiatu tuchi que eriqui mbia riisu isu aque mose ra. Noé siqui bei mose arca raã naa. Aquere que mbia miĩte ique arca ye ra. Ocho que mbia ra. Siqui bei sacua ama ndicuasu mose. ²¹ Sã ama Noé mumbebi minga no. Eĩ si chõ bautismo co no. Nandei mbuchasu mose, aque quia ra nandemingo eã Dios rese. Nandechiã mbitirõ ji mose, aque mose quia ra Dios nandemingo bei cote. Bautismo tuchi chõ ùquĩ nde. ²² Jesucristo quera sire que esi ibate ra. Hue eriqui beite Dios jii hue cote. Mbae ja rerecua tuchi chõ ae cote re. Angeles rerecua. Ibatenda rerecua ja.

4

Mbae jěsaã turã ja

¹ Sã Cristo mbae rasi saã tuchi siqui mose íbii no. Eĩ jenyẽ si chõ nguia ñimbirãcuã nguiaútu mbae rasi raã mose. Ae mbae rasi saã tuchi quia nae, ùquĩ nda mbae ícuã saã eã mbei cote. ² Ae Dios bite nae, ùquĩ ndese ra eriqui bei cote. Ae echoseite quia nae, ùquĩ naa ndocoĩ. ³ Mbia ataque rã tuchi que nandeico nyii ra. Nandeicuã tuchite que eriqui nyii ra. Ae nandechosei quia nae, ùquĩ ndese achõ ño ngue nandeico nyii ra. Nandequiacua quiacua que equia nyii ra. Nandechimbusarei chooño mbei que equia nyii ra. Dios abareã ndese que nandeico ndua tuchi nyii ra. Huee chõ cote. Nandehui que ùquĩ ja si cote ra. ⁴ —¿Mbaerã jěingo bei eã mbae ícuã naa naa urerese re? i nanderesenda ñiinda quia nande je ã. Nyebe eriqui nguia ñee ícuã ícuãte nande je ã. ⁵ —¿Mbaerã ùquĩ jěsaã nde? i chee ra Dios ùquĩ je cote. Dios mae mose mbia chisaã saã ja rese. Aque mose ra Dios mbia mano je abe chisaã ndea ja. Mbia reco abe chisaã ndea ja. ⁶ Ae mano mbia nyii nae, ùquĩ je que Jesucristo Dios cheẽ nenei nenei nda. Eaĩ siqui turã sacua Dios rã si. Erete mano ndaque huiicuã je.

⁷ Achite mbae ñi ua ja a cote. Nyebe jěingo mbae turã naa naa ja bei. Nyebe jěingo ñee ñee mbei Dios je. ⁸ Jenyesequa tuchi quiatu quia jenyese. Ùquĩ mose ra jětesarei jenongue ícuã si. ⁹ Jenongue jěisi turã ño nguia nyoĩ mose jenyuchua. Jěya chõ jěingo eisi mose. ¹⁰ Dios que nandechisaã saana mee nande ae ae je ra. Ùquĩ jěsaã turã turã ño nguia jěataque je. Dios uaquiato mee mose jěje mbae mo naa sacua, ùquĩ jěsaã turã turã ño nguia jěataque je. ¹¹ Emo Dios cheẽ nenei nenei mose, sã Dios cheẽ tuchi chõ esenei senei nguia. Jemo mbae turã naa naa mose uataque je, sã eriqui eraã turã Dios quirãcuã ñi. Ae jěsaã saã nguia mbae nae, Dios je chõ jěsaã. Í nda mbia ñee turã mbei Dios rĩ. Jesucristo rĩ abe no. Sã mbia ñee turã mbei Dios rĩ. Amén.

Mbae ícuã tuutu mose jěje, jěya cho jěingo

¹² Mbae ícuã tuutu mose jěje, “¿mbaerã eriqui seje re?” jenyechĩ nda nyuruirate, Seresenda. Eĩ mbei chõ mbae ícuã nguia tuutu Jesús quiato je. ¹³ Mbae ícuã tuutu mose jěje, jěya chõ jěingo. “Cristo rã si chõ nandeico nguia mbae rasi raã”, jenyẽ chõ nguia ñimbia. Cristo nininya tu mose, aque mose abe nda jěya tuchi chã. ¹⁴ Mbia ñee ícuã ícuã mose jěje Cristo rĩ, coche ñene. Jěya chõ jěingo. Espíritu Turã ño jěichu ichu nguia ùquĩ. ¹⁵ Mbia jembaasi asi chooño mose Cristo rĩ, jěya chõ jěingo. Jěicuã ñi mbia jembaasi asi mose, ùquĩ nguia abe ireĩte re. Jẽ mbia mo íquia mose. Jẽ mbae mo mbuquiachã mose. Jẽ mbia mo mbupaama i mose. Jẽ ùquĩ ícuã mo naa mose, abe ireĩte ùquĩ. ¹⁶ Mbia jembaasi asi mose Cristo rĩ, jěireĩ ireĩchĩ nda ùquĩ mose. Cristo resendate quia jẽ nde. Nyebe jěya chõ jěingo. ¹⁷ Dios ra mae ja chee mbia chisaã ja rese. Achite Dios ñi mae uquiato chisaã ndese a. Nandechisaã ndese chee ra Dios mae. Uquiato chisaã ndese chee. Mañi nda uquiatoã nyisaã je remi. Ùquĩ nguia ra embasi tuchi nandesi quiatu. Dios cheẽ turã nguia ngue eisiãchĩ nguia. ¹⁸ Dios quiato riqui ñimbirãcuãyã arõ arõte mbae ícuã tuutu bei mose ee ã. Dios quiatote raque. Dios quiatoã nguia ra ñimbirãcuãyã tuchi mbae ícuã si. Dios ra emondo chee tata cuasu. ¹⁹ “Mbae rasi jěsaã”, i mose Dios nande je, nandesaã turã ño nguia ee. Mbae turã nandesaã i i chõ nguia ee. Nandereco nandemee tuchi nandeaosa Dios je. Ae ra ucheẽ mbuchebiã mbei nande je.

5

Jesús quiato jětequiato turã ño nguia

¹ Jeñimunua je rerecua ja je tacheẽ cote. Cristo quiato rerecua chõ se no nde. Cristo mbae rasi raã ndese que amae se ra. Cristo nininya nyecua mose, se abe ra aico bei erese cote. ² Ae Jesús quiato siqui quia jendese nae, ùquĩ jětequiato turã nguia. Sã ovejas raarõsa riqui ovejas raarõ turã no. Eĩ jenyẽ chõ nguia Jesús quiato raarõ. Jěteã teã eã ño

nguia mbia mbaaquiato quiatu. Jendua ndua eã ño nguia mbae isiquia rese. ³Jẽingo tochi chõ nguia Jesús quiato chimunua nua je. Mbiacha ra jẽsaã saã techĩ ee jẽ. Jẽingo turã ño nguia eresa rae. Ĩ nda jẽ na sí eriqui. ⁴Jesucristo quiarei mbia reaquiatusa tuchi nande si. Ae tu mose, mbae turã tuchi mo nda emee jẽje premio. Ũquĩ nda ua eã mbei. ⁵Acuanindu je tacheẽ cote. Amei ñee jemumbayã ño nguia jẽ. Jẽ ja jẽataque cheẽ jemumbayã ño nguia jẽ. Jẽingo tochi ja chõ nguia jenyue jẽ. Sã embesa ji riqui ñee no:

Ae ucuasu saã saã nguia nae, Dios biã tuchi chõ ũquĩ nde.

Ae siqui tochi quia nae, ũquĩ je quiatu ra Dios turã mbei riqui, ĩ que embesa ji ra.

⁶Jẽingo tochi chõ nguia Dios je jẽ. Equirãcuã tuchi chõ ae re. Ae ra mbia mumae turã nyee jendese emo mose cote. ⁷Jendua ndua ia eã si jẽhui chõ. Jemee ño Dios je. Ae riqui ndua beite jendese co. Jendeaquiato beite quia co. ⁸Jeñimbaaracua chõ nguia jẽ. Jẽtesa bei chõ nguia jẽ. Aba checuayã nderecua riqui ngata beite co jẽ. “Mbia tambũcuã ĩcuã”, ĩ beite equia co. Sã nyacua no. Sã nyacua risha riqui ureĩ mbocheite “mbae tau” ĩ no. ⁹Aba checuayã nderecua jẽsiquisã ño nguia jenyese. Dios jẽicua tuchi chõ nguia jeñiangui re. Sã jendesenda ishonda ja riqui mbae rasi raã tuchi no. Jẽ na si no. ¹⁰Sã Dios turãte riqui nande je no. Mbae rasi ra jẽsaã ndaque nyii. Aquere ra Dios jembitirõ cote. Jembirãcuã tuchi cote. Dios sí chõ ngue ñee nguiã nande je. “Taemingo bei serese ibate Jesucristo rĩĩ”, ĩ nguiã nande je. ¹¹Dios quiarei equirãcuã mbei. Eturã mbei. Amén.

Pedro ñee hui bei sacua cote

¹²Co ambesa quia jẽje co. Jemingo ĩ ĩ sacua Dios rese. Jembaaquiato sacua Dios turã niĩ. Jẽingo bei chõ nguia erese. Co ambesa mondo quia jẽje aque. Silvano ndese aque. Jesús quiato turã tuchi chõ Silvano nde. Nanderesenda re. ¹³Jesús quiato Babilonia jenda saludos mondo quia jẽje aque. Dios chiirabo chõ ã nde. Jẽ na si. Marcos abe saludos mondo quia jẽje aque no. Seririĩ na ño aico nguiã ee co. ¹⁴Saludar jenye turã turã ño jenyue mambi. Jenongue ritii abe jẽsiite ite chõ nguia mambi. Jesucristo quiato jate quia jẽ nde. Sã jẽya beite riqui. Amén.

SEGUNDA CARTA DEL APOSTOL SAN PEDRO

Pedro ucheë mbesa mondo Jesús quiato je

¹ Simón Pedro chõ se re. Jesucristo rimba chõ se re. Jesucristo chimbaaquiatu chõ se re. Aico co mbesa mbesa jêje co. Ure rã si chõ jêingo nguiã Jesucristo icua ùquĩ. Nandebi tuchi Jesucristo icua mose. Dios turã tuchi nandemingo mose Jesucristo rese. ² Sã Dios turã ndiqui tuchi jendese. Sã Dios jembia tuchi mingo. Jesucristo jêicua i i tuchi bei oso quia.

Jeñimbaaquiatu i i tuchi Dios riĩ

³ Jesucristo nandeicuate quia ã. Nyebe Dios riqui nguiã mbae raã ja tuchi nande je co. Nandemingo bei sacuaã. Nandeico sacuaã erã sí. Uquirãcuã je eriqui mbae raã ja tuchi nande je co. Uturã ngue emee nande je ra. ⁴ Dios que ucheë turã mee nande je ra: —Co tasaã jêje. ã tasaã jêje. Co abe, i tuchi que equia nande je ra. Ûquĩ ngue esaã ja nande je cote ra. Jesucristo rã si que nanderaã nda. Ae mbae icuaã mbia chosei chosei quia nae, ùquĩ si eriqui nanderiquisã quisã co. ⁵ Jêingo Dios icuate ùquĩ. Jêingo turã ño nguia jê. Jeñimbaaquiatu i i tuchi quiatu quia Dios riĩ jê. ⁶ Jendeco jêingo turã ño nguia i co jê. Jêingo mingue chõ nguia jê. Dios rã si chõ jêingo jê. ⁷ Jêingo turã ño nguia jenyue. Jenyesequa chõ nguia jenyiese no. ⁸ Eĩ jenyese mose, eturãte ùquĩ. Eĩ jenyese i i tuchi chõ nguia jê. Ûquĩ mose ra Jesucristo jêicua chooño eã. Mbae ra jêsaã saã tuchi quia ee. ⁹ Eĩ jenyese eã mose, mbia resayã na ño jêingo nguiã ùquĩ. Eĩ jenyese eã mose, jêtesarei chõ ndei equia jeñia irei ji si ùquĩ. Jesús jêicuaã cose ndare mbutiã mose. ¹⁰ Ûquĩ jesaã saã tuchi chõ nguia jê. Jê ùquĩ naa mose, jê sí chõ nda jenyicua quia. “Dios chiirabo chõ nande re”, jenyese tuchi ra equia. Jêhui eã mbei ra equia Dios si cote. ¹¹ Dios ra jêisi tuchi mingo Jesús récuua cote. Huee ra jêingo bei erese.

¹² Nyebe ra aico bei jemundua ndua ùquĩ ndese. Jêicuate raque. Jêingo turãte raque Dios cheë ndese. ¹³ Coche aico rei jemundua ndua ùquĩ ndese a. Sereco siqui mose a ra aico jemundua ndua bei ùquĩ ndese. ¹⁴ Jesucristo que ñee seje ra: —Ereico arete eã nda íbii, i que sembiirandu ra. ¹⁵ Taemundua ndua bei erese. Í nda jêtesareia mbei esi semanonde abe.

Se sí amae Jesucristo rese, i Pedro

¹⁶ Jesucristo quirãcuã ngue uresenei senei tuchi quia jêje ra. —Jesucristo ra tube íbii, ure tuchi que equia jêje ra. Ichoiñosa reã ñeetuchi chõ ùquĩ nde. Mbia ñee ñooño je eã tuchi chõ ùquĩ nde. Se sí chõ ngue amae Jesucristo nininya rese ra. ¹⁷⁻¹⁸ Dios que unininya mee ee sita íbátee ereco mose ra. Se abe reco mose huee que ra. Serésaa que Dios unininya mee Jesucristo je ra. —Seriirĩ ño co re. Sechesequa chõ co re. Seyate erese, i que Ibatenda ñee aque mose ra. Echeë ngue achandu se abe ra. ¹⁹ Eĩ sí tuchi que Dios cheë mbuchecuaa chimbesa nyii ra. Echeë mbesa ji chooño eã ño ùquĩ nde. Jêingo tuchi quia echeë mbesa ji rese. Mbae resaesa tuchi chõ echeë mbesa ji re. Sã tata rendi riqui itondaru resaete nyaashĩ nyee no. Jêingo tuchi mose echeë mbesa ji rese, Cristo ra jendique tesae tuchi quia jêje. Sã nyasitata riqui nanderesae no. ²⁰⁻²¹ Dios cheë mbuchecuaa mo ngue ñee ñooño eãte quia emo mose ra. Ucheë ae que embesa mbesa eãte quia ra. Espíritu Turã ño ngue embucheë nguia ra. Espíritu Turã ño ngue Dios cheë mbesa mbesa uquia quia ee ra.

2

Ae mbia mbiirĩ irĩ nguia embaaquiatu quiatu mose

¹ Mbia mo ngue Dios cheẽ mbuchecuada saã ñooñote quia cose ra. Espíritu Turã ae que embucheẽ eã nda. Eĩ sí ra emo jembĩĩrĩ irĩ ñooño name. Ñee ñooño nda equia Dios rĩĩ jėje. Hui huíte chõ nda equia Jesucristo si. Ae mano nguia erĩĩ. Nyebe ra Dios ũquĩ mbutiã asi. ² Mbia ra siqui tuchi mbae icuã ndese ũquĩ ñee nguire. Mbia ra siqui chooño ño cuña mo ndese ũquĩ ñee nguire. Nyebe ra mbia ñee icuã icuã Jesús cheẽ turã ñiĩ. ³ Ũquĩ nda mbae isiquia choosei oseĩ tuchi chõ nguia jembae. Nyebe ra jembaaquiatu icuã icuã. Dios que ñee ũquĩ ñiĩ coose ra. —Ũquĩ nda ambasi tuchi je, i que ra. Achite ũquĩ ñi a cote.

⁴ Angeles mbae icuã naa mose, ũquĩ nyee que Dios tiisu isu áte quia ra. Ecuã ji que emombo tata cuásuu ra. Itondáruu que emombo ra. Siqui bei sacua huee, Jesús tu chee mae eicuã ndese. ⁵ Mbia cose ndare abe que Dios tiisu isu áte quia ra. Noé mosenda. Ũquĩ ngue eicuãte riqui ee ra. Nyebe que Dios ama mbuchaaqui tuchi ee ra. Ama mbicuasu mbia iquia ja sacua. Noé miĩ ngue Dios iquia eã nda. Mbia siete rese. Dios cheẽ nenei neneisate quiatu ngue Noé nde. ⁶ Sodoma jenda abe que Dios tiisu isu áte quia ra. Gomorra jenda abe no. Mbia icuã tuchite quiatu ngue re. Nyebe Dios ũquĩ ndei ja nguiã tata je. Echuchua ja resebe. —Eĩchĩ nda nande abe je re, nandeico eã mose erese, i sacua mbae icuã. ⁷ Lot miĩ ngue Dios iquia eã nda. Eturãte quiatu ngue eriqui nguiã Dios je. Eya eãte que eriqui mbae hue jenda mbae icuã naa naa mose ra. ⁸ Mbia mbae icuã naa naa mbei mose que Lot ia eã mbeite riqui ra. Ae miĩ ño ngue echiã turã Dios je ra. Nyebe Dios ae miĩ iquia eã nguiã. ⁹ Ae siqui beite quia Dios rese nae, Dios riqui ũquĩ ndeaquiatu beite co. Mbae icuã jea je esi tã i mose ee. Ae mbae icuã saã nguia nae, ũquĩ nda Dios mbasi tuchi. Jesucristo ra tu chee mae eicuã ndese. ¹⁰ Ae siqui quia mbae icuã ndese ubi nae, ũquĩ nda Dios mbasi tuchi. Ae aba cheẽ mumba quia, ũquĩ abe ra Dios mbasi no. Ae eĩ ñooñote quia mbae je nae, ũquĩ. Ae ñee ñooñote quia mbae ibatenda je nae, ũquĩ abe no. ¹¹ Mbae ibatenda rĩĩ ngue ángeles ñee icuã eãte quia Dios je ra. Angeles quirãcuãte raque mbae si. ¹² ã mbae quiarei mbae quiaa riinda rã tuchi. Ndua turã eã mbae rese. Siqui chooño. Ñee icuã ñooño mbae icua rocoĩ. Mbae quiaa riinda rã ño nda ã mano cote. Dios ra eiquia tuchi. ¹³ ã nda mbae rasi saã tuchi quia cote. Ubi icuã miĩ ndese chõ eriqui nguiã ndua ã. Jembĩĩrĩ irĩ ño nguiã ã. Quiaru chooño ño nguiã jendese ã. Jesús quiato raã ñooño jėje. Aba ireingua tuchi chõ ũquĩ nde. ¹⁴ Maeño aronea cuña mo ndese. Hui aroneate equia mbae icuã si ã. Ubichõ aroneate equia cuña iquia iquia chooño je rese ã. Mbae oseĩ oseĩ jate equia ã. Dios ra embasi tuchi cote. ¹⁵ Ishote eriqui Dios si ã. Nyĩcuasẽ equia Dios si ã. Sã Balaam ndiqui nyĩcuasẽte esi no. Beor rĩĩrĩ. Sã mbae icuã naa mbae isiquia isi nonde no jẽ. ¹⁶ Sã burra ñee asite ee no. “Mbae icuã tasaã”, i mose ndua ndua. Sã mbae icuã naa eã burra ñeende ee cote no.

¹⁷ Icuã iru rã ño ã mbae re. Sã quirĩrĩã ndiqui ibeishĩ mbucuatate no. Eĩ si chõ ã mbae re. Hue bei eã chĩ. Nyebe ra Dios emombo bei itondáruu. ¹⁸ Uchisaã mbae icuã ñi ñee ñee ja mbae je. Ucuasu raã naate equia ã. Mbia mbĩĩrĩ irĩ mbeite equia mbae icuã je ã. Ae hui ramo ndei mbae icuã si nae, ũquĩ abe mbĩĩrĩ irĩte equia mbae icuã je ã. ¹⁹ —Jẽingo mose urerese, jẽingo turã ndae, i bei rei equia mbae je ã. Mbae icuã nimba sí chõ ñee ñee nguiã ee ũquĩ. Ae rui nandeico quia nae, ũquĩ nimba quiatu nande re. ²⁰ Sã emo Jesucristo icua raque nyii no. Sã mbae icuã naa eã ndaque ee aque mose no. Mbae icuã embĩĩrĩ irĩ mose ũquĩnde, eicuã tuchi ra cote. Mbae icuã nimba tuchi ra ae cote. Ñiinda si. ²¹ Dios quia nda ũquĩ icuayã mbei nyii re chã. Dios icuare quiatu ngue hui nguiã echeẽ si. ²² Siqui mbĩĩrĩ ndaque Jesús rese. Hui esi aquere cote. Sã ñooño ndiqui ñemo ndaque no. Sã oso raque ucúẽ ndecha no. Nyebi jei chõ u ucúẽ u cote. Sã teasu socoi mo ndiqui raque nyasu no. Aquere ñimoo moo ño utuchu je cote. Eĩ ño mbae re, ae siqui juate quia Jesús rese. Aquere siqui jei chõ mbae icuã ndese.

¹ A aico segunda carta mbesa jêje a. Jemundua turã sacua ño ùquĩ nde. Ae acheẽ jêje nyii nae, ùquĩ ndese jemundua sacua ño aico nguiã ã mbesa jêje a. ² Ae Dios quiato senei senei mbia je nyii nae, ùquĩ ndese jendua. Ae Jesús chimbaaquiatu ñee mbia je nae, ùquĩ ñee jemumbayã ño. ³ ã ndese jendua: Jesucristo tu nonde ra mbia riqui iquia chooño Dios je. Ñee icuã icuã nda equia Dios je. Ae ebite mbae icuã nae, ùquĩ achõ ndese chõ nda eriqui. ⁴ Ûquĩ nda ñee jêje: —Sã Jesús tu áte no jê. Sã ucheẽ mbuchebi chõ jê. Sã eĩ mbei chõ Dios chisaã ima jê, i ra ùquĩ ñee icuã icuã jêje. ⁵ Cose ndare rese nduayã. Dios que ibei chao ucheẽ je chõ cose ra. Ibi abe que echao i ite re ra. ⁶ Aquere que Dios ama mbicuasú ra. Mbae iquia ja nonde cote. ⁷ Dios riqui ibei rerecoquiatu co. Ibi abe no. ã nandeico irõ erese ã nae, Dios ra emendi cote. Aque mose ra mbia Jesús quiatoã oquei ja.

⁸ Co abe rese jendua, Seresenda: Nyaashĩ mii na ño mil años Dios je re. Mil años na ño nyaashĩ mii Dios je no nde. ⁹ —Jesús ra tu áte rei no. Ucheẽ embuchebi rei quia mambi, i raque emo emo nguia Jesús riĩ ã. Ico mingüete equia mbia je pe. —Emo nda quiachãya Dios si chã. Siqui ja nda erese chã, i equia erisu isu pe no. Nyebe eriqui nguiã tu jei eãte. ¹⁰ Mbia mbuate ra Jesús ru. Sã mbae mbuquiachãsa riqui tu itondiite mose no. Eĩ si ra Jesús u mbia mbua. Ûquĩ mose ra ibei ua cote. Mbae rieu ra aba mundi tuchi. Nyasitata ra membe. Ibi abe ra oquiei tuchi. Mbae ja ra oquiei ibi jenda.

¹¹ Nyebe Dios nandesiiichã tuchi quiatu quia. Dios rã si quiatu nandeico mbae turã ndese. ¹² Jesucristo ru jenyosei quiatu quia. Ae Dios bite nae, ùquĩ ndese quiatu jêingo. ã nda Jesucristo ru jei. Ûquĩ mose ra ibei oquiei ja. Nyasitata abe ra membe tata je. ¹³ Aquere ra Dios ibei mbiasu cote. Ibi abe ra embiasu ucheẽ nguire no. Ûquĩ ño nandesaarõ arõ nguiã ã. Ûquĩ mose ra mbae turã achõ cote.

¹⁴ Nyebe jêingo turã ño Dios rese. Mbae icuã je ra jeñimbiicuãchĩ jê. Jeñimbiicuã eã mose ra Dios iate jendese eru mose chã. ¹⁵ Dios siqui mingüete quia mbia je co. Mbia rirõ sacua eicuã si chõ ùquĩ nde. Eĩ si chõ ngue Pablo abe embesa nguiã jêje no. Ae Dios ñee Pablo je nae, ùquĩ sí que Pablo mbesa jêje ra. Nanderesenda tuchi chõ Pablo re. Nandehesecua chõ nguiã erese ã. ¹⁶ Pablo carta mbesa mbesa bei mose, mbia mundua ndua sacua ã ndese chõ ñene. Aba chiicuayãte raque Pablo chimbesa emo emo. Ae eaquiataate Dios rese nae, ùquĩ Pablo cheẽ nyabi chabi chõ nguiã. Sã embesa ji ataque abi abi no. Nyebe ùquĩ sí chõ ñimbiicuã icuã nguiã ùquĩ. ¹⁷ Sechesecua, a aico jembirandu jei a. Mbia icuã jembui eã sacua Dios si. Mbia icuã nda jembirĩ irĩchĩ jê. Jêingoquiatu tuchi quiatu jê. Huee jêingo turãte Dios rese namo hue. ¹⁸ Jesucristo rei nandererecua tuchi. Jêicua i i tuchi quiatu jê. Jenyesequa i i tuchi quiatu erese jê. Ae que nanderirõ mbae icuã si ra. Etura mbeite que eriqui nande je ra. Sã mbia ñee turã mbei quia erĩ. Amén.

PRIMERA CARTA DEL APOSTOL SAN JUAN

Mbia mingosa

¹ Ae siqui quia mbae tiã mose nyii nae, aque tasenei jêje. Ae riqui beite namo co no. Ae cheẽ ngue urechandu chandu bei quia ra. Uremae mae mbei que equia erese ra. Ureoco oco que equia erese no nda. Jesucristo, i equia ee. Dios cheẽ, i abe equia ee. Mbia mingosa, i abe equia ee no. ² Mbia mingosa que siqui ngu rese nyii ra. Tu que nyecua ure je íbii cote ra. Uremae ngue equia erese ra. Uresenei senei equia jêje ã. ³ Ae rese uremae nae, aque uresenei senei nguia jêje ã. Ae urechandu nae, ùquĩ abe uresenei senei nguia jêje ã. Jê abe nda jêingo urerese chã. Sã ureico Dios rese ure no. Jesucristo abe rese. ⁴ Jêya tuchi sacua ño ureico nguia ã mbesa jêje ã.

Dios rei nyaashĩ na

⁵ Jesucristo que urembiirandu Dios rese nyii ra. Ùquĩ si chõ uresaã saã nguia jembiiirandu sacua ã: Dios rei nyaashĩ na. Itondaru rã jiri jiriã tuchi chõ ae re. ⁶ “Dios resenda rei se” nandechĩ nda nandeico eã mose erui jê. Nande i mose, nandechẽ ñooño ño nguia ùquĩ. Nande i mose, mbia mbiĩrĩ irĩsa chõ nande re. ⁷ Dios rã nandeico mose nyaashĩ, nandeico turã ño nguia nandechiese ùquĩ. Dios rã nandeico mose nyaashĩ, Jesús ruqui nandeicua mbutiã ja quia nandesi ã no. ⁸ “Mbae icua asaã eãte rese” nande i mose, nandechimbiĩrĩ irĩ ño nguia ùquĩ. Nande i mose, ñee ñooñosa tuchi chõ nande re. ⁹ Nandeicua nandesenei mose Dios je, ae ra eturã nande je. Nandeicua nda embutiã ja nandesi ucheẽ nguire. ¹⁰ “Mbae icua asaã eãte resẽ” nande i mose, “Dios ñee ñooñosa” nandesã ño nguia ee. Nande i mose, Dios cheẽ iqueã ño nguia nandechiangui re ùquĩ.

2

Jesús ñee turã Dios je nanderĩ

¹ Mbae icua jesaã eã sacua ño aico nguia co mbesa jêje co, seriĩrĩ. Jemo mbae icua naa mose, Jesucristo ra ñee turã Dios je aque rĩ. Eicua mbutiã sacua esi. Jesucristo quia rei eturã mbei. ² Jesucristo rĩ ño Dios nandeicua mbutiã nguia nandesi. Ae rei nandeicua ndibishoronda. Nande miĩ icua ndibishoronda eã ño ñene. Mbia ja icua ndibishoronda chõ ñene. ³ Nande Dios cheẽ mumba eã mose, “Dios aicuate quia co” nande ra nandechiangui re cote. ⁴ “Dios aicuate quia co” i mose emo, Dios cheẽ mumba mose, ñee ñooño je chõ ùquĩ nde. ⁵ Ae Dios cheẽ mumba eãte nae, ùquĩ nguiatu nyesequate nguia Dios rese ùquĩ. ⁶ Ae “aico tuchi Dios rese co” i quia nae, sã ùquĩ siqui tuchi quiatu quia Jesús rã.

Dios cheẽ yasu

⁷ Dios cheẽ yasu eã ño ambesa nguia jêje co, Sechesecua. Dios cheẽ ñiinda sí chõ ambesa mbesa nguia jêje a. Jê echeẽ mumbayã sacua. Ae jeñandu nyii nae, ùquĩ. ⁸ Jêingo Jesucristo icuate ã cote. Nyebe eyasu raãte eriqui nguia jêje. Jesucristo que nyesecua mbia rese ra. Jê abe jêingo nyesecua jenyiese ã cote. Itondaru eãte riqui jêje ã cote. Nyaashĩ ja chõ jêje cote re. ⁹ Nyaashĩ aico co, i mose emo, nguesenda ucuãyã cuãyã mose, itondaru bei chõ siqui nguia ùquĩ je aque. ¹⁰ Ae nyesequate quia nguesenda rese nae, ùquĩ ndiqui nyaashĩ mbei ùquĩ. Ùquĩ nda siqui icua eã. ¹¹ Ae nguesenda ucuãyãte quia nae, ùquĩ ndiqui itondaru bei ùquĩ. Itondaru eresa chati chõ nguia ùquĩ. Nyebe eriqui nguia ngueco icuayãte ùquĩ.

¹² Jesucristo rĩ ngue Dios jêicua mbutiã jêsi ra, Seriĩrĩ. Nyebe aico nguia co mbesa mbesa jêje a. ¹³ Ae siqui beite quia nyii nae, aque jêicuate quia ùquĩ, Mbiaru. Nyebe aico

nguiã co mbesa jêje a. Jêingo mbia mbiirĩ irĩsa riquisã quisã ũquĩ, Acuanĩdu. Nyebe aico nguiã co mbesa jêje a. Nanderu jêicuate quia ũquĩ, Echo. Nyebe aico nguiã co mbesa jêje a. ¹⁴ Ae siqui beite quia nyii nae, aque jêicuate quia ũquĩ, Mbiaru. Nyebe aico nguiã co mbesa jêje a. Jêirâtâte jêingo jeñiangui re ũquĩ, Acuanĩdu. Dios cheẽ ngue jêisi turâte jeñiangui re ra. Jêingo mbia mbiirĩ irĩsa riquisã quisãte ũquĩ. Nyebe aico nguiã co mbesa jêje a.

¹⁵ Jenyesequate chĩ nda mbae ibi jenda ja rese jê. Mbae ibi jenda ja rese jenyesequa mose, jenyesequa eãte ra Dios rese. ¹⁶ Ibi jenda icuã ja chõ ñene. Nanderesa mbae icuã oseĩ oseĩ mose, eicuãte ũquĩ. Nanderete abe mbae icuã oseĩ oseĩ mose, eicuãte ũquĩ no. Nandecuasú abe nandesaã saã mose, eicuãte ũquĩ no. Ibi jendachõ ño ũquĩ nde. ¹⁷ Mbae icuã nda ua ja ibi jenda. Ae mbia choseĩ choseĩ quia ibi jenda nae, ũquĩ abe ra ua no. Ae Dios cheẽ mumba eãte quia nae, ũquĩ nguia ra siqui bei.

Cristo ucuãyãsa

¹⁸ Achite mbae ñi ua ja a, Seriiĩ. Cristo ucuãyãsa ra tu mbia mbiirĩ irĩ, i que jeñandu nyii, ngaẽ ngaẽte que cote ra. Nyebe ureico nguiã ñee, “mbae ra ua ja cote” i. ¹⁹ Cristo ucuãyãsa tubiriãte riqui ã. Nanderesenda rei que nyii ra. Nanderesenda chooño ño ngue ra. Nanderesenda tuchi mose, eĩ nda hui ãte rei nandesĩ. Hui chõ ngue echoi uresi ra. “Eresenda eã ño eriqui re” i sacua mbia. ²⁰ Jêje quiatu que Cristo Espĩritu Turã mondo nguiã. Nyebe jêingo nguiã mbae icua jate ũquĩ. ²¹ Ae bei, jenyẽ eã ño nguiã ichõĩñosa je ũquĩ. Dios quia ichõĩñosa reã tuchi re. Dios cheẽ jêicuate quia ũquĩ. Nyebe aico nguiã ã mbesa mbesa jêaquiatu je a. Eaquiataũ je eã aico nguiã ã mbesa mbesa a. ²² ¿Aba chõ ichõĩñosa chã? “Dios chimondo eã ndei Jesús” ae i quia nae, ũquĩ ño ñene. Ae siqui sereãte quia Paba rui nae, Jesús abe rui nae, Cristo ucuãyãsa chõ ũquĩ nde. ²³ Ae siqui sereãte quia Dios riirĩ ndui nae, Dios abe rui eriqui ãte ũquĩ. Ae Jesús isi turã nguia nae, eru abe eisi turã ño nguiã no. ²⁴ Ae rese jêingo jirandu beite nyii nae, ũquĩ ndese jêingo bei. ũquĩ ique tuchi mose jeñiangui re, jêingo bei ra Dios riirĩ ndese. Eru rese abe no. ²⁵ Taemingo bei, i que nande je ra.

²⁶ Ae jembiiĩ irĩ serĩte quia nae, ũquĩ ñi ño aico nguiã ã mbesa mbesa jêje. Jembiiĩrandu sacua. ²⁷ “¿Aba quiatu ra nandembaaquiatu quiatu re?” jenyẽ aroneate quia ũquĩ. Espĩritu Turã ndiqui tuchi jeñiangui re jembaaquiatu quiatu ũquĩ. Jesucristo que emondo jêje ra. Ae chõ jembaaquiatu quiatu nguiã mbae ja rĩĩ ũquĩ. Ñee ñooñoa tuchi chõ ñene. Cristo rese jeĩ ngo bei, Espĩritu Turã ñee nguire.

²⁸ Seriiĩ, jêingo bei equia erese jê. Nandesiquicheã nda esi eru mose chã. Nandeiĩ ngũĩã nda eru mose no ña. ²⁹ Jesucristo quia rei eturã tuchi. Mbae raã turã ja bei. Ae mbae saã turã mbei quia nae, eriirĩ ño ũquĩ nde.

3

Seriiĩ, i Dios nande je

¹ Dios que nyesequa tuchite nanderese ra. Seriiĩ i tuchi que nande je ra. Nyebe mbia Dios quiatoã ndiqui nandeicua eãte ã. Dios abe icua eãte equia ã. ² Dios riirĩ ndei nande, Sechesequa. Dios ra nandembuturã tuchi core. ũquĩ nandeicua eãte raque quia ã. Jesucristo tu mose, nandemae tuchi ra erese cote. Erã si ra nandeico tuchi cote. ³ “Jesucristo ra tu sembuturã” ae i icuate quia uchiangui re nae, ũquĩ ndiqui siqui turã tuchi ũquĩ. Jesucristo rã sí.

⁴ Mbae icuã naa naasa rei Dios cheẽ mumbasa. Eicuãte Dios cheẽ mumba. ⁵ Jesucristo que tu mano nandeicua mbutiã nandesĩ ra. Mbae icuã ngue esaã jiri jiriã tuchi quia ra. ũquĩ jêicuate quia ã. ⁶ Ae siqui quia Jesucristo rese nae, ũquĩ nda mbae icuã mo saã eã. Ae siqui quia mbae icuã ndese, ũquĩ nguia eicua eãte nguiã. ⁷ Seriiĩ, emo nda jembiiĩ irĩchĩ ñee ñooño jêje jê. Ae mbae turã saã saã nguia, eturã ño ũquĩ nde. Jesucristo rã sí chõ ũquĩ

nde. ⁸ Ae mbae icuã saã saã nguia, diablo rimba chõ ùquĩ nde. Diablo riqui mbae icuã naa naa mbei co. Cose ndare bei. Diablo chiao mbuquiachã sacuã ño ngue Dios riirĩ ndu ra. ⁹ Nande Dios riirĩ mose, mbae icuã nandesaã aroneate. Dios quiatu ngue ngueco mee nguia nande je. Nyebe nandeico nguia mbae icuã naa aroneate ã. Eriirĩte quia nande re. ¹⁰ Ae Dios riirĩ nae, ae Dios riirĩã no nae, ùquĩ abe aba chiicuate. Emo nyesequa eã mose ngõngue rese, diablo riirĩ ño ùquĩ nde. Emo mbae turã naa naa eã mose, diablo riirĩ ño ùquĩ no nde.

Nandehesecua chõ nguia nandechiese

¹¹ Cose ndare bei que jẽingo ã andu ra: nandehesecua bei chõ nguia nandechiese. ¹² Caín na nda jẽingochĩ jẽ. Diablo resenda chõ ae re. Nyebe ngõngue iquia nguia. ¿Mbaerã ño ngõngue iquia chã? Echisaã saã icuãte quiatu ngue eriqui nguia. Enongue chisaã nguiatu ngue eturãte riqui nguia. ¹³ Jesús quiatoã jẽucuãyã mose, jenyururate chĩ nda mae erese jẽ. ¹⁴ Nanderaaque rã eã ño nandeico nguia ã cote. Dios nandereco mingo tuchi quia co cote. Nandenongue rese nandeico nyesequa ã cote. Nyebe nandeico nguia “nanderaaque rã eã ño nandeico nguia ã cote,” i. Ae nyesequa eãte quia ngõngue rese, eraaque rã mbei tuchi chõ ùquĩ ndiqui nguia ùquĩ. ¹⁵ Emo ngõngue ucuãyã mose, mbia iquiasa rã tuchi chõ ùquĩ nde. Dios ra aba iquiasa mingo bei eã. ¹⁶ Jesús que mano nande je ra. Nyebe nandeico nguia “Jesús riqui nyesequate nanderese co” i. Eĩ nande quiatu quia nyesequa nandenongue rese. Nandeteã teã eã ño mano sacuã nandenongue rĩ. ¹⁷ Nandeteã tuchi aroneate nandembae rese mbaecha reã mo je. Emo ia eã eã mose mbaecha reã mo ndese, ¿mañi ño nda equia nyesequa Dios rese uchiangui re? ¹⁸ “Aico nyesequate mbia rese co” nande chooñochĩ nda equia jẽ. Mbae turã quiatu nandesaã saã tuchi quia ee.

Nandereĩ ireĩ eãte equia ñee Dios je ã

¹⁹ Nandehesecua mose mbia rese, Dios resendate quia nande re. Nandechiã ngoi turãte. ²⁰ Nandechiangui renda nandemundua ndua mose nandeicuã ndese, Dios quia rei equirãcuã tuchi ùquĩ si. Ae quia mbae icua jate nguia. ²¹ Nandechiangui renda nandemundua eã mose nandeicuã mo ndese, nandereĩ ireĩ eãte quia ñee Dios je ã. ²² “Mbae mo embu seje” nande mose Dios je, mondo ra nande je. Echeẽ nguia nandemumbayãte nguia ã. Nyebe ra emondo nande je. ²³ ã ndei Dios cheẽ ã, nande emumbayã sacuã ã: “Serucucha jẽicua Jesucristo jẽ. Jenyesequa chõ jenyiese Jesucristo cheẽ nguire jẽ”, i Dios quia nande je co. ²⁴ Nande echeẽ mumbayã mose, nandeico beite quia erese ã. Ae abe riqui beite nanderese co. Espiritu Turã Dios mondo quia nande je nae, aque chõ nandembiirandu nguia ùquĩ ndese. —Dios riqui beite jeñiangui re co, i Espiritu Turã nguia nande je co.

4

Eĩ nande ra Dios quiato icuã; Dios quiatoã abe icua

¹ —Aico Dios cheẽ nenei nenei co, i ja jate raque mbia quia ã. Ñee ñooñote quiatu nguia ã. ùquĩ ñee nda jẽisi chooñochĩ nguia jẽ. —¿Ma Dios cheẽ nenei neneisa tuchi ma nde? jenyete tuchi rã eicua nyii. ² “Jesucristo que tu ibate si mbiarã nda” i mose ùquĩ, Espiritu Turã ndiqui erese ùquĩ cote. Eĩ jenyete ra eicua. ³ “Jesucristo que tu mbiarã nda” i eã mose, Espiritu Turã siqui eã tuchi chõ nguia erese. Cristo ucuãyãsa chõ ùquĩ nde. Se rei Cristo, ichõiño ño nguia ã. Cristo ucuayãsa ra tu, i jeñandu quia nyii nae, aque riqui a cote. ⁴ Dios resenda rei jẽ, Seriirĩ. Ae siqui jeñiangui re co nae, ae quia rei equirãcuã tuchi ibi jenda si. Ae Dios cheẽ senei ñooño nguia nae, jẽ quiatu que jẽquirãcuã tuchi ùquĩ si ra. ⁵ Dios quiatoã ño ùquĩ nde. Ibi jendachõ ño ùquĩ nde. Ibi jendachõ ñi ño eriqui nguia ñee mbia je. Mbia ibi jenda achõ ño echeẽ ñandu nguia. ⁶ Nande quiatu Dios resenda tuchi re. Ae Dios icua quia nae, ùquĩ ndiqui nandechẽ andu ùquĩ. Ae Dios icua eãte quia nae, ùquĩ

nguiatu nandechē andu sereāte nguiā ũquĩ. Eĩ nande ra Dios quiato icua. Dios quiatoã abe icua.

Dios nyesequa tuchi mbia rese

⁷ Sechesequa, nandechesequa ja chõ nandechiese jẽ. Dios chõ nandembuchesequa nguiā nandechiese. Nandechesequa mose nandechiese, Dios riirĩ ño nande re. ũquĩ mose chõ nandeico nguiā Dios icua ã. ⁸ Nandechesequa eã mose nandechiese, ã nguia nandeico nguiā Dios icua eãte ã. Dios quia siqui nguiā nyesequate nanderese co. ⁹ Dios que nguiirĩ miĩ mbu íbii ra. Nandemingo bei tuchi sacua erĩ. Nyebe nandeico nguiā “Dios riqui nyesequate nanderese co” i. ¹⁰ Dios ae nyesequa aquiatute. Nande rane nguia nandechesequa eãte nguiā erese. Ae rane nguiatu ngue nyesequa nguiā nanderese. Nyebe nguiirĩ mondo nguiā nandeicua ndiquicharõ sacua. ¹¹ Sechesequa, Dios nyesequa tuchite quia nanderese co resẽ. Nyebe nande abe quiatu nandechesequa nandechiese. ¹² Nandechesequa mose nandechiese, Dios riqui tuchi nandechiangui re co. Dios riqui nandembuchesequa tuchi nandechiese co. Aba mo mae eã ndaque erese.

¹³ ã nandeico tuchi Dios rese ã. Ae abe siqui tuchi quia nandechiangui re co. Espiritu Turã ngue Dios mondo nande je, ae chõ nandembiirandu nguiā ũquĩ ndese co. ¹⁴ Dios que nguiirĩ mondo mbia rirõ ja sacua huiicua si ra. Uremae ngue erese ra. ã ureico erenei nenei ja mbia je ã. ¹⁵ “Jesús rei Dio s riirĩ” nande i mose, Dios riqui tuchi nandechiangui re co. ũquĩ mose nande abe nandeico tuchi erese ã. ¹⁶ Dios riqui nyesequa tuchite nanderese co. ũquĩ nandeicua tuchi quia ã cote. Nandechesequa bei mose Dios rese, ã nandeico tuchi erese ã. Ae abe riqui tuchi nandechiangui re co. ¹⁷ Nandeico mose Dios rese, ae riqui nandembuchesequa uchiese co. Nandechesequa tuchi mose erese, nandeico siquicheãte esi ã. Nandesiquiche ãte ra esi mbia icua mbasi mose. Nandembasi ãte ra mbia chabe. Jesucristo raãte quiatu nandeico nguiā nande ã. ¹⁸ Nandesiquiche mose Dios si, nandechesequa tuchi ãte quiatu nguiā erese nandechiangui re ã. Nandechesequa tuchi mose erese, nandesiquicheãnda esi. Nandesiquiche mose Dios si, nandesiquiche chõ nda nandembasi. ¹⁹ Dios rane ngue nyesequa nanderese nyii ra. Nyebe nande abe nandeico nguiā nyesequa erese ã cote. ²⁰ “Achesequa quia Dios rese co” i mose emo, ngõngue ucuãya mose, ñee ñooño je chõ ũquĩ nde. Nandechesequa eã mose nandenongue rese, Dios abe rese chõ nandeico nguiā nyesequa eã no. Dios rese quia nandeico nguiā mae aroneate. ²¹ ã i que ñee nande je ra: Ae nyesequa quia Dios rese nae, sã nyesequa ngõngue abe rese.

5

Jesús quiato “qui jẽ” i mbae icua je

¹ “Dios chimondo rei Jesús” nande i mose, Dios riirĩ ño nande re. Emo ndese nandechesequa mose, eriirĩ abe rese ra nandechesequa. ² Nandechesequa mose Dios rese, echeẽ nandemumba eã mose, Dios riirĩ ja rese abe chõ nandeico nguiā nyesequa ã. ³ Dios rese nandechesequa mose, echeẽ nandemumbayãte quia ã. Echeẽ mbaranguiatua eãte riqui nande je co. ⁴ Dios riirĩ mose nande, ibi jenda icua nandesiquisã quisã ño nguiā nandechesi ã. Nandeico Jesucristo icuate ã. Nyebe nandeico nguiā “qui jẽ” i mbae icua ibi jenda je. ⁵ Jesús icuasa achõ nda “qui jẽ” i mbae icua ibi jenda je. —Dios chimondo rei Jesús, i je ra “qui jẽ” i ibi jenda icua je no.

Dios siqui ñee mbei Jesús quiato chiangui re

⁶ Jesucristo que tu íbii ra. I je que Juan bautizar i ee ra. Eruqui que uchẽ emano mose ra. ũquĩ Espiritu Turã senei senei nguia nande je ã. Ae ñee ñooño eãte quia co. ⁷⁻⁸ Tres riqui nandembiirandu randu Jesús rĩ ã. Espiritu Turã nane. I abe no. Jesús ruqui abe no. ũquĩ ja riqui nandembiirandu randu Jesús rĩ ã. Hue rĩ ja chõ ũquĩ tres riqui nguiā ñee. ⁹ Eĩ sí que Dios ñee Jesús rĩ nande je ra. “Ae bei”, nande chõ nguia ee. Sã nandeico mbia cheẽ mo isi turã no. Dios cheẽ nguiatu nandesi turã tuchi. ¹⁰ Ae Dios riirĩ icua quia nae,

ũquĩ je quia Dios riqui nguiã ñee mbei echiangui re Jesús rĩĩ. Ae “eno” i ãte quia Dios cheẽ je nae, “ichõĩñosa chõ Dios cheẽ nde”, isa chõ ũquĩ nde. “Eno” i ãte quiatu nguiã Dios ñee mose Jesús rĩĩ. ¹¹ Dios nandemingo bei quia co. Nguirĩ nii ño eriqui nguiã nandemingo bei co. Ũquĩ nii ño Dios riqui nguiã ñee nande je. ¹² Ae chiangui re Dios ririĩ ndiqui nae, ũquĩ nda Dios mingo bei. Ae chiangui re eriqui eãte nae, ũquĩ nguiatu ra emingo bei eã.

Juan embesa hui bei

¹³ A aico ã mbesa jẽje a. Dios ririĩ icuasa je a. “Dios ra semingo bei” jenye sacua eicua jeñiangui re. ¹⁴ Nandesiquicheã nguia ñee Dios je ã. “Mbae mo embu seje”, i mose ee, mondo ra nande je. Nandendua mose ae rã sí, mondo ra nande je. ¹⁵ Nande ache i mose ee ra nandeandu. “Aque embu seje”, i mose ra emondo nande je. Nandeico ũquĩ icuate ã. ¹⁶ Nandemae mose nandenongue rese mbae icuã naa naa mose, nandechẽ Dios je erĩĩ. Dios ra emingo turã cote. Aque mii mbae icuã ndiqui mbia mbuquiachã icuã mbei co. Emo aque icuã naa mose, “jeñee Dios je erĩĩ”, ae ãte quia jẽje co. Ũquĩ nda quiachã mbei chõ. ¹⁷ Mbae icuã naa naa mose rei eicuã tuchi. Aque mii mbae icuã nguiarei mbia mbuquiachã mbei mondo tata cuásuu.

¹⁸ Dios ririĩ mose nande, nandeico ãte quia mbae icuã ndese ã. Jesús riqui nanderaarõ mbeite mbae icuã si co. Satanás nandembicuã eã sacua. ¹⁹ Nande rei Dios resenda. Ũquĩ nandeicuate quia ã. Mbã ataque quiarei Satanás ndesenda tuchi. Eicuã ndesenda tuchi. ²⁰ Dios ririĩ ngue tu nandembaaquiatu sacua Dios rĩĩ nda. Dios ichõĩñosa reã nii. Ichõĩñosa reã ño eririĩ abe no nde. Ae rese nandeico tuchit e quia ã. Aba mingo beisa chõ ae re.

²¹ Seririĩ, Dios aba reã ndese ra jẽingochĩ. Amén.

SEGUNDA CARTA DEL APOSTOL SAN JUAN

Achesequate jendese, i Juan

¹ Juan ndei se. Ameite se. A aico ã mbesa mbesa ndeje a, Ari. Dios chiirabo tuchi chõ nde re. Nderiirĩ je abe aico ã mbesa mbesa a. Co aico nyesequa tuchi jendese co. Dios rese quia jẽingo tuchite nguiã ùquĩ. Nyebe Dios quiato riqui nguiã nyesequa jate jendese ùquĩ.

² Achesequa tuchite quia jendese co. Dios cheẽ nguiatu siqui beite quia nandechiangui re co.

³ Dios rei nanderu. Jesucristo rei eriiĩ. Sã ùquĩ ndiqui turã jendese. Sã ùquĩ ia eã tuchi riqui jendese. Sã ùquĩ ndiqui jembia bei tuchi. Ùquĩ ndiqui nyesequa tuchi jendese ùquĩ. Ùquĩ ñee ñooño eã tuchi quia ùquĩ.

⁴ Nderiirĩ mo ngue chi tuchi Dios cheẽ ndese seje ra. Seya tuchi que ùquĩ mose ra. ⁵ Nandechesequa ja chõ nguia nandechiese. Dios cheẽ yasu eã ño ã nde. Dios cheẽ ñiinda bei chõ ñene. ⁶ Nandechesequa mose nandechiese, nandeico Dios cheẽ ndui sí ã. — Jenyesequa chõ jenyiese, i quiatu ngue Dios nande je re. Cose ndare bei chõ jẽingo nguiã ùquĩ andu ã.

Aba mbiĩĩ irĩsa

⁷ Mbia tubiriã ndiqui aba mbiĩĩ irĩte ã cote. Jesucristo que tu ibate si mbiarã nda, i sereã nea. Cristo ucuayãsa, i chõ ùquĩ je re. Aba mbiĩĩ irĩsa, i abe que ùquĩ je ra. ⁸ Cochee chõ jẽingo. Mbae jẽsaã iru iru eã sacua Dios je. Ùquĩ mose ra Dios jenyisaã sibishorõ turã tuchi jẽje. ⁹ Emo icha mose Cristo cheẽ si, Dios resenda eã ño ùquĩ nde. Emo siqui bei mose Cristo cheẽ ndese, Dios resenda tuchi chõ ùquĩ nde. Cristo resenda abe no. ¹⁰ Emo mbia mbaaquiatu quiatu mose Cristo cheẽ ndui si eã, ùquĩ jẽisi turã eã ño nguia jenyuchúaa. Jeñee turã turã aroneate ee. ¹¹ Ae ñee turã nguia ee ùquĩ nii nae, ae abe chõ eicuã ndiqui nguiã erã sí.

Juan embesa hui bei

¹² Mbae tasenei ja tuchi jẽje, ae rei que se ra. Ambesa oco sereãte mondo jẽje. Tambuchecua tuchi chõ oso ñee jẽje, ae que se ra. Nandeya tuchi sacua nandechiese.

¹³ Dios chiirabo tuchi chõ ndenongue re. Eriirĩ ja saludos mondo quia ndeje aque. Amén.

TERCERA CARTA DEL APOSTOL SAN JUAN

Gayo turãte que eriqui Dios je ra

¹ Juan ndei se. Ameite se. A aico ã mbesa mbesa ndeje a, Gayo. Aico nyesequa tuchite nderese co. ² Sechesequa, acheẽ mbeite quia Dios je nderĩĩ co. Dios nemingo turã sacuaã. Nderete abe mingo turã sacuaã no. Sã ereico siqui tuchite Dios rese no. ³ Seya tuchi que jirandu mose nderese ra. Nanderesenda mo ngue ngaã sembiirandu nderese ra. —Gayo riqui tuchi Dios rese aque, i que sembiirandu ra. ⁴ —Nderiirĩ nyi tuchi Dios rese pee, i mose seje, sembia beite equia co. Uũquĩ nguiatu sembia tuchi nguiã mbae mo si co.

⁵ Sechesequa, ereico turã tuchi nanderesenda je huee. Ishonda je abe no. Mbae turã eresaã saã mbeite quia ee huee. ⁶ Urechumunua mose que Dios quiato mo urembiirandu ndeturã ndese ra. —Nyesequa tuchi que urerese ra, i que euaã ñee ure je ra. Mbae turã emondo mondo bei ee, embucuata turã sacuaã. Eĩ mose ra Dios ia tuchi nderese. ⁷ Jesús rĩĩ nguiatu uũquĩ ndiqui nguiã ngata mbia mbaaquiato quiatu. Mbae mo nda eisi chooño eã Jesús icuasa reã mo si. ⁸ Nyebe nande chõ mbae nandemee mee ee. Dios cheẽ nenei neneisate quia uũquĩ nde.

Diótrefes ucuasu raã ñooño

⁹ Papel jua que ambesa rei mondo jeñumunua ji je ra. Diótrefes quiatu seosei chiãte nguiã. —Se miĩ ño ererecuaraã, ite. ¹⁰ Huee seso mose ra Diótrefes icuaã asenei jẽ ja je. Ae icuaã esaã ure je nae, uũquĩ. Nanderesenda abe isi teã teã nyee. Emo eisi turã sete mose, ñee asi asi chõ nguiã aque abe je no. Mombo chõ nguiã hue si no. ¹¹ Sechesequa, ereicochĩ nda eicuã mo ndui. Eturaã ndui chõ eico. Eturaã nduinda quiarei Dios resenda. Ae siqui quia eicuã ndui, uũquĩ ndei Dios resenda eã.

Eturaã tuchi, i Demetrio je

¹² Demetrio quiarei eturaã tuchi. Co eriqui tuchi Dios rese co. Mbia ja abe ñee turãte quia erĩĩ uũquĩ. Se abe acheẽ turãte quia erĩĩ co. Acheẽ ñooño ãte que se quia jẽje resẽ.

Juan embesa hui bei

¹³ Mbae tasenei ja tuchi ndeje, ae rei que se ra. Ambesa oco sereãte mondo ndeje. ¹⁴ Namu jiri ra amae nderese reae. Aque mose ra nandechẽ tuchi nandechue. ¹⁵ Sã Dios nembia turã mbei mingo. Nandequiato a jenda ja saludos mondo quia ndeje aque. Saludar ere sequiato hue jenda ja je.

LA CARTA DEL APOSTOL SAN JUDAS

Judas embesa Dios chiirabo je

¹ Judas rei se. Jesucristo rimba. Jacobo nongue rei se. Ñ ambesa quia jêje a. Dios chiirabo je. Dios que jêirabo ino icúe umbaerã nda. Dios riqui nyesequa tuchi jendese co. Dios riqui jenderecoquiato bei Jesucristo mbaerã co. ² Sã Dios riqui ndua bei jendese. Sã eriqui jembia bei. Sã eriqui nyesequa bei jendese.

Ae Jesús quiato saã ñooño nguia

³ Jesucristo nandemingo beisa riñ ngue ambesa seese rei nguiã jejê. Ae mbia mbaa tambesa jêje. Jêingo eã nonde erese. Ûquĩ ñee icuã icuã mose Dios cheẽ niñ, echeẽ jêsibishorõ. —Dios cheẽ tuchi chõ ñene, jenyê tuchi quiato quia Dios cheẽ ndiquisã quisã mbia icuã si. Dios quiato ngue ucheẽ mondo ja nguiã nguesenda ja je. ⁴ Dios quiato raã naasa mo ndiqui mbia mbaaquiato icuã icuãte ùquĩ. Ûquĩ siquiã tuchi chõ nguiã Dios rese ùquĩ. —Sã Dios riqui aba icuã mbutiã uturã je c o no jê. Nyebe mbae icuã nandesã ì ì chõ jê, ì chõchĩ nguiã ùquĩ. Jesucristo cheẽ ndui eã tuchi chõ ùquĩ nde. Nandererequa cheẽ ndui eã. Cosete que Dios ùquĩ mbiicúe embasi sacuã nda. Mbasi mbasi bei ra equia cote.

⁵ Mbae tasenei na jêje. Jêicuate raque. Taemunduabe erese. Dios ngue judíos sirõ ja rei nguiã Egipto si cose. Mbua hue jenda icuã icuã mose ee. Ûquinde que siqui sereã Dios rese cote ra. Nyebe Dios eiquia nguiã. ⁶ Sã ángeles mo je Dios ñee ndei no jê. “Aa jêingo aa”, sã ì rei ee no jê. Sã Dios cheẽ mumba chõ no jê. Sã Dios riqui etarõ nderequia itondaruqui re co no. Embasi mbasi bei sacuã cote. ⁷ Sã Sodoma jenda no. Sã Gomorra jenda no. Sã ùquĩ ndurubinda ja no. Siqui chooño eã. Mbae icuã naamba amba. Siqui siqui emo ninisi rese. Eruã mo ndese abe no. Nyebe que Dios ùquĩ mombo tata cuásuu ra. Mbae rasi ra esaã mbei u huee cote. Mbua mundua ndua sacuã ño ùquĩ nde.

⁸ Ae Dios quiato saã saã nguia nae, ùquĩ ndiqui ndua icuã icuã mbei ùquĩ. Nyebe eriqui nguiã nguete mbiicua ùquĩ. Aba cheẽ mumba. Ñee icuã ángeles ibatenda abe riñ no. ⁹ Sã Miguel ángel rerequa no. Sã ñee asi asi nyue diablo rese no. Moisés rete riñ. —Mbae icuã tasaã ndeje, ì eã ngue diablo je ra. —Dios quiato ra mbae rasi saanguquia ndeje, ì chõ ngue ñee diablo je ra. ¹⁰ Ae Dios quiato saã saã nguia nae, ùquĩ ndiqui ñee ñooño mbae uchicuayã niñ ã. Ae eicuate quia mbae nae, ùquĩ ndese siqui turã eã. Siqui chooño eã ùquĩ ndese. Nyebe ra Dios embasi tuchi cote. Quiaa riinda quia mbae icua jiri nguiã ùquĩ si. ¹¹ Aba mbia eã tuchi chõ ùquĩ nde. Caín na tuchi chõ eriqui nguiã mbae icuã naa naa ùquĩ. Balaam abe rã si chõ eriqui nguiã icha icha Dios si ùquĩ. Mbae isiquia achõ ndese siqui sacuã. Aba cheẽ mumba mumba bei chõ nguiã Coré rã ùquĩ. Nyebe ra Dios mbae rasi saanguquia ee Coré rã si. ¹² Ae Jesús quiato saã saã nguia nae, aba ireingua tuchi chõ ùquĩ nde. Jeñumunua nua mose quiaru sacuã nyiese, ùquĩ ndiqui quiaru chooño ño ùquĩ. Mbae abe mbei chooño. Ico chooñoa abe mbia mo je. Mbua reaquiatusa mo na eã. Nguete miñ ño ùquĩ teaquiato nguiã ùquĩ. Sã ibei rondei riqui raque pã ì mose no. Sã eriqui nyaaquíã no jê. Sã quiririã ndiqui ibei rondei rerao no jê. Ûquĩ na ño Dios quiato raã naasa riqui nguiã ã. Mbae iabae je rã abe chõ eriqui nguiã ã. Ira shiñ rã abe no. Ira riqui ji rã abe no. ¹³ Ama ndebera rã abe chõ ùquĩ ndiqui nguiã ùquĩ. Mbua mbaaquiato quiato mose, ì richoi rã ño ùquĩ nde. Sã nyasitata riqui oso nguenda recha no. Eĩ si chõ ùquĩ nguiã ùquĩ. Nyebe ra mbae rasi raã tuchi itondaruqui re.

¹⁴ Enoc abe que ñee ùquĩ icuã niñ nda. Adán ndiirĩ nducucha rei ae. Eĩ ngue ñee nda: “Dios ra tu ngũimba tubiriã ndese. ¹⁵ Mbua icuã mbasi ja ra eu. Ae icuã mbia saã saã nguia nae, ùquĩ ndese ra mae ja. ‘Mbae icuã asaã ãte resẽ’, ì aroneate ra ùquĩ cote. Ae ñee icuã

nguia Dios rĩĩ nae, Dios ra echeẽ icuã senei a e sí je cote. ‘Eĩ ere que equia ñee icuã serĩĩ nda’, i ra Dios ee. Echisaã icuã tuchi chõ ũquĩ nde”, i que Enoc ñee cose ra. ¹⁶ Echiichati tuchi chõ ũquĩ nde. Ñee icuã mbei equia emo nii ũquĩ. Ae rese eriqui sete nae, ũquĩ miĩ ndese chõ eriqui nguĩã ndua ũquĩ. Ucuasu raã ñooño. Uchuru mondo chooño. Ñee turã abareã nea emo je. Mbiĩrĩ irĩ ño nguĩã ñee turã abareã nea ee.

Ãjẽsaã saã, i Judas Jesús quiato je

¹⁷ Jẽ nguia rei Jesús quiato tuchi. Jesús chimbaaquiato cheẽ si jẽtesarei eã. ã ndei echeẽ ã: ¹⁸ “Mbae ua ja nonde ra mbia iquia iquia Dios cheẽ je. Ae icuã ndese eriqui sete nae, ũquĩ miĩ ndese chõ nda eriqui nguĩã ndua”, i que Jesús chimbaaquiato ñee cose ra. ¹⁹ Mbia mbuqueta quetasa tuchi chõ ũquĩ nde. Ae ebite mbae icuã nae, ũquĩ ndese achõ ño eriqui nguĩã ndua. Espĩritu Turã siqui ãte echiangui re. ²⁰ Jẽ nguia jeñimbirãcuã tuchi quia Dios rui. Dios jẽicua tuchi. Jeñee mbei Dios je. Sã Espĩritu Turã ndiqui jembucheẽ mbei Dios je. ²¹ Jẽingo bei quia Dios rese. ĩ nda jeñee. —Nyesequa tuchi chõ equia nanderese re, i. Jesucristo ia eã tuchi que nanderese ra. Nyebe ra nandemingo bei tu mose. Ũquĩ jẽsaarõ mbei quia. ²² Ae Dios tiisu isu quia nae, ũquĩ jembuti mbuti quiato quia Dios cuti. ²³ Mbia icuã mo abe jemingo Dios rese. Tata si erirõ naanguia jemingo Dios rese. Eĩcuã tuchi raque. Jẽingo tuchi quiato quia Dios rese. Ũquĩ icuã uba eã sacua jendese.

Judas ñee turã Dios rĩĩ

²⁴ Dios miĩ ño jendeaquiato bei nguĩã jembĩcha eã sacua. Dios miĩ ño jeñiangui renda icuã mbuchicuabo nguĩã jemingo sacua uchiese. Dios miĩ ño jembia bei nguĩã no. ²⁵ Dios miĩ ño mbae icua ja nguĩã. Dios miĩ ño nandemingo bei nguĩã Jesucristo rĩĩ no. Ae je ra mbia ñee turã mbei quia. Ae rei eturã tuchi. Ae rei ererequa tuchi. Ae rei equirãcuã tuchi. Eĩ mbei chõ ae re. Amén.

APOCALIPSIS O REVELACIÓN A SAN JUAN

Jesucristo mbae mbuchecua

¹ Juan ño se re. Mbae tasenei jêje. Ae ra nyecua namo nae, ùquĩ tasenei jêje. Dios rane ngue embuchecua Jesucristo je ra. Jesucristo que ángel mbu sembiirandu sacuaã erese cote ra. Se jembiiirandu sacuaã erese cote. ² Nyebe aico nguiã Dios cheẽ mbuchecua checua jêje co. Ae Jesucristo senei senei nguia seje nae, ùquĩ ño asenei senei nguiã jêje co. Ae rese semumae nae, ùquĩ abe chõ asenei senei nguiã jêje co. ³ Ae ra mae mae nguia sechimbesa rese nae, Dios turã tuchi ra eriqui ùquĩ je. Ae ra nyiisaquia turã sechimbesa rese nae, Dios turã tuchi ra eriqui ùquĩ je no. Achite secheẽ ñi ique a cote.

Juan ucheẽ mbesa mondo siete iglesias je

⁴ Se rei Juan. Jê siete iglesias Asia jenda je aico ã mbesa a. Sã Dios riqui uturã ndeacuquia cuquia jêje. Sã Dios riqui jembia bei mingo. Ae chõ siqui bei nguiã co. Ae siqui beite quia nyii no. Ae ra tu emo mose no. Sã Espiritu Turã abe riqui uturã ndeacuquia cuquia jêje. Ae chõ siqui nguiã mangue chooñoa ja co. Mbae raã naa Dios je. ⁵ Sã Jesucristo abe uturã mee jêje. Ae que nandembiirandu turã tuchi Dios rese ra. Ae rane ngue quera si manonde ra. Ae quia rei equirãcuã tuchi mbia rerecua mo si. Ae riqui nyesecua tuchite nanderese co. Ae que nandembui nandeicuã si nguqui je ra. ⁶ Ae que nandemingo bei ngu res e erimbarã nda. Nande mbae raã naa sacuaã Dios je. Sã mbia riqui ñee turã turã mbei Jesucristo je. Ae ra ererecua bei. Amén. ⁷ Jesucristo ra tu ibei si. Mbia ra mae ja tuchi equichi rese. Mangue jenda chooñoa tuchi ra mae ja erese. Ae Jesús iquia nyii nae, ùquĩ abe ra mae erese no. Mbia ra siquichete nyeseo mae mose erese. Ae bei. Amén.

⁸ —Co aico beite querabe co. Mbae eã mose que aico se rane nyii ra. Mbae ua ja mose abe ra aico bei querabe no, i que Dios ra. Equirãcuã mbeite riqui co. Ae chõ siqui bei nguiã co. Ae siqui beite quia nyii. Ae ra tu sí emo mose.

Juan mae Jesús rese cuu

⁹ Se rei Juan. Jendesenda chõ se re. Nandeico ñimbirãcuã jate mbia icuã icuã mose nande je ã. Jesucristo rñ. Ae sí chõ nandembirãcuã nguiã co. Ae sí chõ nandererecua ja riqui nguiã co no. Ama ndisha joõ ngue mbia sereru aa ra. Aa semingo isho mbia si a. Se Dios cheẽ nenei nenei eã sacuaã. Mbia mbiirandu eã sacuaã Jesucristo rese. Patmos, i que a ejoõ acua je ra. ¹⁰ Aa sereco mose que Espiritu Turã mbae reacuquia seje cuu ra. Domingo mo mose. Emo ngue ñeemombo seje sequite quti cuu ra. Echeẽ ngue serasate ra. ¹¹ —Se ae que aico bei mbae eã mose nyii resẽ. Mbae ua ja mose abe ra aico bei no, i que seje ra. —Ae ra eretea cuu nae, ùquĩ embesa papel rese. Ndechimbese emondo rã siete iglesias Asia jenda je. Efeso, Esmirna, Pérgamo, Tiatira, Sardis, Filadelfia, Laodicea. Ùquĩ jenda ja je ndechimbese emondo, i que ñee seje cuu ra.

¹² —¿Aba ñee nguia seje re? ae que uba mae nda. Siete candeleros oro ao ji rese que amae nda. ¹³ Ùquĩ ite re que mbia raanguia mo ñi juã nda. Dios ririñ ño eriqui reaẽ. Huiñrao oco que ecunua nda. Eichuã ati tuchi que eirao ra. Oro ao ji chõ ngue eishia cuasa ra. ¹⁴ Eashĩ tuchi que ra. Tata rendi rã tuchi que eresa ra. ¹⁵ Ei nininyate que ra. Bronce rã. Ama ndieu rã ño ngue echeẽ nda. ¹⁶ Nyasitata siete que equereco oo ra. Uquiatocuti que ererequia ra. Espada que equereco uchúruu ra. Erimbe tuchi que ra. Erimbe chobei que ra. Eruba nininya tuchi que ra. Sã tenda nininyate riqui nandeite re mose no.

¹⁷ Semae mose erese que sesiquiche tuchi ra. Mbia raaque rã ngue aso ngoi ejii ra. Oco que serese oo uquiatocutinda je ra. Ñee ngue seje ra. —Eresiquichechĩ nguiã sesi. Ae siqui beite quia querabe nae, ae chõ se re. ¹⁸ Seraaque rei que nyii ra. Aico bei querab

e co cote. Mbia mingo beisa chõ se re. Secheẽ mose ra mbia mano. Secheẽ mose ra mbia riqui bei querabe no. ¹⁹ Ae rese eremae nae, ùquĩ embesa rã. Ae atecuquia cuquia quia ndeje namo nae, ùquĩ abe embesa no. Ae ra nyecua nyecua emo mose nae, ùquĩ nonde embesa jei rã. ²⁰ Siete candeleros rese que eremae namo, siete iglesias rã ño ùquĩ nde. Siete nyasitata rese que eremae séoo, siete iglesias rerecua rã ño ùquĩ no nde. Jesús quiato rerecua rã ño ùquĩ nde, i que ñee seje ra.

2

Cristo ucheẽ mondo uquiato Efeso jenda je

¹ Jesús que ñeembe seje ra. —Dios quiato rerecua Efeso jenda je ã embesa rã. ã embesa rã mondo ee: “Cristo que ñee jêje ra. Ae siete nyasitata quereco oo nae, aque. Ae ngata quia siete candelero ite rĩ nae, aque sí chõ ñee nguiã jêje aque. ² ã ngue Cristo ñee jêje ra: ‘Jenyisaã turã aicuate quia co. ã jêingo quiei quiei tuchite seje ã. Jeñimbirãcuã tuchite quia mbae icuã si ã. ã jêingo jiri jiriãte mbia icuã ndese ã. Ae sequiatio rerecua saã ñooño nguia nae, jê ngue ùquĩ jêisiã nda. “Ma Jesús quiatote”, jenyete turã tuchi que ra. “Ichõĩñosa chõ ñene” jenyete chõ ngue eriĩ nda. ³ Jeñimbirãcuã turãte que equia ra. Mbae rasi que jêsaã nguia seriĩ nda. Jêquiei quiei tuchite que seje ra. Jêhui eã mbeite equia sesi ã. ùquĩ jêsaã turã jate rei nguiã ã. ⁴ ã nguiatu sembia eãte nguiã ã. Jenyesequa eã jirichĩ equia serese jê nguiatu ã cote. Seicua ramo mose que jêote serese nyii. Jenyesequate que equia serese nyii. Eĩ jenyete eã ñochĩ equia ã cote. ⁵ Jendua rã ùquĩ ndese ae. Jenyesequabe jiri serese ae. Jemba eã mose serese, jaembutiã nda u. Sequiatio eã nda jê cote, jemba eã mose serese. ⁶ ã abe sembiante quia jendese ã. Ae siqui quia Nicolás rese nae, ùquĩ nyisaã jêucuãyãtequia ùquĩ. Se abe aucuãyãte quia co no. ùquĩ nyisaã icuãte riqui ùquĩ. ⁷ Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ùquĩ jeñandu rã: Ae “qui jê” i beite quia Satanás quirãcuã je nae, ùquĩ nda amingo turã mbei ibate Dios rese’, i que Cristo jêje ra”, ere chõ embesa mondo sequiatio Efeso jenda je.

Cristo ucheẽ mondo uquiato Esmirna jenda je

⁸ Dios quiato rerecua Esmirna jenda je ã embesa rã. ã embesa rã mondo ee: “Cristo que ñee jêje ra. Ae rane ño ngue siqui bei mbae eã mose nyii ra. Mbae ua ja mose abe ra eriqui bei no. Ae que mano ndei nyii ra. Manonde eriqui beite e co no. Aque sí chõ ñee nguiã jêje co. ⁹ ã ngue Cristo ñee jêje ra: ‘Jenyisaã turã aicuate quia co. Mbia icuã icuãte riqui jêje seriĩ ùquĩ. Mbaecha reãte jêingo ùquĩ. Dios quiatu siqui tuchite nguiã jendese co. Ae Dios chiirabo saã ñooño nguia nae, ùquĩ ndiqui ñee icuã mbeite jeniĩ ùquĩ. Satanás chiirabochõ ño ùquĩ nde. ¹⁰ Ae ra jêsaã saã mbae rasi nae, ùquĩ mo si ra jêsiquichechĩ jê. Satanás nda jemo tarõ mii. “Ma nyao Dios si”, i sacua ño ùquĩ nde. Diez dñas ra jêingo mbae rasi raã naa. ùquĩ mose, jêingo bei Dios rese. Mbia ra jêiquia seriĩ. ùquĩ mose nda jaemingo bei Dios rese cote chã. ¹¹ Jêisa mose, Espíritu Turã ñee jeñandu rã. Ae Espíritu Turã ndiqui ñee iglesias je nae, ùquĩ jeñandu rã: Ae “qui jê” i beite quia Satanás quirãcuã je nae, ùquĩ nda Dios mondo eã tata cuásuu’, i que Cristo jêje ra”, ere chõ embesa mondo sequiatio Esmirna jenda je.

Cristo ucheẽ mondo uquiato Pérgamo jenda je

¹² Dios quiato rerecua Pérgamo jenda je ã embesa rã. ã embesa rã mondo ee: “Cristo que ñee jêje ra. Ae espada rimbe chobei quereco nae, aque sí chõ ñee nguiã jêje co. ¹³ ã ngue Cristo ñee jêje ra: ‘Sucha tubiriã jendecua aicuate quia co. Mbia hue jenda siqui tuchite quia Satanás ndese ùquĩ. Jê ae chõ jêingo nguiã serese ùquĩ. Jêhui eãte equia sesi ùquĩ. Mbia icuã sequiatio iquia raque huee jendécuaa. Antipas, i rei ngue aque sequiatio je re. ¹⁴ ã nguiatu sembia eãte nguiã ã. Balaam na tuchi chõ jemo jemo ndiqui nguiã

ũquĩ. Balaam nguiarei Balac mbaaquiato icuã icuã nyii. Balac Israel jenda mbiicuã icuã nonde. Nyebe Israel jenda riqui nguiã siqui tuchi cuña icuã ndese. Dios abareã ndese abe no. Jemo abe chõ mbia jemiicuã icuã nguiã ũquĩ. ¹⁵ Ae siqui quia Nicolás rese nae, ũquĩ mo siqui chõchĩ nguiã jendese ũquĩ. Ũquĩ ñee aucuãya tuchi quia co. ¹⁶ Jendua si rã jẽicuã ndese. Nicolás resenda jemombo chõ. Jemombo eã mose ra achu icuãte ee. Co espada areco sechúruu co nae, aque ra areco reco tuchi erese. ¹⁷ Jẽisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ũquĩ jeñandu rã: Ae “qui jẽ” i beite quia Satanás quirãcuã je nae, ũquĩ nda amingo tuchi Dios cheẽ ndese. Dios cheẽ nda ũquĩ mingo bei. Ũquĩ je ra sitashĩ ñetẽ mo amee. Sita ñetẽ ndese ra nombre yasu ambesa mii. Eme sacua ee. Emo nda sechimbesa icuayãte nombre yasu. Ae je ra amee, ũquĩ achõ nda eicua, i que Cristo jẽje ra”, ere chõ embesa mondo sequiatio Pérgamo jenda je.

Cristo ucheẽ mundo uquiato Tiatira jenda je

¹⁸ Dios quiato rerecua Tiatira jenda je ã embesa rã. ã embesa rã mundo ee: “Dios rucucha que ñee jẽje ra. Ae resa tata rendi saãte quia nae, aque. Ae i nininyate eriqui bronze rã nae, aque sí chõ ñee nguiã jẽje co. ¹⁹ ã ngue Cristo ñee jẽje ra: ‘Jenyisaã turã aicuate quia co. Jenyesequate quia mbia rese ũquĩ. Mbae jẽsaã saã turãte quia Dios je ũquĩ. Ũquĩ jẽingo Dios icua tuchite ũquĩ. Jeñimbirãcuã turãte equia mbae icuã si ũquĩ no. Jenyisaã turã tuchite riqui cose ndare si ũquĩ. ²⁰ ã nguiatu sembia eãte nguiã ã. Jezabel naanguia siqui chõchĩ nguiã jendese ũquĩ. ¿Mbaerã aque cuña jẽteachõ nde? Emombo rocoĩ jenyese. Dios cheẽ esenei senei ñooño ño nguiã aque. Sequiatio mbaaquiato icuã icuã ño nguiã aque. Sequiatio mingo chooño ño nguiã cuña icuã ndese aque. Sequiatio mingo chooño ño nguiã dios aba reã ndese aque no. ²¹ Jezabel naanguia que atiisu isu chõ nyii ra. “Sã ndua sí huicuã ndese. Sã eriqui chooñoa mbia rese”, ae rei que se nyii ra. Hui eã mbei chõ equia ũquĩ si aque re. ²² Nyebe ra ambasi tuchi cote. Ae siqui siqui quia erese nae, ũquĩ abe ra mbae rasi saã tuchi cote, ndua si eã mose huicuã ndese. ²³ Ae siqui Jezabel icuã ndui nae, ũquĩ abe ra aiquia. Ũquĩ mose ra sequiatio jirandu ja sequirãcuã ndese. “Jesús mbia chiangui renda icua ja chõ nguiã re. Mbia ndua ndua eicua ja chõ nguiã re”, i ra sequiatio serĩ cote. Jẽingo bei mose mbae icuã ndese, se abe ra mbae icuã amee jẽje. ²⁴ Ae siqui eã nguiã Jezabel cheẽ ndui jemo nae, ũquĩ je chõ tacheẽ cote. Jẽ nguiatu que jeñimee ãte Satanás je ra. Nyebe ra acheẽ tuchiã jẽje. “Mbae mo ndese ra jẽingochĩ jẽ”, ae eã nda jẽje mbae mo nii cote. ²⁵ Ae jẽicuate quia serĩ nae, ũquĩ ndese jẽingo bei querabe. Achu chee nda jẽje chã. ²⁶⁻²⁷ Sã seru uquirãcuã me e seje no. Ae ra secheẽ mumbayã mbeite quia nae, ae ra “qui jẽ” i beite quia Satanás quirãcuã je nae, ũquĩ je ra sequirãcuã amee tuchi. Ũquĩ nda mbia rerecuarã cote. Ũquĩ nda mbia icuã mbasi mbasi tuchi quia cote. Sã emo ñio iquia iquia ira je no. ²⁸ Nyasitata turã na nda aico ũquĩ je. ²⁹ Jẽisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ũquĩ jeñandu rã, i que Cristo jẽje ra”, ere chõ embesa mondo sequiatio Tiatira jenda je.

3

Cristo ucheẽ mundo uquiato Sardis jenda je

¹ Dios quiato rerecua Sardis jenda je ã embesa rã. ã embesa rã mundo ee: “Cristo que ñee jẽje ra. Ae siete nyasitata quereco oo nae, aque. Ae rese Espiritu Turã ndiqui nae, aque. ã ngue Cristo ñee jẽje ra:

‘Jenyisaã aicuate quia co. Mbia raaque raãte chõ jẽingochĩ nguiã ũquĩ. Siqui eã Dios rese. Jẽingo arõte raque equia Dios rese mbia je ũquĩ. ² Secheẽ ndese jenyiisaquia rã. Jeñimbirãcuã ño nguiã siqui i Dios rese. Jẽhui serĩ serĩte chõchĩ nguiã Dios si ũquĩ. Jenyisaã ndese aico mae maete co. Jenyisaã saã icuãte riqui Dios je ũquĩ. ³ Jendua jiri mbae rese ae. Ae rese jeñimbaaquiato nae, ũquĩ ndui jẽingo tuchi jiri ae. Jẽicuã si jẽhui

tuchi jiri ae. Jê secheẽ mumba mose, jaembuate ra ngasẽ jêje. Jendua eã mose ra asochĩ jêje re. Sã mbae mbuquiachãsa riqui aba mbuate no. ⁴ Jemo miĩ miĩ mbae icuã saã saã eãte quia ũquĩ. Ũquĩ ño nda siqui bei serese. Eiraoshĩ nda amee ũquĩ je. Mbae icuã ndese quiatu que eriqui oco oco ãte ra. ⁵ Ae “qui jê” i beite quia Satanás quirãcuã je nae, ũquĩ nda huiiraoshĩ quereco quia serese. Ũquĩ nda siqui bei serese ibate. Ũquĩ mbae nombres ra achusi eã mbei. “Ã ndei sequiato tuchi ã”, ae ra Paba je. Angeles abe je. ⁶ Jêisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ũquĩ jeñandu rã, i que Cristo jêje ra”, ere chõ embesa mondo sequiato Sardis jenda je.

Cristo ucheẽ mondo uquiato Filadelfia jenda je

⁷ Dios quiato rerecua Filadelfia jenda je ã embesa rã. ã embesa rã mondo ee: “Cristo que ñee jêje ra. Ae ñee ñooño eãte quia querabe nae. Ae mbae icuã saã eã mbeite quia nae. Ae ererecua tuchi riqui David rã si nae. Cristo eiquesa mbuquiata mose, emo ematã aroneate. Cristo ematã mose, emo embuquiata aroneate no. ⁸ ã ngue Cristo ñee jêje ra. ‘Jenyisaã aicuate quia co. Jêquirãcuã miite jêingo raque ũquĩ. Seisi teã eãte que equia ra. Ũquĩ jêingo secheẽ mumbayãte ũquĩ. Nyebe que mbae ambuquiata miĩ eiquesa rã jêje ra. Jêingo tuchi sacua serese. Emo nda ematã eã. ⁹ Judíos ñee ñooño je ra amumae turã nyee jendese. Ũquĩ ndiqui Dios chiirabo raã ñooñote ũquĩ. Ũquĩ eriqui tuchite Satanás rese ũquĩ. Ũquĩ nda ñee turã nyee seje jeniĩ. “Dios nyesequa tuchi chõ nguia ã ndese re. Judíos eã ndaque”, i chee ra jeniĩ. Ngoi turã nyee ra jendese ñee seje. ¹⁰ Jeñimbirãcuã turãte equia secheẽ nguire ũquĩ. Nyebe ra jaendeaquiato turãte serequia. Mbia mangu chooñoa jenda mbae rasi raã ja mose ra jaendeaquiato tuchi serequia. ¹¹ Achu jei ra se. Ae jêicuate quia serĩ nae, ũquĩ ndese jêingo bei querabe. Ñ nda emo jembui eã Cristo si. ¹² Ae “qui jê” i beite quia Satanás quirãcuã je nae, ũquĩ nda amingo bei Dios rãcuã. Sembae marca ra amiĩ tuchi ũquĩ ndese. “Dios quiato” i tuchi ra mbia quia ũquĩ je. “Dios recua jenda” i tuchi ra mbia quia ũquĩ je no. “Jerusalén yasu”, i chõ nguia Dios recua je ã. Jerusalén yasu ra nguichi u ibate si. ¹³ Jêisa mose, Espiritu Turã ñee jeñandu rã. Ae Espiritu Turã ndiqui ñee iglesias je nae, ũquĩ jeñandu rã, i que Cristo jêje ra”, ere chõ embesa mondo sequiato Filadelfia jenda je.

Cristo ucheẽ mondo uquiato Laodicea jenda je

¹⁴ Dios quiato rerecua Laodicea jenda je ã embesa rã. ã embesa rã mondo ee: “Cristo que ñee jêje ra. Ae ñee ñooño eãte quia querabe nae. Ae rane siqui quia mbae eã mose nyii nae. Ae ucheẽ mbuchebiã mbeite quia nae. ¹⁵ ã ngue Cristo ñee jêje ra: ‘Jenyisaã aicuate quia co. Seya eãte aico jendese co. Jêhui tuchi ãte raque equia sesi ũquĩ. Jêingo tuchi eã ñochĩ equia serese ũquĩ no. Eĩ jenyete jenyete chõchĩ equia ũquĩ. I ribebe rã ño jêingochĩ ũquĩ. ¹⁶ Sã emo ndiqui i ribebe mbei aroneate no. Mombo chõ nda uchuru si. Eĩ ae ra jemombo sechuru si no. ¹⁷ “Ã ureico tuchite Dios rese ã”, jenyete chooño ñochĩ equia ñimbiĩ irĩ ũquĩ. Aba mbia eã tuchi chõ jêingo nguia ũquĩ. Mbaecha reã na ño jêingochĩ nguia Dios je ũquĩ. Eresayã na ño jêingochĩ nguia Dios je ũquĩ. Jêirao eã na ño jêingochĩ nguia Dios je ũquĩ no. ¹⁸ Jêingo chõ nguia serese ae. Ñ nda oro turã naanguia amee jêje. Ñ nda mbae amee tuchi jêje. Ñ nda tirushĩ naanguia amee tuchi jêje. Ñ nda jêireĩ nguia te jêirao eã si. Ñ nda Dios cheẽ ambuchecua tuchi jêje. ¹⁹ Ae rese aico nyesequa nae, ũquĩ icuã icuã mose chõ aico nguia eiruã nua. Emundua si sacua mbae turã ndese. Jêicuã si jêhui. Jendua sí Dios rese. ²⁰ Aico jêiquesa mbuu mbuu a. Jemo seandu mose, huiiquesa mbuquiata mose seje, aique ra ee. Aico bei ra erese cote. Aquiaru quiaru ra se quia erese cote. Ũquĩ abe ra quiaru quiaru quia serese cote no. ²¹ Ae “qui jê” i bei quia Satanás quirãcuã je nae, ũquĩ nda siqui bei serese se ererecua tuchi mose. Ũquĩ abe ra amiĩ mbia rerecuarã. Sã ñi aico “qui jê” i beite Satanás quirãcuã je nyii no. Sã ñi Paba semĩ mbia rerecuarã no. ²² Jêisa mose, Espiritu Turã ñee jeñandu rã. Ae Espiritu Turã

ndiqui ñee iglesias je nae, ũquĩ jeñandu rá', i que Cristo jėje ra", ere chõ embesa mondo sequiato Laodicea jenda je, i que Cristo ñee seje ra.

4

Mbia ibatenda ñee turã ja Dios rĩĩ

¹ Aquere que amae ibate quiti ra. Eiquesa raanguia que nyeequia mii seje ibei ra. Ae ñeemombo sequite quiti serasate nyii nae, aque que ñee si seje cote ra. —Echu rá ibate. Mbae tateacuquia ndeje. Ae ra jeĩ jeĩ mbia je nae, ũquĩ tateacuquia rá ndeje, i que seje ra. ² Aque mose tuchi que Espíritu Turã mbae teacuquia seje cuu ra. Dios rese que amae cuu ra. Huee que eñi ngoi trono tose ibate ra. ³ Enininya tuchi que seje ra. Sita rendi rá jaspe rá. Cornalina na abe no. Ibei asa que chí trono mama nda. Ibei asa nininya tuchite que chí nda. Esmeralda rá. ⁴ Veinticuatro tronos que chi Dios mama nda. Veinticuatro amei ngue chi tronos tose ja ja ra. Huiiraoshĩ ngue ecunui ja ja ra. Coronas oro ao ji que chíchi ja eãquĩ ndese ra. ⁵ Ama ngue sieu tuchi Dios mbae trónoo nda. Ama ngue ñee tuchi trónoo nda. Pirirã pirirã i tuchi que equia trónoo nda. Siete tata rendi que chi Dios ruba quiti ra. Ũquĩ ndei Espíritu Turã na ũquĩ. ⁶ Ama ndisa raanguia que chí Dios ruba quiti no nda. Eibera tuchi que ra. Mbae reco cuatro que chi Dios mama nda. Eresa ata atate que ũquĩ nda. Eruba quiti que eresa ra. Equite quiti abe que eresa no nda. ⁷ Nyacua rá tuchi que ũquĩ mo nda. Ticuasu riirĩ na ngue enongue no nda. Mbia ruba rá ngue enongue no nda. Ngaira risha rá ngue enongue no nda. Aque que mbebe quia ra. ⁸ Seis ja ja que ũquĩ jeo ra. Eresa ata ata tuchi que ejeo rese ra. Ũquĩ cuatro que ñee turã mbeite quia Dios rĩĩ nda. Isa abe que eriqui ñee turãte Dios rĩĩ nda. Eĩ ngue equia ñe e nda: Ndeturãte. Ndeturãte. Ndequirãcuãte ereico co, Dios.

Co ereico beite co.

Nyii que ereico beite no nda.

Mbae ua ja mose abe ra ereico beite no,

i que ũquĩ nguia ñee ñee Dios je ra. ⁹ Ũquĩ ndeco cuatro que ñee turã mbeite quia Dios je ra. Ae siqui beite quia co, aque je. ¹⁰ Amei veinticuatro abe que ngoi ngoi quia ngũĩã ndese ra. Ñee turã turã Dios je. Umbae coronas que echono chono ja Dios jii ra. ¹¹ Eĩ ngue equia ñee ñee Dios je ra:

Urererecua turãt e ereico co, Dios.

Nyebe ureico nguĩã ñee turã mbeite ndeje ã.

Mbae que erechao jate nembraerã nda.

Erendua turãt e que mbae ao nonde nyii no nda,

i que ũquĩ nguia ñee turã turãte Dios je ra.

5

Emo libro equia aronea

¹ Dios que libro quereco quia oo cuu ra. Uquiatocuti que enunui trono tose ra. Libro mbesa ji. Equitera quiti abe que embesa ji ra. Siete sellos je que ematã ji ra. ² Angel quirãcuã mo ngue ñee nda. —¿Aba ra sellos ndoso libro equia re? i que ángel ñeemombo ra. ³ Mbia mo ngue sellos ndoso aroneate ra. Ibatenda. Ibi jenda. Ibiqui riinda. Ũquĩ mo ngue sellos ndoso aroneate cuu ra. Nyebe mbia riqui nguĩã mae aroneate libro rese. ⁴ Nyebe que acheseo tuchi cuu ra. Mbia ja libro equia aronea mose. Mbia ja mae aronea mose erese. ⁵ Ũquĩ amei mo ngue ñee seje ra. —Erecheseochĩ nguĩã. Jesucristo ra libro equia. Ae quia equirãcuãte re. Ae quia Dios chiirabo rerecua tuchi re. David riirĩ tuchi chõ ae re. Ae quiatu que mbae rasi saã tuchi mbia icuã ndiquicharõ nda. Ae quia ra sellos ndoso. Ae quia ra libro equia, i que amei ñee seje cuu ra. ⁶ Jesucristo que chí huee cuu ra. Oveja iquia ji rá ngue eñi seje huee cuu ra. Siete que erambashĩ nda. Siete que eresa no nda. Siete eresa rei Espíritu Turã. Sã Espíritu Turã mae mbae ja rese no. Jesucristo que chí Dios ruba quiti ra. Mbae reco cuatro joõ ngue eñi nda. Amei abe joõ ngue eñi no nda.

⁷ Dios que libro mondo Jesucristo oo cote ra. Dios chí mose trono tose. ⁸ Jesucristo libro isi mose que ũquĩ mbae cuatro ngoi ngũĩã ndese ejii ra. Amei veinticuatro rese. Arpas que amei quereco reco ja ra. Mbae riru oro ao ji abe no. Incienso resebe. Incienso, i que mbae mbushimbusa oquiei mose ra. Dios quiato ñee mose Dios je, eĩ sí chõ incienso ee re. ⁹ ũquĩ amei ngue irasei rasei canto yasu mo je ra. ã ño ngue irasei rasei nguiã: Nd e que mbia ndeiquia ra. Nde que mbia mangu chooñoa jenda ereisi Dios mbaerã nda. Mbia cheemo ja ja eriqui nae, ũquĩ abe que ereisi ja Dios mbaerã no nda. Mbia mbuae ja abe no. Nyebe nde mii ño libro ereisi arõte nguiã co. Nde mii ño sellos erendoso arõte nguiã co. Libro rese mae sacua. ¹⁰ Nde que uremii Dios rimbarã nda. Ure mbae raã naa sacua Dios je. Mbia ibi jenda rerecuarã nda ureico cote, i que amei irasei rasei Jesucristo je ra. ¹¹ Angeles cheẽ ngue achandu cot e ra. Angeles que chi ũquĩ mama tuchi cuu ra. Dios mama. Mbae reco cuatro abe mama. Amei veinticuatro abe mama no. Angeles tubiriã tuchi que ra. Millones y millones tuchi que ángeles ra. ¹² ũquĩ ngue ñee nyecuate Jesucristo je re: Oveja riirĩ na ño ereico nguiã nde. Mbia que ndeiquia mbae icua ndiquicharõ nda. Nyebe mbia riqui nguiã ñee turãte ndeje co cote. Nyebe mbia riqui nguiã ñee turãte nderii co cote no. Ndequirãcuã nii. Ndeaquiatu riĩ abe no, i que ángeles ñee turã Jesucristo je cuu ra. ¹³ Mbae que ñee turã jate quia Jesucristo riĩ cuu ra. Ibatenda ñee turã ja eriĩ. Ibi jenda abe no. Ibiqui riinda abe no. Ama ndisha riinda abe no. Eĩ ngue ũquĩ nguia ñee turã jate Jesucristo je ra. Dios abe je: Jẽquirãcuã jẽingo beite ã. Mbia rerecua jẽingo beite ã no. Mbae jenyiao ra ñee turã mbeite quia jẽje, i que Dios chiao quia ñee jate ee cuu ra. ¹⁴ Ae beite, i que mbae reco cuatro ra. Amei veinticuatro abe que ngoi ja ngũĩã ndese ñee turã Dios je ra. Ae ereco siqui beite quia co, aque je.

6

Jesucristo sellos ndoso

¹ Jesucristo que chí oveja riirĩ na cuu ra. Ae que sello mo ndoso libro si cote ra. Ae mbae reco cuatro chi nae, ũquĩ mo ngue ñee cote ra. —Echu, i que ñeemombo ra. Ama ndieu rã ngue echeẽ nda. ² Caballo shĩ mo ndese que amae cote ra. Ae chí eátoo nae, nguiraa mo ngue ecunui oo ra. Corona abe que emo mee ee ra. Oso que guerra raã naa cote ra. Equirãcuãte que eriqui mbia mo si ra.

³ Jesucristo que segundo sello ndoso cote ra. Ae mbae reco cuatro chi nae, ũquĩ mo ngue ñee endoso mose cote ra. —Echu, i que ra. ⁴ Caballo nongue gue usẽ u seje cote ra. Era ireĩ tuchi que aque ra. Ae chí eátoo nae, aque je que emo espada cuasu mee nda. Aque que mbia mbũcuã icua jate nyue ra. Nyebe mbia riqui nguiã nyiiquia iquia.

⁵ Jesucristo que sello nongue ndoso cote ra. Tercer sello. Ae mbae reco cuatro chi nae, ũquĩ mo ngue ñee endoso mose cote ra. —Echu, i que ra. Caballo rondei que usẽ u seje cote ra. Ae chí eátoo nae, aque que balanza mo cunui oo ra. Mbae mbuchechasa. ⁶ Emo ngue chí ũquĩ mbae reco cuatro ite re ra. Aque que ñee nda: —Mbia chiu ra ua jiri. Un kilo de trigo rei una jornada. Tres kilos quiata a rei una jornada no. Mbae quira quiatu ra ua eã. Vino ndese, i que ra.

⁷ Jesucristo que sello nongue ndoso cote ra. Cuarto sello. Ae mbae reco cuatro chi nae, ũquĩ mo ngue ñee nda: —Echu, i que ra. ⁸ Caballo nongue que usẽ u seje cote ra. Eracho que aque ra. Ae chí éátoo nae, ERAAQUE i que aque je ra. Emo ngue oso erui no nda. ERAAQUE TÃSA i que aque je no nda. Ũquĩ ngue mbia ibi jenda mbutiã tuchi la cuarta parte ra. Mbia iquia iquia tuchi que equia guerra je ra. Mbae rasi je. Eriãcuã je. Quiaa riinda icuã je abe no.

⁹ Jesucristo que sello nongue ndoso cote ra. Quinto sello. Mbae rese que amae altar qui re cote ra. Mbia chiiquia iquia aingue rese que amae nda. Ae mbia iquia iquia Dios cheẽ nii nyii nae, ũquĩ aingue rese que amae nda. Ũquĩ ñimbirãcuã tuchi chõ nguia mbae rasi je Jesucristo riĩ nyii reaẽ. ¹⁰ Ũquĩ ngue tasẽ tasẽ ñee Dios je ra: —Mbae eresaã turã jate quia nde co, Dios. Mbae ja rerecua chõ nde re. ¿Manosete ra ureriichare erembasi re no, Dios? i que ñee ja Dios je ra. ¹¹ Dios que tirushĩ mee mee ũquĩ ja je cote ra. Ñee ngue ee cote ra: —Mbarandiri. Mbia icuã nda jëataque abe iquia. Sã jëiquia nyii no. Ũquĩ sacua jëingo chombe jiri, i que Dios ñee e e ra.

¹² Jesucristo que sello nongue ndoso cote ra. Sexto sello. Ibi que nyere nyere tuchi aque mose cote ra. Tenda que ñimoo tuchi cote ra. Mbae ruqui rã tuchi que nyasi no nda. ¹³ Nyasitata que ngoi ngoi ngaẽ íbii cote ra. Sã ira a riqui uqui quiririã ñimbuqui no. ¹⁴ Ibei abe que ua cote ra. Sã emo ndiqui papel acua acua no. Sita ibate abe que siri siri ja nyesi ra. Ama ndisha joõ abe que echoi siri siri ja ra. ¹⁵ Mbia que ñimi ñimi ja ibicua ye ra. Sita imi ye abe. Mbia rerecua. Mbia rimba abe. Mbaecha abe. Soldados rerecua abe. Mbia que ñimi ñimi jate cuu ra. Esiquichete quia ñene. ¹⁶ Mbia siquiche mose que ñee ñee jate sita ibate je cuu ra: —Jenyu ngoi urearõ ureiquia. Ñ nda Dios mbae rasi saanguquia eã ure je. Ñ nda Jesucristo mbae rasi saanguquia eã ure je no. ¹⁷ Dios riqui mbae rasi raanguquia uquiato eã je co. Aba quia ra ñimbirãcuã ã je, i que mbia quia siquichete cuu ra.

7

Ángeles Dios mbae marca miĩ miĩ mbia je

¹ Aquere que cuatro ángeles atea cuu ra. Emo ngue chí juã tenda chuisa quiti ra. Enongue que tenda sosa quiti no nda. Enongue que sur quiti no nda. Enongue que norte quiti no nda. Ũquĩ ngue quiririã isi tuchi quia ra. I chu eã sacua. Mangue jenda chooñoa quitinda abe ichu eã sacua. Ama ndisha quiti abe. Ñ nda quiririã ira rãquiã mo ichu eã tuchi. ² Angel nongue mo ndese abe que amae no nda. Tenda chuisa quiti que eru quia ra. Dios mbae marca que equereco ra. Ñeemombo que ũquĩ ángeles cuatro je ra. ³ —Mbae rasi ra jemondo jeichĩ ibi je jẽ. Ama ndisha abe je. Ira abe je. Dios rimba ruba rese Dios mbae marca uremiĩ miĩ na nyii, i que ñeemombo ángeles cuatro je ra. ⁴ Ciento cuarenta y cuatro mil ndese que Dios mbae marca miĩ nda. Judíos chumumbara ja que ra.

⁵ Judá riirĩ ndei doce mil.

Rubén ndiirĩ ndei doce mil.

Gad ndiirĩ ndei doce mil.

⁶ Aser riirĩ ndei doce mil.

Neftalí riirĩ ndei doce mil.

Manasés riirĩ ndei doce mil.

⁷ Simeón ndiirĩ ndei doce mil.

Leví riirĩ ndei doce mil.

Isacar ndiirĩ ndei doce mil.

⁸ Zabulón ndiirĩ ndei doce mil.

José riirĩ ndei doce mil.

Benjamín ndiirĩ ndei doce mil.

Ũquĩ ja rese que ángeles Dios mbae marca miĩ miĩ nda.

Mbia tubiriã iraoshĩ

⁹ Aquere que mbia cuabête atea cuu ra. Contar i ja aroneate que ee cuu ra. Ecuabête quiatu ngue re. Mbia chumumbarate que ra. Mangue chooñoa jenda abe tubiriãte que ra. Echeê ñumumbarate que ra. Dios ruba quiti que ũquĩ chi jate juã nda. Cristo ruba quiti abe no. Eiraoshĩ ja que chi ra. Sindo que equeru ja oo ra. ¹⁰ ũquĩ ngue tasê tasête u ñee Dios je ra. Cristo abe je. ã i chõ ngue equia ñee nda:

Nde ae ereico nguiã mbia rirõ eicuã si co.

Nde ereico trono tose mbia rerecuarã co.

Jesucristo rese chõ ereico nguiã mbia rirõ ndirõ eicuã si co,

i que ũquĩ ja ñee Dios je ra. ¹¹ Angeles que ñumbui jate u Dios mama cuu ra. Mbae reco cuatro abe mama. Ae amei veinticuatro chi nae, ũquĩ abe mama no. ũquĩ ángeles que ngoi jate ngũiã ndese Dios ruba quiti ra. Ngũiã ndese que echĩ ñee turã jate Dio s je ra:

¹² Dios turã tuchite riqui mbia je co.

Sã mbia riqui ñee turã mbei eriĩ.

Dios aquiatu tuchite riqui co.

Sã mbia riqui “gracias” i bei ee.

Dios quirãcuã tuchite riqui co,

i jate que ñee turã Dios je ra. ¹³ ũquĩ amei mo ngue ñee seje cote ra: —¿Aba ã nde? Ae eiraoshĩ chi a. ¿Ma si ecuaẽ a re no? i que ñee seje cuu ra. ¹⁴ —Ereicuate nde resẽ, Amei, ae que ee ra. Ae que eicua seje cote ra. —ã ngue mbae rasi saã tuchĩ quia resẽ. Tiru irei ji rã ño ã ñia ndiqui nguiã ã cote. Jesucristo echĩã mbitirõ nguqui je resẽ. ¹⁵ Nyebe eriqui beite nguiã Dios rese ã. Nyebe eriqui nguiã mbae raã naa mbei Dios je echuchúaa ã. Dios ra siqui bei erese. Teaquiato bei ra mingo. ¹⁶ ũquĩ nda ngũiãcuã irara eã mbei. Huiisei abe ra eirara eã no. Tenda abe ra eiro eã. Huiiriei abe ra eucuyã eã cote. ¹⁷ Jesucristo quia ra eteaquiato bei mingo. Sã oveja raarõsa riqui oveja reaquiature no. Sã eriqui oveja rerao rao mbiu no. Eĩ si ra Jesucristo ũquĩ ndeaquiato mingo. Dios ra echeseo mbutiba bei cote, i que amei ñee seje ra.

8

Mbae rei ji shimbu turã ndetashĩ ngasẽ oso Dios je

¹ Jesucristo que sello nongue ndoso libro si cote ra. Séptimo sello. Mbae ibatenda que quiriri tuchĩ sello ndoso mose ra. Quiriri arete que ra. Media hora chee. ² Siete ángeles chi quia Dios ruba quiti nae, ũquĩ ndese que amaembe cuu ra. Emo ngue trompeta mee ja ja ũquĩ je ra. Siete que trompetas ra. ³ Angel mo ngue tu incienso riru mo nderu ra. Oro ao ji. Tiba que uã altar jii ra. Emo ngue incienso tubiriã mondo ee cuu ra. Altar mo ngue chí oro ao ji ra. Aque arõ ngue ángel incienso ñono nda. Dios ruba quiti. Ae Dios quiato ñee ñee nguia Dios je nae, ũquĩ ñee ngue ngasẽ nguia Dios je ra. Incienso rei jí shimbu turã ndese. ⁴ Incienso retashĩ ngue nyui oso quia ángel o si ra. Dios quiato cheẽ mbirõ ngue eriqui oso ngasẽ Dios je ra. ⁵ Angel que incienso riru mombisẽ tata reteĩ je ra. Altar jenda je. Ichusẽ ngue ibi quiti cuu ra. Ama ngue sieu tuchĩ cote ra. Pirirã pirirã i tuchĩ que ra. Ibi abe que nyere cuu no nda.

Angeles trompetas mbucheẽ

⁶ Ae siete ángeles trompetas quereco nae, ũquĩ ngue icoquiato cote ra. Trompeta mbucheẽ sacuã.

⁷ Emo ngue trompeta mbucheẽ cote ra. Iquitã ngue ngoi ngoi tuchĩ íbii cote ra. Tata abe que ngoi ngoi ra. Ireĩ tuchĩ que cote ra. Mbae ruqui rã. Ibi tercera parte que oquiei tuchĩ ra. Ira tercera parte abe que oquiei ra. Mbae ruri abe que oquiei ja no nda.

⁸ Segundo ángel que trompeta mbucheẽ cote no nda. Aque mose tuchĩ que mbae mo ndu ngoi ama ndisha ye ra. Ecuasu tuchĩ que ra. Sita ibate rã. Sendi que u ama ndisha ite re ra. Ama ndisha tercera parte ireĩ tuchĩ que cote ra. Mbae ruqui rã. ⁹ Ama ndisha riinda

tercera parte que mano ja ra. Ae ngata quia ama ndisha rui barcos nae, ùquĩ tercera parte abe que ñiimi imi ja no nda.

¹⁰ Tercer ángel que trompeta mbucheẽ cote no nda. Aque mose que nyasitata cuasu mo ndu ngoi íbii ra. Tata rendi rã ngue erendi ra. Ngoi que ama tercera parte ye ra. Eriecua tercera parte ye ja abe que ngoi no nda. I mbiicua tuchi que ra. ¹¹ Etei, i que equia aque nyasitata je ra. Nyasitata que ama tercera parte mbotei tuchi ra. Itei tuchi que cot e ra. Nyeb e mbia riqui nguiã mano mano tuchi iu mose cuu.

¹² Cuarto ángel que trompeta mbucheẽ cote no nda. Aque mose que mbae mo tenda mbuchecuayãte tercera parte ra. Nyasi tercera parte abe. Nyasitata tercera parte abe no. Nyebe mbae checuayã tuchi riqui nguiã mbia je nyaashĩ mose tercera parte. Isa mose abe nyasi mbae tesae eã tercera parte. Nyasitata abe no.

¹³ Nguira risha rese que amae cuu cote ra. Mbebe que equia ibate tuchi searõ nda. Ñeemombo mombo que equia ra: —Aba mbia eã tuchi mbia ibi jenda. Mbae rasi ra esaã tuchi cote. Angeles ataque nyuihuĩ mose. Angeles tres trompetas mbucheẽ mose, mbia ra mbae rasi saã tuchi cote, i que nguira risha ñee nda.

9

¹ Quinto ángel que trompeta mbucheẽ cote no nda. Aque mose que nyasitata mo ngoi u íbii seje cuu ra. Mbia raãte que aque nyasitata ra. Nyasitata que íbicua atiquia jea ra. Abismo, i que hue íbicua je ra. ² Eequia mose que tatashĩ usẽ tuchi ra. Sã tata riqui nyuuta rosot e tetashĩ no. Tatashĩ ngue tenda choote ra. Mbae mbuchecuayã jate que ra. ³ Tatashĩ si que tucu mbuae ngaẽ tuchi usẽ cote ra. Tucu mbuae que ibi mboo ja tuchi nyoĩ mangue choõnoa nda. Mbia i i tuchi que equia ra. Quiraẽ ndasi rã tuchi que eriqui mbia je ra. ⁴ Emo ngue ñee tucu mbuae je ra: —Ira mo nda jẽuchĩ jẽ. Ira ruri j a abe. Mbae ruri ja abe no. Quiata abe no. Mbia Dios quiatoã achõ ño jembasi mbasi quia. Ae Dios mbae marca quereco eã nguia nguba rese nae, ùquĩ. ⁵ Ûquĩ je mbae rasi jẽsaanguquia tuchi cinco meses. Jẽiquia eã ño, i que ñee tucu mbuae je ra. Quiraẽ ndasi rã tuchi que tucu rasi riqui mbia je ra. ⁶ Aque mose ra mbia “nandemano” i tuchi rei nguiã nyue. Mano aroneate rae.

⁷ Caballo rã tuchi que tucu mbuae ra. Sã caballo riqui icoquiato guerra raã naa sacua no. Corona naanguia que siqui tucu mbuae ãquĩ ndese ja ja ra. Oro ao ji ereae. Mbia ruba raãte que tucu mbuae ruba ra. ⁸ Cuña a raãte que ea ra. Nyacuareĩ naate que ereĩ nda. ⁹ Eishia ãtã tuchi que ra. Hierro rã. Mbia eiõ aronea. Guerra ndieu rã tuchi que ebebe mose ra. ¹⁰ Sã quiraẽ ndiqui mbia i ngocoi je no. Eĩ si que equia mbia i i ngocoi je ra. Mbia mbasi mbasi que equia cinco meses ra. ¹¹ Angel icua mo ngue tucu mbuae rerecua ra. Ae íbicua atiquia jea nae, aque que ererecua ra. Abadón, i que hebreo cheẽ nguia ee ra. Apolión, i que griego cheẽ nguia ee no nda. —Mbia iquiasa, i chõ nguiã embae nombres je.

¹² Tucu mbuae que ua chee cote ra. Mbae rasi ñiinda chõ ùquĩ nde. Mbae rasi nyeremo tasenei jẽje cote.

¹³ Sexto ángel que trompeta mbucheẽ cote no nda. Aque mose que emo ñee altar jii Dios mbae ra. Oro ao ji rei altar. ¹⁴ Ñee ngue ángel je ra. Ae trompeta mbucheẽ namo nae, aque je. —Cuatro ángeles embui rã mondo. Aecua jí chi Ama Eufrates nae, ùquĩ embui rã mondo, i que ee ra. ¹⁵ Cuatro ángeles que embui mondo cote ra. Aque mose sacua ngue Dios ùquĩ nderecoquiato ra. Ûquĩ ngue mbia iquia iquia tuchi tercera parte cuu ra. ¹⁶ Soldados tubiriã tuchi que ùquĩ ángeles nimba cuu ra. Doscientos millones tuchi que ra, i que achandu ra. ¹⁷ Caballo átoo que soldados chi ja ra. Eishia riquisã ja ja que mbae ãtã ñi nda. Eishia aosa mbiitã jí que ra. Eireĩ. Erubi. Echo. Nyacua ãquĩ na ngue caballos seje cuu ra. Tata que emombo mombo ja quia uchuru rĩ nda. Tatashĩ abe. Azufre abe no. ¹⁸ Ûquĩ tres que mbae rasi tuchi ra. Tata. Tatashĩ. Azufre. Ae caballos mombo mombo quia uchuru rĩ nae, ùquĩ. Ûquĩ ngue mbia iquia iquia tuchi quia tercera parte

ra. ¹⁹ Ngocoi je que eriqui mbia mbasi mbasi tuchi ra. Mbei tasi je rã tuchi que erocoi ra. Uchuru je abe que eriqui mbia mbasi mbasi tuchi ra.

²⁰⁻²¹ Nyebe mbia riqui nguiã mano mano tuchi ũquĩ ndasi je. Mbia ataque quiatu que siqui beite quia huiicua ndese ra. Eicua icua mbei nyue. Nyiiquia iquia. Brujería raã naa mbei. Siqui icua icua cuña mo ndese. Mbae mbuquiachã quiachã mbei. Uchisaã icua si hui eã mbei. Siqui beite que equia aba checuayã ndese ra. Uchiao Dios abareã ndese abe no. Oro ao ji. Plata ao ji. Bronce ao ji. Sita ao ji. Ira ao ji abe no. Ũquĩ ja rese chõ ngue eriqui ra. Ũquĩ mae aroneate raque Dios abareã. Mbae andu aroneate raque. Ngata aroneate raque no.

10

Angel libro mo quereco

¹ Angel mo ngue nguichi ibei si seje cuu ra. Equirãcuãte que ra. Ibeishĩ ngue equeru huiiraorã nda. Ibei asa que chĩ eãquĩ mama nda. Eruba nininyate que tenda rã sí ra. Etima abe nininyate que ra. Sã tata nininyate riqui no. ² Libro ñetẽ mo ngue equereco oo ra. Eequia ji que equereco ra. Utima ndibisho que emii ama ndisha ye ra. Utima ndibisho que emii ibii no nda. ³ Tasẽ tuchi que ra. Sã nyacua riqui curu curu no. Erasẽ mose que ama ñee siete veces ra. ⁴ —Ae rese ama ndieu sembiirandu nae, aque tambesa rã, ae rei que se cote ra. Ibatenda mo ngue ñee ño seje ra. —Ae ama ñee erechandu nae, ũquĩ nda erembesachĩ. Eresenei seneichĩ nda emo je. Echeẽ emocoño ño, i que seje ra. ⁵ Ae ángel tima ndibisho chĩ ama ndisha ye nae, aque que oo uquiatocutinda mee ibate quti ra. ⁶ Ñee ngue cote ra: —Dios que sembu ra. Ae siqu i beite quia co nae. Ae ibei chao nae. Ae ibi chao nae. Ae ama ndisha chao nae. Ae mbae chao ja tuchite nae. Aque que sembu co renei nenei sacua nda. Achite mbae ja ñi ua a cote. ⁷ Séptimo ángel nda nyuihuĩ cote. Trompeta mbucheẽ. Dios cheẽ ique ja mose r a nyuihuĩ cote. Ae Dios ñee uquiato ñiinda je nae, ũquĩ nda ique ja echeẽ cote. Mbia rerecuarã tuchi ra Jesús cote, i que ángel quirãcuã ñee seje cuu ra.

⁸ Ae cheẽ achandu ibatenda nyii nae, aque que ñeembe seje ra. —Eso rã libro ñetẽ isi. Ae tima chĩ ama ndisha ye nae, ae tima ndibisho chĩ ibii nae, aque si libro ñetẽ eisi rã. Eequia ji eisi, i que seje ra. ⁹ Ae aso nguiã ñee ángel je. —Libro ñetẽ emee na seje, ae que ee ra. Ae emee nguiã ñee seje cote. —Co libro ñetẽ jẽ. Eu ja. Irao raãte raque ra eachã namo mose. Etei tuchite quiatu ra nderie je cote, i que seje ra. ¹⁰ Angel que libro ñetẽ mee seje cote ra. Au que se ra. Eturã tuchi que sechuru je ra. Irao rã. Se eu tuchi mose quiatu que eteite serie je cote ra. ¹¹ Emo ngue ñee seje cote ra. —Dios cheẽ nda eresenei senei sí mbia ja je. “Co ra Dios saã. ã nda Dios saã no”, ere ra mbia je. Ishonda abe je. Mangue chooñoa jenda abe je. Mbia cheẽ ñumumbara abe je. Mbia rerecuã jate abe je, i que seje cuu ra.

11

Dios quiato nyeremo Dios cheẽ senei senei

¹ Dios que uu mo mondo séoo cuu ra. Ñee ngue seje ra. —Eso Dios chuchua mbuchechea checha. Altar abe embuchechea. Ae mbia chi huee ñee ñee Dios je nae, ũquĩ abe je contar ere rã. ² Itaicuee ra erembuchechachĩ jẽ. Patio ra erembuchechachĩ jẽ. Ũquĩ ngue amee mbia sequiatoã je ra. Sequiatoã nda irõ irõ Jerusalén ndese cuarenta y dos meses chee. ³ Sequiato nyeremo je ra sequirãcuã amee. Ũquĩ nda secheẽ senei senei tuchi quia mbia je 1,260 días chee. Tiru rondei ra ũquĩ quereco quia, i que seje ra.

⁴ Dios quiato nyeremo ndei olivos i nyeremo na sí. Candeleros nyeremo na sí no. Sã Dios mbae reaquiato ja no. Uquiato nyeremo abe ra etequiatu no. ⁵ Dios ra uquirãcuã mee ũquĩ nyeremo je. Emo embasi serĩ mose, tata ra embu embu uchuru si. Ucuãyãsa mbasi tuchi sacua. Eĩ nda mbia mano mano, ũquĩ Dios quiato nyeremo ucuãyã mose.

⁶ Ñquĩ Dios quiato nyeremo ama mbuchaaqui eã arõte, Dios cheẽ nenei nenei mbei mose mbia je. Mbae ruqui rã nda ama naa. Mbia ra embasi mbasi arõte uquirãcuã je. Ibi jenda a mbasise mose, mbasi tuchi rae. ⁷ Ñquĩ Dios quiato nyeremo Dios cheẽ nenei nenei ja mose mbia ja je, icuã nda tu icuãte ee cote. Ibicua yenda. Icuã nda Dios quiato nyeremo iquia cote. ⁸⁻⁹ Emo ñquĩ Dios quiato raaque nyati aroneate. Erete tiquia iriã nda chichõ itaicuee rĩ. Mbia mangue choõnoa jenda abe tuchi r a mae ja eraaque rese. Tres días y medio chee rae. Jerusalén ndei ra ñquĩ. Ae mbia Jesucristo mbucha ira rese nae, huee. Hue jenda quiarei eicuã tuchi mbia. Sodoma jenda rã. Egipto jenda rã abe no. ¹⁰ Ae mbia siqui quia ibi rĩ nae, ñquĩ ia tuchi rae. Dios quiato nyeremo mano mose. —Ae nandechiao icuã siquisã quisã nguia nae, ñquĩ ngue mano cote ra, i r a eyate ñee nyue. Nyebe ra eriqui mbae mondo mondo tuchi nyue. ¹¹ Dios quiato nyeremo ndaaque que chi tres días y medio cuu ra. Aquere que Dios embuquera sí seque re cuu ra. Júã ngue cuu ra. Mbia que siquiche ja tuchi mae erese ra. ¹² Ibatenda que ñee nyecua ñquĩ Dios quiato nyeremo je cote ra. —Jenyu aa quiatu ibate, i que Dios ñee ee ra. Nyoĩ que ibate ibei ye cuu ra. Eucuãyãsa que mae mbeite u echui rese ra. ¹³ Aque mose tuchi que ibi nyere icuã nda. Sucha tubiriã ndibisho que ngoĩ ngoĩ jate ra. Mbia tubiriãte que mano nda. Siete mil que mbia mano nda. Mbia ataque que siquichete ra. Ñee turã turãte que equia Dios ibatenda je cote ra. ¹⁴ Segundo mbae rasi chõ ã nde. Tercero quia tasenei jėje cote.

Séptima trompeta mbucheẽ cote

¹⁵ Séptimo ángel que trompeta mbucheẽ cote no nda. Ñquĩ mose que mbia ñeemombo ja ja ibatenda ra. Eĩ ngue tasẽ tasẽ nda:

Mbia mo ibi jenda mo nda siquiã ererecuarã cote.

Dios ae chõ nda siqui ererecuarã cote. Nguirĩ ndese.

Ae ae chõ nda siqui ererecuarã mbei cote,

i que ibatenda tasẽ tasẽ cuu ra.

¹⁶ Ae amei veinticuatro siqui beite quia Dios jii nae, ñquĩ ngue ngoĩ ngũĩã ndese ñee Dios je cuu ra. Eĩ ño ngue ñee nguia:

¹⁷ Gracias ure tuchi quia ndeje co, Dios.

Ndequirãcuã mbae saã ja arõte quia co.

Ereico beite que equia nyii ra. Namu abe no. Ereico beite ra eno.

Ereico ndequirãcuã naanguquiate mbia je co cote.

Ereico mbia rerecuarã tuchi co cote.

¹⁸ Mbia rerecuã que paama ite ndeje ra.

Co mose ra ndequiatoã erembasi cote.

Ndequiatoã mano je abe ra erembasi cote.

Ndequiato abe ra erembuquera cote.

Mbae turã mee mee sacuã ee.

Ae ndecheẽ senei senei mbeite quia mbia je nae.

Ae ñee turã turã nguia ndeje nae.

Ndequiato cuasu je. Ndequiato ñetẽ je abe no.

Ndequiato ja je ra mbae turã ereme mee cote.

Ae mbia mbiicua icuã nguia nae, ñquĩ nda erembutiã co mose cote,

i que veinticuatro amei ñee turã Dios je cuu ra. ¹⁹ Dios chuchua ibatenda iquesa que quiata seje cuu ra. Caja Dios chuchua jenda que nyecua seje cuu ra. Aque rei contrato riru Dios mbae aque. Aquere que ama pirirã pirirã i ra. Ama ngue sieute ra. Ama ngue ñeete ra. Ibi que nyere ra. Iquitã abe que ngoĩ ngoĩ chee ra.

¹ Mbia mae sayã mo ndese que amae ibate cuu ra. Cuña nguasu tuchi mo ngue ra. Tenda que eirao ra. Nyasi que chí ei quitu ra. Corona ngue equereco uãquĩ ndese ra. Nyasitata doce que chí corona ndese ra. ² Nañimbae que cuña nda. Tasẽ tasẽ tuchi que equia nguiĩ ndasi je ra. ³ Aquere que amae mbia mae sayã mo ndese ibate no nda. Dragón ireĩ mo ndese que amae nda. Siete que aque dragón ãquĩ cuu ra. Diez que erambashĩ nda. Corona ngue chí eãquĩ ja rese ra. ⁴ Dragón ngue nyasitata tubiriã siichã tuchi ìmbu ìbii ngocoi je ra. Cuña ji que eñi eraarõ cote ra. —Sã nyaacuquia. Eriĩ tau, i que huĩ ejii ra. ⁵ Nyaacuquia que cote ra. Erãcoẽ ngue ra. Mbia ja rerecuarã tuchi ra aque. Emo ngue eriĩ isi ra. Querao que Dios je ibátee ra. ⁶ Cuña ngue uchã oso turuquia ñi nda. Dios echuchua saã ño nguia huee reaẽ. Huee que eriqui 1,260 días ra. Huee que emo ndiqui embuquiaru quiaru ra.

⁷ Amae ngue guerra rese ibate cuu ra. Dragón icuã icuãte que ángeles je ra. Miguel nimba ángeles abe que ucua ucu a dragón nimba ángeles rese no nda. Nyiiquia serĩ jate que cuu ra. ⁸ Dragón ngue ganar i aroneate umbae ángeles rese ra. Nyebe eriqui aroneate nguiã ibate cote. ⁹ Dios que dragón mombo bei ibate si cote ra. Mbei ima ndei dragón. Diablo. Satanás, i abe que ee ra. Ae chõ mbia mangue chooñoa jenda mbiĩrĩ irĩ mbeite nguiã co. Dios que ae mombo ìbii cuu ra. Ngũimba rese. ¹⁰ Ibatenda ia tuchi que Dios emombo mose ra. Ibatenda mo ñee ngue achandu cuu ra: —Coche ñene. Dios riqui mbia rirõ mbei huiicua si co cote. Namu tuchi mbia riqui mae Dios quirãcuã ndese co. Cristo riqui mbia rerecuã tuchi co cote. Dios quiatu que diablo mombo nguiã. Ae Dios mbuqueta queta beite quia equiato rĩ nyii. ¹¹ Ũquĩ Dios quiato que diablo siquisãte quia Jesús ruqui je ra. Jesús cheẽ je abe no. Ae ũquĩ senei mbeite quia mbia je Jesús cheẽ nae, ũquĩ je chõ eriqui nguiã eriquisã quisã. Ũquĩ Dios quiato que siquicheãte quia umano si ra. “Tamano ndei Dios je”, i jate que equia ra. ¹² Mbia ibatenda ia tuchite cote. Mbia ibi jenda quiatuchĩ eya eãte. Mbia ama ndisha yenda abe no. Diablo quiatu que nguichichĩ u nguiã jêje, ibi jenda. Paama i tuchite equia co. Achite quiatu Dios ñi nguiã embasi a cote, i que ibatenda mo ñee cuu ra.

¹³ Dios dragón mombo mose ìbii, dragón icuã icuã ngue cuña je cote ra. Ae eriĩ nacue nyaacuquia nae, aque cuña je que dragón icuã icuã cote ra. ¹⁴ Emo ngue mbae jeo nyeremo mondo cuña je ejeorã nda. Nguira risha jeo raanguia. Cuña mbebe sacua. Eso chee sacua turuquia rĩ. Ae Dios saã echucharã turúquiaa nyii nae, huee eso chee sacua diablo si. Mbei si. Emo embuquiaru sacua tres años y medio huee. ¹⁵ Mbei que i mombo tuchi uchuru rĩ nda. Iãcuana. Cuña iquia sacua ndaque chõ ũquĩ iãcuã nde. ¹⁶ Ibi ia eãte que cuña ndese ra. Nyebe ibi nyiequia nguiã i mocõ ja dragón nyuru jenda. ¹⁷⁻¹⁸ Nyebe dragón paama i tuchi nguiã cuña je. Eicuã icuã mbeite que eriqui cuña ndiĩrĩ ataque ja je cote ra. Ae Dios cheẽ mumba eãte quia nae, ũquĩ je chõ eriqui nguiã cuña ndiĩrĩ i. Ae siqui beite quia Jesús cheẽ ndui nae, ũquĩ je dragón icuã icuã mbeite riqui co.

13

Icuã nyeremo

¹ Ama ndisha rimia ndese que aĩ juã cuu ra. Mbae mo ndese abe que amae huee ra. Icuã mo ngue usẽ u quia ama ndisha si seje cuu ra. Siete que eãquĩ nda. Diez que erambashĩ nda. Corona ngue chí erambashĩ ndese ja ra. Eãquĩ ndese que nombre mo mbesa ji ñi nda. Aque nombre icuãte que Dios je ra. ² Nyacua risha rã ngue icuã nda. Oso i rã tuchi que ei ra. Echuru que nyacua churu rã nda. Dragón ngue uquirãcuã mee tuchi icuã je ra. —Ererecuarã nde, i tuchi que dragón icuã je ra. ³ Icuã ãquĩ mo sia ji tuchi rei ngue re. Manombi chõ ndei ngue re. Nyerõ ñochĩ ngue re. Nyebe mbia mangu e chooñoa jenda nyuruira jate nguiã mae erese cote. Mbia que siqui jate erui cote ra. ⁴ Mbia que ñee turã turãte quia dragón je ra. Uquirãcuã mee mose icuã je. Icuã je abe que eriqui ñee turã

turāte ra: —Co icuā turā na eāte mbia mo. Ae miñ ño equirācuā ndiqui nguiā mbia si co, i jate que mbia quia ee ra.

⁵ Icuā ngue ucuasu saā saā tuchi quia Dios je ra. —Dios tuchi chō se re, i tuchi que equia mbia je ra. Dragón ngue emiñ mbia rerecuarā cuarenta y dos meses ra. ⁶ Aque mose bei que eriqui ñee icuā icuā Dios riñ nda. Echuchua riñ abe no. Dios rimba ibatenda riñ abe no. ⁷ Dragón ngue uquirācuā mee tuchi icuā je ra. Icuā icuā icuāte que eriqui Dios quiato je cote ra. Dios quiato iquia iquia cheete que equia ra. Icuā ngue mbia mangue chooñoa jenda rerecuā tuchi cote ra. Mbia cheemo abe rerecuā tuchi que cote ra. ⁸ Mbia Dios quiatoā ja tuchi que siqui icuā ndese ra. Ae embae nombre mbesa iriāte riqui Jesús mbae libro rese nae, ũquĩ ngue siqui jate icuā ndese ra. Dios quiato mbae nombre que Jesús mbesa mbae ao ja nond e coose ra. Jesús mano nonde eriñ. ⁹ Jēisa mose, secheē jeñandu rā. ¹⁰ Dios mbae icua ja chō nguiā, mbae tā i nonde equiato je. —Co sequiato ra mbia iquia tiquise je, i mose Dios, mbia ra eiquia tiquise je. —Co sequiato ra mbia tarō, i mose Dios, mbia ra etarō no. Sā Jesucristo rimba ñimbiācuā ño. Sā Jesucristo icua tuchi. Icuā icuā icuā mose ee. ¹¹ Aquere que amae icuā mo ndese no nda. Ibi si qu e co icuā ndu ra. Erambashĩ nyeremo ngue ra. Cordero nambashĩ na si que ra. Dragón ñee na si que echeē no nda. ¹² Equirācuā tuchi que ra. Icuā ñiinda rā sí. —Icuā ñiinda rimbarā ño jēingo, i tuchi que equia mbia mingoa ja icuā ñiinda rese ra. Ae āquĩ sia ji nyerō nguiā nae, aque. ¹³ Mbia mae sayā ngue esaā saā tuchi quia ra. Tata que embucoi ibei si mbia resa rae ra. ¹⁴ Mbia mae sayā ngue esaā saā tuchi icuā ñiinda rese eico mose ra. Eĩ ngue equia mbia mbiĩrĩ irĩ tuchi ra. —Icuā ñiinda raanguia mo mbae mo jenyao jē, i que ñee mbia je ra. Mbia que echao ra. Ae āquĩ sia ji tiquise je nae, ae nyerō nguiā nae, aque raanguia que mbia chao ra. ¹⁵ Icuā ngue ereco mee mbae ao ji je ra. Mbucuaata que ra. Mbucheē ngue ra. Mbia rā ngue eriqui cote ra. Ae ngoi sereāte quia ngūiā ndese mbae ao ji résaa nae, mbae ao ji que ũquĩ iquia cote ra. ¹⁶ Icuā ngue umbae marca miñ jate mbia rese ra. Mbia ruba rese. Mbia o rese equiatocutinda. Mbia riirĩ ndese. Mbia cuasu rese. Mbaecha rese. Mbaecha reā abe rese. Mbia rimba rese. Mbia rimba eā ndese abe no. Icuā ngue marcar i ja mbia ja je cuu ra. ¹⁷ Mbia mo marcar iriā mose, ũquĩ mbae mo isi aroneate. Mbae mo je vender i aroneate no. Icuā mbae marca nderequia eā mose. Icuā mbae número abe rerequia eā mose no. ¹⁸ Ae ndua tuchi eāte quia nae, ũquĩ nda ñ icua eā. Ae mbae icuate quia nae, sã ũquĩ icuā mbae número icua. Mbia mo miñ ño ñene. Embae número rei 666.

14

Mbia 144,000 irasei rasei Dios je

¹ Mbae mo ndese abe que amae cuu ra. Jesucristo que chí juā Ibi Ibate Sión seje cuu ra. Ae je eriqui Cordero i. Mbia cuabē tuchi que chi erese ra, 144-000 que mbia chí erese ra. ũquĩ nduba rese ja ja que Jesucristo mbae nombre mbesa ji ñi nda. Dios mbae nombre mbesa ji abe no. ² Mbae rieu que achandu bei quia ibatenda ra. Tororomba ata ata rieu raāte que ra. Ama ndieu abe raāte que ra. Sã mbia tubiriāte riqui arpas mbucheē ñee no jē, ũquĩ naate que erieu riqui ra. ³ ũquĩ mbia cuabēte que irasei rasei quia Dios résaa ra. Mbae reco cuatro résaa abe no. Amei veiticuatro résaa abe que eriqui irasei rasei no nda. Eirasei rasei yasu que ra. Mbia mo ngue ñimbaaquiatu aroneate quia eirasei rasei yasu je ra. Mbia 144,000 achō ño ngue ñimbaaquiatu aque irasei rasei yasu je ra. Dios ũquĩ sirō nguiatu quia mbae icuā si reaē. ⁴ ũquĩ ngue ñimbiācuā eāte quia mbae icuā je ra. Ñimbiācuā eā siqui cuña mo ndese no. Siqui turā mbei equia Jesucristo rese ũquĩ. Dios que esirō mbei mbia ibi jenda si ra. Ofrenda turā na tuchi chō ũquĩ Dios je re. Jesucristo abe je. ⁵ ũquĩ nguiarei ñee ñooño eā tuchi ũquĩ. ũquĩ turā tuchite eriqui Dios je ā.

Tres ángeles ñee mbia je

⁶ Amae ngue ángel nongue rese cuu ra. Mbebe mbebe que equia ibei rĩ cuu ra. Dios cheē turā ua eā je que equereco quia ra. Erenei nenei sacua mbia ja je. Mangue chooñoa

jenda ja je. Mbia cheẽ ñumumbara abe ja je. ⁷ Aque ángel que ñee nda: —Jẽireĩ ireĩ jiri Dios si. Jeñee turã turã jiri quia ee. Achite Dios ñi mae ja mbia rese a. Uquiatoã mbasi nonde. Dios quiatu ngue mbae chao ja nguiã. Ibei. Ibi. Ama ndisha. Ama ndiicoĩ. Nyebe ra mbia ñee turã ee, i que ángel ñee cuu ra.

⁸ Angel nongue abe que siqui seje cuu ra. Aque que ñee cote ra: —Sucha tubiriã Babilonia ngue quiachãte cote ra. Babilonia nda mbia mbiicuaã eã cote. Mbia mbiicuaã tuchichĩ equia nyii, i que aque ángel ñee cuu ra.

⁹ Angel nongue abe rese que amae no nda. Ñee asite que ra: —Icuã ndese chõ nda jẽingochĩ jẽ. Icuã naanguia mbae ao ji rese abe chõ nda jẽingochĩ jẽ. Icuã mbae marca ra jemiichĩ jenduba rese jẽ. Jẽo abe rese ra jemiichĩ jẽ. ¹⁰ Emo emii mose, Dios ra paama i tuchi ee. Emo emii mose, Dios ra embasi tuchi. Dios ra ùquĩ mbasi bei tata je. Azufre je abe no. Mbasi bei ra ángeles resa rae. Jesucristo resa rae abe no. ¹¹ Ûquĩ nda Dios mbasi bei. Mbae rasi ra eucua mbirĩ jiriã. Siqui quiatu que equia icuã ndui mbaerã nda. Icuã naanguia ao ji abe rese quiatu que eriqui ra. Icuã mbae marca abe rese quiatu que eriqui mbaerã no nda.

¹² Dios quiato tuchi ra ùquĩ saã eã. Sã eriqui beite Dios cheẽ ndui. Sã eriqui ñimbirãcuã mbeite, i que ángel ñee cuu ra.

¹³ Ibatenda mo ngue ñee seje cuu ra: —Ã embesa rã: “Jesús quiato mo mano mose, eyate riqui co”, ere chõ mi embesa. Espíritu Turã ñee abe chõ ùquĩ nde. Jesús quiato mo mano mose, uquenea nda eucua cote. Ae mbae turã esaã saã nguia nyii nae, ùquĩ si ra Dios tesareia mbei, i que ibatenda ñee seje ra.

Dios uquiatoã mbasi mose, mbae a riami ami na ño nda esaã ee

¹⁴ Ibeishĩ ndese que amae cuu cote ra. Emo ngue chĩ ngoi ibeishĩ tose ra. Jesucristo rã tuchi que ra. Corona ngue chĩ eãquĩ ndese oro ao ji ra. Tiquise raanguia rimbete que equereco oo ra. Quiata a ucua ucua sacuaã. ¹⁵ Angel mo ngue tu usẽ Dios chuchua si ra. Ñeemombo que Jesucristo raanguia je ra. —Mbae eucua ucua tiquise raanguia je cote. Mbae a quiche jate mangue chooñoa jenda ja, i que ee ra. ¹⁶ Ae chĩ ibeishĩ tose nae, aque que tiquise raanguia mee ibi qiti ra. Aque mose tuchi chõ ngue mbae a ibi jenda ishao ja tuchi cote ra.

¹⁷ Angel mo abe que usẽ u Dios chuchua ibatenda si ra. Tiquise raanguia rimbete que equereco no nda. Uvas ucua ucua sacuaã. ¹⁸ Angel mo ngue tu altar si cot e ra. Tata raarõsa altar jenda rei aque ángel. Ñeemombo que tiquise raanguia rerequiasa je ra: —Uvas eucua ucua tiquise raanguia je cote. Mangue chooñoa jenda ja eucua ucua. Equiche jate, i que ra. ¹⁹ Angel que tiquise raanguia mee ibi arõ cote ra. Aque mose tuchi chõ ngue uvas ibi jenda ishao ja tuchi ra. Uvas ishao ji que emondo ja tuchia mo nda. Eriami ami sacuaã. Dios uquiatoã mbasi mose, mbae a riami ami na ño ùquĩ nde. ²⁰ Isho jiri que eriqui uvas riami ami sucha tubiriã si ra. Dios uquiatoã mbasi mose, uvas riami ami na ño ùquĩ nde. Eruqui riquiraa tuchi que ra. Caballo mbuchecha tuchi que eruqui riquiraa ra. Trescientos kilómetros tuchi que eruqui seje cuu ra.

15

Angeles mbae rasi siete quereco ja eriru ye

¹ Aba siquichesa mo ndese que amae ibei rĩ cuu ra. Mbia mbiirandu sacuaã. Siete angeles rese que amae nda. Mbae rasi chumumbarate que ecurucuaã cuaẽ nguia fbii ra. Siete que mbae rasi ra. Mbae rasi tuchi. Ûquĩ siete mbae rasi ua mose, Dios ra mbae rasi mbu si eã cote.

² Ama ndisha icoi mo ndese que amae nda. Enininya tuchi que ra. Vidrio raanguia. Tata abe raanguia. Ae siquiã mbei icuã ndui Jesús quiato nae, ùquĩ ndese que amae no nda. Icuã naanguia rese abe siquiã. Icuã mbae número abe que equerecoã nda. Ûquĩ ndese que amae ama ndisha arõ nda. Arpas Dios mbae je que echĩ tocar i ra. ³ Ae Moisés

irasei rasei nyii nae, ũquĩ sí je que echi irasei rasei ra. Ae mbia irasei rasei Jesús je nae, ũquĩ sí je que echi irasei rasei ra. Ñe ngue irasei rasei ra:

Ndechiao turã tuchite, Dios.

Ndequirãcuã tuchite ereico co.

Mbia erembuchiabi jiri jiriãte quia co.

Erecheẽ iru iru eãte quia co.

Mbia rerecua jate ereico co.

⁴ Mbia ra ireĩ ireĩ ja ndesi mae mose ndechiao rese.

Ñee turã ja ra nderiĩ.

Nde mii ño ererecua tuchi re.

Mbia ra ngaẽ ja tuchi nderea. Ñee turã sacua ndeje.

Ndechiao turã ndese quiatu ngue mbia mae nguiã,

i que mbia irasei rasei ama ndisha arõ cuu ra.

⁵ Aquere que mbae mo abe atea cuu ra. Dios chuchua ibatenda eiquesa que quiata seje cuu ra. ⁶ Siete ángeles mbae rasi quereco quia nae, ũquĩ ngue usẽ nyoĩ Dios chuchua si cote ra. Eiraoshi tuchi que nyoĩ usẽ nda. Oro que equereco huiishia ati ra. ⁷ Ae rese ama e mbae reco cuatro nyii nae, ũquĩ m o ngue mbae riru mee mee ja ũquĩ ángeles siete je ra. Oro ao ji rei mbae riru. Mbae rasi mbisẽte que chi eriru ja ye ra. Dios mbia mbasi tuchi sacua. ⁸ Dios nininya tuchi que seje cuu ra. Equirãcuã tuchi que ra. Nyebe que tatashi Dios chuchua mboo ja tuchi ra. Mbia mo ngue ique aroneate rã huee ra. Ũquĩ ángeles mbae rasi icherẽ cherẽ ja eã mose.

16

Angeles mbae rasi icherẽ cherẽ ja

¹ Dios chuchua jenda mo ngue ñee asite ũquĩ ángeles je cuu ra. —Jẽso mbae rasi icherẽ cherẽ ibi jenda ja rese. Dios embasi sacua, i que ñee siete ángeles je ra.

² Angel ñiinda que oso umbae mbae riru yenda icherẽ íbii ja ra. Ae siqui quia icua ndese nae, ae ngoi coi quia nguiã ndese icua naanguia je nae, ũquĩ ire rasi rasi que cote ra. Mbae asi tubiriã ngue erese cote ra. Nyerõ aroneate que ra.

³ Segundo ángel que umbae mbae riru yenda icherẽ ama ndisha ja ye ra. Mbia raaque ruqui rã ngue ama ndisha cote ra. Ama ndisha riinda que mano ja tuchi mbae cote ra.

⁴ Tercer ángel que umbae mbae riru yenda icherẽ ama ñi nda. Ama ndicoĩ ñi abe que eicherẽ no nda. Mbae ruqui rã tuchi que ama ja cote ra. ⁵ Angel ama ndaarõsa que ñee Dios je cuu ra. —Coche rei mbia icua erembasi. Dios turã tuchi chõ nde re. Ndeturã mbeite que eriqui ra. ⁶ Ũquĩ mbia icua nguiatu ngue ndequiato iquia iquiate nguiã nyii. Ndecheẽ nenei neneisa abe iquia iquia. Coche rei mbae rasi eresaanguquia ũquĩ je cote. Coche rei mbae ruqui eresaanguquia ee, i que ángel ñee turã Dios je ra. ⁷ Altar jenda mo abe que ñee Dios je cuu ra. —Ae bei. Coche mbia icua erembasi nguiã cote. Ndeturã mbeite chõ ereico nguiã nde, i que Dios je ra.

⁸ Cuarto ángel que umbae mbae riru yenda icherẽ tenda rese ra. Nyebe tenda riqui nguiã mbia rei ja ngacu je cote. ⁹ Tenda que mbia sei tuchi quia embasi ra. Ũquĩ mose abe que mbia riqui ñee turã eãte Dios je ra. Dios embasi raque. Mbia que uba eã mbei Dios rese ra. Ñee icua icua mbei chõ ngue equia eriĩ nda.

¹⁰ Quinto ángel que umbae mbae riru yenda icherẽ icua nenda rese ra. Itondaru tuchi que icua nimba ja je mbia cote ra. Mbia que hueecõ shiu shiu tuchi quia mbae rasi mose ee ra. ¹¹ Ũquĩ mose abe que mbia uba eã Dios rese ra. Huiicuã ngue esecha eãte quia ra. Ñee icua mbeite que equia Dios riĩ nda. Ngasi rerequia mose abe que eriqui ñee icua mbeite Dios riĩ nda.

¹² Sexto ángel que umbae mbae riru yenda icherẽ Río Eufrates ye ra. Ama nguasu tuchi que aque ra. Aque ama ngu e iru cot e ra. Tenda chuisa quitinda soldados iasa sacua. ¹³ Aba checuayã icua tres rese que amae nda. Emo ngue tu usẽ dragón nyuru si ra.

Enongue que tu usẽ icuã nyuru si ra. Enongue que tu usẽ Dios cheẽ nenei ñooñosa churu si no nda. Nyuri rã tuchi que ùquĩ aba checuayã icuã nda. ¹⁴ Ùquĩ aba checuayã icuã ngue mbia mae sayã saã saã tuchi quia milagros ra. Ñee ja que mbia rerecua ja je ra. Ñumunua ja sacua pelear i sacua Dios rese. ¹⁵ Sã Jesús ñee no: “Mbia ndua eã mose serese ra achu. Jêtesa tesa bei equia serese jê. Jêingoquiato bei equia jê. Ì nda jêireĩ ngũã sechu mose”, sã Jesús i no. ¹⁶ Aba checuayã icuã ngue mbia rerecua munua ja huee ra. Pelear i sacua Dios rese. Armagedón, i que hebreo cheẽ hue je ra.

¹⁷ Séptimo ángel que umbae mbae riru yenda icherẽ quiririãsa ra. Aque mose que Dios ñeemombo uchuchua ibatenda si ra. —Mbae rasi icherẽ ji jate cote, i que Dios ñeemombo ra. ¹⁸ Ama ngue pirirã pirirã i tuchite cote ra. Ama ngue sieu tuchi quia no nda. Ibei que ñee tuchi quia ra. Ibi abe que nyere tuchi quia no nda. Emo mose rã eã tuchi que ra. ¹⁹ Sucha tubiriã Babilonia ngue obo obo nyibite rĩ nda. Tres partes. Hue jenda tuchia que ngoi ja tuchi ra. Mbia chuchua que ngoi ngoi ja mangue chooñoa jenda aque mose ra. Dios quiato ngue tesareiãte nguiã Babilonia jenda chisaã icuã si. Nyebe eriqui nguiã paama i tuchi ee cote. Embasi mbasi uquirãcuã je cote. ²⁰ Islas abe que quiachã quiachã ja ama jenda ra. Ibi ibate abe que quiachamba chamba ja no nda. ²¹ Iquitã nguasu que ngoi ngoi quia mbia iquia iquia ra. Cuarenta kilos ja ja que ùquĩ iquitã nda. Iquitã ngue mbia iquia iquia tuchi quia ra. Nyebe mbia riqui nguiã ñee icuã icuã tuchi Dios rĩ. Ñee turã ndocoĩ ee.

17

Cuña icuã mbae rasi saã tuchi

¹ Ae mbae riru quereco ángeles nae, ùquĩ mo ngue tu ñee seje ra. —Nyao serese. Mbae tateacuquia ndeje. Babilonia jenda ra mbae rasi saã tuchi cote. Ae cuña siqui chooñoate quia mbia ja rese nae, aque ra mbae rasi saã tuchi cote. Ama ndisha jie eñi ngoi mar hue. ² Mbia rerecua que siqui siqui jate quia erese ra. Mbia ataque abe no. Ae que mbia mbiicuã jate quia ra, i que ángel ñee seje cuu ra. ³ Angel que sererao turuquia rĩ cuu ra. Huee que amae cuña icuã ndese ra. Icuã ireĩ átoo que eñi nda. Embesa ji tubiriãte que chĩ icuã ndese ra. Nombres mbesa ji icuã tuchi que ùquĩ Dios je ra. Icuã ãquĩ atate que ra. Siete que eãquĩ nda. Diez que erambashĩ no nda. ⁴ Mbia rerecua irao raãte que cuña icuã irao ra. Eirao ireĩ turãte que ra. Oro tubiriãte que equereco adorno nda. Perlas abe no. Sita ñetẽ aba queteamba abe no. Mbae riru abe que equereco oo ra. Oro ao ji. Huiicuã ngue equereco ja quia aque mbae riru ye cuu ra. ⁵ Embesa ji que chĩ eruba rese ra. Aba chiicuayã tuchi que ra. ã i chõ ngue huĩ nguiã: “Babilonia ño co re. Sucha tubiriã icuã ño co re. Cuña icuã nderecua ja chõ co re. Mbae icuã nderecua ja chõ co re”, i chõ ngue embesa ji huĩ nguiã eruba rese. ⁶ Quiacuate quia cuña icuã ndiqui reaẽ. Jesús quiato uninya ruqui quia embei quia quiacua nonde reaẽ. Achuruirã tuchi que mae erese cuu ra.

⁷ Angel que ñee seje cote ra. —¿Mbaerã ereico nyuruirate mae erese re? Tarembiirandu cuña icuã ndese. Ae átoo eñi nae, aque rese abe tarembiirandu. Ae siete eãquĩ ndiqui nae. Ae erambashĩ diez riqui nae. ⁸ Ae rese eremae icuã cuu nae, aque ngue siqui rei nguiã cose. Emoate namo cote. Siquibe rae. Usẽ nda ibicua si. Aque icuã quera si mose, Jesús quiatoã nda nyuruirã tuchi mae erese. Ae embae nombre mbesa ji eãte Jesús mbae libro rese nae, ùquĩ. Icuã nda oso mbae rasi raã tuchi tata cuasu cote. ⁹ Earacua achõ nda ã secheẽ icua: Eãquĩ siete rã sí rei ibi ibate siete. Cuña icuã ñi ngoi ibi ibate siete tose hue. ¹⁰ Eãquĩ siete rã sí rei mbia rerecua siete no. Cinco que mano nda. Aque mii ndiqui namo co. Emo mii nda siqui emo mose cote. Aque ra siqui mbirĩ ño mbia rerecuarã. ¹¹ Ùquĩ siete mo ndei icuã ireĩ mo. Siqui que equia nyii ra. Emoate namo cote. Siqui i ra ùquĩ siete ua mose cote no. Mbia rerecua octavo ra ae cote. Ae ra oso bei tata cuasu aquere cote. ¹² Ae erambashĩ ndese eremae diez nae, mbia rerecua diez

rã sí chõ ùquĩ nde. Mbia rerecua eã ño ùquĩ namo nde. Emo mose quia ra mbia rerecua cote. Ererecua mbirĩ ño ndae. Icuã ndese quiatu ra ererecua. ¹³ Hue rĩ sí tuchi ra ùquĩ ererecua ndua ndua. —Ererecuarã ño icuã jẽ, i ja ra ùquĩ ererecua. Uquirãcuã nda emee ja icuã je. ¹⁴ Ùquĩ nda pelear i ja Cristo rese cote. Cristo quia ra i tuchi ùquĩ ja si. Ae quia mbia rerecua tuchi re. Ae quia equirãcuã tuchi mbia mo si re. Ae siqui Cristo rese nae, Cristo chiirabo chõ ùquĩ nde. Eturã tuchi chõ ùquĩ Cristo je re, i que ángel seje cuu ra.

¹⁵ Ñee si que seje ra. —Ae ama ndisha rese eremae mar nae, ae ji cuña icuã ñi ngoi nae, mbia chumumbara rã sí chõ ùquĩ nde. Mangue chooñoa jenda ja rã ño ùquĩ nde. Sucha tubiriã jenda ja rã ño ùquĩ nde. ¹⁶ Erambashĩ diez rese que eremae nae, mbia rerecua diez na sí chõ ùquĩ nde. Ùquĩ nda cuña icuã ucuãyãte cote. Ùquĩ nda cuña icuã secha icuã cote. Erete checua ra esecha cote. Eroo ra eu. Erete ra esei tata je cote. ¹⁷ Dios que ñee nyii ra. —Mbia rerecua icuã tuchi ra cuña icuã je, i que Dios nyii ra. Echeẽ ndui sí ra eicuã icuã cuña icuã je cote. Dios que eicua nyii ra. Hue rĩ sí ra ùquĩ ererecua diez ndua. Umbae ra emondo ja icuã je. Icuã miĩ nda mbia rerecuarã ja cote. Aque mose ra Dios cheẽ ique. ¹⁸ Cuña icuã ndese ereico mae nae, sucha tubiriã na si chõ aque cuña nde. Hue sucha rei ererecua tuchi sucha ataque si. Mangue chooñoa jenda rerecua ja rei hue sucha, i que ángel seje ra.

18

Babilonia jenda ra mbae rasi saã tuchi

¹ Aquere que amae ángel mo ndese ra. Nguichi que u quia ibei si ra. Equirãcuã tuchi que ra. Enininya tuchi que ra. Ibi resae tuchi qu e eu quia ra. ² Angel que ñeemombo mombo tuchi ra. —Sucha tubiriã Babilonia jenda que ngoi ja cote ra. Mbia tiãte que huee cote ra. Aba checuayã icuã achõ ño chi nguiã hue cote. ³ Hue sucha tubiriã Babilonia jenda que mbia mbiicua jate quia ra. Mbia mbui mbui tuchi que equia Dios si ra. Ubi icuã achõ ndese chõ ngue eriqui ndua tuchi ra. “Ùquĩ na nda se chã” i ja ja que equia mbae ja je ra, i que ángel ñee cuu ra. ⁴ Ibatenda mo ngue ñee cuu ra. —Ae serimba jemo nae, hue si jenyao. Ñ nda hue jenda chisaã icuã jësaã eã jẽ abe. Ñ nda mbae rasi jësaã eã jẽ, hue jenda mbae rasi raã mose. ⁵ Hue jenda que mbae icuã saã saã tuchite quia ra. Dios tesareiãte quia hue jenda icuã si co. ⁶ Hue jenda que mbia ataque mbasi mbasi tuchi quia ra. Ùquĩ sí ra mbae rasi saã tuchi cote. Dios ra mbae rasi saanguquia i i tuchi quia ee cote. ⁷ Hue jenda que ucuasu saã saã tuchi quia ra. Ubi achõ ndese chõ ngue eriqui ndua ra. “Co ai aico turãte co. Mbae rasi tu aroneate seje”, i ja jate rei que equia ra. Nyebe ra Dios mbae rasi saanguquia tuchi ee cote. ⁸ Aque mose tuchi ra mbae icuã tu tuchi ùquĩ mbua cote. Mbae rasi icuã nda esaã tuchi. Eriãcuã ndasi tuchi ra cote. Echuchua ra oquiei ja. Mbia ra mano ja. Dios quiatu ra mbae icuã saanguquia tuchi mbia je eicuã ñii cote. Dios quiarei equirãcuã tuchi, i que ángel ñee cuu ra. ⁹ Ae ererecua mbae icuã saã nguia Babilonia jenda rese nae, ùquĩ ia eã tuchi ra erese cote. Nyeseo tuchi ra erese mbae rasi raã tuchi mose. Echuchua oquiei rese mae mose. ¹⁰ Ìsho chõ nda echi mae mbae rasi raã ndese. Esiquichete quia ñene. Ñee nda ee mbae rasi raã mose. —Ureya eãte riqui jendese ã. Babilonia sucha tubiriã jenda rei ngue jẽ nyii re. Sucha eã tuchite que jenyuchu a cote ra. Mbae rasi tu asi chõchĩ nguia jẽje ã, i ra maesa erese ñee ee. ¹¹ Comerciantes mangue chooñoa jenda ja abe ra eya eãte, Babilonia jenda mbae rasi raã mose. Nyeseo tuchi ra erese. Mbia quia nda embae isi eãte nguiã cote. Nyebe ra eya eãte cote. ¹² Æ je nda vender i nguiã ña:

oro
plata
sita ñetẽ aba queteamba huirã
perlas
turu turã tuchi
turu irei

tiru seda
 ira simbu turã mo
 marfil ao ji
 ira turã ao ji
 bronze ao ji
 hierro ao ji
 sitashĩ ao ji
¹³ canela
 aba mbushimbusa
 perfumes
 tuchua mbusimbusa
 vino
 mbae quira
 mbae cui
 trigo
 ovejas
 caballos
 ira nambacua
 mbia nimba

Ũquĩ ja je nda vender i nguiã ee chã.

¹⁴ Mbia ra ñee Babilonia jenda je cote. —Ae mbae jenyoseite quia nae, ũquĩ mo nda tu ãte jẽje cote. Jembae tubiriãte riqui nyii nae, ũquĩ mo nda jendecoã cote, i ra mbia ee cote. ¹⁵ Ae ã mondo mondo quia vender i Babilonia jenda je nyii nae, ũquĩ abe ra chi mae isho erese no. Esiquichete ra chi mae mbae rasi raã ndese. Nyeseo ra erese. ¹⁶ Ñee nda Babilonia jenda je. —Ureya eãte riqui jendese ã. Babilonia sucha tubiriã jenda rei ngue jẽ nyii re. Sucha eã tuchite jenyuchua cote. Jẽirao turã tubiriãt e rei ngue nyii re. Oro ao ji tubiriãte rei ngue adornos jembae nyii no nde.

¹⁷ Jembae ua asi chõchĩ jẽ mbae rasi raã mose, i ra ee. Ae comerciantes nyoi choi quia canoa ye nae, ae nyoi choi quia barco ye nae, ũquĩ nda chi isho mae Babilonia jenda mbae rasi raã ndese. ¹⁸ Babilonia sucha tubiriã oquiei mose ra ũquĩ nyi isho mae erese. —Sucha tubiriã tuchichĩ Babilonia. Babilonia na eãte emo, i ra nyeseo sucha tubiriã oquiei mose Babilonia jenda. ¹⁹ Ibi tuba ra emombo mombo uãquĩ ndese. Nyeseo tuchi rae. Sucha tubiriã oquiei mose Babilonia jenda. Ñeemombo mombo ra Babilonia jenda je. —Ureya eãte riqui jendese ã. Mbaechate que jẽingochĩ nyii ra. Ure abe que mbaechate ureico jeniĩ nyii no nda. Mbae ua asi tuchi chõchĩ co mose cote, i ra ñee Babilonia jenda je. ²⁰ Babilonia sucha tubiriã ua mose ra ibatenda iate cote. Jesús chimbaaquiatu abe ra eya cote. Ae Dios cheẽ senei senei quia nae, ũquĩ abe ra eyate cote. Dios quia ra mbae rasi mondo tuchi Babilonia jenda je uquiato riĩ.

²¹ Angel quirãcuã mo ndese que amae cuu ra. Sita cuasu mo ngue esui mombo ama ndisha ye cuu ra. Ñee ngue cote ra. —Eĩ nda Dios sucha tubiriã Babilonia mombo. Sã sita amombo ama ndisha ye no. Sucha tubiriã eã mbei ra Babilonia cote. ²² Nyebe ra mbia música saã eã mbei huee cote. Mbia ra irasei rasei eã mbei huee cote no. Mbia ra nyuao eã mbei mbae rese huee cote. Mbia ra mbua tocho eã mbei huee cote no. ²³ Lamparina mo nda mbae tesae eã huĩ huee cote. Emo nda ngũinisirã isiã mbei huee cote. Mbia mbaecha hue jenda que aba chiicuate riqui nyii ra. Hue jenda que mbia ataque mbiĩrĩ i rĩ jate rei quia brujerĩa je nyii no nda. ²⁴ Hue jenda que Dios quiato iquia iquia bei quia ra. Dios cheẽ mbuchecuasa que eiquia iquia tuchi quia ra. Nyebe ra Dios mbae rasi raanguquia tuchi hue jenda je cote.

19

¹ Aquere que mbia cheẽ tubiriãte achandu ibate cuu ra. Ñeemombo mombo que ñee turã Dios je ra.
 Dios turã tuchite riqui mbia je co.

Dios ae riqui mbia rirō eicuã si co.

Dios ae chō equirācuã ndiqui nguiã co.

² Ae siqui sereäte quia Dios rese nae, ũquĩ nda Dios mbasi.

Mae tuchi ra erese embasi nonde.

Sã Dios mbae rasi saanguquia cuña icuã je namo no.

Aque que siqui siqui jate quia mbia rese ra. Mbia mbiicuã icuã ja.

Ae que Dios quiato iquia iquia quia no nda. Nyebe Dios embasi nguiã cote, i que ibatenda cheẽ tubiriäte cuu ra.

³ Aquere que ñee si ra. —Dios turã tuchi riqui mbia je co. Cuña icuã ndiqui oquiei beite hue, i que ñee nda. ⁴ Aquere que veinticuatro amei ñee turãte Dios je cote ra. Mbae reco cuatro rese. Ngoi que ngũĩã ndese Dios nonde ra. Dios chĩ mose ngoi umbae trono tose. Ñee turã ngue Dios je ra. —Amén. Dios turã tuchi riqui mbia je co, i que ñee turã Dios je ra. ⁵ Emo ñee ngue achandu ibate ra. —Ae Dios quiato jẽ nae, jeñee turã ja erĩĩ. Ae Dios cheẽ jemumba eäte quia jẽ nae, jeñee turã ja erĩĩ no. Ae ecuasua nae, ae eñetẽ nae, jeñee turã ja chō nguia erĩĩ, i que ibatenda mo ñee cuu ra.

Jesús quiato ra quiaru erese ibate

⁶ Mbae mo ndieu que achandu cote ra. Iācuã ndieu rã. Ama sieu rã. Mbia tubiriã ñee ño ndei ngue re. ã ño ngue mbia ñee nguiã:

Dios turã tuchi riqui mbia je co.

Equirācuã tuchite riqui co.

Ae riqui mbia rerecua tuchi co cote.

⁷ Nandechimbia tuchi quia erese jẽ.

Nandechẽ turã ño nguia erĩĩ jẽ.

Jesús ra uquiato isi bei cote.

Sã emo ndiqui ngũinisirã isi bei no.

Sã eninisi icoquiato ngurã ndaarō arō no.

⁸ Sã eninisi tirushĩ turã mingue eru eisi bei nonde no.

Eĩ si ra Jesús uquiato isi cote, eru ngũinisirã isi rã,

i que ibatenda ñee cuu ra. Tirushĩ turã ndei Jesús quiato reco turã na.

⁹ Angel que ñee seje cote ra. —Co embesa rã: “Jesús ngũinisirã isi raanguia chō nda esaã uquiato je ibate cote. Ae je ra ñee ‘jenyu serese quiaru’ i aque mose nae, Dios turã tuchi ra ũquĩ je”, ere embesa mi, i que ángel seje ra. —Dios cheẽ tuchi chō ũquĩ nde, i que ángel seje ra. ¹⁰ Senia ndese que acoi rei ángel ndésaa ra. Adorar i sacua ee. Angel que ñee ño seje ra. —Adorar erechĩ nda seje jẽ. Dios rimba chō se re. Nde rã sí. Ndequiato rã sí. Ae siqui tuchi quia Jesús rui nae, ũquĩ mo na ño se re. Dios mi je chō adorar ere. Ae Dios cheẽ senei senei nguia mbia je nae, Jesús mbuchecua sacua mbia je chō ũquĩ nde, i que ángel seje ra.

Ae siqui caballoshĩ átoo

¹¹ Ibei que obo seje cuu ra. Caballoshĩ mo ndese que amae huee ra. Emo ngue chĩ éátoo ra. “Ñee ñoñosa reã” i que aque je ra. Ererecua turãte que ae ra. Ae que guerra saã saã nguia mbae turã ndiquisã quisã nda. ¹² Tata rã tuchi que eresa ra. Corona tubiriäte que eãquĩ ndese ra. Embae nombre mbesa ji que chĩ ndei ra. Mbia mo ngue embae nombre icua eäte quia ra. ¹³ Eirao mondo ji eruqui ye que equereco ra. “Dios cheẽ” i que embae nombre ra. Jesús chō eriqui reaẽ. ¹⁴ Ejército ibatenda que nyoĩ jate erui ra. Eiraoshĩ turã achõte que nyoĩ erui ra. Caballo átoo que echoĩ quia erui ra. ¹⁵ Ae rui ejército nyoĩ nae, aque que tiquise mo nguereco uchúruu ra. Ae teã teã nguia Dios je nae, ũquĩ mbasi sacua ño tiquise rerequia nguiã uchúruu aque. Ae ra mbae rasi saanguquia tuchi Dios quiato eã je cote. Dios ra paama i tuchi mbia je aque mose. Mbia quia siqui sereäte nguiã Dios quirācuã ndese. ¹⁶ Ae chĩ caballo átoo nae, aque irao rese que embesa ji ñi nda. Eu rese abe que embesa ji ñi nda. ERERECUA TUCHI i que embesa ji huĩ nda.

¹⁷ Angel mo ngue chĩ juã tenda re cuu ra. Urubu je que eñi ñeemombo mombo ra. Ae mbebe ja quia. —Jenyu ja quiaru. Dios ra jembuquiaru ja tuchi cote. ¹⁸ Mbia chumumbara roo ra jẽu cote. Mbia rerecua roo. Soldados rerecua roo. Mbia quirãcuã ndoo. Caballo roo abe no. Caballo ato jenda roo abe no. Mbia cuasu roo abe no. Mbia riirĩ ndoo abe no. Ae ererecua riqui nae, ũquĩ ndoo abe no. Ae ererecua eã ndiqui nae, ũquĩ ndoo abe no. Ũquĩ ndoo ra jẽu ja cote, i que ángel urubu je ra. ¹⁹ Icuã ndese que amae cote ra. Mbia rerecua tubiriã ndese uquiato rese. Ejército tubiriãte que chi erese ra. Ũquĩ ñumunu a ño nguia eicuã icuã nonde Jesús je reaẽ. Ae siqui caballos hĩ átoo, aque je. Jesús rimba soldados je abe no. ²⁰ Jesús que icuã isi tarõ nda. Dios cheẽ nenei ñooñosa abe no. Aque chõ mbia mae sayã saã saã ño nguia icuã ndeco mose nyii reaẽ. Aque chõ mbia mbiĩrĩ irĩ nguia reaẽ. Ae mbia marca quereco quia icuã mbae nae, ũquĩ mbiĩrĩ irĩ ño equia reaẽ. Ae adorar i quia icuã naanguia mbae ao ji je nae, ũquĩ mbiĩrĩ irĩ ño equia reaẽ. Nyebe Jesús icuã mombo nguia tata cuásuu cote. Dios cheẽ nenei ñooñosa rese. Azufre rese eriqui sendi hue. ²¹ Jesús que icuã nimba iquia ja cote ra. Ae equereco quia tiquise uchúruu nae, aque je que eiquia ja cuu ra. Urubu ja que eroo u tuchi quia ra.

20

Dios ra Satanás tarõ mi mil años

¹ Aquere que amae ángel mo ndese cuu ra. Nguichi que u quia ibate si ra. Cadena cuasu que equereco ra. Llave abe que equereco ibicua mbuquiata sacua nda. Abismo i equia hue ibicua je. ² Angel que dragón isi nyucua ra. Satanás, i que equia dragón je ra. Mbei ima, i abe que equia ee ra. Diablo, i abe que equia ee no nda. Aque que ángel nyucua mil años cuu ra. ³ Angel que dragón mombo ibicua ye ra. Tarõ ngue llave je huee ibicua ye ra. Eiquesa que ematã nda. I nda dragón mbia mangue chooñoa jend a mbiĩrĩ irĩ si eã. Mil años ua mose, ángel nda embui mbiĩrĩ na mondo.

⁴ Jesús quiato iquia ji rese que amae nda. Ae ãquĩ mbia nyisia sia quia Jesús riĩ. Mbia rerecuarã tuchi que ũquĩ cuu ra. Siqui eãte quiatu ngue icuã ndese re. Icuã naanguia mbae ao ji je abe que eriqui adorar i ãte ra. Icuã mbae marca abe que equerecoãte quia nguba rese no nda. O abe rese. Ũquĩ ndaque que quera si cuu ra. Cristo que emii ererecuarã mil años nda. ⁵ Ũquĩ ndei mbia quera je rane ũquĩ. Mbia raaque ataque que quera eã aque mose ra. —Mil años ua mose ra Dios mbia ataque mbuquera cote, i que seje cuu ra. ⁶ Ae rane nda Dios mbuquera nyii nae, ũquĩ ia tuchi rae. Dios quiato tuchi chõ ũquĩ nde. Ũquĩ nda nyoĩ eã mbei tata cuasu. Siqui bei ra Dios rese. Cristo abe rese. Ererecuarã mbei ra eriqui Cristo rese mil años.

⁷ Mil años ua mose, Dios ra Satanás mbui sí mondo ibicua si. ⁸ Satanás nda mbia mangue chooñoa jenda mbiĩrĩ irĩ ja quia cote. Gog abe mbiĩrĩ irĩ. Magog abe mbiĩrĩ irĩ no. Dios quiatoã ja mbiĩrĩ irĩ. Etubiriã tuchite ũquĩ. Satanás nda ũquĩ munua nua ja quia. Guerra raã naa sacua Dios je. ⁹ Mbia tubiriã tuchi ra Satanás munua nua nguia ibi jenda ja cote. Ũquĩ nda Jesús quiato mama tuchi cote. Jerusalén ab e mama tuchi rae. (Dios nduasa tuchi chõ Jerusalén nde.) Dios ra tata mbu ibei si cote. Tata ra ũquĩ sei ja cote. ¹⁰ Diablo quiatu nda mbia mbiĩrĩ irĩte nguia. Nyebe ra Dios emombo tata cuásuu cote. Ae eriqui icuã mombo. Ae eriqui icuã naanguia mbae ao ji abe mombo. Ũquĩ nda siqui bei huee tata cuásuu. Tata sendi quia azufre mumbara. Mbae rasi ra esaã saã mbei huee. Nyaashĩ mose. Isa abe chee. Usẽ eã mbei ra hue si.

Dios mbia uquiatoã mbasi mose

¹¹ Mbae mo ndese abe que amae cuu ra. Dios que chĩ ngoi trono tose ra. Trono cuasu tuchi que ra. Eshĩ ngue ra. Mbae que uchã ja Dios si aque mose ra. Ibi jenda. Ibei jenda abe no. —Tachimi Dios si, i rei que mbae ja ra. ¹² Amae ngue mbia raaque rese ra, ae mano ndei quia nyii. Mbia cuasu rese. Mbia riirĩ abe rese. Chi ja que júã Dios resa rae cuu ra. Emo ngue libros ata equia ra. Libro nongue abe que eequia ra. Ae mbia ra siqui bei

nae, ũquĩ mbae nombres que chí aque libro rese ra. Ae mba saã saã nguia mbae nyii nae, ũquĩ mbesa mbesa ji qu e chí ũquĩ libros rese ra. Dios que mba chisaã mbuchechea checha cote ra. Embasi sacua. ¹³ Ae mba mano ama ñi nae, ũquĩ ja que chí ra. Ae mba mano íbii no nae, ũquĩ abe que chí ja no nda. Ae mano mano mangu e choñoa jenda nae, ũquĩ abe que chí ja no nda. Dios que ũquĩ nyisaã mbuchechea checha ja cuu ra. Embasi sacua. ¹⁴ Aquere ra mba mano eã mbei cote. Dios quiatoã nda siqui bei tata cuásuu no. ¹⁵ Ae embae nombre mbesa iriãte aque libro rese nae, ũquĩ ngue Dios mombo ja tata cuásuu seje cuu ra.

21

Dios ibi mbiasu, ibei abe

¹ Aquere que amae mbae yasu rese cuu ra. Ibei yasu rese. Ibi abe yasu rese. Ibei ñiinda quiachã ño nguia reaẽ. Ibi ñiinda abe no. Ama ndisha mo eãte que cote ra. ² Se rei Juan. Mbae que nguichi u quia ibate si seje cuu ra. Jerusalén yasu chõ nguichi u quia seje cuu reaẽ. Dios recua. Mbae mbuturã ji jate que ra. Sã emo ninisirã quiche riqu i ngurã je no. ³ Ibatenda mo ngue ñee cuu ra: —Sã jẽ. Sã Dios riqui mba mumbara co cote jẽ. Siqui bei ra equia erese. Mba rerecua turãte ra eriqui ee. Erimbarã tuchi ra mba cote. ⁴ Dios ra mba mba tuchi cote. Mba mo nda manoã tuchi cote. Emo ndasíã nda cote. Emo nda nyeseo eã cote. Emo ia eã eã nda cote. Cose ndare rã eã nda mbae cote, i que ibatenda ñee cuu ra.

⁵ Dios que ñee cote ra: —Sã jẽ. Sã aico mbae mbiasu jate co jẽ, i que ra. —Ã secheẽ embesa ja rã. Ae riĩ aico ñee nae, ũquĩ nda asaã ja, i que ñee seje ra. ⁶ Ñeembe que seje ra: —Equiche que eno. Co aico beite querabe co. Mbae eã mose abe que aico se rane nyii ra. Mbae ua ja mose abe ra aico bei querabe no. Emo isei mose, i turã nda amondo ee. I mba mingo beisa ra amondo ee. “Mbae embu i ribishorõ”, ae eã nda ee. ⁷ Ae “qui jẽ” i quia Satanás je nae, ũquĩ je ra mbae turã ja amondo. ũquĩ nderecua tuchi ra se. Seririĩ tuchi ra ũquĩ. ⁸ ã ja ra nyoĩ tata cuásuu: Esiquiche. Jesús icuasa reã. Mba nyaba chaba reã. Mba iquiasa. Ae siqui choñoote quia emo ninisi rese. Ae brujería saã saã nguia. Ae siqui quia Dios abareã ndese. Ae ñee ñooño nguia. ũquĩ ja ra nyoĩ tata cuásuu. Huee ra tata rasi raã mbei. Asufre mumbara, i que ra.

Jerusalén yasu

⁹ Ae siete ángeles mbae rasi quereco mbae riru ye nae, ũquĩ mo ndese que amae cuu ra. Ñee ngue seje ra: —Quiatuchu. Mbae tateacuquia ndeje. Jesucristo ninisirã tateacuquia ndeje, i que seje cuu ra. ¹⁰ Aque ángel que sererao ibi íbátee mo cuu ra. Huee que mbae nguichi u quia ibate si seje cuu ra. Jerusalén yasu chõ nguichi u quia seje cuu reaẽ. Dios recua. Sucha cuasu. ¹¹ Jerusalén yasu nininyate que ra. Dios nininya rã si. Sita rendi rã ño ngue eturã nda. Eibera turã ño ngue ra. ¹² Etaronda que sucha cuasu mama ja huĩ nda. Muralla, i que etaronda je ra. Eicoi tuchi que ra. Ibate tuchi que ra. Doce que eiquesa ra. Angel miĩ ngue chí eiquesa raarõ ja ja ra. Embesa mbesa ji ja que eiquesa ra. Doce tribus mbae nombre que chí jaaja eiquesa rese ra. ¹³ Eiquesa tres que chí tenda chuisa quti ra. Tenda sosa quti tres no. Norte quti tres no. Sur quti tres no. ¹⁴ Doce sita cuasu que chí muralla qui ñi nda. Etaronda irã. Doce apóstoles mbae nombres mbesa ji que chí ũquĩ sita rese ra.

¹⁵ Angel que uu mo nguereco oro ao ji ra. Dios recua mbuchechea sacua. Eiquesa abe mbuchechea sacua no. Etaronda abe mbuchechea sacua no. ¹⁶ Angel que Dios recua mbuchechea uu je ra. Cuadrado tuchi que Dios recua ra. Eoco que 2,200 kilómetros ra. Eicoi que 2,200 kilómetros no nda. Ibate quitinda abe que 2,200 kilómetros no nda. ¹⁷ Angel que muralla abe mbuchechea ra. Sesenta y cuatro metros que eicoi ra. Sã mba riqui mbae mo mbuchechea no. Eĩ sí que ángel muralla mbuchechea no nda. ¹⁸ Oro ao ji rei sucha cuasu. Eibera tuchi que ra. Muralla rei sita ao ji. Jaspe ao ji. Aba queteamba tuchi rei jaspe. ¹⁹ Sita cuasu chí quia muralla irã nae, ũquĩ arõ ngue sita ñetẽ nininya chí chí ja

ra. Embarõsa chõ ngue ùquĩ nde. Jaspe mbitee ji rane ngue ra. Zafiro mbitee ji que chĩ jaspe arõ cote ra. Agata mbitee ji que chĩ cote ra. Esmeralda abe no. ²⁰ Onice. Cornalina. Cristólito. Berilo. Topacio. Crisoprasa. Jacinto. Amatista. Ûquĩ ja sita ñetē nininya que chi ja ja sita cuasu arõ nda. ²¹ Eiquesa riquisã jate que perla ao ji chi ra. Perla miĩ miĩ ja que chĩ eiquesa riquisã nda. Oro ao ji que calle mbite renda ra. Oro ao ji achõ ngue ra.

²² Dios chuchua templo mo eãte que huee ra. Mbia quiatu que ñee mbei quia Dios je mangue chooñoa nda. Jesucristo abe je. ²³ Tenda eãte abe que eriqui Dios récuua seje cuu ra. Nyasi eãte abe que seje cuu ra. Dios nininya ae chõ ngue mbae tesae ja quia ra. Jesucristo nininya abe no. ²⁴ Dios nininya ra uquiato tesae ja ino huee. Mangue chooñoa jenda ja. Mbia rerecua ra ñee turã turã ja Dios recua riĩ cote. ²⁵ Dios recua chiquesa tarõ iriã mbei rae. Itondaru eã mbei ra huee. ²⁶ Mbia mangue chooñoa jenda ja ra ñee turã turã Dios recua riĩ. Mbae turã ja ra chi huee. ²⁷ Mbia icuã nda iqueã mbei huee. Mbia mbiirĩ irĩsa abe ra ique eã mbei huee no. Ae embae nombre mbesa ji Jesucristo mba e libro rese nae, ùquĩ achõ ño nda ique Dios récuua.

22

¹ Angel que ama mo abe teacuquia seje cuu no nda. Mbia mingo beisa que aque ama nda. Ama ndiibera tuchi que ra. Dios mbae que aque ama nda. Jesucristo mbae abe no. Sucha tubiriã ite riĩ ngue iãcuã irãtã mo ñi nda. ² Ama nimia nguiti ja que ira ñi nda. Mbia mingo beisa que ùquĩ ira ra. Ûquĩ ngue ia beite quia doce veces en el año nda. Nyasi mbuchechea quiatu bei que eriqui ia ia bei ra. Ûquĩ iraro que mbia chumumbara mbucherõ cherõ tuchi quia ra. ³ Mbia rasi eã mbei ra huee cote. Dios ra siqui tuchi huee. Jesucristo rese. Cordero, i equia ee. Erimba ra ñee turã mbei quia ee huee. ⁴ Mae mae ja ra Dios ruba rese. Dios mbae nombre mbesa ji ra equereco nguba rese ja ja. ⁵ Itondaru eã mbei ra huee. Tenda aroneate huee. Tata abe aroneate huee no. Dios nininya ae chõ nda mbae tesae ja huĩ nguiã huee. Ererecua turã tuchi ra Dios quiato ja huee.

Achite Jesús ñi tu a cote

⁶ Angel que ñee seje ra: —Acheẽ ñooño eã ño nguiã co. Ae riĩ aico ñee nae, ùquĩ nda Dios saã ja. Sã Dios ucheẽ mbuchecuaa mondo mbia je cose no. Eĩ si que sembu namo no nda. Ae ra nyecua namo jiri nae, ùquĩ ndeacuquia sacua mbia je chõ ngue sembu nguiã. ⁷ “Se ra achu jei”, i que Jesús ra, i que ángel ñee seje ra. Ae ra ã mumba eã Dios cheẽ mbesa ji nae, ùquĩ ia tuchi rae.

⁸ Se rei Juan. ã ndese que amae nda. ã ngue achandu no nda. Aque ángel ã teacuquia quia seje nae, aque jii que acoi rei senia ndese ra. Adorar i sacua ee. ⁹ Ñee ngue seje ra. —¡Adorar erechĩ nda seje jẽ! Dios miĩ je chõ adorar ere. Dios rimba chõ se re. Nde rã sí. Ndequiato rã sí. Ae Dios cheẽ mbuchecua checua quia nae, ùquĩ na si. Ae ã mbesa ji mumba eãte quia nae, ùquĩ na sí, i que ángel ñee seje ra.

¹⁰ Angel que ñee si seje no nda: —Ae erembesa co libro nae, ùquĩ nda erembuchecua yã cuayãchĩ mbia si jẽ. Eteaquiato ee. Ae riĩ erembesa nae, achite eñi tu a cote. ¹¹ Sã mbia icuã mbae icuã naa naa ño na. Ae siqui quia mbae rondei rese nae, sã eriqui rã erese. Ae siqui quia mbae turã ndese nae, siqui i i tuchi ra mbae turã ndese. Ae siqui Dios rese nae, siqui i i tuchi ra erese cote, i que ángel seje ra.

¹² Jesús que ñee nda: —Achu jei ra se. Ae mbae turã saã saã nguia nae, ùquĩ je ra mbae turã aru. Echisaã na sí. ¹³ Co aico beite querabe co. Mbae eã mose que aico se rane nyii ra. Mbae ua ja mose abe ra aico bei querabe no, i que Jesús ra.

¹⁴ Ae echiã irei ji Jesús ruqui je nae, ùquĩ ia bei ra eriqui. Eirao ituquia jí na ndei echiã irei jí. Ûquĩ nda ique Dios récuua. Siqui turã mbei ra equia huee. ¹⁵ Dios quiatoã nda iqueã huee Dios récuua. Ae brujería saã saã nguia nae. Ae siqui chooñote quia cuña mo

ndese nae. Ae mbia iquia nae. Ae siqui quia dios mbuae rese nae. Idolo rese nae. Ae mbia mbiirĩ irĩ nguia nae. Ûquĩ mo nda iqueã tuchi Dios récuua.

¹⁶ Jesús que ñee nda: —Angel serimba que amondo ra. Ñ nenei nenei sacua iglesias ja je. David i chõ se re. David nducucha chõ se no nde. Nyasitata nininya rã ño se re, i que Jesús ra.

¹⁷ Espíritu Turã ndiqui “quiatuchu” i co. Jesús ninisirã abe riqui “quiatuchu” i co no. Sã secheẽ andusa abe “quiatuchu” i. Emo isei mose, sã ecuaẽ i mbei Jesús mbae. I mbia mingo beisa ra Jesús mondo ee. Embei mose, siqui bei rae. —Mbae embu i ribishorõ seje, i eã nda Jesús ee.

¹⁸ Ae ã ñandu quia Dios cheẽ co libro resenda nae, ùquĩ je tacheẽ tuchi: Emo co libro resenda mbirõ mose emo ñee je, Dio s ra ùquĩ mbasi tuchi. Ae mbae rasi chi ja co libro rese a nae, ùquĩ nda esaã ja tuchi. ¹⁹ “Dios cheẽ eã ño co re”, i mose co libro resenda je, ùquĩ abe ra Dios mbasi tuchi. Ûquĩ nda Dios mingo bei eã nguécuaa.

²⁰ Jesucristo cheẽ ño ã nde: —Achu jei ra se, i equia co. Amén. Echu cote, Jesucristo.

²¹ Jesucristo rei nandererecua. Sã uturã mondo tuchi jêje. Amén.